



THE  
PHILOSOPHICAL LIBRARY

OF

PROFESSOR GEORGE S. MORRIS,

PROFESSOR IN THE UNIVERSITY,

1870-1880.

Presented to the University of Michigan.



Microfilm Library.

P  
272.  
75  
174-C



Postquam adolescens praestans in  
line nobilitate, et ingenio multisque  
laudibus florens,  
Balthasar Constantinus a Lynden,  
oratione declaravit, litteras aequi  
arma Rem publicam muncare,  
hoc diligentiae et ingenii praemi-  
um ei decernere,  
Viri Illustres,  
Scholae Vadenfis Curatores.

Vassae. Cal. Sextil.  
MDCCLXXXVI.

C. F. Hackenbusch  
rector.

XXXXXX











PHILOSOPHIA  
RATIONALIS  
SIVE  
**LOGICA,**

METHODO SCIENTIFICA  
PERTRACTATA  
ET  
**AD USUM SCIENTIARUM  
ATQUE VITÆ**  
APTATA.  
PRÆMITTITUR DISCURSUS PRÆLIMINARIS  
**DE PHILOSOPHIA**  
IN GENERE.

---

EDITIO TERTIA EMENDATIO.  
CUM PRIVILEGIIS.

---

AUTORE  
**CHRISTIANO WOLFIO,**  
ACADEMIÆ MARBURGENSIS P. T. PRO-RECTORE.

---

FRANCOFURTI & LIPSIAE, MDCCXXX.  
**PROSTAT IN OFFICINA LIBRARIA RENGIERIANA.**



SERENISSIMO POTENTISSIMOQUE  
PRINCIPI AC DOMINO

DOMINO

CAROLO I.

HASSIÆ LANDGRAVIO; PRINCIPI  
HERSFELDIÆ, COMITI CATTIMELIBOCI,  
DECIÆ, ZIEGENHAINÆ, NIDDIÆ,  
SCHAUMBURGI

&c. &c. &c.

PRINCIPI AC DOMINO MEO  
LONGE CLEMENTISSIMO.

SERENISSIME AC  
POTENTISSIME  
PRINCEPS,  
DOMINE CLEMENTISSIME.



**A**Rduum aggredior opus  
atque periculosum, dum philo-  
sophiam universam & certam,  
& utilem reddere studeo: plu-  
rimorum enim, qui cathedras  
occuparunt, interest, ne so-  
lida & perfecta doctrina invalescat, qua Eccle-  
siæ ac Reipublicæ nostro præsertim ævo maxi-  
me opus. Etsi enim cum a veteribus multa be-  
ne ac recte tradita, tum superiori & præsentem  
seculo

## D E D I C A T I O .

seculo in omni scientiarum genere multa præclara detecta fuerint ; libertas tamen philosophandi superficialiam quandam philosophiam in scholas introduxit, quæ desidi placet juventuti, sed in spem futuræ oblivionis addiscitur. Non adeo impune turbare licet scholarum quietem & docentibus lucrosam, & discentibus jucundam. Te igitur, PRINCEPS POTENTISSIME, divina providentia mihi Protectorem datum veneror, cujus munificentia prorsus singulari adjutus & præsidio firmissimo tectus perficere valeo, quæ ne molirer nefandis consiliis impedire ausi sunt a vera & erudita studiorum ratione juventutem revocantes. Tu, PRINCEPS SAPIENTISSIME, quemadmodum ætate, ita scientia, sapientia & prudentia inter omnes Europæ universæ Principes emines, ut non felicior sit philosophus, quam qui SERENITATIS TUÆ clementia perfruitur. Ultra annos quinquaginta Principatum tenuisti, ut rarissimo exemplo festa secularia regiminis celebrare datum fuerit. In bello Te fortem, constantem ac circumspectum; in regimine pruden-

## DEDICATIO.

dentem, clementem ac mansuetum probasti. In omni scientiarum, mathematicarum præsertim ac physicarum, nec non artium egregiarum genere ad istud fastigium ascendisti, quo Te inventorem admirantur, quotquot eas intimius pernoscent. Tu igitur, PRINCEPS CIRCUMSPECTISSIME, in discernenda doctrina solida ac Reip. utilia ventosa & sterili non alienis oculis, sed propriis videns acuminis suspiciendi specimina edis. Qui artibus atque scientiis excolendis non invita Minerva se totos consecrant, eorum conatus munificentia Tua atque exemplo juvas. TUÆ SERENITATI ego quoque acceptum fero, quod in cathedra constitutus excelsis ingeniis ex remotissimis regionibus Marburgum advolantibus doctrinam solidam proponere valeam & in condendis operibus philosophicis, quorum ideam animo conceperam, otio tranquillo fruar. Quicquid igitur utilitatis in Remp. quicquid felicitatis in genus humanum olim inde redundabit, id Tibi, PRINCEPS CLEMENTISSIME, grata tribuet posteritas. Quamobrem cum illorum operum nunc primum in publicum proferam volu-

men,

## DEDICATIO.

men, SERENITATIS TUÆ in me clementia atque munificentia publicis præconiis extollenda fuit, ut omnes ac singuli, quotquot existis se profecisse scient, intelligant, se gratam mentem in TUAM gloriam resolvere debere. SERENISSIMO itaque NOMINI TUO hoc opus consecro & ad pedes Tuos devotissima mente depono. Et si enim non defuturo existimem, qui cum abjecte per præcipitantiæ de omni Logica sentiant, propterea quod quæ vulgo docetur docentibus fere solis, discuntibus parum aut nihil prodest, me nescio cujus temeritatis ac inconsiderantiæ rerum postulabunt, quod illud in conspectum TANTI PRINCIPIS inopportune proferre non verear; Tuum tamen, PRINCEPS CONSIDERATISSIME, iudicium ab eo infinitis intervallis distare firmissime persuasus sum, qui accurata Mathematicum ac rerum naturalium tractatione didicisti, quænam sit verior Logica, & in bello ac Principatu præclara molitus abunde intellexisti, quantum conducatur in deliberando ac decernendo cogitationes suas certa lege promovere. Quemadmodum ergo LUDOVICUS M. ab *Ehrenfrido Wal-*

## DEDICATIO.

*Waltbero de Tschirnhausen*, viro de scientiis præclare merito, opus simile sub Medicinæ Mentis titulo Majestati suæ oblatum non dedignatus est, quem veritatis scrutatores per universam Europam munificentia vere regia ad studia incendisse fera narrabit posteritas; ita nec TUÆ SERENITATI displicebit opus, quo sincerus facultatum mentis usus in omni veritatis cognitione & cognitæ applicatione distincte explicatur. Servet TE PATREM PATRIÆ INDULGENTISSIMUM Numen ter Optimum Maximum, ut sub Tuo præsidio plurimorum annorum opus feliciter absolvam, ac per longam annorum seriem gloria tantis, quibus inter Principes emines, virtutibus parta abundantissime frui permittat!

## SERENITATIS TUÆ

Marburgi Cattorum  
d. 27. Martii  
A. 1728.

*humillimus ac devotissimus  
servus,*  
CHRISTIANUS WOLFIUS.





## PRÆFATIO.

**D**uo imprimis sunt, quæ in omni  
philosophia hætenus desiderantur.  
Deest illa evidentia, quæ sola assensum  
gignit certum atque immotum, nec,  
quæ in ea traduntur, usui vitæ respondent. Utriusque  
eadem est ratio: exulant notiones ac propositiones  
determinatæ, sine quibus tamen, quæ afferuntur, nec  
satis intelligi, nec sufficienter probari, nec ad calus  
vitæ obvios dextre applicari possunt. Quam-  
obrem philosophiam generi humano utilem ef-  
fecturus id mihi agendum esse duxi, ut nihil admis-  
surus

b

furus nisi quod satis fuerit explicatum ac sufficienter probatum, & voces a notionibus confusis ad distinctas ac significatu vago ad fixum reducerem, & propositiones determinatas, quas hactenus nullas noverunt philosophantes, conderem, Hac ratione mihi non solum verum a falso, cui vulgo permixtum est, secernere ac veritates inter se connexas in systema harmonicum redigere licuit; verum etiam inventoribus, quod optaverat *Campanella*, tandem in scholas aditus apertus est, quamvis in iisdem nugaciter philosophantes nondum mutaverint mores, quos suo ævo reprehendit philosophus perspicax atque sublimis. (\*) Nemo hic a me expectet, ut juratorum quorun-

(\*) Ita nimirum in literis *ad Gassendum*, quæ leguntur Operum *Gassendi* Tom. VI. f. 407. *Doleo seculi vices, quod cum felicissimum sit inventione novarum rerum, in scholas tamen inventores introire non sinit: occuparunt enim illarum cathedras olim, qui nugaciter philosophati sunt, non duce natura, sed proprio arbitratu cuncta metientes, tantisque præstigiis animos hominum occupaverunt*

rundam doctrinæ solidæ ac virtutis infucatæ hōstium vel artes nefandas delineam, quibus propositum meum etiamnum intervertere nituntur, vel in sensu verborum meorum pervertendo & in sententiis impiis obtrudendis studium describam, a quo se minime revocari patiuntur meliora dudum edocti. Quemadmodum enim mens recti conscia mendacia famæ ridet; ita dudum agnoverunt viri intelligentes & cordati, „dogmata mea defensio,, ne non indigere, sed sola attentione & capacitate,,

b 2

legen-

*runt eaque obnubilaverunt caligine, ut in somnum adeo profundum suavemque obtusis mentibus ita adegerint, ut, quicumque vel veritatis voce, vel face tedisque diei perlucidis intrare velit ad istas, statim ira indignationeque perciti contra dulcis somni impedimenta consurgant armati, explosaque luce iterum ad infamem quietem revertantur. Quapropter vagemur extra oportet, donec Deus systema nostrum purget tenebris, habitandumque suis reddat affectis. --- Sic enim fiet, ut res literaria tandem ita refulgeat, quod vel clausos sponte oculos recludat, ac pastores hominum ad meliora pascua ducere divinum gregem armentumque compellant.*

# P R A E F A T I O.

„legendis: Antagonistas, licet auxiliaribus copiis  
 „suffultos non staturos in acie: me tacente loqui  
 „scripta mea.” Hæc igitur omnibus offero, qui  
 de dogmatis meis & eadem tradendi, qua utor,  
 ratione certa tenere gestiunt: neque ullus dubito  
 fore, ut sine ulla difficultate agnoscant, quod nu-  
 perrime in privatis ad me literis confessus est præ-  
 clarus quidam philosophus, „ita inique mecum  
 „agere adversarios, ut vix crederet quisquam, nî  
 „ex collatione utrorumque operum de iniquitate  
 „constaret: oportere Germanos nullo negotio  
 „occæcari, si apud eos pondus aliquod habeat  
 „adversariorum meorum fides.” Atat! salva res  
 est: non adeo hebetis ingenii sunt Germani  
 omnes, ut non videant, quid distent æra lupinis,  
 nec a bonis moribus adeo remoti, ut doctrinam  
 solidam & generi humano utilem opprimere co-  
 nentur. Quæ Germanico idiomate de philoso-  
 phia commentatus sum, non sine applausu excepta  
 sunt, ita ut intra paucorum annorum numerum  
 iteratis aliquoties editionibus fuerit opus. Logicæ  
 sæpe Germanicæ solius ultra exemplaria octo mil-  
 lia

lia (\*\*\*) partim in eruditorum, partim in juventutis studiosæ manibus versantur. Melioribus suffragiis dudum vici & lætus prospicio fructus, quos feret doctrina solida cum in Ecclesia, tum in Rep. ac orbe in primis literato. Agnosco enim cum *Melanchtone*, quantum opus sit Reip. perfectæ doctrina, & quod ea exulante „tum inopia iudicii, tum quia diserte expli-„  
*care nihil valent*, spargantur ac defendantur opinio-„  
 nes absurdæ & confusæ, ex quibus magna certa-„  
 mina, magnæ dissensiones oriuntur, quodque isto-„  
 rum malorum nullus futurus sit finis, nisi ad veram „  
 & solidam studiorum rationem juvenus revocata „  
 fuerit. „ (\*\*\*) Longum ingressus sum iter, dum singulas philosophiæ partes, quarum in discursu præliminari mentionem feci, eadem methodo illustrare constitui, qua nunc Logicam, tanquam operum philosophicorum volumen primum in publicam lucem profero. Quamobrem cum desi-

(\*\*) nunc longe plura, ex quo altera hujus operis editio prodit.

(\*\*\*) in præfat. ad *Ioannis Vogelini* elementa Geometriæ.

# P R Æ F A T I O.

derio cupidæ veritatis juventuti nequidem satis facere ex asse possim; ubi sex minimum per diem horas in Mathesi atque philosophia cum eadem sum, quin plura adhuc a me doceri exoptent; in providentiam divinam ac genus humanum injurius forem, si, quod a laboribus istis superest, tempus vanis altercationibus consumerem. Quotquot igitur animum habetis a veritate alienum, vel mihi infestum, in me traducendo, convitiando, calumniando itrenue pergite! Ego divina providentia confusus in incepto pergam & ex convitiis atque calumniis vestris proficere studebo, olim operibus meis elogiorum loco præfigendis, ut inde quoque proficere possint feri nepotes. Quæ de instituto meo in eorum potissimum gratiam præfari debebam, qui idem ex operibus Germanicis minime cognoverunt; ex discursu præliminari peti possunt, in quo etsi docere videar, id tamen ago, ut propositum meum exponam atque ejus rationem reddam. Propositiones singulas alio characterè imprimi curavi, quam quæ ad eas proban-

# PRÆFATIO.

bandas in medium afferuntur; alio itidem, quæ illustrationis gratia adjecta sunt, tum ut lectio totius operis facilius evadat, tum ut absque labore constet, quænam in futurum usum memoriæ demandanda sint. Et, si quis in posterum fuerit adeo perfrictæ frontis, ut materiam convitiandi quæsiturus mihi imputare non erubescat, quæ sunt a mente mea aliena, is propositione mea evoluta in ruborem dabitur, nec alia opus erit adversus verborum detorsiones ac imputationes iniquas defensione. Logicæ theoriam, quam dedi, praxi Geometrarum rigorem demonstrandi servantium consentaneam deprehendi, & rationibus partim a natura mentis, partim a notione entis in genere hætenus non satis expensâ derivatis communivi, atque in discursu præliminari, cum de methodo philosophica agerem, abunde evici, nonnisi hac via ad certam rerum cognitionem perveniri posse. In praxi Logicæ amplificanda multus fui, ut theoriæ utilitatem inde perspiciant, qui ad hoc studium animum appellant, atque  
cam

P R Æ F A T I O.

eam ad usum transferre non negligent, qui non-  
nisi olim sibi profutura discere decreverunt. Qui  
hiscè perspicillis utentur, clarissime perspicient disci-  
plinas, quæ in scholis docentur, emendandas esse,  
ut fiant utiles, & me in iis emendandis vero tramite  
incedere. Conspectus operis docet, quanam in  
eodem contineantur, & lemmata singulis para-  
graphis adjecta eadem distinctius repræsentant.  
Non igitur opus est, ut de contentis hic differa-  
mus. Qui ea ratione, quam in fine operis præ-  
scripsimus, eidem intelligendo operam navaturi  
sunt; illi & felices atque veloces in omni scientia-  
rum genere progressus experientur, & usum Logi-  
cæ in omni vita sibi proficuum nunquam non de-  
prædicabunt. Dabam Marburgi Cattorum d. 31.  
Martii 1728.

DISCUR-





# DISCURSUS PRÆLIMINARIS DE PHILOSOPHIA IN GENERE.

## CAPUT I.

### DE TRIPLICI COGNITIONE HUMANA, HISTORICA, PHILOSOPHICA ET MATHEMATICA.



#### §. I.

*S*ensuum beneficio cognoscimus, quæ in mundo mate- Fundamen-  
riali sunt atque fiunt, & mens sibi conscia est mu- tum cognita-  
tationum, quæ in ipsa accidunt. Nemo hæc nis *historice.*  
ignorat: modo ad semetipsum attendat.

Sane sensu duce nobis innotuit, dari animalia, vegetabilia, mine-  
ralia; Solem oriri atque occidere; hominem inter bestias educatum  
rationis usu minime pollere; animam recordari præteritorum; nul-  
lam esse ignoti cupidinem.

#### §. 2.

Quousque sensus penetrare possit in cognitionem eo- Cur ejus hic  
rum, quæ sunt atque fiunt in mundo materiali, & utrum limites non  
anima sit omnium eorum, quæ in ipsa contingunt, sibi conscia, constituan-  
(*Wolffii Logica*) A nec tur.

nec ne, in præfenti non inquirimus. Alterius loci est hæc disquisitio. Nobis in præfenti fufficit, notitiam sensu & attentione ad nosmetipsos acquisitam non posse in dubium vocari. De ejus hic limitibus non laboramus: nulli enim in præfenti negotio sunt usui.

## §. 3.

*Cognitionis  
historica  
definitio.*

*Cognitio* eorum, quæ sunt atque fiunt, sive in mundo materiali, sive in substantiis immaterialibus accidant, *historica* a nobis appellatur.

E. gr. Historica ejus est cognitio, qui expertus novit, Solem mane oriri, vespere autem occidere; initio veris gemmas effrondescere arborum; animalia propagari per generationem; nos nil appetere nisi sub ratione boni.

## §. 4.

*Fundamen-  
tum cognitio-  
nis philoso-  
phica.*

*Ea, quæ sunt vel fiunt, sua non destituuntur ratione; unde intelligitur, cur sint, vel fiant.* Patet per exempla asserti veritas, modo sufficientem afferamus attentionem & subinde acumen requisitum.

E. gr. Non generatur iris, nisi Solis radii in guttulas aqueas certa lege oppositas illabantur. Non cadit pluvia, nisi cælum obducatur nubibus & is fuerit aeris status, qui pluviae gignendæ conducit. Mens non appetit objectum oblatum, nisi id judicaverit bonum. Eadem non appetit nisi bonum, propterea quod ex bono percipit voluptatem.

## §. 5.

*Cur cognitio-  
nis philoso-  
phica non  
constituan-  
tur limites.*

Non id explico hic loci distinctius, nec universalitatem asserti evinco. Alibi (§. 70. & seqq. *Ontol.*) in idem inquiremus sollicitius. Hic nobis fufficit, non affirmari, nisi quod experientiae consentaneum, nec afferri posse exempla in contrarium eorum, quæ omni prorsus ratione carent. Non nego, afferri posse exempla, ubi ratio latet: nego saltem talia proflare exempla, ubi evidenter monstrari possit, rationem nullam adesse. Neque etiam opus hic loci est, ut universalitas asserti evincatur. Sufficit, quod nemo non concedere debeat, dari casus longe plurimos, ubi evidens est asserti veritas. Non postulamus, ut ratio eorum, quæ sunt, vel fiunt, tanquam nobis perspecta admittatur, nisi

nisi ubi eam in medium protulerimus. Pro præsentē igitur scopo nobis perinde est, siue universalitas asserti agnoscatur, siue in dubium vocetur, aut prorsus rejiciatur. Nullos cognitionis rationum decernimus limites.

§. 6.

*Cognitio* rationis eorum, quæ sunt, vel fiunt, *philosophica* Definitio cognitionis philosophicæ. dicitur.

E. gr. Philosophicam habet motus aquarum in alveo fluminis cognitionem, qui intelligibili modo explicare valet, quomodo a declivitate fundi & a pressione aquæ superioris, quam inferior sustinet, pendeat. Nec minus philosophicam appetitus habet cognitionem, qui docere potest, qua ratione appetitus objecti oblatus ex ejus perceptione tandem fuerit enatus.

§. 7.

*Differt cognitio philosophica ab historica.* Hæc enim in nuda facti notitia subsistit (§. 3.): illa vero ulterius progressa rationem facti palam facit, ut intelligatur, cur istiusmodi fieri possit (§. 6.). Quis vero non videt magnam hic intercedere differentiam? Solius facti notitia & rationis illius facti cognitio nequaquam sunt una. Differentia cognitionis historica & philosophicæ.

E. gr. Aliud est nosse, aquam in alveo fluminis decurrere, aliud vero cognoscere, quod id fiat propter declivitatem fundi & pressionem, quam aqua inferior sustinet a superiori. In isto factum consistit; hoc ratio facti continetur.

§. 8.

*Qui novit, quam rationem facti alleget alter; is historicam habet cognitionem cognitionis philosophicæ alterius.* Qui enim novit, quam rationem facti alleget alter; is novit, quæ sit alteri cognitio philosophica in dato casu (§. 6.). Cognitio philosophica alterius est res facti. Cognoscit adeo factum alterius, consequenter cognitionis philosophicæ alterius historicam habet cognitionem (§. 3.). Historica cognitio philosophicæ.

E. gr. Si quis novit, juxta *Isaacum Newtonum* motus elliptici planetarum primariorum & cometarum circa Solem atque secundariorum circa suos primarios, veluti Satellitum Jovis circa Jovem, Satellitum

#### 4. Cap. I. De triplici cognitione humana,

Saturni circa Saturnum & Lunæ circa tellurem, causam esse vim impressam & vim gravitatis, qua illi versus centrum Solis, hi versus centrum sui primarii impelluntur; is cognitionem habet historicam cognitionis philosophicæ viri summi de motu planetarum & cometarum. Cognoscit enim factum aliquod, nimirum quid *Newtonus* sentiat de motus elliptici planetarum & cometarum causis physicis.

##### §. 9.

*Philosophica  
cognitio  
quando absit.*

*Si quis demonstrare non noverit, rationem facti ab altero allegatam esse ejus rationem, is cognitione philosophica ejusdem facti destituitur.* Novit is tantum, hanc facti rationem ab altero allegari: ipse autem ignorat, quod ea ejusdem facti ratio sit, atque ideo rationem ignorare dicendus est. Quis ergo dubitet, quod cognitione philosophica in hoc casu destituatur (§. 6.)?

Sit ita, quod norit aliquis, motus elliptici planetarum primariorum causam circa Solem, vel secundariorum circa suum primarium a *Newtono* allegari vim impressam & gravitatem primariorum in centrum Solis, secundariorum in suos primarios (not. §. 8.); nisi idem distincte explicare possit, quomodo ex vi impressa & gravitatione versus centrum ejus corporis, circa quod revolvitur, oriatur motus curvilineus & in specie ellipticus, ac præterea demonstrare valeat, planetas vi impressa moveri & vi gravitatis a motu rectilineo detorqueri, cognitio philosophica motuum celestium ei tribui nequit.

##### §. 10.

*Cognitio hi-  
storica philo-  
sophica fun-  
damentum.*

*Si per experientiam stabiliuntur ea, ex quibus aliorum, quæ sunt atque fiunt, vel fieri possunt, ratio reddi potest, cognitio historica philosophicæ fundamentum præbet.* Quæ per experientiam stabiliuntur, eorum nonnisi historica est cognitio (§. 3.). Quodsi ergo ex iis rationem reddis aliorum, quæ sunt atque fiunt, cognitionem philosophicam iisdem superstruis (§. 6.). Fundamentum itaque cognitionis philosophicæ est historica.

E. gr. Si quis experimentorum fide sumit, aëri competere gravitatem & elasticitatem, utur ignoret, quænam causa eum efficiat gravem atque elasticum, inde autem rationem reddit ascensus aquæ in antliis ac aquæ salientis in nonnullis fontibus artificialibus, veluti in fonte

*Hero-*

*Heronis*; is cognitionem gravitatis atque elasticitatis aëris nonnisi historicam habet, eidem vero philosophicam aquæ in antliis ascendentis & ex nonnullis fontibus artificialibus salientis superstruit.

§. 11.

Apparet adeo, *cognitionem historicam non esse negligendam* Cognitioni ei, qui ad philosophicam adspirat, sed eidem potius præmitti, immo *historicam cum ea constanter conjungi debere.* Quoniam enim cognitio historica philosophicæ fundamentum præbet (§. 10.), eadem vero non admittit tanquam possibilia, nisi quæ esse atque fieri constat (§. 3.); quæ cognitio philosophica historicæ superstruitur, ea firmo ac inconcusso nititur fundamento. Quis igitur negare aufit, ad cognitionem philosophicam adspirantem de hoc fundamento laborare debere? Præmittenda adeo est cognitioni philosophicæ historica atque cum ista constanter conjungenda, ne firmum desit fundamentum.

§. 12.

Eti in antecedentibus (not. §. 10.) tantummodo exempla *Cognitionis* dederimus physica, ea tamen de omni alio cognitionis genere *historica* valent, quæ modo (§. 11.) inculcavimus. In ipsis disciplinis abstractis, qualis est *philosophia prima*, notiones fundamentales derivandæ sunt ab experientia, quæ cognitionem historicam fundat (§. 3.) & *philosophia* quoque *moralis* atque *civilis* inde principia petit: immo ipsa *Mathesis* historicam quandam notitiam supponit, unde objecti sui notionem atque axiomata nonnulla derivat. De *Mathesi pura* sermo mihi est: de mixta enim idem patet evidentius. Quamvis itaque cognitionem historicam a philosophica cum cura distinguimus (§. 3. 6.), ne diversa inter se confundamus (§. 7.); non tamen ideo historicam vilipendimus, aut prorsus contemnimus (§. 11.), sed suum unicuique pretium decernimus. Immo nobis per omnem philosophiam sanctum est utriusque connubium. Neque solum cognitionis historiciæ *usur.* *nam* in philosophia asserimus; verum etiam ejusdem in vita *utilitatem* defendimus. Utrumque experimur: sed suo loco constabit quoque ratio, ubi de usu logicæ differemus.

## 6 Cap. I. De triplici cognitione humana,

§. 13.

*Fundamen-  
tum cognitio-  
nis mathe-  
maticæ.*

*Quicquid finitum est, sua determinata gaudet quantitate.* Patet per exempla asserti veritas, modo sufficientem afferamus attentionem. Nec obscura etiam ratio est. Quatenus aliquid finitum est, eatenus augeri potest atque minui. Quatenus vero aliquid augeri, vel minui potest, eatenus quantitas eidem tribui solet. Quamobrem determinata quantitas omni tribuenda est finito, quatenus tale est.

E. gr. Calor meridianus Solis non omni anni tempore eodem in loco idem, nec idem in locis diversæ latitudinis eodem tempore. A bruma usque ad solstitium æstivum sensim sensimque augetur; ab æstivo usque ad brumale eadem ratione minuitur. Quovis igitur anni die calori meridiano Solis determinatus competit gradus, qui calorem alterius diei quantitate in se assignabili (sit ita, quod a cognoscente graduum differentiam nonnisi confuse assignari nequeat) vel superat, vel ab eodem deficit. Aqua in alveo fluminis determinata celeritate decurrit, quæ minuitur in alveo artificiali minus declivi, per quem ad rotas molarum deducitur, augetur vero, dum per præcipitium in eadem ruit. Similiter planeta, qui circa Solem revolvitur, determinatam habet in quovis orbitæ puncto a Sole distantiam; vis impressa, qua per tangentem in isto puncto progredi nititur, est determinati gradus, seu determinatam admittit celeritatem, nec minus vis centripeta, qua a motu rectilineo detorquetur, determinatum habet gradum. In rebus immaterialibus eodem modo sese res habet. Attentio in diversis hominibus gradu differt. Major est attentio alterius, alterius vero minor. Alter attentionem conservare valet in longiori demonstratione concipiendæ & evolvendæ: alterius vero attentio nonnisi breviori expendendæ sufficit. Quis nescit, dari gradus virtutis atque vitiorum pro diversitate subjectorum varios?

§. 14.

*Cognitionis  
mathematicæ  
definitio.*

Cognitio quantitatis rerum est ea, quam *mathematicam* appellamus.

E. gr. Caloris meridiani Solis cognitionem mathematicam habet, qui quantitatem ejus cognoscit, rationem seu proportionem perspicuens, quam habet calor dati diei, v. gr. calor meridianus Solis æstivi ad calorem meridianum Solis in solstitio brumali, ut ipsi constet, quonuplus sit calor meridianus in solstitio æstivo ad calorem in solstitio

tio brumali. Similiter cognitionem motus fluvii in alveo habet mathematicam, qui novit, quomodo determinatus celeritatis gradus, quæ aqua per alveum decurrit, ex data fundi declivitate & altitudine aquæ intra alveum enascatur. Motus planetæ in orbita incedentis cognitionem mathematicam habet, qui distincte explicare valet, quomodo in dato orbitæ puncto, seu in distantia a Sole data, ex quantitate vis impressæ & centripetæ enascatur celeritas planetæ & quomodo ex actione duplicis istius vis in planetam prodeat figura orbitæ elliptica. Attentionis cognitionem mathematicam habet, qui rationem sive proportionem ejus, quam longior demonstratio requirit, ad eam, quæ breviori sufficit, perspectam habet.

§. 15.

*Qui novit quantitatem rei ab altero assignatam, is historicam habet cognitionem cognitionis mathematicæ alterius.* Qui enim novit, quam rei finitæ quantitatem assignet alter, is factum alterius cognoscit. Quamobrem cum facti cognitio historica sit (§. 3.), quantitatis autem cognitio mathematica (§. 14.); qui tantum novit quantitatem rei ab altero assignatam, is utique nonnisi historicam habet cognitionem mathematicæ alterius.

Cognitio historica cognitionis mathematicæ alterius.

E. gr. Newtonus demonstravit, quænam sit quantitatis vis centripetæ planetarum in ellipsi circa Solem revolorum, & quænam sit celeritas eorum in dato quolibet orbitæ puncto. Qui novit, quantam vim centripetam & celeritatem Planetæ in dato orbitæ puncto, seu data distantia a Sole determinet; is cognitionis Newtonianæ de motu planetarum mathematicæ historicam habet cognitionem.

§. 16.

*Si quis quantitatem rei ab altero assignatam demonstrare valet, is ejusdem cognitionem mathematicam perinde ac alter habet.* Qui enim quantitatem rei demonstrare valet, is cognoscit hanc esse ejus rei quantitatem, adeoque rei mathematicam habet cognitionem (§. 14.). Quamvis adeo alter eandem quantitatem prior assignavit, atque adeo rei cognitionem mathematicam ante habuit (§. cit.); hoc ipso tamen cognitio posterioris non mutatur. Ab eo, quod rei intrinsicum est, petitur differentia (§. 17.), non vero a principio extrinseco.

Cognitio mathematica cum altero communis.

E. gr.

## 8 Cap. I. De triplici cognitione humana,

E. gr. Si quis demonstrare potest, quantitatem vis centripetæ planetæ in ellipsi circa Solem revoluti ad datam a Sole distantiam ejusque in eadem celeritatem, sive demonstratio eadem sit cum *Newtoniana*, sive ab eadem diversa; is perinde ac *Newtonus* mathematicam habet motus planetarum elliptici cognitionem. In ipsa enim cognitione nihil mutatur, propterea quod *Newtonus* eandem cognitionem prior habuit.

### §. 17.

*Differentia  
cognitionis  
mathematicæ  
a philosophica  
& historica,*

*Differt autem utique cognitio mathematica cum ab historica, tum a philosophica.* Nam cognitio historica acquiescit in nuda notitia facti (§. 3.), in philosophica reddimus rationem eorum, quæ sunt vel esse possunt (§. 6.), in mathematica denique determinamus quantitates, quæ rebus insunt (§. 14.). Aliud vero est nosse factum, aliud perspicere rationem facti, aliud denique determinare quantitatem rerum.

Exempla differentiam palam loquuntur. Qui novit, Solis meridiani calorem nunc crescere, nunc iterum decrescere, is hujus cognitionem historicam habet. Qui novit, majorem caloris gradum pendere a majore densitate radiorum idem planum ferientium & ab istu minus obliquo, is cognitione philosophica pollet. Qui denique densitatem radiorum & ictus magnitudinem ac inde gradum caloris determinare valet, is cognitione mathematica instructus. Per se liquet, determinationem densitatis radiorum & magnitudinis ictus ac pendentis inde gradus caloris esse diversam a simplici notitia, quod calor Solis meridiani alio tempore major sit, alio minor. Nec minus patet, determinationem istam diversam esse a cognitione causæ majoris minorisve caloris. Idem ex ceteris, quæ in antecedentibus attulimus, exemplis apparet.

### §. 18.

*Ufus cognitionis historici-  
cæ & philosophicæ in mathematica.*

*Nonnunquam historica cognitio fundamentum præbet cognitioni mathematicæ; nonnunquam philosophica.* Res facti per exempla comprobatur, neque opus est, ut hic inquiramus, cur id fieri possit, & quando hoc obtineat, quando illud.

Sane *Optici* in *Catoptrica* cognitionem mathematicam visionis reflexæ, quæ sit speculorum ope, tradituri fundamenti loco tanquam axiomata substernunt propositiones de modo reflexionis & loco imaginis ab observationibus derivatas, nimirum quod angulus reflexionis sit angulus



angulo incidentiæ æqualis & quod locus imaginis sit in concursu radii reflexi & catheti incidentiæ. Parum autem solliciti sunt, cur angulus reflexionis sit angulo incidentiæ æqualis, & cur imago in puncto intersectionis catheti incidentiæ atque radii reflexi appareat. Astronomi motuum cælestium cognitionem mathematicam ex observationibus deducunt, insuper habitis eorundem causis physicis. *Galileus* motus gravium theoriâ mathematicam conditurus, non attenta causa ejus motus, in eo acquievit, quod causa gravitatis, qualiscunque tandem ea sit, in quavis a centro terræ distantia eodem modo in grave agat. Enimvero qui mathematicam variantis caloris Solis meridiani cognitionem stabilire in animum induxit, is ante ejus causas perspektas habere debet (not. §. 17.). In Elementis Aërometriæ docui, quomodo mathesis ad experimenta applicetur, nondum cognitis causis physicis, & quomodo effectus viribus causarum proportionati demonstrantur. Utriusque igitur casus exempla ibidem occurrunt.

§. 19.

*Veritatum mathematicarum datur etiam historica cognitio.* Historica cognitio veritatum mathematicarum. Etenim quæ per principia mathematica demonstrantur in Mathesi præsertim mixta, per experimenta quoque doceri possunt, quod ita sese habeant. Qui igitur theorematum mathematicarum veritatem experiundo addiscunt, illi historicam sibi comparant notitiam eorundem, eamque certam (§. 3.), et si demonstrationum ignari mathematica destituantur (§. 16.).

Respondent his experimentis in Mathesi pura exempla numerica, quibus theorematum illustrantur, & examina figurarum juxta hypothesein theorematum constructurum mechanica. Qui enim demonstrationibus neglectis in istis examinibus acquiescant, veritatum mathematicarum non nisi historicam cognitionem consequuntur.

§. 20.

*Facta nature subinde latent, ut non sua sponte sese offerant.* Fundamentum attendenti. Veritatem asserti non ignorant, qui in scientiis ita tum cognitio-arcane. fuere versati, ut non nisi in certa cognitione acquieturi ad modum attenderint, quo principia stabiliuntur.

E. gr. Lumen solare esse compositum ex radiis seu luminibus heterogeneis factum naturæ est. Sed hoc factum maxime latet. Neque sua sponte offertur lumen solare contemplanti, neque per experimentum in apricum productum absque hæsitante agnoscitur. Sane ex

(Wolffii Logica)

B

circum-

circumstantiis experimenti, quo visui perceptibile sistitur, demonstrandum est, lumen Solis esse compositum. Peculiaribus demonstrationibus evincendum est, lumina ista, ex quibus componitur, esse non minus simplicia, quam heterogenea: ubi pluribus opus est experimentis &, ut ex iis evidenter inferri possit, quod probari debet, notitiis aliis cum mathematicis, tum historicis, tum philosophicis. Patent hæc ex Optica *Newtoni*, qui factum istud naturæ absconditum nobis revelavit. Eadem patent per omnem philosophiam experimentalem: & Astronomia nobis quoque in hoc argumento lumen affundit. Suo non minus tempore constabit, occurrere etiam exempla in Psychologia & philosophia morali.

## §. 21.

*Divisio cognitionis historica in communem & arcanam.*

Facta igitur naturæ alia cum lateant (§. 20.), alia verò pateant (§. 1.), ita ut hæc sola attentione agnoscantur, etsi subinde acumine quodam opus sit; illa vero singularibus artificiiis in apicum producenda & in apicum producta non agnoscantur, nisi sensui ratio suppetias ferat; cognitionem historicam distinguimus in communem & arcanam. *Cognitio historica communis* est cognitio factorum naturæ, etiam rationalis, quæ patent: *Cognitio autem historica arcana* est cognitio factorum naturæ, etiam rationalis, quæ latent.

Addo vocem *rationalis*, ut intelligatur, ad facta naturæ hic quoque referri ea, quæ in substantiis immaterialibus finitis, veluti mentibus nostris, accidunt, & cognitionis historice non minus objectum sunt, quam quæ in mundo materiali contingunt (§. 3.). Exempli communis vide ad §. 3. exemplum vero arcane ad §. 20.

## §. 22.

*Infimus cognitionis gradus.*

*Historica cognitio communis infimus humane cognitionis gradus est.* Historica enim cognitio sensuum ope perficitur, attendendo ad ea, quæ actu sunt, vel fiunt (§. 1. 3.). Non igitur alia cognita præsupponit, ex quibus tanquam præmissis multa ratiociniorum ambage demum deduci debeat. Atque adeo inferior cognitione historica communi gradus non est in cognoscendo.

## §. 23.

*Vulgaris cognitio cur*

Patet hinc ratio, cur *cognitio vulgi & ea, quæ in vita utimur, plerumque nonnisi historica sit.* Vulgo enim in iis acquiescimus, quæ

quæ sensuum beneficio nobis primum innotescunt. Et, si vel *nonnisi historica.* maxime rerum agnoscamus causas & rationes, propterea quod sensui palam sistantur, non tamen distincte perspicimus, quomodo hæc alterius causa esse possit, vel quomodo ex hac ratione hoc vel illud fiat. Exempla dicta confirmant.

E.gr. Aquam igni superimpositam ebullire, norunt omnes, propterea quod id fieri plus vice simplici viderunt. Sed rationem, cur ebulliat aqua, ignorant, immo tantum non omnes de ea ne quidem cogitant. Est igitur calor ignis sit ebullitionis istius causa, vulgi tamen cognitio nonnisi historica est, quippe quæ hoc solo continetur, quod ex conjunctione duarum rerum oritur aliquis effectus, a distincta autem explicatione, quomodo inde effectus oriri possit, prorsus abest, ut adeo *ne minium* quidem cognitionis philosophiæ subsit (§. 3. 6.).

§. 24.

*Cognitionem historicam arcanam ad formam communis sæpius Reductio co-*  
*ars reducit.* Artis operationes, perinde ac experimenta, sæpius *gnitionis hi-*  
facta naturæ in apricum producant, quæ alias latent. Quamobrem *storica arca-*  
cum cognoscenti perinde sit, siue natura sensui quædam offerat, *ne ad com-*  
siue ars eidem sistat, quæ alias eundem effugiunt; arte suppetias *muniem.*  
ferente, sola attentione acumine, si quidem opus fuerit, stipata ad  
cognitionem historicam arcanam, perinde ac ad communem per-  
venitur (§. 1. 3.). Arcana adeo cognitio artis ministerio reducitur  
ad communem.

E. gr. Ignis proprietates & effectus latentes ars fusoria metallorum  
spectandos exhibet, perinde ac experimenta ope antix pneumaticæ in-  
stituta aëris latentes proprietates ac effectus revelant. Dedit exempla  
*Emanuel Suedenborgius*, Collegii metallici in Suecia assessor, in *Novis*  
*observatis circa ferrum & ignem* atque *Observationum miscellanearum*  
*circa res naturales* part. 4. p. 36. & seqq. Ipso autore in *Observatis*  
p. 8. & 10. per 10. & 12. dies calor in carbonibus conservatur, licet  
undiquaque fuerint tecti, & massa carbonum, etsi in iis nulla ignis  
scintilla appareat, intra illud tempus a calore diminuitur ad deci-  
mam sui partem; aperto autem camino, post quadrantem vel dimi-  
dium horæ, veluti sponte sua ignis & flamma in carbones erum-  
pit, quæ superficiem tenet: immo carbo quidam in fissura quadam  
muri non bene adustus, licet solus teneretur pendulus, flagrare ince-  
pit

## 12 Cap. I. De triplici cognitione humana,

pit in aëris liberi contactu, flamma autem fuit maxime volatilis & circum circa quasi lambens carbonis superficiem, absque ulla scintilla in carbone apparente.

§. 25.

Utilitas pha-  
nomenorum  
in arte ob-  
viorum.

Inde consequitur, *utile fore ad philosophandum, si phaenomena in officinis artificum & alibi in arte* (v. gr. in œconomia rurali) *obvia colligerentur & accurate describerentur.* Constituunt enim partem cognitionis historicae arcanæ (§. 21.), quam alias sensu duce obtinere non licet (§. 24.). Præbent itaque fundamentum cognitioni philosophicæ, quo alias destituemur (§. 10.).

§. 26.

Cognitio hi-  
storica philo-  
sophicam  
confirmat.

*Si quis per rationem aliquid fieri posse agnovit factoque experimento idem fieri observat, is cognitionem philosophicam historica confirmat.* Qui per rationem agnoscit aliquid fieri posse, is philosophicam habet cognitionem (§. 6.), qui vero idem fieri observat, historicam (§. 3.). Quodsi ergo idem fieri observat, quæ fieri posse per rationem agnovit, historica cognitio cum philosophica conspirat. Quoniam itaque dubitari nequit, quin fieri possint, quæ actu fieri observantur, adeoque cognitio historica extra omnem dubitationis aleam posita est; cognitionem philosophicam historica confirmari evidens est.

Pater hinc ratio, cur historicam cum philosophica cognitione constanter simus conjuncturi (§. 12.), etsi ea non unica sit, cum aliam jam supra (§. 11.) attulerimus.

§. 27.

Cognitio ma-  
thematica  
philosophi-  
cam certam  
reddit.

*Si quantitas effectus viribus causæ proportionata demonstratur, cognitio philosophica a mathematica haurit omnimodam certitudinem.* Qui quantitatem effectus viribus causæ proportionatam esse demonstrat, is ejus habet cognitionem mathematicam (§. 14.); qui vero causam effectus agnoscit, philosophicam (§. 6.). Quamobrem si demonstrari possit, quantitatem effectus non excedere vires causæ, cui eandem tribuimus, cognitio ma-  
thema-

thematica cum philosophica conspirat. Quoniam autem evidentius constare nequit, effectum ab aliqua causa proficisci posse, quam ubi constat, quantitatem ejus viribus causæ esse æqualem; cognitio philosophica a mathematica omnimodam certitudinem acquirit.

In præfatione ad Elementa Aërometriæ, quæ An. 1709. primum edidi, jam monui, certitudinem cognitionis physicæ a mathematica ut plurimum pendere, utque fidem oculatam darem, ipsa hæc elementa in Physicorum gratiam conscripseram, mathesin ad experimenta applicaturorum, quæ postea propter usum non contemnendum in Hydraulica Mathecos universæ elementis inferui.

§. 28.

Inde consequitur, quod *cognitio mathematica cum philosophica conjungenda sit, ubi summa, quæ datur, certitudini philosophicæ conjunctio.* *Ejus cum philosophicæ conjunctio.*

Eam ob rationem nos quoque cognitioni mathematicæ locum hinc inde concedemus in philosophia, etsi eam a philosophica distinguamus (§. 17.): nihil enim nobis certitudine antiquius est.

CAPUT II.

DE PHILOSOPHIA IN GENERE.

§. 29.

*Philosophia* est scientia possibilium, quatenus esse possunt. *Philosophia definitio.*

Hanc philosophiæ definitionem reperi A. 1703. cum ad tradendam philosophiam in Academia Lipsiensi in lectionibus privatis animum appellerem. Eam initio anni 1705. cum Casparo Neumanno, Inspectore Ecclesiarum & Scholarum Vratislaviensium, Augustanæ Confessionis addictarum, limati judicii viro, communicavi, & adversus quasdam ipsius objectiones in litteris privatis defendi. Tandem eam A. 1709. in præfatione ad Elementa Aërometriæ, de quibus modo dixi (not. §. 27.), in lucem publicam protuli. Hæc eum in finem adduco, ut appareat, quam animo conceperim philosophiæ notionem, cum primum de ea accuratori methode tradenda cogitarem: ad eam enim per omne tempus direxi omnes meas de philosophia cogitationes.

## §. 30.

*Scientia definitio.*

Per *Scientiam* hic intelligo habitum asserta demonstrandi, hoc est, ex principiis certis & immotis per legitimam consequentiam inferendi.

Quænam sint principia certa & immota, quænam consequentia legitima, & quomodo ista constituantur, in Logica docemus: cujus adeo vel hinc patet ad philosophandum necessitas. In discursu præliminari fieri nequit, ut termini omnes sufficienter explicantur & singula sufficienter probentur asserta, utut leges methodi hic quoque tueamur, quantum licet.

## §. 31.

*Philosophia reddit rationem, cur aliquid fieri possit.*

In *philosophia reddenda est ratio, cur possibilia actum consequi possint*. Philosophia enim est scientia possibilium, quatenus esse possunt (§. 29.). Quare cum scientia sit habitus asserta demonstrandi (§. 30.), in philosophia demonstrandum est, cur possibilia actum consequi queant. Enimvero qui demonstrat, cur aliquid fieri possit, is rationem reddit, cur id fieri queat: ratio enim id est, unde intelligitur, cur alterum sit. In philosophia itaque reddenda est ratio, quomodo ea, quæ fieri possunt, actu fiant.

## §. 32.

*Reddit etiam rationem, cur est ac cetera, philosophia docere debet, cur illud potius fiat aut unum potius fieri debeat, quam cetera.*

*Quodsi ergo plura fuerint, quorum unum perinde possibile est ac cetera, philosophia docere debet, cur illud potius fiat aut unum potius fieri debeat, quam cetera.* Etenim si plura fuerint possibilia, quæ tamen una esse nequeunt; ratio detur necesse est, cur unum potius fiat, quam alterum (§. 4.). Philosophia itaque rationes eorum, quæ sunt vel fiunt, reddens (§. 31.), docere debet, quænam sit ratio, ut in dato aliquo casu unum potius fiat, quam alterum.

E. gr. Fieri potest, ut hominis appetitus feratur in odium inimici, tum etiam in amorem ejusdem. Quoniam itaque alia esse debet ratio, cur in odium potius, quam amorem inimici feratur, alia vero cur amor odio præferatur; in philosophia doceri debet ratio, cur homo alterum sibi inimicum odio prosequatur, itemque reddenda est ratio, cur eundem amore complectatur.

## §. 33.

## §. 33.

*In philosophia studendum est omnimoda certitudini.* Cum *Studet certitudo* enim philosophia scientia sit (§. 29.), in ea demonstranda sunt *omni-* asserta, ex principiis certis atque immotis legitima consequen- *moda.* tia inferendo conclusiones (§. 30.). Sed quæ ex principiis certis atque immotis legitima consequentia inferuntur, adeo certa sunt, ut de iis dubitari nefas sit: id quod suo loco constabit. Nullum adeo dubium, in philosophia, posito quod scientia esse debeat, studendum esse certitudini omnimodæ.

## §. 34.

*In philosophia itaque principia ab experientia derivanda, quæ Media certi-* demonstrantur experimentis ac observationibus confirmanda & *cogni-* *tudinis ob-* *tionem mathematicæ una opera danda est.* Quoniam enim in phi- *nequæ.* losophia certitudinem omnimodam consequi studemus (§. 33.), quæ vero ab experientia derivantur principium firmum præbent veritatis demonstrandæ (§. 10.), & eorum, quæ demonstrata sunt, certitudo per experimenta atque observationes immota redditur, ut veritas extra omnem dubitationis aleam ponatur (§. 26.), in plurimis denique casibus certitudo omnimoda a demonstrationibus mathematicis seu cognitione mathematica pendeat (§. 27.); quis negare auit, ea in philosophia fieri debere, quibus veritas adeo in aprico collocatur, ut nullus de ea scrupulus superesse nobis possit?

## §. 35.

Patet inde, quo usque *cognitio historica & mathematica in* *Cognitionis* philosophiam admittenda sit, nempe *quatenus principia præbet fir-* *historica ac* *ma* atque immota & *examina decisiva cognitio historica, evidentiæ mathemati-* *ca in philoso-* *autem complet mathematica.* Neque enim cognitio historica & *phia limitè* *mathematica in* philosophiam admitti possunt, nisi quatenus philosophicæ ferunt opem: alias enim præter rationem admit-  
tentur. Quatenus vero utraque philosophicæ fert opem, *carus* ea philosophia carere nequit, siquidem nomen scientiæ *suæ* *debet* (§. 29.).

Recte igitur hac ratione cognitionis historice ac mathematicæ in philo-

philosophia constituuntur limites. Quodsi dictis quidpiam adhuc obscuritatis adhærere videatur, eam dispellent exempla ante not. (§. 10. 13.) allata.

## §. 36.

*Quando cognitio historica & mathematica nexum in philosophia non turbat.*

*Quodsi limites dicta ratione constituentur, cognitio historica & mathematica non turbat veritatum in philosophia nexum.* Cum in philosophia veritas una ex altera demonstrari debeat (§. 29. 30.), omnia, quæ in ea traduntur, continuo nexu copulari debent. Quodsi limites dicta ratione constituuntur, 1. cognitio historica principia firma præbet atque immota (§. 35.). Quamobrem cum ceterorum inde ratio reddatur (§. 10.); cetera cum hisce principiis cohærent, neque adeo cognitio historica nexum in philosophia hoc in casu turbat. 2. Ex eadem ratione cognitio historica examina suppeditat, quibus deciditur, a veritate non esse aliena, quæ per rationes fuere demonstrata (§. 35.). Quamobrem cum ista examina cum propositionibus, quarum veritas iis confirmatur, non modo eadem ratione cohæreant, quæ demonstrationes earum cum ipsis connectuntur; verum etiam ipsamet ex veritatibus, quæ sub incudem revocandæ, deducuntur & cum demonstratis consentiunt; multis sane modis cum iisdem cohærent, adeoque nec in hoc casu cognitio historica nexum in philosophia turbat. 3. Denique si limites dicta ratione constituuntur, cognitio mathematica complet evidentiæ (§. 35.) adeoque demonstrat clarius, circa quæ adhuc scrupulus aliquis suboriri poterat (§. 27.). Ueberior vero & ulterior demonstratio nexum non turbat veritatum, sed eas firmitus copulat & veritatibus ceteris plures connectit. Quamobrem nec cognitio mathematica in hoc casu impedit, quò minus in philosophia pulcherrimo nexu omnia inter se cohæreant.

Dum asserui, demonstrationibus mathematicis augeri veritatum in philosophia concatenatarum numerum, non modo cogitandæ sunt veritates, quæ per demonstrationes mathematicas ceteris superadduntur, veluti quod in dato casu effectus, qui alicui causæ adscribitur, eidem sit proportionatus (§. 27.); verum etiam aliæ philosophicæ, quæ



quæ ex mathematicæ demonstratis ita deducuntur, ut absque illis catenam veritatum philosophicarum non ingrederentur, etsi ad hoc genus referri debeant. Sunt enim in natura rerum, quorum ratio non perspicitur, nisi ex mathematicæ demonstratis, propterea quod vel a determinata quadam figura, vel quantitate pendeant, ita ut aliter forent, si alia admitteretur in casu dato figura, vel quantitas major, aut minor. V. gr. Philosophi est reddere rationem, cur apes cellulas sexangulares in favis suis potius construant, quam figuræ alterius. Enimvero si omnes muneris sui partes adimplere debet, non minus mathematica, quam historica & philosophica opus habet cognitione, ubi demonstrare voluerit, ex omnibus figuris possibilibus in dato casu eligi eam, quæ convenientissima omnium. Istiusmodi autem demonstrationes magnum habent in philosophia momentum.

## §. 37.

Metuendum vero non est, ne philosophia, prout a nobis *Quod datur definitur*, in numerum impossibilem sit referenda, consequenter vana sint, quæ (§. 31. & seqq.) de ea demonstravimus. *philosophia.* Et utique *philosophia e numero eorum, quæ impossibilia non sunt.* Etenim cum ea, quæ sunt vel fiunt, non destituantur ratione, unde intelligitur, cur sint, vel fiant (§. 4.); istiusmodi scientia impossibilis non est, quæ rationem exponit, cur ea, quæ sunt & fiunt, esse ac fieri possint, ac cur in dato aliquo casu hoc potius fiat, quam aliud. Quare cum ista scientia sit philosophia (§. 31. 32.); philosophiam esse ex eorum numero, quæ impossibilia non sunt, patet. Idem brevius ostenditur hoc modo: Datur cognitio philosophica, quæ est rationis eorum, quæ sunt vel fiunt (§. 6.). Ergo possibilis quoque philosophia, quæ istius cognitionis nos reddit compotes (§. 31. 32.).

Quemadmodum vero superius (§. 5.) consultum minime duximus, ut serram contentionis de eo reciprocemus, num omnia, quæ sunt, rationem habeant, per quam intelligi potest, cur fiant; ita nec hic disputandi animus est, num possibilia omnia ad philosophiam referri possint. Veniendum enim est in rem præsentem. Quærendæ sunt rationes eorum, quæ esse vel fieri posse cognoscimus. Quorum inventa est ratio, ea referenda sunt ad philosophiam: cetera jure exulant, quamdiu eorum ignoratur ratio (§. 31. 32.). Frustra vero disputatur, num ea quoque rationem habeant. Quod si enim eadem referatur

(Wolffii Logica)

C

ritur

ritur, dubio locus non est: quamdiu vero ignoratur, nobis quidem perinde est, five quædam adsit, five nulla. Utroque in casu de re ista in philosophia filemus.

## §. 38.

*Quod ea sit  
in nostra  
potestate.*

*Fieri quoque potest, ut philosophia*, qualem supra definivimus (§. 29.), *compotes reddamur.* Nos enim non irritò successu posse scrutari rationes eorum, quæ sunt atque fiunt, ipso facto patet. De eo esto iudicium, ubi philosophiam tradiderimus. Qui vero rationes demonstrare valet eorum, quæ sunt atque fiunt, is philosophiam, qualem supra definivimus, callet (§. 31. 32.). Fieri adeo potest, ut philosophia compotes reddamur.

Non disputamus, quantum in philosophia homo proficere queat. Vana est omnis hæc disputatio. Veniendum denuo in rem præsentem. Successus docebit unumquemque, quid valeant humeri, quid ferre recusent. Quodsi philosophi Mathematicos imitentur, ut methodo accurata tradant, quæ repertæ jam sunt, veritates & iis plures superstruere allaborent continuo ulterius progredientes; philosophia perinde ac Mathesis nova indies capiet incrementa. Enimvero suo loco demonstrabimus, & omnium eorum, quæ sunt ac fiunt, dari rationem, cur sint vel fiant; & eas homini esse facultates, ut rationem istam scrutari & in hac scientia indies ulterius progredi possint. Sed istiusmodi demonstratio a limine philosophiæ abhorret, quæ principia bene multa ex Logica, Ontologia & Psychologia mutuatur.

## §. 39.

*Philosophia  
juris, Medi-  
cinæ, artium.*

*Possibilis etiam philosophia juris, Medicinæ, artium quarumcunque.* Nam 1. in Jurisprudentia docentur leges. Legum dantur rationes, cur potius hæc, quam aliæ in Rep. sint ferendæ. Est igitur quædam scientia, quæ explicat istas rationes, adeoque philosophia juris (§. 31. 32.). 2. In Medicina agitur de sanitate, de morbis, de iis, quæ sanitatem conservant, de remediis morborum. Sed dantur rationes sanitatis atque morborum, nec deest ratio, cur hæc vel ista sanitatem conservent, hæc vel ista medicamenta morbum sanent. Non impossibilis itaque scientia rationes istas exponens, adeoque philosophia artis Medicinæ. 3. In quacunque arte alia non desunt rationes  
eorum,

eorum, quæ ibi fiunt. Unde eodem modo patet, non impossibilem esse philosophiam artium quarumcunque.

E. gr. Ligna findere inter artes manuarum abjectissimas refertur. Sed datur ratio, cur ligna findi possint, & cur id cuneo, vel subinde etiam securi fieri queat. Cunei vires & ictus, quo adigitur, mathematicè demonstrari possunt. Datur igitur philosophica artis hujus abjectæ cognitio & mathematica (§. 6. 14.), unde philosophica omnimodam certitudinem haurit (§. 27.). Nullum adeo dubium, quod ea ad philosophiam referri debeat (§. 31.). Equidem hætenus de artibus parum philosophari sunt, qui ad philosophiam animum appulerunt. Sed nobis jam non est negotium cum eo, quod vulgo fieri solet, verum potius cum illo, quod fieri debet. Quemadmodum vero superius (§. 24.) defendimus, quod ars suppetias ferat philosophantibus; ita hic asserere nulli dubitamus, quod ex philosophia artium multa redundatura sit utilitas in ipsas artes, siquidem in publicos usus proficere. Patent ea ex iis, quæ de utilitate cognitionis philosophicæ mox sumus in genere demonstraturi.

## §. 40.

*Ipsa artis opera philosophicam cognitionem admittunt.* Opera artis  
Etenim nec ea rationibus suis destituuntur, id quod ipso facto ad philosophiam pertinent.  
deprehendimus. Quamobrem eodem, quo ante (§. 39.) modo conficitur, ipsa quoque artis opera ad philosophiam referri.

E. g. Ædificia artis opera sunt. Datur autem scientia, quæ rationes exponit eorum omnium, quæ in ædificiis determinanda sunt. Et ea est *Architectura civilis*, si non per modum artis, quod vulgo fieri solet, sed per modum scientiæ tradatur, quemadmodum a nobis factum in Elementis Matheseos universæ.

## §. 41.

*Si quorum philosophica nobis est cognitio, ea certiori successu ad casus in vita humana obvios applicantur, quam ubi eorundem nonnisi historicam habemus.* Cognitionis philosophicæ  
Quicquid de ente aliquo prædicatur, id nonnisi sub certa conditione eidem convenit, siue certior applicatio, quam historica.  
conditio ista a definitione, siue aliunde petatur, id quod in Logica independentem ab hac demonstrabitur. Qui philosophica cognitione instructus, is novit rationem, cur aliquid sit,

vel fiat (§. 6.), adeoque conditionem istam perspicit, sub qua aliquid de ente quodam enunciatur, consequenter prædicatum non tribuit enti obvio, nisi ubi conditionem istam præsentem perspicit. In applicatione igitur eorum, quorum philosophica nobis est cognitio, non aberramus. Enimvero ubi historicam saltem cognitionem habemus, ad conditionem istam vel prorsus non attendimus, vel minimum non integram perspicimus, cum sic saltem constet, aliqua esse vel fieri posse, nequaquam vero cur fieri, vel esse queant (§. 7.). Fieri adeo sæpissime solet, ut in obviis vitæ humanæ casibus enti alicui tribuamus, absente ista conditione, sub qua eidem competit, consequenter quod eidem minime competit. In applicatione igitur eorum, quorum philosophica cognitione destituimur, sæpius aberratur. Certior itaque successus est in applicatione cognitionis philosophicæ, quam historicæ.

Aberrationem istam quotidiana loquitur experientia. Ut tamen dicta clarius intelligantur, præsertim cum nondum tradita sint; quæ in demonstratione præsupponuntur; lubet uno alteroque exemplo eadem illustrare. E. gr. vider quis furculos roris marini altero sui extremo in terram defixos radices agere atque in fruticem excrescere. Eundem eventum sibi in arborum quarumcunque furculis promittens, irritò conatu idem tentat. Enimvero qui in rationem inquirat, cur id in rore marino succedat, eamque reperit, is novit conditionem ad successum requisitam, consequenter eadem absente eundem sibi minimè promittens ab irritò labore abstinet. *Augustinus Mandirola*, Ordinis Minorum *S. Francisci*, singulari artificio ex foliis citrinis & limoniis arbores educavit. Et si idem experimentum in Germania quoque non infeliciter fuerit iteratum, a pluribus tamen frustra tentatum propterea quod, latente cognitione praxeos philosophicæ, in applicatione regularum a *Mandirola* datarum aberratum fuit. In moralibus & politicis cognitio philosophicæ hætenus tantum non prorsus neglecta. Testatur vero experientia, quam dubius in iisdem sit eventus, etiamsi acta agere intendunt. Misericordia miseri tangimur, cognita ejus miseria. Ignorata ratione, adeoque cognitione philosophicæ deficiente, miseri sibi persuadent, se alios ad misericordiam permoturos, sola miseriæ expositione. Spem vero fallit eventus: in aliis enim casibus deficit misericordia, in aliis irrisioni locus est. Quod si vero philo-

philosophica cognitione instructus novit, misericordiæ non esse locum, nisi ubi amor miseri adfuerit; is sola miseriæ expositione alterum ad misericordiam permovere minime tentat, aut si ex ratione probabili agat, certum sibi eventum non spondet. Inquirendum nimirum sibi esse perspicit, num alter universali totius generis humani amore teneatur, nec adsit ratio specialis, quæ impediatur, quo minus erga ipsum sese exerat, & in casu opposito querenda esse media novit alterius in se provocandi amorem.

## §. 42.

*Quorum philosophica est cognitio, ea ad plures casus in vita humana obvios applicantur, quam ubi eorundem nonnisi historicam habemus, si ratio ejus, quod speciei competit, in notione generis continetur.* Etenim qui historicam habet cognitionem, is novit, aliquid esse, vel fieri posse (§. 3.): quomobrem quod de subiecto certæ cujusdam speciei cognovit, id non admittit nisi de subiectis aliis ad eandem speciem pertinentibus. Quodsi tamen ratio ejus, quod tribuitur speciei, in notione generis contineatur; idem de toto genere, consequenter etiam de omni alia specie ad idem genus pertinente, prædicari debet. Historica igitur cognitione contentus ad res unius speciei applicat, quæ ad res plurium applicari debebant, consequenter ad casus in vita obvios pauciores, quam fieri poterat. Quodsi vero quis philosophica polleat cognitione, is rationem eorum perspicit, quæ sunt atque fiunt (§. 6.), adeoque videt, num ea in notione generis, an in notione speciei contineatur. Quomobrem si contingat, eam in notione generis reperiri; pluribus speciebus tribuit, quæ sola cognitione historica fretus nonnisi de una enunciat. Eadem itaque ad plures casus in vita humana obvios applicat.

E. gr. Aqua movetur celerius, si alveus coarctetur, ut per minorem sectionem fluvii fluat, quam antea. Qui sola cognitione historica instructus, nonnisi in dato casu eadem uti potest, quando nimirum efficiendum, ut aqua in alveo fluvii alicubi celerius fluat, vel tardius. Cum vero qui cognitione philosophica pollet, is novit, motum aquæ hac ratione accelerari, vel retardari, non quatenus ea aqua est, sed quatenus fluidum grave, consequenter motum fluidi gravis cujus-

cunque per canalem declivem ruentis hac ratione accelerari, vel retardari posse. Immo cum eadem constet, motum aquæ ideo accelerari, quod ob altitudinem aquæ crescentem celeritas augeatur, donec eodem tempore per sectionem minorem tantundem aquæ fluat, quantum antea per maiorem fluebat; haud obscure is intelligit, idem valere de omni fluido, si vis, qua urgetur fluidum, erecta apertura, per quam fluit augeatur. Neque enim minus eadem manifestum est, alveum fluvii coarctatum, vel ampliatus hic saltem spectari tanquam aperturam minorem, vel maiorem. Quamobrem propositionem multo universalius ita enunciat: *Si apertura, per quam fluidum quodcumque a vi quacunque urgetur, coarctetur & vis incendatur, donec per minorem eadem fluidi quantitas eodem tempore moveatur, quæ antea per maiorem movebatur, motus fluidi multum acceleratur; in casu autem opposito retardatur.* Nemo non videt, usum propositionis nunc latius patere, quam ante, cum nonnisi ad casum valde specialem restringeretur. Sane nunc ad res externa specie valde differentes applicari potest. V. gr. Quæ de aqua per alveum fluvii decurrente didicimus, eadem quoque ad folles applicamus ventum fortiores excitaturi.

## §. 43.

Cognitio philosophica  
compendiosior  
historica.

*Si ea, quæ cognitio historica ad casum specialem restringit, universalius enunciari possunt, cognitione philosophica propositionum numerus minuitur, ut cognitione minus ampla instructus ad plures casus sit paratus.* Quoniam enim, qui philosophica cognitione pollet, rationem ejus novit, quod ad casum specialem cognitione historica restringitur (§. 6.); cum latere nequit, quod ista in notione generis contineatur. Quamobrem cum de genere prædicari debeat, cujus ratio in ejus notione continetur, quod suo loco in Logica clarius constabit; quæ cognitio historica ad certam speciem restringit, ea ad genus philosophica extendit, prouti jam ante (§. 42.) demonstravimus. Plures itaque propositiones de diversis speciebus formandæ hoc modo ad unam reducuntur. Una propositio cum jam satisfaciatur, ubi pluribus antea fuerat opus, pauciori cognitione instructus ad plures casus paratus est.

Exemplum, quod ad §. præcedentem proposuimus, hic quoque locum habet.

## §. 44.

*Cognitio philosophica animum voluptate perfundit, quam ab historica expectare non licet.* Quodsi cognitio historica circa ob-  
vium versetur, animus est indifferens, nec ulla ratione inde  
movetur. Si inexpectata nobis offerat, in admirationem rapi-  
mur: sin talia, quæ nosse interest; gaudeamus quidem, dum  
primum innotescunt, sed voluptas transitoria mox iterum eva-  
nescit. Quodsi vero rationes eorum, quæ cognoscimus, per-  
spicimus, mira voluptate perfunditur animus sciendi ac veri cu-  
pidus, olim reditura, ubi easdem denuo mediteris. Tentanti  
patent omnia, quorum ratio a principiis psychologicis pendet,  
suo loco explicandis ac firmandis. Experimur quoque istud  
voluptatis genus, quod ex scientia proficiscitur, palmam præ-  
ripere voluptatibus ceteris quibuscunque.

*Voluptas ex  
cognitione  
philosophica  
profecta.*

## §. 45.

*Philosophia ob usum cognitionis historice in casibus vitæ huma-  
ne non est contemnenda.* Quoniam enim cognitio philosophica  
successu feliciori ad casus vitæ applicatur, quam historica (§. 41.),  
& ad plures sese casus extendit (§. 42.), ita ut minus ampla  
cognitione instructus ad plures sit paratus (§. 43.); ea deni-  
que voluptate animum perfundit, quam ab historica minime  
expectare licet (§. 44.); insignis sane prærogativa est cogni-  
tionis philosophicæ præ historica, ipsum si usum spectes in  
casibus vitæ humanæ. Absolum itaque foret ob minorem  
cognitionis historice usum philosophiam contemnere, quæ  
majorem præbet ac insigni præterea animum voluptate de-  
mulcet, quæ haud exiguum felicitatis humanæ partem consti-  
tuit: id quod suo loco ostendetur.

*Philosophia  
cur non con-  
temnenda.*

## §. 46.

*Philosophus est, qui rationem reddere potest eorum, quæ sunt, vel esse possunt.* Ratio definitionis patet. Pollet  
nempe ista scientia, quæ philosophiæ nomine salutatur (§. 29.)  
& cuius est rationem reddere, cur possibilia actum consequi  
queant

*philosophi  
definitio.*

queant (§. 31.) & unum potius fiat in dato casu, quam alterum, quod perinde possibile erat (§. 32.).

## §. 47.

*Quinam major philosophus.*

*Major ergo philosophus est, qui plurimum rationem reddere potest; minor, qui pauciorum rationem novit.*

Hoc sane criterio distinguēs philosophos, quibus veri nominis fuerit philosophia. Sunt equidem adhuc differentiae aliae, quae a doctibus intellectus pendent & gradus constituunt: sed de his demum judicare licet, ubi Logica intimius fuerit perspecta.

## §. 48.

*Nemo in omnibus philosophus.*

Quoniam possibilem tantus est numerus, ut unus homo rationem omnium perspicere minime possit, philosophus tamen non est, nisi qui rationem reddere potest eorum, quae sunt, vel esse possunt (§. 46.); *nemo hominum in omnibus est philosophus.* Immo si quis juxta hanc normam seipsum examinare voluerit, *quam parum sit philosophus* intelliget.

## §. 49.

*Nostri definitionis philosophi a fastu revocat.*

*Nostri igitur philosophi a fastu revocat.* Cum enim vi nostrae definitionis philosophus nemo dici possit, nisi quatenus rationem eorum reddere potest, quae sunt vel esse possunt (§. 46.), secundum hanc vero normam sese examinans intelligat, non modo quod philosophus in omnibus esse nequeat; verum etiam quam parum sit philosophus (§. 48.); fieri sane non potest, ut propter philosophicam cognitionem sese efferat. Nostri igitur philosophiae notio cum a fastu revocat.

Equidem ex definitione nostra sequitur, cum non esse philosophum qui sola cognitione historica instructus recensere novit, quae sunt ac fieri possunt, rationem vero, cur sint vel fiant, non perspicit. Sed nemini hac ratione injuria infertur; nemo contemnitur, propterea quod nostro judicio philosophus non sit. Non denegatur ipsi eruditio & doctrina in vita utilis. In scientiis distinguenda sunt, quae diversa deprehenduntur, & nominibus diversis a se invicem discernenda. Cognitionem historicam & philosophicam differre, clarissime evictum dedimus (§. 7.) & differentiam in definitionibus attendimus (§. 3. 6.).

Lex



**Lex autem ratiocinandi** prima est, ut ex notionibus ratiocinemur rei nulli imposueri nomen, nisi cui competit definitio. Immo vanum foret, si quis de nobis quereretur, quod nostro iudicio philosophus non habeatur. Nam qui nostro sensu philosophus esse negatur, is dicitur vacuus ratione eorum, quæ esse possunt (§. 46.). Quod si igitur rationem istam ignorat, postulare a nobis non potest, ut ipsi ejus notitiam tribuamus. Sin rationem callet, nostro sensu philosophus est, & in omni casu philosophus agnoscitur, ubi rationem reddit eorum, quæ sunt vel esse possunt. Philosophi non est voluptatem ex nomine percipere: cui si abjecta respondeat idea, angusto nomine abjecte de re, cui tribuitur, statueretur.

## §. 50.

*Si quis novit philosophiæ propositiones easque intelligit, verisimile est, philosophiæ cognitionem habere.* *Philosophiæ cognitio historica.* **Si quis novit philosophiæ propositiones easque intelligit, verisimile est, philosophiæ cognitionem habere.** *Philosophiæ cognitio historica.* Qui philosophiæ propositiones novit easque intelligit, is cognoscit, quæ in philosophia doceantur. Cum adeo cognoscat factum aliquod, historica cognitione pollet (§. 3.). Sed quoniam veritatem illarum propositionum demonstrare nequit, scientia destituitur (§. 30.), consequenter philosophia ipsa vacuus (§. 29.) nonnisi historicam habet philosophiæ cognitionem, nec adeo Philosophus dici potest (§. 46.), nisi inconstantiam in loquendo admittas, cui in philosophia nullum concedimus locum (§. 144.).

Patet ex iis, quæ modo ad (§. 49.) diximus, in nullius hæc dici contentum. Præterquam vero quod ratio suadeat, ut ita sentiamus; generosos animos incendimus, ut ad excelsa & præclara contendant, non sine scientiæ ipsius fructu, nec sine generis humani felicitate, in quam veritas multis modis influit. Non ignotæ mihi sunt utilitates aliæ parum hætenus agnitæ, a quibus tamen recensendis abstinemus, donec earum veritas perspicue ostendi possit.

## §. 51.

*Qui historicam habet philosophiæ cognitionem, eam ad casus vite humane applicare valet.* *Cognitio philosophiæ historica ad usum vite applicabilis.* **Qui historicam habet philosophiæ cognitionem, eam ad casus vite humane applicare valet.** Qui historicam habet philosophiæ cognitionem, is ejus propositiones novit (§. 50.), adeoque ipsi perspectum est, de quo subjecto & sub qua conditione prædicatum aliquod enunciatur. Et quoniam propositio-  
(Wolffii Logica).

nes intelligit, terminorum vel perspectas habet definitiones, vel minimum notiones rerum iisdem denotatarum claras: patet enim suo loco in Logica, in opposito casu fieri non posse, ut propositio intelligatur. Qui rei alicujus definitionem tenet, vel notionem minimum claram habet, is eam sibi oblatam agnoscit, consequenter si expressa in propositione conditio adsit, prædicatum in propositione subjecto tributum eidem convenire concludit. Historicam itaque, quam habet, cognitionem ad casus vitæ humanæ applicat.

Eandem philosophia sortem experitur, quæ Matheseos esse solet. Arithmetica præctica in variis vitæ casibus exercent, qui operationum regulas demonstrare nequeunt. Agrimensores & architecti militares præces quasdam Geometriæ feliciter absolvunt, etsi eas demonstrationes capere possint, eos propositiones absque demonstrationibus doceri præstat, quam ut a philosophia prorsus arceantur. Immo utilitate non caret, si quis historicam philosophiæ cognitionem sibi comparer, antequam ad ipsam scientiam animum appellat. Etenim in demonstrationibus supponuntur propositiones præcedentes familiares, qui igitur eas sibi familiares reddidit, antequam demonstrationes expendit, is in iis concipiendis multum facilitatis sentit ac celerius multo in studio philosophiæ progreditur, quam ubi omnium, quæ in ea traduntur, prorsus fuerit ignarus.

## §. 52.

*Judex in  
controversiis  
philosophicis  
qui esse non  
possit.*

*Sola cognitione philosophiæ historica instructus de controversiis philosophicis judicare nequit.* Qui de thesi in philosophia controversa judicium laturus est, is demonstrare debet, num ea thesibus ceteris contradicat, an iisdem consentiat, aut num ex iis legitima consequentia deducatur. Quare cum ad hoc requiratur habitus demonstrandi, adeoque ipsa scientia (§. 30.), sola vero cognitione philosophiæ historica instructus eadem careat (§. 50.); eundem de controversiis philosophicis judicare non posse evidens est.

## §. 53.

*Idem ulterius  
ostenditur.*

*Multum minus igitur de controversiis philosophicis judicare valet, qui tantum cognitionem historicam habet cognitionis philosophiæ alterius.*

*terias.* Is enim non novit, nisi quam rationem facti alleget alter (§. 8.), adeoque leviori cognitione instructus, quam qui ipsius philosophiæ historicam possidet cognitionem (§. 50.). Quare cum hic judicem controversiarum philosophicarum agere nequeat (§. 52.); multo minus ille judicem earundem agere poterit.

## §. 54.

*Si quis theses philosophiæ, quarum historicam habet cognitio-* *Medius in-*  
*nem, per experimenta atque observationes confirmare novit, utut* *ter cognitio-*  
*demonstrationes non capiat; is medium quendam gradum inter co-* *nem philo-*  
*gnitionem historicam & philosophicam obtinet.* Etenim qui sola *phicam &*  
*cognitione historica* instructus, is propositiones philosophiæ tan- *historicam*  
 tum novit atque intelligit, veritatem vero earundem non per- *gradus.*  
 spicit (§. 50.). Qui illas per experimenta atque observationes  
 confirmare novit, is agnoscit, id fieri posse, quod posse fieri  
 per rationem philosophus agnoscit (§. 26.). Quoniam tamen  
 ipse rationem non percipit; philosophica cognitione destituitur  
 (§. 6. 9.). Ejus itaque cognitio inferior est philosophica,  
 superior tamen historica, adeoque gradum intermedium con-  
 stituit inter historicam atque philosophicam.

Optandum sane foret, ut iis, quibus vel ingenium tantum non est,  
 vel otium non suppetit, quo demonstrationibus vacare possint ipsam  
 scientiam philosophicam sibi comparaturi, ad hunc gradum interme-  
 dium contenderent: quemadmodum Opticorum theoremata per ex-  
 perimenta probantur illis, qui ipsas demonstrationes perpendere vel  
 non possunt, vel nolunt. Hic enim proximus ad philosophiam gra-  
 dus est, qui ejus initium dici poterat. Immo multum in philosophia  
 proficerent, si philosophia per gradus traderetur, ut primum ad hi-  
 storicam ejus cognitionem perducerentur, qui memoria vigent; de-  
 inde eadem experimentis ac observationibus confirmarentur, quæ  
 memoriæ fuere impressa; tandem ad ipsam scientiam perducerentur,  
 qui ingenio præstant. Insignis inde in Remp. fructus redundaret,  
 ac controversiæ temerariæ eliminarentur, quibus partim ex vanitate,  
 partim ex pravo affectu litatur. Sed ea de rein politicis ex instituto  
 agemus.

# DE PARTIBUS PHILOSOPHIÆ

§. 55.

*Fundamen-  
tum partium  
philosophia.*

**E***Ntia , quæ cognoscimus, sunt Deus, animæ humanæ ac corpora seu res materiales.* Etenim si ad nosmetipsos attendimus, quovis temporis momento nobis sumus conscii rerum extra nos præsentium & organa sensoria nostra commoventium; quilibet vero etiam sui ipsius conscius est. Id, quod in nobis sui ipsius conscius est, dicitur *anima*: res ceteræ extensæ, figuris & magnitudine a se invicem differentes, quas extra nos intuemur, *corpora* vocantur. Admittimus itaque duplex entium genus *corpora* & *animas humanas*. Et quam primum statuimus, corpora & animas humanas non esse entia a se, seu propria virtute ortas & perseverantes; Autorem quoque admittimus cum corporum, tum animarum, cujus virtute utrumque entium genus fuit productum. Atque is Autor rerum, quas existere largimur, *Deus* a nobis appellatur. Quamobrem entia, quæ cognoscimus ad nosmetipsos attenti, antequam philosophamur, sunt Deus, animæ humanæ ac corpora.

§. 56.

*Philosophia  
partes pri-  
maria.*

*Tres binc enascuntur philosophiæ partes, quarum una de Deo, altera de anima humana, tertia de corporibus seu rebus materialibus agit* Quoniam enim præter Deum, animas humanas ac corpora entia alia non cognoscimus (§. 55.); nec plures possunt constitui partes philosophiæ ab eo, qui nonnisi ad hæc tria entium genera attendit.

Non negamus, præter corpora, animas & Deum entia alia existere, nec in dubium vocamus, quæ de angelorum existentia tradit Scriptura sacra; sed id tantummodo asserimus, quod, antequam philosophamur, de philosophiæ objecto solliciti non plura entium genera nobis innotescant præter animas & corpora eorumque Autorem Deum: cujus existentia quamvis nondum a nobis demonstrari possit, quamdiu philo-

loſophia nondum exulta, ob rationes tamen probabiles admittitur, perinde ac differentia inter animas & corpora. Philoſophamur enim, ut certam conſequamur cognitionem eorum, quæ ſenſu duce & attentione ad noſmetipſos facta conſuſe agnoſcimus.

§. 57.

Ea pars philoſophiæ, quæ de Deo agit, dicitur *Theologia Naturalis*. *Theologia naturalis definitio.* Quamobrem *Theologia naturalis* definire poteſt per ſcientiam eorum, quæ per Deum poſſibilia intelliguntur. Etenim philoſophia eſt ſcientia poſſibilium, quatenus eſſe poſſunt (§. 29.). Quamobrem cum in numero poſſibilium etiam ea ſint, quæ Deo inſunt & per eum fieri poſſe intelliguntur, quod nemo negaverit, quam primum exiſtentiam Dei admit- tit; ideo *Theologia naturalis* eſt ſcientia eorum, quæ per Deum poſſibilia ſunt.

Qui demonſtrare debet, quamnam per Deum poſſibilia ſint; iſ ea noſſe teneatur, quæ eidem inſunt. Ea, quæ inſunt, ſunt attributa, & quæ vi horum attributorum per ipſum fieri poſſe intelliguntur, ſunt operationes ipſius, veluti creatio & conſervatio univerſi. Unde apparet, in *Theologia naturali* agendum eſſe de attributis ac operationibus Dei. Enimvero quoniam in hoc quoque diſcurſu præliminari eum, quantum licet, ſequi libuit ordinem, ut ex antecedentibus inferantur ſequentia; ideo in definitione *Theologiæ naturalis* nullam expreſſam fecimus mentionem attributorum ac operationum Dei, ſed eam terminis generalibus concepimus, quibus tanquam definitio ſpecialis ex definitione philoſophiæ generali deducitur. Monemus talia, ne methodi ignari reprehendant, quod in definitione non exprimantur ea, quæ in *Theologia naturali* pertractari debent. Ubi regulas definiendi in *Logica* demonſtraverimus, non difficulter demonſtrari poterit, noſtram *Theologiæ naturalis* definitionem ex aſſe iſdem convenire. Neque enim in definitione plura contineri debent, quam ad cetera inde deducenda ſufficiunt. Ex iſ vero, quæ in definitione *Theologiæ naturalis* poſuimus, deducere poſſumus, quæ in eadem pertractanda ſint: quemadmodum ſuo tempore conſtabit. Novi quid a me fieri poſſit. Quod vero a me fieri poteſt, inter ea, quæ fieri nequeunt, referri implicat.

§. 58.

Pars philoſophiæ, quæ de anima agit, *Pſychologia* a me *Pſychologia* appellari ſolet. Eſt itaque *Pſychologia* ſcientia eorum, quæ per *definitio.*

D 3

ani-

animas humanas possibilia sunt. Ratio definitionis patet, ut ante. Est enim philosophia in genere scientia possibilium, quatenus esse possunt (§. 29.). Quare cum Psychologia sit ea philosophiæ pars, quæ de anima agit; erit ea scientia eorum, quæ per animam humanam possibilia sunt.

## §. 59.

*Physica definitio.*

Pars denique philosophiæ, quæ de corporibus agit, *Physica* salutatur. Quamobrem *Physicam* definio, quod sit scientia eorum, quæ per corpora possibilia sunt. Ratio definitionis hic quoque patet, ut ante (§. 57.). Quoniam enim philosophia est scientia possibilium, quatenus esse possunt (§. 29.), physica autem de corporibus agit; erit ea scientia eorum, quæ per corpora fieri possunt.

Quæ de theologiæ naturalis definitione paulo ante (not. §. 57.) annotavimus, ea mutatis mutandis ad definitionem Psychologiæ etiam atque Physiæ applicari possunt. Suo sane tempore ex prolegomenis disciplinarum specialibus constabit, quod per istas definitiones satis determinentur ea, de quibus in iis tractari convenit.

## §. 60.

*Fundamentum Logicæ & philosophiæ practicæ.*

*Anima duplicem habet facultatem, cognoscitivam atque appetitivam.* Hæc per experientiam certa sumimus, suo loco explicanda & stabilienda uberius. Nec minus patet, *utramque facultatem in suo exercitio aberrare poss.*, nempe *cognoscitivam a veritate, appetitivam a bono*, ita ut illa errorem loco veritatis amplectatur, hæc malum loco boni eligat.

Distinctius ea exponemus in Psychologia. Nunc nobis sufficiant terminorum notiones claræ & experientiæ obviæ, quibus dicta confirmantur.

## §. 61.

*Logica definitio.*

Ea philosophiæ pars, quæ usum facultatis cognoscitivæ in cognoscenda veritate ac vitando errore tradit, *Logica* dicitur: quam adeo definimus per scientiam dirigendi facultatem cognoscitivam in cognoscenda veritate.

Quæ circa hanc definitionem moneri poterant, ea reservamus ad prolegomena Logicæ mox tradenda.

## §. 62.

## §. 62.

Ea vero philosophiæ pars, quæ usum facultatis appetitivæ in *Philosophiæ* eligendo bono & fugiendo malo inculcat, *philosophia practica practica* dicitur. Est adeo *philosophia practica* scientia dirigendi facultatem *finis.* appetitivam in eligendo bono & fugiendo malo.

## §. 63.

Duplici modo *homo considerari potest, vel quatenus est homo, Fundamen-* *vel quatenus est civis,* aut, quod perinde est, *vel quatenus vivit in tum Ethicæ* societate generis humani seu *in statu naturali,* vel quatenus vivit *ac Politicæ.* *in societate civili.* Ob duplicem hunc respectum philosophiæ practica in duas dispescitur partes.

## §. 64.

Ea philosophiæ pars, in qua homo consideratur tanquam *Ethicæ des-* vivens in statu naturali, seu in societate generis humani, *nitio.* *Ethica* appellatur. Quamobrem *Ethicam* definimus per scientiam dirigendi actiones liberas in statu naturali, seu quatenus sui juris est homo, nulli alterius potestati subjectus.

Et si enim nunc non vivamus in statu naturali, ubi alterius potestati subjecti sumus; constat tamen, in statu civili libertatem hominis non quoad omnes actiones restringi, sed magnam earum partem, immo maximam illimitatam eidem relinqui. Earum igitur respectu perinde est, ac si in statu naturali viveret, nullius potestati subjectus, sed actionum suarum ipsemet dominus.

## §. 65.

Ea philosophiæ pars, in qua homo consideratur tanquam *Politica des-* vivens in Rep. seu statu civili, *Politica* vocatur. Est itaque *Politica finis.* scientia dirigendi actiones liberas in societate civili seu Rep.

## §. 66.

*Dantur præter Remp. seu societatem civilem societates Fundamen-* *tie minores,* quibus etiam in statu naturali seu extra Remp. *tum Oecon-* *fuit locus,* veluti societas conjugialis, paterna, herilis, quæ *mica.* *simplicium* nomine venire solent.

## §. 67.

Pars ea philosophiæ, in qua homo consideratur tanquam *Oeconomica definitio.*

quam membrum societatis alicujus minoris, *Oeconomica* appellatur. Unde *Oeconomica* est scientia dirigendi actiones liberas in societatibus minoribus, quibus etiam extra Rempublicam locus.

Receptas retinemus disciplinarum divisiones: definitiones vero istiusmodi concinnamus, quæ notitiis generalibus respondent.

## §. 68.

*Juris natura definitio.*

Quoniam fieri nequit, ut homo appetat bonum & aversetur malum, quod non cognovit; ea philosophiæ pars, in qua docetur, quænam actiones sint bonæ, quænam malæ, *Jus naturæ* appellatur. Definitur adeo *Jus naturæ* per scientiam actionum bonarum atque malarum.

Facile patet, jus naturæ esse theoriæ philosophiæ practicæ (§. 62.), Ethicæ scilicet, Politicæ atque Oeconomicæ (§. 64. & seqq.). Quamobrem cum non opus sit, theoriæ a praxi distingui; jus naturæ in ipsa Ethica, Oeconomica atque Politica tradi potest.

## §. 69.

*Fundamentum philosophiæ practicæ universalis.*

Sunt quoque principia quedam generalia, unde omnis theoria & praxis philosophiæ practicæ pendet. Quod hic asserimus, ipso facto probatur, nempe dum principia ista generalia exhibentur.

Equidem & a priori succedit demonstratio: sed supponuntur ex Ontologia & Psychologia, quæ minime in vulgus nota sunt. Unde ab ista hic abstinere methodus jubet. Neque enim ea fert, ut principia postulentur, quæ ægrius admittuntur, quam ipsa propositio, quæ per ea probari debet.

## §. 70.

*Philosophiæ practicæ universalis definitio.*

Ea philosophiæ pars, quæ generalem theoriæ & praxin philosophiæ practicæ tradit, a me *Philosophia practica universalis* appellatur. Unde eam definivi per scientiam affectivam practicam dirigendi actiones liberas per regulas generalissimas.

Philosophiam practicam universalem methodo mathematica conscriptam dedi A. 1703. & eruditorum examini in conflictu publico submisi in Academia Lipsiensi, cum specimen per statuta edendum esset academicum inter Doctores privatos locum ambiendi. Atque hoc specimen primum innotui *Leibnitio*, qui mittente *Menckenio* idem acceperat



ceperat suoque me favore ac amicitia dignum judicaverat. Etsi valde juvenis confeceram hoc scriptum Mathematicos imitatus recentiores, qui in Mathesi universali communia Arithmeticae ac Geometriae principia generaliter tradunt; in eo tamen tradita solida etiamnum reperio, utut theoriā profundius posthac meditatus & ejus rationes altius percuratus fuerim. Maximo adjumento est philosophia practica universalis, ubi methodo demonstrativa philosophiam practicam universalem tradere constitueris. Definivi eam per *scientiam affectivam*, quia flectit voluntatem ad appetendum & averſandum: definivi per *practicam*, quia determinare docet facultatem locomotivam ad exequendum actiones internas.

## §. 71.

Possibilis quoque est philosophia artium, etsi hactenus *Technologia neglecta* (§. 39.). Eam *Technicam* aut *Technologiam* appellare posses. *definitio.* Est itaque *Technologia* scientia artium & operum artis, aut, si mavis, scientia eorum, quæ organorum corporis, manuum potissimum, opera ab hominibus perficiuntur.

Non explicandum in Technologia, quomodo motus manuum & organorum aliorum ad artis opera perficienda requisitorum per struaturam corporis fieri possint: hæc enim disquisitio ad physicam spectat (§. 59.). Reddenda hic potissimum ratio est regularum artis & operum, quæ arte perficiuntur. Specimen aliquod hujus philosophiæ dedi de agricultura in Tentamine de vera causa multiplicandi frumentum, unde apparet eam esse possibilem, sed reliquam: supponere philosophiam. Sunt enim regulæ artis veluti consecutaria theoriarum philosophicarum, in quibus earundem ratio continetur, si vel maxime exinde ab inventoribus non fuerint erutæ, immo ex ab artificibus regulas istas ad usum transferentibus ignorentur: id quod eo minus miramur, quod satis superque constet, artificibus sapissime deesse notitiam distinctam regularum, juxta quas operantur. Superius jam (not. §. 40.) monui, me Architecturam civilem per modum scientiæ tradentem dedisse hujus philosophiæ specimen. Est enim Architectura civilis hac ratione pertractata species Technologiæ.

## §. 72.

*Ipsarum quoque artium liberalium condi potest philosophia, Philosophia si nempe eadem ad formam scientiæ redigantur. E. gr. artium liberalium philosophia Grammaticæ, in qua rationes redduntur re- raliū.*  
(*Welfi Logica*) E gula-

gularum generalium ad Grammaticam in genere spectantium, non habita linguarum specialium idiotismi ratione. Atque hanc *Grammaticam philosophicam* usitato stylo dixeris. Unde simul intelligitur, quid sibi velit *Rhetorica philosophica*, *Poetica philosophica* & ita porro.

Grammatica philosophica ex Ontologia, Logica & Psychologia; Rhetorica philosophica ex iisdem & philosophia practica principia mutatur. *Thomas Campanella* Grammaticam, Rhetoricam & Poeticam philosophicam philosophiæ rationalis partes fecit & secundum propria principia tradidit. Eis quoque addidit *Historiographiam*, quam definit per artem scribendi historias ad scientiarum bases fundandum. Sed vulgo hæ philosophiæ partes negliguntur.

## §. 73.

*Fundamentum & definitio Ontologiae.*

*Sunt etiam nonnulla enti omni communia*, quæ cum de animabus, tum de rebus corporeis, sive naturalibus, sive artificialibus prædicantur. Pars illa philosophiæ, quæ de ente in genere & generalibus entium affectionibus agit, *Ontologia* dicitur, nec non *Philosophia prima*. Quamobrem *Ontologia* seu *Philosophia prima* definitur, quod sit scientia entis in genere, seu quatenus ens est.

Istiusmodi notiones generales sunt notio essentia, existentia, attributi, modi, necessitatis, contingentia, loci, temporis, perfectionis, ordinis, simplicis, compositi &c. quæ nec in Psychologia, nec in Physica commode explicantur, propterea quod in utraque scientia, tum ceteris philosophiæ partibus quibuscunque generalibus istis notionibus ac pendentibus inde principiis habemus opus. Atque ideo necessarium omnino est, ut peculiaris philosophiæ pars notionibus istis ac principiis generalibus explicandis destinetur, quæ usus longe maximi per omnem scientiam & artem, ipsamque vitam, si rite pertractetur. Absque ea profecto philosophia methodo demonstrativa nequit pertractari: immo ars inveniendi inde principia sua sumit.

## §. 74

*Artis inveniendi definitio & fundamentum.*

*Dantur etiam regule, quibus intellectus dirigitur in veritate latente investiganda.* Exemplo est Algebra & omnis Ars analytica Mathematicorum, qui veritates latentes feliciter in apertum producant & scientiam indies augeant. Pars illa philosophiæ,

sophiæ, quæ regulas istas dirigendi intellectum in veritate latente explicat, *Arts inveniendi* dicitur. Definitur adeo *Arts inveniendi* per scientiam veritatem latentem investigandi.

Vulgo Logica cum arte inveniendi confunditur, quæ etsi in eadem non contemnendum habeat usum, haud quaquam tamen eandem absolvit. peculiaribus ea opus habet artificiis, quæ aliunde quam a Logica pendunt. Monui jam Ontologiam maximi in ea usus esse: enimvero si ad specialia descendere volueris, plurima ex omni philosophiæ parte præsupponenda sunt. Hactenus nemo publice dedit, quod titulum Artis inveniendi rueri possit.

## §. 75.

*Diversa sunt corporum genera*, de quibus in Physica agitur. *Fundamentum diversarum partium Physicæ.*  
Dantur enim *corpora totalia*, ex quibus tanquam partibus componitur mundus; dantur etiam *partialia* in totalibus obvia, veluti fossilia, vegetabilia, animalia. Quamobrem Physica in diversas partes dispescitur, quæ subinde peculiaribus nominibus insigniuntur.

## §. 76.

Ea Physicæ pars, quæ de generalibus corporum affectionibus agit, pluribus eorundem speciebus communibus, *Physica generalis* appellatur. Unde *Physica generalis* definitur, quod sit scientia eorum, quæ corporibus vel omnibus, vel diversarum saltem specierum competunt. *Physica generalis definitio.*

Quæ corporibus vel omnibus, vel diversarum saltem specierum competunt, ea omnino seorsim pertractanda sunt, ne eadem aliquoties repeti sit opus. Immo si proprietatum generalium perspecta fuerit ratio, ex iis subinde in corporibus dereguntur, quæ latent.

## §. 77.

Pars Physicæ, quæ de corporibus mundi totalibus agit atque docet, quomodo ex iis componatur mundus, *Cosmologia* appellatur. *Cosmologia definitio.* Est igitur *Cosmologia* scientia mundi, qua talis.

Quoniam corpora mundi totalia moventur, Physici quoque est reddere rationem motuum eorundem. Pars Cosmologiæ, quæ de motuum celestium causis agit, a *Keplero* appellatur *Physica celestis*.

## §. 78.

*Cosmologia  
generalis  
definitio.*

*Datur* vero etiam *generalis mundi contemplatio*, ea explicans, quæ mundo existenti cum alio quocunque possibili communia sunt. Ea philosophiæ pars, quæ generales istas notiones, easque ex parte abstractas, evolvit, *Cosmologia generalis* vel *transcendentalis* a me vocatur. Definitio autem *Cosmologiam generalem* per scientiam mundi in genere.

Cosmologia generalis ignorata hætenus philosophis, etsi passim ab iis sparsim tradita fuerint, quæ ad eam pertinent. Ego consultum duxi condere hanc scientiam, propterea quod Psychologia, Theologia naturalis atque Physica inde principia sumit, nec commode alibi pertractantur, quæ ad eam referri debent.

## §. 79.

*Pneumaticæ  
& metaphy-  
sica definitio.*

Psychologia & Theologia naturalis nonnunquam *Pneumaticæ* nomine communi insigniuntur, & *Pneumatica* per spirituum scientiam definiri solet. Ontologia vero, Cosmologia generalis & Pneumatica communi *Metaphysicæ* nomine compellantur. Est igitur *Metaphysica* scientia entis, mundi in genere atque spirituum.

## §. 80.

*Meteorologia  
definitio.*

Pars Physicæ, quæ de meteoris agit, *Meteorologia* nuncupatur. Est adeo *Meteorologia* scientia meteororum, hoc est, eorum, quæ in atmosphæra generantur, ut sunt pluvia, iris, fulgur, aurora borealis.

## §. 81.

*Oryctologia  
definitio.*

Pars Physicæ, quæ de fossilibus tractat, *Oryctologia* vocatur. Est itaque *Oryctologia* scientia fossilium.

In fossilium numero sunt terræ variæ, succi concreti, veluti salia & sulphur, lapides & gemmæ, nec non metalla. Descriptio fossilium, quæ historiæ naturalis pars est, *Oryctographia* appellatur.

## §. 82.

*Hydrologia  
definitio.*

Pars Physicæ, quæ de aqua agit, *Hydrologia* appellatur. Est itaque *Hydrologia* aquarum scientia.

Omnium cum rationem reddere debeat physicus (§. 31.), reddenda quoque in *Hydrologia* ratio est motus aquarum, veluti fluminum  
atque

atque maris, fontium originis, thermarum & acidularum &c. *Hydrographia* est descriptio fontium, fluviorum, lacuum & maris, atque historię naturalis partem constituit.

## §. 83.

Pars Physicæ, quæ de plantis agit seu vegetabilibus, *Phy-Phytologia* dicitur. Est adeo *Phytologia* scientia vegetabilium. *definitio.*

Vegetabilium cum variæ sint species, quæ nonnunquam sigillatim pertractari solent; diversæ quoque sunt Phytologiæ partes. Ita *Botanica* dicitur herbarum descriptio, quæ historię naturalis pars est. *Botanologia* vero dicenda erat ea physicæ pars, quæ herbarum proprietates speciales ad rationes revocat. *Dendrologia* nuncupatur ea physicæ pars, quæ de arboribus singularia tradit. Definienda itaque *Botanologia* per scientiam herbarum; *Dendrologia* per scientiam arborum & fruticum. Enimvero cum hæcenus ne Phytologia quidem satis exculpta sit, quæ vegetabilium generalem doctrinam tradit; speciales partes ejus nunc quidem missas facimus. Eas tamen non prorsus silentio præteriri fas erat, ut appareret, quam multa adhuc in physica investiganda supersint, quæ certum generi humano usum pollicentur.

## §. 84.

Ea denique Physicæ pars, quæ de corpore animato, præ-*Physiologia*sertim humano, agit, *Physiologia* appellatur, nonnunquam & *Patholo-Oeconomix animalis* nomine venit. *Mechanicam animalium* dixit *Cladius Perrault*. *Definitur Physiologia* per scientiam corporis animati; strictius a Medicis per scientiam corporis humani sani. Alii tractationem physicam de homine in specie *Anthropologiam* vocant. Medicis *Pathologia* dicitur, quæ de corpore ægroto seu morbis, quibus affligitur, agit. Quoniam Medicinæ quoque datur philosophia (§. 39.); *Pathologia* quoque *physica* admittenda. Et cum philosophi sit reddere rationem eorum, quæ sunt ac fiunt (§. 31.); Physici quoque est reddere rationem eorum, quæ in corpore ægroti accidunt. Est itaque *Pathologia physica* scientia corporis ægroti, quæ talis.

Nil obstat, quo minus Physicus Pathologiam physicam sub Physiologia complectatur. Sanitas enim & morbus sunt duo corporis humani status, quorum rationem reddere debet Physicus. Ratio autem petitur utriusque status ex structura & natura corporis humani, adscitis causis externis, quatenus per eas actus determinatur eorum, quæ per

corporis structuram atque naturam fieri possunt. Si quis tamen pathologiam a physiologia more Medicorum distinguere velit, non improbamus. In verbis sumus faciles, modo in rerum pertractatione non perfunctoria opera adhibeatur.

## §. 85.

*Physica pars  
nomin. desti-  
tuta.*

Enimvero rerum naturalium duplices dari possunt rationes, quarum alix petuntur a causa efficiente, alix a fine. Quæ a causa efficiente petuntur, in disciplinis hæcenus definitis expenduntur. Datur itaque præter eas alia adhuc philosophiæ naturalis pars, quæ fines rerum explicat, nomine adhuc destituta, etsi amplissima sit & utilissima. Dici posset *Teleologia*.

## §. 86.

*Num plures  
philosophiæ  
partes hæc-  
enus recensitis  
dantur.*

Recensuimus hæcenus philosophiæ partes, quibus illustrandis hæcenus operam suam dicarunt philosophi. Enimvero absit, ut nobis persuadeamus, his exhauriri omnem Naturæ thesaurum. Multæ potius sunt disciplinæ philosophicæ, quæ hæcenus latent, suo autem tempore in apricum producuntur, ubi serio ad philosophandum applicaturi sunt animum eruditi, ut potius scientiæ pomœriis dilatandis studeant, quam ut vanæ ambitioni litent, qua in partes scinduntur animi exaltius contemptu atque ignominia gloriam captantes. Unius hominis non est agere omnia. Coniunctis viribus laborandum. Suffecerit adeo nobis in id incumbere, ut ante omnia disciplinæ receptæ, sed male coherentes ordinentur.

## §. 87.

*Ordo partium  
philosophiæ.*

*Ordo partium philosophiæ is est, ut præcedant, ex quibus aliæ principia mutuuntur.* Philosophia scientia est (§. 29.), adeoque ex principiis certis & immotis per legitimam consequentiam inferri debent, quæ in ea traduntur (§. 30.). Quæ igitur partes philosophiæ principia præbent aliis, ex præcedere, quæ autem principia inde mutuuntur, sequi debent. Si negas, id fieri debere: priori loco ponendæ sunt, quæ ex aliis demonstrationum principia petunt. Utendum igitur erit terminis nondum definitis, & principiis nondum demonstratis, adeoque

que antequam nobis constat, eadem certa esse ac immota. Sensum igitur propositionum non bene assequimur, nec de veritate earum sumus certi, quamdiu partes ceteræ non accedunt. Quamobrem cum id scientiæ repugnet (§. 30.), qualis philosophia esse debet (§. 29.), nec cum omnimoda certitudine consistat, cui in philosophia studendum (§. 33.); sancte custodiendus est ordo, quo prior locus cedit iis partibus, qui ceteris principia suppeditant, unde intelliguntur ac demonstrantur, quæ ibidem traduntur.

Nobis sane constitutum est hunc sequi ordinem, propterea quod præcipue intendimus veritates philosophicas concatenata serie tradere. Ideo enim eam philosophiæ formavimus notionem, vi cuius non alius ordo eidem convenit.

§. 88.

*Si philosophiæ cum fructu operam navare decreveris, Logica primo omnium loco pertractanda.* Logica enim tradit regulas, quibus facultas cognoscitiva dirigatur in veritatis cognitione (§. 61.). Quare cum philosophiæ ita studere teneamur, ut omnimodam certitudinem consequamur (§. 33.): ubi quis ad ipsius studium animum appellit, non ignorare debet, qua ratione in veritate cognoscenda versari debeat, consequenter Logica instructus accedat opus est. Ea igitur primo omnium loco tractanda.

Quando Logica primo omnium loco pertractanda.

Uso quoque receptum est, ut philosophiæ initiandi in Logicæ studio tyrocinia deponant. Nec ratio redditur consuetudinis diversa ab ea, quam dedimus. Sane qui nulla Logicæ notitia instructus est, is ignorat, qua ratione definitiones & demonstrationes sint examinandæ, num rigorem sustineant, adeoque facile admittit tanquam certa, quæ ab evidentia multum absunt, immo sæpius ea se intelligere arbitratur, quæ sunt sine mente soni.

§. 89.

*Quodsi in Logica omnia demonstranda, petenda sunt principia Logica ex Ontologia atque Psychologia.* Tradit enim ea regulas, quibus dirigatur intellectus in cognitione omnis entis (§. 61.), neque enim definitio eam ad certam entium speciem restringit.

Docce-

Docere igitur debet, quamnam sint ea, ad quæ in rerum cognitione attendere tenemur. Hæc autem ex generali entis cognitione derivanda, quæ ex Ontologia hauritur (§. 73.). Patet itaque ad demonstrationes regularum Logicæ petenda esse principia ex Ontologia. Porro cum Logica exponat modum dirigendi intellectum in cognitione veritatis (§. 61.); usum docere debet operationum ipsius in veritate cognoscenda. Quamnam vero sit facultas cognoscitiva, quamnam ipsius sint operationes, ex Psychologia addiscendum (§. 58.). Patet igitur porro, quod ad demonstrationes regularum Logicæ petenda sint ex Psychologia principia.

Clarius hæc patebunt, ubi Logicam didiceris & eam cum Ontologia atque Psychologia contuleris. Nos ea satis superque experti sumus, ubi in regularum Logicæ rationes, immo in ipsas regulas sollicita cura inquisivimus.

## §. 90.

*Quando Logica Ontologiae & Psychologiae postponenda.*

*Quodsi in Logica omnia rigoroſe demonſtranda, allatis rationibus genuinis, Logica Ontologiae atque Psychologiae poſtponenda.* Petit enim ex Ontologia atque Psychologia principia (§. 89.). Enimvero eo ordine pettractandæ ſunt philoſophiæ partes, ut eæ præcedant, ex quibus aliæ principia petunt (§. 87.). Ontologia igitur & Psychologia Logicam præcedere debent, ſi in ea ſingula rigoroſe demonſtranda, rationibus regularum genuinis allatis.

## §. 91.

*Cur Autor Logicam primo omnium loco pettractaverit.*

Methodus demonſtrativa requirit, ut Logica poſt Ontologiam & Psychologiam tradatur (§. 90.); methodus autem ſtu-  
dendi ſuadet, ut eadem omnibus philoſophiæ partibus ceteris præponatur, conſequenter & Ontologiam atque Psychologiam præcedat (§. 88.). Utrique methodo ſatiſfieri nequit. Re igitur curatius expenſa cum intelligeremus, non poſſe in Ontologia & Psychologia utiliter verſari eum, qui Logica nondum imbutus; ſacillime tamen principia ontologica & psychologica in ipſa Logica explicari poſſe, quibus ea habet opus; methodum ſtudenti præferre maluimus methodo demonſtrandi.

Tante



Tanto vero commodius hoc fieri potuit, quod principia ontologica sint definitiones, psychologica per experientiam pateant, adeoque intelligi & admitti possint tanquam vera, etiam si alia in Ontologicis tradenda nondum fuerint perfecta. Accedit, quod in Logica quædam sumi possint a posteriori, quorum demonstrationem exhibere licet in Psychologia. Ubi demonstrationem ex Psychologia didiceris, perinde erit, ac si eam in Logica traditam accepisses.

## §. 92.

*Si in philosophia practica omnia demonstranda, principia Philosophiæ petenda sunt ex Metaphysica.* Philosophia practica demonstrat, *practica* qua ratione dirigenda sit facultas appetitiva in eligendo bono & *principia metaphysica.* fugiendo malo (§. 62.). Sed Psychologia explicans ea, quæ per animas humanas possibile sunt (§. 58.) eorumque rationem reddens (§. 31.), facultatem appetitivam ejusque a ceteris facultatibus mentis dependentiam declarat. Philosophia itaque practica ex Psychologia principia petit. In Jure naturæ, quod philosophiæ practicæ pars est (§. 68.), demonstrantur officia hominis erga Deum (§. cit.) & in Ethica docetur, quomodo homo officiis istis absque obligatione externa a potestate civili manante satisfacere queat (§. 64.). Quamobrem cum officia erga Deum nec demonstrari, nec eorum praxis doceri absque illius cognitione possit, quod ex ipsa Ethicæ atque Juris naturæ pertractatione liquet; Dei autem cognitio a Philosopho ex Theologia naturali hauriatur (§. 57.); Jus naturæ atque Ethica ex Theologia naturali principia supponunt, si demonstrativa ratione pertractari debent. Philosophia practica universalis theoriam pariter ac praxin omnium philosophiæ practicæ partium generalem tradit (§. 70.), in notionibus vero istis generalibus stabiliendis non simplici vice recurrere debet ad Theologiam naturalem atque Psychologiam: quod utramque disciplinam intuenti patebit. Philosophia igitur practica universalis principia ex Theologia naturali atque Psychologia petit. Denique philosophia practica, ut omnis reliqua, in demonstrationibus suis carere nequit notionibus istis

(Wolffii Logica) F uni-

universalibus, quæ in Ontologia evolvuntur (§. 73.). Quæ expertus loquor, ex ipsa philosophiæ practicæ pertractatione liquet. Philosophia itaque practica ex Ontologia quoque principia sumit. Liquet ex demonstratis, philosophiam practicam ex Ontologia, Psychologia & Theologia naturali principia petere. Sunt autem Ontologia, Psychologia & Theologia naturalis partes Metaphysicæ (§. 79.). Palam igitur est, philosophiam practicam universam ex Metaphysica principia petere debere, si omnia accurate demonstranda.

Dedit Ludovicus Philippus Thümmigius compendium operum philosophicorum, quæ Germanico idiomate edidi, sub titulo *Institutionum Philosophiæ Wolfianæ*. Quando igitur ad ea provocho, quæ nonnisi ex ipsa disciplinarum pertractatione manifesta sunt; Institutiones Thümmigianæ interea evolvendæ sunt, donec ipsa opera prodeant nostra. Iis scribimus, quos certitudo in cognoscendo juvat. Omnem itaque movemus lapidem, ne quicquam prætermittatur, quod ad eam obtinendam conducit. Ceterum plura adduci poterant argumenta, quæ Metaphysicæ opem in philosophia practica expectant. Sed plura desideranti Thümmigius satisfaciet, si Institutiones evolvens ad citationes oculorum ac mentis aciem convertat.

## §. 93.

*Metaphysica  
philosophia  
practica  
præmittenda.*

Ex dictis consequitur, *Metaphysicam philosophiæ practicæ omni esse præmittendam, si ea demonstrativa ratione pertractari debet*. Nam si philosophia practica demonstrativa ratione pertractari debet, principia petenda sunt ex Metaphysica (§. 92.). Enimvero is partium philosophiæ ordo est, ut præcedant istæ, ex quibus aliæ principia mutantur (§. 87.). Metaphysica igitur philosophiam practicam præcedere debet.

## §. 94.

*Physica principia metaphysica.*

*Si in Physica demonstranda sunt singula accurate, principia ex Metaphysica sunt petenda*. In Physica docentur, quæ per corpora possibilis sunt (§. 59.), adeoque si demonstrativa ratione eadem pertractanda, notiones corporis, materiæ, naturæ, motus, elementorum aliæque his agnatæ generales ignorari nequeunt, cum multorum ratio ab istis derivetur. Sed notiones

tiones istas generales evolvit Cosmologia generalis, quasdam etiam Ontologia (§. 73. 78.). Physica igitur ex Cosmologia generali & Ontologia principia petit, si accurate omnia demonstranda. Immo nulla fere est notio, quæ in Ontologia evoluta suum non exerat usum in Physica, cum in omnibus demonstrationibus effectuum per suas causas, quæ in Physica traduntur, tandem ad principia ontologica deveniatur. In Physica igitur sollicita cura versans ignorare nequit, quam lucem Ontologia eidem affundat. Liqueat ex demonstratis, quod Physica, si singula accurate in ea demonstranda, ex Cosmologia generali & Ontologia principia mutuatur. Sed Cosmologia generalis & Ontologia sunt Metaphysicæ partes (§. 79.). Physica igitur ex Metaphysica principia petit.

§. 95.

Ex dictis patet, *Metaphysicam Physicæ præmittendam esse, si Metaphysica ea demonstrativa ratione pertractari debet.* Si enim Physica demonstrativa ratione pertractanda, principia petenda sunt ex Metaphysica (§. 94.). Quoniam itaque partium philosophiæ is ordo esse debet, ut ex præcedant, ex quibus alia principia mutantur (§. 87.); Metaphysica utique Physicæ præmittenda.

§. 96.

*Si Theologia naturalis methodo demonstrativa tradenda, principia ex Cosmologia, Psychologia & Ontologia petenda.* In Theologia naturali agitur de existentia, attributis & operibus Dei (§. 57.). Quodsi de his demonstrativa methodo agendum, ex principiis certis & immotis, quæ de Deo prædicantur, sunt inferenda (§. 30.). Immoti ista principia, ex quibus existentia Dei ejusque attributa firmiter concluduntur, desumenda sunt a contemplatione mundi; ab ejus enim existentia contingente necessaria consequentia argumentamur ad Dei existentiam necessariam, & ea eidem tribuenda sunt attributa, unde intelligitur mundi unicus Autor. Quamobrem cum Cosmologia generalis mundi contemplationem generalem tradit, unde ejus dependentia ab attributis divinis fit conspicua (§. 78.);

Theologia naturalis principia ex Cosmologia petit. Notiones attributorum divinorum formamus, dum notiones eorum, quæ animæ conveniunt, a limitibus liberamus. Quare cum animæ cognitio ex Psychologia hauriatur (§. 58.); Theologia quoque naturalis principia ex Psychologia desumit. Quoniam denique notionibus generalibus, quæ in Ontologia evolvuntur (§. 73.), in demonstrationibus Theologiæ naturalis maxime opus est; eadem non minus ex Ontologia principia mutuatur.

Plura hic supponimus in Theologia naturali fieri: sed quæ cum sint facti, a nobis demonstrari non possunt. Consuli circa ea interea possunt Institutiones *Thümmigii* (not. §. 92.). Ueberior tamen Ontologiæ & Psychologiæ in Theologia naturali usus patebit, ubi Theologiæ naturalis systema amplum prostackit.

## §. 97.

*Cosmologia  
generalis  
principia ontologica.*

*Si Cosmologia generalis methodo demonstrativa tradenda, principiis ontologicis opus habet.* Cosmologia generalis generalem tradit mundi & corporum, ex quibus constat, nec non elementorum, unde corpora ortum trahunt, doctrinam (§. 78.). Præsupponuntur itaque notiones entis generales, si ex generalibus principia specialiora de corporibus & eorum elementis una cum generalibus mundi attributis sint demonstranda. Quamobrem cum istas notiones Ontologia explicet, Cosmologia generalis principiis ontologicis opus habet.

E. gr. In Ontologia traduntur doctrinæ de ente composita & simplicis, quarum ista ad corpora, hæc ad elementa eorundem in Cosmologia applicatur. In Ontologia evolvuntur notiones spatii, temporis, continui, ordinis, perfectionis, vis ac potentiae &c. quibus in Cosmologia habemus opus, extensionem & continuitatem corporum, eorumque actiones ac passiones, nec non ordinem naturæ atque perfectionem universi demonstraturi.

## §. 98.

*Psychologia  
principia ontologica &  
cosmologica.*

*Si Psychologia methodo demonstrativa tradenda, ex Cosmologia & Ontologia principia sumit.* Animæ competere vim sibi representandi universum convenienter mutationibus, quæ in organis sensoriiis contingunt, nemo negare potest. Meditatus

repe-

reperi, posse hunc conceptum sumi tanquam primum & ex eo rationem reddi ceterarum mentis facultatum &, quæ per eandem intelliguntur, mutationum. Quoniam vero vis illa distincte non agnoscitur, nisi ex Ontologia notionem vis in genere & ex Cosmologia doctrinam de mundo generalem perceptam habueris (§. 73. 78.); ideo Psychologia ex Cosmologia & Ontologia principia sumere debet. Ex ipsa Psychologiæ pertractatione apparet, multis aliis notionibus generalibus, quæ in Ontologia evolvuntur (§. 73.), eandem habere opus.

## §. 99.

*In Metaphysica primum locum tuetur Ontologia seu philosophia prima, secundum Cosmologia generalis, tertium Psychologia & ultimum denique Theologia naturalis.* Partes Metaphysicæ eo collocandæ sunt ordine, ut præmittantur, unde principia sumunt ceteræ (§. 87.). Quare cum Theologia naturalis principiaumat ex Psychologia, Cosmologia & Ontologia (§. 96.), Psychologia ex Cosmologia generali & Ontologia (§. 98.), Cosmologia ex Ontologia (§. 97.); evidens est, Ontologiam primo loco pertractari debere, secundo Cosmologiam, tertio Psychologiam, quarto denique Theologiam naturalem.

## §. 100.

*Physica Teleologiæ præmittenda.* In Physica demonstratur, quænam sint rerum naturalium causæ efficientes; in Teleologia autem, quænam sint eorundem rationes finales (§. 85.). Ipso facto docemur, rationes finales tum demum patere, ubi causæ efficientes fuerint perspectæ; ita ut ex Physica petantur principia demonstrationum teleologicarum. Quare cum ea philosophiæ pars præcedere debeat, unde altera principia mutuatur (§. 87.); Physica Teleologiæ est præmittenda.

## §. 101.

*In Teleologia cognitio Dei ex Theologia naturali hausta confirmatur.* In Teleologia explicantur fines rerum naturalium (§. 85.). Quoniam itaque finis primarius in eo consistit, ut ex

*Usus Teleologiæ in cognitione Dei.*



opere agnoscat<sup>ur</sup> conditor Deus, atque adeo mens ex contemplatione rerum naturalium in Deum ascendat, quemadmodum in Theologia naturali demonstratur; in Teleologia quoque doceri debet, quomodo Deus ex rebus naturalibus agnoscat<sup>ur</sup>. Argumentis hinc petitis cum confirmentur, quæ in Theologia naturali de Deo fuere demonstrata; evidens est, cognitionem Dei ex Theologia naturali haustam in Teleologia confirmari.

Præstantissimum ideo usum habet Teleologia. Quo magis enim animus in cognitione Dei confirmatus, eo promptiores evadimus in exequendis erga Deum officiis ejusque præsertim gloria per omnes actiones illustranda. In eo vero maximum positum est ad omne virtutum genus præsidium. Parebunt ea ex philosophiæ practicæ integræ pertractatione.

## §. 102.

*Cur post  
Theologiam  
naturalem  
tractanda.*

*Teleologia post Theologiam naturalem pertractanda.* In Teleologia cognitio Dei ex Theologia naturali hausta confirmatur (§. 101.). In ea igitur supponitur, nos non modo habere notiones perfectionum divinarum, verum etiam demonstrare posse, quod Deo istiusmodi perfectiones convenient. Quamobrem cum ista cognitio ex Theologia naturali hauriatur (§. 57.), ea ante Teleologiam tractanda.

## §. 103.

*Philosophia  
practica uni-  
versalis qui-  
bus discipli-  
nis sit præ-  
mittenda.*

*Philosophia practica universalis Ethicæ, Oeconomica atque Politicæ præmittenda.* Philosophia practica universalis generalem theoriam & praxin philosophiæ practicæ tradit (§. 70.), adeoque Ethicæ, Oeconomica atque Politicæ, philosophiæ practicæ partes speciales (§. 62. 64. 65. 67.), principia sua inde mutantur. Is vero ordo partium philosophiæ est, ut præcedant, quæ aliis principia largiuntur (§. 87.). Quamobrem philosophia practica universalis Ethicæ, Oeconomicæ atque Politicæ præmittenda.

## §. 104.

*Ethicæ, Oeco-  
nomica &  
Politica quo  
loco tractan-  
da.*

*Ethica Oeconomica, Oeconomica Politicæ præmittenda.* Ex ipsa harum disciplinarum pertractatione patet, in Oeconomica supponi tanquam principia, quæ in Ethica demonstrantur;

in

in Politica vero, quæ tum in Ethica, tum in Oeconomica docentur. Patet igitur eodem, quo ante modo, quod Ethica sit præmittenda Oeconomica, Oeconomica vero Politicæ (§. 87.).

Quodsi Jus naturæ ab Ethica, Oeconomica & Politica separes, cum eo ipso theoria istarum disciplinarum contineatur (§. 68.); theoria vero tanquam præceos fundamentum eidem sit præmittenda, de quo nemo dubitat; nemo inficiabitur, Jus naturæ Ethicæ, Oeconomicae atque Politicæ præmitti debere.

*Jus naturæ  
quo loco tra-  
ctandum.*

§. 105.

*Philosophia practica statim post Metaphysicam tractari potest.* Etenim philosophia practica ex Ontologia & Psychologia potissimum atque Theologia naturali principia sua petit, ex quibus & praxin, & theoriam suam demonstrat. Quæ vero ex Physica petuntur, ea tanquam per experientiam cognita summi possint. Nil ergo impedit, quo minus philosophia practica statim post Metaphysicam tractetur.

*Philosophia  
practica cur  
post Meta-  
physicam  
tractari  
queat.*

Equidem negari non potest, quod multum in praxi morali usus sit Teleologiæ (§. 101.), consequenter cum ea post Physicam demum tractari debeat (§. 100.), Physica philosophiæ practicæ præmittenda videtur. Enimvero ad demonstrationes philosophiæ practicæ sufficiunt, quæ de Deo in Theologia naturali demonstrantur. Ut vero, quod ibi præcipitur, ipso opere exequaris, Teleologia haud parum juvat. Immo ut hic ejus usus doceri possit, præstat eandem demum post philosophiam practicam tradi.

§. 106.

*Physica statim post Metaphysicam tradi potest.* Disciplinæ palmariz, quæ ceteras ambitu suo complectuntur, sunt Metaphysica, Physica & Philosophia practica (§. 62. & seqq. & §. 59. 76. seqq.). Metaphysicam præcedere debere Physicam supra demonstratum est (§. 95.). Quoniam vero Physica ex Philosophia practica principia nulla mutuatur, non opus est ut ea ipsi præmittatur (§. 87.). Potest igitur statim post Metaphysicam tradi.

*Cur Physica  
statim post  
Metaphysi-  
cam tradi  
queat.*

Perinde adeo est (§. 105.), sive Physica, sive Philosophia practica prius loco tractetur. Quoniam tamen Teleologia principia ex philosophia

philosophia

sophia practica supponit, post hanc adeo tractanda (§. 87.), Teleologia autem Physicæ pars est (§. 85.); consultius videtur, ut Physica integra demum post Philosophiam practicam tradatur: nisi forsan Philosophiam practicam universalem cum Jure naturali Metaphysicæ jungere, Ethicam autem atque Politicam Physicæ demum subungere velis, quatenus quædam ipsius dogmata in iis usum habere possunt & Technologia, a Physica pendens (§. 71.), Politicæ principia nonnulla præbere valet.

§. 107.

*Physicæ experientialis definitio & fundamentum.*

In Physica reddenda est ratio eorum, quæ per corpora fieri possunt (§. 59. 31.). Patet autem ex demonstrationibus Cosmologicæ generalis, nos ad rationes ultimas pervenire non posse, adeoque in iis acquiescendum esse, quæ a causis proximis derivantur. Principia igitur ab experientia petenda, unde aliorum, quæ fiunt, ratio reddi potest: quæ cum non semper per observationes pateant, per experimenta in apricum sunt producenda. Ea præterea, quæ demonstrantur in Physica, experimentis confirmanda (§. 34.) & acquisito hinc gradu intermedio inter cognitionem historicam & philosophicam ad ipsam scientiam physicam præparatio fieri debet (§. 54.). Ea igitur philosophiæ pars, quæ per experimenta stabilit principia Physicæ ibique tradenda illustrat, *Physica experimentalis* vocatur. Quamobrem *Physicæ experimentalis* definitur, quod sit scientia per experimenta stabiliendi principia, unde ratio redditur eorum, quæ in naturæ rerum fiunt.

Quodsi experimenta adhibeantur ad confirmandum ea, quæ in Physica demonstrantur; eadem ipsis demonstrationibus subjungi possunt. Ceterum experimentatio posset quoque ad omnem philosophiam reliquam extendi, atque sic *Philosophiæ experimentalis* notior amplior evaderet, quam ubi vulgo ad solam Physicam experimentalem nomen istud restringitur. Sane quatenus in Teleologia confirmantur ex operum naturæ contemplatione, quæ in Theologia naturali de Deo demonstrantur, Teleologia *Theologiæ experimentalis* rationem habet. Sunt etiam experimenta moralia atque politica, hætenus quidem neglecta, sed suo loco a nobis indicanda, ne quid asseruisse videamur, quod a veritate sit alienum.

§. 108.



## §. 108.

Physica experimentalis introducta, nomen Physicæ generale esse cœpit. Quamobrem ut scientia, quæ hoc nomen olim *Physica dogmatica* acceperat (§. 59.), a Physica experimentalis distingueretur, *Physica quænam dicatur dogmatica* appellari suevit. Neque vero opus est, ut physicam dogmaticam hic definiamus: ea enim ejus definitio est, quam supra de Physica tradidimus (§. 59.).

## §. 109.

*Physica experimentalis dogmaticæ præmittenda.* Physica *Physica experimentalis* dogmaticæ principia suppeditat & ad eam facilius *rimentalis* & rectius percipiendam præparat (§. 107.). Quamobrem cum *cur dogmaticæ præmittenda.* eo solo nomine dogmaticæ sit præmittenda, quod eidem principia præbeat (§. 87.); multo magis præmittenda erit, quod ad scientiam physicam hauriendam quoque præparat.

## §. 110.

*Experimenta eo ordine sunt digerenda, ut ex anterioribus Experimentorum ordo.* ratio sequentium reddi possit. Hæc fieri posse, expertus affirmo, fit ita, quod vulgo fieri non solet. Quod vero ita fieri consultum sit, haud difficulter patet. Experimenta enim Physicæ dogmaticæ præmittuntur, ut per ea stabiliantur principia, unde ratio reddi possit eorum, quæ in natura rerum fiunt, & ut ad Physicam dogmaticam seu naturæ cognitionem scientificam præparemur (§. 107.). Quodsi experimenta eo ordine digerantur, ut ex anterioribus ratio sequentium reddi possit; ex experimentis non modo derivantur principia, quorum in reddendis rationibus eorum, quæ fiunt, usus est, sed ipsa quoque illorum principiorum applicatio addiscitur. Uterque igitur finis obtinetur, quem per experimenta intendimus. Quis ergo dubitet, experimenta eo ordine digerenda esse?

Non obstat, quod hac ratione jam multa in physica experimentalis tradantur, quæ ad dogmaticam spectant. Quæ enim in experimentalis triplicantur, ea in dogmatica omittuntur. Amplissimus est naturæ campus, ut ideo non desit in Physica dogmatica dicendorum materia. Nobis vero perinde est, sive in Physica experimentalis, sive in dogmatica (*Wolffii Logica*). *Objeçtio remouetur.*

tica thesin aliquam didicerimus, modo nobis constet, quod sit vera. Vidimus jam superius (not. §. 107.), in Physica quoque dogmatica subinde tradi debere, quod ad experimentalem spectat. Ubi certitudo cognitionis, quam omnimodam in philosophia consequi studemus (§. 33.), curæ cordique fuerit, non adeo arcti constitui possunt disciplinarum limites, ut non subinde in alia tradenda sint, quæ ad aliam pertinent. Ratio patebit ex Logica: rein ipsam expertus assevero. Ceterum hunc quoque deprehendi usum, si quidem physica experimentalis ordine a nobis præscripto pertractetur, ut partes physicae, quarum ingens est numerus (§. 80. & seqq.), absque confusione pertractari possint. Cum enim in una sæpius supponenda sint, quæ in alia traduntur; ea, quæ sibi mutuo partes diversæ præbent, principia in Physica experimentalis commode traduntur. Ita Physicæ experimentalis beneficio obtinetur, ut partes physicae dogmaticæ sigillatim methodo demonstrativa pertractari possint, nec in una supponenda sint, quæ demum in altera demonstrantur: quod etsi methodo demonstrativæ simpliciter non repugnet, modo ea, quæ in demonstratione aliqua ex subsequentibus supponuntur, ibidem independenter ab ea propositione, cujus demonstrationem ingrediuntur, demonstrantur; magna tamen circumspeditione opus est tum docenti, ne circulum in demonstrando committat, tum ipsi quoque discenti, ut certus reddatur, quod nullus commissus fuerit. Ab hac vero cura liberamur, si ea, quæ ex aliis partibus nondum pertractatis petenda forent, jam in Physica experimentalis fuere stabilita.

## §. III.

*Psychologia  
empirica fun-  
damentum  
definitio.*

In Psychologia reddenda est ratio eorum, quæ per animas humanas possibile sunt (§. 58. 31.). Quoniam ex Psychologia demonstrationum principia cum in Logica (§. 89.) atque arte inveniendi (§. 74.), tum etiam in philosophia practica petuntur (§. 92.), istarum vero disciplinarum, tanquam actionum hominis rectorum, certitudo maxime nobis curæ cordique esse debet, cum ratio specialis generali superaccedat (§. 33.); ideo in Psychologia quoque consultum est, ut principia tam momentosa per experientiam constituentur (§. 34.) & perinde ac in Physica experimentalis (§. 110.) eo ordine digerantur, ut sequentium ratio per antecedentia pateat. Ea igitur ratio est, cur *Psychologiam empiricam* philosophiæ partem

tem fecerimus, in qua per experientiam stabiliuntur principia, unde ratio reddi possit eorum, quæ per animam humanam fieri possunt. Definitio adeo *Psychologiam empiricam*, quod sit scientia stabiliendi principia per experientiam, unde ratio redditur eorum, quæ in anima humana fiunt.

Paret adeo *Psychologiam empiricam* *Physicæ* experimentali respondere atque adeo ad philosophiam experimentalem pertinere. Paret præterea, *Psychologiam empiricam* perinde ac *Physicam* experimentalem nostro modo pertractatam (§. 110.) non esse historiciæ partem; neque enim tantum recensentur, quæ de anima observantur, verum etiam notiones facultatum atque habituum inde formantur & principia alia stabiliuntur, immo etiam nonnullorum ratio redditur; quæ utique ad philosophicam cognitionem spectant (§. 6.), minime ad solam historicam referri possunt (§. 3.).

§. 112.

Postquam *Psychologiam empiricam* ab ea distinguere *Psychologia rationalis* cœpi philosophiæ parte, quam supra (§. 58.) sub *Psychologiæ rationalis* nomine definivimus; huic *Psychologiæ rationalis* nomen imposui. *quænam dicatur.* Non igitur opus est, ut *Psychologiæ rationalis* novam hic definitionem condamus.

In *Psychologia rationali* ex unico animæ humanæ conceptu derivamus a priori omnia, quæ eidem competere a posteriori observantur & ex quibusdam observatis deducuntur, quemadmodum docet Philosophum (§. 46.). Novus eum sit ausus & præjudicatæ opinioni adversus, nova vero ab initio a plerisque ægre admittantur; prægnans maxime ratio fuit, cur *Psychologiam rationalem* ab empirica discernere, ne *psychologica* promiscue rejicerentur. Etenim principiis *psychologicis* nititur theoria & praxis moralis, immo & politica, & ex iis a nobis deducitur, qui methodi demonstrativæ rationem habemus. Philosophia practica est maximi momenti; quæ igitur maximi sunt momenti, istiusmodi principiis superstruere noluimus, quæ in disceptationem vocantur. Ea de causa veritates philosophiæ practice non superstruimus nisi principiis, quæ per experientiam in *Psychologia empirica* evidentia stabiliuntur. Præcipuum enim philosophiæ fructum judicamus veritatem sinceram. Cavemus itaque, ne fini a nobis intento ipsimet obstatula ponamus. Nihil omittimus, quod a nobis eo afferri potest, ut veritati sua constet evidentia.

## §. 113.

*Technologiæ  
principia.*

*Technologia ex Physica, præsertim experimentalis, principia mutuatur.* In *Technologia* reddenda est ratio eorum, quæ arte fiunt (§. 71.). *Ars* versatur circa corpora naturalia, quorum cognitio ex *Physica* petenda (§. 59.). *Rationem* igitur redditurus eorum, quæ arte fiunt, ad *Physicam* recurrere debet. Multus præterea in arte occurrit instrumentorum apparatus, de quorum structura & usu ex principiis mechanicis iudicium ferri debet. Ista principia in *Physica* experimentalis per experimenta declarantur & confirmantur, ut in eorum notitiam etiam admittantur, qui mathematicum sunt ignari. *Rationem* itaque redditurus eorum, quæ arte fiunt, ad *Physicam* experimentalem recurrere debet. Præterea *Physica* experimentalis stabilit principia physica, quibus in explicandis iis, quæ arte fiunt, perinde opus est, ac in explicandis istis, quæ fiunt in reum natura. Evidens adeo est, quod *Technologia* ex *Physica*, præsertim experimentalis, principia mutuatur.

Ad *Technologiam* refertur quoque *Architectura civilis*, si per modum scientiæ tractetur, prout a nobis factum fuit (not. §. 71.). Enimvero qui *Architecturæ* civilis elementa a nobis tradita evoluit, is principiorum physicorum in iisdem usum agnoscet.

## §. 114.

*Technologia  
cur Physicæ  
postponenda.*

*Technologia post Physicam tractanda.* *Technologia* principia mutuatur ex *Physica* tum dogmatica, tum experimentalis (§. 113.). Quamobrem cum partes philosophiæ eo ordine sint tractandæ, ut præcedant illæ, ex quibus aliæ principia mutantur (§. 87.); *Technologia* utique post *Physicam* demum tractanda.

Cum artes sint multiplices, me non monente apparet, *Technologiam* in tot abire partes, quot sunt artes, nisi consultius fuerit, ut artium quædam genera constituantur & partes *Technologiæ* pro numero generum multiplicentur, ne numerus in nimium excreseat. Enimvero de his quidem in præsentis specialiora dicere non licet: neque enim hætenus habemus historiam artium accuratam, qualis in usum scientiæ supponitur; multo minus igitur de iis verba facere datur, quæ scientiam jam cognitam perspectamque esse supponunt.

CAPUT

## DE METHODO PHILOSOPHICA.

## §. 115.

**P**Er *Methodum philosophicam* intelligo ordinem, quo in tradendis dogmatis uti debet philosophus. *Methodi philosophica definitio.*

Observanda methodus per singulas philosophiæ partes, adeoque ordo hic diversus est ab eo, quem de integris disciplinis capite præcedente demonstravimus. Quemadmodum itaque ibidem ostendimus, quæ ratione integræ disciplinæ sint ordinandæ; ita hic docemus, quo modo in singulis disciplinis dogmata ordinari conveniat. Equidem in *Logica* usum ejus in tradendis disciplinis demonstraturi methodum istam repræsentabimus: nil tamen obstat, quo minus hoc loco ea de re nonnulla in medium proferamus, quæ absque multa *Logicæ* notitia intelligi possunt.

## §. 116.

*In philosophia non utendum est terminis nisi accurata definitione explicatis.* Si in philosophia non utimur terminis nisi accurata definitione explicatis, singularum propositionum sensus est manifestus. Enimvero scientia cum sit philosophia (§. 29.), quæcunque in ea affirmantur, demonstranda sunt (§. 30.). Quoniam vero per se patet, thesin demonstrari non posse, antequam ejus sensus sit certus; omnium propositionum philosophicarum certus esse debet sensus, adeoque non utendum est terminis nisi accurata definitione explicatis. *Cur omnes termini explicandi.*

Si utamur terminis vel prorsus non explicatis, vel definitione minus accurata expositis, eorum significatus vel prorsus obscurus est, vel minimum ambiguus, ut in priore casu propositio, quam ingreditur istiusmodi terminus, prorsus non intelligatur, in posteriore dubia sit interpretationis. Hoc autem non posse consistere cum omnimoda certitudine, cui in *Philosophia* studendum (§. 33.), attendenti manifestum esse arbitror. Vix quoque fieri poterit, ut propositiones, quarum sensus non certo nobis constat, vel vagus admodum & indeterminatus est, ad casus obvios citra errorem applicentur. Desistimus adeo fructu philosophiæ, quæ in usum scientiarum atque vitæ discitur.

tur. Nos cum hunc fructum potissimum intendamus, terminorum quoque accuratas definitiones curæ cordique habemus. Quænam vero definitiones sint accuratæ, in Logica doceamus.

§. 117.

*Principia  
philosophiæ  
qualia esse  
debeant.*

*In philosophia non utendum est principiis nisi sufficienter probatis.* Philosophia cum sit scientia (§. 29.), in ea asserta ex principiis certis & immotis per legitimam consequentiam inferri debent (§. 30.). Quodsi principia nondum sint sufficienter probata, nec eorum veritas certo nobis constabit. Sunt igitur nobis incerta. Et quoniam fieri potest, ut nobis scrupulus injiciatur; de eorum veritate ambigere aliquando possumus, consequenter ea immota non sunt. Sed id contrariatur ei, quod modo demonstravimus. Patet itaque non utendum esse principiis nisi sufficienter probatis.

Si principii locum demas, quæ sufficienter probata non sunt, omnis ex philosophia abigatur certitudo. Patebit enim in Logica, non majorem certitudinem inesse propositioni, quam deprehenditur in principiis, per quæ probatur. Quodsi quæaveris, ecquando principium sit sufficienter probatum, huic quæstioni Logica satisfaciet. In ea enim docetur, tum quomodo per experientiam stabiliantur principia certa, tum quomodo per rationia eruantur.

§. 118.

*Quænam  
propositiones  
in philosophiam  
admittenda.*

*In philosophiam propositio nulla admittenda, nisi quæ ex principiis sufficienter probatis legitime deducitur.* Philosophia scientia est (§. 29.) atque adeo propositiones suas ex principiis certis & immotis per legitimam consequentiam inferre debet (§. 30.). Nulla igitur admitti potest propositio, nisi quæ ex principiis antea positis legitime deducitur, hoc est, ex principiis sufficienter probatis, cum in philosophia non sit utendum nisi istiusmodi principiis (§. 117.).

Certitudini, cui in philosophia studemus (§. 33.), non modo consulitur per principia, si sufficienter probentur (§. 117.); verum etiam per propositionum demonstrationes, quando nimirum ex principiis legitima consequentia deducuntur conclusiones (§. præf.). Quomodo vero conclusiones ex principiis legitima consequentia deducantur, in Logica docetur.

§. 119.

§. 119.

*In philosophia termini, qui ingrediuntur definitiones sequentes, explicari debent per antecedentes.* Ordo definitionum.

Duo occurrere possunt casus: aut enim termini, qui ingrediuntur definitiones, prorsus non explicantur, aut explicantur demum in sequentibus. Casus prior pertinet ad generaliore, quo utimur terminis non sufficienter explicatis: etenim perinde est, siue id in definitionibus contingat, siue in propositionibus. Quod terminis insufficienter explicatis uti non liceat, consequenter multo minus prorsus non explicatis, a nobis jam demonstratum est ante (§. 116.). Præsens adeo propositio potissimum concernit casum posteriorem, ubi termini, qui ingrediuntur definitiones anteriores, demum explicantur in posterioribus. Contrarium fieri debere, hac ratione demonstramus. In philosophia certitudini omnimodæ studendum, ita ut nihil nobis dubii supersit (§. 33.). Quod si in definitione utamur termino nondum explicato, in ejus vero sensu hæremus, ut eam plene intelligere nequeamus. Quare cum hoc certitudini obstet, terminis non utendum est nisi in anterioribus definitionibus jam explicatis. Etsi autem obstaculum removeatur, ubi in sequentibus definitionibus explicantur termini, qui ingrediuntur priores: id tamen adhuc incommodi est, quod tædioso labore demum inquirendum sit, num circulus forsitan vitiosus fuerit commissus. Quamobrem cum hinc denuo lectori dubium subnasci possit certitudini adversum, quæ adesse debet (§. cit.), minimum nulla urgente necessitate creetur tædium in disquisitione circuli vitiosi; nemo sane negabit, præstare utique, ut termini, qui ingrediuntur definitiones sequentes, in anterioribus jam fuerint explicati.

Patet hinc ordo definitionum simulque intelligitur, quod non perinde haberi debeat, quocumque loco definitiones ponantur, ubi curæ tibi fuerit, ne quisquam admittatur, quod jure reprehendi possit.

§. 120.

*In philosophia propositiones, quæ ingrediuntur demonstrationes sequentium, demonstrari debent in antecedentibus.* Ordo propositionum.

que

que duo sunt. Aut enim in demonstrando utimur propositionibus tanquam principiis, quæ prorsus non demonstrantur, aut quæ demum demonstrantur in sequentibus. Casus prior huc non spectat: de eo enim jam diximus ante (§. 117.). De posteriori itaque intelligenda est propositio præsens. Ejus veritatem ita evincimus. In philosophia studendum est certitudini omnimodæ, ita ut nihil prorsus dubii supersit (§. 33.). Quodsi demonstrationem ingrediatur propositio tanquam principium, quæ in anterioribus nondum fuit demonstrata, dubium nobis superest, an ea vera sit, nec ne, consequenter ipsa quoque propositio, cujus demonstrationem principium dubium ingreditur, dubia manet atque incerta. Quamobrem cum id omnimodæ certitudini repugnet, quam adesse debere demonstravimus; propositiones in anterioribus demonstrandæ sunt, quæ posteriorum demonstrationes tanquam principia ingrediuntur. Est autem obstaculum removeatur, ubi in sequentibus propositiones istæ demonstrantur, quas in anterioribus supposuimus tanquam veras; id tamen adhuc incommodi remanet, quod tædioso labore demum inquirendum sit, num circulus forsan vitiosus in demonstrando fuerit admixtus. Quamobrem cum hinc de novo dubium subnasci possit lectori, evidentæ adversum, quæ adesse debet (§. 33.), minimum præter necessitatem tædium eidem creetur in examinandis propositionum demonstrationibus, quæ eam ingrediuntur, quam inferius demum demonstrandam in anterioribus interea sumimus; ut omnis circuli in demonstrando metus evanescat, quis, quæso, inficiabitur; in anterioribus demonstrandas esse propositiones, quæ demonstrationes sequentium ingrediuntur?

Paret hinc ordo propositionum, simulque intelligitur, non perinde esse, quocumque in loco propositio aliqua in medium afferatur, ubi curæ tibi fuerit cordique, ut omnes philosophi partes adimpleas, ne quis jure quidpiam reprehendere possit. Cur in hoc discursu præliminari haud quaquam fieri potuerit, ut ordini definitionum & propositionum ex asse satisfaceremus, diximus in superioribus (not. §. 30.).



§. 121.

*In propositionibus philosophicis conditio accurate determinanda, Propositio-  
sub qua prædicatum convenit subjecto, seu sub qua aliquid de re ali- num philoso-  
qua affirmatur, vel negatur.* In philosophia reddenda est ratio, *phicarum*  
cur possibilia actum consequi possint (§. 31.), consequenter cur *forma.*  
aliquid de re aliqua affirmari, vel negari debeat. Quodsi ergo  
ratio, cur prædicatum convenit suo subjecto, vel in definitio-  
ne, vel in conditione aliqua contineatur; philosophus mon-  
strare debet, quomodo vi istius vel definitionis, vel conditio-  
nis prædicatum subjecto conveniat. Quare propositionem ita  
efferre debet, ut liquido appareat, num vi definitionis, vel  
conditionis alicujus prædicatum ei tribuatur, adeoque condi-  
tio accurate determinanda, nisi vi definitionis, consequenter  
absolute eidem competat. Potest eadem propositio alia adhuc  
ratione demonstrari. Si conditio, sub qua prædicatum conve-  
nit subjecto, in propositione accurate non exprimitur; dubius  
manes, num prædicatum subjecto conveniat absolute seu omni  
in statu, an tantum sub certa quadam conditione seu aliquo  
in statu, multo minus perspicis, quo in statu idem eidem sit  
tribuendum. Qui dubius in hac ignorantia versatur, certam  
cognitionem non assequitur, multo minus omnimodæ certitu-  
dini studet: id quod notioni philosophiæ repugnat (§. 33.).

Immo fieri minime potest, ut propositio aliqua demonstretur,  
quamdiu ignoratur, num prædicatum subjecto conveniat absolute,  
an sub quadam conditione, atque in casu posteriori conditio ista non  
accurate determinatur. Etenim in priori casu initium ratiocinandi sit  
a definitione, vel ab iis, quæ inde necessario consequuntur & jam ante  
fuere deducta; in posteriori idem capimus a conditione, qua subjectum  
determinatur. Sed ea demum plene intelliguntur, ubi logica de de-  
monstratione doctrina satis perspecta: quemadmodum & ipsa theore-  
matis demonstratio Logica pertractata clarior evadet.

§. 122.

*Propositiones philosophicæ, in quibus conditio accurate deter- Propositio-  
minari, sub qua prædicatum subjecto tribuitur, sunt cum ad scien- num genui-  
(Wolffii Logica) H tiam,*

*ne forma  
militat.*

*tiam, tum ad vitam utiles.* In scientia utimur propositionibus ad ratiocinandum propositiones demonstraturi. Quamobrem si nobis innotuerit conditio, sub qua prædicatum tribuitur subiecto; nunquam propositione ista utimur tanquam principio in ratiocinando; nisi ubi vel vi assumtorum, vel vi eorum, quæ demonstrata sunt, conditio illa adesse intelligitur. Sicque vi propositionum ante cognitarum inferre licet alias nondum nobis perspectas. Atque adeo propositiones sunt ad scientiam utiles, in quibus accurate determinatur conditio, sub qua prædicatum subiecto tribuitur. In vita utimur propositionibus de rebus obviis iudicaturi. Quodsi igitur in iis accurate fuerit expressa conditio, sub qua prædicatum subiecto tribuitur, nunquam prædicatum rei obviæ tribuis, nisi ubi conditionem istam adesse intellexeris. Immo si definitio conditionis loco fuerit, ex definitione accurata in philosophia tradita (§. 116.) subiectum obviuum agnoscitur, consequenter prædicatum non tribuitur nisi ei, cui definitio competit. Ex vero itaque de rebus obviis iudicamus.

Conferri hic possunt, quæ supra (not. §. 41.) de certiori applicatione cognitionis philosophicæ, quam historicæ monuimus. Facile autem liquet, si in propositionibus non accurate exprimitur conditio, sub qua subiecto convenit prædicatum, eas per errorem cum in scientia, tum in vita applicari. Nee operosa hic opus est demonstratione, quæ id evincatur. Experientia plurima nobis suggerit exempla. Atque ea ratio est, cur tam frequens sit in iudicando error. Iudicia autem in vita cum influant in actionum nostrarum determinationem, neglectus propositionum exactarum multa damna parit. Optime adeo de genere humano merentur, qui propositiones ad genuinam formam reducant.

#### §. 123.

*Demonstrationis masculina.*

*In demonstrationibus non plura contineri debent, quam quæ lectori antecedentium gnaro sufficiunt ad revocandum cetera in memoriam ad ratiocinia complenda requisita.* Quoniam in philosophia accurata methodo pertractata sequentia per antecedentia intelliguntur & demonstrantur (§. 119. 120.), sequentia legere non debet, nisi qui antecedentium fuerit guarus. Quod-

Quodsi itaque in demonstratione posita lectori antecedentium gnaro sufficiunt ad cetera in memoriam revocandum, quæ ad ratiocinia, quibus demonstratio absolvitur, complenda requiruntur; perfecta numerisque suis absoluta demonstratio animo concipi potest, neque adeo requiritur, ut plura addantur.

Supponit philosophus lectorem, qui muneri suo satisfacit. Si quis vero suam in studio philosophiæ desiderari patitur industriam; is sibi tribuat, quod, quæ jure supponuntur, memoriam ejus non sponte subeant. Si quis vero hebetioris fuerit ingenii, quam ut veritatem philosophicam capere possit; cum a studio philosophico procul abesse jubemus. Acquiescat vel in philosophiæ cognitione historica (§. 50.), vel in gradu medio inter cognitionem philosophicam & historicam subsistat (§. 54.), quod ad usum vitæ ipsi sufficere potest (§. 51.).

§. 124.

*Singule propositiones in demonstratione eo ordine collocari debent, quo subeunt animum demonstrationem concipientis.* In Logica strationis, ostendemus (§. 551. & seqq.), omnem demonstrationem ex determinato quodam constare ratiociniorum numero, certa quadam ratione inter se connectendorum, ut conclusiones syllogismorum præbeant præmissas sequentium. Hinc constabit, omnes propositiones certo quodam ordine animum demonstrationem concepturi subire debere, ubi demonstrationem distincte concipere voluerit: quod cum necessarium sit ad certam, cui in philosophia studemus (§. 33.), cognitionem, quis negare ausit, eo ordine collocari debere propositiones, quo in demonstratione concipienda animum subire debent, cum alterius ordinis nulla prorsus sit ratio?

Non nego, in ipsis sapissime demonstrationibus mathematicis turbari hunc ordinem; sed nego id fieri cum ratione ex notione demonstrationis derivata. Quæ ex inanimadvertentia, aut rationibus aliis extrinsecis fiunt, sunt aberrationes a regula, nequaquam autem pro ipsa regula haberi possunt.

§. 125.

*Si qua cognitu utilia demonstrari nequeunt, eorum probabilitas conveniente ratione adstruenda, ipsa autem probabilia a lia a certis*

H 2

certis

ut distinguenda.

*certis probe distinguenda.* Quoniam in philosophia omnimoda certitudini studendum (§. 33.), quæ vero tantum probabilia sunt, a certitudine adhuc absunt; nemo negare potest, quod probabilia a certis distingui debeant. Idem adhuc alio modo ostenditur. In philosophia non admittenda sunt principia, nisi sufficienter probata (§. 117.), nec propositiones in eam recipienda nisi demonstrata (§. 118.). Quamobrem si qua utilia cognitu, v. gr. ut eorum cognitione in vita carere nequeamus, ad certam tamen pervenire nobis impossibile fuerit; probabilia propter solum usum tamdiu in philosophiam admittenda, donec certa cognitio obtineatur, a certis utique distinguenda sunt. Enimvero quoniam in Logica (§. 579.) docemus, probabilitatis non eundem esse gradum, ejus vero notitiam pendere a modo, quo effatum probabile adstruitur; ut de probabilitatis gradu judicari queat & intelligantur, quæ ad certam cognitionem adhuc desint, quo de defectu supplendo cogitari possit; probabilitas utique conveniente ratione, ea nempe, quæ in Logica demonstrabitur (§. 580. & seqq.), adstruenda.

Probabilia in philosophia potissimum admittuntur propter usum vitæ: est tamen quoque ratio quædam, cur in ipsum usum scientiæ admittenda, nempe quatenus cognitio certa absque prævia probabili obtineri nequit. Ratio posterior cum minus pateat priori; igitur quædam distinctius nobis sunt proponenda.

#### §. 126.

*Hypotheses Philosophicæ definitio.*

Si qua in philosophia sumuntur, quod per ea ratio reddi possit quorundam phaenomenorum, etsi demonstrari non possit in iis rationem veram contineri; ea hypothesin philosophicam constituunt. Definitio itaque *Hypothesin philosophicam* per summationem eorum, quæ esse nondum demonstrari potest, tanquam essent, rationis reddendæ gratia.

E. gr. Si quis in Astronomia in gratiam primi motus sumit Telluris in centro mundi quietem & motum cæli circa eandem ab oriente versus occasum; sumtio ista *Hypothesis* & in specie *Hypothesis terra quiescentis* vocatur.

#### §. 127.

## §. 127.

*Hypothesibus philosophicis in philosophia locus concedendus, Hypotheses quatenus ad veritatem liquidam inveniendam viam sternunt.* In philosophica hypothesibus philosophicis sumimus quædam, de quibus non constat, num sint, ac si ea essent, propterea quod rationem inde reddere licet eorum, quæ fieri observamus (§. 126.). Quod si plura inde deducantur, quam quæ fieri observavimus; ansam inde arripimus vel observandi, vel per experimenta detegendi ea, de quibus alias nequidem cogitasset, ut certiores evadamus, num quædam inde fluant, quæ experientiæ repugnant. Etenim si qua inde deducuntur, quæ experientiæ contraria sunt; hypotheseos falsitas apparet: si vero eadem eidem consentanea deprehenduntur, ejusdem probabilitas crescit. Via igitur hic sternitur ad veritatem liquidam inveniendam. Enimvero dum videmus, ex assumptis reddi posse rationem eorum, quæ fieri observamus; ansam porro arripimus inquirendi in ea, quæ sumimus, an revera in iis ratio contineatur. Unde de novo via sternitur ad veritatem liquidam perveniendi.

A multis retro seculis exempla nobis suppediavit Astronomia, in parte præsertim theoria. Cum enim fieri non posset, ut a prima statim origine theoria motus planetarum vera investigaretur; ideo Astronomi hypotheses condiderunt, unde rationes motuum cælestium derivarent. Ex iis hypothesibus deduxerunt, quæ cum observationibus contulerunt. Hinc ansam nacti sunt cogitandi de observationibus, quæ alias mentem eorum nunquam subiissent, & hypotheses continuo magis magisque emendandi, donec tandem veritatem propius intueri datum fuit. Nec male meo judicio in philosophia Astronomos imitatur, quotiescunque istiusmodi casus occurrunt, in quibus conjectando jaciuntur veritatis investigandæ fundamenta. Præbet nobis hujus rei exemplum etiam Arithmetica, quæ primum me permovit, ut de hypothesibus philosophicis mitius judicarem. Etenim cum in divisione per divisorem compositum ope abaci Pythagorici quotus partialis verus inveniri non possit, per modum hypotheseos philosophicæ sumitur divisorum integrum in notis dividendi eidem respondentibus toties contineri, quoties nota divisoris prima in nota prima dividendi eidem respondeat continetur. Instituto enim examine deprehendimus, num hypo-

thesis fallat, & ubi eam fallere contingit, eandem emendamus, donec veritati consentiat. Non tamen ideo promiscue probamus *hypotheses* omnes, sed *spurias* potius declinamus eas, ex quibus necessaria consequentia deduci nequeunt, quorum gratia assumuntur. Multo minus autem probamus illorum institutum, qui ultra *hypotheses* in philosophia non progrediuntur: id enim & notioni philosophiæ, quam nos habemus (§ 29.), & omnimodæ certitudini, cui in philosophia studemus (§. 33.), repugnat. Æqua mentis lance scrutamur singula & suum unicuique pretium decernimus.

§. 128.

*Hypothese sunt  
abusus quo-  
modo præca-  
vetur.*

*Hypotheses non ingredi debent tanquam principia demonstra-  
tionem propositionum, quæ in philosophiam tanquam dogmata admit-  
tuntur.* Hypotheses philosophicæ sumunt, quod ita esse non-  
dum probari potest (§. 126.), adeoque a certitudine plurimum  
adhuc absunt. Quamobrem si iis tanquam principiis in pro-  
positionibus demonstrandis utaris, quæ in philosophiam tan-  
quam dogmata admittuntur; principiis uteris incertis ad do-  
gmata firmanda: quod cum a foro philosophico sit alienum  
(§. 117.), hypothesebus in propositionum demonstratione nul-  
lus concedendus est locus.

E. gr. Hypothesis *Leibnitiana* de commercio inter mentem & cor-  
pus etsi ceteris palmam præcipiat; in demonstrationibus tamen mora-  
libus ac politicis a nobis non usurpatur, ne veritates momentosas, qua-  
rum in vita usus eximius, incertis pelagi fluctibus committamus. Dum  
vero Philosophus per istam hypothesein explicat, quæ ad commercium,  
quod inter mentem atque corpus intercedit, spectant; non alium ei lo-  
cum concedit, quam quem hypothesebus philosophicis vindicavimus  
(§. 127.). Similiter non probamus, si quis ex hypothesebus philoso-  
phicis demonstrare astringitur existentiam Dei, nisi ubi quis id eum in fi-  
nem fecerit, ut ab hypothese aliqua removeat impietatis suspicionem.  
Solent enim vulgo impietatis postulari philosophicæ hypothese, ante-  
quam assensu communi recipiantur: id quod omnium seculorum hi-  
storia testatur.

§. 129.

*Hypothese  
adhuc in-  
certæ quæ-*

*Si ex ante positis nondum constat, hypothesein aliquam in na-  
tura rerum obstruere, ex iis tamen quadam in eadem demonstrari  
possint: nil obstat, quo minus demonstratio afferatur.* Propositio-  
num

num in Philosophia is esse debet ordo, ut unicuique is cedat *nām sic locus*, ubi ea ex antecedentibus demonstrari potest (§. 120.). *cur.*

Quamobrem si in aliqua hypothese ex præcedentibus quædam demonstrari possunt; eorum demonstratio ibidem tradenda, tanto facilius intelligenda, quod ejus principia adhuc recenti memoriæ inhæreant. Etsi autem hypothese in natura rerum obtinere per præcedentia nondum constet; nihil tamen periculi hinc metuendum, cum in data hypothese demonstrata nulli applicentur, nisi ubi eandem obtinere reperimus. Quod si eam prorsus impossibilem deprehendamus, negamus idem, quod in ea fuerat demonstratum. Atque ita propositio hypothetica usum habet in errore refellendo. Nil itaque obstat, quominus demonstrantur, quæ ex hypothese aliqua consequuntur, ubi principia sufficientia adsunt, etsi ipsam hypothese possibilem esse nondum constet, immo etsi eam per sequentia impossibilem esse deprehendamus.

E. gr. Etsi in Ontologia nondum demonstrari possit, ens simplex proprie sic dictum, quod omni parte careat, existere, vel minimum possibile esse; id tamen non obstat, quo minus ibidem demonstrantur, quæ ex notione entis simplicis consequuntur. Quoniam enim rectam ratiocinandi viam ingressus nulli enti ea tribuit, quæ ex notione entis simplicis consequuntur, nisi ubi istud omni parte carere agnoverit; de ceteris vero, quæ partibus constare intelligit, eadem negat: nihil inde periculi foret metuendum, si vel maxime ens simplex nullum daretur, quin potius eum adhuc experiremur usum, quod constaret, quænam sint de composito neganda, ne per errorem his tribuamus, quæ iisdem repugnant. Enimvero ubi deinceps in Psychologia ostenditur, animam hominis esse ens simplex, & in Cosmologia probatur, in numero simplicium esse elementa rerum; animabus hominum & elementis rerum materialium ea applicamus, quæ de ente simplici in genere fuerant demonstrata. Quod si vero demonstratio eorum, quæ enti simplici in genere competunt, omitteretur, propterea quod ens simplex per modum hypothese tantum sumitur; eadem sigillatim de elementis rerum materialium in Cosmologia, de animabus in Psychologia, de Deo ipso in Theologia naturalis demonstranda forent, quæ una demonstratione in Ontologia comprehen-

prehendi & possunt, & debent. Istiusmodi exempla plura occurrunt in Philosophia, nec infrequentia sunt in Mathesi. Illud vero per se patet, philosophum anteriora in usum posteriorum præmittentem (§. 119. 120.) non ideo comminisci hypotheses inutiles ac steriles, ut aliqua tantum dixisse videatur.

## §. 130.

*Determinatio prædicati in propositionibus philosophicis.*

*In propositionibus philosophicis prædicatum accurate determinandum, ne scilicet subjecto plus tribuatur, quam per ante posita de eodem demonstrari potest.* Quodsi prædicatum non accurate determinetur, ita ut subjecto plus tribuatur, quam per ante posita de eodem demonstrari poterat; quod plus justo tribuitur, id quidem gratis asseritur. In philosophia autem nihil admittendum, nisi quod ex principiis in antecedentibus sufficienter probatis legitime deducitur (§. 118. 120.). Quamobrem illud, quod subjecto plus tribuitur quam per ante posita de eodem demonstrari potest, in philosophia vitio quodam subreptionis admitti nequit.

E. gr. Si quis demonstrat, dari ens necessarium sive ens a se, utrum ens illud a se non sit aliud præter Deum, non tamen dici potest dari Deum, qui sit mundi hujus autor: multo minus addere licet, quod sit mundi ex nihilo producti autor. Ita enim vitio subreptionis sumeretur, quod nondum fuerat probatum, nempe ens a se esse mundi autorem eumque ex nihilo produxisse: quod etsi verum sit, probari tamen debet, cum omnimodæ in philosophia certitudini studeamus (§. 33.). Vitatur autem vitium istud subreptionis, si in prædicatorum numero nullus sit terminus, nisi accurata definitione explicatus (§. 116.). Nam si quis dedit accuratam definitionem, qua significatum vocis Dei determinavit; is regularum ratiocinandi memor non tribuet enti, quod existere demonstravit, nomen Dei, nisi ubi demonstraverit eidem competere, quæ definitione Dei comprehenduntur. Forsan nonnullis talia moneri superfluum videtur: quodsi vero quis expertus fuerit, quam vulgare sit vitium istud subreptionis ex neglecta prædicati determinatione ortum, is aliter statuet.

## §. 131.

*Cur subinde minus de-*

*Hinc porro consequitur, subinde minus de re aliqua demonstrari debere, quam eidem competit. Quoniam enim ex dictis*

(§. 130.)



(§. 130.) patet, de subiecto non plus affirmari debere, quam *monstratur quam rei convenit.* quod ex antecedentibus de eo demonstrari potest; si minus dato in loco demonstrari possit, quam eidem competit, eo tamen ad demonstrandum alia habeamus opus, utique id tantum demonstrari debet, quod potest, ceteris in alium locum opportuniorem rejectis.

E. gr. In theologia naturali primum tantummodo demonstramus, Deum esse ens, in quo continetur ratio sufficiens actus contingentis universi, cum hinc jam porro attributa Numinis demonstrari possint. Etsi enim Deus mundum produxerit ex nihilo, ab initio tamen de dependentia mundi in existendo a Deo minus demonstratur, quam ea importat, propterea quod nostro demonstrandi modo initio Theologiæ naturalis plura demonstrari nequeunt; hæc autem opus habemus ad attributa divina stabilienda, unde deinceps porro creatio deducitur, quatenus actionem ex nihilo aliquid producentis designat. Exemplo nobis est, *Euclides*, qui, etsi non ignoraret, tres in triangulo rectilineo angulos simul esse æquales duobus rectis, & ideo externum latere uno continuato duobus internis oppositis æqualem, initio tamen minus demonstravit, nempe quod externus iste angulus sit uno oppositorum internorum major, quoniam hoc theoremate opus ipsi erat ad demonstranda alia, unde tandem istius æqualitas cum duobus internis oppositis deducebatur. Equidem *Petrus Ramus* ut in aliis bene multis, ita in hoc quoque *Euclidem* reprehendit Schol. Mar. lib. 8. & 9. p. m. 171. 178. quasi histerologiæ reum: Sed hoc non obstante in elementis Geometriæ *Euclidem* secuti sumus, propterea quod aliter faciendo rigorem in demonstrando tueri non daretur, a quo *Ramus* subinde in Geometria sua recessisse constat. At *Euclides* rigoris in demonstrando tenacissimus fuit.

#### §. 132.

In omni parte philosophiæ is tenendus est ordo, ut ea premit- *Ordo per*  
tantur, per que sequentia intelliguntur & demonstrantur, vel minus *omnem phi-*  
mum probabiliter adstruuntur. In philosophiæ parte quacunque *lophiæ.*  
non occurrunt nisi definitiones & propositiones, nec ab his  
diversum occurrere posse, in Logica demonstrabitur. Enim-  
vero in omni philosophiæ parte per definitiones anteceden-  
tes explicari debent termini, qui ingrediuntur definitiones  
sequentes (§. 119.) & in antecedentibus demonstrari debent  
(*Welfi Logica*) I pro

propositiones, quæ ingrediuntur demonstrationes sequentium (§. 120.). Immo in singulis demonstrationibus ratiocinia præcedere debent, quorum conclusiones ingrediuntur tanquam præmissæ ratiocinia sequentia (§. 124.). Patet itaque in omni philosophiæ parte eum esse tenendum ordinem, ut ea præmittantur, per quæ sequentia intelliguntur & demonstrantur, vel minimum probabiliter adstruuntur: nam probabilia quoque ex philosophia non prorsus eliminanda, utut a certis probe distinguenda (§. 125. 127.).

## §. 133.

*Methodi philosophica lex  
suprema.*

Quoniam philosophica methodus est ordo, quo in tradendis dogmatis uti debet philosophus (§. 115.), ordo vero is tenendus est, ut ea præmittantur, per quæ sequentia intelliguntur & demonstrantur, vel minimum probabiliter adstruuntur (§. 132.); hanc *supremam methodi philosophicæ legem esse apparet, quod ea sint præmittenda, per quæ sequentia intelliguntur & adstruuntur.*

## §. 134.

*Lex communis philosophiæ toti ac singulis ejus partibus.*

Idem cum ordo tenendus sit in tradendis partibus philosophiæ (§. 87.), *unus idemque ordo est per philosophiam universam ejusque hæc lex communis, quod præcedere debeant, unde quomodo-cunque pendet cognitio sequentium.*

Habes itaque hic methodi philosophicæ summam, quam primo loco ex notione certitudinis omnimodæ, cui in philosophia studendum (§. 33.), demonstrare potuissimus, regulas speciales, de quibus (§. 116. & seqq.) diximus, inde ulterius deducturi. Enimvero maluimus ex ipsa philosophiæ notione ac ejus loca notione certitudinis eas eruere, ut earum evidentia fortius perstringeret aciem mentis.

## §. 135.

*Methodi philosophicæ praxis unde pendeat.*

*Si quis methodo philosophica philosophiam tradere velit, is & regularum logicarum apprimè debet esse gnarus, & habitu pollere eandem ad praxin transferendi.* Methodo philosophica philosophiam traditurus omnes, quibus utitur, terminos accurata definitione explicare (§. 116.), principia sufficienter probare (§. 117.)

(§. 117.) & ex iis per legitimam consequentiam propositiones deducere (§. 118.) earumque tum subjectum (§. 121.), tum prædicatum accurate determinare (§. 130.), tandemque omnia ita ordinare debet, ut præmittantur ea, per quæ sequentia intelliguntur & adstruuntur (§. 133.); immo in ipsis demonstrationibus singulæ propositiones eo ordine collocandæ, quo subeunt animum demonstrationem concipientis (§. 124.), nec plures istiusmodi propositiones in medium afferendæ, quam quæ ceteras ad complenda ratiocinia requisitas lectori anteedentium gaudio in memoriam revocare possunt (§. 123.). Enimvero modum accurate definiendi, determinatas propositiones formandi & demonstrationes legitimas condendi tradit Logica. Regulis itaque methodi philosophicæ satisfactorius regulas Logicæ cognitas atque perspectas habere debet habituque polleat necesse est easdem ad praxin transferendi.

Patet hinc Logicæ ad recte philosophandum necessitas. Supponimus vero, Logicum satisfacere officio suo, ut rectum definiendi, judicandi & demonstrandi modum exponat. Trademus vero suo loco (§. 26. & seqq. Log.) criteria, unde dignoscitur, num Logicus satisfecerit officio suo. Quod vero is, qui regulas logicas novit, eas non statim ad praxin transferre possit, ipsa experientia loquitur ac ex eo confirmatur, quod habitus definiendi, accurata judicia formandi atque demonstrandi nonnisi multo exercitio acquiratur. Quænam sint ista exercitia, quibus methodum philosophicam in nostram potestatem redigimus, in Logica docemus.

## §. 136.

*Si quis alia, quam philosophica methodo, philosophiam tradere intendit; is ea tradet, quæ nec sufficienter intelligi, nec evidenter vera agnoscí possunt.* Etenim qui alia, quam philosophica methodo, de rebus philosophicis tractare instituit, is terminis utitur nulla accurata definitione explicatis, nec, si vel maxime terminos quosdam definit, eorum definitiones priori loco tradit, qui definitiones aliorum ingrediuntur (§. 116. 119.). Quamobrem sensus propositionum manet dubiæ interpretationis & in posteriori casu verendum, ne forte circulus in definiendo fuerit admissus. Illas igitur sufficienter intelligere

non licet. Idem porro utitur principiis vel prorsus non, vel non sufficienter probatis (§. 117.), in anterioribus propositiones probat per ea, quæ demum inferius sequuntur (§. 120.) & rationes, cur prædicatum subiecto sit tribuendum, magis indicat, quam ut absolutam suis numeris demonstrationem tradat (§. 123.). Principiorum itaque ac propositionum demonstrabilium veritas evidenter agnosci nequit.

## §. 137.

*Dammum  
alterum.*

Hinc consequitur, *neglecta methodo philosophica, nullam certam ac distinctam obtineri cognitionem.* Nam si methodus philosophica negligitur, nec termini, nec propositiones sufficienter intelliguntur (§. 136.), adeoque nonnisi confusa est rerum notitia. Similiter quæ traduntur, vera esse evidenter non agnoscuntur (§. cit.), adeoque dubia & incerta manet omnis cognitio.

Equidem fieri potest, ut imperiti sibi persuadeant, se optime intelligere, quæ acumine præditis vel obscura sunt, vel dubiæ interpretationis deprehenduntur, utque se de veritate alicujus propositionis convictos esse arbitrentur, ubi demonstrationum gnari multiplicibus dubiis eam adhuc involutam esse perspiciunt: enimvero nobis in præsentia non sermo est de imperitorum opinione, sed de eo, quod res est. Multa videntur, quæ non sunt. Philosophus vero statuit de iis, quæ sunt.

## §. 138.

*Dammum  
tertium.*

*Si quis philosophiam alia, quam philosophica methodo tradit, is docet, quæ ab usu vitæ abhorrent, seu quæ ad casus vitæ humanæ non commode applicari possunt.* Non urgemus hic, quod ea tradat, quæ non sufficienter intelligi possunt (§. 136.): etsi nemo facile negaverit, quod minus commode ad vitæ humanæ casus applicari possint, quæ non sufficienter intelliguntur. Alia enim adhuc ratione idem evincitur clarius. Etenim qui philosophiam alia methodo tradit, quam philosophica, is in propositionibus conditionem accurate non determinat, sub qua prædicatum convenit subiecto (§. 121.). Enimvero si propositiones ita formentur, ut conditio accurate determinetur, sub qua

qua prædicatum subiecto tribuitur; tum demum ad scientiam & ad vitam utiles sunt (§. 122.). Ergo si conditio ista in propositionibus non accurate determinatur, sed enunciationes sunt vagæ ac indeterminatæ, utilitas ista cessat.

## §. 139.

*Methodi philosophicæ eadem sunt regulæ, quæ methodi mathematicæ.* Nam in methodo philosophica non utendum est terminis nisi accurata definitione explicatis (§. 116.), nec admittitur tanquam verum, nisi quod sufficienter demonstratum (§. 117. 118.), in propositionibus subiectum pariter & prædicatum accurate determinatur (§. 121. 130.) & omnia ita ordinantur, ut præmittantur ea, per quæ sequentiâ intelliguntur & adstruuntur (§. 133. 123. 124.). Sed ex nostra commentatione de methodo mathematica & ipsa Matheseos accurata tractatione, qualem offerunt Elementa nostra Matheseos universa, liquet, in tradenda quoque Mathesi terminos accurata definitione explicari (§. 17. 18. *Metb.*) & terminos, qui ingrediuntur definitiones subsequentes, in antecedentibus explicari, nisi aliunde satis intelligatur, quæ res iis subjiciantur (§. 14. *Metb.*); principia sufficienter stabiliri (§. 30. & seqq. *Metb.*); ex definitionibus ac propositionibus in antecedentibus jam evictis propositiones, quoad subiectum & prædicatum accurate determinatas (§. 40. & seqq. *Metb.*), rigorose demonstrari (§. 43. 45. & seqq. *Metb.*). Ubique ea lex sancte custoditur, ut præmittantur ea, unde cetera intelliguntur & demonstrantur (§. 14. 43. 44. *Metb.*) Quis ergo non videt, methodi mathematicæ easdem esse regulas, quæ sunt methodi philosophicæ?

Nemo methodi philosophicæ ac mathematicæ identitatem mirabitur, nisi qui ignorat, unde utriusque regulæ deriventur. Nos regulas methodi philosophicæ ex notione certitudinis deduximus, cui in philosophia studendum esse probavimus (§. 33.). Enimvero si quis rationem requisiverit methodi mathematicæ, is non aliam deprehendat certitudine cognitionis, cui in Mathesi studendum esse quilibet Mathematicus ultro sumit: quis enim adeo vesanæ mentis erit, ut cognitionem incertam præferat certæ, ubi certa haberi potest, cum

Identitas methodi philosophicæ & mathematicæ.

nonnisi certa cognitio certum spondeat operis in vita successum? Quoniam itaque methodi philosophicæ ac mathematicæ regulæ eadem ratione nituntur; non mirum, quod ipsæ quoque regulæ eadem sint. Ceterum non opus est ut adstruamus, philosophiam methodo mathematica tractandam esse: etenim si vel maxime nulla esset *Matheſis*, vel saltem ea nondum esset adeo exulta, ut certam cognitionem offerret sui cultoribus; non aliam philosophicam methodum reperire liceret, quam eam, quæ a nobis hæcenus stabilita fuit, quamdiu certam rerum cognitionem consequi studeremus, tum ad progressum scientiarum, tum ad vitam utilem (§. 122.). Inanis adeo atque superflua omnis de methodo mathematica ad philosophiam applicanda disceptatio. Philosophia methodum suum non mutuatur a *Matheſi*; sed perinde ac *Matheſis* eam ex veriori *Logica* haurit & ideo eam sibi convenientem agnoscit, quod ea sola perveniatur ad cognitionem certam, quæ cum ad scientiarum progressum, tum ad vitam utilis. Quodsi fuerint alii, quibus cognitio incerta satisfacit, quæ ad progressum scientiarum nil confert, quin eidem potius adversatur, nec alium in vita usum spondet, quam ut ambiguo tentamine successum fortunæ committamus & spe sepiissime inani animum lacremus; eis non succensemus, quod rem suam suo modo agant summa imis miscentes, utentes terminis, quibus nulla determinata respondet idea, & defendentes propositiones vagas, de quibus, quod subiectum & prædicatum conveniente modo determinata non sunt, in utramque contradictionis partem cum veritatis quadam specie discepratur. Immo nec invidemus ipsis gloriam victoriæ reportatæ, qua sibi blandiuntur certæ cognitionis sensu destituti. Nos certam consequi studemus cognitionem, non vanitati litantes, sed progressui scientiarum & utilitati in vita intenti. Neque magis utilem judicamus disceptationem, quam in philosophia certam cognitionem consequi detur. Veniendum potius esse censemus in rem præsentem, ut experiamur quid possint humeri, quid ferre recusent. Si non ubivis statim voto respondeat eventus, hypotheses tantisper admittimus continuata industria emendandas, donec tandem veritate liquida, quam querimus, potiamur. Imitamur Astronomos, quorum per plurima secula continuam studium fax & indefessum ea tandem perfecit, quæ omnium expectationem superasse dicenda sunt. Quodsi ipsis quoque visum fuisset impossibilitatem cognitionis scientiæ sideralis speciosis argumentis a nimia siderum nobis inaccessorum distantia, ab imbecillitate rationis hu-

manæ

manz in rebus adeo abditis & a cognitione nostra remotis scrutandis, & frustrato per tot secula ingeniorum excellentissimorum successu & c. petitis adstruere; nulli equidem dubitamus, quin applausum meruissent eorum, quibus segnitiei vel vanitatis praesidium in imbecillitate rationis positum; sed ipsa scientia fideralis parum inde nata fuisset incrementi, nec ad id fastigii pervenisset, ad quod hodie eandem eventam admiramur.

CAPUT V.

DE STYLO PHILOSOPHICO.

§. 140.

*Per styllum philosophicum intelligimus genus scribendi, quo uti debet philosophus.* *Styli philosophici definitio.*

Generalia hic proponimus, quæ in omni lingua locum habent, quacunque quis philosophetur. Nequaquam vero hic nobis res est cum sermone Latino, etsi eodem philosophiam tradere constituerimus.

§. 141.

*In stylo philosophico non habenda est ratio rei alterius, quam ut alteri animi nostri sensu aperiamus.* In philosophia enim non admittenda sunt, nisi sufficienter intellecta & probata (§. 116. 117. 118.). Non itaque opus est, ut verborum lenociniis alterum capiamus & in assensum pertrahamus. Quamobrem in stylo philosophico non alterius rei rationem habemus, quam ut alteri animi nostri sensu palam faciamus.

Nos sane non intendimus nisi docere, quam quis animo concipere debeat rei ideam & quæ eidem tribuere debeat prædicata, curque eadem ei sint tribuenda. Id igitur unice agimus omni verborum apparatu, ut lectori mentem nostram perspicue declaremus, ne, si attentionem afferat ad philosophica scripta legenda requisitam, ab ea aberrare possit. Non verborum vi, sed rationum pondere assensum extorqueamus &, ut alii quoque nostra opera ad cognitionem certam perducantur, in votis habemus.

§. 142.

*In philosophia igitur a receptio verborum significatu non est recipiendum, hoc est, verbis non res aliæ a nobis denotanda sunt, quam*

*Significatus  
cur retinen-  
dus.*

quam quæ iisdem vulgo significantur. In stylo enim philosophico id unice attendimus, ut alteri mentem nostram perspicue declaremus (§. 141.). Quod si vero verbis res alias indigitamus, quam quæ iisdem vulgo significantur, aut mentem nostram prorsus non assequi potest lector, aut minimum difficulter; prout vocis vel nulla a nobis datur definitio, vel definitio lectori non semper animo obversatur. Verborum igitur significatus mutatio in alienum perspicuitati officit, quæ stylo philosophico propria esse debet.

Sunt qui sibi persuadent, vocum significatum mutari, quando aliæ afferuntur definitiones, quam quæ vulgo tradi solent. Enimvero oppido falluntur, qui sic sentiunt. Quamdiu enim eadem voce res eadem significatur, idem quoque ejus manet significatus. Dudum hoc agnatum est a Geometris, qui unam eandemque figuram diversimode definiunt, etsi satis persuasi sint, nomen significatum immutandum temere non esse. E. gr. *Apollonius* eam sectionem conici vocat *Parabolam*, quæ basin trianguli per axem secat ad angulos rectos & cuius axis est lateri conici parallelus. Sed dum *Dechales* eandem definit per figuram, cujus ordinatim applicatarum quadrata eandem rationem habent ac sagittæ; non ideo significatum vocis *Parabolæ* immutat, quam ei tribuit *Apollonius*, propterea quod eadem est figura, cui convenit definitio utraque. Similiter si quidam Deum definiunt per spiritum independentem, *Cartesius* per ens perfectissimum, nos per ens a se, in quo continetur ratio sufficiens contingentis existentie universi; idem semper est vocis Dei significatus, propterea quod illud ens, quod est spiritus independens, idem est ens perfectissimum atque ens a se, quod continet rationem sufficientem contingentis existentie universi.

#### §. 143.

*Constantia  
loquendi  
necessaria.*

*Ejusdem vocis idem constanter esse debet in philosophia, saltem in eadem ejus parte, significatus.* Ratio eadem est quæ regulæ præcedentis. Si enim voce aliqua non constanter in eodem prorsus significatu utaris, sensus subinde erit ambiguus & facile nonnulla a lectore in alienum rapiuntur: id quod perspicuitati officit, quam philosophia postulat (§. 141.). Est vero ratio adhuc alia, quæ constantem vocis ejusdem significatum iungit. In Philosophia propositiones sequentes demonstrantur per



per antecedens (§. 120.). In sequentibus adeo vocum idem esse debet significatus, qui fuerat in præcedentibus: alias enim fieri non potest per leges artis ratiocinandi in Logica (§. 346. & seq.) tradendas, ut propositiones anteriores ingrediantur demonstrationes posteriorum.

Si quis omnem Logicam habuerit perspectam, ut methodum philosophicam intimius perspiciat, atque ipso facto eandem sibi reddiderit clariorem; is evidentius percipiet, quantum inconstantia loquendi methodo philosophica repugnet. Nihil equidem communius est loquendi inconstantia, sed nihil quoque experimur accuratæ philosophandi methodo magis aduersum.

## §. 144.

Hinc consequitur, si per inconstantiam loquendi vocis cujus Vocum a  
dam significatus sit vagus & indeterminatus, in philosophia eum ad significatu  
determinatum reduci debere. In philosophia equidem a recepto vago ad  
significatu verborum non est recedendum (§. 142.), atque sic fixum re-  
retinendus videtur significatus vagus & indeterminatus, ubi usu ductio.  
fuerit receptus. Enimvero in eadem philosophia constans esse debet ejusdem vocis significatus (§. 143.), adeoque determinatus, non vagus, consequenter ab inconstantia loquendi communiter recepta recedendum. Utrumque cum fieri nequeat, quod repugnat per inconstantiam loquendi voci eidem tantisper variatos tribuere significatus, & missa loquendi inconstantia eidem fixo significatui inhaerere; ideo exceptio fieri debet ab alterutra regula. Quoniam in hoc casu vocis significatus, ut sit certus, accurata definitione explicandus (§. 116.), nullus hinc nascitur nisi lectori incauto, ad definitiones nimirum traditas non attento, sensus ambiguus. Quoniam vero loquendi inconstantia a methodo philosophica prorsus abhorret (§. 143.); ideo exceptio fieri debet a regula priori, quæ receptum usum loquendi tuetur. Significatus adeo vagus & indeterminatus ad determinatum & fixum est reducendus.

De stylo philosophico cum agimus, usum vocum, quem Logica præscribit, potissimum intendimus. Quamobrem pertractata Logica non modo clariora evadent, quæ in hoc discursu præliminari de stylo  
(Welfi Logica)

philosophico præcipiuntur; verum etiam dilucide constabit, quomodo eam ipso opere satisfieri queat. Ceterum in hoc præcipuus quidam labor philosophi consistit, ut voces a vago & indeterminato, qui vulgo obviæ, signifiætu ad fixum & determinatum reducat, accuratas rerum per eas denotarum tradendo definitiones. Difficultatem operis non modo experimur, dum nos ad id accingimus; verum eandem ipsa quoque definitionum accuratarum raritas palam loquitur. Major autem deprehenditur difficultas, ubi definitiones una ordinandæ (§. 119.), ut voces in anterioribus explicantur, quibus utimur in sequentibus: magna enim cautioe opus est, ne in circulum incidas in definiendo vitiosum. Experta loquenti non denegabit fidem, qui definitiones sparsim traditas in ipsa Mathesi colligere & ordinare decreverit experimentum rei facturus.

§. 145.

*Nominibus  
quæ sint dis-  
cernenda.*

*Quæ a se invicem differentia intrinseca constante differunt, diversis quoque in philosophia nominibus insigniri debent.* Philosophi est reddere rationem eorum, quæ sunt vel esse possunt (§. 46.). Rationes vero eorum, quæ sunt, desumuntur ab iis, quæ rebus inesse & quibus a se invicem differre intelliguntur. Quamobrem per ea, quæ rebus insunt, eorum genera & species constituere debet, ut constet, num aliquod prædicatum rei cui-dam tribuatur ex ratione generali, an ex ratione speciali, sicque judicia accurata formentur: de quibus in Logica dicemus expressius. Cum igitur per differentias intrinsecas determinentur rerum genera & species; tot constitui debent genera & species rerum, quot differentia intrinsecæ constantes deprehenduntur. Singula vero genera & singulæ species propriis insigniri debent nominibus. Quæ igitur differentia quadam constante a se invicem differunt, diversis quoque in philosophia nominibus insigniri debent.

Eadem hic militat ratio, quæ vulgo persuasit, ut diversa res diversæ sortitæ fuerint nomina. Enimvero cum in communi appellatione plurimum datum fuerit casui, parum aut nihil consilio; nec secundum notiones distinctas, sed confusas res in genera & species fuerint distributæ: non mirum videri debet, si philosopho in isto genere multa fuerint relictæ, accuratius rerum differentias scrutaturo.

## §. 146.

Nomina rerum a philosopho discretarum, sed quarum *Termini* vulgo differentia non attenditur, *Termini philosophici* dicuntur. *philosophici definitio.*

Quorum differentia vulgo non agnoscitur, ea peculiariis nominibus destituuntur: species enim & genera rerum, quæ per istas differentias determinantur, tamdiu latent, quamdiu differentiarum non agnoscuntur. Dum itaque philosophus iisdem nomina imponit, terminis utitur in philosophia, quibus extra eam consuetudo loquendi nullum concessit locum. Et ita terminos sibi peculiare habet philosophia. Idem obtinet in Mathesi, Theologia, Jurisprudentia, Medicina & quavis arte, ut termini unicuique sint proprii ex eadem ratione, quam de philosophia modo inculcavimus. Enimvero cum hodie non desint, qui terminos philosophicos fastidiunt; non abs re erit nonnulla de iis docere discretius.

## §. 147.

*Termini philosophici semel recepti non sunt immutandi: quod si Philosophi non satis accurate fuerint definiti; accuratior definitio substitiunda.* *circum terminos receptos officium.*  
Terminos philosophicos semel receptos non esse immutandos, eodem modo probatur, quo supra (§. 142.) adstruximus, receptum verborum significatum esse retinendum. Idem vero etiam hoc modo ostenditur. Si termini semel recepti non retinentur, sed eorum loco novi substituuntur, lector illorum gnarus hos non intelligit, adeoque eos in gratiam nostri scripti sibi familiares reddere debet, & contra hos qui primum didicit, illos non intelligit, adeoque aliorum scripta lecturus eosdem sibi familiares reddere debet. Aut igitur in aliorum scriptis versatus a nostris arcendus & contra, aut nulla urgente necessitate memoria terminis oneranda, quibus carere poteramus, dum non modo eos memoriarum mandari opus sit, verum etiam memoria tenendum, quinam termini in nostris scriptis respondeant terminis in scriptis aliorum. Quoniam adeo præter necessitatem lectoris industriam fatigari non convenit; termini philosophici semel recepti notique non sunt immutandi. Porro in philosophia termini omnes, quibus utimur, accurata definitione sunt explicandi (§. 116.). Quamobrem

si ab aliis non satis accurate fuerint definiti, accuratior definitio a nobis substituenda.

Ea profecto ratio est, cur nos terminos in antiqua philosophia usitatos retineamus. Non moramur, si vel maxime videantur barbari, vel vi etymologiæ rebus non satis convenient, quæ iisdem denotantur. De rebus ex earum notionibus ratiocinamur, non ex terminorum derivatione grammatica. Nec in philosophia verborum elegantia, sed veritas est, quæ delectat. Exemplo nobis sunt Astronomi, qui retinuerunt terminos ex erroneis opinionibus enatos. Istiusmodi nomina sunt affixarum & planetarum sive stellarum erraticarum: quæ appellationes dubio procul inde enatæ, quod primitus stellæ fixæ credebantur cælo solido quasi affixæ, planetæ vero incerta lege per cælum hinc inde vagari putabantur. Immo *Keplerus* in nova sua Astronomia terminos veterum Astronomorum retinuit, etsi non idem prorsus eorundem retineri potuerit significatus, sed tantisper immutandus fuerit, cum res in theoriis veterum per eas denotatæ in novis theoriis *Kepleri* non prorsus eodem modo locum habeant. Nova autem definitione non variari significarum termini, qui ante minus accurate fuerat definitus, ex supra (not. §. 142.) dictis intelligitur. Multo minus autem ferendum, si qui novos terminos comminiscuntur, quibus ab aliis dicta involvunt, ut nova invenisse, vel ab aliis hausta proprio Marte reperisse videantur, cum ventositatem non probe philosophus.

§. 148.

Terminorum usus.

*Si termini accurata definitione explicentur, cognitionem reddunt distinctam & ad progressum scientiarum vitamque utilem.* Si termini accurata definitione explicentur, res, quarum differentias intellectus beneficio distincte percipimus, nominibus quoque a se invicem distinguimus & in sua genera ac species distribuimus. Rerum vero in sua genera & species accurata distributione cognitionem reddi distinctam, uberius ex Logica patebit. Porro si res a se invicem diversæ in genera & species accurate distribuuntur, propositiones quoque accuratæ formantur, in quibus cuilibet generi atque speciei sua attribuantur prædicata. Enimvero istiusmodi propositiones sunt & ad progressum scientiarum, & ad vitam utiles (§. 122.). Cognitio igitur philo-

philosophica redditur terminorum accurata definitione explicatorum usu ad scientiarum progressum atque vitam utilis.

Si terminis caremus, toties recitanda est definitio, quoties termino est locus. Multis igitur verbis opus est, ubi vox una sufficit. Et tædiosa ista definitionum recitatio sæpissime mentem turbat. Nonne tædiosum foret in Geometria, si toties quadrati definitio recitanda foret, quoties nomen quadrati occurrit, v. gr. si in celebri illo theoremate Pythagorico dicendum foret, figuram quadrilateram æquilateram rectangulam, cujus latus sit hypotenusa trianguli rectanguli, esse æqualem duabus figuris quadrilateris æquilateris rectangulis, quorum latera sint duobus cruribus ejusdem trianguli rectanguli sigillatim æqualia?

Qui in demonstrationibus plurimum, nec sine attentione ad formam demonstrandi fuere versati, quantum adjumentum in ratiocinando sit, ubi terminorum beneficio propositiones fiunt concinnæ, satis superque experiuntur. Oppido autem falluntur, qui sibi persuadent, terminis philosophiam obscurari. Quod si enim accurata definitione iidem explicentur, lucem potius affundunt, quam primum crebro usu evaserint familiares. Absque terminorum usu non multus in scientia progressus expectari potest. His igitur carere possunt, qui in limine subsistunt. In Arithmetica dudum observavi, quantum commodus terminorum usus numeri ingentis enunciationem reddat distinctum, quæ absque eo adeo evadit confusa, ut mens perturbata vix intelligat, quod ore profertur.

#### §. 149.

*In philosophia utendum est verbis propriis: nec pluribus, quam ad veritatem nude proponendam sufficiunt.* In philosophia tradimus rerum definitiones (§. 116.) & demonstramus, quænam Styli philosophici simplicitas. ipsis sive vi definitionis, sive sub data quadam conditione conveniant (§. 121. 130.), aut quomodo aliquid a nobis fieri possit (§. 58. 71.). Quoniam suo loco in Logica (§. 153.) demonstrabitur in definitione non plura esse ponenda, quam quæ definitum in esse suo determinant; in propositionibus philosophicis conditio accurate determinanda, sub qua prædicatum subiecto convenit (§. 121.), consequenter in eis præter subiectum & prædicatum ac utriusque determinationem, si qua adfuerit, nihil ponendum; in demonstrationibus denique non plura



contineri debent, quam quæ sufficiunt ad revocandum cetera in memoriam ad ratiocinia complenda requisita (§. 123.), consequenter quæ ad demonstrationem animo concipiendam sufficiunt; nec minus per se patet, ubi docemus, quomodo aliquid a nobis fieri possit, non plura dici debere, quam quibus factis intentum consequamur: igitur non pluribus opus est verbis, quam quæ ad ea indicanda sufficiunt, quæ ad definitiones, propositiones determinatas, demonstrationes earum & problematum resolutiones seu modum, quo quid fieri debeat, requiruntur. Qui non pluribus utitur verbis, is veritatem nude proponit. *Verbi* autem *propria* sunt, quæ rebus istis, de quibus adhibentur, significandis destinantur. Quamobrem si non pluribus utendum est verbis, quam quæ animi nostri conceptibus alteri significandis sufficiunt, quemadmodum a nobis modo fuit evictum; verbis utique utendum erit propriis. Idem adhuc aliter ostenditur hoc modo. In philosophia non utendum est terminis nisi accurata definitione explicatis (§. 116.), nec a recepto verborum significato est recedendum (§. 142.), adeoque de rebus singulis, de quibus nobis sermo est, utendum est verbis, quæ iis significandis sive ex intentione philosophi (§. 146.), sive ex communi loquendi consuetudine destinantur, consequenter propriis per definitionem modo traditam.

Immo quod hic præcipitur, supremæ legi styli philosophici consentaneum, quæ nullius rei alterius rationem haberi jubet, quam ut alteri animi nostri sensa aperiantur (§. 141.). Exemplo quoque nobis sunt ab antiquissimis temporibus Geometræ, qui nonnisi verbis propriis usi, nec pluribus, quam quæ ad veritatem nude proponendam sufficere deprehenderunt. Ubi enim nil intendimus, nisi ut alterum doceamus, nulla est ratio, cur alia adhibeantur verba iisque plura, quam quæ ad hunc scopum sufficiunt. Philosophus scribit, ut proferat, non ut persuadeat, quemadmodum Orator, nec ut delectet, quemadmodum Poëta. Non aliud intendit, quam quod ex veritate, quam proponit, agnita consequi potest. Scribit enim iis, qui veritatis amore ducuntur. Absit tamen, ut quis sibi persuadeat, ea contemni quæ alio loco alio fine facit Poëta, vel Orator, qui idem philosophus. Quin potius non inconsultum judicamus, ut veritatem a philosopho eruant, quæ

quæ nuda fastiditur, pulchro haubitu vestitam in scenam producat Poëta, vel Orator, ut ejus amore capiantur, quibus nuda sese minime probat. Opera enim danda est, ut veritas ad vitam utilis omnium omnino hominum animis instilletur, quacunque demum ratione id fieri possit. Quæ a nostro scopo aliena sunt, & a foro philosophico abesse jubentur, non ideo vituperantur & ex orbe litterario proscribuntur.

## §. 150.

Hinc consequitur, *philosophum respuere debere verborum ornatum, qui Oratores juvas.* Ille enim ornatus aut in verbis *Cur stylus oratorius ex* impropriis consistit, aut in verborum ambagibus; quod utrum- *philosophia* que simplicitati styli philosophici adversatur (§. 149.). *proscribenda*

Tenenda tamen hic sunt, quæ modo ad præcedentem paragraphum *dur.* monuimus.

## CAPUT VI.

## DE LIBERTATE PHILOSOPHANDI.

## §. 151.

**D**Um philosophamur, aut nobis permissum est palam eloqui, *Libertatis philosophandi definitio.* quid nobis videatur verum, quid falsum; aut non licet tanquam verum defendere, nisi quod aliis ita videtur. Nemo non largitur, nos in priori casu uti libertate philosophandi; in posteriori nullam nobis esse relictam. *Libertas* itaque *philosophandi* est permissio publice proponendi suam de rebus philosophicis sententiam.

Philosophus, penes quem stat libertas philosophandi, definit, iudicat, asserta probat, prout ipsi visum fuerit: haud quaquam vero sibi injungi patitur, ut definitionem condar, quemadmodum volunt alii, etsi eam agnoscat regulis genuinæ Logicæ adversam, vel ut in iudicando non suo, sed aliorum staret arbitrato, quorum iudicium a veritate alienum ipsi videtur, vel ut tandem argumentum pro stabilienda aliqua thesi ab aliis allatum pronunciet validum, quod multiplici dubio involutum experitur. Liber in philosophando suo, non aliorum stare debet iudicio philosophiam traditurus. Si Astronemus per rationes astronomicas, quæ ipsi motum Telluris circa Solem annum persuadent, sta-

tuit,

tuit, Tellurem circa Solem spatio unius anni revolvi & in Astronomia per hunc motum inæqualitatem secundam planetarum explicat, in suo stat judicio in reddenda inæqualitatis istius ratione atque adeo libertate philosophandi vitur. Ita *Keplerus* motum istum defendens, quod observationibus phenomenorum cælestium eum congruere deprehenderat, etsi rerum astronomicarum imperiti eundem absurdum pronuntiabant ac impium, libertate utebatur philosophandi.

## §. 152.

*Servitutis  
philosophan-  
di definitio.*

*Servitus* contra philosophandi est coactio defendendi aliorum de rebus philosophicis sententiam tanquam veram, utut nobis contrarium videatur.

Ubi nulla in philosophando libertas, sed fæda servitus; ibi non permittitur suam de rebus philosophicis sententiam palam eloqui. Verum pronunciandum illud, quod aliis ita videtur, si vel maxime a veritate alienum deprehendatur. Definitiones condendæ sunt ad aliorum placitum, si vel maxime tales regulis definiendi contrariantur. Aliorum standum est judicio, etsi idem veritati parum consentaneum esse constet. Ad probandas theses utendum est argumentis, quæ ab aliis pro validis venditantur, etsi ea maxime infirma esse agnoscamus. Si Astronomus fuerit convictus, motum Telluris annum circa Solem observationibus cælestibus convenire, motum e contrario Solis circa terram quiescentem ab iis abhorrere, motum tamen Solis verum, motum Telluris absurdum pronunciare cogitur, nisi censuram sibi molestam incurrere velit; is libertate philosophandi destituitur & sub jugo servitutis gemit. Ita *Galileus* a Cardinalibus Inquisitoribus systema terræ motæ tanquam erroneum abjurare coactus, quod validis rationibus in Dialogis de systemate mundi adstruxerat, libertate philosophandi non fruebatur. Nondum disputamus, num libertas philosophandi prorsus integra relinqui debeat, an eam in nonnullis restringi conveniat. De eo paulo post dispiemus. Nunc tantum declaramus, quid libertatis philosophandi nomine veniat, quid e contrario servitus dicat. Nostrium adeo de facto Inquisitorum judicium hic non interponimus.

## §. 153.

*Servitus  
philoso-*

*Si quis philosophiam methodo philosophica tradere debet, ei jugum servitutis in philosophando imponi nequit.* Etenim cui jugum



jugum servitutis in philosophando imponitur, is debet admittere definitiones tanquam genuinas, quas a regulis logicis abhorre deprehendit, propterea quod alii eas judicant bonas: *phandi metho- sophica ad- versatur.* admittere debet propositiones tanquam veras, de quarum veritate dubitat, immo quas falsas esse agnoscit, propterea quod alii eas pro veris venditant: admittere debet probationes tanquam demonstrationes, quas plurimis defectibus obnoxias agnoscit, propterea quod alii rigorem & validitatem ipsarum prædicant (not. §. 152.). Sed methodo philosophica philosophiam traditurus in definiendo esse debet accuratus (§. 116. 119.), in judicando circumspectus (§. 121. 130.), in demonstrando rigidus (§. 117. 118. 120. 123.) & ordinis tenax (§. 124.), adeoque regulis methodi philosophicæ adstrictus in aliorum gratiam probare nequit, quæ iisdem adversantur. Quamobrem philosophiam methodo philosophica tradituro jugum servitutis imponi nequit.

Erunt forsan aliqui, qui sibi persuadebunt, istiusmodi servitutem philosophandi, qualem nos supponimus, ab omnium seculorum moribus abhorre. Non dicam de iis, quæ inter nos aguntur, ubi non desunt, qui cum ipsimet omnem sentiendi licentiam non modo in philosophia, sed in ipsis sacris sibi sumant, istiusmodi servitutis jugum alii intentant: neque enim desunt exempla alia, quibus idem confirmatur. Nonne Voetius, Theologus Ultrajectinus, Cartesium atheismi, minimum patrocinii atheismi postulabat, quod in demonstranda existentia Dei non tritis uteretur argumentis; sed novam ingrederetur viam, quam tutiorem in re tanti momenti judicabat? Lectu digna est epistola Cartesii ad Voetium prolixa apologetica p. m. 79. & seqq. quæ Meditationibus de prima philosophia juxta alias objectiones in eas cum responsionibus Cartesii subjungitur. Neque Campanella alia de causa in ejusdem criminis suspicionem ab hominibus libertatem philosophandi in alii non ferentibus adductus, quam quod aliis, quam receptis, armis in Atheismo triumphato adversus atheismum pugnavit. Tædet referre plura! Mallem enim inter eruditos non prostare vesaniæ ac malignæ mentis documenta.

§. 154.

Si quis philosophiam methodo philosophica tradere debet, is in eligenda  
(Wolffii Logica) L in sententia

*solius veritatis habenda ratio.* in eligendis sententiis solius veritatis rationem habere debet. Qui enim philosophiam methodo philosophica tradere debet, is

nulli propositioni in eadem locum concedere tenetur, nisi quam ex principiis sufficienter probatis legitime deducere valeat (§. 118.), immo non utendum ipsi principiis nisi sufficienter probatis (§. 117.), neque terminis nisi accurata definitione explicatis (§. 116.). Definitiones censentur accuratae, quæ Logicæ regulis respondent (*not.* §. cit.), adeoque non admittuntur, nisi quando eas iisdem respondere demonstrari potest. In Logica quoque docetur, quomodo principia certa tum per experientiam stabiliantur, tum per ratiocinia eruantur (*not.* §. 117.), adeoque philosophus principia sufficienter probata tuetur, quorum evidentiam per regulas logicas agnoscit. In eadem denique Logica docetur, quomodo conclusiones ex principiis legitima consequentia deducantur (*not.* §. 118.), adeoque philosophus tanquam demonstratum non admittit, nisi quod demonstratum esse per regulas Logicæ evincere valet. Omnis philosophi cognitio ad definitiones & propositiones earumque demonstrationes redit, quod ipso opere manifestum in Logica demonstrari potest. Quamobrem si philosophiam methodo philosophica tradit, non admittit nisi quod per regulas logicas admitti potest. Enimvero Logica eas tradit regulas, quibus facultas cognoscitiva dirigitur in cognoscenda veritate (§. 61.), consequenter qui non admittit, nisi quod per regulas logicas admitti potest, is nil admittit, nisi quia id verum esse evidenter agnoscit. Philosophiam itaque methodo philosophica traditurus in eligendis sententiis solius veritatis rationem habere debet.

§. 155.

*Non attendenda sunt rationes extrinsecæ.*

Hinc consequitur, *quamdiu philosophia methodo philosophica traditur, in eligenda sententia exulare debere omnes rationes extrinsecas.* Qui enim veritatis tantum rationem habere debet, ut sententiam unam præferat aliis, quod eam veritati consentaneam deprehendit (§. 154.); is non ob alias rationes sententiam quandam eligit, aliunde quam ab ipsa rerum cognitione derivatas, quocunque demum nomine veniant. Metho-

Methodo philosophica philosophanti perinde est, siue veritas fuerit jam olim agnita, siue recentius demum detecta; siue hodie in pretio sit, siue contemnatur; siue ab aliis fuerit eruta, siue ab ipso demum proprio Marte reperta; siue a viro celebritatem nominis consecuto defendatur, siue lateat in libro auctoris obscuri nominis. Veritatem is per se amat & eam propter se maximi facit: non eam ad famam, opes, aliorumque favorem refert. Fortunæ bona non sectatur philosophus cum dispensatio veritatis. Immo ponamus, philosophiam methodo philosophica traditurum admittere tanquam verum, quod erroneum, vel tanquam certam, quod dubium, ut aliorum gratiam aucupetur, vel quod talia defendendo ad nominis clari famam contendere videt, vel ut vinum vendibile lectori incauto propinet: cum ex antecedentibus demonstrat sequentia (§. 132.), ex principiis autem erroneis & incertis deducantur erronea & incerta (not. §. 117.); aut errores continuo multiplicare privati que commodi ergo sciens ac volens alios in errorem seducere, aut, quæ docet, inter se minime connectere, hoc est, methodo philosophicæ renunciare debet, quæ non minus præcipit, ut in philosophiam propositio nulla admittatur, nisi quæ ex principiis sufficienter probatis legitime deducitur (§. 118.), quam ut sequentia per antecedentia declarentur ac demonstrantur (§. 132.). Non jam urgeo, quod privati commodi gratia alios fraude circumvenire sit ab honestate & moribus hominis ingenui alienum.

## §. 156.

*Si quis philosophiam methodo philosophica tradere debet, is suo, Philosophus non aliorum stare debet iudicio.* Philosophiam methodo philosophica traditurus non uti debet terminis nisi accurata definitione explicatis (§. 116.), nec principiis nisi sufficienter probatis (§. 117.) nec admittere debet propositionem, nisi quæ ex principiis sufficienter probatis legitime deducitur (§. 118.) & si cognita utilia demonstrari nequeunt, eorum probabilitas conveniente ratione adstruenda, ipsa autem probabilia a certis probe distinguenda (§. 125.). Quænam definitiones sint accuratæ, quando principium sit sufficienter probatum, quomodo conclusiones ex principiis legitima consequentia deducantur, quæ ad certam cognitionem adhuc desint, unde cognoscatur, in Logica docetur (not. §. 116. 117. 118. & 125.). Philosophus igitur philosophiam philosophica methodo traditurus regulas generales ibi

traditas ad casus speciales, hoc est, definitiones, principia & propositiones applicare debet. Dum ita judicat de valore definitionum, principiorum & propositionum, suo stat judicio, non aliorum: si enim ipsemet aliorum judicio stare deberet, ista disquisitione non haberet opus. Sed hoc methodo philosophicæ repugnat.

Qui plures numeros ipse in unam summam colligit, de ejus quantitate ipsemet statuit, si vel maxime aliter assignata fuerit per errorem ab alio. Etenim si fide alterius summam sumere vellet, quanta ab eo assignatur, ipsemet calculo non haberet opus. Similiter si quis definitiones, principia, propositiones admittit ob autoritatem alterius; is non opus habet, ut ipsemet juxta regulas logicas ad examen revocet, quæ ab aliis affirmantur, vel negantur. Neque adeo opus est, ut regularum logicarum sit apprime gnarus & habitu polleat easdem ad praxin transferendi: quod tamen implicat, ubi methodo philosophica philosophiam tradere debet (§. 135.). Immo si quis tantum ob aliorum autoritatem definitiones admittit tanquam accuratas, principia tanquam sufficienter probata, propositiones tanquam legitime ex iis deductas, alias vero ut propositiones probabiles, judicio proprio neglecto; is tantum novit, quanam ab altero dicantur, adeoque nonnisi historicam habet cognitionem cognitionis alterius (§. 3.). Ab eo adeo non aliam quam historicam cognitionem cognitionis philosophicæ aliorum requisiveris (§. 8.). Quis non rideret Mathematicum, theorema geometricum de quantitate angulorum in triangulo rectilineo, quod scilicet sint duobus rectis æquales, probaturum provocare ad *Euclidem* & consensum omnium Mathematicorum? Quis non rideret eum, qui demonstrationem propositurus affirmaret, theorema demonstrari per angulorum alternorum inter parallelas æqualitatem & hanc demonstrationem consensu omnium Mathematicorum validissimam haberi; illos vero reprehenderet, qui ipsam demonstrationem evolutam darent? Eodem igitur jure ridendi sunt, qui definitionem venditari jubent pro accurata, principium pro sufficienter probato, propositionem pro demonstrata vel probabili, propterea quod alii famam consecuti illam pro accurata, istud pro sufficienter probato, hanc pro demonstrata vel probabili venditarunt: vel qui argumenta ab aliis adducta pro firmis agnoscere ac validis volunt non ferentes, ut ad formam genuinæ demonstrationis reducantur. Mirabuntur forsitan nonnulli, cur talia adeo studiose inculcentur, quæ nemo sanus in dubium revocaverit: enimvero paren-

dum

dum est tempori. Satis superque persuasi sumus, e re esse ut talia monemus.

## §. 157.

*Si quis philosophiam methodo philosophica tradere debet, is ab aliis tradita non admittere potest, nisi quatenus ea ex principiis suis demonstrari & intelligi possunt.* Philosophiam methodo philosophica traditurus in definitionibus & propositionibus non utitur terminis nisi in anterioribus explicatis (§. 116. 119.), nec propositionibus in demonstrationibus, nisi quæ in anterioribus fuerint demonstratae (§. 120.). Quamobrem si definitionem alterius suam facit, ea non continere debet terminos, nisi ab ipso explicatos. Si propositionem alterius suam facit, termini, ex quibus constat, ab eo explicati esse debent eamque ex propositionibus a se demonstratis demonstrare tenetur. Ab aliis igitur tradita non admittit, nisi quatenus ex suis intelligi ac demonstrari possunt.

## §. 158.

Hinc consequitur, *fieri posse, ut philosophiam methodo philosophica traditurus ab aliis verbis dissentiat, etsi in re sit consensus & vice versa ut in verbis sit consensus, etsi in re inter ipsos non conveniat.* Qui enim methodo philosophica philosophiam tradit, voces a significato vago ad fixum reducit (§. 144.) eidemque significatui constanter inhæret (§. 143.). Quodsi igitur contingat, ut alter vel per inconstantiam loquendi, vel suo in denominando jure usus, quo unicuique integrum est rei a se inventæ, quod commodum visum fuerit, imponere nomen, voce quadam in alio utatur significato; ubi uterque de eadem re judicium tulerit, quod a veritate non alienum, in re est consensus, in verbis vero dissensus; ubi vero alteruter de re, quam voce quadam denotat, tulerit judicium a veritate alienum, non implicat, ut judicium istud sit verum, si vox in isto significato sumatur, quem eidem tribuit alter, consequenter in verbis erit consensus, etsi in re inter ipsos non conveniat.

Non jam nostri instituti est, omnes perstringere casus, quibus ac-

cidit, ut consensus in verbis socium habeat dissensum in re & vicissim dissensus in verbis comitetur consensum in re. Sufficit quod ostendamus utrumque fieri posse. Et ut minus dubii superstitiis, qui rationum pondera trutinare nesciunt, dicta exemplis illustramus atque confirmamus. E. gr. *Leibnitius* in eximio *Theodicæ* opere vocem *mundi* sumit in generali admodum significato pro universa rerum existentium sibi que mutuo succedentium serie, propterea quod hunc significatum instituto suo convenientissimum deprehendebat, nec ab omni usu loquendi abhorreere intelligebat. De universa igitur hac serie rerum iudicium laturus affirmabat, quod sit omnium possibilem optima. Atque ideo statuebat, mundum, qui existit, esse optimum. Contra in Scriptura sacra vox *mundi* sumitur pro universo genere humano & in hoc significato de mundo iudicium laturus scriptor sacer affirmat, totum mundum esse malum. Inter scriptorem sacrum atque *Leibnitium* est dissensus in verbis, etsi in re convenient. Neque enim *Leibnitius* negat, totum genus humanum contaminatum esse malo morali, nec ulli in sacris negatur, Deum elegisse eam seriem rerum, quæ omnium possibilem optima. Quin potius re curatius expensa experimur, & *Leibnitium* in *Theodicæ* sumere tanquam extra omne dubium positum, quod universum genus humanum malo morali sit contaminatum, & scripturæ sacre effatis concordare, quod ea series rerum fuerit a Deo electa, quæ omnium possibilem optima. Nec desunt in *Mathesi* exempla, quibus dicta confirmantur. Opticus vocat corpus opacum, quod lumen non emittit, nempe in oppositione ad lucidum. Astronomus, qui Opticæ veritatibus utitur in Astronomia, vocem *corporis opaci* in eodem significato sumit, quem ei tribuit opticus. Atque hoc supposito significato affirmat, lunam esse corpus opacum. Scriptor sacer vocat *luminare*, quod lumen ad opaca diffundit, atque in hoc significato lunam perinde ac solem vocat *luminare*. In his duabus propositionibus luna est corpus opacum & luna est *luminare* dissensus est in verbis, sed non in re: nam in re convenit inter Astronomum atque scriptorem sacrum. Neque enim hic affirmat, lunam emittere lumen, consequenter non negat, eam esse corpus opacum: neque ille negat lunam diffundere lumen ad corpora opaca terrestria, consequenter largitur eam lucere. Nimirum verum est, lunam non perinde ac Solem emittere radios, sed lumine per se esse destitutam: huic tamen non repugnat, quod lumen a Sole acceptum ad Tellurem diffundere sicque corpora terrestria in tenebris constituta illuminare possit. Similiter *Leibnitius* calculum

lum seu *methodum differentialem* appellat algorithmum quantitatum differentialium: *Newtono* vero *methodus differentialis* est singularis methodus ducendi curvam generis parabolici per data quocunque puncta transeuntem. De usu methodi differentialis in sensu *Leibnitiano* iudicaturus affirmat, per methodum differentialem determinari posse facillime omnium curvarum algebraicarum tangentes, nec eam morari fractiones & quantitates radicales. Sed de methodo differentiali in sensu *Newtoniano* idem prædicari non potest. Quamobrem si quis de *Newtoniana* idem neget, non re dissentit ab altero, sed verbis, qui de *Leibnitiana* id affirmat. Porro *Newtonus* quantitates infinite parvas, quibus continuo crescentes vel decrecentes augentur, vel imminuuntur, fluxiones appellat; *Leibnitius* easdem *differentias* vel *quantitates differentiales* vocat. *Newtonus* & *Leibnitius* hic quidem verbis dissentiunt, in re tamen inter se conveniunt, quod scilicet fluxiones seu differentialia ad fluentes seu variables habeant rationem inassignabilem.

## §. 159.

Porro patet, fieri posse, ut philosophiam *metodo philosophica tradens non ex eadem ratione idem affirmet, ob quam idem affirmat alter.* Qui enim methodo philosophica philosophiam tradit, propositionem ab alio traditam non admittit, nisi quatenus eam ex principiis a se sufficienter in antecedentibus probatis legitime deducit (§. 118. 120.). Quodsi igitur principia ista fuerint diversa ab iis, quibus utitur alter ad propositionem aliquam stabiliendam; evidens est, quod idem non ex eadem ratione affirmet, ob quam id affirmat alter. Fieri autem posse, ut una eademque propositio diversa ratione demonstretur, ipso facto docemur.

*Ratio ejusdem sententia diversa*

Idem in Mathesi obtinet: quis enim ignorat unum idemque theorema diversis modis demonstrari solere, nisi in eadem fuerit hospes, aut plures uno non evolverit libros? Dum vero constat, idem affirmantes & negantes diversa niti posse ratione; si thesin aliquam ab uno autore male probatam ab altero defendi intelligimus, non iidem is male causam suam egisse dicendus erit, antequam rationes ejus perspexerimus. Vera esse possunt, quorum veritatem probare autor aliquis nequit. Quamobrem non repugnat, ut alius aliquando veniat, qui veritatem evidenter monstret. Thesis non inde arguitur erronea, quod sit male probata: Sed eam esse erroneam firma demonstratione evincendum.

dum. Enimvero si unius ejusdemque rei plures fuerint rationes, idem ob diversam rationem solide adstrui potest. E. gr. Utilitatis studii mathematici ad philosophandum complures dari possunt rationes, quatenus scilicet philosophiæ principia, vel exempla regulas & notiones bene multas illustrantia suppeditat, mentemque ad scientiam præparat. Unus igitur hoc, alius alio argumento istam Matheſeos utilitatem evincere valet. Similiter non una est ratio, cur influxus physicus animæ in corpus & corporis in animam hodie impugnetur & rejiciatur. Sunt quidam, qui eum rejiciunt, quod distincte explicari non possit. Sed absolum foret, si omnibus, qui eum non admittunt, tribuere velis non aliam ob rationem eum ab ipsis ex philosophia proſcribi, quam quod ejus nullum habeant conceptum. Similiter non desunt, qui influxum physicum rejiciunt, quod actionem spiritus finiti in corpus impossibilem judicant. Absolum vero foret omnibus tribuere sententiam de impossibilitate actionis spiritus finiti in corpus, quibus influxus physicus non probatur.

## §. 160.

*Sententia alterius pars adoptari potest, integra missa.*

Nec minus patet fieri posse, ut philosophiam methodo philosophica tradens non integram alterius sententiam, sed aliquam partem ejus partem adoptet. Etenim methodo philosophica philosophiam tradens ab aliis tradita non admittit, nisi quatenus ea ex iis, quæ a se stabilita sunt, legitime deducere valet (§. 118.). Quodsi ergo contingat, ut nonnisi aliqua, quæ defendit alter, ex principiis suis deducere possit; non integram alterius sententiam adoptat, sed eam tantum, quam ex principiis suis deducere valet.

Qui methodo philosophica non philosophantur, nec rationibus tantum intrinsicis, verum etiam extrinsecis assensum determinant, quales supra (not. §. 155.) complures recensuimus, integram adoptare solent aliorum sententiam, quorum aliquam tantum partem principiis suis conformem deprehendunt. Ista autem præcipitantia non consistit cum methodo philosophica, quæ rationes extrinsecas respuit. E. gr. Scholastici & cum iis Theologi antiqui inter æternitatem absolutam ac independentem, quæ est solius Dei, & æternitatem dependentem, quam mundo non repugnare arbitrabantur, distinguunt. Potest aliquis admittere discrimen inter æternitatem independentem ac dependentem, propterea quod ipsum ex principiis suis evidenter monstrare valet; sed ideo non opus est, ut æternitatem mundi ætalem defendat,



dit, vel ut possibilem agnoscat: absolum vero foret possibilem asserenti tribuere sententiam de actuali. Qui mundi æternitatem possibilem tuentur, dependentem quoque æternitatem possibilem agnoscunt. Enimvero qui solum discrimen inter æternitatem independentem ac dependentem admittunt, illi æternitatem dependentem nonnisi hypothetice possibilem statuunt, posito scilicet, quod mundi æternitas sit possibilis. *Leibniti*us elementa rerum materialium statuit esse monades sive substantias simplices, quæ gaudeant vi repræsentandi universum limitata. Potest aliquis admittere, quod substantiæ simplices sint elementa rerum materialium, potest etiam iis tribuere vim, qua continuo modificantur: non tamen opus est, ut in eis agnoscat vim repræsentativam universi. Qui enim concedit, posse ens aliquod referri ad quoddam genus; non alteri largiri tenetur, quod pertineat ad datam aliquam speciem sub genere isto contentam, cum plures sint species ejusdem generis. *Copernicus* stabilivit Solem centrum motuum planetarum & in horum numerum retulit quoque Tellurem. *Tycho* admisit Solem tanquam centrum motuum planetarum: non tamen idcirco assumit motum Telluris circa Solem.

## §. 161.

*Si quis methodo philosophica philosophiam tradit, is efficere Ab aliis dis-*  
*potest, ut ab aliis dicta & clarius intelligantur & ad majorem certitudinem*  
*perducantur & eorum cum ceteris veritatibus nexus per-*  
*spiciatur.* Qui philosophiam methodo philosophica tradit, is non admittit propositiones, nisi quarum termini ab ipso fuerint explicati (§. 116.) & quas ex principiis ante sufficienter probatis legitime deducere valet (§. 117. 118.). Quamobrem si quas ab aliis propositiones mutuatur, eas non admittit, nisi quatenus per definitiones suas explicari & ex principiis suis demonstrari possunt. Quodsi igitur alii terminos propositiones ingredientibus vel prorsus non, vel non satis accurate definiverint, ipse autem eorum meliores tradiderit definitiones; eo ipso efficitur, ut ab aliis dicta clarius intelligantur. Similiter si alii propositionis veritatem vel prorsus non demonstraverint, vel non sufficienter evicerint, inprimis vero eam extra nexum cum aliis veritatibus proposuerint; ipse autem e contrario firmiorem dederit demonstrationem eamque in systemate  
 (Wolfii Logica) M cum

cum veritatibus ceteris connexam exhibuerit, eo ipso efficitur ut ea ad maiorem certitudinem perducatur ejusque cum ceteris nexus perspiciatur.

Methodo igitur philosophica philosophiam tradens ab aliis dicta nova eaque multa luce sæpissime illustrat, dumque ea per suas definitiones explicat & ex suis principiis demonstrat, immo & eis deinceps perinde ac ceteris utitur tanquam principiis ad alia demonstranda, eadem sua facit. Unde accidit, ut plurimi aliorum dicta non satis intelligant, nec eorundem veritatem intime perspiciant, nisi ubi eadem hac luce fuerint collustrata. E. gr. *Robertus Hooke* docuerat, planetas primarios gravitate in Solem & vi hujus gravitatis a motibus rectilineis retrahi: sed hanc hypothesin demonstrare non poterat. Enimvero postquam *Newtonus* in eminente opere *principiorum philosophiæ naturalis mathematicorum* in summo rigore geometrico demonstravit, admisso impetu impresso & gravitate versus centrum Solis planetas juxta leges a *Keplero* per observationes stabilitas non in alia orbita, quam ellipsi *Apolloniana* moveri posse, atque vim, qua planetæ a motibus rectilineis detorquentur, tendere in centrum Solis & leges gravitatis servare; absonum omnino foret, si quis asserere vellet, causas physicas motuum cælestium jam traditas fuisse ab *Hookio*, ut inventis viri summi derogaret. Demonstrationes *Newtonianæ* longe aliam ingenii vim judicii acumen & longe plus Geometriæ interioris atque scientiæ mathematicæ requirunt, quam ad hoc sufficit, ut orbitas ellipticas *Kepleri* & motum projectorum in parabola a *Galileo* traditum perpendentis mentem subeat cogitatio de gravitate versus Solem motus elliptici, aut potius saltem curvilinei causa. Aliter longe sese res habet, ubi alia, quam philosophica methodo, philosophantes suos ex aliis centones conscribunt, in quibus alienis non modo lux nova nulla affunditur, sed novæ potius sæpissime tenebræ inducuntur, dum non modo ea minus explicantur & demonstrantur, quam factum fuerat ab aliis, sed sensus prorsus in alienum detorquetur: ut alios navos sileamus, quibus bene posita ab aliis deformantur.

## §. 162.

*Cur in erroribus resutandis opera perdat a philosopho.*

*Si quis methodo philosophica philosophatur, is oppositas sententias refellere non habet opus.* Qui enim methodo philosophica philosophatur, is non admittit propositionem tanquam veram, nisi quam ex principiis sufficienter a se probatis deducere valet (§. 117. 118.) & probabilia a certis distinguit (§. 125),

net

nec hypothesibus utitur in demonstrandis dogmatis tanquam principiis (§. 128.). Quod si ergo quis aliter sentit, is vel negat, quod alter affirmat, vel pro incerto venditat, quod illi demonstratum habetur, & contra pro certo habet, quod ille incertum pronunciat. Quamobrem cum affirmativa ab illo fuerit demonstrata, eo ipso destructa est negativa, & qui demonstrationem percepit, cum affirmativam tanquam certam amplectatur, sponte sua missam facit negativam. Superfluum itaque foret, sententiæ negativæ refutandæ peculiarem operam impendere. Eodem modo sese res habet, si negativa fuerit evicta, aliis affirmativam tuentibus. Similiter si ab eo, qui methodo philosophica philosophatur, propositio aliqua nonnisi probabiliter adstrui possit, neminem id turbabit, si vel maxime alius eam pro certo venditet. Quoniam enim ille rationes indicat, quæ deficiunt, quo minus thesis demonstrari possit; quamdiu alius defectum non supplet, ejus assertioni nemo fidem habebit, qui defectum evidenter perspicit. Frustraneum itaque foret, si in revellenda alterius sententia peculiarem operam collocare vellet.

His rationibus permotus Philosophus nonnisi propositionum veritatem demonstrat, & si aliquando contingit, ut oppositam removeri opus sit, vel per modum corollarii falsitatem oppositæ infert, vel ad firmandam propositionem veram utitur demonstratione per indirectum. Eum scilicet morem sequitur philosophus, ubi veritatem solam curæ cordique habet: id quod non potest non fieri, ubi methodo philosophica philosophari constituit. Qui nihil affectui dat, nec ex eo, quod erraverint alii, voluptatem percipit, sed tum demum delectatur, ubi veritatis, quam evidenter agnoscit, alios simul participes facit; is non convenientius judicabit medium errores refellendi, quam si veritates iis oppositæ per indirectum demonstrantur. Vanitatem venandi gloriam ex erroribus aliorum evidentius agnoscere licebit, ubi de origine erroris in Logica (§. 626. & seqq.) egerimus.

## §. 163.

*Si quis methodo philosophica philosophatur, is defendere Methodo  
negat veritati revelate contraria. Qui enim methodo philo-philosophica  
M 2 sophi-philosophica-*

*ius non con-  
tradicit ve-  
ritati revela-  
ta*

sophica philosophatur, is non admittit tanquam verum, nisi sufficienter demonstratum (§. 117. 118.) & sicubi contigit ipsum errare, facile erroris convincitur monstrata propositionis erroneæ cum ipsius principiis repugnantia, cumque solius veritatis rationem habeat (§. 154.), errorem agnitum non diffitetur, sed emendat: id quod etiam ea de causâ fieri necesse est, quod, cum sequentia ex antecedentibus deducat (§. 120.), viam ad ulteriora sibimet ipse præcludat. Jam extra controversiam positum est, etsi hoc loco demonstrari non possit, & suo loco a nobis ostendetur, veritatem naturalem seu philosophicam revelatâ contradicere non posse. Quodsi ergo quis methodo philosophica philosophatur, is non defendit veritati revelatâ contraria.

Fieri potest, ut defendat, quæ erroneis interpretationibus scripturæ sacræ, vel iis, quæ non legitima consequentia inde deducuntur, contraria sunt. Sed erronea scripturæ sacræ interpretatio & ea, quæ parum legitima consequentia inde deducuntur, non sunt veritas revelata. Quamobrem si contingit, philosophum incidere in propositionem propositioni theologicæ, aut interpretationi loci cuiusdam scripturæ contrariam; cum theologus non minus, quam philosophus errare possit, non modo ad examen revocari debet thesis philosophica, verum etiam theologia & interpretatio scripturæ. E. gr. Credebatur olim a Patribus quibusdam ecclesiæ rotunditas Telluris scripturæ sacræ adversa, propter quædam scripturæ loca, quæ ita interpretabantur, ut cum iis rotunditas Telluris consistere non posset. Rerum astronomicarum gnarus philosophus demonstrabat Tellurem esse rotundam, non hemisphæricam. Thesis adeo philosophica interpretationi quorundam scripturæ locorum contradicebat. Non sumi poterat interpretatio scripturæ tanquam vera & inde redargui thesis philosophica erronea. Incumbebat potius & philosopho suam examinare demonstrationem, & theologo suam scripturæ sacræ interpretationem. Philosophi fecere, quod ipso erant partium, tandemque rotunditatem Telluris adeo evidenter demonstrarunt, ut de ea dubitari impossibile foret. Hac luce percussus Theologi falsam scripturæ interpretationem agnovere, sicque in gratiam rediere cum philosophis

§. 164.

*Nec contra-  
ria docet vir-  
tuti*

*Si quis methodo philosophica philosophatur, virtuti contra-  
ria docere nequit. Qui methodo philosophica philosophatur, non*

non admittit tanquam certa nisi demonstrata (§. 117. 118.), nec tanquam probabilia, nisi quorum probabilitatem conveniente ratione adstruere valet (§. 125.), neque utitur hypothesibus ad dogmata probanda (§. 128.). Quæ ex principiis veris demonstrari possunt, virtuti repugnare nequeunt, nam & ipsa virtutis notio per ista principia stabilitur: quod in philosophia practica universali patebit. Qui vero probabilibus non utitur instabiliendis dogmatis, neque hypothesi quantumvis probabili hic concedit locum, is, si vel maxime probabilia veritati non prorsus consentanea sint, & hypothesis prorsus fallat, virtuti tamen nil quicquam præjudicat.

E.g. Si quis methodo philosophica philosophatur, is nihil periculi creat virtuti, si vel maxime fallat hypothesis, qua in explicando commercio inter mentem & corpus utitur. Qui enim methodo philosophica philosophatur, is hypothesin non vendit pro veritate demonstrata, neque adeo eadem utitur in demonstrandis principiis moralibus. Sumit enim, quod experientia certum est & cujus explicandi gratia hypothesis excollitur, tanquam principium: quod autem experientiæ consentaneum, nullam labem ab hypothesis contrahit, per quam id explicare conatur philosophus. Ponamus eum adoptare systema harmoniæ præstabilitæ a *Leibnitio* ad explicandum commercium inter mentem & corpus excogitatum. Quoniam experientiæ consentaneum, animam & corpus ita agere, ac si in se mutuo influerent; in omni hypothesis, qualiscunque tandem ad hoc commercium explicandum excogitatur, id sumitur tanquam verum, adeoque etiam in systemate *Leibnitiano*. In praxi adeo morali sumimus, quod experientiæ consentaneum, talemque præscribimus, qualis foret, si anima & corpus in se mutuo influerent. Si enim vel maxime systema harmoniæ præstabilitæ eidem adversaretur, non tamen inde concluditur, falsum esse, quod certa experientiæ fide constat, sed e contrario, ubi repugnantia agnoscitur, inde infertur, hypothesin esse falsam. Frustra igitur ab harmonia præstabilita virtuti interitum metuimus. Agnovit hæc curia Romana, quæ systemate *Copernicano* permittit uti tanquam hypothesi in explicandis & computandis motibus cælestibus, non tamen tanquam dogmate, ut ei conformiter scriptura sacra explicetur, antequam veritas ejusdem ita fuerit evidens, qualis est rotunditatis Telluris. Si qui veritati revelatæ vel contradicunt, vel talia docent, ex quibus eidem

dem repugnantia legitima consequentia inferuntur; illi contra methodum philosophicam philosophantur, utentes principiis incertis, vel demonstrationibus parum firmis. Ista igitur repugnantia ex principiis ipsorum est demonstranda & inprimis principiorum incertitudo ac paralogsimi commonstrari debent.

## §. 165.

*Nec statui publico contraria.*

*Qui methodo philosophica philosophatur, non docet statui publico contraria.* Supponimus statum non nimium degenerasse a forma genuina & tum demonstratio fuit ut ante (§. 164.). Quodsi vero contingat formam ejus esse pravam, tum methodus philosophica philosophatus non tamen turbas creat, propterea quod formam genuinam tantum in genere docet, nulla applicatione in singulari facta. Cum veritatibus enim universalibus res est philosopho, minime autem cum singularibus. Et quoniam in genuina philosophia civili ultima lex stabilitur salus & tranquillitas publica; ideo methodo philosophica philosophatus non admittere potest, quæ eidem repugnant ob veritatum nexum, cui studet (§. 173.). Quamobrem si agnoscit, quod dogma sine metu turbarum evulgari non possit, illud silentio premit, ut statui civili pariter atque ecclesiastico sua constet tranquillitas.

Accedit, quod philosophica demonstratio aciem quidem mentis perstringat, ut in assensum pertrahamur, haud quaquam vero animum commoveat, ut ad turbas inclinemur, præsertim ubi nulla sit ad statum præsentem applicatio. Sed de hac re in Politica ex instituto agemus.

## §. 166.

*Cui libertas philosophandi concedenda.*

*Si quis methodo philosophica philosophiam tradere debet; is libertate philosophandi fruatur opus est.* Philosophiam enim methodo philosophica traditurus in eligendis sententiis solius veritatis rationem habere debet (§. 155.), suo, non alieno stans judicio (§. 156.), nec admittere potest ab aliis tradita, nisi quatenus ea ex principiis suis demonstrantur & intelliguntur (§. 157.). Ei igitur permissum esse debet sententiam suam publice proponere, aut ut philosophiam tradat prorsus

non

non ferendum: quod hypothesi repugnat & alio quoque nomine absurdum. Permissio ista libertas philosophandi appellatur (§. 151.). Patet igitur, libertatem philosophandi ei esse concedendam, qui methodo philosophica philosophiam tradere debet.

Absurdum esse dixi, si propterea non ferendum, ut quis philosophiam tradat, quodeam methodo philosophica tradit. Inde enim sequitur, philosophiam methodo philosophicæ contraria tradendam esse. Non igitur permittendum, ut philosophiam tradat, nisi qui talia docet, quæ nec sufficienter intelligi, nec evidenter vera agnosci (§. 136.), nec ad casus vitæ humanæ commode applicari possunt (§. 138.), ne certa & distincta cognitio obtineatur (§. 137.). Id esse absurdum, facile patet, cum philosophia in usum vitæ addiscatur. Si quis id negaverit, is per me doceat, quæ in spem futuræ oblivionis memoriæ mandantur. In Gallia Academiæ regiæ scientiarum Parisinæ libertas philosophandi concessa, propterea quod methodo accurata in veritatem inquirere apta & in veritate latente investiganda omnis eorum labor versatur. Professoribus philosophiæ contra in Universitate Parisina injunctum, ne aliam a peripatetica philosophiam tueantur vel doceant, referente Joanne, du Hamel, Socio Sorbonico & in Academia Parisiensi Philosophiæ Professore, in præfatione ad philosophiam universalem, propterea quod philosophiam in usum Theologiæ scholasticæ docent.

§. 167.

*Si libertas philosophandi integra conceditur iis, qui methodo philosophica philosophantur, nullum hinc metuendum est religioni, virtuti ac Reip periculum.* Quando nihil hinc natum scitur periculum. Qui enim methodo philosophica philosophatur, non contradicit veritati revelatæ (§. 163.), nec virtuti, nec statui publico contraria docet (§. 164. 165.). Immo si inter thesin philosophicam & scripturæ quandam interpretationem vel thesin theologicam appareat dissensus, inde ansam arripit illius veritatem accuratius investigandi & evidentius firmandi, ut, si erronea fuerit interpretatio vel thesis aliqua theologica, tandem id sponte agnoscat; quemadmodum ex dictis ad §. 163. liquet. Immo si statui vel civili, vel ecclesiastico doctrinæ alicujus professio foret nocua, veritatem tempesti-

ve reticere novit methodo philosophica philosophatus: quemadmodum ex dictis ad §. 165. colligitur & suo loco ac tempore ex instituto demonstrabitur. Enimvero si libertas philosophandi limitanda est in Rep. non alii constitui possunt limites, quam ut ne tradantur religioni, virtuti ac statui publico adversa: id quod in Politica ex instituto demonstrabitur, cum ex principiis politicis tota fluat demonstratio. Quamobrem cum methodo philosophica philosophatus ipsemet sibi constituat limites, quos transgrediuntur alii; libertas philosophandi eidem concessa nihil creat religioni, virtuti ac statui publico periculi.

Quodsi objecias, experientia constare contrarium: *Benedictum de Spinoza* philosopharum fuisse methodo mathematica, quæ cum philosophica eadem (§. 139.); hoc tamen non obstante docuisse, quæ religioni & virtuti contrariantur: tum quidem respondeo, utique fieri posse, ut quis in applicanda methodo philosophica aberraret, sicque in errores nocuos incidat; sed tum aberratio ab aliis evidenter demonstrari poterit, ut errore emenderetur, nec in philosophiam recipiatur (§. 118.) Quod in specie *Spinosam* attinet, is Ethicam suam, quam vocat, methodo Geometris recepta digessit in definitiones, axiomata, propositiones atque demonstrationes eorundem: sed nondum hinc consequitur, quod methodo philosophica fuerit philosophatus, ut in definitionibus terminos omnes sufficienter explicaverit & in demonstrationibus non usus fuerit principiis nisi sufficienter probatis formamque demonstrationum genuinam tenuerit, quemadmodum methodus fert philosophica (§. 116. 118. 124.). Quodsi aberrationes a vera methodo inquirere libuerit, tum patebit, quibus debeantur errores nocui. Nostrum jam non est in hanc arenam descendere: obiter tamen observamus, eum istiusmodi asserere definitiones substantiæ & libertatis, quarum vi nonnisi Deus substantia atque ens liberum dici potest. Erenim substantiam definit per *id, quod in se est & per se concipitur: hoc est, id, cujus conceptus non indiget conceptu alterius rei, a quo formari debeat & eam rem liberam dicitur quæ ex sola sua natura necessitate existit & a se sola ad agendum determinatur.* Quis definitiones istas attente considerans non videt priorem esse potius definitionem entis a se? quod cum sit solus Deus, ea utique nonnisi ipsi convenire potest. Quis porro non videt, soli Deo convenire, quæ in definitione entis liberi sumuntur? Nam sola sua necessitate existere est denno proprietas entis a se, quod solus Deus est, & prorsus independentem ab omni re alia sese de-



determinare, denuo nonnisi Dei est. Sed qui methodo philosophica philosophatur, a recepto vocum significato non recedit (§. 142.), consequenter quæ ita vulgo accipiuntur, ut de Deo & hominibus una prædicari possint, non ita definienda, ut de solo Deo prædicari queant. Taceo alia, quæ poterant in definitionibus istis desiderari. Ponamus vero evitari non posse, ut methodo philosophica philosophantium unus alterve aliquando abutatur philosophandi libertate, non tamen ea ratio sufficiens est, quæ persuadeat, ut, sublata methodo philosophica, quæ absque philosophandi libertate consistere nequit (§. 166.), servitus introducat progressui scientiarum adeo inimica (§. 152.). Nihil ex omni parte beatum! Admittendus est unus alterve abusus, ne missum facere teneamur multo illustriorem usum, præsertim cum abusui adhuc adhiberi possint remedia civilia in Politica recensenda. Infrequentior vero erit abusus, ubi ipsa philosophica philosophandi methodus fuerit intimius perspecta & philosophaturi per creberrima exercitia ad habitum eadem utendi contenderint, proscriptis habitum intellectus infusorum vel per saltum acquirendorum somniis.

## §. 168.

*Si qua propositio philosophica theologica, vel interpretationi scripturæ sacræ receptæ contradicere putatur, contradictio evidenter demonstranda.* Duplex est casus contradictionis: aut enim *contradictio est patens*, veluti quando *Ptolemæus* ait: *Terra in centro mundi quiescit*, *Copernicus* vero affirmat: *Terra medio inter planetas loco collocata circa Solem movetur*; vel *latens*, veluti cum in Geometria dicitur, *circulus alterum intus contingens idem cum eo habere potest centrum*, id quod propositioni alteri contradicit, qua affirmatur: *omnes radii unius circuli sunt inter se æquales*. Nonnunquam etiam contradictio ideo latet, quod verba in alia sumantur significatione. Quoniam servitus philosophandi cum methodo philosophica consistere nequit (§. 153.), sed libertas potius philosophandi cum eadem necessario connectitur (§. 166.), nec philosophica methodus rejici potest, nisi volueris, ut philosophus tradat, quæ nec sufficienter intelligi, nec evidenter vera agnosci possunt (§. 136.), & ut nulla certa ac distincta cognitio obtineatur (§. 137.), sed talis, quæ ab usu vitæ abhorret (§. 138.): ideo contradictio philosophanti obtrudi

(Wolffii Logica)

N

non

UOPI

non potest, sed evidenter demonstranda, ut philosophus, qui suo, non aliorum stare debet iudicio (§. 156.), eandem agnoscat. Quamobrem cum fieri possit, ut in re sit consensus, etsi in verbis appareat dissensus (§. 158.); contradictio non venditari potest pro patente, nisi ubi dissensum realem eviceris, ex definitionibus nimirum, quas methodo philosophica philosophatus in medium affert (§. 116.), ostendens verba a philosopho & theologo in eadem sumi significatione. Quodsi lateat contradictio, legitima consequentia ex thesi autoris, sumtis principiis ab eodem concessis tanquam præmissis, inferri debet contraria theologicæ, cui illa contradicere dicitur. Patet adeo methodo philosophica salva contradictionem cum theologia aut Scriptura sacra philosopho non posse obtrudi; sed eam, sive patere, sive latere dicatur, evidenter esse demonstrandam.

Plura patebunt suo tempore tum ex Logica, ubi methodum refutandi sumus exposaturi; tum ex Politica, ubi de libertate philosophandi in relatione ad Remp. sumus acturi. Sufficit hic abunde, quod cum methodo philosophandi pugnet concessa alteri licentia contradictionem cum veritate revelata pro arbitrio impingendi. Et cum manifestum sit, nondum pugnare cum Scriptura sacra, aut veritate revelata, quod receptæ alicui interpretationi scripturæ, aut thesi theologicæ, præsertim inter ipsos Christianos adhuc controversæ, contradicit; monstrata contradictione nondum liquet, thesin philosophi esse falsam (§. 163.). Etenim rotunditas Telluris contradicebat interpretationi quorundam locorum Scripturæ a Patribus Ecclesiæ factæ (not. §. 163.); non tamen ideo erat falsa: alias enim non tanta evidentia demonstrari potuisset, ut ipsi Theologi vim dictis scripturæ illatam agnoscerent, nec Tellurem circumnavigando (§. 6. Geogr.) ipsi sensui manifesta facta fuisset, Attendit adea, quæ dicta sunt, curia Romana, cum *Galilæus* libertate philosophandi in detrimentum religionis abuti diceretur. Inquisitores enim Cardinales non obtrudebant ipsi contradictionem: sed contradictionem patentem monstrabant, quam ipse *Galilæus* diffiteri non poterat. Nimirum nemo ignorat, usque ad *Copernici* tempora unanimiter & postea a plerisque, ipso *Tychone de Brabe*, loca Scripturæ de motu Solis ita fuisse accepta, ac si sensus litteralis motui Solis diurno faveret. Recepta igitur Scripturæ interpretatione statuebatur, Terram quiescere in centro universi. *Galilæus* cum *Copernico*

desen-

defendebat, Terram & motu vertiginis circa proprium axem, & motu translationis circa Solem moveri, consequenter non Terram, sed Solem in centro universi quiescere. Patebat igitur contradictio inter assertum *Galilaei* & receptam Scripturæ sacrae interpretationem. Agnovit tamen curia Romana, nondum inde sequi, hypothesein terræ motæ esse falsam: etenim *P. Fabri* e Societate Jesu, Pœnitentiarius Romæ ad *S. Petrum*, rescripto, quod legitur in Transactionibus Anglicanis A. 1665. mense Junio, declaravit, si quando *Copernicani* motum Telluris firmiter demonstraverint, illam ei non adversaturam, cum propter scandalum tanquam veritatem eundem proponi non permittatur. Nimirum aut a recepta Scripturæ interpretatione in gratiam hypotheseos terræ motæ est recedendum, ut eadem est retinenda. In utroque casu non evitabitur scandalum iudicio *Fabiano*. Etenim si recepta Scripturæ interpretatio retinetur & tamen defendi permittatur motus Telluris tanquam verus; fieri potest, ut hinc aliqui colligant, Scripturam sacram docere, quæ veritati consentanea non sunt: quo posito multæ variis modis consequuntur conclusiones religioni adversæ, prout ille, qui eas infert, his vel aliis hypotheseibus fuerit addictus. Quod si a recepta scripturæ interpretatione in gratiam hypotheseos, quæ nondum demonstrata est, recedatur; periculum est non modo, ne forsitan in posterum hypothesis reperitur falsa, sed & parum conveniens est, in casu inevidentiæ Theologum cedere Philosopho: immo utroque in casu denuo consequentiæ fluunt religioni parum respondentes, diversæ pro diversitate hypotheseum aliarum, quæ tanquam præmissæ ingrediuntur ratiocinia, quibus conclusio inferitur. Et ita non absque ratione scandalosum visum fuit Pœnitentiario laudato receptæ Scripturæ interpretationi nuncium mittere in gratiam hypotheseos philosophicæ. Quamvis autem curia Romana noluerit, ne scandalum creetur, ut motus Telluris defendatur tanquam verus, antequam demonstretur, non tamen ideo prohibuit eodem uti tanquam hypothesis in computandis motibus celestibus & reddendis phenomenon rationibus. Etenim ipse *Ricciolus* eodem motu tanquam hypothesis usus immo cum *Cassinus* junior, Astronomus Academiae regiae Scientiarum Parisinæ in Commentariis istius Academiae A. 1717. adduxerit observationes de parallaxi fixarum ad hypothesein istam demonstrandam; ipso facto patet, licere in Ecclesia Romana inquirere in veritatem hypotheseos, quæ receptæ Scripturæ interpretationi adversatur. Exemplum hoc illustrat, quæ a nobis demonstrata sunt: neque enim ab iis abhorret. Etenim qui methodo philosophica philosophatur, in philosophiam non admittit debet tanquam verum, nisi quod ex principiis sufficienter probatur

batis per legitimam consequentiam inferre valet (§. 118.), probabilia a certis accurate distinguere teneretur (§. 125.), nec hypothesis alium concedere locum, nisi quatenus ad veritatem liquidam inveniendam viam sternunt (§. 127.): absit autem ut hypothesis utatur tanquam principiis in demonstrandis dogmatis (§. 128.). Qui methodo philosophica philosophatur, non aliam poscit libertatem philosophandi, quam quæ cum methodo philosophica consistit, consequenter circa hypotheses ipsi sufficit, si eas ad ulteriorem disquisitionem publice proponi conceditur adductis rationibus, quibus earum probabilitas adstruitur. Ceterum quod eum præcise casum spectat, ubi hypothesis philosophica receptæ alicujus loci Scripturæ sacræ interpretationi repugnat, nos jam alibi (§. 577. seq. *Astron.*) ostendimus, quod minime opus sit, ut sensus Scripturæ sacræ ab eventu philosophico suspendatur. Sed cum usum Logicæ in interpretanda Scriptura sacra monstraturi ea de re ex instituto dicturi simus (§. 972. *Log.*); hic quidem loci specialiora addi parum consultum ducimus.

## §. 169.

*Progressus  
scientiæ a li-  
bertate phi-  
losophandi  
pendet.*

*Sine libertate philosophandi nullus est scientiæ progressus.* Quodsi enim libertas philosophandi minime viget, nemini permissum est publice proponere suam de rebus philosophicis sententiam, quæ a recepta abhorret (§. 151.), adeoque cogitur unusquisque sententiam vulgo receptam tanquam veram defendere, utut ipsi contrarium videatur, consequenter servitus philosophandi locum habet (§. 152.), qua stante methodo philosophica philosophari nequit (§. 153.). Quodsi absque methodo philosophica philosophia traditur, ea traduntur, quæ nec sufficienter intelligi, nec evidenter vera agnosci possunt (§. 136.), nec certa ad distincta (§. 137.) & casibus vitæ satis respondens obtinetur cognitio (§. 138.). Quis igitur hinc sibi promittet alicujus momenti in philosophia progressus? idem adhuc alia ratione ostenditur. In philosophia non perinde ac in Mathesi fatentur auctores, quæ ignorant; sed de ignotis sibi judicium sumunt ac scire sibi videntur aliisque videri volunt, quæ ab eorum cognitione maxime sunt remota. Quodsi igitur, sublata libertate philosophandi, alterius standum est iudicio (§. 151.), fieri profecto potest ut defendenda sint, quæ a vero abhorrent. Enimvero admissio

uno

uno errore sequuntur plures, si eo tanquam principio utamur ad inferendas conclusiones. Quamobrem si quis errorem agnoscit, is gradum sistere debet, cum nec errorem emendare liceat, nec veritate contraria eidem substituta ulterius progredi concedatur.

Quantum obfuerit progressui scientiarum servitus philosophandi, omnium seculorum testatur historia. Equis ignorat, quam parum incrementi ceperit philosophia, cum a philosophia *Aristotelico Scholastica* ne latum quidem unguem recedere liceret. Quæ disciplinæ philosophicæ habuere incrementa, ea debentur viris, qui, excusso jugo, philosophandi libertatem sibi arrogarunt, ringentibus aliis, quibus servitus magis probabatur. Non negamus, ex libertate philosophandi plurima propullulasse damna, ex servitute vix secutura: quo jure refertur superficialia philosophiæ tractatio, qua desidiosa juventuti placere student propter panem philosophantes. Enimvero damna ista ex libertate philosophandi non per se sequuntur, sed quatenus ea perversæ methodo superaccedit. Quod si enim methodo philosophica utaris, ista minime metuenda. Hac methodo qui philosophatur, non admittit ab aliis dicta, nisi quatenus ex principiis suis demonstrari & intelligi possunt (§. 157.), nec defendit tanquam verum, nisi quod ex principiis sufficienter probatis deducitur (§. 118.), probabilia a certis distinguit (§. 125.), immo operam dat, ut ab aliis dicta & clarius intelligantur, & ad majorem certitudinis gradum perducantur, & ut eorum cum ceteris veritatibus nexus perspiciatur (§. 161.). Tanto igitur intervallo a superficiali tractatione distat, quantum a terra cælum. Ostendimus (§. 166.), libertatem philosophandi convenire methodo philosophicæ, immo ab ea separari non posse: non ergo mirum, quod eo in casu scientiæ non sit inimica. Sed si libertatem philosophandi sibi fumunt, quibus methodo philosophica uti non datum est, tum superficialia tractatio locum habet ac opinionum monstra magno numero nascuntur. Ubi libertas philosophandi exulat, haud raro scientiarum cultura in crimen vertitur. Unde vexas creant autoribus homines improbi sub prætextu veritatis vindicandæ, quos odio aliis de causis prosequuntur. Nonne Socrates cicutam bibere coactus fuit, quod accusaretur, quasi impia doceret ac juventutem seduceret, propterea quod *Anaxagoras* odium adversus eum conceperat ex causa privata? Nonne *Anaxagoras*, præter *Socratis*, a *Cleonte* impietatis accusatus, quod *Solem sensus* & rationis expertem docuisset, ideoque in carcerem con-

jectus & ad mortem damnatus est? Nonne ipse *Aristoteles* impietatis postulatus ab *Eurymedonte*, sacrorum antistite, vel *Demophilo*, ut videretur aliis, Athenis Chalcidem se contulit, quod nollet, quemadmodum agebat, committere, ut Athenienses, qui *Socrati* fuerant adeo infensi, bis peccarent in philosophum?

§. 170.

*Incrementa  
Scientiarum  
quomodo a  
methodo phi-  
losophica  
pendeant.*

*Quando methodo philosophica philosophari cœperint homines collatis viribus incrementa Scientiarum promovebunt.* Qui methodo philosophica philosophatur, is apprime gnarus est regularum logicarum & habitu pollet eas ad praxin transferendi (§. 135.), consequenter novit, utrum methodo philosophica philosophetur, nec ne, aut ubi aliquando aberrare contigerit, errorem statim agnoscit & corrigit, quemadmodum *Arithmetica* gnarus & habitu computandi instructus novit, se operatione arithmetica rite defungi, dum attentionem ad eam affert, aut errorem, si quem admisit, monitus statim corrigit. Quamobrem cum methodus philosophica præcipiat, ut non utatur terminis nisi accurata definitione explicatis (§. 116.), nec admittat principia, nisi sufficienter probata (§. 117.), multo minus propositionem, nisi quæ ex principiis sufficienter probatis legitime deducatur (§. 118.) & ut accurata demonstratione utatur (§. 120. 123. 124.) atque hypothesebus non alium decernat locum, nisi quatenus ad veritatem inveniendam viam sternunt (§. 127. 128.), probabilia quoque in usum vitæ hætenus admitenda a certis distinguat (§. 125.), ut denique verba a rebus accurate discernat (§. 158.); attentione usus novit, num definitiones, quibus utitur, sint accuratæ & principia sufficienter probata, propositiones quæcunque sufficienter demonstratæ; num demonstrationes sint omnibus numeris absolutæ; num quibusdam propositionibus inter probabilia concedi possit locus & num hypotheses ita sint comparatæ, ut ad veritatem inveniendam viam sternere queant, & ubi contigerit, vel memoriæ labilitate, vel attentionis defectu (id quod in *Logica* enucleatius proposituri sumus), eum in applicatione regularum logicarum labi, admonitus, vel ipsemet alio tempore mentem magis serenam

tenam ad meditationes reiteratas afferens lapsum agnoscit & quod erratum est, vel corrigit, vel, ubi veritas nondum in potestate est, errorem missum facit. Idem cum sit animus omnibus methodo philosophica philosophantibus, unus veritatem ab altero traditam agnoscit eaque ad ulteriora detegenda utitur; alter lapsum admissum vel annotat, vel emendat &, qui eum admittit, eundem agnoscit &, nisi jam ab altero emendatus fuerit, ipsemet eum emendare studet. Collatis adeo viribus incrementa Scientiarum promoventur.

Erunt forsan nonnulli, qui sibi persuadebunt, de methodo philosophica prædicari, quæ experientiæ repugnant. Quacunque enim evidentiæ errores ab aliis commissos demonstrares, varias tamen hominibus elationes, cur eos pertinaciter defendant. Quis enim est, qui ignoret, vulgarissimas esse querelas de pertinaci errorum agnitorum defensione? Enimvero multa vulgo videntur & dicuntur, quæ non sunt. Intellectus non adeo nititur contra evidentiæ imperium voluntatis secutus, quemadmodum vulgo creditur. Qui nullam unquam demonstrationem distincte perceperunt, Logicæ veræ ignari multoque magis ejus applicandæ habitu destituti, assensum determinant non per evidentiæ rationis, sed per rationes extrinsecas, quæ multis modis variant: unde assensum habent a voluntate pendulum atque adeo in se ad utramque partem contradictionis indifferentem. Unde videris, eos eas eodem fervore defendere, quo contradictorium hodie propugnant, & in aliis acriter reprehendere & flammis feralibus dignum judicare, quod modo ipsi docuerant. Sed eorum exempla nostro effatio minime adversantur. Etenim nos supponimus eum, qui erroris admonetur, esse methodi philosophicæ gnarum eamque ad praxin transferre posse, nec minus alterum utraque virtute pollere, qui errorem esse admissum demonstrat, ne per ignorantiam reprehendat, quod ista virtute non destitutus valde probaret. Neque etiam est, quod verearis, methodi quoque philosophicæ gnarum errorem, quem agnoscit, pertinaciter defendere, etsi evidentiæ demonstrationis resistere nequeat, quin eundem agnoscat. Etenim qui sciens ac volens errorem defendit, ne errasse videatur, is sibi dedecori ducere debet, quod erraverit. Enimvero ubi philosophicæ methodi fuerit gnarus, haud quaquam sibi persuadere potest, quod alii eadem pollentes errorem non agnoscerent, multo minus animadvertant, quod is a sciente ac volente defendatur. Quamobrem ubi sibi dedecori ducit, quod erraverit, multo magis

magis sibi dedecori ducet, quod errorem ne admonitus quidem agnovit. Fieri adeo non potest, ut errorem pertinaciter defendat, utur, agnitum, quod errasse videri nequeo. Quorum is est mos, iidem nullum evidentia sensum habent, adeoque alios ex genio suo judicantes facile credunt, eos argumentis suis inevidentibus, plerumque extrinsecis, cessuros. Methodi philosophica peritus novit errores a se admissos vel memoria labilitati, vel defectui attentionis, ob animum aliis curis distractum deberi. Unde turpius judicat, ob voluntatis defectum errorem agnitum defendere (cujus quidem turpitudinis rationes alibi commemorabimus), quam errorem commissum agnoscere atque emendare. Nondum adeo pervulgata est methodus philosophica, multo minus ad praxin perducta, ut exempla contraria asserto nostro opponi queant.

§. 171.

Quæ hæcenus de philosophia in genere docuimus, eum potissimum in finem præmissimus, ut instituti nostri ratio inde intelligatur. Plura moneri poterant; sed hæc scopo nostro sufficiunt. Cetera suo loco tradentur, ubi jactis prius principiis firmiter demonstrari possunt. Interea ex dictis judicabit lector, quam ad legenda nostra asferre debeat attentionem, siquidem ea intelligere eorumque evidentiam perspicere voluerit.

### *FINIS DISCURSUS PRÆLIMINARIS.*



PHILO-



PHILOSOPHIA  
RATIONALIS  
SIVE  
LOGICA.





# PHILOSOPHIÆ RATIONALIS

SIVE

# LOGICÆ PROLEGOMENA.

§. I.

**L**ogicam jam definivimus in discursu præliminari (§. 61.), *Definitio*  
quod sit scientia dirigendi facultatem cognoscitivam *Logica.*  
in cognoscenda veritate.

§. 2.

Quoniam scientia est habitus asserta demonstrandi (§. 30. *Disc. An Logice*  
*præd.*) *Quæ in Logica præcipiuntur, demonstrandi sunt* (§. 1.) *præcepta sint*  
Præcipua demonstrandi ex Ontologia & Psychologia (§. 89. *demonstram-*  
*Disc. præd.*). Quamobrem cum prægnantes rationes urgeant, ut Lo- *da.*  
gica Ontologiæ & Psychologiæ præmittatur (§. 91. *Disc. præd.*); Onto-  
logiæ

O 2

logicæ ac Psychologiæ quædam principia explicanda nobis sunt in Logica, ut demonstrationi sit locus.

§. 3.

*Dantur Regula operationum mentis.*

*Exercitium facultatis cognoscitivæ in cognoscenda veritate suis constat regulis.* Patet hoc experientia, modo ad nosmet ipsos attendamus, dum quid cognoscimus.

Scrutabimur illas regulas, juxta quas dirigitur facultas cognoscitiva, tumque evidentissime patebit, mentis operationes juxta certas regulas sese exerere.

§. 4.

*Mens eas sequitur, etsi eas non intelligat.*

*Regulas istas in cognoscendo mens tenet, utut eas non intelligat.* Quod enim vulgo eas non intelligamus, unusquisque domestica experientia novit. Sane plurimi prorsus sibi persuadent, mentem in cognitione rerum nullis regulis esse adstrictam. Alii eas in Logica exposaturi alias prorsus tradunt, quæ a veritate abhorrent, vel nonnisi confuse de illis loquuntur.

Perinde hic sese res habet ac cum motibus organicis corporis organici. Sunt regulæ staticæ, juxta quas fiunt, etsi homo eas ignoret, multo minus autem animantia bruta eas norint. Nemo de eo dubitabit, qui vel obiter inspexerit *Jo. Alphonsi Borelli* opus de motu animalium. Nihil fit contra istas leges & ipse homo in motibus voluntariis nil prorsus valet efficere, nisi quod regulis istis sit convenienter.

§. 5.

*Naturalis dispositio facultatis cognoscitivæ & ejus habitus vulgo acquiritur.*

*Datur naturalis quedam dispositio mentis dirigendi operationes ejus in cognoscendo regulis istis conformiter, sed quæ ad actum, multo magis ad habitum non deducitur, nisi prævio exercitio.*

Homines multa cognoscere, etsi non doceantur, quomodo operationes mentis seu facultatem cognoscitivam dirigere debeant, patet ex modo dictis (§. 4.). Quod autem natura menti tantum insit dispositio quædam ad istam directionem, quæ in actum, multo magis ad habitum non deducitur, nisi prævio exercitio, probat exemplum hominis inter urfos educati, relatum a *Bernhardo Connor* in *Evangelio Medici artic. 15. p. m. 133.* Idem confirmat exemplum aliud hominis a nativitate surdi & muti

muti, quod describitur in Historia Academiæ Regiæ Scientiarum Parisinæ A. 1703. p. 22. edit. Bat. Utroque enim docemur, hominem operationibus mentis ad cognoscendam veritatem requisitis non uti, nisi imitatus fuerit, quod viderit & audiverit ab aliis hominibus, in quorum consortio vivit.

Quomodo illa dispositio naturalis successive transeat ad habitum, suo docebimus loco, in Psychologia facultatem cognoscitivam explicaturi. Neque vero hic singulare quicquam occurrit respectu animæ, quod non idem in corpore quoque locum haberet. Etenim & in corpore sunt motuum organicorum dispositiones, quæ non deducuntur ad actum, nisi prævio exercitio, dum homines alios imitamur. Exempli loco esse possunt motus ad loquelam requisiti, quos nec homo inter ursos educatus, nec a nativitate surdus producere potuit, etsi non deessent, quæ ad dispositionem naturalem requiruntur. Hanc enim ipsis non defuisse constat inde, quod in consortio hominum viventes & sensu integro utentes, ut ex eodem proficere liceret, sermonis usum tandem perdidicerint.

§. 6.

Dispositio illa naturalis exercitio communi ad habitum deducta dirigendi operationes mentis seu facultatem cognoscitivam in cognoscenda veritate dicitur *Logica naturalis*. Sed cum vulgo non satis distinguatur, quod connatum est, ab eo, quod acquisitum, poterit *Logica naturalis* distingui in *connatam* & *acquisitam*. Nimirum *Logica naturalis connata* non est nisi dispositio naturalis ad operationes mentis, quibus veritas cognoscitur: *Logica vero naturalis acquisita* est habitus dirigendi operationes mentis in cognoscenda veritate, ipso usu acquisitus absque regulis.

*Logica naturalis definitio & divisio.*

Distinguiamus Logicam naturalem acquisitam a Logica naturali connata, ut ut distinctio nondum sit recepta, propterea quod judicia de Logica naturali ambigua sunt & in utramque contradictionis partem disputabilia, nisi in ea distinguas id, quod connatum, ab eo, quod acquisitam est. Non ergo multiplicamus terminos præter necessitatem, præsertim cum judicia de Logica naturali momentum in studiis trahunt. Ceterum non desunt in aliis quoque scientiis exempla, quibus discrimen istud illustrari potest. Inest homini dispositio quædam naturalis ad numerandum & computandum, sed quæ sine prævio exercitio ad actum

actum non deducitur, multo minus in habitum quendam degenerat. Dispositio naturalis ad numerandum & computandum est *arithmetica connata* quædam species. Si vero ea ad actum & eo sæpius repetito ad habitum quendam deducitur absque regulis arithmeticis in casibus operis computum absolvendi, *arithmetica naturalis* vulgo fert nomen: sed per ea, quæ de Logicæ naturalis divisione dicta sunt, ad differentiam arithmetice naturalis connatæ *arithmetica naturalis acquisita* dici debebat. Eodem modo sese res habet in disciplinis practicis aliis. Nolumus tamen istam distinctionem alibi adhiberi, nisi manifestus usus eandem requisiverit ob ambigua iudicia, quæ ab ambiguitate liberanda. Ea enim ratio est, cur in Logica hac distinctione utamur. In Psychologia vero generatis distinctio connati ab acquisito locum habet, ibique explicandum est, quid sit dispositio naturalis & quomodo habitus acquiratur: dispositiones autem naturales & habitus inde acquisiti speciales in partibus philosophiæ practicæ explicantur.

## §. 7.

*Logica naturalis docens  
sive fundamentum*

*Qui Logica naturali utitur, confusam quandam ideam habet regularum, per quas mentis operationes dirigit in cognoscenda veritate.* Qui enim vel alios, vel seipsum imitatur in casu simili, exempla præterita sibi vi imaginationis repræsentat & in iis modum agendi confuse percipit. Sed qui Logica naturali utitur, is habitum dirigendi operationes mentis absque regulis ipso usu sibi comparat (§. 6.), adeoque antea factum in casu simili imitari nequit, nisi quatenus exempla præterita sibi vi imaginationis repræsentat & in iis modum agendi percipit: id enim in præsentis casu aliter fieri non posse, ex principiis psychologicis constabit, quodque ita fiat, experientia cognoscere licet. Patet itaque, eum nonnisi confusam quandam ideam regularum dirigendi facultatem cognoscitivam in veritatis cognitione habere, qui naturali tantum utitur Logica.

Versamur in Prolegomenis, ubi perinde ac in discursu præliminari sumimus, quæ nondum demonstrata sunt; in posterum tamen independenter ab his demonstrabuntur: id quod ne quidem methodo philosophicæ repugnat, etsi convenientius sit, ut principia, quæ demonstrationem ingrediuntur, jam in antecedentibus fuerint demonstrata (§. 120. *Disq. præl.*)

§. 8.

Notitia confusa regularum, juxta quas diriguntur operationes mentis in cognitione rerum, constituit *Logicam naturalem docentem*. Definitur adeo *Logica naturalis docens* per notitiam confusam dirigendi facultatem cognoscitivam in veritate cognoscenda. *Logica naturalis docens definitio*

Equidem vulgo distinctionem inter Logicam docentem & utentem ad solam artificialem restringunt philosophi, propterea quod ignorant dari etiam in Logica naturali aliquid acquisiti (§. 6.). Enimvero cum nos ostenderimus facultatem istam animæ dirigendi operationes mentis in veritate investiganda absque regulis, quas edocti sumus, non esse pure naturalem, sed habitum potius acquisitum ob dispositionem quandam naturalem præexistentem (§. cit.); in habitu isto theoreticum a practico perinde distinguere tenemur, ac in Logica artificiali fieri solet. Nil igitur obstat, quo minus etiam Logicam naturalem in docentem & utentem distinguamus. Neque nos moratur ratio denominandi: etenim in philosophia parum curamus, num nomina convenienter rebus suis (*not. §. 147. Disc. pral.*). Si vero inde enascatur scrupulus, quod Logica naturalis non possit doceri, neque adeo docendo nobis communicetur confusa ista regularum dirigendi facultatem cognoscitivam notitia; is quidem sine ullo negotio eximitur. Nam docemus non modo verbis, verum etiam factis. Quamobrem cum aliorum imitatione habitus iste acquiratur (§. 6.), qui Logica naturalis fert nomen; eam utique ab aliis docemur. Quod si Logicae docentis appellationem inde derivare malueris, quod nos doceat regulas dirigendi facultatem cognoscitivam in veritatis cognitione, patet multo magis eam in Logicam naturalem quadrare. Sed de nomine cum nemine litigabimus. Sufficit nobis in Logica naturali, quæ vulgo dicitur, distinguui debere connatum & acquisitum, atque in acquisito theoriam differre a praxi (§. 6.7.).

§. 9.

Habitus ille notitiam confusam regularum dirigendi facultatem cognoscitivam ad praxin transferendi constituit *Logicam naturalem utentem*. Unde *Logica naturalis utens* est habitus sive ars dirigendi facultatem cognoscitivam in cognitione veritatis solo usu acquisitus. *Logica naturalis utens definitio*

Posses etiam dici habitus utendi Logica naturali docente & Logi-

ea quidem naturalis utens ea est, quæ vulgo sola Logicæ naturalis nomine appellatur. Ea contenti sunt, quotquot Logicam artificialem vel prorsus ignorant, vel eam ad praxin transferre nesciunt, vel talem Logicam artificialem didicere, quæ ad praxin transferri nequit.

## §. 10.

*Logica artificialis docentis definitio.*

Quodsi regulas illas distincte cognoscis, earumque rationes perspicis, tum *Logicam* habes *artificialem docentem*. Et hæc *Logica artificialis docens* est scientia dirigendi facultatem cognoscitivam in cognoscenda veritate, diciturque per eminentiam *Logica*, propterea quod ea sola philosophiæ pars est.

Logica nimirum naturalis docens est notitia confusa (§. 8.), adeoque doceri nequit nisi factis, quemadmodum in ipsa Logicæ pertractatione ostendimus. Omnis Logica utens est habitus, qui proprio exercitio comparatur, minime autem discendo acquiritur (§. 9. & not. §. 12.), adeoque & ipsa doceri nequit. Quamobrem cum Logica omnis vel sit docens, vel utens, neque enim præter regularum notitiam atque habitum eas ad praxin transferendi tertium concipi potest; sola Logica artificialis docens ea est, quæ doceri adeoque in numerum disciplinarum philosophicarum referri potest. Atque ideo quoque Logicam definivimus per scientiam (§. 61. *Disc. præl.*), minime autem per artem vel habitum in genere, quod genus convenit Logicæ utenti.

## §. 11.

*Logica artificialis docentis & naturalis differentia.*

*Logica artificialis docens est distincta explicatio Logicæ naturalis.* Qui Logica naturali pollet, is confusam habet notitiam regularum, quibus facultas cognoscitiva dirigitur in cognoscenda veritate (§. 8.), & juxta eas eandem dirigere valet (§. 9.). In Logica vero artificiali docente demonstrantur regulæ, quibus facultas cognoscitiva dirigitur in cognoscenda veritate doceturque modus comparandi sibi habitum easdem ad praxin transferendi (§. 2. 10.). Quamobrem Logica naturalis distincte explicatur in artificiali docente.

Nimirum quemadmodum in Arithmeticæ præctica regulæ arithmeticæ distincte explicantur & demonstrantur, vel *Borellus* in opere de motu animalium regulas staticas motus animalium exposuit; ita similiter in Logica artificiali docente regulæ traduntur & rationibus firman-  
ad quas mens adstringitur in cognitione rerum. Non adeo Logice eundem regulas & novum quoddam artificiale cogitandi genus in-

troductus



introducitur, quemadmodum subinde nonnullis videtur; sed ipsum cogitandi modum naturalem explicat, ut distincte intelligatur. Quamobrem Logica artificialis naturali non eo sensu opponi potest, ac si ab ea esset prorsus diversa. Eadem enim sunt regulæ artificialis atque naturalis; sed non eadem est illarum in utraque Logica notitia. Si Logica artificialis alias tradit regulas, quam quæ Logica naturali propriæ sunt; spuria est & vel nullius utilitatis, vel prorsus seductrix.

§. 12.

Si quis pollet habitu regulas Logicae ad praxin transferendi, is *Logicam habet artificialem utentem*. Quamobrem *Logica artificialis utens* definitur, quod sit habitus live ars dirigendi facultatem cognoscitivam in veritate cognoscenda. *Logicae artificialis utentis definitio.*

Nimirum sola regularum logicarum notitia nondum sufficit, ut juxta eas facultatem cognoscitivam in cognitione rerum actu dirigamus, si vel maxime velimus. Crebris opus est exercitiis, quibus tandem habitus iste, ut ceteri omnes, comparatur. Quamobrem cum duo diversi sint habitus regulas logicas demonstrandi, vel minimum explicandi, easdemque ad praxin transferendi, alter theoreticus, alter practicus, quorum prior absque posteriore esse potest; ii quoque a se invicem sunt distinguendi, minime autem confundendi, ne, qui uno pollet, altero quoque instructus sibi videatur. Non deesse inter eruditos, qui hoc præjudicio tenentur, illorum scripta probant, quid demonstrativa methode se ipsos esse profitentur sibi que videntur, utut ab ea maxime sint alieni.

§. 13.

*Logica naturalis connata non est ejusdem gradus in singulis hominibus.* Non omnes homines eadem sibi facilitate comparant habitum dirigendi operationes mentis in cognitione veritatis: id quod nemo hominum in dubium vocabit, qui ad diversitatem in hominibus obviam in hoc genere attendit. Quod si dubitas, pone omnes homines eadem sibi facilitate comparare habitum istum. Nulla igitur ratio est, cur non omnes eadem facilitate demonstrationes geometricas capiant. Sed docet experientia, non omnes esse ad eas intelligendas æque aptos, etsi eodem doctore utantur, & nullus Logica artificiali sit instructus. Non igitur eadem sibi facilitate habitum *(Wolfi Logica!)* *Diversi gradus Logicae naturalis connatae.*

comparant dirigendi mentis operationes in cognitione veritatis absque regulis, solo usu, adeoque non eadem omnibus natura est dispositio ad istam operationum mentis directionem. Hæc dispositio cum sit Logica naturalis connata (§. 6.); eandem non ejusdem gradus esse in singulis hominibus patet.

Non mirum hoc videbitur illis, qui sibi ad animum revocant, omnes dispositiones naturales ad habitus, qualescunque tandem sint, five animæ, five corporis, non ejusdem gradus reperiri in singulis hominibus: quæ sane ratio est, cur non omnes eadem facilitate, nec eodem in gradu eundem habitum consequantur, etsi in exercitio nemo eorum suam desiderari patiatur industriam. Immo non desunt in Metaphysica rationes, quibus idem probatur a priori.

#### §. 14.

*Diversi gradus Logica naturalis acquisita.*

*Nec Logica naturalis acquisita ejusdem gradus est in singulis hominibus.* Logica enim naturalis acquisita est habitus, qui solo usu absque regulis acquiritur (§. 6.). Sed cum non omnibus idem sit usus, nec omnibus eadem dispositio naturalis ad actus huc necessarios (§. 6. 13.); nec Logica naturalis acquisita ejusdem in singulis hominibus gradus esse potest.

Usus operationum mentis, quo Logica naturalis connata perficitur, dispositionem ad habitum evehendo, varius est. Etenim operationes mentis subinde veluti sponte sese exerunt, dum ab objectis externis vel aliorum exemplo ad eas invitamur: eadem vero indispensabilis necessitatis sunt in addiscendis disciplinis. Quamobrem si contingat, eas esse accurata methodo pertractatas, nec minus accurata industria a nobis singula, quæ in iis proponuntur, perpendi; nullum est dubium, quin Logica naturalis magis perficiatur, quam ubi disciplinæ, in quibus versamur, methodo parum accurata pertractata fuerint ab autoribus, aut nos nonnisi perfunctorie in iis versemur, si vel maxime nullus in methodo notetur defectus. Atque ea ratio est, cur in Mathesi probe versati, etsi Logicam artificialem non didicerint, natural tamen magis polleant ceteris, qui sunt in eadem hospites, & cur non omnes, qui Mathesi operam dedere, Logica naturali valeant, nimirum quia vel Mathesis ab autore non fuit methodo demonstrativa tradita, vel qui suam eidem operam addixit ad methodum parum attendit. Quoniam methodus philosophica cum mathematica eadem (§. 139 *Discurs. pralim.*), ubi philosophia methodo philosophica fuerit pertractata.

tractata, Logica quoque naturalis amplificatur, quando cum cura in philosophiæ studio versamur.

§. 15.

*Logica naturalis connata major accedente eodem studio majoris parit acquisitæ gradum, quam minor.* Possideat *Cajus* maiorem gradum Logicæ naturalis connatæ, quam *Mevius*, & major. uterque eodem studio utatur ad acquisitam obtinendam; dico, *Cajum* maiorem obtenturum gradum Logicæ naturalis acquisitæ, quam *Mevium*. Si enim *Cajus* maiorem habet gradum Logicæ naturalis connatæ, major ipsi naturalis est dispositio ad operationes mentis in cognitione veritatis dirigendas (§. 6.), quam *Mevio*. Quamobrem si idem sit utriusque studium ad dispositionem naturalem in habitum convertendam; *Cajus* maiorem acquirere debet habitum, quam *Mevius*: si enim acquirerent eundem, dispositio naturalis eadem esse deberet, cum, si eadem fuerit dispositio naturalis, eodem studio idem habitus acquiratur. Enimvero qui maiore pollet habitu dirigendi operationes mentis in cognitione veritatis, is maiorem possidet gradum Logicæ naturalis acquisitæ (§. 6.). Quamobrem *Cajus* major gradus Logicæ naturalis connatæ eodem studio maiorem parit gradum acquisitæ, quam minor *Mevius*.

§. 16.

Hinc consequitur, non aliam esse homini uni præ altero in Prærogative Logica prærogativam per naturam, nisi quæ in maiore gradu Logicæ naturalis in gice naturalis connatæ consistit. In Logica enim nemo per naturam habet, nisi quod est connatum; quod vero studio acquiritur, eidem tribui nequit, cum studio acquisitum connato opponatur. Sed sola Logica naturalis connata complectitur, quod homini connatum est; naturalis autem acquisita, quod studio acquiritur absque regulis (§. 6.). & illa quidem non est ejusdem gradus in singulis hominibus, sed in uno major, minor in altero (§. 13.). Ergo prærogativa, quam homo unus præ altero in Logica per naturam habet, non est alia, nisi quæ in maiore gradu Logicæ naturalis connatæ consistit.

Esti in Logica naturali distinguamus, quæ homini per naturam ad-  
sunt & quæ suo sibi studio acquirit (§. 6.), cum pro iisdem haberi ne-  
queant, quæ sunt diversa, neque adeo aliam admittamus in Logica  
prærogativam naturalem, nisi quæ ab eo emanat, quod per naturam  
inest (§. 16.); non tamen ideo Logicæ naturali connatæ quidpiam de-  
rogamus, cum ultro concedamus, majorem gradum Logicæ natura-  
lis acquisitæ pendere a majore gradu connatæ, eodem studio accedente  
(§. 15.). Justum adeo decernimus rebus pretium: id quod in præsentem  
præsertim casu sua utilitate non caret, ne nimia in naturam fiducia  
negligamus, quod studio acquirendum.

*Quando Lo-  
gica natura-  
lis docens  
perversa.*

§. 17.

*Si quis rerum cognitioni studens operationes mentis non di-  
rigit secundum regulas, quibus naturalis cogitandi modus conti-  
netur, is perversam sibi comparat Logicam naturalem docentem.*  
Qui enim operationes mentis in cognitione rerum non diri-  
git secundum regulas, quibus naturalis cogitandi modus conti-  
netur, is animo concipit ideam confusam ejus, quo utitur  
modi, tanquam ad agnitionem rerum necessarii, consequen-  
ter istiusmodi, qui a modo cogitanti naturali abhorret. Sed  
confusa ista idea absolvit Logicam naturalem docentem (§. 8.),  
modo autem cogitandi naturali vera Logica continetur (§. 13.).  
Patet itaque, isto in casu Logicam naturalem docentem a vera  
abire, seu perversam comparari.

Ea sane ratio est, cur lectio librorum, quorum autores a modo co-  
gitandi naturali recedunt, mentem corrumpat, ut ad veritatem agno-  
scendam inepta evadat. Immo eadem ratio est, cur non quævis Ma-  
theseos tractatio intellectum perficiat, item cur Mathesis methodo alia  
quam Geometrarum pertracta mentem prorsus ad veritatem diju-  
dicandam & rimandam ineptam reddat. Atque adeo liquet, non per  
inde esse, qua quis methodo in disciplinis utatur. Nimirum si quis  
perversum cogitandi modum pro genuino habet; is nihil efficit, in-  
vita natura in veritatem inquisiturus.

§. 18.

*Cui perversa est Logica naturalis docens, is & perversa  
pollet Logica naturali utente.* Est enim Logica naturalis utens  
habitus docente utendi (§. 9.). Quamobrem si ea perversa est,  
perver-

*Quando Lo-  
gica natura-  
lis utens per-  
versa.*

perversa utitur, dum rerum cognitioni studet. Atque adeo Logica naturalis utens perversa est, ubi docens perversa fuerit. Idem etiam hoc modo ostenditur. Logica naturalis docens ab solvitur idem confusa modi cognoscendi (§. 7. 8. ); utens vero consistit in habitu eundem ad praxin transferendi (§. 9.). Quodsi igitur perversum animo concipimus modum cognoscendi, perverso quoque modo in veritatem inquirimus. Quamobrem ubi Logica docens perversa fuerit, perversa quoque est utens.

Ea ratio est, cur subinde eruditi ineptiores evadant illiteratis ad veritatem dijudicandam: nimirum illi (§. 17.) intellectum corrumpunt, hi nonnisi naturali modo cogitandi usi Logicam naturalem incorruptam servant. Eandem ob causam operam dedi in Matheſeos universæ elementis, ut modum cogitandi naturalem ubique adhiberem, quo in iis sufficiente attentione versantes Logicam naturalem veram cum docentem, tum utentem consequantur. Voto quoque respondit eventus & quod respondere debeat, inferius plenius constabit. Neque desunt exempla eorum, qui, etsi in Matheſi fuerint versati, & a natura non postremo dispositionis naturalis gradu ornati, in veritate tamen philosophica dijudicanda cæcutiunt.

§. 19.

*Qui sola pollet Logica naturali, is in applicatione sæpissime aberrat.* *Insufficientia Logica naturalis.* Qui enim nonnisi Logica naturali pollet, etsi vera, is nonnisi confusam habet regularum notitiam, juxta quas operationes mentis in cognitione rerum diriguntur (§. 7.), & secundum hanc confusam ideam ipse quoque easdem dirigit (§. 9.), idem facturus in casu simili, quod vel ab ipso, vel ab aliis alias factum fuerat. Enimvero quæ confuse tantum cognoscuntur, ea sæpius confunduntur, ut adeo casus similes videantur, quæ sunt dissimiles, & secundum ideam confusam qui agit, facile omittit, quibus vel maxime fuerat opus. Atque adeo Logica naturali instructus in applicatione sæpissime aberrat.

Exemplo nobis sunt illi, qui in Matheſi cum laude versati methodum mathematicam extra eandem perperam applicant, etsi sibi remanere videntur. Cum enim ejusdem nonnisi confusam ideam animo concipiant, fieri profecto solet, ut eam intimius non perspiciant adeoque

que non ad singula attendant, quæ ad eam apprime faciunt. Hinc etiam audias subinde ab ipsis viris scientia mathematica eminentibus negari de mathematica methodo, sine quibus subsistere nequit, veluti cum Syllogismus e demonstrationibus mathematicis proseribitur.

*Logica artificialis necessitas.*

§. 20.

Hinc consequitur, cum *Logica naturali jungendam esse Logicam artificialem*. Qui enim Logica artificiali pollet, is regulas illas distincte cognoscit, juxta quas diriguntur operationes mentis in cognitione veritatis (§. 10.) & quarum nonnisi confusam ideam habet Logica naturali contentus (§. 11.), atque eas applicat in casibus obviis (§. 12.). Quamobrem vitantur lapsus, qui in applicatione Logicæ naturalis locum habent, propterea quod confusa notitia constat (§. 19.). Unde patet, Logicæ naturali jungendam esse artificialem.

Inferius clarius patebit, quod per Logicam artificialem vitentur lapsus, quibus sola naturali instructus obnoxius est, dum videbimus, in distincta regularum applicatione non tam facile aberrari posse, quam ubi secundum ideam confusam agimus. Sufficit nunc, ut idem exemplo aliquo simili illustremus. Qui Arithmeticam absque regulis didicit, operationum arithmeticarum idea confusa non nisi ex plurimis exemplis hausta, is in applicatione regularum confuse cognitarum facilius aberrat, quam qui singulas singularum operationum regulas distincte novit & in casu obvio applicat.

§. 21.

*Quando nulli usui artificialis docens.*

Si quis Logica artificiali docente fuerit instructus, non autem polleat utente, is agit secundum Logicam naturalem, cum sibi videtur agere secundum artificialem. Logica artificialis docens est scientia dirigendi facultatem cognoscitivam in cognoscenda veritate (§. 10.); utens vero ars sive habitus eandem dirigendi (§. 12.). Quæ itaque in docente demonstrantur (§. 2. 10.), ea per utentem ad praxin transferuntur. Quodsi jam quis non polleat Logica utente, ad praxin transferre nequit, quæ a docente præcipiuntur. Quare cum ad praxin descenditur, Logica non potest uti nisi naturali (§. 9.).

Pertinent huc exempla eorum, qui methodum, qua usuri sunt, in præfatione descripturi Logicæ artificiali docenti consentanea commem-  
morant

morant & lectorem ejus peritum in magnam spem erigunt; in ipsa tamen pertractatione regulis istis non satisfaciunt, sed alia omnia agunt, manifesto indicio, adfuisse voluntatem, sed defuisse vires, hoc est, ut stylo logico idem enunciemus, eos approbasse regulas Logicae docentis, sed caruisse Logica utente. Fieri potest, ut ipsimet non satis intelligant, quæ ab aliis accepta ingeminant, atque tum tanto facilius falluntur, ut sibi videantur præstitisse, quod viribus ipsorum superius. Accidit istud, quoties nonnisi historicam habent cognitionem Logicae docentis alterius (§. 10.). In ipsa autem pertractatione sese produnt indicia hujus calus, quando obtinet. Nos plura dicemus huc spectantia in usu Logicae.

§. 22.

*Si quis in Logica docente in confusis operationum mentis Casus alter. notionibus acquiescit; is agit secundum Logicam naturalem.* Enim Logica docens artificialis distincta est Logica naturalis explicatio (§. 11.): quodsi nonnisi in confusis operationum notionibus acquiescas, verbisque tuis non aliæ quam istæ respondeant, descriptionem quandam Logicae naturalis, quam non intelligit, nisi qui hanc habet, pro Logica artificiali docente accipis, solo verborum apparatu tibi imponens. Per se adeo patet, in hoc casu neminem agere posse, nisi secundum Logicam naturalem.

Huc referri debent exempla eorum, qui, dum Logicas conscribunt, nova sibi tradidisse videntur, ubi notionibus confusis involvant, quæ ab Aristotele ipsumque secutis Scholasticis dudum distinctius fuerant exposita, quemadmodum fieri debet in Logica artificiali (§. 11.). Hinc non mirum, quod, licet Logicae non unius fuerint scriptores, in praxi tamen non secuti, nisi quam habent, Logicam naturalem perverfam (§. 17.), in omnibus mentis operationibus adversus regulas Logicae verioris, & in communem Logicam naturalem misere impingant, nec utile ipsis sit, quod a Matheseos tractatione sperare poterant, præsidium, præsertim ubi Logicam suam in ipsa Mathesi ducem secuti.

§. 23.

*Qui sub nomine Logicae didicit, quæ ad dirigendam facultatem cognoscitivam in cognoscenda veritate nil conferunt, vel tuis de quibus non constat, quomodo ad praxin transferantur; is age-*

*re aliter nequit, nisi secundum Logicam naturalem.* Logica artificialis utens ad praxin transfert, quæ in docente demonstrantur (§. 12.). Quamobrem si in Logica docente talia traduntur, quæ ad dirigendam facultatem cognoscitivam in cognoscenda veritate nil conferunt, vel de quibus non constat, quomodo ad praxin transferri queant; per se liquet, quod eorum maxime gnarus secundum ea tamen operationes mentis in cognoscenda veritate dirigere nequeat. Nullius igitur cum ipsi usus sint, Logicæ quæ didicit sub nomine; non aliter profecto agere potest, quam secundum Logicam naturalem.

Postquam defectus philosophiæ Scholasticæ agnoverunt viri eruditi atque libertas philosophandi in academiis Protestantium introducta, & viri egregii præclara in arte ratiocinandi dedere, sed generalia, quæ quomodo ad praxin transferantur non patet, suo loco a nobis commendanda & perficienda, & alii in Logicis docuere, quæ ad veritatem dijudicandam, vel investigandam nihil conferre posse tandem ipsimet fateteri coacti fuere, si non verbis, ipso tamen opere.

#### §. 24.

*Distincta regularum logicarum applicatio,*

*Qui Logica utente artificiali pollet, is regulas docentis distincte applicare valet in casu quolibet dato.* Logica artificialis utens ad praxin transfert in casu dato, quæ docens præcipit (§. 12.). Sed in Logica docente regulæ distincte explicantur (§. 10.). Quamobrem qui Logica artificiali utente pollet, is in casu dato judicare debet, quam regulam sit opus & eam ad istum applicare tenetur, consequenter regulas distincte applicat.

Nimirum dico distincte applicari regulas, si regulam nobis in memoriam revocamus, quæ in dato casu applicanda, & inde concludamus, quid sit agendum. Arithmeticæ exemplo rem illustrare licet. Docentur ibi distincte regulæ, quibus opus in computo. V. gr. Si ex tribus numeris proportionalibus inveniri debet quartus, secundus multiplicari per tertium & factum dividi per primum jubetur. Quod si jam istiusmodi occurrat casus, in quo numerus quartus proportionalis ex tribus datis investigandus; ex regula, quæ nobis succurrit, judicamus, ibi etiam terminum secundum per tertium multiplicari & factum per primum dividi debere. Atque ita juxta regulam agimus, quam distincte agnoscimus. Eodem modo, qui Logica artificiali gaudet,



det, regulas quoque docentis applicare debet, ubi distincta est applicatio. Studio autem dico, quod distincta applicatio in potestate sit. Et si enim ab initio, dum Logicæ utenti studemus, regulas distincte applicare tenemur; eam tamen consecuti agimus secundum regulas, licet non ante distincte judicemus, quænam regula sit applicanda. Eodem modo se res habet in omni habitu cum animi, tum corporis: neque adeo mirum videri potest, quod etiam idem Logicæ utenti conveniat, quæ in nullo habitu animi est (§. 12.). Quod si tamen nobis volupe fuerit, regulæ distincte applicari possunt.

§. 25.

*Qui Logicæ artificialis inutilitatem se experiri arbitrantur, illi vel Logica utente destituuntur, vel docentem d. dicere, quæ regulas dirigendi facultatem cognoscitivam non distincte explicat.* Etenim Logica docens absque utente nullius est usus (§. 21.) atque adeo ejus utilitatem experiri nequit, qui utente destituitur. Quod si in docente regulæ dirigendi facultatem cognoscitivam distincte non explicantur; in notionibus confusis acquiescimus, vel talia discimus, quæ vel nihil ad praxin conferunt, vel quomodo ad eam transferenda sint non patet. Quamobrem cum rebus sic stantibus agere non possimus, nisi secundum Logicam naturalem (§. 22. 23.); fieri tum quoque nequit, ut ejus utilitatem experiamur. Non itaque mirum, quod in utroque casu arbitremur Logicæ artificialis nos experiri inutilitatem.

*Quinam contur, illi vel Logica utente destituuntur, vel docentem d. dicere, quæ regulas dirigendi facultatem cognoscitivam non distincte explicat.* Etenim Logica docens absque utente nullius est usus (§. 21.) atque adeo ejus utilitatem experiri nequit, qui utente destituitur. Quod si in docente regulæ dirigendi facultatem cognoscitivam distincte non explicantur; in notionibus confusis acquiescimus, vel talia discimus, quæ vel nihil ad praxin conferunt, vel quomodo ad eam transferenda sint non patet. Quamobrem cum rebus sic stantibus agere non possimus, nisi secundum Logicam naturalem (§. 22. 23.); fieri tum quoque nequit, ut ejus utilitatem experiamur. Non itaque mirum, quod in utroque casu arbitremur Logicæ artificialis nos experiri inutilitatem.

Facile apparet, quod Logica utente destituti, aut docente, quæ non satisfacit, instructi, Logicam vel sibi, vel suam experiantur inutilem. Falluntur autem, ubi sibi persuadent, quod Logicam artificialem in se inutilem esse experiantur: si quis enim Logicæ artificialis inutilitatem suo experimento comprobare velit, is certus esse debet, se genuinæ Logicæ regulas perspectas habere, easdemque regulas dextre applicandi habitu polleat necesse est. Tum vero utique constabit contrarium. Nos profecto, qui regularum logicarum, quas tradimus, veritatem non uno documento comprobare valemus, earum quoque utilitatem multum experti sumus & etiamnum experimur.

§. 26.

*Ea Logica artificialis docens censetur genuina, quæ praxi Lapis Lydius*  
(Wolfii Logica) *vetere*

Logica artificialis.

*veterum Geometrarum conformis.* In confesso est apud omnes, veteres Geometras veritatem, quam quæsiuerunt, inuenisse & eam adeo rigoroſe demonſtraſſe, ut nemo in eorum demonſtrationibus reperire poſſit, quod reprehendat, ſed omnes in aſſenſum trahantur: id quod ipſe eventus teſtatur, cum nemo *Euclidem, Archimedes, Apollonium, Theodoſium* &c. legerit, qui non veritatis ſtatim fuerit convictus, quam primum eos intellexit. Conſtat itaque, eos operationes mentis non invita natura direxiſſe in veritate cum inueſtiganda, tum demonſtranda. Quoniam regulæ methodi philoſophicæ eadem ſunt, quæ methodi mathematicæ (§. 139. *Diſcuſſ. prælim.*), methodus vero ordo eſt, quo in tradendis dogmatis utimur (§. 115. *Diſc. prælim.*); non alia ſane ratione dirigendæ ſunt operationes mentis in philoſophia, quam in Matheſi, ut veritas agnoſcatur. Quodſi ergo regulæ, quas in Logica artificiali docente tradimus, eadem ſunt, quibus Geometræ veteres in veritate demonſtranda ſunt uſi; nullum ſuper eſt dubium, quin eadem ſint illæ ipſæ regulæ, juxta quas operationes mentis dirigi debent in veritate cognoscenda, conſequenter conſtat, Logicam docente artificialem, quam examini ſubjicimus, eſſe genuinam (§. 10.).

Veteres laudamus Geometras, ubi Logica artificialis ad examen revocanda, propterea quod recentiores ſubinde laxius demonſtrandi genus ament a rigore veterum alienum. Nos in elementis noſtris Mathæſeos univerſæ, quæ in uſum Logicæ artificialis utentis comparandæ poſſimum conſcripſimus, non modo rigorem veterum ſecuti ſumus; verum etiam, in Matheſi præſertim pura, eum in demonſtrationibus tenuimus ordinem, quem in methodo philoſophica requiſivimus (§. 123. 124. *Diſc. prælim.*). Quamobrem ſi quis Logicam, quam didicit, artificialem juxta elementa noſtra Geometriæ examinet; iſ de ejus valore optime ſtatuet, ſiquæ genuinam deprehenderit, utentem Logicam eadem opera in poteſtatem ſuam rediget. Si quis ſibi neſcio quam differentiam inter Logicam mathematicam & philoſophicam imaginetur, eam non moramur, cum nullam eſſe appareat ex iis, quæ de identitate methodi philoſophicæ & mathematicæ adſtruximus (§. 139. *Diſc. prælim.*). Immo in ſequentibus patebit, Mathematicos naturali cogitandi modo, quem

quem Logica artificialis distincte explicare debet (§. II.), firmiter in-  
harere. Quod si vero fuerint aliqui, qui Mathematicum imperiti  
aspernantur, quod præstare nequeunt; in eorum gratiam alium adhuc  
lapidem Lydium Logicæ artificialis exhibemus.

§. 27

*Ea Logica artificialis docens censetur genuina, per cujus Lapis Lydius  
regulas rationem reddere licet cogitationum, quæ sese invicem na-  
turaliter consequuntur.* Logica artificialis docens distincte expli-  
care debet Logicam naturalem (§. II.), adeoque tradere regulas,  
juxta quas operationes mentis in cognitione rerum dirigun-  
tur, dum dispositio naturalis, quæ menti ad illas operationes eli-  
ciendas inest, ad actum deducitur (§. 8. 6.). Cogitationes,  
quæ naturaliter se invicem consequuntur in mente, juxta illas  
regulas producuntur, si vel maxime mens eas non intelligat  
(§. 4.). Quamobrem si per regulas in Logica artificiali tradi-  
tas reddi potest ratio cogitationum, quæ naturaliter sese invi-  
cem consequuntur; ea non est nisi explicatio distincta Logicæ  
naturalis, adeoque genuina.

Plures jam elapsi sunt anni, ex quo reperi, mathematicæ demonstra-  
tionis formam esse eandem, quæ est seriei cogitationum naturaliter sese  
invicem consequentium, & publice in Lexico mathematico vernacula  
sermone edito ejus rei mentionem feci. Ab eo autem tempore quoque  
cognovi lapidem hunc Lydium Logicæ artificialis utentis, quem hic  
propono. Agnovi quoque hinc identitatem demonstrationis mathema-  
ticæ, aut in genere methodi mathematicæ ac modi cogitandi naturalis  
ut adeo certum sit, Mathematicos naturalem cogitandi modum in scien-  
tia quoque tenere, a quo deviare solent, quotquot diversa via inee-  
dunt. Si cui scrupulus super fuerit, is removebitur ipsa Logicæ arti-  
ficialis pertractatione, quam suscepimus.

§. 28.

*Ea Logica artificialis docens censetur genuina, cujus regu-  
la ex ipsa mentis humane natura & notione entium in genere  
demonstrari possunt.* Menti inest dispositio ad dirigendas ope-  
rationes mentis in cognitione rerum juxta regulas, quas vio-  
lare nequit (§. 5.) & quas Logica artificialis docens distincte  
explicare debet (§. II. 8.). Quæ vero per mentem fieri possunt,

Q 2

eorum

eorum quoque ratio ex natura mentis humanæ demonstrari potest. Quamobrem si regulas tradit Logica artificialis docens; quæ quomodo a mente humana observari possint, ex ejus natura demonstrare licet; nullum remanet nobis dubium, quin illæ ipsæ sint regulæ, quas mens vi naturæ suæ tenet, operationes suas in cognitione rerum directura, consequenter patet, Logicam artificialem esse genuinam. Enimvero quoniam ens omne, quatenus tale, cognoscibile est, quod suo loco clarius ostendemus; regulæ, quibus facultas cognoscitiva dirigitur in cognitione rerum, suas quoque in notione entis generali rationes habent. Quare cum regulas istas distincte explicare debeat Logica artificialis docens (§. 11.); eam genuinam esse patet, ubi regulæ, quas tradit, notioni entis generali fuerint conformes.

Ideo jam in superioribus (*not.* §. 2.) monui, nos quædam Ontologiae & Psychologiae principia esse explicaturos, ut demonstrationi sit locus. Ceterum tibi caveas velim, ne hoc Logicae veræ criterium perverte interpreteris. Minime contendimus, tum demum Logicam artificialem esse genuinam, si regulas ex natura mentis & notione entis generali demonstret: sufficit enim, ut regulæ habeant rationem suam in natura mentis & notione entis generali, ut qui illas tradit hanc non capiat. Arithmeticae regulæ sunt genuinae, si ex notione numeri & valore notarum numericarum demonstrari possint, licet Autor, qui eas tradit, demonstrationes nec afferat, nec contexere queat. Quod si tamen regulæ Logicae dicta ratione demonstrentur, earum facilius constat veritas.

#### §. 29.

*Epilogus.*

Quoniam Logica artificialis docens sola est, quæ doceri verbis potest, eaque dudum per eminentiam Logica dici suevit (§. 10.); nos quoque eandem tradituri & de ea verba facturi sola Logicae appellatione erimus contenti, distinctionibus non alium locum concessuri, quam quem iisdem vindicavimus (*not.* §. 6.), nempe in tollenda ambiguitate judiciorum, quæ de Logica ferri solent, cum in praxi studiorum maximum momentum trahant.

**FINIS PROLEGOMENORUM.**

**LOGI-**

# LOGICÆ PARS I.

SIVE

# THEORETICA

## SECTIO I.

DE

## LOGICÆ PRINCIPIIS.

### CAPUT I.

### DE TRIBUS MENTIS OPERATIONIBUS IN GENERE.

§. 30.



*Sensu percipimus res externas, quæ organa nostra sensoria afficiunt.* Quis enim nescit, nos apertis oculis in visibile præsens directis videre; sonum in aures incidentem audire; sapores gustu, odores olfactu, alia bene multa tactu discernere? *Mens sensu percipit externa.*

Nemo miretur, nos hic inculcare, quæ unicuique obvia sunt! Omnes scientiæ ortum a notiis vulgi trahunt. Parebit id inferius luculentius, ubi omnem theoriæ logicæ ambitum fuerimus emensi. Neque dubium videri potest assertum vel tantilla attentione usis. Primi enim inventores non alias habuere, quam vulgi notiis, unde prima scientiarum stamina deduxerunt: quod qui olim capere non poterant, ad fabulosas origines sunt delapsi.

§. 31.

*Mens etiam sibi conscia est eorum, quæ in ipsa contingunt,* *Sensu interno percipit sensu quodam interno.* Quis enim nescit, se sibi conscium esse ejus, quod videt, vel alio sensu externo percipit (§. 30.), *seipsam.*

Q 3

aliarum-

aliarumque mentis operationum, quocunque tandem nomine posthac designanda veniant?

Hac facultate si mens destitueretur, nulla foret Logica. Etenim veritates Logicae docentis artificialis ex iis deducimus, quæ in mente nostra circumspici attentione observamus: Logica vero utens artificialis, cum distinctam requirat regularum docentis applicationem (§ 24.), a nobis acquiri non poterat, nisi nobis consciis essemus illorum actuum, qui ad regularum applicationem necessarii. Absque hac applicatione sepius iterata non acquiritur habitus applicandi. Logicam docentem artificialem; in quo utens consistit (§. 12.): si autem nobis non essemus consciis operationum mentis, unde, quæso, nobis constaret, applicationem regularum a nobis fieri, prout debebat & habitus acquirendus requirit? Etsi autem unicuique manifestum sit, quod mens percipiat, quæ in ipsa contingunt; non tamen æque liquet, annon plura in eadem accidunt, quam quorum sibi conscius est. Id hic non decidimus; sed ulteriori discussioni reservamus. In præsentem nobis sufficit nosse ea, de quibus nemini dubium est, cum a primis notitiis Logicam simus derivaturi (not. §. 30.).

## §. 32.

*Mens imaginatur absentia & lex imaginationis.*

*Possumus etiam nobis imaginari res absentes & , si quæ simul percepimus atque unius perceptio denuo producat, ab imaginatione quoque produci perceptio alterius.* Possumus nobis imaginari leonem antea visum, ita ut imago ejus veluti oculis nostris oberret. Et ubi in platea nobis obviam it persona in templo visa, imago templi nobis simul objicitur: immo cum imagine templi recurrit quoque imago aliarum personarum, vel objectorum aliorum ibi visorum. Qui ad se attendit, non modo plures rerum absentium imagines in se continuo advertit; verum eas contemplatus perspiciet etiam legem, quam commemoramus, constanter observari.

Legis hujus imaginationis, de qua plura nobis dicenda erunt in Psychologia, maxima est in Logica utilitas. Ut igitur perspicua fiat ac familiaris, juxta eam sedulo inquirendum in rationem, cur hoc vel istud nunc imaginemur. Quæ enim a posteriori sumuntur principia, exemplis confirmantur & inculcantur.

## §. 33.

*Simpliciter*

*Dum rem sive sensui, sive imaginationi præsentem tantum*

tum intuemur, seu attentionem nostram in eadem defigimus, *apprehensio- nis definitio.* eam simpliciter apprehendere dicimur: Unde simplex apprehensio nobis est attentio ad rem sensui vel imaginationi praesentem seu menti quomodocunque representatam.

E. gr. Si Solem instar disci argentei per nubes transparentem intuemur, & attentionem nostram in eo defigimus, sed ultra obtutum non progredimur; eum simpliciter apprehendimus. Similiter si imago rei absentis, veluti leonis, quasi oculis nostris oberrat, & nos imaginem istam tantum intuemur, ac si rem praesentem obtutu comprehendemus; leonem simpliciter apprehendimus.

## §. 34.

Rerum in mente representatio *Notio*, ab aliis *Idea* appellatur. *Notionis J. Idea definitio.*

Habemus nimirum rei notionem, quam nobis in mente representare valeamus, ita ut nobis ejus sumus conscii sive tanquam extra nos existentis, sive tanquam nobis inexistentis. Ita ideam seu notionem habemus equi, quem licet absentem nobis ita representare valeamus, ac si coram esset nostrisque oculis objiceretur. Notionem habemus simplicis rei apprehensionis, quatenus nobis sumus conscii hujus actus mentis cumque ab aliis distinguere valeamus. Similiter si quis sibi imaginetur Centaurum, ut ejus imago oculis ipsius veluti oberret; is notionem Centauri habet. Ita in Geometria notionem habemus trianguli rectilinei, si nobis in mente representemus figuram tribus lineis rectis terminatam: in Arithmetica notionem habemus binarii, si cogitemus unitatem cum alia unitate in unum numerum coalescentem. Numerorum enim notiones acquirimus, dum unitatem unitati continuo addimus.

## §. 35.

Facile autem patet, *rem nullam simpliciter apprehendi posse, nisi cujus notionem seu ideam habemus.* Dum enim *Absque notionis simplex apprehensio nulla est.* rem simpliciter apprehendimus, in eadem attentionem nostram defigimus (§. 33.). Sed non sumus nobis rei conscii, nisi quatenus eam nobis in mente representamus, consequenter quatenus ejus notionem vel ideam habemus (§. 34.), adeoque in eadem attentionem nostram defigere non possumus, nisi ejus habeamus notionem. Patet itaque, nos rem nullam simpliciter

pliciter apprehendere posse, nisi cujus notionem & ideam habemus.

Atque ea ratio est, cur *simplex rei apprehensio* atque *notio* vulgo pro Synonymis habeantur. Placuit tamen nobis simplicem apprehensionem distinguere a notionem. Etenim alius actus mentis est, quo notio formatur seu idea producitur; alius vero, quo ad notionem formatam seu ideam productam attendimus. Utrumque actum a se invicem distinguere debere, patebit ex sequentibus. Quæ igitur tanquam distincta concipimus, ea quoque nominibus nobis discernenda sunt. Quamobrem cum minime opus, immo parum consultum sit, ut unam eandem rem diversis nominibus exprimamus; nil obstat, quo minus simplicem apprehensionem sumamus pro eo actu mentis, quo attentionem in rem repræsentatam convertimus; notionem vero pro ipso actu repræsentationis.

## §. 36.

*Voces & termini definitio.*

Notiones, quas habemus, *vocibus* alteri indigitamus. Sunt adeo *Voces* soni articulati, quibus notiones significantur. Voces autem istæ *Termini* appellantur. Unde *Terminus* definitur, quod sit vox notionem quandam significans.

E. gr. Vox *leo* est signum alicujus notionis, qua animal quoddam ferum nobis repræsentamus, & quatenus ea logice consideratur, terminus dici solet.

## §. 37.

*Termini res significant.*

*Termini denotant res, quarum notiones habemus, aut habere possumus.* Termini denotant notiones (§. 36.). Sed notionibus res nobis repræsentamus (§. 34.). Patet itaque, quod perinde res indigent ac notiones, quas de iis habemus.

Ideo terminos philosophicos (§. 146. *Disc. prelim.*) definivimus per nomina rerum a philosopho discretarum, sed quorum vulgo differentia non attenditur. Et si enim termini isti proprie denotent notiones, quibus sibi philosophus res repræsentat a communi cognitione remotas: quoniam tamen res non cognoscimus, nisi quatenus earum notiones habemus, perinde est siue terminos philosophicos per nomina rerum, siue per voces notionum signa definiamus. Et idem eodem modo patet de omni termino reliquo. Patebit tamen inferius ratio, cur termini notionum potius, quam rerum iis repræsentatarum dicantur signa, ubi de notionibus universalibus agemus.

## §. 38.



## §. 38.

Si quis sibi videtur habere notionem aliquam, cum tamen nullam habet, eamque voce quadam indigitat, tum terminus *notionem deceptricem* significat, quæ cognoscenti imponit, cum sit re vera sine mente sonus. *Terminus* istum *inanem* appellamus. Atque adeo *Terminus inanis* est, qui notionem deceptricem significat.

*Definitio termini inanis.*

E. gr. In explicando commercio inter mentem & corpus multi ad influxum *physicum* tanquam causam provocant, videnturque sibi intelligere, quid dicant. Enimvero cum voci huic nulla idea respondeat, terminus inanis est. In eundem censum veniunt termini bene multi in *Physica Scholasticorum*, ubi ideis deceptricibus infra distinctius explicandis multus est locus. Quemadmodum vero idea deceptrix proprie loquendo nulla est idea, sed talis tantummodo apparet; ita quoque terminus inanis proprie non est terminus, sed tantummodo talis apparet. Sicut enim ideæ deceptrici non convenit definitio ideæ sive notionis (§. 34.), ita similiter in terminum inanem non quadrat definitio termini (§. 36.). Sed quamdiu homines falluntur, tamdiu quoque ferendum, ut notionibus, quæ apparent, tribuatur id nominis & vocibus, quibus eas indigitamus, nomen termini. Etenim cum apparentes notiones a veris distinguamus, quod illas deceptrices appellemus, & terminos spurios a veris discernamus, quod illos inanes dicamus, nihil inde periculi enascitur, propterea quod notionibus deceptricibus ac terminis inanibus non tribuimus, quod de notionibus atque terminis cognovimus. Luculentius hæc constabunt, ubi ratiocinandi leges explicatas dederimus (§. 346. & seqq.).

## §. 39.

Quando aliquid in re obvia distinguimus, aut cum ea simul percipimus, idque primum tanquam ab ea diversum, deinde vero tanquam ad eandem quomodocunque pertinens, vel non pertinens spectamus; tum *judicare* dicimur. Atque actus iste mentis, quo aliquid a re quadam diversum eidem tribuimus, vel ab ea removemus, *judicium* appellatur.

*Judicii definitio.*

E. gr. Si triangulum intueamur, & præter tria latera tres in eodem angulos distinguamus, atque adeo perpendamus, tres istos angulos non esse ipsius triangulum, eos tamen ad idem pertinere; tum judicamus, triangulum habere tres angulos. Immo si ipsa quoque tria latera tan-

(Wolffii Logica)

R

quam

quam a triangulo distincta, ad idem tamen pertinentia consideremus, de eodem triangulo judicamus, quod tria habeat latera. Quodsi quadratum cum triangulo una contuemur atque quatuor angulos, quos illi inesse deprehendimus, huic non inesse animadvertimus; tum de triangulo judicamus, quod non habeat quatuor angulos. Similiter cum candela accensa lucem, quam spargit, una percipimus. Quodsi eam tanquam a candela diversum quid, ad eandem tamen pertinens consideremus; tum judicamus, candelam accensam lucere. Si ferrum intuemur & imaginatio (§. 32.) nobis veluti præsens sistit ferrum candens olim visum; comparatione inter utrumque instituta, ut appareat, huic inesse, quod ab illo abest, judicamus, ferrum non candere. Liquet utique ex dictis, actum judicii exerceri posse absque vocum seu terminorum usu, etsi non adeo sit præcisum.

## §. 40.

*Judicia in  
quo consi-  
stant.*

*Dum igitur mens judicat, notiones duas vel conjungit, vel separat.* Etenim dum judicat de re quadam, eidem tribuit, quod tanquam diversum ab ea agnoscit, vel istiusmodi quid ab ea removet (§. 39.). Quoniam igitur cum rem, de qua judicat, tum illud, quod eidem tribuit, vel ab ea removet, sibi repræsentare, adeoque utriusque notionem habere debet (§. 34.), rei ignotæ nihil tributura, nihil ab ea remotura, nec rei notæ tributura, vel ab ea remotura, quod ignorat; patet eam notiones duas vel conjungere, vel a se invicem separare.

E. gr. Si judicamus, *triangulum habere tres angulos*; notionem habemus trianguli, quod nobis repræsentamus tanquam spatium tribus lineis rectis terminatum; notionem habemus anguli, quem nobis repræsentamus per inclinationem duarum linearum in eodem puncto concurrentium ad se invicem; notionem quoque habemus ternarii, quem nobis repræsentamus tanquam numerum ex additione unitatis ad binarium ortum, & ex coalitione notionis ternarii atque angulorum enascitur notio trium angulorum: conjungimus autem notionem trium angulorum cum notione trianguli. Eodem modo patet, quod e contrario judicantes *triangulum non habere quatuor angulos*, notionem quatuor angulorum a notione trianguli separemus. Similiter dum *Solem lucere* judicamus, notionem habemus Solis, notionem quoque lucis: quod enim lux a Sole separatam constituat ideam, inde nobis constat, quod in aliis quoque rebus a Sole diversis lucem experiamur.

Utram-

Utramque autem notionem jungimus, quod in notione Solis notionem lucis comprehendi videmus, seu, si ad lumen directum a corporibus terrestribus reflexum respicimus & hoc nobis tanquam lumen Solis representamus, notionem luminis cum notione Solis una habemus, nec unam ab altera removeri posse advertimus. Dum judicamus, *aërem non esse humidum*, notionem habemus humiditatis, notionem quoque aëris; sed notionem istam ab hac separamus.

## §. 41.

Solemus etiam iudicium verbis efferre, tumque illud *Enunciatio* enunciare vel *proponere* dicimur. Est igitur *Enunciatio* sive *Propositio* Oratio, qua alteri significamus, quid rei conveniat, vel non conveniat. Per *Orationem* vero hic intelligimus terminorum combinationem.

E. gr. Enunciationes sive propositiones sunt; quando dicimus: *Triangulum habet tres angulos, triangulum non habet quatuor angulos, Sol lucet, aër non est humidus*. Etenim triangulum, angulus, Sol, lux, aër, humiditas sunt termini (§. 36.): quando igitur dicimus, *Triangulum habet tres angulos, non habet quatuor angulos*; in priori casu combinamus terminos, quorum notiones in iudicio junguntur; in posteriori vero eos, quorum notiones in iudicio separantur (§. 40.). Eodem modo, quando dicimus: *Sol lucet, aër non est humidus*; terminos combinamus, quibus respondentēs notiones in iudicio vel junguntur, vel a se invicem separantur. Termini nimirum duplici modo combinari possunt, vel ut per hanc combinationem idearum indigitetur conjunctio, vel ut per eandem significetur earum separatio. Sed de hoc discrimine, utut ex ipsis exemplis manifesto, suo tamen loco dicemus apertius.

## §. 42.

Patet adeo, *differre propositionem sive enunciationem a iudicio*. Etenim iudicium est actus mentis, quo ideæ, quibus res in mente representantur (§. 34.), vel junguntur, vel a se invicem separantur (§. 40.): propositiones vero sive enunciationes non sunt nisi combinationes terminorum, ideis istis respondentibus, quibus earum conjunctio, vel separatio significatur (§. 41.). Quemadmodum itaque differunt notiones & termini, quibus istæ indignantur, cum se habeant termini ad

notiones ut signa ad res significatas (§. 34. 36. ); ita similiter differunt etiam enunciationes & judicia ut signa & res iisdem indigitata.

Equidem vulgo enunciatio & iudicium pro synonymis habentur; sed veritati parum convenienter: etenim discrimen adeo luculentum est, ut in dubium vocari nequeat, etsi vulgo ad idem non attenderint. Neque usu caret, si iudicium ab enunciatione distinguitur: sicuti enim termini inanes pariunt ideas deceptrices (§. 38.); ita quoque enunciationes ex terminorum inanum combinatione resultantes sunt inanes, quibus nulla respondent judicia, sed respondere tantummodo videntur. Enimvero ea ex sequentibus clarius constabunt.

## §. 43.

*Individuum*

*quid dicatur.*

Quicquid sensu percipimus, sive externo, sive interno, aut imaginamur, id singulare quid est, soletque *Individuum* appellari.

E. gr. Equus, quem videmus, est ens quoddam in singulari, seu unum quid. Sonus, quem audimus, est quid singulare, diversus ab eo, quem alio tempore percipimus. Si nobis sumus conscius alicujus mutationis in mente nostra, illa mutatio singularis, diversa ab omni reliqua, quæ alio tempore percipitur. Imago leonis vi imaginationis producta, quæ oculis nostris oberrat, ens quoddam singulare repræsentat. Nondum hic definimus, quid sit individuum, notione clara contenti: dabimus tamen inferius, quæ ad distinctam ejus cognitionem spectant.

## §. 44.

*Speciei definitio.*

Res singulares, quas percipimus, vel in quibusdam similes sunt inter se vel sunt dissimiles. Quæ similes sunt, ad eandem classem referimus, quam *Speciei* nomine insignimus. Est itaque *Species* similitudo individuorum.

E. gr. Omnes equi sunt inter se similes; unde classem constituimus entium, quam equi nomine designamus. Similiter omnes homines sunt inter se similes, atque ideo classem entium constituimus, cui hominis nomen imponimus. Similiter omnia triangula rectilinea in eo conveniunt inter se, quod tribus lineis comprehendantur, & ideo classis figurarum tribus lineis terminatarum constituitur, cui triangulorum rectilineorum cedit nomen. Quoniam species non designar  
nisi

nisi similitudinem individuorum; ideo notionem speciei non ingreditur, nisi quod individua inter se commune habent.

## §. 45.

Quodsi notiones specierum quædam communia continent, adeoque individua ad eas relata eatenus adhuc aliquam inter se similitudinem habent; classem quandam superiorem constituimus, quæ species istas sub se complexa *Genus* appellatur. Quamobrem *Genus* definimus per similitudinem specierum. *Generis definitio.*

E. gr. Equi constituunt certam entium speciem, boves perinde & sic porro. Sed si ad notionem equorum, boum &c. attendas, non obstante differentia, in quibusdam adhuc conveniunt. Quamobrem id, quod commune habent & ob quod aliqua inter hæc animalia similitudo intercedit, ad notionem peculiarem referimus & sic genus entium constituimus, quod *animalium quadrupedum* fert nomen. Similiter si cogitemus, inter figuras tribus lineis terminatas hoc intercedere posse discrimen, quod lineæ istæ vel sint rectæ, vel curvæ; triangulis rectilineis & curvilineis tanquam speciebus commune genus trianguli assignamus, cujus notio non complectitur, nisi quod triangula rectilinea & curvilinea commune habent, nempe terminum spatii tribus lineis constantem.

## §. 46.

Quoniam genere quoque diversa in nonnullis adhuc convenire possunt, atque eatenus quandam inter se similitudinem habent; notio, quæ pluribus generibus communia complectitur, *Genus* quoddam *superius* constituit. Quamobrem *Genus superius* est similitudo generum. *Generis superioris definitio.*

E. gr. Figuræ rectilinæ ac curvilineæ, duo figurarum genera, hoc commune habent, quod sint spatia terminata. Novum adeo genus constituitur, sub quo comprehenduntur, nomine *Figure* designatum.

## §. 47.

Quoniam Genera superiora adhuc alia superiora habere possunt, ideo *Genera intermedia* sive *Subalterna* appellantur, quæ alia habent se superiora & inferiora. Et notandum quidem est, genera inferiora respectu superiorum, sub quibus continentur *Generis subalterni appellatio itemque specierum divisio.*

tur, appellari species, respectu inferiorum genera: *speciem* autem *infimam* dici, quæ nonnisi individua sub se complectitur. Enimvero cum rerum differentiarum nondum ita sint constitutæ, ut in species & genera accurata distributio fieri possit; consultius forsitan foret, si sola generis appellatione contenti ipsas quoque species generis nomine designaremus & genera nonnisi secundum superioritatem graduum distingueremus, quemadmodum quoque in communi sermone fieri solet.

Nostri species definitio nonnisi speciem infimam designat (§. 44.).

§. 48.

*Ratiocinationis primum genus.*

*Si quid simpliciter apprehendimus & ulterius progressi judicamus, quod ei vel convenient, vel non convenient, quæ ad hujus vel istius speciei aut generis notionem pertinent; eidem quoque nomen illius speciei aut generis vel convenire, vel non convenire porro judicamus.* Patet per exempla asserti veritas. Etenim si notionem trianguli rectilinei habemus, quod sit figura tribus lineis rectis terminata, ac jam nobis occurrat figura, de qua judicamus, quod tribus lineis rectis terminetur; mox recordati triangulum rectilineum dici debere figuram tribus lineis terminatam judicamus, præsentem quoque figuram triangulum rectilineum dici debere, seu esse figuram istiusmodi, quæ triangulum dicitur.

Judicamus nimirum: *Figura hæc terminatur tribus lineis rectis.* Vi legis imaginationis (§. 32.) nobis succurrit: *Figura tribus lateribus terminata est triangulum rectilineum.* Atque inde inferimus: *Hæc figura est triangulum rectilineum.* Hæc mentis operatio constanter obtinet, quotiescunque rem oblatam suo nomine generali appellamus, v. gr. quando judicamus: Petrum esse hominem, bucephalum esse equum, Saturnum esse planetam.

§. 49.

*Ratiocinationis alterum genus.*

*Similiter si judicamus, ens nobis obvium esse hujus vel istius generis aut speciei, nobis succurrit, generi isti aut speciei hoc convenire, vel non convenire, sive absolute, sive ab præsentem conditionem; ideo judicamus, huic quoque enti idem convenire, vel non*

*non convenire, five absolute, five ob praesentem conditionem.* Patet denuo assertum per exempla. Etenim si nobis constet ferrum candens urere atque de ferro nobis obvio judicemus, quod candeat; prioris judicii recordati judicamus porro, hoc quoque ferrum candens urere debere. Applicamus itaque, quod certæ cuidam speciei convenire sub certa conditione ante cognovimus, ad ens quoddam nobis obvium, propterea quod ipsum ad eandem speciem pertinere & eandem ejus esse conditionem perspicimus.

Judicamus nimirum: *Hoc ferrum candet.* Succurrit nobis iudicium alias formatum vi legis imaginationis (§. 32.): *Ferrum candens urit.* Atque inde inferimus, seu ulterius ideo judicamus: *Hoc ferrum urit.* Hæc mentis operatio constanter obtinet, quoties iudicium aliquod de quodam genere, vel quadam specie, five absolute, five in aliquo statu formatum, denuo applicamus ad aliquod ens, quod ad istud genus vel istam speciem referri debere agnoscimus & cujus in casu posteriori eundem esse statum intelligimus. E. gr. In Geometria demonstratur: *Omnes tres angulos in triangulo rectilineo esse duobus rectis aequales.* Quando itaque nobis occurrit figura, v. gr. triangulum rectangulum, quam ex ipsius notione triangulum rectilineum esse agnoscimus (§. 48.), adeoque judicamus: *Figura hac five triangulum rectangulum rectilincum est triangulum rectilineum;* illico ulterius judicamus: *Figura hujus five trianguli rectanguli rectilinei tres anguli simul sunt duobus rectis aequales.*

## §. 50.

Dum ita ex duobus judiciis notionem communem habentibus tertium vel, quod perinde est, ex duabus propositionibus terminum communem habentibus tertiam elicimus, combinando notiones in utroque iudicio, vel terminos in utraque propositione diversos, *rationari* dicimur. Est itaque *Ratiocinatio* operatio mentis, qua ex duabus propositionibus terminum communem habentibus formatur tertia, combinando terminos in utraque diversos. *Ratiocinationis definitio.*

Alii ratiocinationem *Dianam*, *Discursum*, *Argumentationem* vocant. Exempla (not. §. 48. 49.) allata definitionem illustrant. Singula autem

autem in eis contenta clariora evadent, ubi in pertractatione speciali distinctius evolventur.

## §. 51.

*Judicii intuitivi & discursivi definitio.*

*Judicium* istud dicimus *intuitivum*, quo enti cuidam tribuimus, quæ in ipsius notione comprehensa intuemur. Istud autem *judicium discursivum* appellamus, quod per *ratiocinium* (§. 50.) elicitur. Posset quoque dici *dianoëticum*.

E. gr. Soli tribuimus splendorem, propterea quod notio, quam de ea habemus, seu idea eum splendidum nobis exhibet. *Judicium* itaque, *Sol splendet*, est intuitivum. Enimvero dum ex *judicio intuitivo*, quod *hoc ferrum candeat* & alio, quod memoria suggerit, *ferrum candens urit*, tertium elicimus; *hoc ferrum urit*; *judicium* hoc tertium est discursivum sive *dianoëticum*.

## §. 52.

*Numerus operationum mentis.*

*Tres sunt mentis operationes, quibus ea circa cognoscibile versatur, notio cum simplici apprehensione, judicium & discursus.* Etenim aut cognoscibile nobis tantum representamus & ultra attentionem ad notionem non progredimur; aut tribuimus eidem, quod ei convenit, vel ab eodem removemus, quod ei non convenit. In priori casu rem simpliciter apprehendimus, cujus notionem habemus (§. 33.); in posteriori judicamus (§. 39.). Quoniam vero omnia nostra judicia vel sunt intuitiva, vel discursiva (§. 51.) & discursiva quidem ratiocinando eliciuntur (§. cit.); ideo judicantes vel simpliciter judicamus, vel ratiocinamur. Patet itaque tres esse operationes mentis, quibus ea circa cognoscibile versatur, notionem cum simplici apprehensione, judicium atque discursum.

Nimirum si cognoscibile intuemur, aut in simplici apprehensione acquiescimus, aut de eo judicamus: tertium non dari, ex ipsa notionis simplicisque apprehensionis atque judicii definitionibus liquet (§. 33. 34. 39.). Si judicamus, *judicium* vel intuitivum est, vel discursivum (§. 51.), quorum hoc ratiocinando elicitur. E. gr. Si Solem intuemur, vel in nudo obtutu acquiescimus, vel calorem radiorum percipientes judicamus, quod æstu ferveat, & recordati æstu Solis terram exsiccare ratiocinando ulterius judicamus, Solem esse solum in horis, campis & pratis exsiccatum.



## §. 53.

*Notio cum simplici apprehensione est operatio mentis prima, Ordo earum. judicium secunda, discursus tertia.* Notione nobis cognoscibile repræsentamus (§. 34.) & simplici apprehensione attentionem in eodem defigimus (§. 33.). Dum autem de eo judicamus simpliciter, eidem tribuimus, quod in notione ejus contentum intuemur, vel removemus, quod ex eadem exulare deprehendimus (§. 39. 51.). Quodsi judicium formetur discursivum, ratiocinando ex judiciis duobus aliis id elicitur (§. 48. 49. 51.). Patet itaque de cognoscibili non posse judicari, nisi ante ejus notionem habeamus, idque simpliciter apprehendamus; nec judicia discursiva formari posse, nisi alia judicia & notiones præsupponantur. Quamobrem cum notionem cum simplici apprehensione judicia & ratiocinia supponant; notio cum apprehensione simplici est prima mentis operatio. Eadem ratione constat, quod ratiocinatio & notiones, & judicia supponens sit operatio tertia, consequenter judicium secunda.

In infantibus primum sese exerit notio, quam mox sequitur simplex apprehensio. Succedit judicium in pueris & ratiocinatio ex intervallo sese demum exerit. Atque inde confirmantur, quæ de ordine operationum mentis dicta fuere. Ceterum demonstratio hoc quoque modo concipi poterat. Judicium notiones conjungit vel separat (§. 40.), adeoque eas supponit. Ratiocinando ex notionibus & judiciis præviis elicitur judicium ulterius (§. 48. 49.), adeoque ratiocinatio notiones & judicia supponit. Ergo notio est operatio prima, judicium secunda, discursus tertia. Hic quidem ordo est in prima rerum cognitione & in communi eorum, quæ nobis per diem obiciuntur. Minime vero negamus, quod cognitione aliqua jam acquisita ratiocinando elicere possimus judicia, ex quibus pluribus simul junctis formare licet notiones rerum, quarum nihil ante nobis innotuerat. De hoc enim argumento inferius ex instituto dicemus.

## §. 54.

*Notiones universales sunt notiones similitudinum inter res Notionis universalis definitio. plures intercedentium, aut, si mavis, notiones, quibus ea repræsentantur, quæ rebus pluribus communia sunt. Unde patet, generum & specierum esse notiones universales, cum species*  
(Wolffii Logica) S sint

sint individuorum (§. 44.); genera specierum (§. 45.) & genera superiora generum inferiorum similitudines (§. 46.).

Exempla superius (not. §. 44. & seqq.) allata dicta illustrant atque confirmant. Habent enim exempla aliquam cum experimentis affinitatem, quibus per rationes evicta confirmantur (§. 34. *Disc. pral.*).

§. 55.

*Eorum formatio.*

*Notiones universales non possunt formari absque secunda & tertia mentis operatione.* Cum notio universalis comprehendat, quæ notionibus plurium individuorum vel plurium specierum communia sunt (§. 54.); ea formari nequit, nisi quæ in notione rerum continentur a rebus ipsis distinxeris & num eis constanter competant, an mutationibus obnoxia sint, determinaveris. Quatenus igitur agnoscis, quæ rebus convenient, quæ non semper convenire queant, eatenus judicas (§. 39.): per ratiocinia autem determinari debet, an, quod rei inesse observamus, semper eidem competat, num vero ab ea abesse possit, cum hæc judicia non ad intuitiva referri queant, adeoque ad discursiva pertineant, quæ ratiocinando eliciuntur (§. 51.). Quoniam adeo judicia secunda mentis operatione, ratiocinia vero tertia fiunt (§. 53.); notiones universales absque secunda & tertia mentis operatione non formantur.

§. 56.

*Genera & species ubi existant.*

*Genera & species non existunt, nisi in individuis.* Species sunt notiones similitudinum individuorum, ea comprehendentes, quæ in individuis eadem deprehenduntur (§. 44.). adeoque per eas indeterminata relinquuntur, quæ in diversis individuis diversimode determinantur. Quoniam itaque fieri nequit, ut existat, quod aliqua parte indeterminatum est; igitur ens, cui ea sola insunt, quæ notioni speciei respondent, existere nequit. Enimvero cum ea omnia, quæ in notione speciei continentur, in singulis individuis ad eam pertinentibus actuantur; species in singulis individuis existit. Jam porro genera sunt notiones similitudinis specierum, ea comprehendentes, quæ in speciebus singulis ad idem genus relatis eadem sunt.

Quare

Quare cum omnia, quæ notio speciei involvit, individuis insint, ea quoque, quæ notioni generis respondent, eidem inesse debent. Sed quia species non existit nisi in individuis, nec genus aliter existere potest, nisi in individuis.

E. gr. Triangulum rectangulum æquicrurum est quædam trianguli æquicruri species, eaque infima, quæ nonnisi individua sub se comprehendit in species inferiores subdividi nescia. Quoties enim in figuris linearum speciem non determinamus, ex quibus perimenter constat, lineas rectas intelligimus, ex communi Geometrarum usu loquendi. Sed triangulum æquicrurum rectangulum delineari nequit, nisi magnitudo cruris determinetur. Si enim duæ lineæ rectæ junguntur ad angulos rectos, crurum magnitudo infinitis modis determinari potest, ut sit eadem utriusque. Latus autem tertium seu hyporthenulum trianguli ducere non licet, antequam crurum magnitudo determinata fuerit. Eniunvero quodecunque detur triangulum rectangulum æquicrurum, in eo actu sunt, quæ notioni speciei respondent. Cum enim triangulum rectangulum æquicrurum debeat habere duo crura æqualia, quæ angulum rectum interceptiunt; quodecunque triangulum ad hanc speciem referendum obvium fuerit, in eo notabis angulum rectum cruribus æqualibus interceptum. Nec aliter sese res habet cum homine, vel arbore in genere. Nullum datur ens, cui ea sola insint, quæ notionem hominis in genere absolvunt, nec datur ullibi ens, cui ea sola insint, quæ notioni arboris in genere respondent. Quoniam tamen notio hominis in genere nil continet, nisi quod singulis hominum individuis inest, nec notio arboris in genere quicquam involvit, nisi quod singulis arborum individuis inest; igitur in omni hominum individuo existit in genere, & in omni arborum individuo in genere.

§. 57.

Cum adeo (§. 54.) genera & species sint notiones universales, omnibus singularibus insunt universalia (§. 56.), consequenter a contemplatione rerum singularium ascendere licet ad cognitionem universalium.

*Cognitio universalis a cognitione singularium derivanda.*

Hæc notasse plurimum juvat. Nam & cognitionem acquisitam amplificare licet & subinde singularium ope universalis cognitio absque difficultate acquiritur, quæ alias difficulter foret comparanda. Expertaliquimur, & quæ unusquisque in Matheſeos studio experiri valet. Exempla cum in Logica, tum in aliis philosophiæ partibus suo

loco occurrent. In Arithmetice Elementis §. 125. ostendi, quomodo ab algorithmo numerorum tanquam methodo inveniendi speciali abstrahantur regulæ methodi inveniendi generales & ubi §. 262. 277. fundamentum extractionis radicum quadraticæ ac cubicæ tradimus, generalem compositionis numeri quadrati & cubici notionem ab exemplo singulari derivamus. Et idem artificium per omnem Arithmetice præcticam amplissimi experti sumus usus. Docemus autem deinceps (§. 708.), quæ ratione universalis e singularibus vel a specialibus sint derivanda: ubi, quæ hic dicuntur, clariora evadunt.

## §. 58.

*Compendium  
Logice naturalis.*

Quæ hætenus tradidimus, Logicam naturalem absol-  
vunt, hominibus omnibus communem, qua tanto rectius utun-  
tur, quo puriorem conservant (§. 17.). Nimirum, 1. dum sensu  
externo atque interno percepta (§. 30. 31.) simpliciter apprehendunt (§. 33.), rerum quasdam notiones sibi familiares reddunt (§. 35.) easque terminis a se invicem distinguunt (§. 36.). 2. Cum notiones rerum, quas vel sensus solus (§. 30.), vel sensus & imaginatio (§. 32.) una exhibent, inter se conferunt, rerum similitudinem & dissimilitudinem perspicientes de utroque judicia formant intuitiva (§. 39. 51.). 3. Judiciis de similitudine rerum species & genera constituunt (§. 44. & seqq.), quibus designandis nomina vulgo in linguis recepta adhibentur. 4. Judicia de dissimilitudine ad species & genera referunt, quæ iisdem vel absolute, vel sub certa conditione conveniunt, sicque enunciationes formant (§. 41.). 5. Notionibus istis atque judiciis comparatis, de rebus obviis ratiocinantur ex eo, quod in iisdem deprehendant, quæ notioni generis vel speciei alicujus respondent, colligentes, eam pertinere ad hoc genus, vel ad hanc speciem, eique adeotribuendum esse nomen, quo genus istud vel species ista designatur (§. 48.); vel ex eo, quod res obvia ad hoc genus vel hanc speciem pertineat, ac præsens ejus esse intelligatur conditio, inferentes, eisdem tribui debere, quod per judicia ante acquisita generi vel speciei sive absolute, sive sub ista conditione tribuendum (§. 49.) & contra.

Hanc

Hanc esse Logicam docentem naturalem, tres isti lapides Lydii probant, quas *Logica* docenti artificiali destinavimus (§. 26. 27. 28.). Ea enim *Logica* censeri debet genuina, per cujus regulas rationem reddere licet cogitationum, quæ sese invicem naturaliter consequuntur (§. 27.). Enimvero si rem experiri volueris, & ad modum, quo a prima infantia successive acquiritur rerum cognitio, sepositis tantisper iis, quæ ex aliorum relatione hausta tantum memoriæ mandamus, tum etiam ad communem praxin vitæ, qua notitiæ acquisitæ ad casus obvios applicantur, sufficientem attentionem attuleris; eorum, quæ hic occurrunt, rationem ex dictis reddi posse deprehendes. Nos in *Psychologia* dabimus, quæ uberiolem lucem his affudent. Porro ea *Logica* genuina censeri debet, quæ praxi veterum *Geometrarum* conformis (§. 26.). Si quis *Elementa* nostra *Geometriæ* ac *Arithmeticæ*, ut ceteras *Matheſeos* partes silentio tranſeamus, evolverit & quæ circa definitiones ac propositiones earumque demonstrationes expendenda sunt, secum perpendit, is utique deprehendet, genera & species, quantum instituto satisfacit, accuratis definitionibus distingui, judicia determinate enunciari, ut appareat, num generi, vel speciei aliquid conveniat absolute, aut sub certa saltem conditione, & in demonstrationibus obvia beneficio eorum, quæ in definitionibus continentur, reduci ad sua genera vel species, ac tandem porro ad ea applicari, quæ in antecedentibus de isto genere vel specie ista sive absolute, sive sub eadem conditione, quam casus præſens offert, fuere enunciata. Quoniam in sequentibus singula mathematice quoque exemplis sumus illustraturi, quæ jam dicuntur, magis patebunt. Tertius denique lapis Lydius *Logicæ* genuinæ a nobis (§. 28.) commendatus fuit, quod ea ex ipsa mentis humanæ natura & notione entium in genere demonstrari possit. Quam hic in Compendio exhibemus, *Logicam* naturalem esse menti humanæ conformem dubitari nequit, cum eam ex operationibus ejus attente observatis deduxerimus. Quod vero eadem notioni entis in genere respondeat, ex iis palam fiet, quæ in capite sequente de entium notitiis quibusdam generalibus in medium sumus allaturi. Quoniam itaque dubium nullum superest, quo minus *Logica* naturalis paucis istis absolvat, quæ hic in compendio recensemus, *Logica* vero artificialis distincte explicare debet, quæ ad naturalem spectant (§. 11.); jam evidenter nobis patet, quænam a nobis pertractanda sint, ut officii nostri partes adimpleamus. Et si enim omnis *Logica* iis contineatur, quæ hætenus a nobis sunt stabilita & hic in compendium redacta; de singulis tamen multa notanda sunt, ut

in casu quolibet obvio ad praxin transferri possint. Specialibus istis explicatis constabit, cur præster Logicæ naturalij jungere artificialem & cur soli naturali contentus facilius a vero aberraret, quam qui cum ea artificialem combinavit. Neque verò metuendum, ne forsan in Logicam artificialem perversam incidamus, quæ magis nocet, quam prodest, propterea quod regulæ generales, quas jam perspectas habemus, nonnisi specialius explicandæ sunt.

## CAPUT II.

## DE NOTITIIS QUIBUSDAM GENERALIBUS ENTIS.

§. 59.

*Propositum  
Auctoris.*

**M**Onui jam superius (*not. §. 2.*), quædam Ontologiæ principia in Logica nobis esse explicanda, ut demonstrationi sit locus: id quod tanto magis necessarium intelligitur, quod per demonstrationes istas patet, utrum Logica genuina sit, nec ne (§. 28.), quodque ea, quæ demonstrata sunt, firmiori assensu complectamur, quemadmodum Mathesis documento est & ratio inferius ex natura demonstrationis constabit. *Antequam igitur ad singulas mentis operationes distinctius explicandas progrediamur, principia Logicæ ontologica præmittenda sunt.* Non tamen omnia dabimus, sed præcipua, alia quædam hinc inde suo loco interspersuri.

§. 60.

*Eorum, quæ  
rebus insunt,  
discrimen.*

*Si ad ea attendimus, quæ rebus insunt, alia constantia apprehendimus, quæ tamdiu insunt, quamdiu speciem ac genus non mutant; alia vero mutabilia, quæ salvis specie ac genere entis mutantur.* Sumimus id hoc loco a posteriori, adeoque sufficit, si quædam afferantur in medium exempla.

Nimirum

Nimirum durities lapidi constans est: quamdiu enim is speciem non mutat, sed in numero lapidum persistit, tamdiu duritiem non amittit. Idem dicendum esse de gravitate. Calor vero mutabilis, quem non retinet, nisi ubi corpori calefacienti, veluti Soli, aut aëri calido, fuerit expositus. Immo ipsis exemplis geometricis discrimen hoc illustrari potest. Nam tres a triangulo anguli inseparabiles sunt; sed linea ex vertice ad basin perpendicularis abesse potest, salvo triangulo.

§. 61.

*Quæ enti cuidam constanter insunt, ea de eodem absolute enuncitari possunt & contra.* Quæ enim constanter insunt, tamdiu insunt, quamdiu ens speciem ac genus non mutat (§. 60.). De eo igitur enuncitari possunt, quamdiu ad istam speciem, vel istud genus refertur, hoc est, ens idem persistit. Cum adeo non alia conditione opus sit, ut, quod constanter inest, de eo enuncitari possit, quam ut ad hanc speciem, vel hoc genus referatur; de eo tanquam ente hujus speciei, vel generis idem absolute enunciandum. Si negas, de ente absolute enuncitari debere, quo eidem constanter inest; demus contrarium. Tribuendum igitur ei erit sub certa conditione. Quoniam id, quod constanter inest, ei tamdiu convenit, quamdiu speciem vel genus non mutat; non alia adjici poterit conditio, quam quod ipsum ad hoc genus, vel ad hanc speciem pertineat. Enimvero cum termini, quibus res, de quibus judicamus, denotantur (§. 36.), ipsas rerum species & genera designent (§. 44. & seqq.); non opus est, ut ista conditio adhuc alia ratione exprimatur. Quod igitur enti cuidam constanter inest, de eo absolute enuncitari debet.

Quodsi de ente quodam absolute enuncitari possit, quod ei convenit; id ei competere debet, quatenus ens huius præcise speciei, vel generis est, non alius. Quod vero eidem convenit, quatenus hujus præcise speciei, vel generis est; id ei tamdiu competit & de eo enuncitari potest, quamdiu ens ejusdem speciei, vel generis permanet. Ente igitur huic constanter inest.

E. gr.

E. gr. Durities lapidi competit, quatenus lapis est, hoc est, ad eam entium classem pertinet, quæ Lapidis nomine designatur. Absolute igitur de lapide enunciat, conditione nulla adjecta, durities. Dicimus nempe: *Lapis est durus*. Similiter tres anguli a triangulo inseparabiles sunt, adeoque eidem insunt, quatenus triangulum est, hoc est, ad eam figurarum classem pertinet, quæ triangulorum nomine indigitatur. Absolute igitur de triangulo enunciat, nulla conditione adjecta, ternarius angulorum numerus. Dicimus nempe: *Triangulum habet tres angulos*.

§. 62.

*Quanam de rebus sub certa conditione enuncianda.*

*Quæ mutabilia sunt, ea de ente nonnisi sub certa conditione enunciari possunt & contra.* Quæ enim mutabilia sunt, ea specie ac genere salvis mutari possunt (§. 60.). Terminus itaque, quo species vel genus designatur, nondum exprimit illam conditionem, ob quam rei convenit, quod mutabile. Alia igitur conditio cum requiratur, ea in enunciatione exprimenda, ut iudicium sit accuratum. Si negas: ergo absolute enuncia, quod mutabile est. Quoniam itaque ens eodem carente potest, etsi speciem, vel genus non mutet; iudicia ista non in omni casu applicari poterunt, adeoque cum conditio, qua casus determinatur, non exprimitur, nulli erunt usui, neque enim constat, quando enti illius generis vel speciei obvio applicari possint. Concedendum itaque, quod mutabilia nonnisi sub certa conditione enunciari possint.

Quodsi quid nonnisi sub certa conditione de ente data speciei, vel dati generis enunciari potest; id eidem non tantum ideo competit, quod ad hanc speciem, vel ad hoc genus refertur; verum etiam quod dicta adest conditio. Quamobrem cum conditio ista abesse possit, salvis specie ac genere; etiam id utroque salvo abesse potest, quod sub ista conditione enti tribuitur, consequenter inter mutabilia referri debet.

E. gr. Calor lapidi non constanter competit, atque adeo ei nonnisi sub hac conditione tribui potest, si Soli, vel igni, vel aëricálido fuerit expositus. Et vicissim si observo, Lapidem fieri calidum, dum radiis solaribus exponitur, inde agnosco, calorem in numerum mutabilium referri debere (§. 60.).

§. 63.



## §. 63.

*Quæ constanter insunt, eorum alia determinantur per alia, Constantium* ita ut, si hæc insint, non possint non ipsa quoque inesse: *alia discrimen.* vero tantummodo sibi mutuo non repugnant, ita ut una inesse possint & per ipsa cetera, quæ insunt constanter, determinantur, ipsa vero non determinantur per alia, quæ insunt. Demonstrabimus hæc a priori in Ontologia (§. 142. & seqq.): in præsentī nobis sufficit dicta exemplis confirmari.

Exempla facillima sunt, quæ ex Mathesi petuntur. E. gr. In *Triangulo* necessario perimetre tribus constat lineis & in eo una tres sunt anguli. Quod tres lineæ ad spatium terminandum concurrant, inter ea refertur, quæ fieri possunt; non tamen data una vel datis duabus lineis determinatur tertia, sed ea harum magnitudine salva & specie, & magnitudine varia esse potest. Tertia igitur ad duas non necessario accedit, sed variis modis determinari potest. E. gr. si triangulum fuerit rectilineum, id tantum caveri debet, ne sit duabus datis simul sumtis major, quoniam repugnat in triangulo duo latera simul sumta esse tertio majora. Datīs vero tribus lineis, quibus spatium determinari debet, simul determinantur anguli, sive earum ad se invicem in punctis, ubi concurrunt, inclinationes. Non tamen vice versa datis tribus angulis in triangulo rectilineo determinantur quoque ipsa latera; sed ratio saltem laterum determinatur, quam ea inter se habent. Sunt igitur in triangulo nonnulla, quæ mere possibilia sunt, ita ut una inesse possint, sed quorum unum non necessario inest, ubi inest alterum. Sunt præterea alia, quæ per hæc determinantur, ita ut, si determinantia ponantur, ponenda etiam sint determinata. Eodem modo sese res habet in figuris ceteris. In *Pentagono regulari* anguli quinque sunt inter se æquales, & perimetre constat ex quinque lineis rectis inter se æqualibus. Fieri potest, ut spatium quinque lineis rectis æqualibus ita terminetur, ut anguli quoque prodeant æquales: sed per æqualitatem laterum non simul determinatur æqualitas angulorum. Potest construi pentagonum æquilaterum, sed quod non est æquiangulum. In figuris quoque curvilineis eodem modo sese res habet. In *Parabola* semiordinata inter abscissam & parametrum est media proportionalis. Hæc semiordinata ad abscissam relatio possibilis est: construi potest istiusmodi curva, quæ istiusmodi relationem coordinatarum admittit, sed ea non est curvæ necessaria, nam in curvis aliis alia ratio coordinatarum obtinet. Per lineæ itaque curvedinem relatio

(Wolfsi Logica)

T

latio

latio ista non determinatur, sed ei saltem non repugnat. Enimvero per hanc semiordinatarum ad abscissas constantem relationem determinantur alia, quæ parabolæ necessario conveniunt, atque ex ista demonstrari solent a Geometris, v. gr. identitas rationis Quadratorum semiordinatarum & abscissarum. Immo si parabolam cum *Apollonio* instar sectionis conici consideres, cujus axis est lateri conici parallelus; istiusmodi sectio cono non repugnat, nec ejus conditiones se mutuo ponunt, sed saltem una esse possunt. Per has vero sectionis conditiones determinantur rationis Quadratorum semiordinatarum & abscissarum identitas, semiordinatæ ad abscissam constans relatio consistens in æqualitate ejus quadrati & rectanguli ex abscissa in parametrum, constans item relatio chordæ ad abscissam consistens in æqualitate quadrati ipsius atque rectanguli ex abscissa in compositam ex parametro & abscissa &c. Extra Mathesin exempla non adeo manifesta prostant, quod hæcenus non eadem methodo philosophati fuerint, qua Mathematici usi, ut ex demonstrationibus manifestum foret, quænam ea sint, per quæ, quod una inesse possint, etsi non necessario conjuncta, determinantur cetera, quæ constanter insunt. Quoniam tamen nobis propositum est philosophiam ad accuratam revocare methodum; exempla plurima occurrent, quibus idem confirmatur.

## §. 64.

*Essentialia  
entis.*

Ea, quæ constanter insunt, quorum tamen unum per alterum non determinatur, *essentialia* appello.

Ratio denominationis patebit in Ontologia, ubi ostensurus sum, essentiam entis consistere in ejus intrinseca possibilitate, hanc autem inde agnosci, quod ea, quæ una ponuntur, nullam contradictionem involvant. E. g. Essentialia trianguli sunt tres lineæ rectæ punctis extremis concurrentes, quarum duæ simul sumptæ sunt tertia majores. Etenim fieri potest, nec ullam contradictionem involvit, ut tres lineæ rectæ, quarum duæ simul sumptæ sunt tertia majores, ad terminandum aliquod spatium concurrant: posita autem una recta, non per eam determinantur simul ceteræ, sed eæ ad arbitrium sumi possunt, modo ambæ junctim sumptæ non sint data minores (*not.* §. 63.). Similiter essentialia pentagoni regularis sunt quinque latera æqualia & anguli æquales, seu æqualitas laterum & angulorum atque numerus eorundem quinarium. Fieri enim potest, ut figura aliqua quinque habeat angulos & latera æqualia, sed per æqualitatem laterum non determinatur æqualitas angulorum; quemadmodum per numerum quinarium laterum numerus quinarium angulorum.

§. 65.

§. 65.

Ea, quæ constanter insunt, sed per essentialia simul de-terminantur, *attributa* dico. *Attributa entis.*

E. gr. Figura tribus lineis terminata necessario quoque tres habet angulos & datis lineis anguli una determinatur. Numerus adeo ternarius angulorum est trianguli attributum. Similiter per numerum ternarium laterum & speciem lineæ rectæ una determinatur quantitas trium angulorum simul sumtorum, nimirum æqualitas eorundem cum duobus rectis. *Æqualitas* ergo omnium angulorum cum duobus rectis est attributum trianguli rectilinei. Similiter si figuræ rectilineæ quinque ponantur latera æqualia & anguli omnes æquales, per numerum quinarum laterum determinatur simul numerus quinarum angulorum & per numerum quinarum laterum atque eorundem & angulorum æqualitatem quantitas unius anguli, seu ratio ejus sesquiquinta ad rectum.

§. 66.

*Attributa*, quæ per omnia essentialia simul determinantur, dicuntur *Proprietates*, item *proprietates essentialia*, sive *attributa propria*: quæ vero per unum vel aliquot eorum determinantur, dici possunt *Proprietates communes* vel *attributa communia*. *Attributa-rium discrimen.*

E. gr. In triangulo rectilineo ratio æqualitatis trium angulorum ad duos rectos determinatur per numerum laterum & speciem linearum, adeoque per omnia essentialia trianguli rectilinei (§. 64.). Est igitur æqualitas trium angulorum cum duobus rectis proprietas trianguli rectilinei. Sed numerus ternarius angulorum per solum numerum laterum determinatur, non attenta specie linearum, atque ideo attributum commune est, quod omni triangulo competit, sive rectilineum fuerit, sive curvilineum, sive mixtilineum, non tamen alii figuræ præter triangulum. Eodem modo sese res habet cum quantitate anguli unius in pentagono regulari & numero quinario angulorum ejusdem pentagoni.

§. 67.

Mutabilia, quæ enti insunt, nec per essentialia determinantur, *Modos* appellare soleo; Scholastici *accidens* appellare solent, sed *predicabile*, & nonnunquam *accidens separabile*. *Modi definitio.*

Quoniam accidentis appellatio non semper eodem sensu sumitur, igitur ab ea abstinere malui, præsertim cum vocabulum modia philosophis usurpari soleat ad denotandum ea, quæ in ente mutationi obnoxia sunt.

§. 68.

*Differentia*      *Fieri potest, ut, dum quædam essentialia vel propria eadem essentialium. manent, cetera diversis modis determinentur.* Patet asserti veritas per exempla, nec alia opus est probatione.

Sane numerus ternarius laterum triangulo essentialis est; sed eodem manente species linearum & ratio laterum ad se invicem determinari potest diversimode. Pentagono rectilineo laterum & angulorum numerus essentialis est, sed eo salvo laterum & angulorum ratio diversimode determinari potest: etenim & laterum & angulorum ratio esse potest ratio æqualitatis, vel inæqualitatis, & alterutrorum ratio potest esse æqualitatis, ceterorum inæqualitatis, v. gr. ut latera sint inter se æqualia, sed anguli inæquales.

§. 69.

*Quomodo essentialia, attributa & modi de ente enunciantur.*      *Essentialia & attributa de ente absolute enunciantur & contra; modi vero sub certa tantum conditione & contra.* Essentialia enim & attributa enti constanter insunt (§. 64. 65. ); sed quæ constanter insunt, absolute de ente enunciantur (§. 61. ): ergo essentialia & attributa de ente absolute enunciantur. Contra quæ de ente absolute enunciantur, eidem constanter insunt (§. 61. ). Sed quæ constanter insunt, eorum alia determinantur per alia; alia vero tantummodo sibi mutuo non repugnant (§. 63. ), & hæc quidem essentialia (§. 64. ), illa attributa entis (§. 65. ) absolvunt. Quare quæ de ente absolute enunciantur, vel ejus essentialia, vel attributa sunt.

Modi sunt mutabiles (§. 67. ): sed quæ mutari possunt, sub certa nonnisi conditione de ente enunciantur (§. 62. ). Modi ergo sub certa tantum conditione enunciantur. Contra si qua tantum sub certo conditione de ente quodam enunciantur, ea mutabilia sunt (§. 62. ). Sed quæ in ente mutari possunt, ea modos ipsius constituunt (§. 67. ). Quamobrem quæ sub

sub certa tantum conditione enunciantur, ad modos pertinent.

Supponimus hic talia de ente enunciari, quæ ipsi intrinseca sunt, adeoque nobis non res est cum relationibus extrinsecis, quæ perinde ac modi mutari possunt.

§. 70.

*Per essentialia genera & species determinantur.* Quæcunque rebus insunt, vel constanter insunt, quamdiu species & genus non mutatur, vel his salvis mutari possunt (§. 60.). Sed constantia illa vel essentialia entis, vel ejus attributa (§. 64. 65.), seu proprietates essentialia atque communes constituunt (§. 66.), mutabilia vero modos absolvent (§. 67.). Ergo genera & species vel per essentialia, attributa & modos simul, vel per unum horum determinantur. Modi cum abesse possint, specie ac genere salvis (§. 67. 60.); specierum ac generum determinationem ingredi nequeunt. Si enim ingredi deberent, species ac genus mutaretur, quamprimum modus variaretur: id quod definitioni repugnat. Species itaque & genera determinantur vel per essentialia, vel per attributa, vel per utraque simul. Attributa per essentialia determinantur, ita ut iis positis hæc una ponantur. Non igitur opus est, ut ad determinandum genera & species utraque conjungantur; sed sola essentialia sufficiunt: per hæc enim ubi genera & species determinantur, attributa singulorum generum singularumque specierum una determinantur, neque adeo liberum est ista salvis essentialibus aliter determinare (§. 65.).

*Quomodo genera & species determinantur.*

In exemplis res manifesta. Triangulum rectilinum est genus ali- quod, quod sub se æquilaterum, æquicurum & scalenum comprehendit. Essentiale trianguli rectilinei est concursus trium rectarum ad spatium terminandum, quarum duæ simul sunt tertia majores: proprietas vero numerus angulorum ternarius, nec non ratio æqualitatis eorundem ad duos rectos (§. 66.). Triangulum rectilinum solo concursu trium rectarum ad spatium terminandum determinatur, quarum duæ junctim sumtæ sunt tertia majores: nec quicquam huc faciunt proprietates commemoratæ, quæ ex concursu trium rectarum consequuntur. Æqualitas trium laterum triangulum æquilaterum,

æqualitas duorum æquicrurum, inæqualitas trium scalenum determinat. Sed æqualitas trium laterum, æqualitas duorum & inæqualitas trium ad essentialia referri debet (§. 64). Species adeo triangulorum rectilineorum per essentialia determinantur.

## §. 71.

*Cur genera  
& species per  
attributa  
distingui pos-  
sint.*

*Genera & species possunt a nobis distingui per attributa, etsi essentialia ignorentur.* Attributa propria per omnia essentialia simul determinantur (§. 66.), atque adeo nonnisi isti generi vel speciei competunt, cui ista essentialia conveniunt. Per unicum igitur attributum proprium seu proprietatem essentialiæ genus vel species agnosci potest atque ab aliis distingui, etsi essentialia ignorentur. Attributa communia per unum alterumve essentialium determinantur (§. 66.), atque adeo nonnisi isti generi vel speciei competunt, cui istud essentialia convenit. Quodsi ergo plura fuerint attributa communia, quorum unumquodque per unum vel alterum essentialium, omnia autem simul per omnia essentialia junctim sumpta determinantur; attributa ista simul sumpta non conveniunt nisi generi vel speciei, cujus sunt ista essentialia. Quamobrem per ea junctim sumpta genus & species denuo agnosci atque ab aliis distingui possunt, utut essentialia ignorentur.

## §. 72.

*Specierum &  
generum in  
feriorum  
differentia  
unde.*

*Species & genera inferiora differunt per ea, quæ manentibus essentialibus ceteris iisdem diversimode determinari possunt.* Genera & species determinantur per essentialia (§. 70.). Sed genera ea continent, quæ speciebus (§. 45.); genera vero superiora, quæ inferioribus communia sunt (§. 46.): species igitur & genera inferiora a se invicem differre nequeunt nisi iis essentialibus, quæ manentibus ceteris iisdem diversimode determinantur.

Demonstrationem aliam ex ipsis specierum & generum notionibus derivatam, in subsidium vocatis notionibus aliis simplicioribus, quæ eas ingrediuntur, dabimus in Ontologia (§. 255.), ubi generalium notionum analyfin sumus exhibituri. Confirmatur vero præsens propositio exemplis. Species triangulorum sunt æquilaterum, æquicrurum & scalenum

lenum. Notio trianguli in genere comprehendit trium rectorum ad terminandum spatium concursum, quarum duæ simul sumtæ sunt tertia majores, adeoque quod idem manet in tribus triangulorum speciebus. Enimvero ratio rectorum ad se invicem tribus modis determinari potest: aut enim singula ad se invicem habent rationem æqualitatis, aut inæqualitatis, aut tertium habet ad unum rationem æqualitatis, ad alterum rationem inæqualitatis. Per has diversas vero determinationes differunt triangula æquilatera, scalena & æquicrura inter se. Idem eodem modo se habet in formulis generalibus algebræ. Nam si latus numeri polygoni sit  $n$ , numerus angulorum  $a$ , erit numerus polygonus  $\frac{n^2(a-2)-n(a-4)}{2}$  (§. 210. Anal.). Jam in hac

formula generali, quæ notionem polygoni numeri in genere symbolice repræsentat, numerus angulorum  $a$  diversimode determinari potest, manente latere  $n$  indeterminato. Species adeo differunt diversa numeri angulorum  $a$  determinatione: nam si  $a$  explicetur per 3, 4, 5, 6, &c. prodit  $\frac{n^2-1}{2}$  pro numero triangulæ,  $\frac{2n^2-3n}{2}$  pro quadrato,  $\frac{3n^2-5n}{2}$  pro penta-

tagono,  $\frac{4n^2-6n}{2}$  pro hexagono &c. adeoque species differunt per coëf-

ficientes quadrati lateris & ipsius lateris, quorum illi repetuntur ex serie naturali numerorum 1.2.3.4. &c. hivo ab illis binario differunt, quippe prodeuntes binario ex istis subducto. Exempla alia occurrunt in philosophiæ pertractatione & inferius in ipsa Logica, ubi subinde ad logica theoremata & regulas provocabimus, que iis illustrantur.

§. 73.

*Si, quæ in notione speciei indeterminata supersunt, singula Individua determinentur, nec determinatio generalibus, quæ notioni speciei rum differunt, repugnat; notio individui prodit.* Species ea continet, rentia unde. quæ individuis communia sunt (§. 44.): cetera igitur, quibus individua a se differunt, in notione speciei non determinantur. Quamobrem si ea determinantur, ut nihil indeterminati amplius supersit; notio utique individui prodit: quod si enim aliquid remaneret indeterminatum, quod, manentibus ceteris iisdem, diversimode determinari possit, species data non

non foret infima, sed intermedia (§. 47.). Enimvero quod determinationes ultimæ non repugnare debeant anterioribus, quibus genera & species determinantur, probatione non indiget: si enim repugnarent, una cum ceteris eidem enti inesse non possent, adeoque ens nullum esset, cui notio ista singularis conveniret.

E. gr. In specie trianguli æquilateri absoluta lateris magnitudo seu, quod perinde est, ratio lateris ad lineam datam nondum determinata est. Quodsi ergo ea superaccedat, nihil amplius superest, quod determinari posset: unde dato latere determinata longitudinis triangulum æquilaterum in singulari determinatur. Atque ea ratio est, cur data recta magnitudine triangulum æquilaterum constui possit. Similiter in adductis modo (not. §. 72.) formulis algebraicis pro numeris polygonis in specie, v. gr. in triangulari  $\frac{n^2 + n}{2}$ , latus numeri poly-

goni indeterminatum est, quo determinato per numerum specialem, prodeunt numeri triangulares singulares seu eorum individua. Nam si sit  $n=2$ , erit numerus triangularis  $\frac{4+2}{2} = 3$ , qui est numerus

determinatus, nec ulteriorem determinationem admittit. Suo tempore occurrent quoque exempla alia, quam mathematica; sed quæ hic nondum supponi possunt. Monebimus ramen lectorem, ubi talia occurrent, ut sibi in memoriam revocet regulas, quæ iisdem illustrantur.

## §. 74.

*Individui  
definitio.*

Apparet hinc, *Individuum* esse ens omnimode determinatum, seu in quo determinata sunt omnia, quæ eidem insunt.

Habemus adeo jam definitionem individui, cujus notione clara hactenus fuimus contenti (§. 43.). Quodsi in Arithmetica numeros individuales ad certam speciem relatos ita scribas, ut modus, quo ex datis determinantur, inde appareat, notio individui mirifice illustratur & quomodo cognitio universalis insit singularibus appareat. E. gr. Numeri triangularis formula analytica est  $\frac{n^2 + n}{2}$  (not. §. 72.), ubi  $n$

latus numeri denotat. Sit jam in casu singulari  $n=5$ , pro quinto  
in



in ordine numero triangulari erit  $\frac{5^2+5}{2}$  seu  $\frac{5 \cdot 5+5}{2} = 15$ . Evidens est,

hac characteristica exhiberi numerum 15, tanquam ad speciem triangularium relatum atque in hac ipsius representatione una doceri, quid numerus triangularis quintus cum ceteris omnibus in infinitum habeat commune, nempe modum, quo ex numero dato in serie naturali determinatur, nimirum quod prodeat ille, si hic in seipsum ducatur factoque denuo addatur, aggregatum denique bifariam dividatur doceri quoque, in quo a ceteris omnibus differat, nempe in eo, quod numerus datus, ex quo determinatur sit quinarius. Obiter noto, latere in istiusmodi expressionibus insigne artificium analyticum, ubi ex notionibus obviis derivari possunt, quo & doctores, & inventores commode utuntur. Sed de eo suo loco atque tempore dicemus apertius. Quod si ex formula generali substitutionis via numerum triangularem quintum derives, eum exhibere licet tanquam relatum ad genus numeri polygoni & speciem numeri triangularis simul. Etenim formula analytica generalis  $\frac{(a-2)n^2-n(a-4)}{2}$

(not. §. 72.), ubi  $a$  numerum angulorum  $n$  latus ejus denotat. Quamobrem si pro  $a$  numerum angulorum triangularis 3 & pro  $n$  latus 5 substituamus; prodibit numerus triangularis quintus  $\frac{(3-2)5 \cdot 5 - 5(3-4)}{2}$ .

In hac expressione numeri triangularis ad oculum patent tum illa, quæ ipsi cum omnibus numeris polygonis communia sunt; tum ista, quæ cum numeris triangularibus omnibus communia habet; tum denique, quod ipsi tanquam quinto numero triangulari proprium est. Apparet adeo hanc quinti numeri triangularis expressionem eum representare tanquam individuum ad suam speciem suumque genus relatum, cumque distincte intuendum exhibeat, quæ ipsi tanquam individuo, quæ vero ob speciem atque genus conveniunt; doctrina de generibus, speciebus ac individuis istiusmodi exemplis omnium optime illustratur. Indicabimus tamen suo loco exempla, quæ in philosophicis occurrent.

#### §. 75.

Patet hinc, quid sit principium istud individuationis, de *Differentia* quo tot extant disputationes in philosophia scholastica. Est *numerica* & nempe *Principium individuationis* omnimoda determinatio principium *U* *corum*  
(Wolffii Logica)

*individua-  
tionis.*

eorum, quæ rebus insunt. Et harum quidem determinatio-  
num eæ constituunt *differentiam numericam*, quibus datis po-  
nitur individuum: ceteræ vero, quibus datis, individuum  
nondum ponitur, *in specificam & genericam differentiam* discer-  
pendæ.

Differt utique in eo individuum ab universali, quod hujus notio  
nihil involvat, quod non sit determinatum, cum in universali adhuc  
quædam indeterminata contineantur (§. 73.). Exemplum numeri  
quinti triangularis modo allatum rem reddit satis manifestam & ex  
eodem liquet, determinationem ultimam lateris, quod pro numero  
quinto est 5, constituere in numeris polygonis *differentiam nume-  
ricam*. Principium autem individuationis complectitur *differentias*  
omnes, sive numericæ fuerit, sive specificæ, sive genericæ. Est adeo  
omnium differentiarum complexus.

§. 76.

*Differentia  
specifica a  
proprio di-  
versa.*

*Differentia specifica differt a proprio.* Differentia speci-  
fica consistit in determinationibus, quibus datis adhuc inde-  
terminata sunt, quæ *differentiam numericam* absolvunt  
(§. 75.). Sed genera & species per essentielles determinatio-  
nes discernuntur (§. 70.), propria autem hisce datis una de-  
terminantur (§. 66.); *differentia igitur specifica a proprio*  
*differt.*

Nimirum eadem hic intercedit differentia, quæ inter essentialia  
entis ejusque attributa locum habet (§. 64. 65.).



**SECT.**

SECT. II.

DE

NOTIONIBUS IN SPECIE.

CAPUT I.

DE NOTIONUM DIFFERENTIA  
FORMALI.

§. 77.



*D*ifferentiam notionam formalem dicimus eam, quæ *Differentia*  
a modo cognoscendi desumitur. *formalis de-*

Ad differentiam hanc attendit *Cartesius* in *Differ-*  
tatione de methodo Anno 1637. primum Gallico ser-  
mone vulgata; sed eam non explicavit. Explicationem aliquam an-  
no sequente dedit *Jungius* in *Logica Hamburgensi* lib. 1. c. 15. p. m.  
100. 101; sed sufficientem *Leibnitius* in *Actis Eruditorum* A. 1684.  
p. 537. legens vestigia *Valeriani Magni* in *Logica*, quam nos more  
nostro ad evidentiam reducemus, novis accessionibus locupletabimus  
& ad praxin revocabimus.

§. 78.

*Dum rem nobis representamus, aut notio ad eam agno-*  
*scendam sufficit, aut non sufficit.* Etenim si quando vidimus ho-  
minem quendam eundemque nobis denuo obvium factum  
intuemur, aut eum statim agnoscimus, aut hæremus, num is  
sit, quem alio tempore alibi visum meminimus. Similiter si  
terminum quendam audimus, aut satis intelligimus, quid eo-  
dem denotetur, ita ut eum in casu obvio citra periculum erran-  
di applicare possimus; aut nobis non satis patet, quænam sit  
illa res, quæ eidem respondeat.

*Fundamen-*  
*tum notio-*  
*num obscura-*  
*rum & cla-*  
*rarum.*

## §. 79.

*Nota definitio.*

*Notas* appello rebus intrinseca, unde agnoscuntur & a se invicem discernuntur.

E. gr. Tria latera ad superficiem terminandam concurrentia dicuntur notæ, unde agnoscitur triangulum.

## §. 80.

*Notionis clara & obscura definitio.*

*Notio clara* est, quæ nobis notas exhibet ad rem agnoscendam atque ab aliis discernendam sufficientes: *obscura* vero, quæ notas insufficientes continet.

Solem intuentes statim agnoscimus, cumque ab omni ente alio optime discernimus: ejus adeo notionem claram habemus. Similiter notiones claras habemus hominis, avis, leonis, canis, arboris &c. & in Geometria figurarum, veluti trianguli, quadrati, polygoni &c. Si vero plantam exoticam intuentes hæremus, num eadem sit cum alia olim alibi visa, vel cujus nobis succurrit nomen; ejus notionem habemus obscuram.

## §. 81.

*Termini obfcuri & clari definitio.*

*Terminus obfcurus* est, cui notio obscura adhæret: *clarus* vero, cui notio clara respondet.

Terminus enim est vox notionem significans (§. 36.): quamobrem cum notio vel clara sit, vel obscura (§. 80.), termini quoque eandem differentiam admittunt. Voces igitur, homo, equus, Sol, ventus, nix, pruina sunt termini clari, quoniam iis notiones claræ respondent, ita ut res oblatas agnoscamus, quibus nomina ista conveniunt. Contra vero *entelechia Aristotelis* est terminus obscurus, cum non satis constet, quid ipse ea voce indigitare voluerit.

## §. 82.

*Terminus idem cur uni clarus, alteri obscurus.*

*Fieri potest, ut terminus aliquis sit alteri clarus, qui alteri est obscurus.* Fieri enim potest, ut unus habeat notionem rei claram, cujus alter nonnisi obscuram habet (§. 80.). Quod si igitur uterque noverit terminum notioni isti respondentem, alteri erit clarus, alteri obscurus (§. 81.). Similiter fieri potest, ut uterque habeat rei, quæ termino aliquo denotatur, notionem claram, sed ut alter norit, rei isti denotandæ terminum convenire, alteri autem non satis constet, quod ei indigitandæ

dæ serviat : unde denuo terminus uni clarus est, alteri obscurus.

E. gr. Venator notionem claram habet damæ: sunt alii, quibus terminus iste innouit & quibus constat, eo feram indigitari. Quoniam tamen damam obviam non agnoscunt, quod nempe sit ea ipsa fera, cui istud nomen convenit; notionem ejus obscuram habent adeoque terminus quoque ipsis obscurus est, qui venatoribus clarus.

§. 83.

*Si duo ejusdem rei notionem habent obscuram, notio unius obscurior esse potest notione alterius.* Qui enim notionem habet obscuram, is non tot intuetur notas, quot ad rem agnoscendam & ab aliis distinguendam sufficiunt (§. 80.). Quamobrem si unus plures ignoret notas, quam alter; ille notionem obscuriorem habet, hic minus obscuram.

§. 84.

Hinc ulterius consequitur, *si quis terminus duobus fuerit obscurus, eundem uni obscuriorem esse posse quam alteri.* Obscurus enim est terminus ob obscuram notionem, quæ eidem adhæret (§. 81.). Cum itaque fieri possit, ut ejusdem rei notio uni obscurior sit, quam alteri (§. 83.); terminus quoque notionem istam significans (§. 36.) uni obscurior esse potest quam alteri.

Gradus nimirum obscuritatis terminorum pendent a gradibus obscuritatis notionum.

§. 85

*Si notarum quarundam obliviscimur, quæ nobis fuerant perspectæ; notio clara obscura fit, quæ fuerat obscura, obscurior evadit.* Notio enim clara est ob notarum sufficientem numerum (§. 80.). Quamobrem cum quarundam notarum obliviscimur, residuæ non amplius sufficiunt ad rem agnoscendam atque ab aliis distinguendam, adeoque notio, quæ clara fuerat, obscura evadit (§. cit.). Quodsi vero notæ nobis primum perspectæ non sufficebant ad rem agnoscendam atque ab aliis discernendam; multo minus sufficient residuæ, ubi

aliquæ earum oblivioni traditæ fuerant. Notio igitur, quæ obscura erat, adhuc obscurior redditur (§. cit.).

*Terminus  
clarus quan-  
do fiat obscu-  
rus.*

§. 86.

Hinc una liquet, quando terminus clarus nobis evadat obscurus & terminus obscurus adhuc obscurior (§. 81.), nimirum si quarundam notarum obliviscimur, quæ nobis fuerant perspectæ & ad notionem spectant, quæ termino adhæret.

Terminis nimirum nihil claritatis deedit, nisi quatenus ea subducitur a notionibus, quæ iidem adhærent, cum claritatem non habeant, nisi quam a notionibus mutantur.

*Fundamen-  
tum notionis  
confusæ &  
distinctæ.*

§. 87.

Dum notionem claram habemus, seu rem oblatam agnoscimus atque ab alia distinguimus (§. 80.), aut notas omnes, quas continet, distinguere, aut non distinguere valeamus. Patet asserti veritas cundo per exempla, qualia mox (not. §. 88.) dabimus.

Patet adeo notionem claram in duas abire species. Clara nimirum est notio, quæ nobis sistit intuendas notas ad rem agnoscendam & ab aliis discernendam sufficientes (§. 80.). Cum igitur modi cognoscendi habeatur hic ratio (§. 77.), in definitione notionis claræ modus, quo notas intuemur, duplici modo determinari potest: aut enim eas uno obtutu comprehendimus, aut singulas a se invicem distinguimus, notione rei in alias simpliciore resoluta. Quamobrem notionis claræ duæ constitui debent species (§. 72.). Quod si, quæ de generibus & speciebus cap. 2. sect. 1. part. 1. dicta & exemplis mathematicis illustrata fuerit, constanter applices, ubi nos non modo in Logica, verum etiam in aliis philosophiæ arque Matheseos partibus genera in suas species & has denuo in inferiores dividimus; non modo doctrina logica a nobis tradita clarior continuo evadet, verum etiam ejus usus facilius reddetur, ipsarum autem nostrarum notionum veritas magis perspicitur.

*Notionis cla-  
ræ & confu-  
sæ definitio.*

§. 88.

Notio clara, quam habemus, distincta est, si notas, quas nobis sistit, distinguere valeamus: confusa vero est, si eas distinguere non possumus.

E. gr. Si triangulum nobis offertur, aut id uno obtutu comprehendimus, aut sigillatim ad singulas perimetri partes attentionem nostram

nostram promovemus. In priori casu non distinguimus notas, quibus id ab aliis figuris discernitur; in posteriori autem judicamus, perimetrum constare ex tribus partibus seu tribus lineis rectis. Quamobrem ubi novimus, nos triangulum a ceteris figuris rectilineis distinguere, quod perimeter ex tribus lineis componatur; notionem trianguli distinctam habemus. Ternarius enim laterum in perimetro numerus est nota sufficiens ad triangulum a figura quacunque alia discernendum. Colorem rubrum optime agnoscimus & a colore quocunque alio distinguimus: cum tamen notas indicare non valeamus, unde eundem agnoscimus, ejus notionem nonnisi confusam habemus. Exempla notionum distinctarum & confusarum ipsæ notionum species exhibent, quas hic explicamus. Etenim *Cartesius*, qui nullam differentiam notionis claræ atque distinctæ ab obscura & confusa assignavit, in confusa acquievit notione notionis claræ & distinctæ: nos vero, qui differentias istas naturæ humanæ conformiter scrutamur, notionem distinctam tradimus specierum, in quas ob differentiam formalem abeunt notionem nostræ. Omnes Mathematicorum definitiones præbent notionum distinctarum exempla: immo nobis curæ est, ut omnes quoque definitiones in philosophia sint totidem notionum distinctarum exempla.

§. 89.

*Si quis habet notionem distinctam novitque notarum terminos, is eas alteri enumerare valet.* Qui enim habet notionem distinctam, is notas, quas notio continet, distinguere valet. (*§. 88.*). Quod si vero terminos notarum novit, ei perspectæ sunt voces, quibus notæ indignantur (*§. 36. 37.*). Notas igitur, quas notio involvit, alteri enumerare valet (*§. 36.*).

§. 90.

*Qui notas cognoscibilis alteri enumerare valet, is ejus notionem habet distinctam; sed non contra notione distincta destituitur, qui eas enumerare non valet.* Qui enim alteri enumerare valet notas cognoscibilis, is vocibus alteri significat notionem notarum, quas habet (*§. 36.*), adeoque singulas sibi repræsentare valet (*§. 34.*), consequenter eas a se invicem distinguit. Notionem itaque cognoscibilis distinctam habet (*§. 88.*). Quod

Quod vero non e contrario notione distincta destituatur, qui notas enumerare non valet, patet per propositionem precedentem (§. 89.), vi cujus duæ requiruntur conditiones, ut quis notas cognoscibilis alteri enunciare valeat, nempe notionem habere debet distinctam notarumque nosse terminos. Alterutra igitur conditione deficiente, notas enumerare non valet.

Sæpiissime tamen accidit, ut, qui notas cognoscibilis enumerare non valet, notione distincta destituatur: rarius est casus alter, ubi quis ob terminorum ignorantiam vel defectum notas cognoscibilis alteri significare nequit,

## §. 91.

*Fundamentum notionis distinguamus easque enumerare valeamus, vel saltem aliquas completa & incompleta.* Fieri potest, ut rem oblatam agnoscentes vel notas omnes distinguamus easque enumerare valeamus, vel saltem aliquas. Utrumque casum esse possibilem, experientia loquitur.

Ita tria latera in perimetro trianguli discernens notas omnes agnoscit, quæ ad istud agnoscendum & ab aliis discernendum sufficiunt. Quæsitus vero, unde pentagonum regulare agnoscat, si responder, ex quinque laterum æqualitate, notas saltem aliquas recenset, non omnes: nam in earum quoque censum veniunt quinque anguli æquales,

## §. 92.

*Notionis completa & incompleta definitio.*

*Notio completa* est, quæ notas sufficientes exhibet ad rem in statu quolibet agnoscendam & ab aliis distinguendam: *incompleta* vero, quæ notas insufficientes continet.

E.g. Qui novit, se pentagonum regulare ab aliis figuris discernere per quinque laterum & angulorum æqualitatem, is notionem ejus habet completam: si quis vero quæsitus, unde pentagonum regulare agnoscat, solam quinque laterum æqualitatem nominat, is incompletam habet. Omnes notiones specierum notionis, quas hucusque dedimus & porro dabimus, sunt notionum completarum exempla. *Leibnitius* differentiam notionis completæ ac incompletæ non attendit; sed distinctam supponit esse completam. Enimvero in doctrina de definitione & alibi prædest hoc observasse discrimen. Sane qui cum *Cartesio* corpus per ens extensum definiunt, notionem incompletam cum completa confundunt: quod suo loco patebit.

## §. 93.



§. 93.

*Notio* plures continens notas, quam quæ ad rem agnoscendam & ab aliis discernendam sufficiunt, *abundans* a me dici solet. *Notionis abundantis definitio.*

E. gr. Abundans notio trianguli rectilinei est, si dicas esse spatium tribus lineis rectis terminatum & tribus angulis instructum. Quoniam enim numerus ternarius angulorum per numerum ternarium laterum determinatur; ad triangulum agnoscendum & ab aliis figuris dignoscendum solus numerus ternarius laterum sufficit. Superfluum itaque est, ut angulorum quoque habeatur ratio.

§. 94.

*Si notionem habemus distinctam, notarum, quæ eam ingrediuntur, denuo habemus vel distinctam, vel confusam.* Qui enim notionem habet distinctam, is notas, quæ eam ingrediuntur, sibi repræsentare valet (§. 88.), adeoque earum notionem habet (§. 34.), eamque claram (§. 80.). Quoniam vero notio clara vel distincta est, vel confusa (§. 88.); ideo notionem notarum vel distinctam habet, vel confusam. *Notionis adæquate & inadæquate fundamentum.*

§. 95.

Notio distincta in notiones distinctas notarum, quæ eam ingrediuntur, a cognoscente resolubilis dicitur *adæquata*; in casu opposito *inadæquata*. *Notionis adæquate & inadæquate definitio.*

E. gr. In Geometria definimus *Quadratum* per figuram quadrilateram, æquilateram, rectangulam. Tres istæ notæ sufficiunt ad hanc figuram a ceteris distinguendam. Notio igitur Quadrati est distincta (§. 88.). Damus vero etiam definitiones *figura quadrilatera, æquilatera & rectangula* (§. 88. 97. Geom.) & ulterius *perimetri* (§. 31. Geom.), *lateris* (§. 35. Geom.) atque *anguli recti* (§. 55. Geom.) &c. qui termini tanquam notæ definitiones illas ingrediuntur. Qui ergo definitionibus Geometriæ nostris ordine operam navat, is terminos, consequenter notiones, quas denotant (§. 36.), definitionem ingredientem per definitiones antecedentes explicare, adeoque in notiones distinctas notarum resolvere valet. Notiones itaque figurarum damus *adæquatas*. Idem observamus in præsentī Logicæ pertractatione ac constanter observabimus per philosophiam universam. E. gr. In *notionis adæquate* definitione mentio fit *notionis distinctæ* atque *notæ*. *Notionem* vero *distinctam* definivimus (§. 88.) & *notam* (§. 79.) &c. (*Wolffii Logica*)

X

Quam-

Quamobrem ipsæ notionum species a nobis ita explicantur, ut, quæ singularum notiones tanquam notæ ingrediuntur, in anterioribus pariter distincte fuerint explicatæ atque ita porro. Ipsa igitur Logica, prout a nobis pertractatur, hic quoque præcepta sua illustrat. Atque ita obtinemus, ut non modo attento Logicæ nostræ studio Logica docens plene intelligatur, verum etiam utens una comparetur.

## §. 96.

*Notionis ad-  
æquatæ gra-  
dus.*

Prima resolutio notionis distinctæ in notiones distinctas notarum est *primus gradus notionis adæquatæ*. Secunda resolutio notionum distinctarum notarum, quæ datam notionem ingrediuntur, in notiones distinctas notarum, quæ illas ulterius ingrediuntur, constituit *gradum secundum notionis adæquatæ* & ita porro, donec perveniatur ad notiones irresolubiles.

Quoniam terminis caremus, quibus notionum subordinationes exprimere valemus; nec gradus notionis adæquatæ satis distincte efferre licet (§. 148 *Disc. pralim.*). Satis tamen clare percipiuntur gradus, si cogitemus, nos uno gradu ulterius promoveri, quoties notionem notæ sumimus tanquam datam & notarum, quæ ipsam ingrediuntur, notiones quarimus distinctas. Gradus isti notionis adæquatæ & notionum subordinationes optime patent, ubi definitiones nostras per universam Mathesin traditas in Elementis nostris resolvas, quærendo indicis beneficio terminorum, quibus notæ definitionem ingredientibus designantur, definitiones. Cum methodus philosophica, qua philosophiam universam tradere constituimus, iisdem contineatur regulis, quibus mathematica absolvitur (§. 139. *Disc. pralim.*); gradus notionis adæquatæ & notionum subordinationes, ex nostra quoque philosophiæ pertractatione perspicere licebit, si quis eo labore defungi voluerit, quem modo commendavimus & ad hunc scopum apprime necessarium esse res ipsa loquitur (§. 95. 96.).

## §. 97.

*Quando no-  
tio completa  
fit incomple-  
ta.*

*Si notas quasdam, quæ distinctam ingrediuntur, oblivioni damus, vel saltem per oblivionem statuimus, eas ad notationem completam non esse referendas; notio completa abit in incompletam.* Sive enim notarum quarundam prorsus obliviscamur, sive nobis memoriæ lapsu persuadeamus, eas in notarum nume-

numerum non esse referendas; notio non amplius continet notas sufficientes ad rem agnoscendam & ab aliis discernendam. Est igitur incompleta (§. 92.).

E. gr. Ad notionem polygoni regularis completam requiritur & laterum, & angulorum æqualitas. In numerum figurarum planarum regularium refertur quoque triangulum regulare seu æquilaterum. Quodsi quis recordatus, trianguli regularis notionem sola laterum æqualitate compleri, cum ideo sit æquiangulum, quia æquilaterum, nec attendens, quod id triangulo æquilatero conveniat, quatenus ad triangulorum genus refertur, & memoriæ quodam lapsu sibi imaginarius, convenire id triangulo regulari, quatenus sub genere figurarum regularium continetur, figuram regularem omnem sola laterum æqualitate determinari sumit; ejus notio completa, quam de polygono regulari antehabuerat, incompleta evadit.

§. 98.

*Si notas rei a se invicem discernere didicimus, notio distincta ab it confusam.* Qui enim notas rei a se invicem discernere didicit, is eas posthac non amplius ab aliis rei intrinsicis ac inter se distinguere poterit. Notio igitur, quæ fuerat distincta, confusa evadit (§. 88.).

*Notionis distincta in confusam mutatio.*

Cur fieri possit, ut, quas distinguere didicimus, notas distinctas posthac non amplius discernere valeamus, patebit ex sequentibus clarius. Nunc nobis sufficit, nihil hic sumi, nisi quod experientiæ congruum.

§. 99.

*Si notiones notarum distinctæ abeunt in confusas, notio adæquata fit inadæquata.* Patet hoc ex ipsa definitione notionis adæquatæ ac inadæquatæ (§. 95.).

*Adæquata in inadæquatam mutatio.*

Notio adæquata cum suas habeat gradus (§. 96.), patet eodem modo gradus deteriorari posse, ut magis adæquata notio in minus adæquatam abeat. Qui ex disciplinis accurata methodo pertractatis sibi familiarem reddidit notionum subordinationem attendendo, quomodo sequentes in antecedentes resolvantur (§. 119. *Disc. prælim.*); is hanc notionum degenerationem apprimè concipiet.

§. 100.

*Notæ desumendæ sunt ab essentialibus & attributis.* O. Notæ unde omnis nota est quidpiam rei intrinsicum, per quod ea agnosci

& ab

& ab aliis rebus discerni potest (§. 79.). Desumendæ igitur sunt notæ ab iis, quæ constanter insunt. Quamobrem cum ea, quæ constanter insunt, vel essentialia sint, vel attributa (§. 63. & seqq.); notæ desumendæ sunt ab essentialibus atque attributis.

## §. 101.

*Notiones distinctæ quæ tendant.*

*Notionibus rerum distinctis eas reducimus ad sua genera atque species.* Qui notionem rei habet distinctam, is notas a se invicem distinguit, per quam agnoscitur & ab aliis discernitur (§. 88.), adeoque novit, quæ ei sunt essentialia, vel attributa ejusdem (§. 100.). Per essentialia autem (§. 70.), vel iis ignoratis per attributa, genera & species determinantur (§. 71.). Dum ergo rerum notiones distinctas sibi quis comparat, eas ad sua genera atque species reducit.

Quamdiu ergo notionibus confusis contenti sumus, genera & species rerum accurate constitui nequeunt. Quodsi genera atque species rerum non fuerint accurate constituta, nec judicia satis determinata erunt, nec accurate ratiocinari licebit (§. 48. 49.). Patet adeo quanta sit notionum distinctarum ad accurate philosophandum utilitas, immo necessitas (§. 116. & seqq. *Disc. prælim.*).

## §. 102.

*Notarum sufficientium unde demonstratur.*

*Notas esse sufficientes ad rem agnoscendam & ab aliis discernendam demonstrari nequit, nisi intellectus essentialibus.* Qui essentialia novit, is genera & species determinare valet (§. 70.), differentias específicas & genericas a se invicem distinguendo (§. 75.), ut distincte agnoscat, quænam essentialium ad genus, quænam ad speciem determinandum sufficient. Immo qui essentialia novit, is quoque attributa propria & communia distinguere valet (§. 66.) atque adeo distincte agnoscit, quænam attributa ad genus, quænam ad speciem constituendum sufficient (§. 71.). Quodsi quis rei istiusmodi notionem habet, ut eam ad suam speciem suumque genus referre queat; is sufficientes habet notas ad eam agnoscendam & ab aliis distinguendam. Enimvero quamdiu essentialia ignoramus, rei genus atque speciem per ea determinare non possumus:

sumus: quod per se patet. Nec minus evidens est, nos iis ignoratis attributa propria & communia non evidenter distinguere. Quamobrem ubi per attributa a posteriori cognita res discernere constituimus, non evidenter patet, nos ea tenere, quæ rei ab aliis distinguendæ, consequenter ad suam speciem suumque genus referendæ sufficiunt (§. 44. & seqq.). Essentialibus itaque minime intellectis, demonstrari non potest, notas ad rem agnoscendam & ab aliis discernendam esse sufficientes.

Est enim experientia constare possit, quædam esse rebus diversarum specierum communia, alia non item, sed in hac tantummodo specie deprehendi; non tamen id ubivis succedit, neque nobis pater, an ea, quæ cognovimus, simul sumpta notas sufficientes constituent. Hæc sane ratio est, cur istiusmodi condantur definitiones, quæ instantiis obnoxie sunt, atque inutiles pariunt distinctiones, ubi eas tueri volueris. In genere autem constat, quæ a posteriori sumuntur, ea nondum esse demonstrata, si vel maxime certa sint. Sed ea de re dicemus suo loco apertius, ubi de demonstratione agemus.

*CAPUT II.*

DE DIFFERENTIA NOTIONUM MATERIALI.

§. 103.

**D**ifferentiam notionum materiale[m] dicimus eam, quæ a Differentia materia earundem, seu re representata desumitur. *definitio.*

Pertinet huc distinctio notionum in *universales & singulares*, quarum ista genera & species (§. 54.), hæ individua (§. 43. 74.) sub se comprehendunt. Sunt autem adhuc alie nonnullæ, quas in Logica attendi utile est. De his dicemus in præsentia.

§. 104.

*Notio, quam habemus, aut solas rei notas continet, aut præ-* Notionis *serta attributa, modos & determinationes extrinsecas.* Etenim *simplicis &*

*Complexa  
fundamen-  
tum.*

aut essentialia continet, per quæ ens repræsentatum in suo genere suaque specie determinatur (§. 70.), aut præterea constantia ac mutabilia alia. Si essentialia continet, nec præterea alia, tum solas notas continet (§. 79.). Si solis attributis, per quæ ignoratis essentialibus genera & species determinari possunt (§. 71.), constat; tum denuo nonnisi notas involvit (§. 79.). Enimvero si præter essentialia, aut attributa ad rem distinguendam sufficientia complectitur adhuc alia; tum vel ea constantia sunt, vel mutabilia (§. 60.). In casu itaque priori insunt ulterius vel attributa quædam sive propria, sive communia (§. 66.), in posteriori modi nonnulli (§. 67.). Quodsi notio præter intrinseca rei quædam etiam extrinseca complectatur, tum determinationes extrinsecæ seu relationes ad alia insuper adsunt.

E. gr. Si notio trianguli æquilateri non continet nisi trium laterum ad spatium terminandum concurrentium æqualitatem; solas notas continet. Quodsi accedat angulorum æqualitas; præter notas adest attributum. Si triangulum æquilaterum tibi repræsentes tanquam per perpendicularum ex angulo uno in latus oppositum demissum in duo rectangula divisum; illa divisibilitas cum in numero modorum sit (§. 67.), notio præter notas atque attributa etiam modum quandam complectitur. Si idem triangulum circulo inscriptum concipias; ejus ad circulum relatio extrinsecum quiddam est, adeoque notio trianguli æquilateri, quam tum habes, extrinsecam quoque determinationem admittit.

### §. 105.

*Notionis simp-  
licis & com-  
plexæ defini-  
tio.*

*Notionem simplicem* voco, quæ solis notis constat: *notionem complexam* vero, quæ præter notas alia sive rei intrinseca, sive extrinseca complectitur.

Qui sibi triangulum æquilaterum repræsentat ut triangulum, cujus singula latera sunt inter se æqualia; illius notio simplex est. At complexam habet notionem trianguli æquilateri, qui juxta laterum æqualitatem angulorum quoque æqualitatem cogitat, vel triangulum æquilaterum per perpendicularum in duo triangula rectangula resolutum aut circulo inscriptum concipit. Similiter qui notione confusa

appre-

apprehendit lapidem, non attentis modis, si qui adsunt, is lapidis notionem simplicem habet. Sed si quis sibi lapidem repræsentat tanquam calidum, aut crusta tenui glaciali obductum, aut de turri excelsa delapsum; is notionem habet complexam.

§. 106.

*Quicquid sensu percipimus aut imaginamur, ejus notionem* *Quorum no-*  
*complexam habemus.* Nemo nescit, quæ sensu percipimus aut *tionem com-*  
imaginamur, ea esse singularia sive individua. In individuo *plexam ha-*  
determinata sunt omnia, quæ eidem insunt (§. 74.), adeoque *beamus.*  
tam attributa, quam modi (§. 60. 66. 67.): determinata quoque sunt omnia, quæ eidem adsunt, seu juxta ipsum una percipiuntur. Notio igitur eorum, quæ sensu percipimus aut imaginamur, complexa est (§. 105.).

§. 107.

*Notiones generum & specierum distinctæ sunt notiones sim-* *Quorum no-*  
*plices.* Notiones generum & specierum distinctæ non conti- *tion simplex*  
nent nisi notas, per quas res repræsentata agnoscitur & ab aliis *est.*  
discernitur (§. 88.). Est igitur simplex (§. 105.).

Fieri potest, ut rem sensu perceptam aut imaginationi præsentem ita cogitemus, ac si ea abessent, quæ in notarum numerum referri nequeunt. Atque tum notio, quæ complexa est, fingitur instar simplicis: quæ fictio in cognitione rerum confusa locum habet. Pertinet huc exemplum lapidis paulo ante (not. §. 105.) allati.

§. 108.

*Terminus simplex, seu incomplexus est, qui notionem sim-* *Termini sim-*  
*plicem seu incomplexam significat.* Istiusmodi termini sunt *plicis & com-*  
nomina generum ac specierum (§. 107.). *Terminus vero com-* *plexi defini-*  
*plexus est, qui notionem complexam significat.* Istiusmodi *tio.*  
termini sunt voces, quibus denotantur res cum suis attributis, modis ac relationibus extrinsecis (§. 104. 105.).

Exempla paulo ante de notionibus simplicibus & complexis in medium allata has quoque termini simplicis atque complexi definitiones illustrant. Fieri autem potest, ut terminus pluribus constet vocibus, etsi simplex sit. Ita *polygonum ordinatum* est terminus simplex, cum figurarum quoddam genus significet. Similiter *Logica artificialis doctrina* terminus simplex est, cum ipsi simplex notio respondeat (§. 11.).

§. 109.

## §. 109.

*Fundamen-  
tum notionis  
abstractæ &  
concretæ.*

*Quæ rebus insunt, veluti earum attributa atque modi, vel etiam adsunt, veluti earum relationes ad alias, vel representantur ut rebus inexistencia, vel sigillatim absque rebus, quibus insunt.*

Patet per exempla asserti veritas.

Ita albedinem duplici modo considerare licet, vel ut rem nullam cogitemus, cui inest; vel ut rem quandam nobis una representemus, cui inest, veluti nivem albam, aut album in genere. Similiter temperantia considerari potest vel per se, nullo habito respectu ad hominem, qui habitu isto gaudet; vel referri potest ad eundem, veluti si mihi eundem representem ut temperantem.

## §. 110.

*Notionis ab-  
stractæ &  
concretæ de-  
finitio.*

*Notio abstracta est, quæ aliquid, quod rei cuidam inest, vel adest, representat absque ea re, cui inest vel adest. Concreta autem est notio, quæ aliquid, quod alteri inest, vel adest, representat ut eidem inexistens.*

E. gr. Si color consideratur absque subiecto, cui inhaeret, abstracta est notio: sed si subiectum consideratur ut coloratum, notio concreta est. In abstracto consideramus rerum modos, attributa, relationes, ubi ea per modum substantiarum concipimus. Ita in Politicis si eadem persona fuerit Rex atque Elector & ea consideretur qua Rex tantum, notio individui abstracta est.

## §. 111.

*Termini ab-  
stracti &  
concreti de-  
finitio.*

*Terminus abstractus est, qui notionem abstractam significat: Concretus vero, cui notio concreta adhæret.*

Concreta efferri solent nominibus adiectivis, veluti lucidus, albus, doctus: abstracta vero per substantiva, ut lux, albedo, doctrina.

## §. 112.

*Notionum  
communium  
& singula-  
rium funda-  
mentum.*

*Notiones nostræ vel talia continent, quæ rebus pluribus communia sunt, vel quæ nonnisi rem unam in singulari representant.* Patet hoc ex iis, quæ de generibus, speciebus ac individuis dicta sunt. Conveniunt enim individuis, quæ ad integram speciem transferri nequeunt (§. 73. & seqq.). Species autem continent, quæ pluribus individuis; Genera, quæ pluribus speciebus communia sunt (§. 44 45.). Modi quoque rebus



rebus pluribus sunt communes (§. 67.), nec non quædam proprietates (§. 66.).

§. 113.

*Notio communis* est, quæ pluribus communia exhibet: *Notio singularis*, quæ rem singularem seu individuum repræsentat. *communis & singularis definitio.*

Notio hominis in genere est notio communis, cum plura fiat individua, quibus ea conveniunt, quæ isti notioni respondent. Ast notio hujus hominis, v. gr. Petri, est notio singularis, cum unicum tantum sit individuum, cui notio ista responderet. Pertinent huc exempla mathematica superius allata (not. §. 72. & seqq.).

§. 114.

*Terminus communis* est, qui notionem communem designat: *Singularis* autem, qui individuum significat. *Termini communis & singularis definitio.*

Ita omnia nomina generum & specierum sunt termini communes, veluti homo, equus, pluvia, virtus, temperantia: nomina vero individuum sunt singulares, veluti Petrus, Paulus, Bucephalus, Sol, Luna, Venus.

§. 115.

Non admittimus in Logicam nostram, nisi quæ vel intellegendis ac demonstrandis ceteris inserviant, vel in praxi certum eumque indispensabilem usum spondent. Quamobrem eas quoque notionum differentias tantum exposuimus, quæ huic scopo satisfaciunt. Terminos autem a notionibus constanter distinguimus, ne verba cum rebus confundamus, magno cum scientiarum dispendio. *Cur non plures differentie notionum expendantur.*

### CAPUT III.

## DE USU VOCUM SIVE TERMINORUM CIRCA NOTIONES.

§. 116.

**S**i quis habet notionem alicujus rei novitque terminum, quo ea significatur; ei notio termino prolato in memoriam revocari potest. Terminus est vox notionem quandam (§. 36.) & consequenter rem, quæ eadem repræsentatur; significans *Quando terminus notionem in memoriam revocat.*  
(Wolffii Logica) Y (§. 37.).

(§. 37.). Discimus itaque, quānam notio termino aliquo significetur, si rem nobis representantes terminum ab aliis audimus, aut si ipsimet aliquam notionem pro arbitrio nostro eidem tribuimus. Quodsi ergo aliquis notionem rei habuerit terminumque quendam cum eadem aliquoties conjunxerit, ut satis meminerit, eum ipsi respondere; ejus mentem subit notio, termino audito (§. 32.). Quamobrem termino prolato notio eidem respondens in memoriam ei revocatur.

E. gr. Qui vidit Solem nomenque ejus audivit, is audita voce *Sol* luminare istud magnum diei sibi in memoriam revocat, ita ut ejus imago ipsius veluti oculis oberret.

## §. 117.

*Quando mentem alterius intelligamus.*

*Si quis audita voce eandem in se notionem excitare valet, quam cum ea conjungit alter; is mentem alterius intelligit & contra.* Qui enim audita voce in se excitat notionem, quam cum ea alter conjungit, is novit, quam notionem alter voce ista significet, adeoque mentem alterius intelligit.

Contra qui mentem alterius intelligit, is novit, quānam notio cum voce ab altero prolata sit conjungenda. Necessse igitur est, ut notionem istam audita voce in animo suo producere valeat.

## §. 118.

*Quoniam ea fini sit opus.*

*Qui igitur mentem alterius intelligere voluerit, is & perspectos habere debet terminos, quibus utitur, nosseque notiones, quae iis sunt jungendae.* Etenim necesse est, ut audita voce eandem in se notionem excitare valeat, quam cum ea conjungit alter (§. 117.). Hoc autem ut fieri possit, & terminum perspectum habere debet, qui eam significat, & nosse, quod ea eidem respondeat.

## §. 119.

*Quando alterius mentem*

*Si quis audita voce notionem cum ea jungit vel nullam, vel deceptissem, vel obscuram, is mentem alterius non intelligit.*  
Qui

Qui mentem alterius intelligit, is audita voce eandem notionem excitare valet, quam cum ea connectit alter (§. 117.). non intelligi-  
mus.  
Quare qui audita voce nullam cum ea notionem jungere valet, is mentem alterius non intelligit. Notio deceptrix notio nulla est, sed sine mente sonus (§. 38.), adeoque perinde est, sive notionem nullam cum voce prolata jungas, sive deceptricem. Quamobrem in hoc quoque casu mentem alterius non intelligis.

Quodsi denique quis notionem obscuram cum voce jungit, is rem significatam agnoscere atque ab aliis discernere minime novit (§. 80.), adeoque ignorat, quænam sit ea res, quæ voce ista significetur. Perinde igitur est ac si nullam cum ea voce notionem jungeret, adeoque denuo mentem alterius non intelligit.

E. gr. Si quis audit vocem *infinite parvi*, qua utuntur Geometræ recentiores, nunquam tamen didicit, quid ea voce intellectum velint; is vel nullam cum ea jungit notionem atque adeo agnoscit, se mentem Geometrarum minime perspicere; vel ex etymologia vocis format sibi notionem quandam obscuram, vel deceptricem, quasi sit aliqua pars determinatæ magnitudinis ex determinata quadam divisione emergens, atque adeo sibi videtur mentem Geometrarum agnoscere, etsi revera eandem non agnoscat, cum istiusmodi pars infinite parva sit impossibilis, atque hinc nulla ei notio respondeat.

§. 120.

Si quis audita voce notionem aliam in se excitat, quam *Quando alie-*  
cum ea jungit alter, is mentem ejus pervertit seu sensum a men- rius mentem  
te ejus alienum fingit. Qui enim aliam cum voce notionem pervertamus,  
jungit quam alter, is sibi audita voce aliam rem repræsentat  
(§. 34.), quam ea denotat alter (§. 37.). Voci adeo tribuit  
significatum a mente alterius alienum (§. 36.), hoc est, men-  
tem ejus pervertit.

E. gr. *Leibnitius* voce mundi denotat universam seriem rerum, qua  
spatium ac tempus omne repletur. Si quis in *Theodicaa Leibnitiana* le-  
gens vocem mundi cum ea connectit notionem compagis corporum to-  
talium vel status præsentis, aut alterius præteriti universalitatis rerum &c.  
in voci *mundus* significatum tribuit a mente *Leibnitii* alienum.

## §. 121.

*Quinam notio distincta communicari possit.*

*Si quis habet notiones notarum, quæ notionem distinctam ingrediuntur, claras novitque terminos, quibus eadem indignantur; ei notio distincta communicari potest.* Qui enim notiones notarum habet claras novitque terminos, ei terminis prolatis istæ in memoriam revocantur (§. 116.). Cum igitur jam & ipse sibi representet ens iis notis instructum easque a se invicem distinguat; notionem istius entis distinctam habet (§. 88.). Distincta igitur notio terminorum usu eidem communicari potest.

E, gr. Si quis notionem habet figuræ, æqualitatis laterum & æqualitatis angulorum, & novit terminos figuræ æquilateræ & figuræ æquiangulæ; ei notio figuræ regularis communicari potest, quæ est figuræ æquilateræ æquiangula.

## §. 122.

*Terminorum in abstractionibus usus.*

*Terminorum usu abstractiones sunt claræ atque distinctæ.* Etenim si quis abstrahere voluerit, quæ rei cuidam insunt, is missis ceteris ad ea sola attendere debet (§. 110.). Quoniam vero sapius aliis sunt interspersa, aut sub aliis veluti sepulta latent, difficulter admodum mens a ceteris avocatur & in ea sola omnis cogitatio convertitur. Enimvero ubi eadem terminis peculiaribus indigitas, tum & clare perspicis, quænam sint ea, quæ una insunt, vel in quibus ista latent, tum eadem a se invicem distinguis. Abstractiones igitur terminorum usu sunt claræ atque distinctæ.

## §. 123.

*Quando notio determinata.*

*Notio determinata est, quæ nec plures, nec pauciores habet notas, quam quæ rei representandæ sufficiunt, quæ ipsi respondet.*

Nimirum omnis notio rem quandam representat, veluti notio trianguli triangularem figuram (§. 34.). Omni rei quæpiam inesse intelliguntur, per quæ in esse istius entis constituitur, seu cur ad hoc genus, ad hanc speciem referatur, vel hoc individuum sit, non aliud: id quod tum per exempla, tum per ea patet, quæ de speciebus, generibus ac individuis dicta sunt (§. 44. & seqq.). Ita genus trianguli rectilinei

rectilinei constituitur per numerum ternarium rectarum spatium comprehendendum; species æquilateri per æqualitatem trium laterum; species scaleni per inæqualitatem laterum. Quamobrem si notio determinata esse debet, eæ præcise notæ ingredi debent, quæ representando ei, quod intenditur, sufficiunt, v. gr. notionem trianguli rectilinei tanquam generis numerus ternarius laterum spatium terminantium; notionem trianguli æquilateri tanquam speciei æqualitas laterum & ita porro. Unde notionem determinate agnoscit, qui notas illas optime distinguit ac enumerare valet, hoc est, cujus notio est completa (§. 92.); indeterminate vero, cujus incompleta (§. cit.), vel abundans est notio (§. 93.).

§. 124.

*Terminorum usu notiones distinctæ fiunt determinatæ & communicabiles.* Notio distincta notas continet, quas in re deprehensas a se invicem distinguimus (§. 88.). Quamobrem si singulæ notæ suis terminis indigentur, tum clarissime constat, quot & quasnam notas notio data involvat. Notio igitur distincta fit determinata (§. 123.). Jam si quis notarum terminos novit, is eas alteri enumerare valet (§. 89.). Quoniam igitur alteri, qui notiones notarum habet terminosque novit, notio hac ratione communicari potest (§. 121.); terminorum usu notio distincta fit communicabilis.

§. 125.

*Terminorum quoque usu notiones adequatæ determinatæ sunt & communicabiles.* Notio adequata constat resolutione in notiones notarum, quæ eas ingrediuntur, distinctas continua, donec ad irresolubiles perveniatur (§. 95. 96.), adeoque est quædam notionum distinctarum congeries. Singulæ notiones distinctæ terminorum usu determinatæ fiunt & communicabiles (§. 124.): ergo & integra notio adequata istis constans eodem terminorum usu determinata fieri debet atque communicabilis.

§. 126.

*Notio confusa non est determinata, multo minus obscura.* Notio confusa Si quid confuse nobis representamus, notas, quæ ad illam pertinent

*non est deter-  
minata.*

pertinent, distinguere non possumus (§. 88.), adeoque fieri nequit, ut eas a re repræsentata abstrahamus & nominibus suis a se invicem discernamus. Quamobrem fieri potest, immo plerumque fieri solet, ut de re confuse cogitantes ad alia simul attendamus, quæ ex notione exulare debent. Notio igitur confusa determinata non est (§. 123.).

Notio obscura notas insufficientes continet (§. 80.). Est igitur minime determinata (§. 123.).

§. 127.

*Significatus  
fixus termini  
notionem con-  
fusam signifi-  
canti.*

*Si notio confusa nihil prorsus distincti continet, significatus termini, cui respondet, fixus est.* Etenim notio confusa cum sit clara (§. 88.). notas exhibet nobis ad rem agnoscendam atque ab aliis discernendam sufficientes (§. 80.). Quoniam vero nihil prorsus distincti continet, fieri non potest, ut in aliquo casu ad talia attendamus, quæ in numerum notarum minime sunt referenda, consequenter non ingredi debent notionem rei termino aliquo indigitatæ. Terminus itaque cum nobis continuo eandem rem sine ulla mutatione exhibeat; significatus ejus fixus est (§. 129.).

E. gr. notio coloris rubri est confusa & ne minimum quidem distincti continet. Nullum ergo periculum est, ut uno tempore voce *rubedi-  
nis* una designemus, quod alio sub ea non comprehendimus.

§. 128.

*Significatus  
termini no-  
tionis confu-  
sæ signi va-  
riatur.*

*Si notio confusa aliquid distincti contineat, vel rei, in qua aliquid confuse percipitur, insint alia, quæ a ceteris distingui possunt; significatus termini, qui ei respondet, variationem aliquam subinde admittit.* Etenim si notio confusa est, notas, quæ ad eam pertinent, distinguere non valemus (§. 88.). Quare si rei insint præterea a ceteris optime discernibilia, de quibus minime constat, num ad notas sint referenda, nec ne; fieri omnino potest, ut subinde ad ea attendamus, dum termino prolato notionem nobis in memoriam revocamus, vel rem denuo oblatam agnoscimus, quæ alio tempore a notione removemus. Quamobrem cum rem eodem termino denota-

tam

tam tunc paulo aliter nobis repræsentemus, quam alio tempore; significatus ejus non constanter idem, adeoque minime fixus est (§. 129.). Quodsi quædam ad notionem spectantia possint a ceteris distingui, aliis notis indiscernibilibus, saltem respectu cognoscentis; tum utique accidere potest, ut discernibilia sola ad notionem referamus, atque adeo significatum termini angustiore reddamus. In hoc igitur quoque casu significatus minime fixus est (§. 129.).

E. gr. Qui audit, mundum consistere ex cælo & terra, vel cælum pariter ac terram ad mundum referri; is confusa notione sibi repræsentat mundum tanquam compositum ex cælo & terra, cum eam d. m. comparans, cujus tectum sit cælum, pars habitabilis terra. Quoniam in cælis distinguit sidera, in terra mineralia, fluvios, alia &c. alio tempore ad stellas animum advertit, dum de cælo cogit, vel ad corpora partialia in Tellure, dum hæc mentem ejus sedit. Mundum igitur tum sibi repræsentat tanquam complexum siderum ac corporum partialium in Tellure. Alius adhuc aliter eundem sibi imaginatur, prout ad hoc potius attendit, quam ad aliud. Atque hinc accidit, ut, qui cum voce *mundus* notionem confusam conjungunt, non eandem prorsus cum eadem constanter conjungant, sicque minus fixus sit ejusdem significatus.

§. 129.

*Terminus fixus* est seu *fixi significatus*, cui notio invariata constanter respondet. *Terminus vero vagus* est, cui non constanter invariata respondet notio. *Termini fixi  
& vagi definitio.*

Ita *triangulum æquilaterum* est terminus fixus, neque enim unquam alia notio eidem respondet, quam figuræ tribus æqualibus lateribus terminatæ. Contra vox *mundus* terminus vagus est, cum nunc denotet corpora totalia continentia, nunc continentia & contentum unum terram, nunc contenta simul sumta, sed exclusis partialibus, nunc eadem cum partialibus præsentis ætatis, nunc complexum omnium locorum & temporum quomodocunque repletorum, nunc solum genus humanum &c.

§. 130.

*Si quis notas enumerare valet notionem distinctam completam ingredientem, is termino eam denotanti tribuit significatum terminum quædam fixum.* Qui notionem distinctam completam habet, is novit notas

notas sufficientes ad rem in statu quolibet agnoscendam & ab aliis distinguendam (§. 92.), easque notas a se invicem distinguit (§. 88.). Quodsi notas alteri enumerare valeat, singulas notas terminis singulis discernit (§. 36.) adeoque eorum usu notionem reddit determinatam & communicabilem (§. 124.), ut non modo ipsi perspectum sit, quoniam præcisè notæ notionem termino dato respondentem ingrediantur (§. 123.); verum etiam easdem notas alteri in memoriam revocare valeat, cui ea pariter perspectæ sunt ac noti termini ipsas significantes (§. 116.). Termino adeo respondens notio æctis limitibus comprehensa invariata subsistit, adeoque terminus ipse fixus est (§. 129.), seu fixum habet significatum.

Hæc sane, non alia ratio est, cur termini Mathematicorum sint fixi. *Figura ordinata* ipsis dicitur, quæ æquilatera & æquiangulara. Duabus hisce notis absolvitur notio, quarum unaquælibet proprio suo termino indigitari solet fixi pariter significatus.

## §. 131.

*Termini  
significatus  
quando va-  
gus.*

*Si quis cum voce jungit notionem obscuram, vel confusam, cui aliquid distincti admisceatur, aut si in re confuse percepta distincte perceptibilia insint, termini significatus vagus est.* Notio enim obscura non est determinata (§. 126.), adeoque nec significatus termini eam denotantis determinatus est (§. 36.), ut adeo in usu termini variari notio queat admiscendo notis insufficientibus (§. 80.) peregrinas, quæ ex ea exulare debebant. Terminus adeo notionem obscuram denotans vagus est (§. 129.). Si quis cum voce jungit notionem confusam, cui aliquid distincti admisceatur, aut si in re confuse percepta insint quædam distincte perceptibilia, notio termino tribuenda subinde variari solet (§. 128.), atque adeo terminus aut (quod perinde est) significatus ipsius vagus est (§. 129.).

Exempla ubivis obvia sunt. Plerique enim hodiernum terminis utuntur vagis, si Mathematicos excipias. Exempli loco esse potest *vox mundus* (not. §. 129.).

## §. 132.

*Quando*

*Si termino quodam crebro utamur, eum nos satis intelligere*



gere arbitramur, etsi ad notionem eidem respondentem non attendamus. Patet per experientiam asserti veritas. Etenim si quem terminum prima vice audimus, extemplo quærimus, quid significet. Ubi autem notionem eidem respondentem cum ipso sæpius animo recolimus; audito termino, de notione ipsi respondente non amplius sumus solliciti. Sufficit nobis utcumque meminisse, nos olim notionem ei respondentem considerasse, adeoque eum non esse sine mente sonum. Unde discursu continuo plurima fundimus verba non attendentes ad notiones singulis respondentes: id quod in tanta celeritate, qua proferuntur, fieri prorsus nequit.

terminum  
intelligere  
nobis videamur  
absque  
notione.

§. 133.

*Terminus nobis dicitur familiaris, quem nos intelligere putamus, etsi ad notionem, quæ eodem denotatur, non attendamus. Ut adeo pateat, crebro usu terminos nobis familiares reddi.*

Terminifamiliaris  
denotatio.

§. 134.

Patet hinc ulterius, nos in legendo aliquo scripto nonnisi lento gradu progredi posse, quamdiu termini ibi occurrentes nobis non fuerint familiares. Etenim quamdiu termini nobis familiares non sunt, iis auditis hæremus in significato ipsorum, adeoque non ante certi sumus, nos eum assequi, quam notionem eidem respondentem in memoriam revocamus (§. 133.).

Difficultas in  
alterius mente  
assequenda  
hinc orta.

Hinc nascitur illa difficultas legendi scripta Autorum, quorum nobis termini sunt minime familiares, & molestum redditur ipsum legendi studium.

§. 135.

*Si ex terminis simplicibus, quibus singulis sua respondet notio, formetur terminus complexus; videmur nobis notionem habere ei respondentem, etsi terminus revera sit inanis. Si enim singulis terminis, ex quibus complexus formatur, sua respondet notio nobis perspecta; eo prolato mentem nostram subeunt notiones terminis simplicibus respondentes (§. 116.),*

Notio decomplexi  
termini  
no complexo  
denotata.

(Wolffii Logica)

Z

adeo-

adeoque intelligere nobis videmur mentem propriam vel alterius (§. 117.). Fieri autem potest, ut notiones talia repræsentent, quæ una inesse nequeunt, consequenter ut terminus complexus contradictionem involvat. Quamobrem cum in numero impossibilium habeatur, quod contradictionem involvit, impossibili autem notio nulla respondere queat (§. 34.); termino in præsentī casu nulla notio respondet nisi deceptrix, adeoque inanis est (§. 38.).

E. gr. In Geometria *bilinea* respondet sua notio. Est enim spatium duabus lineis comprehensum, quale est, quod interceptur arcubus duorum circularum se mutuo secantibus, itemque segmentum circuli arcu & chorda terminatum. *Figura*, quoque *rectilinea* seu *Rectilineo* sua respondet notio. Est nimirum spatium lineis rectis comprehensum, veluti triangulum tribus rectis terminatum. Terminos hos qui perspectos habet, is cum singulis suas jungit notiones. Quamobrem si quis *Bilineum rectilineum* dicat, tum intelligere videmur mentem alterius atque bilinei rectilinei notionem habere eamque distinctam; quod nempe sit figura duabus lineis rectis terminata. Enimvero cum duæ lineæ rectæ spatium comprehendere non possint (§. 170. Geom.); bilineum rectilineum impossibile est atque adeo nullæ eidem notio respondet. Similiter notiones habemus rotæ, motus atque celeritatis. Quodsi ergo quis de motu celerrimo rotæ loquatur, videmur nobis eum intelligere atque ideo notionem habere *motus celerrimi rotæ*. Enimvero motus rotæ celerrimus contradictionem involvit. Pone enim rotam celerrimo motu gyron & radium quendam ejus ultra peripheriam produci, quantum libuerit. Quoniam punctum radii producti extremum majorem peripheriam eodem tempore describit, quam quod ipsi in peripheria rotæ responderet; illud hoc celerius movetur: id quod hypothesein evertit. Rotæ igitur motus celerrimus nullus est, consequenter nec termino huic complexo notio respondet, sed quàm nobis habere videmur, ea deceptrix est. Exemplo hoc usus est *Leibnizius* contra *Cartesianos* in Actis Eruditorum A. 1684. p. 539, ut probaret, fieri posse, ut nobis videamur habere notionem, cum revera nullam habemus: sed nos accuratius determinavimus, quandonam id fieri possit. Nostra enim philosophia amat propositiones determinatas, præsertim in re tam ardua. Maximi profecto momenti ac utilitatis maximæ est præsens propositio, cum ideæ deceptrices frequentissimæ sint inter eruditos.

§. 136.

Si quis ejus, quod observat, rationem redditurus causam ter-  
mino indigitat, huic autem non aliam jungit notionem quam ejus, <sup>Notio dece-</sup>  
quod observat; tum sibi videtur habere notionem termino respon-  
dentem, utut revera is sit inanis. Ejus, quod observamus, sive  
extra nos, sive in nobis, notionem aliquam habemus (§. 34.).  
Et quoniam ea, quæ sunt vel fiunt, sua non destituuntur ra-  
tione, unde intelligitur, cur sint, vel fiant (§. 4. *Disc. prælim.*),  
ens vero continens istam rationem causâ dicitur; patet uti-  
que causam aliquam ejus adesse debere, quam adeo termino  
aliquo indigitamus. Videmur igitur nobis habere aliquam  
notionem termini, quod nempe denotet causam ejus, quod  
observamus (§. 34.). Enimvero dum quis causam & id, cu-  
jus rationem reddere debet, hic a se invicem distinguit tan-  
quam entia duo, quorum unum alterum non est; non ta-  
men nisi unius notionem habet, nempe ejus, quod observat:  
causæ, cujus sibi aliquam notionem habere videtur, revera  
nullam habet. Terminus itaque, quo eam indigitat, ina-  
nis est.

E. gr. Observamus ferrum a magnete attrahi ejusque polo adhærere.  
Notionem habemus hujus attractionis, quatenus est phænomenon  
quoddam seu effectus naturæ. Adesse debere phænomeni hujus cau-  
sam, ratione convincimur. Eam etsi adhuc ignoratam anticipando  
termino quodam indigare licet (§. 37.). Solet itaque appellari *vis*  
*attrahens*. Jam si quis notionem phænomeni seu effectus a se obser-  
vati transfert ad causam eamque considerat per modum entitatis in  
magnete, per quam motus ferri ad magnetem ejusque adhesio produ-  
citur; tum sibi videtur habere notionem vis attrahentis magnetis;  
cum tamen nullam habeat, adeoque *vis* illa *attrahens magnetis* est  
terminus inanis (§. 38.), & qui eam allegat tanquam causam motus  
ferri ad magnetem atque mutæ adhæisionis, dat sine mente sonos.  
Istiusmodi notionibus deceptricibus scatet philosophia scholastica,  
præsertim Physica: nihil enim frequentius est, quam ut causam effe-  
ctus a se observati, quam ignorant, termino aliquo indigent & ratio-  
nem effectus reddituri terminum istum allegent. Cum in rerum na-  
tura effectus unus sit causa alterius effectus, id quod hic vel experi-

entia notum sumere licet; suo loco a priori demonstrandum; non reprehendimus, quod rationem effectus ab alio, cujus causam ignoramus, proficiscens redditori hunc ejus causam allegemus, quoniam absonum foret negare, quod veritati consentaneum: sed id tantummodo minime ferendum judicamus, si quis sibi videtur habere perspectam causam alicujus phaenomeni, dum eam nondum cognitam nomine quodam ab aliis rebus distinguit. V. gr. Videmus acutius altero sui extremo ad planum perpendiculare internum poli ferrei borealis applicatam, altero autem tantisper a polo australi distantem in situ horizontali axi magnetis parallelam detineri. Situs hic acus gravitati adversus est effectus attractionis magneticæ per polos ferreos magnetis sese exercentis. Quamobrem si per istam attractionem a posteriori suppositam tanquam per causam explices, quomodo acus in situ isto detineri possit; nemo Logicæ gnarus hoc reprehenderit. Etenim si vel maxime perspecta fuerit attractionis magneticæ causa, non tamen ab illa tanquam remota petere licet rationem, quæ ab effectu ejus observabili tanquam a proxima derivanda. Similiter si Mathematicus quantitates effectuum atque virium ad eos præstandos requisitarum determinare voluerit; is minime opus habet, ut essentiam vel attributa rei, per quæ concipitur, perspiciat, adeoque is potest uti termino, quo causa indigitatur, etiam si hæc ei perspecta non sit.

## §. 137.

*Notionis genuina in de-  
ceptricem de-  
generatio.*

*Si quis causam ejus, quod observat, repræsentat tanquam ens, a quo id, quod observat, proficisci potest; is illius notionem habet, sed inde rationem reddere nequit ejus quod observat.* Si quid enim fieri observamus, tum dubium prorsus nullum est, quod sit aliqua causa (§. 4. *Discurs. prælim. §. per notionem causæ §. præc. ultiam*), unde id proficiscitur, neque dubitari potest, quin ab ea id proficisci possit, quod fieri observamus. Quamobrem si eam nobis repræsentamus tanquam ens, a quo id, quod observatur, proficisci potest, nihil impossibile nobis repræsentamus, adeoque notionem illius causæ utique habemus (§. 34.).

Enimvero cum idem per idem explicari non possit; ex ista notione reddi nequit ratio ejus, quod observatur. Si affirmes id fieri posse: dicendum erit, id, quod fieri observa-

mus

mus ideo fieri, quod fiat. Enimvero cum tale quid affirmare idem sit ac nugari, quod per se patet; quamdiu cum termino causam ejus denotante, quod observamus, non aliam notionem conjungis, quam quæ exhibet id quod observamus, ex ea hujus rationem reddere non potes.

E. gr. Si quis vim attractricem magnetis concipit tanquam ens, quod efficit motum ferri ad eundem & adhæsiōem cum eodem, is ejus utique aliquam habet notionem. Enimvero ex hac notione rationem reddere nequit, cur ferrum ad magnetem moveatur ejusque polo adhæreat. Si quis enim vim attractricem, cujus non aliam habet notionem, quam quæ motui ferri ad magnetem responder, tanquam ejus causam alleget; is dicit, ferrum moveri ad magnetem eique adhærere, quia ad eundem movetur eique adhæret, adeoque nugatur. Similiter si quis gravitatem concipit per vim, qua corpus fertur versus centrum terræ; is utique habet ejus notionem. Enimvero rationem redditurus, cur corpora versus centrum ferantur, si affirmet, id fieri propter gravitatem, & hanc ejus causam alleget; is dicit, ea ferri versus centrum Terræ, quia versus terræ centrum feruntur, adeoque denuo nugatur. Fieri adeo potest, ut quis habeat notionem genuinam termino respondentem; sed quæ ob ejus abusus degenerat in deceptricem, ita ut terminus evadat inanis (§. 38.). Hæc non mira videbuntur ei, qui perpendit terminis notiones nonnisi arbitrario tribui, atque adeo fieri posse, ut termino notionem auferamus, quam eidem tribueramus: nec repugnat, tale quid a nobis fieri posse maxime insciis.

§. 138.

Notio, qua repræsentatur res, cui indigitandæ terminus *significatus* aliquis destinatur, *significatum* ejus *proprium* constituit. Et *terminus* terminus tamdiu *proprie sumi* dicitur, quamdiu eidem illa *notio* *propriis* *destinatio* attribuitur, immo ipse *terminus* respectu hujus notionis, consequenter etiam rei, quæ ista repræsentatur (§. 37.), *proprius* appellatur, tanquam signum hujus notionis vel rei *proprium*.

E. gr. *Euclides* voce *trianguli* denotat figuram planam tribus lineis rectis terminatam. Huic igitur figuræ significandæ cum terminus iste destinetur; significatus vocis *trianguli* proprius in *Elementis Euclidis* est, quod denotet figuram planam tribus lineis rectis terminatam. Et vox *triangulum* est terminus proprius, quo figura ista in

Elementis *Euclidis* denotatur. Omnes termini, quos hactenus in medium protulimus & quos in posterum per omnem philosophiam proferemus, datas quasdam significant notiones, quibus res a se invicem differentes repræsentantur, atque ita proprium habent significatum & tamdiu proprie sumuntur, quamdiu istæ notiones ipsis attribuuntur. Ita in sermone communi vox *Sol* denotat luminare istud magnum, a quo lucem ac calorem haurimus in terra & quod suo se fulgore, quo oculos nostros perstringit, satis prodir. Quamdiu hæc vox de corpore isto totali usurpatur, tamdiu eadem proprie sumitur. Quoniam omnes voces, quibus in communi sermone utimur, rebus datis significandis destinantur; significantur quoque proprium habent, etsi non semper fixum, sed subinde vagum (§. 131.).

## §. 139.

*Usus loquendi quid sit*

Significatus vocum in communi sermone proprius constituit *usum loquendi*. Ut adeo usum loquendi observet, qui vocibus seu terminis eas tribuit notiones, quibus res repræsentantur iis in communi sermone indigitatæ.

E. gr. In communi sermone vox *Sol* sumitur pro luminari magno, quod lucem ac calorem Terræ subministrat (not. §. 138.). Usus igitur loquendi fert, ut voci *Solis* notio tribuatur, qua istud, non aliud corpus mundi totale repræsentatur. Quamobrem cum Astronomi eadem voce eodem in significato utantur, ab usu loquendi minime recedunt.

## §. 140.

*Receptus significatus quinam.*

Usui loquendi in sermone communi respondet in disciplinis ac arte *receptus terminorum significatus*, qui est significatus eorum in disciplinis ac arte proprius. Quamdiu adeo termino tribuimus notionem, qua res eadem repræsentatur, cui significandæ in disciplinis vel arte is destinatur; tamdiu a recepto significato non recedimus (§. 139.).

E. gr. *Euclidi* in Elementis *figura ordinata* est figura rectilinea æquilatera & æquiangula. Qui termino huic tribuit notionem, qua eadem figura repræsentatur; is receptum *Euclidi* significatum servat. Quodsi ergo quis figuram ordinatam dicit esse figuram æquilateram circulo inscriptibilem; is significatum vocis non mutat. Nam figura æquilatera circulo inscriptibilis est æquiangula & figura æquilatera æquiangula circulo inscriptibilis est. Sive igitur æqualitate angulorum,

rum, sive quod circulo inscribi possit, utaris tanquam nota ad eam ab aliis figuris discernendam, eadem in utroque casu figurarum species denotatur, consequenter idem vocis significatus est. Diximus jam aliqua huc spectantia in discursu praeliminari (not. §. 142.): enimvero cum ipse satis superque fuerim expertus, hærere subinde viros doctos in eo, num vex aliqua in recepto significato sumatur, an ejus significatio mutetur; ideo non inconsultum mihi videtur quædam ea fini apponere theoremata.

§. 141.

*Si ejusdem rei plures formari possunt notiones distinctæ completæ, termini significatus idem est, quamcunque eidem junge- re volueris.* Si enim notiones rei, quæ formantur, fuerint completæ, unaquæque illarum notas sufficientes exhibet ad rem eandem in statu quolibet agnoscendam & ab aliis distinguendam (§. 92.). Quamcunque igitur earum termino jungas, nunquam tamen eundem nisi eidem rei tribues (§. 48.), consequenter idem significatus subsistit (§. 37.).

*Significatur idem quando cum diversitate notionum consistat.*

E. gr. Pentagonum regulare plures admittit notiones completas. Nam agnosci & ab aliis figuris distingui potest tum per laterum numerum eorumque & angulorum æqualitatem, tum quod latera sint quinque & æqualia, ipsum vero circulo inscriptibile, tum quod singuli anguli contineant  $\frac{1}{2}$  unius recti, seu quod excedant rectum parte ipsius quinta. Termini igitur *pentagoni regularis* idem est significatus, quibuscunque notis utaris ad notionem ejus completam formandam: notio enim constanter eandem figuram repræsentat. Similiter huc spectant exempla parabolæ & Dei supra (not. §. 142. *Disc. pralim.*) allata.

§. 142.

*Si quis habet ejusdem rei notionem claram, sed confusam, alter vero distinctam, quam termino conjungit; ejus significatus idem est.* Notio clara notas exhibet ad rem agnoscendam atque ab aliis discernendam sufficientes (§. 80.), utut qui distinctam habet, notas istas distinguere valeat, qui vero non nisi confusa utitur eas distinguere non possit (§. 88.). Enimvero quamdiu notæ sufficiunt ad rem oblatam agnoscendam atque ab aliis discernendam, sive eas distinguere possis, sive minus; nunquam eveniet, ut terminum tanquam nomen rebus diver-

diversis tribuas (§. 48.), consequenter significatus idem subsistit (§. 37.).

E. gr. Qui Geometriæ practicæ operam navant, definitiones figurarum negligere solent atque figuræ intuitu cum terminis, quibus significantur, notionem claram jungunt. Qui vero theoriam sibi familiarem reddit, definitiones tanquam futurarum demonstrationum principia sibi familiares reddit, atque adeo cum terminis, quibus figuræ indignantur, notiones distinctas jungit. Quodsi igitur alter pentagoni regularis tantum habuerit notionem confusam, alter vero distinctam, quoniam utriusque notio eandem figuram repræsentat, uterque terminum pentagoni regularis in eodem significato sumit, nec obstat (§. 141.), si vel maxime notio distincta exhibeat notas, quæ confusa contentus in eadem non advertit, v. gr. si dicat pentagonum regulare figuram æquiangulam, cujus angulus excedat rectum parte ejus quinta, cum notione confusa contentus revera in laterum & angulorum æqualitatem oculum convertat.

#### §. 143.

*Casus tertius.*

Hinc consequitur, *nec ob stare eidem significatus termini, si alter notas ad rem agnoscendam & ab aliis discernendam sufficientes rite enumerare valeat, alter vero easdem enumeraturus fundat sine mente sonos, vel notas alleges alienas, vel insufficientes notione confusa genuina instructus eaque impeditus, ne defectum notionis distinctæ atque completæ agnoscat.* Etenim dum alter rem revera agnoscit ac discernit per notionem, quæ ipsi est, claram, sed confusam, minime autem per notas, quas sibi enumerare videtur; casus præsens præcedenti æquipollet (§. 142.).

Huc pertinet tanquam exemplum, quod in discursu præliminari (not. §. 147.) de terminis philosophicis diximus in alienum significatum non converſis, propterea quod definitionibus minus accuratis substituantur meliores.

#### §. 144.

*Significatus  
termini  
quando di-  
versus.*

*Si duo cum eodem termino jungunt notiones rebus diversis convenientes, ejus significatus diversus est.* Termini enim denotant res notionibus respondentes (§. 37.). Quamobrem si eidem termino junguntur notiones rebus diversis convenient-



venientes, eodem termino res diversæ indigitantur. Ejus adeo significatus diversus est.

§. 145.

Eodem modo patet, terminum in diverso significato accipi ab eodem Autore, si non constanter ei notionem jungat, qua eadem res denotatur. Perinde enim est, sive unus diverso tempore faciat, quod duo eodem faciunt, vel diverso.

Quoniam diversitas significatus petitur a re repræsentata, consequenter a differentia notionum materiali (§. 103.); nulla hic habenda est ratio differentię formalis (§. 77.).

§. 146.

Si terminus quidam a significato proprio transfertur ad significandam rem aliam suo termino proprio licet non destitutam, ob quandam similitudinem; significatus iste dicitur improprius & vox sumi improprie fertur, immo ipse terminus improprius audit respectu hujus rei, ad quam significandam transfertur.

E. gr. Vocis *Oculi* significatus proprius est, si sumitur de organo corporis, quo mediante videmus. Enimvero si eadem vox transfertur ad intellectum, isque dicitur *Oculus mentis*; tum eadem vox improprie sumitur. Habet enim ista animæ facultas, qua cognoscimus, quæ sunt & esse possunt, proprium sibi terminum, quo denotatur, nempe vocem *intellectus*. Supponitur autem hic aliqua inter oculum & intellectum similitudo, ob quam nomen istius organi tribuitur huic facultati. Loquimur hic de significatione impropria, quatenus est logicæ considerationis. In Rhetorica enim, ubi de tropis agitur, plures commemorantur verborum translationes ad significandum rem aliam, quam quæ similitudinis gratia fiunt: sed ibi, si rem logice examines, non semper a proprio significato receditur, etsi adsint rationes, cur terminis propriis non utamur. Ita in *Synecdoche* nomen regionis loco nominis metropolis proferimus, non quod nomen regionis ad significandam metropolin transferamus; sed quod illud hoc loco notius existimantes ab altero sic nos rectius intelligi arbitremur, immo subinde quoque ea de causa, quod nomen regionis nobis sit familiarius nomine metropoleos, adeoque istud succurrat, dum hujus meminisse volueramus. Similiter in *Ironia* contrarium ejus dicitur, quod verbis significatur, non quod verbis contrarium significatum tribuamus, sed

(*Wolffii Logica*)

A a

pluri-

pluribus aliis de causis, v. gr. ut, qui mali quidpiam patravit, pudore suffundatur, dum ita apparet, se fecisse contrarium ejus, quod fieri debebat.

## §. 147.

*Significatus  
termini  
quando mu-  
tetur.*

*Si quis termino ad rem quandam significandum destinato jungit notionem rei alterius, is significatum ejus immutat.* Etenim notio, qua repræsentatur res, cui indigitandæ terminus aliquis destinatur, significatum proprium ejus constituit (§. 138.). Quodsi ergo in locum hujus notionis substituas notionem rei alterius; termini significatum utique immutas.

## §. 148.

*Significatus  
duo proprii  
ejusdem ter-  
mini.*

*Si terminus aliquis rei cuidam significandæ destinatus præterea adhuc rei significandæ alii, cujus notionem habemus, destinatur; significatus posterior perinde proprius est ac prior.* Proprium enim significatum constituit notio, qua res repræsentatur, cui indigitandæ terminus destinatur (§. 138.). Quodsi ergo duas habueris rerum diversarum notiones & utramque eidem termino jungas; non minus unius, quam alterius significatus proprius erit.

Vana esset objectio, si quis affirmaret, significatum proprium esse, qui sit tempore prior, neque enim tempus ingreditur definitionem significatus proprii (§. 138.), adeoque nec ejus habenda ratio est, ubi de significatu proprio judicium ferre volueris (§. 48.). Fieri autem potest ut citra confusionem idem terminus duos habeat significatus proprios, nempe alium in communi vita vel arte, alium in data quadam disciplina, vel alium in hac, alium in altera disciplina. E. gr. Arcus & sagitta suos habent significatus proprios in vita communi, sunt enim voces totidem rebus significandis destinatæ, quarum tanquam instrumentorum obviorem notiones habemus minimum confusas. Enimvero in Geometria iisdem vocibus alius tribuitur significatus, cum arcus pro parte lineæ curvæ, sagitta pro recta ex arcu ad medium chordæ perpendiculariter ducta sumitur. Notiones in Geometria & vita communi iisdem vocibus tributæ non sunt eadem, etsi aliqua similitudo intercedat, quæ Geometras determinavit ad notiones geometricas istis terminis indigitandas, in ipsum autem significatum non magis ea influit, quam temporis prioritas, de qua modo diximus. Non minus vero significatus arcus & sagittæ proprius est in Geometria,

quam

quam in vita communi. Nec ex diversitate significatorum propriorum ulla nascitur confusio, propterea quod circumstantiæ, dum vocibus istis utimur, satis superque loquuntur, num in sensu geometrico, an in communi eadem accipiantur. Nos in Psychologia multis utimur terminis a rebus materialibus ad animam translatis, sed non in sensu improprio, quoniam singulis notiones tribuimus, quibus aliquid in anima indigitatur, ita ut significatus subsisteret, etiamsi eadem voces nunquam de rebus materialibus fuissent usurpatæ.

§. 149.

*Si terminus, cui proprius quidam significatus competit, præ- Terminus  
erea adhuc rei alii significandæ destinatur, cujus notionem vel clarus quam  
nullam, vel saltem obscuram habemus; erit si in altero hoc casu do fiat ina-  
inanis.* Etenim si terminus, cui proprius quidam significatus  
competit, alii rei adhuc significandæ destinatur, notio signifi-  
catum proprium constituens (§. 138.) ei demitur, ut significa-  
tu omni vacuus censi debeat. Quamobrem ubi ejus rei,  
cui significandæ destinatur, notionem vel nullam, vel saltem  
obscuram habemus; termino quoque novo significato imbuen-  
do notionem claram tribuere nequimus, multo minus distin-  
ctam completam. Quoniam tamen propter notionem ab eo  
removendam aliquam sibi habere videtur, terminum ideo cla-  
rum existimans (§. 81.), vel etiam ob familiaritatem (§. 132.);  
notionem nonnisi deceptricem termino jungit, quæ cognos-  
centi imponit, cum is in hoc casu revera sit sine mente sonus.  
Est itaque terminus nonnisi inanis (§. 38.).

E. gr. *Vox metus*, quatenus denotat quandam animi humani passio-  
nem, ortam ob imminens periculum, proprium habet signifi-  
catum. Enimvero quando a Scholasticis naturæ tribuitur ob immi-  
nens vacuum, nulla ei notio responder, adeoque sine mente sonus est.  
*Vox odium* pariter ac *amor* suum habet significatum proprium,  
quando de homine usurpatur. Sed cum Scholastici odium & amorem  
tribuunt corporibus inanimatis, utraque vox fit sine mente sonus.  
*Vox anime* suum habet significatum proprium, quando sumitur  
de principio in nobis cogitante. Enimvero dum ad plantas trans-  
fertur, nulla ipsi amplius notio responder, sitque ex termino claro vox  
inania.

§. 150.

*Significatur  
proprius quo-  
modo detega-  
tur.*

*Quodsi in significatum vocis, quem ipsi tribuit usus loquendi,* *inquirere* jubeamur, tum 1. varii cogitandi sunt casus, in quibus voce illa utimur: 2. quæcunque in re illa distingui possunt, cui inest quod voce indigitatur, sedulo sunt distinguenda: 3. examinandum, quænam sint illa, ob quæ voce ista hic utimur, dum scilicet casus alios in memoriam nobis revocantes attendimus, utrum adhuc voce ista sumus usuri nec ne, si hoc vel istud abesset, vel si hoc aut istud solum adesset. Hac sane ratione detegemus notas, quæ notionem ingredi debent voce data designatam.

Nimirum qui significatum vocis proprium quærit, quem ei usus loquendi tribuit, is notionem investigare nititur, quæ repræsentatur res notione ista indigitata (§. 139.). Jam vero omnis notio, siue fuerit confusa, siue distincta suas continet notas (§. 88.), quæ sunt rei intrinsecæ (§. 79.), adeoque notionem quærentes notas investigare tenemur eam ingredientibus. Jam notæ efficiunt, ut res agnoscatur & ab aliis distinguatur (§. cit.). Quamobrem si absunt, non amplius permovemur ad utendum ista voce (§. 48.). Notæ igitur detegendæ sunt perpendendo, num his vel istis absentibus, vel his solis præsentibus, adhuc voce ista utamur.

Quoniam in philosophia a recepto verborum significatu non est recedendum (§. 142. *Disc. prælim.*); præsens problema de investigando sensu vocum proprio, quem ex usu loquendi obtinent, magnæ est utilitatis. Et in ejus resolutione una continentur principia, unde demonstrari potest, vocem aliquam in recepta significatione sumi. E. gr. Si quis quærit significatum vocis *lux*, quem ex usu loquendi obtinet; ei attendendum est ad eos casus, in quibus lucem adesse dicit, tum & ad oppositos, in quibus eam adesse negat, ut appareat, quænam sint ea, ob quæ lucem adesse asseramus. Quoniam itaque deprehendimus, nos quod lux adsit inde agnoscere, quod corpora circumjecta videre possimus; eam autem nondum adesse affirmamus, quando eadem videre nondum licet: ideo hinc constat voce *lux* ex usu loquendi id denotari, vi cujus corpora videri possunt.

§. 151.

§. 151.

Ex hætenus dictis apparet, quam *circumspectus esse de-* *Circumspe-*  
*beat verborum usus*, ne aut notionibus deceptricibus nobis im- *ctus verbo-*  
ponamus verba cum rebus confundentes, aut vocum indeter- *rum usus.*  
minato ac vago significato evidentia cognitionis obicem po-  
namus ac summa imis misceamus.

# CAPUT IV.

## DE DEFINITIONIBUS.

§. 152.

**D***efinitio* est oratio, qua significatur notio completa at- *Definitionis*  
que determinata termino cuidam respondens. Su- *definitio.*  
mitur subinde pro ipsa notione completa atque deter-  
minata rei termino denotata. Ipse autem terminus aut res  
eodem indigitata *Definitum* appellatur.

Cur ad definitiones non referamus nisi notiones completas atque  
determinatas, patebit deinceps. Distinguiamus autem notionem com-  
pletam atque determinatam a definitione, tanquam signum a re signi-  
ficata, quemadmodum notio a termino (§. 36.), enunciatio a iudicio  
(§. 41.) a nobis fuit distincta. Dicimus, notionem esse debere com-  
pletam atque determinatam, cum notio completa dicatur, quatenus  
notæ ad rem agnoscendam sufficiunt (§. 92.), determinata vero, qua-  
tenus notæ nec plures, nec pauciores adsunt, quam quæ ad hunc scopum  
sufficiunt (§. 123.). E. gr. Si nobis triangulum representamus tribus  
lateribus æqualibus terminatum; notionem habemus completam  
atque determinatam istius speciei triangulorum, quæ termino *trianguli*  
*æquilateri* indigitatur. *Triangulum* igitur *æquilaterum* si dicitur esse  
triangulum, quod tria latera æqualia habet; triangulum æquilaterum  
est definitum, verba vero, quibus notio significatur eidem respondens,  
definitionem absolvunt. Ipsæ definitiones Logicæ hætenus allatæ &  
in posterum afferendæ definitionum exempla præbent.

§. 153.

*Quot nota in  
definitione  
enumeran-  
da.*

*In definitione enumerari debent notæ nec plures, nec pauciores, quam quæ ad rem definitam agnoscendam & ab aliis distinguendam sufficiunt.* Est enim definitio oratio, qua significatur notio completa atque determinata (§. 152.); notio vero completa & determinata notas continet nec plures, nec pauciores, quam quæ ad definitum agnoscendum atque a rebus aliis distinguendum sufficiunt (§. 92. 123.). Quamobrem cum in oratione terminos combinemus (§. 41.), quibus res denotatur, quarum notiones habemus (§. 37.); in definitione combinandi sunt termini, quibus denotantur notæ ad rem representandum sufficientes. Definitionem adeo conditurus enumerare debet notas nec plures, nec pauciores, quam quæ ad eam agnoscendam atque ab aliis discernendam sufficiunt.

Qui *triangulum æquilaterum* definit per triangulum, quod tria latera æqualia habet, is notas enumerat sufficientes ad hanc figuram agnoscendam & ab aliis cum triangulis, tum figuris discernendam. Etenim a Figura quacunque rectilinea alia distinguitur numero ternario laterum, a triangulis ceteris eorundem æqualitate. Quod si omiseris numerum ternarium; non amplius illam figuram distingues ab aliis figuris æquilateris. Si omiseris æqualitatem laterum retento numero ternario, non eam distingues a figuris triangularibus ceteris. Neutra igitur harum notarum abesse potest. Enimvero si quis triangulum definiret per figuram tria latera æqualia & tres angulos æquales habentem, seu per figuram trilateram, æquilateram, æquiangulam; tum nota una foret superflua, nempe æqualitas angulorum, propterea quod triangulum æquilaterum est quoque æquiangulum. Æqualitas adeo angulorum non in notarum numerum referenda, quæ definitionem ingrediuntur; sed inter ea, quæ de triangulo æquilatero enuntianda. Similiter definitionem Dei in gratiam theologiæ naturalis scientificæ methodo pertractandæ conditurus non plura ejus attributa in ea enumerare debet, quam quæ ad eum ab aliis rebus discernendum sufficiunt; cetera ad judicia de Deo formanda, seu propositiones spectant.

§. 154.

*Quanam de-  
finitionem.*

*Definitionem ingredi non debent, nisi quæ rei definiendæ intrinseca sunt.* In definitione enim enumerantur notæ rei definiendæ

significan-

finiendæ (§. 153.). Sed notæ sumuntur ab iis, quæ rebus intrin- *ingredi pos-*  
seca sunt (§. 79.). Nihil ergo definitionem ingredi debet, nisi *sint.*  
quod definito intrinsecum.

Ita trium laterum æqualitas, per quam discernitur triangulum æqui-  
laterum a ceteris, est aliquid ei intrinsecum. Attributa Dei, quæ in-  
grediuntur definitionem ipsius, sunt aliquid ipsi intrinsecum. Diximus  
superius (not. §. 140.), notionem figuræ ordinatæ completam atque  
determinatam esse; si eam concipiamus tanquam æquilateram & cir-  
culo inscribibilem. Videtur adeo notionem ingredi aliquid, quod  
minime intrinsecum, nempe quod circulo inscribi possit. Enimvero  
cum in definitione non dicatur, figuram ordinatam esse circulo in-  
scriptam, sed saltem, quod ea circulo inscribi possit; ista inscrip-  
tibilis utique tanquam aliquid figuræ ordinatæ intrinsecum considerari  
potest, cum fluat ex eo, quod figuræ inesse nemo negabit, nempe  
ex laterum atque angulorum æqualitate simultanea. Ne igitur in pra-  
xi Logicæ scrupulus nobis oriatur, lubet sequentes addere proposi-  
tiones.

## §. 155.

*Si quid in definito possibile concipitur, illa possibilitas tan-* *Possibilitates*  
*quam intrinsecum quid consideranda.* Cum ea, quæ sunt vel fiunt, *rei intrinse-*  
sua non destituantur ratione, unde intelligitur, cur sint, vel *ca.*  
fiant (§. 4. *Disc. prelim.*); si quid in definito possibile, seu esse,  
vel fieri posse concipitur, ratio quoque in eo esse debet, cur id in  
eodem possibile sit, consequenter datur quidpiam actu in de-  
finito, propter quod alterum possibile. Quamobrem possibi-  
litas ista, quæ per quidpiam inexistentis una determinatur, con-  
cipitur per modum rei actu inexistentis atque adeo recte tan-  
quam intrinsecum quid consideratur.

E. gr. Plumbum vi ignis liquefieri potest. Ratio, cur liquefieri  
possit, pendet ab ejus textura & qualitatibus massarum simpliciorum,  
quæ mixtionem ingrediuntur, quemadmodum in Physica docetur.  
Immo sufficit hic nobis generaliter cognovisse, dari aliquid in plum-  
bo, per quod liquabile concipitur. Liquabilitas igitur concipitur  
tanquam quidpiam plumbo intrinsecum & inter notas recensetur, per  
quas metallum istud ab aliis corporibus distinguitur. Similiter fieri  
potest, ut homo doctrina imbuatur & ideo doctrinæ capax dicitur.

Ista

Ista capacitas per facultates animæ determinatur atque perinde ac hæ eidem intrinseca concipitur.

## §. 156.

*Modorum & relationum possibilitates.*

Hinc consequitur, *modorum quorumcunque atque relationum ad alia possibilitates tanquam rei intrinsecas considerandas esse.* Et si enim modi per essentialia entis non determinentur, ut actu insint (§. 67.); attamen per essentialia eorum possibilitas determinatur, ut res data dati cujusdam modi capax sit. Si enim negas, atque omnem modi determinationem unice ab extrinseco principio accersendam esse statueris, ita ut non præsupponatur possibilitas admittendi hunc modum in ipso subjecto; causa eadem rei cuilibet eundem modum inducere valebit, hoc est, ignis lignum vel lapidem perinde liquabit ac metallum; quod absurdum est atque experientię repugnat. Non aliter se res habet cum relationibus, quæ quidem per essentialia entis non ita determinantur, ut actu insint; per eadem tamen possibiles sunt, ita ut istis salvis possibilitas earum a subjecto removeri nequeat.

## §. 157.

*Possibilitates inter attributa referendæ.*

*Possibilitates, quæ per omnia essentialia simul determinantur, iness: intelliguntur per modum attributorum propriorum; quæ vero per unum vel aliquot eorum determinantur, per modum attributorum communium.* Rei enim intrinseca, quæ per omnia essentialia simul determinantur, sunt attributa propria; quæ vero per unum vel aliquot eorum determinantur, sunt attributa communia (§. 66.). Jam possibilitates, quæ per intrinseca rei quæ tales determinantur, tanquam intrinsecum quid considerantur (§. 155.). Eadem igitur, si per omnia essentialia simul determinantur, per modum attributorum propriorum; si vero per unum vel aliquot eorum, per modum attributorum communium concipiuntur.

## §. 158.

*Possibilitates inter modos*

*Quod in re quadam non concipitur possibile, nisi præsupposito quodam eius modo, ejus possibilitas concipitur instar alicujus*



*jus modi.* Quod non ante possibile concipitur, quam modo *referen-*  
quodam actu inexistente; ejus possibilitas in re admitti non *de.*  
potest, nisi præsentem modo. quod per se patet. Enimvero  
possibilitas, quæ in re non potest admitti, nisi præsentem modo,  
cum non per ea determinetur, quæ constanter insunt (§. 67.),  
tanquam mutabilis, adeoque instar alicujus modi concipi debet  
(§. cit.).

Et si hæc theorematum nimis abstracta videri possint iis, qui præjudicio  
hoc tenentur, quasi omnia terminis in communi sermone obviis indi-  
gitari queant; id tamen ob stare non debet, quo minus ea tradamus,  
quæ ad definitiones accurate formandas & rite judicandas apprimè  
necessariaprehenduntur.

## §. 159.

*Definitionem termini conditurus notionem habere debet rei, Notitia ad*  
quam is denotat, distinctam & notarum nosse terminos, quæ eam *definiendum*  
ingrediuntur. Definitionem enim conditurus enumerare de- *requisita.*  
bet notas, quot ad rem definiendam agnoscendam & ab aliis  
distinguendam sufficiunt (§. 153.). Sed qui notas cognoscibiles  
enumerare valet, is ejus habere debet notionem distinctam  
(§. 90.) & ut eas enumerare possit, earum terminos nosse  
(§. 36. 37.). Definitionem itaque conditurus & distinctam ha-  
bere debet notionem rei definiendæ, & terminos nosse nota-  
rum, quæ eam ingrediuntur.

Quoniam ante tempora *Cartesii* notiones rerum distinctæ parum  
curæ cordique fuere eruditis, si Mathematicos excipias; mirum videri  
non debet, quod, præterquam in Mathesi, adeo raræ sint definitiones  
accuratæ. Est præterea non exiguæ difficultatis judicare, quænam  
sint notæ rei definiendæ & quot earum notionem reddant completam  
atque determinatam (§. 102.). Atque ideo non tædet doctrinam de-  
finitionis uberius pertractare, quam hætenus factum fuit a phi-  
losophis.

## §. 160.

*In definitionibus non utendum est terminis nisi propriis & Quales ter-*  
*fixis.* Definitiones condimus eum in finem, ut alteri signifi- *mini ad defi-*  
cemus notionem completam atque determinatam, quæ termi- *nitionem re-*  
(*Wolfii Logica*) B b *no* *quirantur.*

no definito respondet (§. 152. ). Sed cum alter mentem nostram non intelligat, nisi auditis vocibus easdem in se notiones excitare valet, quæ cum terminis, quæ definitionem ingrediuntur, conjunguntur (§. 117. ); singulis invariata respondere debet notio. Non igitur utendum est in definitione terminis nisi fixis (§. 129. ).

Porro definitionem conditurus enumerare debet notas, quot ad rem definitam agnoscendam atque ab aliis distinguendam sufficiunt (§. 153. ), adeoque proferre terminos, quæ notis istis indigitandis destinantur (§. 36. ). Enimvero si termino attribuitur notio, cui indigitandæ destinatur, in significato proprio eundem sumimus (§. 138. ). Termini igitur definitionem ingredientibus in significato proprio sumi debent.

## §. 161.

*Idem ulterius ostenditur.*

Quoniam terminus, præter significatum proprium, quem habet, alium præterea acquirit, dum adhuc rei cuidam alii significandæ destinatur (§. 148. ); in definitionibus uti licet terminis, qui a proprio significato ad alium transferuntur, modo si ante definitionem fuerint explicati, ne scilicet eis prolatis alter eisdem jungat notiones vulgo eis tributas (§. 116. ), sicque mentem definiientis non assequatur (§. 119. ).

Facile apparet, terminos hic à significato proprio, quicumque tandem sit, transferri ad significandam notam, quæ notionem definiti ingreditur. Quamobrem cum proprius significatus non attenditur, terminus ab eodem liberatus nihil significat, atque tum demum ex non significativo redditur rursus significativus, cum nova ei notio attribuitur, atque novum acquirit significatum proprium.

## §. 162.

*Idem adhuc ulterius ostenditur.*

*Terminis definitionem ingredientibus aut utendum est in recepto significato, aut si ante definiendi sunt, quam inde utamur.* Definitionem eum in finem condimus, ut alteri significemus notionem completam atque determinatam, quam termino dato tribuimus (§. 152. ). Alter igitur mentem nostram intelligere, adeoque perspectos habere debet terminos nosseque notiones, quæ

quæ iis junguntur in definitione (§. 118.). Quoniam itaque eas notiones singulis terminis definitionem ingredientibus tribuere tenemur, quæ rebus conveniunt, quibus denotandis vel in communi sermone, vel in disciplinis ac arte termini isti designantur; terminis utendum est, quemadmodum fert usus loquendi (§. 139.), atque in recepto significato (§. 140.).

Quodsi terminum quendam ante definiamus, quam eodem in definitione aliqua utamur, patet utique, quænam notio eidem sit tribuenda (§. 152.), atque adeo qui præcedentem definitionem novit, eo audito notionem convenientem in se excitare valet (§. 116.), consequenter mentem definientis assequitur (§. 117.).

Hic saltem logice consideramus, quid fieri possit, non autem quid in dato casu fieri debeat. Hoc enim ad Logicæ applicationem spectat: quem in finem nonnulla diximus in discursu præliminari (§. 142. 143.).

## §. 163.

*In definitionibus utendum est terminis clavis, non obscuris.* *Termini in definitione agnoscuntur esse debent clari.*  
In definitione recensentur notæ, quæ ad definitum agnoscendum & ab aliis distinguendum requiruntur (§. 153.). Terminis igitur singulis respondere debet notio clara, etsi confusa, ut notas ipsas agnoscere atque a se invicem discernere valeamus, licet earum notas distinguere ulterius nequeamus (§. 80. 88.). Si negas terminis respondere debere notiones claras: sufficient obscuræ. Notas adeo nec agnoscere, nec a se invicem ab aliis discernere (§. 80.), consequenter nec rem definitam ex istis notis agnoscere poteris: id quod scopo definitionis adversatur (§. 152.). Terminis itaque, quibus notæ indignantur, notiones claræ utique respondere debent. Quare cum clarus sit terminus, cui notio clara respondet; obscurus vero, cui nonnisi obscura adhæret (§. 81.); definitionem ingredi nequeunt nisi termini clari, nullus in eadem locus est obscuris.

## §. 164.

Cum fieri possit, ut terminus aliquis sit alteri clarus, qui *Quenam*

claritatis  
cura.

alteri obscurus est (§. 82.), definiens satisfacit officio suo, si  
utitur terminis, quos claros supponere licet ei, in cujus gratiam  
definitio conditur.

E. gr. In definitionibus astronomicis utimur terminis geometricis, qui cum in Astronomia non explicantur, nonnisi ei perspecti sunt, qui definitiones geometricas memoria tenet, aut minimum terminorum istorum notiones claras, etsi confusas, Geometriae tractatione sibi comparavit. Etenim ad Astronomiam accedere non debet nisi principiis geometricis instructus: secus qui facit, is sibi imputet, quod ipsi obscura videantur, quæ disciplinas ordine tractanti clara sunt. In nostris definitionibus logicis utimur terminis, qui in antecedentibus fuerunt explicati atque adeo perspecti sunt lectori, qui attento animo antecedentia volvit atque revolvit, ut termini fiant familiares, quos definimus (§. 133.). Idem faciemus in omni reliqua philosophiæ parte. Cum enim philosophiam methodo philosophica tradere constituerimus, methodus vero philosophica requiratur, ut termini, qui ingrediuntur definitiones sequentes, explicantur per antecedentes (§. 119. *Disc. prelim.*); methodo philosophica scribens jure supponit in definitionibus sequentibus lectorem antecedentium gnarum. Quod si aliquis involat in definitiones sequentes, præcedentibus intactis, vel fugitivo oculo conspectis; is sibi imputet, si quid ipsi videatur obscurum.

#### §. 165.

Cur in definiendo non tantum terminis communibus & in significatu recepto uti liceat.

Fieri non potest, ut in disciplinis definitiones non ingrediantur nisi termini in communi sermone usitati, & ut istiusmodi termini semper respondeant usui loquendi. Termini, qui definitionem ingrediuntur, denotare debent notas, quibus definitum agnoscere atque ab aliis distinguere licet (§. 153.). Quamobrem cum vulgo non omnia discernamus, quæ rebus insunt, præsertim si earum notiones fuerint abstractæ (§. 109. 110.), adeoque in notionibus confusis acquiescamus (§. 88.); non mirum, quod in sermone communi deficiant subinde termini abstracti (§. 111.). In disciplinis adeo termini vel philosophici excogitandi (§. 145. 146. *Disc. prelim.*), aut terminus in communi sermone obvius a recepto usu loquendi ad significatum aliud non minus proprium transferendus (§. 148.), hoc est, communis in philosophicæ aut technicæ seu terminum artis transmutandus.

Enim-

Enimvero datur adhuc alius casus, in quo termini definitionem ingredientibus non prorsus consentiunt cum usu loquendi. Scilicet in definitionibus utendum est terminis fixis (§. 160.), adeoque ex iis arcentur vagi (§. 129.). Quamobrem si in communi sermone (quod sapius accidere observamus) termini significatus fuerit vagus; a vago ad fixum est reducendus (§. 144. *Dist. prælim.*). Quoniam termino fixo respondet notio invariata, vago autem non item (§. 129.); ubi termini significatus vagus ad fixum fuit reductus, fieri omnino potest, ut usus ejus cum communi usu loquendi subinde non consentiat (§. 139.).

Oppido igitur falluntur, quibus omnis terminorum philosophicorum vel rectorum usus, vel novus quoque & ab usu loquendi abhorrens significatus in definitionibus damnatur. Valgo nimis precipitanter judicant homines, nec iis exceptis, qui precipitantiam in iudicando vitandam esse sedulo inculcant.

## §. 166.

*Si definitio respondet notio confusa, nec terminis definitio- nem ingredientibus simul sumtis aliam tribuere valeamus notionem, nisi eandem confusam; definitio nulla est.* Definitio de-  
ceptrix idem  
per idem ex-  
plicans. Etenim in definitione enumerari debent notæ, quot ad definitum agnoscendum & ab aliis rebus discernendum sufficiunt (§. 153.). Sed si omnibus terminis definitionem constituentibus simul sumtis non respondeat nisi notio confusa, quam definito tribuere solemus; nullæ in eadem notæ enumerantur (§. 89.). Definitio igitur nulla est.

E. gr. Si quis definit *finitum* per id, quod actu terminetur undique; is cum terminatione actuali undique facta eandem notionem confusam jungit, quam finito tribuit; nullas vero enumerat notas, per quas finitudo agnoscitur. Repræsentamus nobis aliquod extensum terminatum, dum intelligere nitimur, quid sit esse actu undique terminatum, ne verba sint sine mente sonus; sed idem extensum nobis repræsentamus, dum cogitationem divertimus ad notionem termino finito respondentem. Definitio igitur revera nulla est. Idem hic explicatur per idem. Sunt nempe *finitum esse & undique actu terminari* termini idem significantes (§. 36.). Similiter cum Eu-

*elides* lineam rectam definit per lineam, quæ ex æquo interjacet inter sua extrema; definitio nulla est. Etenim verbis *rectum esse & ex æquo interjacere suis extremis* eadem notio confusa respondet; nulla vero hic assignantur notæ lineæ rectæ intrinsecæ, per quas a curva distinguitur, cui notæ istæ non insunt. Sæpissime admittitur hic error, præsertim ab iis, qui derivationes grammaticas cum definitionibus confundunt. Ita sibi habere videntur notionem omnipotentia, qui eam dicunt esse potentiam faciendi omnia, cum tamen nonnisi sic grammatice explicent terminum, eandem notionem confusam, immo decepticem (§. 38.), & termino omnipotentia, & verbis potentia faciendi omnia tribuentes.

## §. 167.

*Definitum  
cur non possit  
ingredi defini-  
tionem.*

*Definitum ipsum non potest ingredi definitionem.* Definitum est res, quæ definiri debet (§. 152.), adeoque non tantum aliquid rei intrinsecum, quo ad eam agnoscendam utimur, consequenter nota nulla (§. 79.). Quamobrem cum in definitione enumerari non debeant nisi notæ (§. 153.); ipsum definitum eam ingredi nequit.

E. gr. Si quis *annum* definiret per spatium annum, quo majores temporis partes metimur; is nullam dat anni definitionem: spatium enim annum & annus sunt unus idemque terminus, atque adeo definitum ingreditur definitionem. Nullam vero ipsum definitum constituit notam, unde hanc temporis partem agnoscere licet. Aliter longe se res habet, si annum d cas spatium 365. dierum: tum enim numerus ille dierum sufficiens nota est ad hanc temporis partem, quæ annus dicitur, ab aliis temporis partibus discernendam.

## §. 168.

*Quando id  
incautis ap-  
pareat.*

*Si definitum fuerit species, quam denotat terminus complexus constans ex termino generis & termino differentia specificæ, & terminus genus denotans ingreditur definitionem; definitum eam non ingreditur, sed saltem nota definiti.* Etenim definitum non est terminus, quo denotatur genus; sed terminus complexus constans ex termino generis & termino differentia specificæ, quo denotatur species definienda. Quamobrem si tantum terminus, quo genus denotatur, definitionem ingreditur; definitum eam non ingredi patet.

Enim-

Enimvero cum genus denotet similitudinem speciei definiendæ cum speciebus aliis (§. 45.), adeoque aliquid intrinsecum hisce commune; notam aliquam speciei constituit (§. 79.). Terminus itaque genus denotans notam rei definiendæ significat, adeoque in hypothese propositionis præsentis nota aliqua definiti definitionem ingreditur.

E. gr. Nomen *Trianguli æquilateri* est terminus complexus, constans ex nomine generis, quod est *triangulum*, & ex nomine differentię specificæ, quæ indigitatur voce *æquilaterum*. Quamobrem si *triangulum æquilaterum* definitur per triangulum, cujus singula latera inter se æqualia sunt; definitum minime ingreditur definitionem, sed tantum aliqua nota huic figuræ triangulari cum ceteris communis, nempe numerus ternarius laterum in perimetro, qui voce trianguli indigitatur. Equidem in hoc exemplo res satis manifesta est: dantur tamen alia, ubi ea non adeo patet. Immo regula quoque attente considerata nihil difficultatis habet, ut superfluum videri possit talia moneri ac rationibus confirmari: enimvero nisi eadem familiaris fuerit, ut in dato quocunque casu veluti sponte nobis succurrat, ob ejus defectum acumen quaesitum in judicando deficere potest. Non igitur contemnenda sunt tanquam levioris momenti, quæ attentus lector per se assequitur. Quæ ad praxin transferenda sunt, intelligi non sufficit, sed familiaria reddi necesse est.

## §. 169.

*Definitionem ingredi nequit terminus, cujus definitionem ingreditur definitum.* In definitione enumerari debent notæ in definiendo nec plures, nec pauciores, quam quæ ad rem definitam agnoscentiam & ab alijs distinguendam sufficiunt (§. 153.). Terminus itaque, qui definitionem ingreditur, denotare debet aliquam notam definiti. Quare si ejus definitionem ingreditur definitum; definitum constituitur nota notæ sui ipsius, hoc est, ex ipso definito agnosci debet id, unde definitum agnoscentum. Definitum adeo ante agnosci debet, quam agnosci potest nota, unde illud agnoscere atque ab alijs distinguere debemus: Quod cum sit absolum, fieri non potest, ut definitionem ingrediatur terminus, cujus definitionem ingreditur definitum.

E. gr.

E. gr. Si quis definit *diem* per tempus constans viginti quatuor horis & *horam* per partem vigesimam quartam diei; definitionem diei ingreditur hora tanquam nota & vicissim definitionem horæ dies. In definitione itaque diei horas supponitur esse cognita, antequam noscatur quid sit dies, & in definitione vicissim horæ supponitur notus dies, antequam constet, quid sit hora. Tale quid absonum esse, nemo non fatetur; sed sapissime tamen fieri experientia loquitur. Nec difficultate caret in disciplinis terminos ita definire, ut definitiones sint ab hoc vitio immunes.

## §. 170.

*Circuli vitiosi definitio.*

Si in definitione occurrat terminus, cujus definitionem ingreditur definitum, vitium in definiendo commissum dicitur, *Circulus in definiendo*. Est adeo is vitium, quo in definitionem admittitur terminus, cujus definitionem ingreditur definitum.

Pater attendenti, in circulo hoc vitioso definitum revera ingredi definitionem, atque adeo is vitiosus intelligitur per regulam, quod definitum non ingredi debeat definitionem (§. 167.). *Vitiosum enim* dicimus, quod *regule repugnat*.

## §. 171.

*Definitio, cui notio deceptrix respondet.*

*Si terminis in definitione combinatis non respondet notio nisi deceptrix; definitio nulla est.* Hypothesin, quam hic sumimus, esse possibilem, constat ex superioribus (§. 135.). Quod si ergo ponamus, verbis in definitione combinatis non respondere nisi notionem deceptricem, hoc est, non esse possibilem rem istiusmodi, cui notæ istæ junctim sumtæ convenient, quæ terminis in definitione combinatis denotantur (§. 38.); oratio ista nullam significabit notionem, atque adeo definitio non est (§. 152.).

E. gr. Si quis definit *bilineum rectilineum* per figuram planam duabus lineis rectis terminatam; oratio definitionis speciem mentitur, neque enim speciei externa differt a definitione *trilinei* seu *trianguli rectilinei*, quod definitur per figuram planam tribus lineis rectis terminatam. Enimvero cum in Geometria demonstretur, tribus lineis rectis, quarum duæ sunt tertia majores, figuram planam terminari posse; minime autem rectis duabus spatium comprehendere nescientibus: figura istiusmodi plana possibilis, cui convenient notæ in definitione trianguli



guli rectilinei commemoratæ; impossibilis autem est figura, cui conveniant notæ in definitione bianguli rectilinei prolatae. Notio igitur bianguli sive bilinei rectilinei nulla est: datur autem notio trianguli. Atque adeo illius quoque nulla est definitio, sed oratio ad formam definitionis effecta speciem ejus mentitur: contra verò hujus definitio vera est, non tantum externa specie, quæ verborum combinatione efficitur, verum etiam interna, quæ per notionem verbis sic combinatis respondentem constituitur. Signum nullum est, cui res significata nulla responderet.

## §. 172.

Si essentialia sufficienter enumerantur, per quæ genus aliquod, vel species aliqua determinatur; definitionem habemus generis, vel speciei. Si essentialia sufficienter enumerantur, omnia enumerantur, quæ definito constanter insunt, sed quorum unum per alterum non determinatur (§. 64.), adeoque notæ sufficientes enumerantur ad genus vel speciem definitam agnoscendum atque ab aliis generibus vel speciebus distinguendum (§. 79.), propterea quod omnia essentialia simul sumta, per quæ aliquod genus, vel aliqua species determinatur, non nisi huic generi, vel huic speciei conveniunt. Quoniam vero nihil essentialium abesse potest, quamdiu idem genus vel eadem species subsistere debet (§. 72.); nec plures recensentur notæ, nec pauciores, quam quæ sufficiunt ad genus vel speciem agnoscendum atque ab aliis distinguendum. Notionem igitur habemus completam (§. 92.) & determinatam generis istius vel speciei (§. 123.) eamque verbis significamus. Generis adeo atque speciei definitionem habemus (§. 152.).

E. gr. Triangulum rectilineum per trium laterum concursum ad terminandum spatium tanquam genus aliquod figurarum planarum constituitur. Si igitur *Triangulum rectilineum* dicis esse figuram planam tribus lineis rectis terminatam; definitionem ejus habes. Similiter inæqualitas trium laterum determinat speciem quandam trianguli rectilinei, quæ dicitur triangulum scalenum. Quamobrem si dicis *triangulum scalenum* esse figuram planam tribus lineis recti inæqualibus terminatam; definitionem habes trianguli scaleni rectilinei. Utrobique non recensentur nisi essentialia: etenim & triangulum in genere (Wolfii Logica)

Cc

con-

consideratum habet in perimetro tria latera, & in triangulo scaleno tria ista latera sunt inæqualia; sed nec in priori, nec in posteriori casu latus unum per alterum determinatur. Recensentur itaque in utraque definitione essentialia (§. 64.). Poterant quoque condi definitiones numerorum polygonorum ex illis formulis, quæ ad illustrandum generum & specierum differentias supra fuere adductæ (not. §. 72.).

## §. 173.

*Modus secundus.*

*Si attributa sufficienter enumerantur, per quæ genus aliquod, vel species aliqua determinatur; definitionem habemus generis istius, vel speciei.* Attributa enim sunt rei intrinseca & constanter insunt (§. 66.), & si ad genus aliquod, vel speciem aliquam determinandum sufficiunt, ad idem quoque genus eandemque speciem agnoscendum ac ab aliis distinguendum sufficiunt. Si igitur attributa ista enumerantur, notæ sufficienter enumerantur, nec plures, nec pauciores, quam quæ sufficiunt. Habemus igitur notionem generis, vel speciei completam atque determinatam (§. 92. 123.) terminis expressam, consequenter definitionem (§. 152.).

E. gr. Nulla est figura plana, præter triangulum rectilineum, cujus omnes anguli simul sumti sint ad rectum in ratione dupla. Ratio igitur dupla angulorum omnium simul ad rectum est proprietas, qua triangulum rectilineum a ceteris figuris planis omnibus distinguitur. Quamobrem *triangulum rectilineum* definiri potest per figuram planam, cujus omnes anguli simul sunt ad rectum in ratione dupla. Et si autem ita definiri possit; non tamen ita definiri debere asserimus: cum enim unius ejusdemque rei plures condi possint definitiones, non perinde est, quamnam earum eligas. Sed de eo postea disceptemus. Ceterum in Geometria sublimiori nihil fere frequentius est, quam ut curvæ per proprietates quasdam definiantur: immo si more *Cartesiano* constantem punctorum relationem ad axem per æquationem algebricam exprimis, curvas per proprietatem quandam seu attributum proprium definis.

## §. 174.

*Modus tertius.*

Quoniam modorum quorumcunque atque relationum ad alia possibilitates tanquam rei intrinsecæ considerantur atque per modum attributorum insunt (§. 157.), per attributa vero

vero genera & species definiri possunt (§. 173. ); patet utique, *per modorum quorumcunque atque relationum ad alia possibilitates genera & species definiri posse.*

Spectat huc definitio figuræ regularis, quod sit figura plana æquilatera circulo inscriptibilis (not. §. 154. ).

### §. 175.

*Attributorum propriorum nonnisi unum definitionem ingredi debet; communia vero tot ingrediuntur, quot junctim sumpta nonnisi definito competunt.* Nam attributa propria seu proprietates essentialia per omnia essentialia simul sumpta determinantur (§. 66.), atque adeo nonnisi enti ista essentialia habenti conveniunt, consequenter illorum unum sufficit ad ens istius generis vel speciei agnoscendum atque ab entibus aliorum generum vel specierum discernendum. Quoniam itaque in definitione enumerari debent notæ nec plures, nec pauciores, quam quæ ad rem definitam agnoscendam & ab aliis distinguendam sufficiunt (§. 153. ); attributorum propriorum, quæ in notarum numero esse ambigi nequit (§. 79. ), non nisi unum definitionem ingredi debet.

Contra communia attributa seu proprietates communes per unum vel aliquot essentialia determinantur (§. 66. ), atque adeo omnibus istis generibus vel speciebus competunt, quæ essentialia ista communia habent. Unum igitur eorum ad rem definiendam agnoscendam atque ab aliis distinguendam non sufficit, consequenter unum definitioni non satisfacit (§. 153. ). Enimvero si plura sumantur attributa communia, quæ simul sumpta per omnia essentialia determinantur; ista simul sumpta nonnisi enti conveniunt ista essentialia habenti; consequenter uni attributo proprio æquivalent, (*per demonstrationem casus primi*), atque adeo ea simul definitionem ingredi debent (*per eundem casum primum*). Patet adeo, attributa communia tot ingredi debere definitionem, quot junctim sumpta nonnisi definito competunt.

Idem brevius ostenditur hoc modo. Attributa commu-

nia per essentialia entis determinantur (§. 66.), atque adeo eidem intrinseca sunt & in notarum numerum referenda (§. 79.), Quodsi ergo tot enumeres attributa, quot junctim sumta nonnisi definito competunt; notas sufficientes enumeras ad idem agnoscendum atque ab aliis distinguendum. Plura igitur definitionem ingredi non est necesse (§. 153.).

E. gr. Proprietas trianguli rectilinei est, quod summa angulorum sit ad rectum in ratione dupla. Una igitur triangulo rectilineo definiendo sufficit. Triangulum enim rectilineum tanquam species figuræ planæ inde agnosci ac a ceteris figuris planis distingui potest. Eodem modo patet, figuræ quadrilateræ attributum cum sit ratio quadrupla summæ angulorum ad rectum, eandem isti definiendæ sufficere. Et in genere patet, constantem rationem summæ angulorum ad rectum, in quolibet figurarum planarum specie determinatam, sufficere ad figuras planas rectilineas a se invicem distinguendas, consequenter earundem definitioni. Triangulum æquilaterum habet angulos æquales: sed hæc æqualitas cum pendeat ab æqualitate laterum, quod essentialia commune est omnibus figuris æquilateris circulo inscriptibilibus, eadem quoque proprietas communis est figurarum earundem. Idem triangulum habet angulorum summam recti duplam: sed hæc eorum ratio ad rectum cum pendeat a numero ternario laterum, quod essentialia est omnium triangulorum, proprietas omnium triangulorum communis est. Enimvero angulorum ratio æqualitatis inter se & dupla omnium simul ad rectum junctim sumtæ nonnisi triangulo æquilatero conveniunt, consequenter ei definiendo sufficiunt. Exempla quoque in doctrina curvarum occurrunt, quæ lector Geometriæ gnarus facile agnoscat. Nullum attributum Dei est ipsi cum ente alio commune, si determinate sumitur, prout attributum est entis infiniti, seu perfectissimi. Quamobrem omne attributum Deo definiendo sufficit, nec leges definiendi observat, qui plura cumulat (§. 153.).

#### §. 176.

Quoniam modorum quorundam ac relationum possibilitates insunt per modum attributorum propriorum; aliz autem per modum attributorum communium (§. 157.), atque adeo istæ attributis propriis, hæc communibus æquivalent; *istarum una, harum vero tot, quot junctim sumtæ nonnisi definito conveniunt, definitioni sufficiunt (§. 175.).*

*Quot modorum & relationum possibilitates ingredi debent definitionem.*

Exem

Exempla occurrunt in arte docimastica. E. gr. Auri solubilitas in aqua regis est modi possibilitas, quæ auro per modum attributi inest. Hæc igitur nota cum insolubilitate in aqua forti sufficit ad aurum ab aliis metallis distinguendum, atque adeo ibidem aurum definiri potest per metallum in aqua regis solubile & aqua forti insolubile.

## §. 177.

*Definitionem ingredi nequeunt modi.* Modi sunt mutabiles (§. 67.); neque adeo constanter insunt, consequenter regredi nequeunt. Quoniam itaque ex notarum numero excluduntur (§. 79.), in definitione autem nonnisi notæ enumerari debent, quibus definitum agnoscitur & ab aliis distinguitur (§. 153.); modi ex definitione exulare debent. *Modi cur ingredi nequeant definitionem.*

E. gr. Lapis aëri frigido expositus frigidus est; expositus autem radiis solaribus calidus. Frigus igitur & calor sunt modi, quorum neuter ipsi constanter inest. Quamobrem nec frigus, nec calor constitui nota lapidis, neque adeo definitionem ipsius ingredi potest.

## §. 178.

Quoniam modorum & relationum possibilitates, quæ instar alicujus modi insunt (§. 158.), modis æquivalent, modi autem definitionem ingredi nequeunt (§. 177.); evidens est, nec definitionem ingredi posse modorum atque relationum possibilitates, quæ instar alicujus modi insunt. *Cur nec possibilitates ad modum æquivalent.*

## §. 179.

*Per definitiones res ad suas species & genera distingere reducuntur.* Definitiones ingredi nequeunt nisi intrinseca definitis (§. 154.); intrinseca vero sunt vel essentialia, vel attributa, vel modi (§. 64. 65. 67.), vel modorum & relationum possibilitates (§. 156.), quæ vel per modum attributorum (§. 157.), vel per modum modorum (§. 158.) insunt. Quoniam itaque modi (§. 177.) & quæ instar modorum insunt (§. 178.) ex definitionibus exulare debent; essentialia vero (§. 172.), attributa (§. 173.), quæque per modum attributorum insunt, modorum atque relationum possibilitates (§. 174.) definitionem ingredi possunt; patet utique, sola essentialia, attributa, quæque per

modum attributorum insunt modorum atque relationum possibilitates definitionem ingredi posse. Enimvero per essentialia atque attributa (§. 70. 71. ), consequenter & per possibilitates, sive modorum, sive relationum, quæ per modum attributorum insunt, adeoque attributis æquivalent, genera & species rerum determinantur. Quamobrem cum in definitionibus illa enumerentur, quibus genera & species rerum determinantur (§. 153. ); generum ac specierum notiones distincte explicantur (§. 90. ). Patet adeo per definitiones res ad suas species suaque genera distincte reduci.

## §. 180.

*Quando definitio constare debeat ex essentialibus.*

*Si essentialia fuerint perspecta, definitum per ea definiri debet.* Genera & species per essentialia determinantur (§. 70. ), quibus aliquid prius in definito concipi non potest, tanquam ab aliis prorsus independentibus (§. 63. 64. ). Enimvero per definitiones res ad sua genera atque species distincte reducuntur (§. 179. ), facta nempe distincta singulorum, per quæ determinantur, enumeratione (§. 153. ). Quamobrem si essentialia fuerint perspecta, definitum per ea definiri debet.

Ita in figuris rectilincis definiendis sola attendimus essentialia, hoc est, ea, per quæ figuræ istæ determinantur, quæque adeo sufficient ad eas construendas. Legantur Geometriæ elementa: patebit asserti veritas. Recolantur, quæ de nonnullis earum in antecedentibus abunde dicta sunt; nec minus manifesta eadem erit.

## §. 181.

*Quando definitio condit debet ex attributis.*

*Si essentialia ignorentur, definitum per attributa definiri potest.* Etenim ignoratis essentialibus genera & species per attributa determinari possunt (§. 71. ). Patet igitur eodem, quo in præcedente demonstratione, modo, definitum ignoratis essentialibus per attributa definiri posse.

Quoniam essentialia in Geometria elementari sunt sufficienter perspecta; ideo quoque figuræ rectilincæ per eadem definiuntur, minime autem per attributa. Occurrunt tamen definitiones curvarum per attributa in Geometria sublimiori, propterea quod ex his essentialia

commo-

commode demonstrari possunt, atque adeo per leges methodi supponuntur incognita, dum attributa in definitione sumuntur.

## §. 182.

*Si essentialia & attributa sive omnia, sive aliqua ignorentur, definitum definiri potest per meras modorum atque relationum possibilitates, quæ per modum attributi insunt, vel per attributa & istiusmodi possibilitates, quæ simul nonnisi definito conveniunt.* *Quando possibilitates definitionem ingrediuntur.*  
Si essentialia & attributa ignorantur, genera rerum atque species per ea definiri nequeunt: quod per se patet. Enimvero modorum atque relationum possibilitates, quæ per modum attributorum insunt, attributis æquivalent (§. 157.), adeoque in eorum locum surrogari possunt. Quoniam itaque genera & species per attributa definiri possunt (§. 173.); eadem quoque per possibilitates istas definire licet.

Quodsi attributa communia notas sufficientes non præbent; eodem modo patet, posse in supplementum assumi aliquam possibilitatem alicujus modi, vel relationis, quæ per modum attributi inest, donec notarum numerus compleatur (§. 153.).

E. gr. Pentagonum per diagonales ex eodem anguloeductas in tria triangula dividi potest. Id soli pentagono accidit, atque adeo ista divisibilitas per modum attributi proprii inest. Quamobrem (§. 175.) pentagonum definiri potest per figuram planam, quæ per diagonales ex uno anguloeductas in tria triangula resolvi potest. Figura regularis definiri potest per figuram planam æquilateram atque circulo inscriptibilem. Æqualitas laterum est attributum commune, quod ad definitionem non sufficit (§. 175.). Quod possit circulo inscribi figura, consideratur instar modi possibilis, cujus possibilitas inest per modum attributi communis, cum non omnis figura circulo inscriptibilis sit regularis. Enimvero hæc inscriptibilitas sumitur in supplementum alterius cujusdam attributi communis, nempe æqualitatis angulorum.

## §. 183.

*Notio speciei constat ex notione generis atque differentie* Notio speciei *specificæ.* Notio speciei repræsentat ea, quæ pluribus speciebus *invol-*  
*bus* *vat.*

bus communia sunt, ac præterea ea, quibus species istæ a ceteris ad idem genus relatis differunt (§. 44. 45.). Notio igitur speciei ex generis atque differentiæ specificæ notione componitur (§. 75.).

E. gr. Si triangulum æquilaterum definitur per figuram tribus lateribus æqualibus terminatam, numerus ternarius laterum spectat ad triangulum in genere; eorundem vero æqualitas ad differentiam specificam æquilateri a ceteris triangulis. Notio igitur speciei trianguli æquilateri involvit & notionem trianguli in genere, & differentiam specificam, qua a ceteris differt.

## §. 184.

*Notio generis inferioris ad suum genus, seu respectu generis superioris pro specie habetur (§. 47.); patet ulterius, notionem generis inferioris componi ex notione superioris & notione differentie generis inferioris a ceteris, quæ ad idem superius tanquam species referuntur.*

Quoniam genus inferius se habet ad superius ut species ad suum genus, seu respectu generis superioris pro specie habetur (§. 47.); patet ulterius, notionem generis inferioris componi ex notione superioris & notione differentie generis inferioris a ceteris, quæ ad idem superius tanquam species referuntur.

## §. 185.

*Genus & differentia sufficientes præbent genus atque differentia specifica. Per definitiones res distinctæ cognitæ reducimus ad suas species atque sua genera (§. 179.), genera vero inferiora considerantur tanquam species respectu superiorum (§. 47.). Omnes igitur definitiones vel sunt definitiones specierum, vel generum, quæ superiorum respectu tanquam species considerari possunt. Notio speciei non componitur nisi ex notione generis atque notione differentie specificæ (§. 183.) & notio generis inferioris ex notione superioris atque notione differentie ab aliis inferioribus ad idem superius relatis (§. 184.), hoc est, ex suo genere atque sua differentia specifica. Quare notas ad definitum agnoscendum & ab aliis discernendum sufficientes præbent genus & differentia specifica.*

Notas ad definitum agnoscendum & ab aliis discernendum sufficientes præbent genus atque differentia specifica. Per definitiones res distinctæ cognitæ reducimus ad suas species atque sua genera (§. 179.), genera vero inferiora considerantur tanquam species respectu superiorum (§. 47.). Omnes igitur definitiones vel sunt definitiones specierum, vel generum, quæ superiorum respectu tanquam species considerari possunt. Notio speciei non componitur nisi ex notione generis atque notione differentie specificæ (§. 183.) & notio generis inferioris ex notione superioris atque notione differentie ab aliis inferioribus ad idem superius relatis (§. 184.), hoc est, ex suo genere atque sua differentia specifica. Quare notas ad definitum agnoscendum & ab aliis discernendum sufficientes præbent genus & differentia specifica.

## §. 186.

*Eadem cur sufficiant de-*

Genus & differentia specifica ad definitionem sufficient. In definitione non plures enumerandæ sunt notæ, quam quæ ad



ad rem agnoscendam & ab aliis discernendam sufficiunt (§. 153.). Sed genus & differentia specifica præbent notas sufficientes ad definitum agnoscendum atque ab aliis discernendum (§. 185.): ad definitionem itaque sufficiunt.

## §. 187.

Si vel genus definitum fuerit, vel termino, quo denotatur, *Quomodo respondet notio clara, sed confusa; in definitione tantum ponitur terminus, quo genus denotatur, nequaquam ipsius notæ sigillatim enumerantur.* Si enim genus fuit definitum, termino ejus respondet notio completa atque determinata (§. 152.), quæ cum ad ipsum in statu quolibet agnoscendum sufficiat (§. 92.), nec quicquam peregrini admixtum habeat (§. 123.), atque termino audito in memoriam revocari possit (§. 116.); non sane opus est, ut notæ generis in definitione recenscantur. Sufficit ergo in ea poni solum terminum, quo genus denotatur.

Si termino, quo genus denotatur, respondet notio clara, etsi confusa; ea adhuc sufficit ad rem agnoscendam atque ab aliis distinguendam (§. 80. 88.). Integra igitur generis notio habetur pro nota una definiti; atque adeo, cum in definitione notæ enumerandæ sint (§. 153.), terminum, quo genus denotatur, in ea poni sufficit.

Aliter propositionis uterque casus una demonstratur. Genus exhibet similitudinem speciei definiendæ cum aliis (§. 45.) adeoque aliquid rei intrinsicum, quod ei agnoscendæ & a rebus similitudine destitutis discernendæ inservit, consequenter notam definiti constituit (§. 79.). Notionem istius ad eam agnoscendam cum habeat, qui genus definire valet (§. 153.), vel ejus notionem claram, etsi confusam habet (§. 80. 88.); sufficit terminum, quo ea indigitatur, in definitione poni (§. 153.).

E. gr. Si *triangulum* in genere fuit definitum per figuram tribus lateribus comprehensam, fueritque ulterius in specie definiendum *triangulum scalenum*; non opus est, ut figuræ atque numeri ternarii laterum,  
(*Wolfii Logica*) D d rum,

rum, quæ trianguli in genere notæ sunt, expressa mentio fiat; sed sufficit, si triangulum scalenum dicatur triangulum.

## §. 188.

*Quando notas generis & differentia specificæ permisceri liceat.*

*Si genus non fuit definitum, vel quæ ad id pertinent, nondum determinata notione comprehenduntur; in definitione promiscue enumerantur notæ definiti, non attento generis & differentia specificæ discrimine.* Etenim si genus nondum definitum fuit, adeoque determinata notione comprehenditur (§. 152.); nondum discernere licet notas in notione rei distincta ad genus pertinentes a ceteris (§. 123.). Quodsi tamen omnes simul suntæ totidem præcisè fuerint, quod ad rem agnoscendam & ab aliis distinguendam requiruntur; ad definitionem sufficiunt (§. 153.). Eas igitur enumerare licet promiscue, non attento discrimine inter notas generis atque differentia specificæ.

E. gr. Si figura quadrilatera rectilinea in genere non fuit definita, quod sit figura plana quatuor lineis rectis terminata; notas ad genus pertinentes definitioni *Quadrati* in specie inserere licet, ita ut ipsum dicamus figuram planam quatuor lineis rectis ad angulos rectos invicem junctis atque æqualibus terminatam. Similiter si triangulum rectilineum in genere non fuerit definitum, quod sit figura plana tribus lineis rectis terminata; triangulum æquilaterum in specie definiri potest per figuram planam tribus lineis rectis æqualibus terminatam, ut notæ trianguli in genere simul enumerentur in definitione trianguli æquilateri.

## §. 189.

*Quando notarum permixtio non ferenda.*

*Si notas ad genus & differentiam specificam pertinentes discernere valemus; nonnisi terminus genus denotans definitionem ingredi debet, nequaquam autem notæ generis cum notis differentia specificæ sint permiscendæ.* Per definitiones res distincte ad sua genera suasque species reducuntur (§. 179.), ut in dato quolibet casu judicari possit, ad quodnam genus & ad quam speciem ex sint referendæ (§. 48.). Constituuntur autem genera & species rerum, ut judicia accurata formari possint, qualia in philosophia fieri debent (§. 121. *Disc. prælim.*)

id

id quod inferius independenter ab hac propositione ostendetur & hic vel ideo intelligitur, quo iudiciorum in dato casu applicatio requirat, ut constet, quid de genere, quid vero de specie intuitu differentiarum specificarum enuncietur (§. 49.). Quamobrem ubi notæ generis & differentiarum specificarum distingui a se invicem possunt; eas distingui præstat. Nequaquam igitur notæ generis cum notis differentiarum specificarum sunt permiscendæ; sed nonnisi terminus genus denotans in hypothese præsentis in definitionem admittendus.

## §. 190.

In definitione genus proximum seu inferius præfertur remotiori seu superiori. Etenim in definitione notæ ad genus pertinentes non permiscendæ sunt cum notis differentiarum specificarum constituentibus (§. 189.). Enimvero cum genus remotius seu superius aliqua tantum contineat, quæ notio generis inferioris seu proximi speciei definiendæ involvit (§. 47.); si remotius in definitione ponitur, aliqua ad genus spectantia cum iis commisceri debent, quæ differentiam specificam constituunt. Genus adeo inferius, quod definito proximum, seu sub quo idem tanquam species continetur, remotiori vel superiori in definitione præferri debet.

E. gr. Si *triangulum rectangulum* definitur per figuram planam, tribus lineis rectis terminatam, quarum duæ angulum rectum interceptiunt; generis loco ponitur genus remotius, nempe figura plana, quod proximum nempe triangulum tanquam speciem sui sub se continet. Ideo numerus laterum ternarius ad genus spectans cum differentia commiscetur specifica, nempe quod duo latera angulum rectum interceptiant. Enimvero si in definitione trianguli recti genus proximum ponitur, quod est *triangulum*, confusio ista evitatur & trianguli recti definitio concinnior prodit, quod sit triangulum, cujus unus angulus rectus est.

## §. 191.

*Definitio*, per quam non patet rem definitam esse possibilem, *nominalis* dicitur. *Ast definitio*, per quam patet rem definitam esse possibilem, *realis* vocatur.

Dd 2

E. gr.

*Differentia  
definitionis  
nominalis &  
realis.*

E. gr. Si *Circulus* definitur per figuram planam, linea in se redeunte ejus terminatam singula puncta a puncto quodam intermedio æqualiter distant; definitio nominalis est: neque enim ex ea apparet, num istiusmodi figura plana sit possibilis, consequenter an definito respondeat aliqua notio, an vero sit sine mente sonus. Enimvero si idem *Circulus* definitur per figuram, motu lineæ rectæ circa punctum fixum in plano descriptam, ex definitione patet, istiusmodi figuram possibilem esse: definitio itaque realis est. Hoc definitionum nominalium atque realium discrimen docuit *Leibnitius* in *Actis* A. 1684. p. 540. Vulgo voces paulo aliter sumuntur.

## §. 192.

*Differentia  
definitionum  
essentialium  
& accidenti-  
alium.*

*Definitionem essentialem* appello, in qua enumerantur essentialia, per quæ definitum determinatur. *Accidentalem* dico, in qua enumerantur vel attributa, vel quæ per modum attributorum insunt, modorum ac relationum possibilitates, quibus definitum determinatur.

Exempla peti possunt ex antecedentibus (*not. §. 172. & seqq.*). Accommodamus terminos in philosophia Scholastica usitatos ad nostras notiones, quemadmodum *Keplerus* in Astronomia terminos in Astronomia veteri receptos ad suam planetarum theoriā aptavit (*not. §. 147. Disc. pralim.*).

## §. 193.

*Quanam de-  
finitiones sint  
nominales.*

*Definitiones cum essentialibus, tum accidentales sunt nominales.* In definitione essentiali enumerantur essentialia, per quæ definitum determinatur (§. 192.). Enimvero essentialium unum non determinatur per alterum (§. 64.), adeoque non necessario conjunguntur. Quamobrem dum enumerantur, nondum liquet, utrum ens istiusmodi sit possibile, quod per ista essentialia determinatur. Quoniam itaque ex definitione non intelligitur, utrum definitum sit possibile, nec ne; definitio essentialis nominalis est (§. 191.).

Similiter in definitione accidentali enumerantur vel attributa definiti, vel modorum atque relationum possibilitates, quæ per modum attributorum insunt (§. 192.). Enimvero attributa determinantur per essentialia entis (§. 66.), nec mi-

nus

aus possibilitates, quæ per modum attributorum insunt (§. 157.). Essentialibus igitur ignoratis (ignorantur autem, ubi res per attributa atque modos istiusmodi definitur, ceu supra (§. 181. 182.) ostendimus) non constat, utrum ens istiusmodi possibile sit, nec ne, cui ista attributa simul sumta conveniunt, vel in quo istiusmodi relationes ac modi concipi possunt. Quoniam itaque de novo ex definitione non intelligitur, utrum definitum sit possibile, nec ne; definitio accidentalis nominalis est (§. 191.).

Definitiones istæ nominales sunt sensu *Leibnitiano*, quem nos adoptavimus (§. 191.). Nec incongrua est appellatio, cum ex definitionibus essentialibus atque accidentalibus non constet, nisi quod hoc termino istiusmodi notio a nobis denotetur, quæ cum deceptrix esse possit (§. 135.), definitio nos dubios relinquit, num notioni isti ens aliquod respondeat, an nullum. Neque adeo a communi significato prorsus abhorret *Leibnitianus*, cum definitio nominalis vulgo dicatur, quæ termini significatum explicat. Definitio autem, per quam non apparet, num definitum possibile sit, utique nil docet, nisi quod terminum aliquem in hoc sumamus significatu, quem definitio insinuat.

## §. 194.

*Definitio modum exponens, quod aliquid fieri potest, realis* *Definitio*  
*est.* Definitio, quæ modum exponit, quo aliquid fieri possit, *quamam realis.*  
 palam facit, rem definitam esse possibilem, quod per se patet. Si enim ponis, rem esse impossibilem, nullus datur modus, quo ea fieri potest, adeoque nec is exponi potest: id quod hypothesein evertit. Jam definitio illa realis est, per quam patet, quod definitum possibile sit (§. 191.). Realis igitur est definitio, quæ modum exponit, quo aliquid fieri possit.

E. gr. Si circulus dicitur figura, motu lineæ rectæ circa punctum fixum in plano descripta; tum definitio exponit modum, quo circulus gignitur, atque adeo realis est. Similiter si parallelogrammum definitur per figuram planam descriptam motu rectæ, quæ juxta ductum alterius rectæ in plano quiescentis motu sibi semper parallelo de-

orſum fertur; definitio geneſin parallelogrammi exponit, atque adeo realis eſt,

## §. 195.

*Definitio ge-  
netica qua-  
nam.*

*Definitio genetica* dicitur, quæ rei geneſin ſeu modum, quo ea fieri poteſt, exponit. Ut adeo appareat, definitiones geneticas eſſe reales (§. 194.).

Multas iſtiusmodi figurarum definitiones in *Leſſionibus Geometricis* lect. 2. & ſeqq. p. 13. & ſeqq. dedit *Iſaacus Barrowius*, qui inſignem earum uſum abunde commonſtravit. Ejus veſtigia legit *de Tſchirnhaufen* in *Medicina Mentis* part. 2. ſect. 2. p. 92. ubi exempla definitionum geneticarum daturus curvarum deſcriptionem ex focis edocet. Non in moralibus definitionibus realibus utimur, veluti cum *Obligationem* definimus per connexionem motivi cum actione libera. Ex hac enim obligationis definitione innotefcit modus, quo quis obligari poteſt, atque adeo obligatio poſſibilis intelligitur.

## §. 196.

*Notitia ad  
definitionem  
geneticam  
requiſita.*

Ex ipſa autem definitionis geneticæ definitione patet, quod *definitionem geneticam conditurus noſſe debeat cum ea, quæ ad geneſin rei requiruntur; tum quid unumquodque eorum ad eam conſervet.*

E. g. Circuli definitionem geneticam conditurus, noſſe debet 1. ad ejus geneſin requiri punctum & rectam, quorum illud in relatione ad circulum *centrum*, hæc *radius* appellatur; 2. punctum eſſe debere in plano fixum & lineam rectam circa hoc punctum in orbem moveri. Similiter definitionem geneticam ſive realem obligationis conditurus noſſe debet, ad obligationem introducendam requiri actiones liberas & motiva, atque hæc cum iſtis eſſe connectendas, ita ut actio patrari nequeat, niſi quoque ſequatur, quod motivi loco inſervit.

## §. 197.

*Scholion ge-  
nerale.*

Ex hætenus dictis apparet, *definitionem nominalem* eſſe diſtinctam enumerationem notarum ad rem definitam agnoſcendam & ab aliis diſcernendam ſufficientium: *definitionem* vero *realem* ſive *geneticam* eſſe notionem diſtinctam poſſibilitatis, aut, ſi mavis, modi, quo quid poſſibile. Definitiones nominales ſignificatus fixos terminorum conſtituunt, ut eos non tribuamus

mus nisi rebus, quibus indigitandis destinantur, atque earum ope has obvias agnoscamus. Præbent quoque prima ratiocinandi principia, ut quæ de rebus cognosci possunt inde deducantur. Patet hoc ex nostris Analyseos seu Algebrae Elementis, ubi ex æquationibus curvarum, quæ definitionibus nominalibus respondent, deduximus earum proprietates, ipsasque constructiones, quæ definitionibus geneticis respondent. Ipsæ autem geneticæ definitiones hunc inprimis præstant usum, ut, quæ rei definitæ conveniunt, inde facilius deduci possint, utque ratio reddatur eorum, quæ insunt quæque inesse possunt. Definitionum theoriam dedimus prolixam propter utilitatem, quam ea habet. Magnum enim ad veritatem cognoscendam præsidium est in definitionibus collocatum. Patebunt hæc inferius una cum aliis, quibus demonstrandis hætenus tradita nondum sufficiunt. Terminorum usum evitare non licuit, nisi voluissemus in ipso limine consistere. Quare cum præstent veteres, vanum fuisset novos condere. In veritatem unice intenti sumus; non vanitati litamus. Praxin investigandarum notionum distinctarum & condendarum definitionum hic nondum tradere licuit. Supponit ea usum omnium operationum mentis. Eam igitur secunda & tertia operationibus sufficienter explicatis dabimus. Secunda vero & tertia mentis operatio supponit theoriam definitionum, quam adeo iisdem præmitti necesse erat. Habes rationem sufficientem, cur theoriam & praxin non uno loco explicaverimus. Perspicias eam clarius, ubi leges methodi inferius tradendas habueris perspectas. Nec minus hic usui sunt, quæ de methodo philosophica in discursu præliminari præcepimus. In legendis nostris tenenda sunt, quæ suo loco de legendis scriptis dogmaticis methodo scientifica conscriptis docemus. Exempla dedimus mathematica, sed talia, quæ haud multam Geometriæ notitiam supponunt, cum ea sint facillima & extra disputationis aleam posita. Monui tamen jam superius (*or. §. 95.*), ipsam Logicam nostro modo pertractatam suppeditare exempla, quibus regulas suas illustret.

SECT.

SECT. III.

DE

JUDICIO IN SPECIE.

CAPUT I.

DE JUDICIORUM DIFFERENTIA.

§. 198.

Judicii par-  
tes.



*Hinc judicium ex duabus constat notionibus, no-  
tione scilicet rei, cui aliquid tribuitur, vel a qua  
aliquid removetur, & notione illius, quod eidem  
tribuitur, vel ab ea removetur. Patet ex ipsa  
definitione judicii, nec præterea alia demonstra-  
tione opus (§. 39.).*

E. gr. Si quis ait: triangulum habet tres angulos, is notionem  
trium angulorum jungit cum notione trianguli, quod sibi repræsentat  
tanquam figuram planam tribus lineis rectis terminatam. Componi-  
tur itaque judicium ex notione trianguli tanquam rei, de qua judica-  
tur, & notione trium angulorum, qui eidem inesse intelliguntur. Si-  
militer si quis dicit, Deum esse omnipotentem, is notionem debet ha-  
bere Dei, tanquam illius entis, de quo judicat, v. gr. quod eum sibi re-  
præsentet tanquam Autorem universi, & notionem omnipotentiz,  
quam Deo tribuit tanquam attributum.

§. 199.

Enunciatio-  
nis partes.

*Enunciatio constat ex duobus terminis, quorum unus signi-  
ficat rem, de qua judicatur; alter id, quod eidem tribuitur,  
vel ab eo removetur. Enunciatio enim est oratio, qua al-  
teri judicium nostrum significamus (§. 41.). Quoniam ita-  
que judicium duabus constat notionibus, altera scilicet rei, cui  
aliquid tribuitur, altera vero illius, quod eidem tribuitur, vel  
etiam ab ea removetur (§. 198.); in enunciatione adesse debet  
& ter-*



& terminus, quo indigitatur res, de qua judicatur, & terminus, qui significat illud, quod de ea judicatur. In enunciatione adeo duo sunt termini ejus conditionis, quam posuimus in propositione.

E. gr. Si dicis: Deus est omnipotens, duos oratio tua continet terminos, quorum alteri respondet notio, quam tibi de ente isto formas, quod *Deus* dicitur; alteri autem notio alicujus attributi divini. Ast hæc facilia sunt; sed fundamentum tamen eorum, quæ sequuntur.

## §. 200.

Illud, de quo judicatur, dicitur *Subiectum*: quod vero rei *Definitio* sub-  
cuidam tribuitur, vel ab ea removetur, *Prædicatum*. Subje-  
ctum quoque audit terminus, quo res ista indigitatur, de qua *dicti*.  
judicium fertur, & Prædicatum terminus, quo enunciatur,  
quid rei conveniat, vel non conveniat.

E. gr. In propositione *Deus est omnipotens* subiectum Deus est; prædicatum vero omnipotentia, quæ ipsi tanquam attributum tribuitur.

## §. 201.

In enunciatione seu propositione notiones vel conjungun- *Copula defi-*  
tur, vel separantur (§. 40. 41.), atque adeo voce quadam opus *nitio*.  
est, quæ earum nexus, vel separatio indigitatur. Vocula ista, quæ  
nexus prædicati & subiecti significat, dicitur *Copula*. Quod-  
si copulæ præfigatur particula *non*; significabitur notionum se-  
paratio. Utimur autem tanquam copula verbo substantivo.

E. gr. In propositione *Deus est omnipotens* copula est voculæ: *est*: ea  
enim significatur, quod omnipotentia Deo inest atque adeo ad ejus  
notionem pertineat. Quodsi a Deo removenda est imperfectio tan-  
quam quidpiam ipsi repugnans, quod inesse non possit; tum dicimus:  
*Deus non est imperfectus*, ubi copulæ *est* additur particula *non* ad signifi-  
candum remotionem ejus, quod convenire nequit.

## §. 202.

*Copula non est nisi verbum substantivum præsentis temporis. Cautio circa*  
Denotat enim nexus inter subiectum & prædicatum inter-  
cedentem (§. 201.), qualis nempe repræsentatur in ideis no-  
stris. Cum igitur in omni judicio nexus ille semper sit aliquid  
(*Wolfii Logica*) *E* præsens

præfens (§. 40.); copula non esse potest nisi verbum substantivum præfentis temporis.

Dubium videri poterat, quomodo copula semper dici possit verbum substantivum est præfentis temporis, cum etiam occurrant judicia de præteritis & futuris, v. gr. quando dicitur: *Lapis fuit calidus*; item *lapis erit calidus*. Etenim in hoc casu copula non est verbum substantivum præteriti vel futuri temporis *fuit* vel *erit*; sed copula tantum in eo latet: ipsum vero præteritum & futurum denotant statum, in quo subiectum repræsentatur, præteruisse, vel demum venturum. Nimirum iudicium est notio complexa repræsentans subiectum cum suo attributo, modo vel statu (§. 39. 105. 198.). Quemadmodum itaque subiectum per notionem menti exhibetur tanquam præfens, ita quoque istud attributum vel modus exhibetur menti tanquam inexistens vel subiectum tanquam in isto statu. Enimvero dum mens sibi conscia est, subiectum jam non esse præfens illo modo instructum, vel isto in statu constitutum; subiectum isto modo præditum vel illo in statu positum considerat tanquam præteritum, vel futurum. Nexus igitur prædicati vel subiecti semper idem est, sive res, quæ notioni præfenti responderet, consideretur tanquam nunc præfens, sive tanquam præterita vel futura.

#### §. 203.

*Quomodo copula ingrediatur enunciationem.* Copula in propositione vel expresse ponitur, vel in termino, qui ad prædicatum pertinet, latet. Copula est verbum substantivum præfentis temporis (§. 202.). Sed illud verbum in omni propositione non apparet: quod per exempla est manifestum. In his igitur casibus latet in termino ad prædicatum pertinente, cui respondens notio cum notione subiecti coniungenda.

In propositionibus mathematicis copula sæpissime expressa est, veluti cum dicitur: *Tres anguli trianguli sunt æquales duobus rectis*. Nec desunt in communi sermone exempla, veluti cum dicimus: *Aër est frigidus*. Occurrunt vero longe plurimi casus, in quibus copula latet, ut cum dicimus: *Ignis urit*. Hic enim verbum *urit* & prædicatum, & copulam includit. Tribuimus enim subiecto actionem aliquam, quam consideramus tanquam istiusmodi, quæ ab ipso semper proficisci valet. Notio igitur complexa huic iudicio respondens exhibet ignem cum subiecto aliquo habili, in quod actionem istam exercit.

ferit. Unde si iudicium & subiectum, & prædicatum, & utriusque nexum distincte exprimere debet; propositio reducitur ad hanc ipsi æquivalentem: *Ignis est urens*. Patet vero, exempla, in quibus prædicatum includit verbum substantivum præteriti, vel futuri temporis, eodem modo esse explicanda. Scilicet si dicitur: *Lapis fuit* vel *erit calidus*; tum perinde est, ac si diceremus: *Lapis* (quem scilicet nunc cogitamus) *est is*, vel *istiusmodi, qui fuit calidus*. Erunt forsan aliqui, qui quæ de copula latente & nonnisi præsens tempus indicante dicta sunt, intricatas scholasticas reponunt, seculo huic delicato speculationes inutiles nauseanti non convenientes. Enimvero non dicam, quod, qui sic sentiunt; notionem iudicii distinctam minime habeant (§. 39.), nec ejus ab enunciatione discrimen agnoscant (§. 41. 42.); sed hoc unice monuisse sufficit, quod hæc de copula doctrina indispensabilem usum habeat in ratiocinando, quo nec in Logica docente, nec in utente carere possumus lapsus omnes evitaturi, immo in distincta quoque iudiciorum cognitione. Patebit illud ex inferioribus, ubi artis ratiocinandi principia sumus explicaturi: hoc vero mox evadet manifestum. Tradimus igitur de copula, quæ vera sunt, & usum præsentissimum spondent.

## §. 204.

Notiones vel conjunguntur, vel separantur, dum iudicamus (§. 40.). Notionum conjunctio dicitur *iudicium affirmativum*; Notionum separatio *negativum*. Unde porro apparet, quænam enunciatio sive propositio dici debeat affirmativa, quænam negativa. Nimirum *Enunciatio* seu *propositio affirmativa* est, in quo prædicatum tribuitur subiecto: *Propositio* autem *negativa*, in qua prædicatum removetur a suo subiecto.

*Definitio iudicii ac enunciationis affirmativæ ac negativæ.*

E. gr. *Propositio affirmativa* est: *triangulum habet tres angulos duobus rectis junctim æquales*, vel *Deus est conditor hujus universi*. *Propositio negativa* est: *Triangulum rectilineum non habet duos angulos actus rectos*, vel *Deus non est autor peccati*.

## §. 205.

*Affirmare* igitur idem est ac prædicatum aliquod tribuere cuidam subiecto, vel significare, quod prædicatum subiecto conveniat: *Negare* vero idem est ac prædicatum aliquod remove a suo subiecto, vel significare, quod prædicatum subiecto

*Definitio affirmationis, & negationis.*

non conveniat. Aque adeo constat, quid sibi velit *affirmatio* & *negatio*.

Nulli hic occurrunt termini, nisi qui in antecedentibus fuere explicati. Quamobrem si quis notionem iudicii (§. 39.) & enunciationis (§. 41.), una cum iis, quæ de subiecto, prædicato atque copula (§. 200. & seqq.) fuere in medium prolata, animo recolit; is satis intelligit, quid sit prædicatum tribuere subiecto, vel ab eodem remove, & quid sit convenire subiecto, vel eidem non convenire. Ex hoc exemplo intelligitur, quam necessarium sit ad intelligendum definitiones sequentes, ut familiares sint antecedentes, & quomodo neglectus antecedentium efficere possit, ut videamur idem explicare per idem (§. 168.) aut prorsus obscurum per æque obscurum.

## §. 206.

*Affirmationis  
signum.*

*Affirmationis signum est copula.* In affirmatione enim significatur notionem prædicati jungendam esse notioni subiecti (§. 205.), hoc est, quod notioni prædicati respondet, vel tanquam subiecto intrinsecum, vel tanquam ad idem pertinens representari debere (§. 34.). Nexum vero istum significat copula (§. 201.). Quamobrem copula est signum affirmationis.

E. gr. Propositio affirmativa est: *Deus est vindex malorum actionum*. Affirmationem hic indicat copula *est*. Similiter affirmativa est propositio: *Triangulum habet tres angulos duobus rectis æquales*. Sed hæc propositio æquivalet alteri: *Triangulum est figura habens tres angulos duobus rectis æquales*. Quamobrem denuo copula inclusa verbo *habet* ad prædicatum spectanti est signum affirmationis.

## §. 207.

*Negationis  
signum.*

*Negationis signum est particula negandi copulæ præfixa.* In negatione enim significatur, prædicatum subiecto non convenire (§. 205.), seu ejus notionem cum notione subiecti non posse conjungi (§. 204.). Nexum istum, quem non posse admitti significamus, cum copula significet (§. 201.); particula negandi eidem præfigenda est, ut significetur, nexui isti nullum esse locum concedendum.

E. gr. Negativa est propositio: *Deus non est autor peccati*. Copulæ *est* præfigitur particula negandi *non*: quo ipso significatur, non posse admitti nexum inter notionem Dei atque notionem auctoris peccati, ita

ita ut ambæ simul sumtæ constituent aliquam notionem complexam, qualis omne iudicium esse solet. Hinc apparet, quid sibi velit canon scholasticorum: *In propositione negativa negatio afficere debet copulam.*

## §. 208.

*Si negandi particula non refertur ad copulam, sed ad prædicatum, vel subiectum; propositio negativa non est, sed aliquam ejus saltem speciem habet.* Signum enim negationis est particula negandi copulæ præfixa (§. 207.). Ubi ergo eadem ad copulam non refertur, sed vel ad prædicatum, vel ad subiectum; ibi copulæ nulla particula negandi præfigitur, adeoque nulla negatio significatur. Propositio itaque negativa esse nequit (§. 204.).

E. gr. Notam possibilitatis constituimus, quod nullam involvat contradictionem. Quamobrem si dicas: *Notio trianguli æquilateri non involvit contradictionem*; particula negandi ad prædicatum quidem refertur, sed non ad copulam. Etenim perinde est ac si diceres: *Notio trianguli æquilateri est notio non involvens contradictionem*. Propositio adeo tantum speciem mentitur negativæ. Revera enim significatur, definitionem possibilis convenire notioni trianguli æquilateri, atque adeo affirmativa est propositio (§. 204.).

## §. 209.

*Propositio, quæ speciem negativæ habet, sed revera affirmativa est, infinita dicitur.* *Definitio propositionis infinitæ.*

Talis est propositio paulo ante allata: *Notio trianguli æquilateri non involvit contradictionem*, si ita eam interpretari deberemus, *notio trianguli æquilateri est notio contradictionem non involvens*. Caveas vero denuo, ne inter tricas scholasticas referas, quæ de propositione infinita & ejus fundamento (§. præf. & præc.) dicuntur. Etenim artis ratiocinandi regulæ nec intelligi, nec dextre ubivis applicari possunt, nisi ad notionem propositionis infinitæ attendas. Qui ex notione ratiocinii regulas ratiociniorum deducit, quemadmodum in sequentibus faciemus; is necessitatem notionis propositionis infinitæ reipsa experietur.

## §. 210.

*Particula negandi vel exprimitur in propositione negativa, aut infinita, vel in voce ad subiectum, aut prædicatum* *Particula negandi quomodo*

*ingrediatur* *zum pertinente latet.* Patet per exempla asserti veritas, nec alia  
*propositio-* hic opus est demonstratione.  
*nem.*

In exemplo paulo ante allato (*not.* §. 208.) particula negandi expresse ponitur, nec non in aliis propositionum negativarum superius (*not.* §. 204. 207.) datis. Enimvero si dixeris: *Nullus hominum in omnibus est sapiens*, particula negandi includitur voci ad subiectum pertinenti, utut ad copulam pertineat; idem enim est ac si diceres, *omnis homo non est sapiens in omnibus*. Similiter si dixeris: *Bruta carent ratione*; particula negandi latet in verbo *carent* ad predicatum pertinente: etenim perinde est ac si diceres, *bruta non habent rationem*.

## §. 211.

*Definitio no-*  
*tionis & ter-*  
*mini positivi*  
*ac negativi.*

*Notio positiva* dicitur, quæ constat notis realitates denotantibus; contra *Negativa notio* vocatur, quæ a re representata removet realitates, seu earum absentiam tanquam notas rei exhibet. *Terminus positivus* est, qui notionem positivam denotat: *Terminus autem negativus*, qui notionem negativam significat.

*Terminus positivus* realitatem denotat; negativus realitatis absentiam (§. 37.). E. gr. *Triangulum rectilineum* concipimus figuram planam tribus lineis rectis terminatam. *Notio igitur positiva* est & *terminus triangulum rectilineum*, quo ea significatur, itidem positivus. Enimvero *immaterialis* dicimus, quod ex materia non constat, seu juxta *Cartesianos*, quod nullam habet extensionem; *notio igitur ejus negativa* est & *terminus immaterialis* negativus. Cavendum vero, ne ex regulis Grammaticis judicemus, an terminus positivus sit, an negativus: fieri enim potest, ut terminus habeat formam negativi & tamen propter notionem positivam ipsi respondentem censeretur positivus, & contra ut terminus habeat formam positivi & tamen propter notionem negativam ipsi respondentem sit negativus. E. gr. *Terminus ens infinitum* est vi Grammaticæ negativus, at si definitur per *ens*, in quo omnia insunt per modum actus, *notio eidem positiva* respondet, atque adeo positivus censeretur debet.

## §. 212.

*Quando ter-*  
*minus nega-*  
*tivus propo-*  
*sitionem*

*Si terminus negativus ita ingreditur propositionem, ut negatio ipsi inherens ad copulam referatur; propositio negativa est, in casu reliquo affirmativa.* Etenim si in propositione occurrit terminus negativus, negativa eidem notio respondet (§. 211.).

(§. 211.). Enimvero in notione negativa realitates a subiecto *efficiat nega-*  
remouentur (§. cit.), atque adeo terminus negationem includit *tivam.*

(§. 205.). Quodsi ergo negatio ad copulam in propositione,  
quam is ingreditur, refertur; ea utique negativa est (§. 207.). Si  
vero copulam non afficit, pro affirmativa habenda, utut negativa  
appareat (§. 208.).

E. gr. Si dicis: *Anima est immaterialis*, propositionem ingreditur  
terminus negativus *immaterialis*, suppono enim ei non respondere nisi  
notionem negativam, scilicet materiae carentiam (§. 211.). Duplici au-  
tem modo interpretari licet propositionem, vel ut æquipollet huic:  
*anima non est materialis*, vel ut æquivalet alteri: *anima est ens, quod non*  
*est materiale*. In priori casu negatio ad copulam refertur, in postero-  
ri eandem non afficit. In priori ergo casu negativa est, in posteriori  
infinita & affirmativæ æquipollet. Multo minus autem propositio ne-  
gativa censeri debet, quam tantum ingreditur terminus, qui negativus  
apparet vi originis (not. §. 211.). E. gr. Si quis dicit: *Deus est infinitus*  
atque infinitudinis datur notio positiva, tum propositio ista affirmativa  
est, nec unquam eam negative interpretari licet.

#### §. 213.

Si subiecto & prædicato eadem respondet notio, *Propositio Propositionis*  
dicitur *identica*. *identica defi-*

E. gr. Si quis voci *Deus* non aliam jungit notionem, quam quod sit *nitio.*  
creator universi, & Deo tanquam subiecto propositionis jungit prædica-  
tum, quod creaverit hoc universum; propositio *Deus creavit universum*  
identica est. Etenim idem est ac si diceret: *Creator universi creavit*  
*universum* seu *Creator universi est creator universi*. Patet itaque propo-  
sitionem posse esse identicam, quæ talis non apparet. Interim dantur  
propositiones identicæ, ubi identitas subiecti & prædicati per se patet,  
veluti cum dicitur: *Homo est homo*. Ubi esse in ratiocinando propo-  
sitiones identicæ, suo patebit loco.

#### §. 214.

*Definitio est propositio identica*. In definitione enuncia- *Definitiones*  
tur notio definitio conveniens tanquam prædicatum de suo sub- *quæ locum*  
iecto (§. 152 200.). Subiecto itaque atque prædicato eadem *inter proposi-*  
notio respondet, consequenter definitio identica propositio est *tionem tucan-*  
(§. 213.). *tur.*

Cum

Cum definitionum usus in ratiocinando in dubium vocari nequeat (§. 48.); eo ipso patet, propositiones identicas suum in ratiocinando habere usum.

## §. 215.

Propositionis  
categorice  
fundamen-  
tum.

*Attributa & essentialia, nec non modorum atque relationum possibilitates, quæ per modum attributorum insunt, prædicantur absolute de suo subiecto.* De essentialibus & attributis idem demonstratum est superius (§. 69.). Modorum atque relationum possibilitates, quæ per modum attributorum insunt (§. 157.), constanter insunt. Quæ vero constanter insunt, ea de subiecto absolute enunciantur (§. 61.). Patet itaque, ut attributa & essentialia; ita quoque modorum atque relationum possibilitates, quæ per modum attributorum insunt, absolute, hoc est, nulla adjecta conditione, enunciari de subiecto.

E. gr. Omnipotentia est attributum Dei. Quamobrem nulla adjecta conditione dicitur: *Deus est omnipotens.* Habere tres angulos duobus rectis æquales seu ratio dupla omnium angulorum simul sumtorum ad rectum est attributum trianguli. Dicimus itaque: *Triangulum habet tres angulos duobus rectis æquales.*

## §. 216.

Definitio  
propositionis  
categorice.

*Propositio categorica* est in qua prædicatum absolute, seu nulla adjecta conditione, de subiecto enunciat.

E. gr. *Deus est sapientissimus* propositio categorica est: sapientia enim Deo tribuitur absque ulla adjecta conditione. Similiter theorema *Pythagoricum* propositio categorica est, quia *Hypothemusa quadratum æquale* pronunciat *quadratis laterum simul sumtis*: hæc enim constans hypothenusæ ad latera relatio, trianguli rectanguli attributum, sine ulla adjecta conditione enunciat de hac triangulorum specie.

## §. 217.

Propositionis  
hypothetica  
fundamen-  
tum.

*Modi atque relationes & quod in re quadam non concipiatur possibile nisi præsupposito quodam ejus modo; de subiecto suo non nisi conditionate enunciantur.* De modis idem demonstratum est in superioribus (§. 69.). Relationes sunt extrinsecæ, adeoque a comparæntia rerum aliarum pendent. Sed quæ mutabilia sunt, ea non nisi de subiecto suo sub



sub certa conditione enunciari possunt (§. 62.). Modi igitur atque relationes ad alia nonnisi sub certa conditione de subiecto suo enunciantur.

Quicquid in subiecto non concipitur possibile nisi præsupposito quodam ejus modo, id instar alicujus modi eidem inest (§. 158.). Enimvero modi nonnisi sub certa conditione prædicantur de subiecto suo, quemadmodum modo ostendimus. Ergo quod in subiecto non concipitur possibile nisi præsupposito quodam ejus modo, id nonnisi sub adjecta conditione de eodem prædicari potest.

E. gr. Calor est modus quidam lapidis, adeoque de lapide non potest prædicari nisi sub certa conditione, nempe quod vel radiis solaribus, vel calori ignis fuerit expositus. Unde propositio hæc erit: Si lapis radiis solaribus fuerit expositus, calidus est. Eodem modo ratio subdupla trianguli ad parallelogrammum nonnisi sub certa conditione enunciari potest de triangulo, nempe si fuerit cum eodem super eadem basi & inter easdem parallelas constitutum.

## §. 218.

*Propositio hypothetica* est, in qua prædicatum tribuitur subiecto sub adjecta conditione. *Definitio propositionis hypotheticæ.*

E. gr. *Si homo crebris exercitiis operam navat, habitum sibi comparat*, propositio hypothetica est. Talis etiam est sequens: *Si lapis ex turri decedit alta, impetum ingentem acquirit, seu magna celeritate movetur.*

## §. 219.

*Si quod per alterum determinatur, id ideo de subiecto prædicatur, quia hoc alterum eidem convenit.* *Fundamentum modi prædicandi.* Propositio per se patet, & sine demonstratione admittitur.

Si difficultatem experiaris in ea admittenda, cogites velim, id quod per alterum determinatur, ideo inesse, quia inest hoc, per quod determinatur. Quare cum prædicatum denotet illud, quod subiecto inest (§. 200.); ideo quoque id, quod per alterum determinatur, ideo de subiecto prædicatur, quia ipsi hoc alterum convenit. Hinc Scholastici dixere: *modum prædicandi sequi modum essendi.* Quod inest subiecto, propterea quod alterum inest; id quoque de eodem prædicatur, quia alterum in eo supponitur. Exemplo res manifesta. *Triangulum æquilaterum est æquiangulum*, quia æquilaterum: propterea quod

(Holsii Logica)

FF

## Part. I. Sect. III. Cap. I.

quod angulorum æqualitas per æqualitatem laterum determinatur. Angulorum itaque æqualitas de hac figurarum speciei ideo prædicatur, quia eidem convenit laterum æqualitas. Neque vero solum valet præsens effectum, si prædicatum determinatur per intrinseca subjecto; sed idem locum habet semper, cum nulla conditio exprimitur, atque adeo quoque si illud per extrinseca determinatur. Exemplo denuo res est manifesta. *Lapis ex alta turri delapsus magnum impetum acquirit*, quia ex tanta altitudine delabitur: propterea quod magnitudo impetus determinatur per altitudinem, per quam delabitur. Imperus adeo magnus prædicatur de lapide ex turri alta delapso, quia ex ista altitudine delapsus fuit.

### §. 220.

*Modus prædicandi attributa propria.*

*Attributa propria prædicantur de subjecto sub conditione essentialium ejus.* Attributa propria per omnia essentialia simul sumta determinantur (§. 66.). Ergo de subjecto ideo prædicantur, quod ipsi hæc essentialia conveniunt (§. 219.), consequenter sub conditione essentialium.

Attributum proprium trianguli rectilinei est ratio dupla angulorum omnium simul ad rectum (not. §. 66.). Ea igitur de triangulo rectilineo prædicatur, quia terminatur tribus lineis: sunt enim numerus ternarius laterum & species rectarum linearum determinationes essentielles hujus trianguli (not. §. 64.).

### §. 221.

*Modus prædicandi attributa communia.*

*Attributa communia prædicantur de subjecto sub conditione essentialium nonnullorum, quæ cum aliis entibus eidem sunt communia.* Attributa communia determinantur per unum, vel aliquot essentialia (§. 66.). Ergo de subjecto ideo prædicantur, quod eidem unum istud, vel plura hæc essentialia insunt (§. 219.), consequenter sub conditione istius, vel horum essentialium. Enimvero quoniam omnia essentialia simul subjectum determinant, ut hoc præcisè ens sit, non aliud; idem unum essentialia, vel aliquot eorum cum entibus aliis communia habet. Quamobrem attributa communia de subjecto prædicantur sub conditione essentialium, quæ cum aliis entibus eidem communia sunt.

Nihil

Nihil difficultatis experietur, qui familiaria sibi reddidit, quæ de generum & specierum atque individuorum determinatione demonstrata sunt in superioribus (§. 70. & seqq.). Exempli loco est theorema geometricum: *Triangulum rectilineum habet tres angulos*. Nam numerus ternarius angulorum est attributum commune (not. §. 66.), atque adeo prædicatur de triangulo rectilineo, quatenus inter determinationes essentielles refertur numerus ternarius laterum, qui est ipsi cum triangulo sphaerico & alio quocunque curvilineo atque mixtilineo communis.

## §. 222.

*Possibilitates, quæ insunt per modum attributorum priorum, prædicantur de subiecto sub conditione omnium essentialium.* Determinantur enim per omnia essentialia simul (§. 157.), atque adeo eodem, quo ante (§. 220.), modo ostenditur, quod de subiecto non prædicentur nisi sub conditione omnium essentialium. Modus prædicandi ea, quæ insunt per modum proprietatum.

E. gr. Si dicitur: *Triangulum circulo inscribi potest*; ista inscribilitas instar proprietatis trianguli consideratur; prædicatur autem de eo, ceu ex elementis constat, propterea quod tribus lineis concurrentibus terminatur, adeoque propter essentialia (not. §. 64.).

## §. 223.

*Si subiectum per essentialia definitur, & aliquod-vel quædam eorum de eodem prædicantur; propositio identica est.* Quoniam enim essentialia unum per alterum non determinatur (§. 64.), unum propter alterum de subiecto prædicari nequit (§. 219.). Cum itaque præter essentialia in definitione nil contineatur per hypotesin; ideo quod de subiecto prædicatur, essentialia propter seipsum eidem tribuitur. Subiecto adeo & prædicato eadem notio respondet, consequenter definitio identica est. Essentialium prædicatio quomodo propositiorem pariat identicam.

E. gr. Essentialia, per quæ figura regularis determinatur, sunt laterum & angulorum æqualitas. Quoniam angulorum æqualitas per laterum æqualitatem non determinatur, cum his existentibus æqualibus illa inæqualia esse queant; angulorum quoque æqualitas propter laterum æqualitatem de figura regulari enunciari non potest. Prædicatur igitur de eadem propter se ipsam, adeoque si dicis: *Figura regularis habet omnes angulos aequales*, perinde est ac si diceres: *Figura habens omnes angulos aequales habet omnes angulos aequales*, adeoque

utique identica est. Quod vero istiusmodi propositiones non appareant identicæ, vel inde est, quod definito jungimus notionem confusam, vel quod ipsum nobis familiare reddidimus, ut ad notionem ei convenientem prorsus non attendamus: etenim in utroque casu non animadvertimus, quod in definitione subjecti prædicatum jam contineatur.

## §. 224.

*Quando non  
pariant.*

*Si subjectum per attributa definitur, vel per modorum atque relationum possibilitates, quæ per modum attributi insunt; essentialia de eodem prædicantur propter attributa vel ea, quæ attributorum vicem subeunt.* Sicuti enim attributa (§. 65.) & suppositæ modorum atque relationum possibilitates (§. 157.) per essentialia determinantur; ita vicissim positis attributis vel istis modorum atque relationum possibilitatibus, ponuntur quoque essentialia, ut adeo sumtis attributis vel illis possibilitatibus tanquam primis per ea determinantur essentialia. Quamobrem si subjectum per illa definitur & hæc de eodem prædicantur, quemadmodum hypothesis requirit, essentialia prædicantur de subjecto propter attributa vel possibilitates eis æquivalentes, quæ definitionem ingrediuntur (§. 219.).

E. gr. Parallelogrammo per modum attributi seu proprietatis convenit divisibilitas in duo triangula æqualia per diagonalem facta. Essentialia autem, per quæ figuræ istæ determinantur, sunt laterum numerus quaternarius & parallelismus. Quodsi ergo *parallelogrammum* definias per figuram planam in duo triangula æqualia per diagonalem divisibilem & postea affirmes: *Parallelogrammum habet latera opposita parallela*; parallelismus laterum de eo prædicatur ob divisibilitatem in duo triangula æqualia per diagonalem.

## §. 225.

*Quanam  
conditio in  
propositioni-  
bus categori-  
cis tacite sup-  
ponatur.*

*Quæ de subjecto absolute prædicantur, eadem ipsi tribuuntur sub definitionis conditione, nempe ideo subjecto dicitur convenire prædicatum, vel etiam repugnare, quod eidem definitio competit.* Quæ enim de subjecto absolute prædicantur, ea sunt vel attributa & essentialia, vel modorum atque relationum possibilitates, quæ per modum attributorum insunt

(§. 69.

(§. 69. 215.). Enimvero attributa tam propria (§. 220.), quam communia (§. 221.) & quæ per modum istorum attributorum insunt, modorum atque relationum possibilitates (§. 222.) propter essentialia; contra essentialia propter attributa & ea, quæ per modum ipsorum insunt (§. 224.) prædicantur. Quamobrem cum in priori casu subjectum per essentialia (§. 180.), in posteriori autem per attributa aut talia, quæ per modum attributorum insunt (§. 181. 182.) definiatur; evidens est, quæ de subjecto absolute prædicantur, eadem ipsi tribui sub conditione definitionis.

E. gr. In propositione *Deus est omnipotens* omnipotentia Deo tribuitur sub conditione definitionis, v. gr. a *Cartesiano* ideo, quod sit ens perfectissimum. Cur vulgo id non animadvertamus, ratio prorsus eadem est, quam paulo ante (not. §. 223.) allegavimus, cur propositiones identicæ subinde tales non appareant. In Mathematicis, ubi subjecta ante fuerunt definita, quæ propositionem ingrediuntur, res semper manifesta est.

## §. 226.

*Propositiones categoricæ æquivalent hypotheticis & ad eas Categoricæ reduci possunt.* In propositione categorica prædicatum absolute, seu nulla adjecta conditione, de subjecto enunciatur (§. 216.). Enimvero quæ de subjecto absolute prædicantur, ea de eodem non enunciantur nisi sub conditione definitionis, etsi conditio nulla exprimitur (§. 225.). In propositionibus igitur categoricis, quamvis nulla adjiciatur conditio, subjecto tamen non competit prædicatum nisi sub conditione definitionis. Categoricæ adeo propositiones hypotheticis æquivalent (§. 218.) & si conditio in definitione subjecti contenta exprimitur, ad hypotheticas reducuntur.

E. gr. *Propositio categorica est: Figura regularis circulo inscriptibilis.* Enimvero per subjectum *Figuram regularem* intelligimus figuram planam æquilateram & æquiangulam. Quamobrem propositio categorica hypotheticæ huic æquivaler: *Si figura plana fuerit æquilatera & æquiangula; Circulo inscribi potest.* Immo hæc reductio etiam fieri solet in theorematibus demonstratione: id quod eam in Elementis Geometriæ evolventi ac perpendenti manifestum evadet. Notandum nimirum

rum, quod inferius clarius constabit, non inanis subtilitatis captandæ gratia hæc doceri, quæ de diverso modo prædicandi fuere in medium allata; sed ea usum indispensabilem habere cum in theorematibus investigandis, tum in iis demonstrandis. Similiter propositio categorica est: *Deus creavit mundum*. Sed cum nomini Dei respondere debeat aliqua definitio, ne sit sine mente sonus; si ea distincte exprimitur: habebis propositionem hypotheticam. E.gr. Si cum *Cartesians* definias *Deum* per ens perfectissimum; propositio hypothetica erit: *Si Deus est ens perfectissimum, ipse mundum creavit*. Quod si cum nobis *Deum* definias per ens a se, quod in se continet rationem sufficientem existentia contingentis universi, prout nempe nostra de existentia & attributis divinis a contingentia derivata demonstratio requirit; propositio hypothetica talis erit: *Si Deus est ens a se, quod in se continet rationem sufficientem existentia contingentis universi; mundum creavit*. Qui in demonstrationibus cum attentione ad modum demonstrandi versati sunt, iis dubium quoddam suboriri poterat: neque enim in propositionibus categoricis demonstrandis semper recurritur ad definitionem sed ad propositiones alias categoricas in anterioribus demonstratas. Enimvero dubium revera nullum est, quod prima specie non contemnendum videtur. Etenim & præsens, quæ demonstranda est, propositio categorica, & præcedentes omnes, si ad hypotheticas reducantur, eandem hypothesin habent, quæ termino subiectum constituyente indigitatur. Quamobrem si ad propositiones categoricas ejusdem subiecti anteriores recurritur; id quidem fit vi communis hypotheseos, quemadmodum in hypotheticis expressis accidit. Sed ea clarius evadent ex inferioribus, ubi de demonstratione sumus acturi. Hic saltem discutiendæ sunt præjudiciorum nebulæ, ne tanquam inutilia contemnantur, quæ magnum momentum in Logica utente trahunt.

## §. 227.

Quando propositio hypothetica formam categoricam habeat.

*Si conditio, sub qua prædicatum convenit subiecto termino concreto absque particula conditionali subiecto adjecta exprimitur; propositio habet formam categoricam, etsi revera sit hypothetica.* Etenim si prædicatum subiecto non absolute convenit, sed sub quadam conditione, non ideo conditio cessat, quod particula conditionalis non expresse ponatur. Manet igitur propositio hypothetica (§. 218.).

Quoniam tamen particula conditionalis non expresse ponitur,

nitur, sed in vocibus ad subjectum pertinentibus latet; ideo propositio formam categoricæ habet.

E. gr. Si dicis: *Lapis ex alto delapsus ingentem impetum habet*; propositio categoricæ formam habet (§. 216.). Sed latet particula conditionalis in vocibus *ex alto delapsus*: id quod clarius constat, si propositionem in hanc hypotheticam resolves: *Si lapis ex alto delapsus fuit, ingentem impetum habet*. Similiter propositio: *Lapis calidus calefacit* categoricæ formam habet: latet autem particula conditionalis si in voce *calidus*. Nam propositio æquipollet hypotheticæ sequenti: *Si lapis est calidus, calefacit*.

§. 228.

Quod subjecto adjicitur ad determinandum ejus statum, *Determinationis subjecti* in quo prædicatum ei tribui potest, dicimus *Determinationem* *et definitio.* *subjecti.*

Nimirum si prædicatum subjecto non semper competit, neque adeo vi definitionis eidem tribui potest; per definitionem sufficienter determinatum non est. Quod igitur adea, quæ constanter eidem insunt, accedere debet, ut fiat subjectum habile in propositione data, id ulterius idem determinat. Unde quoque a nobis *subjecti determinationem* appellatur. E. gr. Lapis non calefacit, quatenus lapis est, sed quatenus ipse calidus. Per definitionem itaque, qua in esse suæ speciei determinatur, subjectum nondum sufficienter determinatum est, ut actus calefaciendi de eodem prædicari possit. Quamobrem accedat opus est determinatio ulterior, quæ hic sumitur a modo, qui non constanter inest, nempe a calore. Unde dicimus: *Lapis calidus calefacit*, ubi terminus concretus *calidus* novam addit lapidi determinationem, qua constituitur in eo statu, ubi actus calefaciendi de eodem prædicari potest. Similiter in propositione: *Lapis ex alto delapsus ingentem impetum habet*, prædicatum non tribuitur subjecto, quatenus per definitionem in esse suæ speciei determinatur; sed propter lapsum ex alto. Hic igitur constituit determinationem subjecti.

§. 229.

*Determinationes subjecti vel desumuntur a modis, vel a Determinationibus extrinsecis.* Quæcunque rebus insunt, vel essentialia *et unde desumantur.* sunt, vel attributa, vel modi (§. 64. 65. 67.): quæ vero in iis possibilia intelliguntur, ea insunt vel per modum attributorum (§. 157.), adeoque ad attributa referuntur, vel instar modo-

rum

rum (§. 158.), adeoque simul sub iis comprehenduntur, quatenus nempe possibilitatem concipimus tanquam quidpiam rei intrinsecum (§. 155.). Essentialia & attributa, quæque iis æquivalent, vel ingrediuntur definitionem (§. 180. 181. 182.) vel de subiecto absolute prædicantur (§. 220. 221. 222.) atque adeo vi definitionis (§. 225.), consequenter adesse intelliguntur, ubi definitio locum habet. Nullam igitur subiecti determinationem in enunciationibus constituunt (§. 228.).

Enimvero modi mutabiles sunt (§. 67.), neque adeo constanter insunt. Quamobrem si prædicatum non convenit subiecto, nisi quatenus modus iste inest; is utique in enunciatione exprimendus, ut status intrinsecus subiecti determinetur, in quo prædicatum ei convenire potest. Subiecti igitur determinatio sumitur a modo (§. 228.). Similiter quæ extrinseca sunt subiecto, ea ipsi non constanter adsunt: quod experientia notum sumimus. Quamobrem si prædicatum non convenit subiecto, nisi in relatione ad res quasdam extrinsecas & quatenus ab iis pendet; status ille extrinsecus in enunciatione determinari debet, in quo illi prædicatum tribui potest. Adeoque determinatio subiecti sumitur a rebus extrinsecis (§. 228.). Quoniam itaque præter ea, quæ subiecto vel intrinseca, vel extrinseca sunt, alia concipi non possunt, ab intrinsecis vero aliarum determinationes peti nequeunt, nisi a modis, quemadmodum jam ostendimus; determinationes subiecti vel a modis, vel a rebus extrinsecis petendæ sunt.

Exempla (not. §. 228.) allata propositionem præsentem abunde illustrant. Etenim in propositione: *Lapis calidus calefacit* determinatio subiecti petitur a modo, nempe a calore: in propositione autem altera: *Lapis ex alto delapsus ingentem habet impetum* determinatio subiecti sumitur partim a modo, motu nempe lapidis, partim a rebus extrinsecis, ad quas motus iste refertur, nempe ab altitudine, per quam delapsus impetum motus acceleratione acquisivit. In hac vero propositione: *Lapis radiis solaribus expostus fit calidus*, determinatio subiecti sumitur a re extrinseca, causa nempe calefaciente. Similiter in propositione geometrica elementari: *Parallelogramma super eadem basi & inter-*  
eandem



*earum parallelas constituta equalia sunt* determinatio subiecti sumitur ab eo, quod ipsi extrinsecum est: neque enim ad parallelogrammum pertinet, ut cum alio super eadem basi & inter easdem parallelas constituitur.

§. 230.

*Determinationes subiecti æquivalentes* appello, quarum una alteri salvo prædicato substitui potest. Unde simul patet, *Determinationis æquivalentis non valentis definitio* quænam e contrario dicendæ sint *determinationes subiecti non valentis definitio* æquivalentes vel diversæ, nempe illæ, quarum una alteri salvo prædicato substitui nequit.

E. gr. Si parallelogramma eandem habent basin atque altitudinem aut, quod perinde est, bases & altitudines æquales; tum super eadem basi & inter easdem parallelas constitui possunt. Et vice versa si super eadem basi & inter easdem parallelas constituuntur, altitudines & bases æquales habent. Quamobrem determinationes subiecti æquivalentes sunt *constitui inter easdem parallelas super basi eadem & bases atque altitudines æquales habere*, atque ideo una alteri salvo prædicato substitui potest. Perinde nimirum est, sive dicas: *Parallelogramma super eadem basi & inter easdem parallelas constituta equalia sunt*; sive affirmes: *Parallelogramma basium & altitudinum æqualium equalia sunt*. Nolle determinationes æquivalentes usui est cum in demonstrando, tum in inveniando. Quamobrem præter nomen res quoque ipsa declaranda nobis est. Ea fini addimus propositionem sequentem.

§. 231.

*Si due fuerint subiecti ejusdem determinationes & earum Quenam de una posita altera quoque eidem sit tribuenda; erunt determinationes æquivalentes.* Si enim determinationes ita fuerint comparatæ, ut una posita altera quoque eidem subiecto sit tribuenda; quæ de subiecto unius gratia enunciantur, eadem quoque respectu alterius enunciari possunt. Si dubitas: demon-

stratio facilis. Etenim si determinatio A tribuitur subiecto, etiam eidem tribuenda est altera B *per hypothesin*, atque adeo ubi A adest, ibi etiam adesse intelligitur B. Enimvero ubi A adest, ibi locum habet prædicatum, denuo *per hypothesin*. Ergo ubi B adest, ibi quoque locus est prædicato. Scilicet altera determinatio B habet se ad priorem A per modum prædicati

(Wolfs Logica)

Gg

subiecto

subiecto sub determinatione A tribuendi, sub qua ipsi tribuitur prædicatum alterum C. Unde determinatio B & prædicatum C habent se ad subiectum sub determinatione A per modum duorum, attributorum, quæ una insunt necessario, ut adeo unum possit dici inesse, propterea quod alterum inest. Quoniam itaque salvo prædicato C determinatio B in locum alterius A substitui potest; determinationes B & A æquivalentes sunt (§. 230.).

Propositionem illustrat exemplum præcedens, in quo Parallelogrammi determinatio A, quod constituatur super eadem basi & intra eadem parallelas cum altero, si sumatur, locum quoque habet altera B, quod bases & altitudinis utriusque parallelogrammi sint æquales. Quamobrem prædicatum C, quod parallelogramma sint æqualia, non minus locum habet sub determinatione subiecti B, quam sub determinatione A (not. §. præc.).

## §. 232.

*Prædicata  
speciei singu-  
lis indivi-  
duis commu-  
nia*

*Quod de specie absolute prædicatur, illud etiam prædicari potest de singulis individuis sub ea comprehensis.* Quod de specie absolute prædicatur, illud de eadem enunciatum sub conditione definitionis (§. 225.), consequenter quia hæc species est (§. 179.). Enimvero ea, per quæ species constituitur, singulis individuis sub ea contentis communia sunt (§. 44.). Quamobrem id, per quod prædicatum determinatur, in singulis individuis deprehenditur, adeoque idem prædicatum singulis individuis tribui potest (§. 219.).

E. gr. De triangulo æquilatelo absolute prædicatur, quod sit æquiangulum, adeoque quatenus triangulum æquilaterum est. Nemo igitur dubitat, quin quodvis triangulum æquilaterum in singulari sit æquiangulum.

## §. 233.

*Prædicata  
specierum  
conditionata  
quomodo in-  
dividuis ap-  
plicanda.*

*Quod de specie sub certa conditione prædicatur, id de individuis ejusdem speciei prædicari potest, penes quæ eandem conditionem locum habet.* Quod de specie sub certa conditione prædicatur, id eidem tribuitur tum propter quidpiam, quod speciei constanter inest, tum propter conditionem adjectam. Nempe

Nempe ab isto pendet, quod prædicatum ei convenire possit; ab hac vero, quod actu conveniat. Quoniam quod speciei inest, id singulis individuis inest (§. 44.); igitur singulis individuis non repugnat istiusmodi prædicatum. Enimvero quoniam actu competere nequit, nisi conditio speciei adjecta adsit; ideo istis individuis prædicatum actu tribui potest, penes quæ eadem conditio locum habet, sub qua de specie enunciatur (§. 219.).

E. gr. In propositione hypothetica, *si lapis radiis solaribus exponitur, calidus fit*, de lapide tanquam specie prædicatur, quod calefiat, sub ea conditione, quod radiis solaribus exponitur. Idem igitur etiam de hoc, isto, illo lapide, prædicari potest sub eadem conditione. Nempe *hic* quoque, *iste*, *ille lapis calefit, si radiis solaribus exponitur*.

## §. 234.

*Quod de singulis individuis vel absolute, vel sub determinata quadam conditione prædicari potest; idem quoque de specie, ad quam ea pertinent, vel absolute, vel sub eadem conditione prædicari potest.* Quod enim singulis individuis absolute tribui potest, is eidem convenire non potest nisi propter aliquid quod omnibus commune est. Quod vero omnibus commune, id ad notionem speciei pertinet (§. 44.). Quamobrem quod singulis individuis absolute tribuitur, id etiam de specie absolute prædicari potest (§. 219.).

Quod de singulis individuis sub certa conditione prædicari potest, id iisdem tribuitur cum propter aliquid ipsi intrinsicum, tum propter hanc ipsam conditionem. Quamobrem cum speciei insit, quod individua omnia inter se commune habent (§. 44.), si ulterius accesserit conditio, sub qua individuis prædicatum convenit, ut nova quasi species accidentalis constituatur; idem quoque speciei sub eadem convenire debet (§. 219.).

Pater, me vel tacente, propositionem præsentem esse conversam duarum proxime præcedentium. Habet ea suum usum in veritate per experientiam investiganda: id quod suo loco patebit.

## § 235.

*Prædicato-  
rum generis  
ad species &  
individua  
applicatio.*

*Quod de genere absolute prædicatur, id etiam prædicari potest de singulis speciebus sub eo contentis earumque individuis.* Etenim quod de genere absolute, nulla adjecta conditione, prædicatur, id eidem convenit ob ea, quæ in definitione (§. 225.), consequenter in notione ipsius (§. 152.) continentur. Enimvero quæ in notione generis continentur, ea omnibus speciebus (§. 45.) & hinc quoque singulis earum individuis (§. 44.) communia sunt. Quamobrem quæ de genere absolute prædicantur, ea de singulis speciebus sub eo contentis earumque individuis prædicari possunt (§. 219.).

De *triangulo rectilineo* in genere absque ulla adjecta conditione prædicatur *ratio dupla angulorum simul sumtorum ad rectum*: igitur quoque de *triangulo rectangulo* in specie & de *singulis triangulis rectangulis* in singulari prædicari potest, quod habeant tres angulos junctim sumtos duobus rectis æquales. Similiter de *omni fluido gravi* tanquam genere absque ulla conditione adjecta prædicatur, *quod descensus gravium resistat*: igitur quoque de *aqua* tanquam specie & de *hæc, illa, ista aqua* tanquam individuis prædicari potest, quod gravibus in ea descendentibus resistant.

## § 236.

*Prædicato-  
rum generis  
conditionato-  
rum ad speci-  
es & indivi-  
dua applica-  
tio.*

*Quod de genere sub data quadam conditione prædicatur, id etiam prædicari potest sub eadem conditione de singulis speciebus sub eo contentis earumque individuis.* Quoniam genus eodem modo continetur in singulis speciebus, quo species in singulis individuis (§. 44. 45.); eodem modo ostenditur, quod, quæ de genere sub data quadam conditione prædicantur, de singulis quoque ejus speciebus sub eadem conditione prædicari queant, quemadmodum (§. 233.) ostendimus, de singulis individuis prædicari posse sub eadem conditione, quæ de specie sub ea prædicantur.

Cum itaque dubio careat, quod, quæ de genere sub data quadam conditione prædicantur, sub eadem conditione de singulis speciebus prædicari queant; quæ vero de speciebus sub certa conditione prædicantur, ea quoque sub eadem de singulis

gulis earum individuis prædicari queant (§. 233. ) ; evidens est, quæ de genere sub data conditione prædicantur, ea quoque de singulis individuis specierum sub eo contentarum prædicari posse.

E. gr. *Grave ex alto delapsum magno impetu fertur.* Hic de genere, scilicet corpore gravi, prædicatur, quod magno impetu feratur, propter aliquam conditionem, quod ex alto delapsum sit. Sub hoc genere continentur plurimæ species, veluti globi lignei, plumbei, lapidei. Quamobrem istud prædicatum convenit non solum singulis hisce globorum speciebus, verum etiam singulis individuis earum, ita ut dicere liceat: *Globus ligneus ex alto delapsus magno impetu fertur, itemque in casu singulari hic globus ligneus ex alto delapsus magno impetu fertur.*

## §. 237.

*Quod prædicatur de genere aliquo superiori absolute, id non Prædicato modo prædicatur de singulis inferioribus sub eo contentis, verum generis etiam de singulis speciebus ad inferiora relatis, nec non de singulis superioribus absolute prædicatur, id ipsi vi definitionis tribuitur (§. 225. ), consequenter propter ea, quæ ipsius notio involvit (§. 152. ).* Enimvero quæ in notione generis superioris continentur, ea singulis generibus inferioribus ad idem relatis communia sunt (§. 46. ). Quamobrem quæ de genere superiori absolute prædicantur, ea quoque de singulis inferioribus sub illo contentis prædicari possunt (§. 219. ).

Quæ de genere aliquo prædicantur absolute, illa quoque de singulis speciebus ad idem relatis earumque individuis prædicari possunt (§. 235. ). Quoniam itaque ostendimus, quod de singulis generibus inferioribus sub superiori contentis prædicari queant, quæ de superiori absolute prædicantur; dubium sane nullum superest, quo minus eadem, quæ de genere superiori prædicantur, etiam de singulis speciebus ad genera inferiora, quæ sub superiori continentur, relatis earumque individuis prædicari queant.

Gg 3

E. gr.

E. gr. *Curva algebraica*, quæ nempe per æquationem algebraicam definiri potest, est genus aliquod superius, quod infinita genera curvarum inferiora sub se complectitur, in plures species distribuenda. De *curva algebraica* prædicatur *constans punctorum ad axem relatio*, cum sine ea algebraica æquatione definiri nequeat. Enimvero constans hæc punctorum ad axem relatio prædicatur quoque de singulis curvarum algebraicarum generibus, veluti de curvis primi generis, *sectionibus conicis*, earumque speciebus, veluti in casu curvarum primi generis, de parabola, hyperbola, ellipsi & circulo. Ita *fluidum grave* est genus quoddam superius, quod alia inferiora veluti aquam, Mercurium &c. sub se continet. De fluido gravi absolute prædicatur, quod *pressio sit ut basis ducta in altitudinem*. Sed idem quoque prædicatur de aqua, Mercurio &c. & in specie de aqua marina, fluviatili, fontana, pluviali atque in singulari de hac aqua, de hoc Mercurio &c. Ex demonstratione liquet, quæ de genere superiori prædicantur, ea descendendo ad genera quotlibet continuo inferiora applicari posse, nec hic opus esse, ut genus superius nonnisi uno gradu inferiora sub se contineat, sub quibus statim consequuntur species cum suis individuis.

## §. 238.

*Prædicato-  
rum generis  
superioris  
hypothetico-  
rum ad infe-  
riora, species  
& individua  
applicatio.*

*Quæ de genere aliquo superiori sub data quadam conditione prædicantur, ea sub eadem conditione de generibus inferioribus sub eodem contentis, de speciebus ad genera hæc inferiora relatis & earum individuis prædicari possunt.* Genera inferiora respectu superiorum sunt species, respectu specierum, quas sub se continent, genera (§. 47.). Sed quod de genere sub data quadam conditione prædicatur, idem quoque de singulis speciebus ad id pertinentibus sub eadem conditione prædicari potest (§. 236.). Quæ itaque de genere aliquo superiori sub data quadam conditione prædicantur, ea sub eadem conditione de generibus inferioribus prædicari possunt.

Jam quæ de generibus inferioribus sub data conditione prædicantur, ea quoque de singulis speciebus earumque individuis sub eadem conditione prædicari possunt (§. 236.). Quamobrem quæ de genere superiori sub data conditione prædicantur, ea quoque de singulis speciebus ad genera inferiora, quæ sub

sub superiori continentur, relatis, earumque individuis sub eadem conditione prædicari possunt.

E. gr. Si fuerint duæ curvæ algebraicæ sub eadem æquatione comprehensæ & constantes eam ingredientibus utrobique eandem inter se habuerint rationem, vel constans quantitas nonnisi una ingrediatur; curvæ similes sunt, quemadmodum a me demonstratum fuit in Actis Eruditorum A. 1715. p. 215. & seqq. Hic aliquid prædicatur de omnibus curvis algebraicis, sed sub duabus conditionibus, quod nempe per eandem æquationem definiri possint, seu, quod perinde est, ad eandem speciem ejusdem generis referantur, & quod quantitates constantes, quæ æquationem ingrediuntur, seu, quod perinde est, quibus datis curva determinatur, sint in eadem utrobique ratione, aut quod quantitas constans tantum una ingrediatur. Idem prædicatum sub duabus istis conditionibus tribui potest omni curvarum generi, veluti omnibus sectionibus conicis primum curvarum genus constituentibus. Immo eidem quoque tribui potest omni speciei ejusdem generis inferioris, veluti Ellipsis, Hyperbolis, Parabolis Apollonianis. Etenim Ellipses atque Hyperbolæ similes sunt, quarum axes conjuncti sunt proportionales: Parabola vero, quarum æquationem nonnisi una quantitas constans, nempe parameter, ingreditur, omnes inter se similes sunt. Exemplum hoc aliquid singulare habet, nempe quod genus inferius & species ingrediatur hypothesin theorematis generalis, etsi indeterminata. Etenim dum supponitur, duas curvas algebraicas eadem æquatione comprehendi, sumitur utique, quod sint ejusdem non modo generis, verum etiam ejusdem speciei: non tamen determinatur genus, neque species; verum in casibus specialibus genus quodcunque & sub eo species quæcunque sumi potest, prædicato salvo. Consultum igitur nobis videtur, sequentem addere propositionem. Plura exempla, quibus præsens illustratur, desiderantem ad *Isaaci Barrowii* Lectiones Geometricas & quidem lect. 4. & 5. p. 29. & seqq. ablegamus, ubi Geometria præstantissimus ex definitione generica curvarum generalia ita synpromata in certis hypothesibus de curvis in genere demonstrat, quæ ab *Apollonio* de singulis sectionibus sigillatim & ab *Euclide* de circulo in iisdem hypothesibus fuere demonstrata. Exemplum alia in philosophia nostra occurrent, quæ lector attentus & Logicæ peritus haud difficulter agnoscat.

§. 239.

*Si quod individuis singularum specierum sub diversis generibus*

quando ingrediatur  
propositionem  
instar conditionis.

bus contentarum, quæ ad unum superius referuntur, sub data quadam conditione convenit, quatenus ejusdem speciei individua spectantur; species subeunt vicem conditionis, qua datæ conditioni superaddente idem prædicatum generi superiori tribui potest. Quod enim non prædicari potest, nisi de individuis ejusdem speciei; id prædicatur propter aliquid speciei huic proprium. Quoniam tamen idem prædicari potest de individuis cujuscunque speciei sub generibus inferioribus quibusdam contentis, quatenus nempe ea ad eandem speciem referuntur; prædicatum non modo iisdem tribuitur ob id, quod speciei unicuique proprium, verum etiam ob quidpiam singulis commune. Quamobrem quod prædicatur de individuis singularum specierum diversorum generum, sed quatenus ad eandem eandem referuntur; id tam de generibus inferioribus, quam de superiori, sub quo ea continentur, sub conditione specierum prædicatur, in propositione adeo indeterminate exprimenda, aut sub conditione specierum identitatem indigitante. Quamobrem si prædicatum, quod individuis ejusdem speciei convenit, nonnisi sub quadam conditione iisdem tribuitur; conditio speciei eidem superaddere debet, ubi istud generi superiori tribuendum.

Exemplo præcedentis paragraphi propositio præfens illustratur. Enim *similitudo* non potest prædicari nisi de curvis ejusdem speciei. Similitudo intercedit inter duas parabolæ; intercedere potest inter duas ellipses; sed nulla intercedit inter parabolam atque ellipsin, nisi valde generalis, quæ ad genus constituendum sufficit (§. 45.) hic loci vero non attenditur, ubi de similitudine individuum specialissima agitur. Enimvero non una tantum species est, cujus individua similia esse possunt: sed sub omni specie curvarum, ad quodcunque genus ea referantur, dantur curvæ similes. Ita sub genere primo non modo parabolæ & circuli similes sunt, verum etiam ellipses atque hyperbolæ similes dantur. Underatio, cur curvæ similes sunt, non modo petenda ab eo, quod singulis speciebus proprium est, verum etiam hic quidpiam simul in censum venit, quod speciebus omnibus commune est, ad quodcunque tandem genus referantur, nempe æquationum identitas.



identitas. In Mathesi istiusmodi exempla frequenter occurrunt: enimvero ubi in philosophia accurate philosophari cœperimus, in ea quoque plura sese offerent.

## §. 240.

*Subiectum propositionis vel est genus quoddam, vel species, Subjectum vel individuum.* Subjectum enim est terminus, quo indicatur res, de qua iudicium fertur (§. 200.). Terminus vero vel singularis est, vel communis (§. 114.), adeoque subjectum vel terminus singularis est, vel communis. Jam terminus singularis individuum denotat (§. cit.). Quare in priori casu subjectum est individuum. Enimvero cum terminus communis notionem communem denotet (§. cit.); hæc vero pluribus communia exhibeat (§. 113.), adeoque vel species sit (§. 44.), vel genus quoddam sive superius, sive inferius (§. 45. & seqq.); in casu posteriori subjectum vel species est, vel genus quoddam sive superius, sive inferius.

E. gr. In Propositione: *Petrus est doctus* subjectum est individuum; in altera: *Homo est mortalis*, subjectum est species; in ista vero: *Lapis est gravis*, subjectum genus est; cum plures dentur lapidum species.

## §. 241.

*Judicium singulare* est, cujus subjectum est individuum. *Judicii & Hinc Propositio singularis* est, cujus subjectum est terminus singularis, seu individuum determinatum. Terminus autem singularis vel indicatur nomine proprio; vel particula demonstrativa, vel determinatione quadam singulari.

E. gr. Propositiones singulares sunt: *Keplerus veras planetarum orbitas invenit; hic liber continet lectu utilia; lapis, qui modo decedit, impegit in brachium hominis prætereuntis.* Propositiones singulares sæpius in vita communi, quam in scientiis occurrunt. In Physica singulares sunt, in quibus subjectum est corpus mundi totale peculiari nomine insignitum, veluti Sol, Luna, Terra, Venus: in Theologia naturali propositiones singulares sunt, quarum subjectum Deus est.

## §. 242.

*Judicium universale* est, cujus subjectum est notio *Judicii & (Wolffii Logica)* Hh com-

*Propositionis  
universalis  
definitio.*

communis, species nempe vel genus, prædicatum autem convenit singulis speciei individuis, vel singulis generis speciebus harumque individuis, sive absolute, sive sub data determinatione. Est autem signum universalitatis in propositione affirmativa vox *omnis*; in negativa *nullus*. Unde *Propositio universalis* est, qua subiecto præfigitur signum universalitatis.

E. gr. *Propositio universalis est. Omnis figura regularis est circulo inscriptibilis.* Subiectum enim *figura regularis* genus quoddam figurarum rectilinearum denotat, & prædicatum *inscribi posse circulo* omnibus earum speciebus, veluti *pentagonis, hexagonis, heptagonis &c. regularibus* & in singulari *isti pentagono, illi pentagono, huic pentagono regulari* convenit. Similiter *omnis homo est mortalis* propositio universalis est. Subiectum enim *homo* denotat aliquam speciem & prædicatum *mortalem esse* convenit singulis ejus individuis, *Petro, Paulo, Jacobo, Joanni &c.* Similiter *omnis lapis ex alto delapsus magna celeritate movetur* propositio universalis est, ubi de genere quodam, quod *lapis* est, sub quadam determinatione, nempe *lapsu alto*, prædicatur *magna celeritas*, quæ omni lapidum speciei omniumque specierum individuis sub eadem determinatione tribuenda.

### §. 243.

*Judicii &  
propositionis  
particularis  
definitio.*

*Judicium particulare* est, cujus subiectum est terminus communis, species nempe vel genus, prædicatum vero non convenit nisi quibusdam speciei vel generis individuis. Signum particularitatis est vox *Quidam*. Hinc *Propositio particularis* dicitur, cujus subiecto præfigitur signum particularitatis.

E. gr. *Propositio particularis est: Quidam lapis est calidus*, ubi subiectum genus quoddam denotat, prædicatum vero nonnisi quibusdam individuis ad genus istud relatis convenit & hic non nisi uni tribuitur. Similiter *Propositio particularis est. Quædam figura rectilinea sunt circulo inscriptibiles*, ubi subiectum est genus quoddam superius, prædicatum vero nonnisi aliquot individuis ad genus istud relatis convenit, veluti *triangulis, polygonis regularibus, nonnullis quadrilateris & multilateris*. Notandum non obitare particularitati propositionis, si prædicatum uni alterique speciei integræ sub genere, quod subiectum est, contentæ conveniat, modo non conveniat speciebus singulis: cum enim singularum specierum individua ad genus referantur, prædica

prædicatum utique individuis ad genus relatis non convenit, si quædam species vel integræ, vel aliqua saltem earum individua excipiuntur.

## §. 244.

*Propositio* dicitur *definita*, cujus subjecto additur signum quantitatis, nempe vel universalitatis, vel particularitatis, vel singularitatis (§. 241. & seqq.). *Propositio* vero *indefinita* appellatur, cujus subjectum est terminus communis sive absolute positus, sive cum certa determinatione, sed absque signo quantitatis.

*Propositionis definitæ & indefinitæ definitio.*

E. gr. Propositiones definitæ sunt sequentes: *Omne triangulum est dimidium parallelogrammi super eadem basi & ejusdem altitudinis; Quoddam triangulum est dato circulo æquale; Hoc triangulum est æquilaterum.* Similiter in numerum propositionum definitarum referuntur sequentes: *Omnes homines sunt mortales; Quidam homines non sunt sancti; Hic homo est dedecus ordinis sui.* Contra propositiones indefinitæ sunt: *Circulus est æqualis triangulo, cujus basis peripheria, altitudo radio ejus æquatur; homo est doctrina capax.*

## §. 245.

*Si prædicatum pluribus simul sumtis convenit, sed non singulis sigillatim; propositio speciem externam universalis mentitur, sed revera singulari æquale.* Etenim si prædicatum pluribus simul sumtis convenit, sed non singulis sigillatim; tum omnia ista simul sumta spectantur instar individui & singula tanquam partes differentiarum numericarum (§. 74. 75.). Quamobrem cum propositio singularis sit, cujus subjectum est individuum (§. 241.); propositio in numerum singularium referenda, ubi subjectum constituitur per plura simul sumta, quorum singulis sigillatim non convenit prædicatum.

Esti igitur in subjecto compareat vox *omnes* vel *omnia*; non tamen hoc in loco est signum universalitatis; sed saltem indicat, omnia, quæ nominantur, simul sumi debere, ut determinetur subjectum, cui prædicatum tribui potest. Particula igitur *omnes* vel *omnia* nonnisi incautis imponit, ut ipsis

propositio videatur universalis, quæ talis non est, per *modo demonstrata*.

E. gr. Si quis dicat: *Omnes mendici* (scilicet simul) *accepere viginti sex nummos*: tum prædicatum de uno in singulari enunciari nequit. Omnes igitur mendici simul constituunt subiectum, quod adeo instar individui consideratur, quod nullis inferioribus communicari potest. Patebit in tertia mentis operatione, necessarium ad ratiocinandum esse, ut propositiones universales a particularibus & singularibus discernantur. Quamobrem non steriles nugæ censi debent, quæ usum non prævidentibus nullam utilitatem habere videntur. Ceterum in præsentī casu particula *omnes* sumi dicitur a Scholasticis *collective*; in casu vero altero, ubi prædicatum de singulis inferioribus sub termino communi subiectum designante comprehensis sigillatim enunciari potest, *distributive*. Enimvero distinctione ista non habemus opus, modo theorematum, quæ de propositionibus condimus, fuerint perspecta, in quarum hypothesis distincte exprimitur, quod terminis Scholasticorum confuse indigitatur.

§. 246.

*Propositio  
oblique uni-  
versalis.*

*Si signum universalitatis in casu obliquo ingreditur propositionem, ipsa tamen ad aliam reduci potest, ubi prædicatum de singulis inferioribus sigillatim enunciari potest, quæ sub termino communi subiectum denotante comprehenduntur; propositio universalis est.* Patet enim in hoc casu propositionem universalem datæ substitui posse (§. 242.). Universalis igitur & ipsa esse debet.

E. gr. *Propositio: In omni triangulo latus majus subtendit majorem angulum* universalis est; etsi enim signum universalitatis *omnis* in casu obliquo in eadem compareat videaturque *latus majus* esse subiectum, ad quod istud non refertur; potest tamen propositio data ad aliam reduci, in qua relatio lateris ad angulum oppositum fit prædicatum & quam universalem esse patet, scilicet ad hanc: *Omne triangulum habet latus majus majori angulo oppositum.* Hic evidens est, de triangulo tanquam genere prædicari aliquam proprietatem, quæ singulis ejus speciebus earumque individuis communis (§. 235.). Utramque vero propositionem esse eandem patet inde, quod eadem utrique notio complexa respondeat: id quod paulo post distinctius a nobis ostendetur. Similiter ex eadem ratione identitate nempe notio-

tionis complexæ duabus propositionibus respondentis patet, propositionem hanc: *Subtensa maior omnis circuli majorem arcum subtendit æquivalere huic: Omnis circulus habet subtensam majorem ad arcum majorem*, consequenter illam perinde ac hanc esse universalem.

## §. 247.

Eodem modo ostenditur, *propositionem esse particularem*, *Propositio si particularitatis signum in casu obliquo propositionem ingreditur, oblique par-*  
*que nonnisi ad talem revocari potest, ubi prædicatum non singulis* *particularis.*  
*inferioribus competit sub termino communi subiectum denotante*  
*comprehensis.*

E. gr. In quibusdam triangulis anguli duo simul sumti sunt tertio majores propositio oblique particularis est. Æquivalet enim alteri: *Quedam triangula duos habent angulos, qui simul sumti tertio sunt majores.*

## §. 248.

*Si quid universaliter prædicatur de omni specie vel genere, Universalis*  
*illud etiam particulariter de quibusdam individuis, vel quadam prædicata*  
*specie prædicari potest. Quod enim universaliter prædicatur quomodo*  
*de omni specie vel genere; illud de singulis individuis sub particulari-*  
*specie & de singulis speciebus sub genere contentis earumque ter prædi-*  
*individuus prædicari potest (§. 242.), consequenter in utroque centur.*  
*casu de quibusdam etiam individuis; in posteriori de quadam*  
*specie. Prædicatur igitur de quibusdam individuis vel qua-*  
*dam specie particulariter (§. 243.).*

E. gr. De omni triangulo rectangulo prædicatur ratio æqualitatis inter quadratum hypotenusæ & quadrata reliquorum laterum simul sumta. Eadem vero quoque potest prædicari de quibusdam triangulis rectangulis dicendo: *Quedam triangula rectangula habent quadratum hypotenusæ quadratis laterum æquale*, vel sub alia determinatione particulari: *Triangula rectangula, quorum latera sunt inter se ut 5, 4 & 3. habent quadratum hypotenusæ quadratis laterum æquale.* Immo fieri quoque solet, ut in disciplinis subinde sub determinatione particulari inferantur, quæ generaliter fuerant demonstrata.

## §. 249.

*Propositio universalis est, si quid de specie aliqua vel ab-* *Modus uni-*  
*solute, vel sub expressa conditione prædicatur. Quod enim versaliter*  
*de*

*prædicandi  
primus.*

de specie absolute prædicatur, illud etiam prædicari potest de singulis individuis sub ea comprehensis (§. 232.). Enimvero si, quod speciei tribuitur, singulis ejus individuis competit, propositio universalis est (§. 242.). Universalis ergo est propositio, in qua de specie aliquid absolute enunciat.

Porro quod de specie sub expressa conditione enunciat, id de individuis ejusdem speciei prædicari potest, penes quæ eadem conditio locum habet (§. 233.). Quoniam itaque hac determinatione subjecti (§. 228.) nova quasi constituitur species (§. 44.), cujus singulis individuis prædicatum istud competit; propositio universalis censeri debet, in qua subjecto, quod species est, prædicatum tribuitur sub expressa conditione (§. 242.).

E. gr. Propositio hæc: *Triangulum æquilaterum est etiam æquiangulum*, universalis est atque subjecto signum universalitatis in casu recto adjici potest dicendo: *Omnis triangulum æquilaterum est etiam æquiangulum*. Similiter propositio isthæc: *Si Lapis radiis solaribus exponitur, calefit*, universalis est, & ad formam universalis expressam reducitur dicendo: *Omnis lapis radiis solaribus expositus calefit*.

#### §. 250.

*Modus secundus  
universaliter prædicandi.*

*Si quid de genere vel absolute, vel sub expressa conditione prædicatur; propositio universalis est.* Quod enim de genere absolute prædicatur, id etiam prædicari potest de singulis speciebus sub eo contentis earumque individuis (§. 235.). Propositio igitur universalis est (§. 242.).

Porro quod de genere sub expressa conditione prædicatur, id etiam prædicari potest sub eadem conditione de singulis speciebus sub eo contentis earumque individuis (§. 236.). Quoniam itaque hac determinatione subjecti nova quasi constituitur species aut novum genus inferius, cujus singulis individuis vel speciebus prædicatum convenit (§. 228. 44.); propositio quoque in hoc casu universalis censeri debet (§. 244.).

E gr.

E. gr. *Fluidum grave resistit descensui gravium* est propositio universalis & subiecto *fluidum grave* signum universalitatis *omne* adicere licet. Similiter hæc propositio universalis est: *Si grave ex insigni altitudine delapsum fuit, magno impetu fertur*, & ad formam universalis expressam reducitur dicendo: *Omne grave ex insigni altitudine delapsum magno impetu fertur*.

## §. 251.

*Si quid de genere aliquo superiori vel absolute, vel sub expressa conditione prædicatur, propositio universalis est* Ostenditur eodem modo, quo propositio præcedens (§. 250.), nisi quod principiorum loco utendum sit propositionibus de prædicatis generum superiorum absolutis & hypotheticis (§. 237. 238.).

Modus tertius universaliter prædicandi.

Quæ ad §. 237. & 238. allata sunt, exempla, ad præsentem propositionem illustrandum facile transferuntur. Ceterum cum in propositione universalis subiectum aliud occurrere non possit, nisi genus vel species, cui prædicatum vel absolute, vel sub data determinatione tribuitur (§. 242.); ideo patet, plures modos universaliter prædicandi tribus hæcenus (§. 249. 250. 251.) demonstratis non dari.

## §. 252.

*Definitio æquivalet propositioni universali.* In definitione definito tanquam subiecto tribuitur notio quædam completa atque determinata tanquam prædicatum, & quidem absolute, nulla adjecta, nulla supposita conditione (§. 152. 200.). Concipimus nempe definitum tanquam ens, cui nomen hoc convenit, adeoque notio illa eidem attribuitur propter istud nomen. Quamobrem cum nomen istud sit terminus communis genus vel speciem quandam significans, atque idem conveniat singulis speciebus sub genere & singulis individuis sub speciebus contentis; notio quoque isti nomini iuncta iisdem speciebus ac individuis tribuenda. Definitio igitur propositio universalis est (§. 242.).

Definitio æquivalet propositioni universali æquivalet.

E. gr. Definitio *trianguli rectilinei*, quod id sit figura plana tribus lineis rectis terminata, æquivalet huic propositioni universali: *Omne triangulum rectilineum est figura plana tribus lineis rectis terminata.* Etenim definitum *triangulum rectilineum* designat quoddam figurarum

figurarum genus, cui id nominis convenit, & huic generi, consequenter omnibus ejus speciebus & singulis harum individuis tribuitur, quod debeant tribus lineis rectis in plano terminari.

§. 253.

*Cui definitio  
competat.*

Hinc igitur patet, quod, *si cui enti definitum competit, eidem quoque competere debeat notio definito in definitione attributa.*

E. gr. Cui figuræ nomen *trianguli rectilinci* tribuitur, *eadem quoque esse debet plana ac tribus lineis rectis terminata.* Etsi enim arbitrarium sit, quam termino cuidam notionem attribuere velimus; postquam tamen determinata quædam notio ei attributa fuit, necessarius habetur nexus inter terminum & notionem, quæ eodem denotatur, ita ut, si ponamus, enti alicui convenire debere hoc nomen, eo ipso simul ponamus, quod eidem quoque convenire debeant ea, quæ notio termino attributa continet. Vulgo præsens propositio ita effertur: *Cui competit definitum, illi etiam competit definitio.* Enimvero tum definitio tantum sumitur pro termino complexo, quo denotatur notio completa atque determinata definito attribuenda, cum ita definiamus definitionem, ut definitum una comprehendatur (§. 152.), atque ita quoque terminum definitionis accipiamus in propositionibus §. 214. 252. Si quis tamen hanc significatus immutationem notet atque breviter loquendi amet; is per nos propositionem præsentem enunciet more consueto.

§. 254.

*Cur singula  
in definitio-  
ne contenta  
de definito  
universaliter  
prædicentur.*

*Si definitum sumitur ut subiectum, de eo sigillatim universaliter prædicari possunt, quæ notio eidem in definitione attributa involvit.* Si definitum sumitur ut subiectum, tum concipitur instar entis, cui id nominis convenit (§. 200.). Jam cum definitionem non ingrediantur, nisi intrinseca (§. 154.); definito singula conveniunt, quæ in notione per definitionem ipsi attributa continentur. Quæ vero subiecto conveniunt, ea quoque de eodem prædicari possunt (§. 200.). Quamobrem de definito sigillatim prædicari possunt singula, quæ in definitione continentur. Enimvero cum ea definito ideo attribuantur, quod ipsi istud nominis convenit, seu id tribuere visum fuit; ideo singulis individuis, quæ sub definito continentur,



tinentur, eadem tribui possunt, tanquam idem nomen participantibus. Propositiones igitur istæ universales sunt (§. 242.).

E. gr. *Quadratum est figura quadrilatera, æquilatera, rectangula.* Singula, quæ hic conjunguntur in definitione, sigillatim de quadrato universaliter prædicari possunt, affirmando scilicet: *Omne quadratum est figura: Omne quadratum habet quatuor latera: Omne quadratum habet latera equalia: Omne quadratum habet angulos tantum rectos: vel Omnia latera quadrati sunt inter se equalia: Omnes anguli quadrati sunt recti.*

## §. 255.

*Si definitum in definitione ponatur loco prædicati & terminus complexus denotans notionem ei respondentem loco subiecti; de inversa æquifinitio æquivalens propositioni universali.* Definitio est propositio identica (§. 214.). Sed in propositione identica subiecto & prædicato eadem notio respondet (§. 213.). Ergo perinde est, quemnam utrorumque terminorum loco subiecti, quemnam loco prædicati ponas. Jam si definitum ponitur loco subiecti, notio completa & determinata eidem in definitione attributa universaliter de eodem prædicatur (§. 252.). Ergo etiam definitum de termino complexo notionem ei respondentem denotante, aut de re, cui convenit hæc notio (§. 37.), universaliter prædicari potest.

E. gr. *Quadratum est figura quadrilatera, æquilatera, rectangula.* Hæc definitio transformari potest in hanc propositionem universalem: *Omnis figura quadrilatera, æquilatera & rectangula est quadratum.*

## §. 256.

Hinc consequitur: *Si cui convenient notæ in definitione Cui definitio enumerata, vel (quod perinde est), si cui conveniat notio in tum completæ definitione definitio attributa, eidem quoque convenire definitum.* Potest tamen idem adhuc hac ratione ostendi. Definitum est nomen rei (§. 152.); notio eam repræsentat per notas, quæ ad eam agnoscendam & ab aliis distinguendam sufficiunt (§. 153.), vel etiam per modum, quo ea fieri potest (§. 194.).

(Wolffii Logica)

li

Quem-

Quemadmodum itaque notæ omnes simul sumtæ nonnisi huic enti conveniunt, nec modo isto res alia, quam eadem oriri potest; ita quoque nomen nonnisi huic enti convenit, cum hoc, non aliud quoddam ens, eodem significare libuerit. Quamobrem si sumas, enti alicui convenire notas in definitione enumeratas, vel notionem in definitione definito attributam; ei quoque convenire debet definitum.

Nempe si in Geometria figura quædam deprehenditur *quadrilatera, aquilatera & rectangula*; eidem quoque nomen *Quadrati* convenit. Vulgo propositionem præsentem breviter enunciant: *Cui competit definitio, ei etiam competit definitum*. Sed tenenda hic sunt, quæ paulo ante (not. §. 253.) de altero canone monuimus: *Cui competit definitum, eidem etiam competit definitio*: qui eodem modo, quo præsens, demonstrari poterat.

## §. 257.

*Prædicata universalia absoluta.*

*Attributa & essentialia, nec non modorum atque relationum possibilitate, quæ per modum attributorum insunt, de subiecto universaliter prædicantur & contra: Quod de subiecto universaliter absolute prædicatur, est vel attributum, vel essentialia, vel modi cuiusdam atque relationis possibilitas, quæ per modum attributi inest.* Etenim attributa & essentialia, nec non modorum atque relationum possibilitates, quæ per modum attributorum insunt, de subiecto absolute prædicantur (§. 215.). Quod vero de subiecto absolute prædicatur, nempe de genere quodam & specie (nam de singularibus hic nobis minime sermo est), id de eadem universaliter prædicatur (§. 249. 250. 251.). Ergo omnia attributa & essentialia, quæque per modum attributorum insunt modorum atque relationum possibilitates de subiecto universaliter prædicantur.

Jam si quid universaliter de subiecto atque absolute prædicatur, id aut erit attributum, aut essentialia aliquod, aut modi cuiusdam vel relationis possibilitas, quæ attributi instar inest, aut erit aliquid ab his diversum. Si negas, quod in propositione affirmatur; eris, quod de subiecto absolute atque

univer-

universaliter prædicatur, aliud quid ab illis diversum. Enimvero cum præter essentialia & attributa non dentur nisi modi (§. 64. 65. 67.) atque relationes extrinsecæ ad alia & præter modorum harumque possibilitates, quæ per modum attributorum insunt, nonnisi possibilitates, quæ insunt instar modorum (§. 157. 158.); modi autem atque relationes & quæ modorum instar insunt possibilitates nonnisi conditionate de subiecto enunciari possint (§. 217.): evidens est, quod absolute enunciatur, nec modum, nec relationem, nec, quod instar modi concipitur, modi atque relationis possibilitatem esse posse. Erit igitur aut essentialiale quid, aut attributum, aut quædam possibilitas, quæ per modum attributi inest.

Exempla superius (not. §. 215. 217.) data ad præsentem propositionem ejusque conversam illustrandam transferenda.

## § 258.

*Modi atque relationes & quod in subiecto non concipitur prædicata possibile nisi præsupposito quodam modo nonnisi sub data determinatione de subiecto universaliter prædicantur; ea vero omissa, hyphetica. nonnisi particulariter prædicari possunt.* Et contra si quid de subiecto sub data determinatione universaliter prædicatur; id vel modus est, vel relatio quædam ad alia, vel quidpiam, quod in subiecto non concipitur possibile, nisi præsupposito quodam ejus modo. Modi sunt mutabiles (§. 67.), neque adeo constanter insunt, consequenter nec ea constanter possibilia in subiecto concipi possunt, quæ nonnisi præsupposito quodam modo in eodem possibilia concipiuntur. Relationes pendent a rebus extrinsecis, ad quas alix referuntur, neque adeo constanter iisdem conveniunt. Quamobrem si termino communi, generi nempe vel speciei, tanquam subiecto (§. 240.) tribuitur modus, cum is non singulis individuís ad speciem & genus, nec singulis specibus ad genus relatis necessario conveniat, nonnisi particulariter eidem tribui potest (§. 243.).

Enimvero cum modi atque relationes & quod in subiecto nonnisi præsupposito quodam modo possibile concipitur

de subiecto conditionate (§. 217. ), adeoque sub expressa determinatione (§. 228. ) enunciari possint, consequenter de genere quodam, vel specie (§. 240. ) sub expressa conditione vel determinatione prædicentur; quæ vero de specie aliqua vel genere quodam sub expressa conditione enunciantur, universaliter de hisdem prædicentur (§. 249. 250. 251. ): evidens est, modos atque relationes & quod in subiecto possibile concipitur præsupposito quodam ipsius modo sub expressa conditione de subiecto universaliter prædicari.

Jam si quid de subiecto aliquo sub data determinatione universaliter prædicatur, id vel est modus quidam, vel relatio quædam, aut quidpiam quod in objecto possibile concipitur modo quodam præsupposito, vel est aliud quidpiam ab iis diversum. Si negas prius, concedendum erit, esse quidpiam a priori prorsus diversum. Enimvero præter modos, relationes & quod sub conditione modi in subiecto possibile concipitur, nil in eodem concipere licet nisi essentialia & attributa (§. 64. 65. ) & possibilitates, quæ attributorum instar insunt (§. 157. ). Ergo erit vel attributum aliquod, vel quidpiam essentialiale, vel quædam possibilitas, quæ per modum attributi inest, quod de subiecto sub data conditione universaliter prædicatur: quod cum sit absurdum (§. 215. ), non potest esse nisi quidpiam ab hisce diversum, nimirum vel modus aliquis, vel quædam relatio, vel quidpiam, quod in subiecto possibile concipitur modo quodam præsupposito.

Exempla ad §. 217. allata ad propositionem præsentem illustrandam huc transferenda.

#### §. 259.

*Propositio-  
num diver-  
sar.*

*Omnis propositio vel est universaliter affirmans, vel universaliter negans, vel particulariter affirmans, vel particulariter negans.* Omnis propositio vel universalis est, vel particularis (§. 241. 242. ); singulares enim sub particularibus comprehenduntur, quemadmodum ex collatione definitionum propositionis singularis & particularis patet (§. 242. 243. ), & si fuerint pro-

proprie sub universalibus (§. 355.). Enimvero omnis quoque propositio vel affirmativa est, vel negativa (§. 204.). Quamobrem non minus propositio universalis, quam particularis aut affirmativa esse debet, aut negativa. Ergo propositio omnis vel est universaliter affirmans, vel universaliter negans, vel particulariter affirmans, vel particulariter negans & sub particulariter affirmante etiam singulariter affirmans, sub particulariter vero negante etiam singulariter negans comprehenditur, quæ propria non est.

Propositiones infinitæ & indefinitæ minime in censum veniunt, cum illæ sint affirmativæ, etsi speciem negativæ præ se ferant (§. 209.); hæ autem constanter vel universales, vel particulares, utut signum quantitatis omittatur (§. 244.), ex iis, quæ de diverso modo prædicandi fusc a nobis demonstrata sunt (§. 246. & seqq.), facile supplendum. Patebit autem inferius in tertia mentis operatione præclarus hujus propositionis usus: quoniam vero ea ad casus obvios applicari nequit, nisi antecedentia intelligantur, in præxi ratiocinandi omnis nostræ theoriæ usus palam fiet.

## CAPUT II.

DE DIVISIONE PROPOSITIONVM IN  
MATHESI USITATA.

§. 260.

**D**ifferentia propositionum, quam in capite præcedente magno apparatu adstruximus, præsentissimum pollicetur usum in arte ratiocinandi omnique Logica utente. Singula patebunt suo loco, nempe in sectione quarta, ubi tertiam mentis operationem distinctius sub incudem revocamus, atque in parte altera Logicæ, ubi praxin ejus sumus tradituri. Quæ vero apud Mathematicos occurrit propositionum divisio, in distincta methodi explicatione usum habet atque ideo, quod methodus philosophica cum mathe-

*Cur divisio  
ista hic ex-  
plicetur.*

matica eadem sit (§. 139. *Disc. praelim.*), in omni accurata translatione locum invenit: in praxi autem Logicæ tantum non omne fert punctum.

## §. 261.

*Fundamentum propositionum inde monstrabilem & demonstrativum.*

Nimirum si qua nobis offertur propositio, terminis intellectis vel nobis patet, prædicatum in affirmativa convenire, in negativa non convenire suo subiecto, aut non patet. Claret per exempla asserti veritas, modo cogitemus, nos tum terminos intelligere, quando in nobis excitamus notionem ei attributam (§. 36.).

E. gr. *Omne triangulum habet tres angulos* propositio universalis est. Qui novit *triangulum* dici figuram tribus lineis terminatam & *angulum* duarum linearum in uno puncto concurrentium ad se invicem inclinationem; is sibi non potest repræsentare triangulum, quin una tres angulos in ejus idea clarissime perspiciat. Solis igitur terminis intellectis pater, triangulo convenire tres angulos. Contra non minus universalis est propositio: *In omni triangulo rectangulo quadratum hypotenuse est æquale quadratis laterum simul sumtis.* Enimvero si tibi repræsentares triangulum cum quadratis ejus lateribus singulis superstructis, quod quadratum maximum sit duobus ceteris simul sumtis æquale nondum perspicias, atque adeo non pater, quod prædicatum conveniat subiecto, etsi propositionem intelligas. Similiter propositio universalis est: *Omne totum est majus sua parte.* Quod si totum aliquod secundum notionem claram, sed confusam, quam termino jungis, tibi repræsentares, v. gr. totam aliquam lineam, & in ea partem secundum claram, quam de parte habes, notionem distinguas; illico apparet, non posse concipi totum cum quadam ejus parte, quin statim pateat illud esse hac majus. Eodem modo se res habet in propositionibus negativis. Etenim si quis enunciet: *Nulla pars major est toto:* ubi totum cum parte sua tibi repræsentaveris atque notionem claram majoritatis in memoriam tibi revocaveris; illico patebit, partem non posse dici toto majorem. Eodem modo cum idea trianguli animo præsentem intuens tres in eo angulos animadvertis, illico patet, non posse convenire triangulo quatuor angulos, consequenter terminis intellectis patet, in propositione negativa *Nullum triangulum quatuor habet angulos* prædicatum non convenire subiecto.

## §. 262.

§. 262.

*Propositio illa indemonstrabilis dicitur, cujus subjecto convenire, vel non convenire prædicatum terminis intellectis patet. Sed demonstrativa appellatur propositio, cujus subjecto convenire, vel non convenire prædicatum intellectis terminis nondum patet. Et ideo propositiones indemonstrabiles dicuntur per terminos manifestæ.*

Ex iis, quæ ad præcedentem propositionem annotavimus, abunde intelligitur, quid sibi velint verba: *terminis intellectis hoc patet*, & unde constet, *terminis intellectis aliquid esse manifestum*. Nimirum si ideam subjecti, de quo aliquid prædicatur, in animo tuo excites, atque id, quod definitioni ejus respondet, eadem referre nequeat, quin una exhibeatur, quod prædicato significatur; tum ex terminis manifestum est, quod prædicatum conveniat subjecto, in easu autem opposito liquet ex iisdem, quod non conveniat. E. gr. *Omnes radii ejusdem circuli dicuntur æquales*. Si quis cogitat definitionem circuli, quem animo sibi præsentem sistit, quod singula peripheriæ puncta a centro æqualiter distent, in eo autem *radius* sibi repræsentat tanquam rectam ex centro ad peripheriam ductam; is illico perspiciet, nulum posse concipi radius, qui alteri cuicunque non sit æqualis. Non negamus extra Mathesin præsertim multa cautione opus esse, ne decipiamur; sed abusui criterii tribuendum, quod incauti vulgo decipiantur. Nostrium igitur est ad declinandum avia hoc argumentum accuratius pervestigare atque enucleatius proponere.

§. 263.

*Si notionem subjecti atque prædicati habemus confusam atque utraque indivulso nexu coheret, ita ut producta notione subjecti in eodem quoque compareat notio prædicati; propositio indemonstrabilis est.* Si notionem subjecti habemus claram, etsi confusam, ipsum ita nobis repræsentare valemus, ut id agnoscere & ab aliis discernere valeamus (§. 80.): consequenter cum subjectum agnoscamus non attendentes ad ea, quæ prædicato respondent, liquet inde, eadem ad notionem subjecti minime pertinere. Enimvero dum super integra notione complexa refleximus atque in ea nobis obijciuntur, quæ notioni prædicati respondent, eaque a ceteris, quæ ad subjecti notionem referimus,

mus, divelli non posse animadvertimus; tum sola attentione nobis patet, prædicatum subiecto suo convenire, atque adeo terminis intellectis non amplius obscurum est. Propositio igitur in numerum indemonstrabilium referenda (§. 262.).

Ad hunc casum pertinet exemplum jam ante allatum, quod *totum sit majus sua parte*. Notionem enim claram habemus totius pariter atque partis, vi cuius & totum, & partem agnoscere possumus. Notionem quoque claram habemus majoritatis, vi cuius majus a minori & æquali discernere valeamus. Enimvero attendentes ad notionem totius indeque totum agnoscentes, non opus est ut una attendamus ad notionem partis. Et attendentes ad notionem totius atque partis, non opus est ut attendamus simul ad notionem majoritatis. Satis igitur manifestum nobis est, neque notionem partis ad notionem totius, nec notionem majoris ad notionem utriusque pertinere. Nullum tamen nobis repræsentare possumus totum, quin una repræsentemus aliquam ejus partem & ejus ad totum relationem. Quamobrem dum super toto, quod nobis repræsentamus, reflectimus; animadvertimus quoque ejus partem & dum hanc ad totum referimus, totum parte majus agnoscimus. Idem nobis fit evidentius, si plures res toto genere diversas tanquam totum nobis repræsentemus atque aliquam ejus partem ad eandem referimus. Hinc vero intelligitur, cur per exempla propositiones indemonstrabiles illustratæ agnoscantur atque a demonstrabilibus discernantur.

## §. 264.

*Secundus*

*modus cognoscendi propositionem indemonstrabilem.*

*Si subiecti pariter & prædicati habemus definitiones & producta notione subiecti, in eo quid deprehendimus, quod notioni prædicati responderet, atque notio prædicati a notione subiecti divelli nequit; propositio denuo indemonstrabilis est.* Demonstratio parum differt a demonstratione propositionis præcedentis. Etenim si subiecti habemus notionem distinctam atque completam; notas sufficienter enumerare valeamus, quibus illud agnoscitur atque a rebus aliis discernitur (§. 153.), consequenter si subiectum nobis repræsentamus, multo magis jam distinguimus, quæ ad definitionem ipsius pertinent, a ceteris, quæ eidem inesse deprehendimus. Dum vero ad eadem quoque attendimus & in iis animadvertimus, quæ



quæ prædicato respondent, clare autem perſpicimus, eadem ab iis ſeparari non poſſe, quæ ad notionem ſubjecti pertinent; ſola attentione cognoscimus, prædicatum ſubjecto convenire, quam primum termini intelliguntur, qui ſubjecto & prædicato respondent (§. 117.). Propoſitio igitur in numerum indemonſtrabilium refertur (§. 262.).

Pertinet huc exemplum, quod *radii unius circuli ſint inter ſe æquales*. Hæbemus enim circuli definitionem & dum eum menti ſeu oculis præſentem exhibemus, diſtinguimus notas definitionem ingredientes, nempe quod ſit figura plana, quod terminetur linea in ſe redeunte, quod ſingula huius lineæ puncta a centro æqualiter diſtent. Jam ſi cogitemus ulterius rectas ex centro in peripheriam eduſtas, quæ ad circuli definitionem non pertinent, & lineæ iſtæ ad ſe invicem referuntur, ob æqualem punctorum peripheriæ a centro diſtantiā non latere poteſt earundem æqualitas. Cum vero hæc iſtarum linearum ad ſe invicem relatio conſtituat notionem prædicati, quod hic circulo tribuitur (§. 200.); prædicatum ſubjecto ſuo convenire ſatis clare perſpicitur. Pertinet huc porro exemplum alterum paulo ante (not. §. 261.) allatum, quod *omne triangulum habeat tres angulos*. Nec minus exemplum præbet hæc propoſitio: *Ex quovis centro quovis intervallo deſcribi poteſt circulus*: ex definitione enim circuli perſpicitur, æquali a centro diſtantiæ non repugnare, ut ſit ea, quam nobis jam repræſentamus, major vel minor.

§. 265.

*In propoſitionibus vel de ſubjecto affirmatur ac negatur, quod eidem ineſt aut ſub quadam conditione ineſſe aut ad eſſe poteſt; vel aliquid fieri vel ſſici poſſe affirmatur.* Evolvantur Elementa Euclidis, vel noſtra Matheſeos univerſæ Elementa. Patebit afferti veritas. Loquimur enim hic de facto Mathematicorum, quod ipſorum ſcriptis probari debet. Ceterum cum methodus philoſophica cum mathematica eadem ſit (§. 139. Diſc. prælim.); dubium non eſt, hanc quoque differentiam propoſitionum in philoſophia locum habere. Immo res iplæ loquitur, differentiam hanc in omni rerum cognitione occurrere poſſe, ac revera occurrere experientia docemur, ſi eam conſulimus.

Fundamentum propoſitionum rhetoricarum & practicarum.

E. gr. In propositione, *Circuli paralleli idem habent centrum, vel sunt concentrici*, de circulis parallelis tanquam subiecto affirmatur concentricitas: in altera vero, *circuli se intus tangentibus non habent idem centrum, vel non sunt concentrici*, de circulis se intus tangentibus tanquam subiecto negatur concentricitas. Enimvero in propositionibus, quibus affirmatur *Circulos parallelos describi posse & describi posse circum maiorem, qui maiorem datum intus in dato puncto tangit*, affirmatur aliquid effici posse. Similiter extra Mathesin in propositione Theologiae naturalis, *Deus est sapientissimus*, sapientia de Deo affirmatur: at in propositione philosophiae moralis, *Deum posse amari*, affirmatur aliquid fieri posse.

## §. 266.

*Definitio  
propositio-  
num theore-  
tica & pra-  
ctica.*

*Propositio* dicitur *theoretica*, in qua aliquid, quod subiecto inest vel adest, de eodem affirmatur, vel negatur. *Practica* vero est *propositio*, qua aliquid fieri posse affirmatur, vel fieri debere postulatur.

E. gr. *Circuli paralleli idem habent centrum* propositio theoretica est: sed propositio practica est, qua circulos parallelos describi posse affirmatur, vel qua describi iubentur.

## §. 267.

*Definitio  
axiomatis.*

*Propositio theoretica indemonstrabilis* dicitur *Axioma*.

Axiomata igitur sunt propositiones paulo ante (not. §. 262. & seqq.) in medium allatae: *Totum est majus sua parte; figura trilaterra habet tres angulos; radii unius circuli sunt inter se aequales.*

## §. 268.

*Propositio-  
nes inter  
axiomata  
referenda.*

*Propositiones, in quibus de definito praedicatur aliquid agillatim, quod in definitione continetur, sunt axiomata.* Quae in definitione continentur, ea definito convenire, ex ipsa definitione patet, adeoque quamprimum terminus, quo denotatur subiectum, intelligitur (§. 117. 152.). *Propositio* igitur indemonstrabilis est (§. 262.). Sed cum in istiusmodi propositione aliquid de subiecto affirmetur (§. 205.), quod eidem inest; eadem quoque theoretica est (§. 266.). In axiomatum itaque numerum referenda (§. 267.).

E. gr. *Quadratum* definitur, quod sit figura quadrilatera, aequilatera, reſtanguſa. Propositiones itaque: *Quadratum est figura quadrila-*

arilatera, Quadratum est figura aequilatera, Quadratum est figura rectangula, axiomatum loco habentur.

§. 269.

Propositio practica indemonstrabilis vocatur *Postulatum*. *Postulati de-*

Talia sunt postulata *Euclidis*, quibus postulatur, *A quovis puncto ad finitum quodvis punctum rectam lineam ducere; Rectam lineam terminatam in continuum & directum producere; Quovis centro & intervallo circum describere*. Sunt enim propositiones, quibus affirmatur, tale quid fieri posse. Unde etiam ita efferri possunt: *A quovis puncto ad quodvis punctum duci potest linea recta; Recta linea terminata in continuum & directum produci potest; Quovis centro & intervallo describi potest circulus*; quemadmodum a nobis factum est in *Elementis Geometriæ* (§. 20. 21.). Definitionem postulatorum eim formavi, quæ convenit postulatis *Euclidis*, qui eadem & ab axiomatis, & a propositionibus demonstrativis distinguit. Non ignoro *Clavius* aliter explicare postulata in *Prolegomenis ad Elementa Euclidis*, & alios v. gr. *Mariottum* in *Tentamine Logicæ part. 2. disc. 2. art. 1. p. 639 640. Operum* adhuc aliter: enimvero cum eorum explicationes aut nullum prorsus discrimen intrinsecum axiomatum ac postulatorum admittant, qualis est *Claviana*, aut discrimen, quod tanti non est, ut axiomata a postulatis distinguamus; nostrum vero postulatorum & axiomatum discrimen & intrinsecum sit, & notionibus universalibus conforme, & praxi *Euclidis* consentaneum; ideo huic postulatorum significatui inhærebimus. Id vero hic ideo monemus, ne quis ex aliorum Autorum scriptis notionem postulatorum in nostra scripta inferat, quæ in iis nullum invenit locum. Est autem in postulato evidens, quomodo aliquid fieri debeat, quemadmodum in axioma, quod prædicatum subijcto conveniat, ut illud doceri, quemadmodum hoc ostendi non habeat opus. De *Tschirnhausen* in *Medicina Mentis* pag. 117. 118. axiomata ita definit, ut sub definitione postulata una comprehendantur: unde & horum nullam facit mentionem. Sunt nempe ipsi axiomata omnes propositiones, quas in scientiis absque demonstratione sumere licet & quæ a nobis *indemonstrabilium* titulo decorantur (§. 262.).

§. 270.

*Propositiones identicæ sunt axiomata*. In propositione *Propositiones identicæ* subjecto & prædicato eadem respondet notio (§. 213.), *identicæ cur consequenter eadem utroque res indicatur* (§. 200.). *Propositiones identicæ sunt axiomata* igitur identica generalis, quæ ceteras omnes ambitu suo

complectitur hæc est: *Idem ens est illud ipsum ens, quod est*, seu, *omne A est A*, ubi A denotat generatim ens cujuscunque speciei vel generis, sive in communi, sive in singulari. Quoniam igitur in propositione identica terminis vel generaliter intellectis (scilicet quod subjectum & prædicatum denotent idem ens A, etsi entis A notionem nondum habeamus claram) patet, subjecto convenire prædicatum; nullum superest dubium, quin propositionem identicam referre debeamus in numerum indemonstrabilem (§. 262.) & quidem theoreticarum (§. 266.), consequenter axiomatum (§. 267.).

Fieri potest, ut subjectum & prædicatum diversis terminis exprimantur, atque hoc non obstante propositio identica sit: id quod ex ipsius definitione patet (§. 213.). Quod vero propositiones identice, quemadmodum cetera axiomata, habeant instar principiorum demonstrandi in scientiis locum; suo demum loco ostendetur.

## §. 271.

*Axiomata  
negativa.*

*Propositiones, quibus idem negatur esse diversum a se ipso, sunt axiomata.* Quivis sola attentione perspicit, si A sit A, fieri non posse, ut simul A non sit A. Sed si ponatur esse B, hoc est, quidpiam ab A diversum, ponetur esse non A: quod cum sit absurdum, idem non potest esse diversum quid a se ipso. Quamobrem cum intellectis terminis statim pateat, prædicatum subjecto convenire non posse; erunt istiusmodi propositiones indemonstrabiles (§. 262.), cumque eadem theoreticæ sint, inter axiomata referendæ (§. 266. 267.).

E. gr. Si quis novit, *triangulum* esse figuram tribus lineis terminatam; *quadratum* vero figuram quadrilateram, æquilateram, rektangulam; is statim perspicit, *triangulum non esse quadratum*: immo ex sola definitione trianguli patet, *triangulum non habere quatuor vel plura latera*. Istiusmodi axiomatis esse locum in ratiocinando cum in scientiis, tum in vita humana; iis ignotum non est, qui attentione sufficiente utuntur.

## §. 272.

*Definitiones  
quando*

*Si definitione utimur tanquam propositione, eam axiomatis loco habemus.* Est enim definitio propositio identica (§. 214.); sed

ſed definitiones identicæ ſunt axiomata (§. 270.). Definitiones itaque abeunt in axiomata, ſi iis tanquam propoſitionibus utimur.

§. 273.

*Si definitum ſumitur ut ſubjectum, & de eo prædicatur quidpiam, quod notis ad definitionem ſpectantibus in ejuſ notione animo præſente, indivulſo nexu coheret; propoſitio axiomata eſt. Iſtiusmodi propoſitio indemonſtrabilis eſt (§. 264.). Eſt vero etiam theoretica (§. 266.). Patet igitur propoſitiones haſe inſtar axiomatum (§. 267.).*

E. gr. Definitio *figura regularis* eſt, quod ſit æquilatera & æquiangula. Axiomata igitur ſunt: *In Pentagono regulari angulus unus eſt pars quinta omnium ſimul; in Hexagono pars ſexta; in Heptagono ſeptima & ita porro in infinitum. Aut in genere: In Polygono regulari quocunque angulus unus ad ſummam omnium eam habet rationem, quam unitas ad numerum laterum.*

§. 274.

*Definitio inverſa eſt axiomata.* Patet eodem modo, quo præcedens propoſitio, vi §. 255, vel etiam vi §. 264.

Qui enim novit definitionem *figura regularis*, quod ſit æquilatera & æquiangula; iſ vi rationis generalis Logicæ, atque adeo in caſu ſpeciali ſola attentione ad definitionem perſpicit, quod *Omnis figura æquilatera & æquiangula ſit regularis.*

§. 275.

Propoſitio theoretica demonſtrativa vocatur *Theorema*.

Hinc *Theorema* appellatur *Pythagoricum* propoſitio a *Pythagora* inventa, quod *quadratum hypothenuſa in triangulo rectangulo ſit æquale quadratis laterum ſimul ſumtis*. Omnes propoſitiones a nobis in Logica demonſtratæ theoreticæ ſunt theorematum exempla.

§. 276.

Propoſitio practica demonſtrativa dicitur *Problema*.

E. gr. Propoſitio, qua docemur *conſtruere triangulum rectangulum*, vel *invenire mediam proportionalem inter duas lineas rectas datas*, problema vocatur in Elementis Geometriæ. Exemplum problematis habemus in ſuperioribus (§. 150.), ubi docemur *invenire ſignificatum vocis, quem ipſi tribuit uſus loquendi*. Vulgo cum *Ariſtotelicis* problema

blema appellatur propositio invidens, de qua in utramque contradictionis partem cum aliqua veritatis specie disputari potest. Sed nobis cum isto significato nihil est negotii.

## § 277.

*Corollarij definitio.*

*Corollaria*, a nonnullis *Conseſſaria*, dicuntur propositiones, quæ non multa raciociniorum ambage ex definitionibus, vel propositionibus aliis inferuntur.

Evidentiùs adeo perspicimus, quid sit corollarium, ubi tertiam mentis operationem & pendentem inde demonstrationem explicatam dederimus. Exempla plurima in Elementis nostræ Matheseos occurrunt. Ubi demonstravimus theorema, quod *in quovis triangulo tres anguli junctim sumti conficiant gradus 180*, corollarii loco subijcimus, quod in triangulo æquilatèro quilibet angulus sit 60. graduum. Supposito enim theoremate, non alia re opus est, ut veritatem corollarii perspiciamus, nisi quod nobis in memoriam revocemus, in triangulo æquilatèro omnes angulos esse inter se æquales. Exemplum corollarii præbet propositio supra (§. 57.) ex altera (§. 56.) illata, quod *omnibus singularibus universalis insit*. Immo talia quoque sunt propositiones (§. 253. 256.). Cui definitum competit, ei definitio competit, & cui definitio competit, ei definitum competit.

## CAPUT III.

## DE VARIIS JUDICIORUM AFFECTIONIBUS.

## §. 278.

*Judiciorum æquipollentium definitio.*

**J**udicia *æquipollentia* dicuntur, quibus eadem notio complexa respondet. Propositiones igitur *æquipollentes* sunt, quibus judicia *æquipollentia* significantur, vel quæ sibi mutuo possunt substitui notione complexa salva.

E. gr. Si quis sibi repræsentat Solem una cum ædificio directe eidem opposito atque lumine, quo ædificium collustratur; tum vel Sol sumi potest loco subjecti, vel ædificium, vel lumen. In primo casu judicamus: *Sol illuminat ædificium*; in altero: *Ædificium illuminatur a Sole*;

*a Sole*; in tertio: *Lumen Solis adificium perfundit, vel ab adificio terminatur.* Omnia igitur hæc iudicia seu propositiones omnes æquipollent. Patebit suo loco, in demonstrationibus sæpissime propositiones æquipollentes in locum anteriorum substituendas esse, ut ex iis sequens demonstrari possit.

## §. 279.

*Si ex definito prædicatur notio eidem in definitione attributa & de hac notione definitum; propositiones sunt æquipollentes.* Etenim cum ex ipsa definitionis definitione pateat (§. 152.), quod utrique propositioni eadem respondeat notio complexa, si nempe definitum seu nomen rei per modum attributi consideres, quali fictioni hic locum esse jam supra (§. 252.) ostendimus; nullum sane dubium est, quin una harum propositionum æquipolleet alteri (§. 278.).

*Propositio-  
nes æquipol-  
lentes quæ-  
nam.*

E. gr. *Omne triangulum est figura tribus lineis terminata & omnis figura tribus lineis terminata est triangulum* sunt propositiones æquipollentes, quarum una in alterius locum surrogari potest, prout nobis commodum fuerit hæc vel ista uti.

## §. 280.

*Si eidem subjecto sub determinationibus æquivalentibus idem tribuitur prædicatum, propositiones sunt æquipollentes.* Determinationes subjecti æquivalentes sunt, quarum una alteri salvo prædicato substitui potest (§. 230.). Quamobrem si determinationem subjecti, quem ipsum habet in una propositione, substituis in locum alterius, quam habet in altera propositione; altera hæc propositio evadit prorsus eadem cum prima, consequenter eidem æquipollet (§. 278.).

*Idem alteri-  
us ostendi-  
tur.*

E. gr. *Parallelogramma, quorum æquales sunt bases & altitudines, æqualia sunt, & Parallelogramma super eadem basi & inter eadem parallelas constituta æqualia sunt*, propositiones sunt æquivalentes: determinationes enim æquivalentes sunt habere bases & altitudines æquales atque super eadem basi intra easdem parallelas constitui (not. §. 230.). Similiter propositiones: *triangulum est dimidium parallelogrammi ejusdem basis & altitudinis & parallelogrammum dividitur per diagonalem in duotriangula æqualia* propositiones æquipollentes sunt, cum per divisionem ope diagonalis factam prodeant triangula cum parallelogram-

logrammo ejusdem baseos & altitudinis, adeoque in utraque propositione determinatione æquivalent (§. 231.).

§. 281.

*Adhuc ulterius ostenditur.*

*Si qua nobis occurrit propositio S notione complexa eidem respondente excitata formare licet propositionem aliam, cui eadem notio respondet; hæc altera æquivaleret primum propositæ. Etenim per se patet, quod utrique propositioni eadem conveniat notio complexa. Quamobrem una alteri æquivaleret (§. 278.).*

Dedimus jam supra (not. §. 278.) exempla & quid demonstrationes geometricas attendit, ei inter demonstrandum sua veluti sponte plura sese efferent. Ceterum præsens propositio cum per solam definitionem propositionum æquipollentium pateat in axiomaticum numerum referri potest (§. 264. 267.). Usus vero multum habet in demonstrando: id quod facile animadvertet, qui demonstrationes mathematicas rite solvere novit & ad resolutionem attendit, quemadmodum inferius expressius docemus & in Elementis nostris Matheseos fecimus.

§. 282.

*Propositionis conversæ definitio.*

*Si prædicatum fiat subjectum & subjectum prædicatum; propositio dicitur converti. Et quæ per talem conversionem prodit propositio, conversa alterius appellatur.*

E. gr. Propositionis: *omne triangulum æquilaterum est æquiangulum*, conversa est hæc altera: *omne triangulum æquiangulum est æquilaterum*. Similiter propositionis: *Si crura trianguli æqualia sunt, anguli ad basin sunt æquales*, conversa est hæc altera: *si anguli ad basin sunt æquales, crura sunt æqualia*. Occurrunt quoque inter nostras propositiones Logicas conversæ aliarum, quas hætenus demonstravimus. E. gr. Propositionis (§. 61.): *Quæ entis cuidam constanter insunt, ea de eodem absolute enunciari possunt*, conversa est hæc altera: *Quæ de ente quodam absolute enunciari possunt, ea eidem constanter insunt*. Vide exempla plura §. 62. 69. 257. 258.

§. 283.

*Quando propositiones convertibiles.*

*Si de subjecto per essentialia definito prædicatur attributum proprium; propositio converti potest. Attributum enim proprium prædicatur de subjecto sub conditione essentialium ejus (§. 220.) atque adeo cum subjectum per essentialia definiri suppona-*



ponatur, ideo eidem tribuitur attributum, quia ipsi attribuntur ista essentialia. Quamobrem cum prædicatum in nullo subjecto locum habere possit, nisi omnia ista essentialia eidem insint; ex eodem agnoscere licet, quod eadem insint, consequenter prædicatum potest fieri subjectum, subjectum vero prædicatum (§. 200.), seu de ente attributo isto prædico prædicari possunt omnia essentialia simul sumta. Propositio itaque, in qua de subjecto per essentialia definito prædicatur attributum proprium, converti potest (§. 282.).

E. gr. *Triangulum* definitur per sua essentialia *aquilaterum*, quod si tribus rectis inter se æqualibus terminatum. Propter hanc laterum æqualitatem de ipso prædicatur *angulorum æqualitas*, adeoque attributum trianguli æquilateri proprium est, quod sit æquiangulum. Converti autem potest hæc propositio in alteram, *triangulum æquiangulum est æquilaterum*, in qua prædicatum jam est subjectum & subjectum migravit in locum prædicati. Possunt quoque propositiones hypotheticæ ita efferri: *Si trianguli latera fuerint æqualia, anguli sunt æquales* & contra: *Si anguli sunt æquales, latera æqualia sunt*. Propositio generalis, quæ præsentī, quam illustramus, æquivaleret (§. 280.), hæc est: *Si cui essentialia conveniunt, eidem quoque conveniunt attributa propria*, & contra: *Si cui attributum aliquod proprium convenit, eidem quoque conveniunt essentialia*. Habent istiusmodi theoremata generalia usum eximium in arte inveniendi: sed demonstrabuntur a nobis in Ontologia seu philosophia prima, & olim, a nobis ad artem inveniendi transferentur, si ita visum fuerit. Deo. Singula enim suo tradimus loco.

### §. 284.

*Si de subjecto per attributum definito prædicantur omnia essentialia simul sumta, propositio converti potest.* Ponamus enim propositionem converti: *Inconversa attributum proprium, per quod subjectum definiebatur (per hypoth. & §. 173.), prædicatur sub conditione essentialium (§. 282. 225.). Enimvero cum hoc fieri possit (§. 220.); propositio utique converti potest.* Idem ulterius ostenditur.

E. gr. *Proprietas quadrati* est, quod eius latera subtendant circuli Quadrantes. Definiri adeo potest per figuram planam circulo inscripibilem, cujus latera sunt quadrantum subtensa. Quod si jam de

(Wolffii Logica)

L1

Quadra-

*Quadrato in definito prædicatur, quod sit figura æquilatera, quadrilatera, rectangula; propositio utique converti potest in alteram: Figura quatuor latera æqualia ad angulos rectos juncta habent est quadratum. Melius patet, quid sibi velit conversio, si utraque propositio reducatur ad formam hypotheticam: Si quadrati latera quadrantes circuli subtendunt, quatuor habet latera inter se æqualia & ad angulos rectos juncta & contra: Si quadratum habet quatuor latera æqualia ad angulos rectos invicem juncta, circulo inscribi potest & latera singula quadrantem subtendunt.*

§. 285.

*Idem adhuc  
ulterius o-  
stenditur.*

Quoniam possibilitates, quæ insunt per modum attributorum priorum eodem modo de subiecto prædicantur, quo attributa propria (§. 220. 222.) & vicissim essentialia de subiecto per possibilitates istas definito (§. 182) perinde prædicantur ac de eodem per attributa (§. 181.) definito (§. 224.); quæ respectu attributorum de propositionum conversione demonstrata sunt (§. 283. 284.), ea etiam applicari possunt ad possibilitates relationum atque modorum, quæ per modum attributorum priorum insunt. Nimirum: *Si de subiecto per essentialia definito prædicatur modi cujusdam vel relationis possibilitas, quæ per modum attributi proprii inest, propositio converti potest & vicissim: Si de subiecto per modi vel relationis cujusdam possibilitatem definito prædicantur omnia essentialia simul, propositio converti potest.*

E. gr. Parallelogrammo per modum attributi convenit divisibilitas in duo triangula æqualia per diagonalem. Quod si igitur parallelogrammum definias per figuram quadrilateram, cujus latera opposita sunt parallela; propositio: *Parallelogrammum est divisibile per diagonalem in duo triangula æqualia*, ita converti potest: *Figura per diagonalem divisibilis in duo triangula æqualia est parallelogrammum.* Et vicissim si parallelogrammum definias per figuram ope diagonalis in duo triangula divisibilem; propositio: *Parallelogrammum habet quatuor latera, quorum bina opposita sunt parallela*, converti potest in alteram: *Figura quatuor latera habens, quorum bina opposita sunt parallela, est parallelogrammum.* Ut melius intelligatur conversio; propositiones categoricæ reducendæ sunt ab hypotheticis sequentes: *Si parallelogrammum habet quatuor latera, quorum opposita sunt parallela;*

per.

per diagonalem in duo triangula equalia dividi potest; & contra: Si parallelogrammum per diagonalem in duo triangula equalia dividi potest, latera quatuor habet & bina opposita parallela. His enim duabus hypotheticis æquivalere quatuor præcedentes categoricas patet (§. 280.). Obiter moneo in gratiam eorum, qui non sufficiente attentione utuntur, in præsentī casu, quo parallelogrammum definiri supponitur per figuram ope diagonalis in duo triangula equalia divisibilem, propositionem: Parallelogrammum habet quatuor latera, quorum bina opposita sunt parallela & ejus conversam: Figura quatuor latera habens, quorum bina opposita sunt parallela, est parallelogrammum, nec identicas esse, nec posteriorem inversam definitionem, quemadmodum obtinet si parallelogrammum definitur per figuram quadrilateram, cujus opposita latera sunt parallela (§. 214. 254. 255.). Quæ in Mathesi patent, ea in disciplinis aliis non adeo manifesta sunt, sed majorem attentionem merentur, ut agnoscantur.

## §. 286.

Si quid sub quadam conditione nonnisi de oasa specie vel genere dato prædicari potest, propositio potest converti. Etenim *Idem porro ostenditur.* prædicatum nonnisi de illa specie potest enunciari, sub sola ista conditione; ubi sub illa conditione enti cuidam convenit istud prædicatum, id ipsum ejusdem speciei esse debet. Si negas: poterit idem esse ens alterius speciei, adeoque prædicatum non de sola hac specie enunciari potest: quod cum hypothesein evertat, absurdum est. Quoniam itaque ens ejusdem speciei utique est, ideo species migrare potest in locum prædicati & conditioni junctum prædicatum tueri vicem subiecti (§. 200.); consequenter propositio converti potest (§. 282.).

E. gr. De lineis parallelis solis sub ea conditione, quod secantur linea transversa, prædicari potest angulorum alternorum æqualitas. Ex converso autem linearum parallelismum prædicare licet de lineis transversa quadam ita scētis, ut anguli alterni sint æquales.

## §. 287.

Si quid de subiecto sub determinatione unica prædicari potest, propositio ita est convertibilis, ut determinatio fiat prædicatum & prædicatum determinatio subiecti. Quod enim de sub- *Idem ulterius prædicatur.*

jecto prædicari potest nonnisi sub unica determinatione, id eadem convenire non potest nisi adsit ista determinatio (§. 200.). Quamobrem si id eadem convenire sumitur, determinatio quoque erit eitribuenda. Fit itaque, quod ante erat prædicatum, nunc subjecti determinatio (§. 228.), & quod determinationis loco erat abijt in locum prædicati (§. 200.).

E. gr. In propositione *omnis lapis calidus calefacit* actus calefaciendi tribuitur lapidi sub conditione caloris, seu sub hac determinatione, quod sit calidus. Fieri autem non potest, ut sub determinatione alia idem actus calefaciendi eidem conveniat: quod enim affirmatur de calido, negandum est de omni non calido. Propositionem igitur istam in hanc convertere licet: *Omnis lapis, qui calefacit, calidus est*. Si libuerit uti propositionibus hypotheticis, habebis sequentes: *Si lapis calidus est, calefacit, & contra: Si lapis calefacit, calidus est*. Enimvero in propositione: *Lapis ex alto delapsus celeriter movetur*, conversio istiusmodi locum non habet. Non licet affirmare convertendo: *Lapis, qui celeriter movetur, ex alto fuit delapsus*, propterea quod idem prædicatum eidem tribui potest sub aliis quoque determinationibus. Lapis celeriter quoque movetur, qui magno impetu fuit projectus, aut cui alia quacunque ratione impedus magnus fuit impressus. Quamobrem nonnisi in casu particulare verum est, quod lapis, qui celeriter movetur, ex alto delapsus fuerit.

## §. 288.

*Propositio-  
num opposi-  
tarum &  
contradictio-  
narum defi-  
nitio.*

*Propositiones*, quarum una negatur, quod altera affirmatur, *Oppositæ* sunt. In specie *contradictoriæ* dicuntur, quibus idem ponitur simul esse & non esse.

E. gr. Propositiones oppositæ sunt: *in omni triangulo anguli simul summi sunt æquales duobus rectis & in omni triangulo anguli simul summi non sunt æquales duobus rectis*. Contradictoriæ in casu singulari sunt: *Petrus scribit & Petrus non scribit*.

## §. 289.

*Earum differ-  
entia.*

*Propositiones oppositæ* cum non differant, nisi quod altera sit affirmativa, altera negativa (§. 288.); differentia *omnis in eo consistit, quod in una copula unde ponatur, in altera vero particula negandi eidem præfigatur* (§. 207.).

Idem quoque in exemplis manifestum est. Etenim propositiones: *Totum est majus sua parte & totum non est majus sua parte* non differunt,

ferunt, nisi quod copula est in priori nude ponatur; in posteriori copula est habeat particulam negandi non prefixam. Similiter in casu oppositum singulari: *Petrus scribit & Petrus non scribit*, omnia differentia consistit in particula negandi non, quæ in altera propositione adijcitur copulæ in prædicato latenti: id quod patet, si eas revocaveris ad æquipollentes (§. 203.), *Petrus est scribens & Petrus non est scribens*.

## §. 290.

Hinc porro consequitur, *propositionibus oppositis idem prorsus esse debere subjectum atque prædicatum, nec minimi quicquam in utroque immutari debere in alterutra; consequenter terminos singulos in eodem sumi debere significatu*. Si enim sumantur in diversis, non eandem amplius rem significabunt (§. 37.), adeoque nec subjectum & prædicatum idem est.

E. gr. Paulo ante exemplum propositionum oppositarum allegavimus propositiones Geometriæ elementaris: *In omni triangulo anguli simul sumti sunt æquales duobus rectis & in omni triangulo anguli simul sumti non sunt æquales duobus rectis*. Supposuimus enim triangulum rectilinum, tribuentes voci triangulum cum Euclide eam notionem, quæ nonnisi triangulo rectilineo convenit. Enimvero si quis eum Theodoso vocem trianguli generaliter sumat, ac præter rectilineum, curvilineum & mixtilineum quodcumque sub se comprehendat; propositio negativa non contradicit Euclidæ affirmativæ.

## §. 291.

Hinc ulterius consequitur, *si quid subjecto nonnisi sub certa conditione convenit & in negativa eadem omittatur vel immutatur, propositiones non amplius fore oppositas*. Etenim in hoc casu subjecti quidam status determinatur, in quo prædicatum ei tribui potest (§. 228.), atque adeo omiſsa conditione, subjectum absolute positum non amplius idem est, consequenter nec propositio negativa affirmativæ opponitur (§. 290.).

E. gr. In propositione: *Omnis lapis calidus calefacit* subjectum determinationem habet adjunctam: quæmobrem si in negativa *omnis lapis non calefacit* eadem omittatur; eadem affirmativæ non opponitur. Oppositæ sunt: *Lapis calidus calefacit & lapis calidus non calefacit*. Similiter si certus quidam gradus caloris supponitur ad calefaciendum in propositione affirmativa; idem quoque supponendus

est in negativa, si oppositæ esse debent. Obiter hic moneo, hinc constare, cur adeo difficile sit de oppositione iudicium, ubi nec terminis respondent notiones satis determinatæ, nec subjectum sufficienter determinatur, ut pateat, in quo statu prædicatum eidem convenire possit: id quod vulgo plerumque accidere solet.

## §. 292.

*Determinata  
notio prædi-  
cati in opposi-  
tis eadem.*

Similiter patet, in propositionibus oppositis determinatam respondere debere prædicato notionem, nec in negativa quidpiam eidem addi, vel demi posse. Etenim cum prædicatum denotet omne id, quod subjecto tribuitur vel ab eo removetur (§. 200.), consequenter quod in notione termino sive simplici, sive complexo, quod designatur, respondente continetur; in propositionibus autem oppositis idem prædicatum esse debeat (§. 490.); evidens omnino est, quod prædicato determinata respondere debeat notio.

Porro cum prædicatum non amplius idem sit, si quid notioni determinatæ, quæ eidem respondet, vel addatur, vel dematur, quod per se patet; porro manifestum est, in propositione negativa prædicato nihil addi, nihil demi posse.

E. gr. Si quis affirmet: *Omnis lapis calidus calefacit* & jam sumens lapidem, quem radiis solaribus expositum tactus calidum probat eundemque submergens in magna aquæ quantitate, quam nihil caloris contraxisse tactus denuo testatur, neget, *omnem lapidem calidum calefacere*; altera hæc propositio non contradicit priori. Etenim ut ut subjectum possit considerari ut idem, cum in prima propositione nec lapidis densitas, nec magnitudo, nec modus, quo calorem contraxit, determinetur, adeoque ab his in negativa quoque abstrahi possit, immo debeat; in prædicato tamen additur notioni, quæ eidem responderet, quod in affirmativa non continebatur, calefactio enim spectatur in aqua determinatæ quantitatis & sumitur gradus caloris tactu percipibilis; quorum nihil in propositione affirmativa supponitur.

## §. 293.

*Officium de  
oppositione  
iudicaturi.*

Inde porro sequitur, *antequam de oppositione iudicium fieri possit, determinatas cum subjecti, tum prædicati notiones esse constituendas, sive termino simplici utrumque indigiteretur, sive complexo.*

E. gr.

E. gr. Si quis iudicia format de eo, quod a rebus naturalibus, tanquam causis, proficisci possit, seu de earum effectibus; cum iidem sint viribus causarum proportionales, nullum casum specialem vel singularem tanquam contradictorium opponere licet asserto universali, nisi in universali & quantitas virium, & quantitas effectus fuerit accurate determinata. Applicamus hæc ad exemplum præcedens lapidis calidi, ut appareat, quanta circumspeditione opus sit, si de contradictione iudicium ferre nobis visum fuerit. Si lapis calidus calefacit, cum subiectum, tum prædicatum accurate determinari debet; circa subiectum vel determinandus est caloris gradus ope cuiusdam mensuræ ad quam refertur, vel modus, quo eundem acquisivit, una cum ceteris, quæ ad hunc gradum aliquo modo concurrunt; ratione prædicati vero obiectum, quod calefit, & gradus caloris, qui eidem confertur. E. gr. Subiectum determinabitur, si pondus lapidis & ejus densitatem una cum tempore determinaveris, per quod radiis solaribus fuit expositus, & statum cæli atque Solis isto tempore altitudinem minimam & maximam; prædicatum determinabitur, si aquæ, cui lapis immixtus fuit, quantitatem, ejus caloris gradum, antequam immitteretur, & qui secutus, postquam fuerat immixtus, ad mensuram revocaveris. Hisce neglectis, non firmum ac tutum erit de oppositione & in specie contradictione iudicium.

## §. 294.

*Si propositionum contradictoriarum una fuerit universaliter affirmans; altera est particulariter negans.* Etenim si contradictoriarum una fuerit universaliter affirmans, sub hac formula generali continetur: *Omne A est B*, ubi A denotat subiectum quodcunque in communi sive absolute positum, sive certo modo determinatum, & judicans affirmat, omni A convenire, quod notione ipsius B continetur (§. 288. sq.). Quoniam is, qui alteri contradicit, negare debet, quod affirmat alter (§. 288.); contradicturus negare debet, quod omni A tribui possit, quod notione ipsius B continetur, adeoque contendere, sub A contineri quædam, quibus tribui nequeat, quod notione ipsius B continetur. Erit igitur contradictoria universalis propositionis data: *Quoddam A non est B*: quæ cum particulariter negans sit (§. 207. 243.); evidens est propositioni univer-

*Quando contradictoria particulariter negans.*

niversaliter affirmanti respondere contradictoriam particulariter negantem.

E. gr. Si quis affirmat, *omne triangulum habere tres angulos*; qui idem negat, statuere debet, *quedam triangula non habere tres angulos* vel *quoddam triangulum non habere tres angulos*, ut adeo contradictoria sit particulariter negans.

§. 295.

*Quando particulariter affirmans.*

*Si propositionum contradictoriarum una fuerit universaliter negans; altera est particulariter affirmans.* Etenim si contradictoriarum una fuerit universaliter negans; sub hac formula generali continetur: *Nullum A est B*, ubi denuo A quodcunque subjectum in communi sive absolute, sive sub data quadam determinatione positum denotat. Quoniam igitur judicans statuit, nullum dari A, cui tribui possit, quod in notione B continetur; eidem contradicturnus affirmare debet dari quoddam A, cui tribui B possit (§. 288.). Erit igitur contradictoria universalis propositionis datæ; *Quoddam A est B*. Hæc propositio cum sit particulariter affirmans (§. 207. 243.); evidens est propositioni universaliter neganti respondere contradictoriam particulariter affirmantem.

E. gr. Si quis judicat, *nullum triangulum habere duos angulos actu rectos*; eidem contradicturnus statuere debet, *dari quedam triangula, quæ angulos duos actu rectos habeant*. Unde contradictoria: *Quedam triangula habent duos angulos actu rectos*, est particulariter affirmans.

§. 296.

*Cur due universales non sint contradictoriae.*

Quoniam nulla datur propositio universalis, quæ non sit vel affirmans, vel negans (§. 259.), utriusque autem contradictoria particularis est (§. 294. 295.); si in duabus propositionibus idem B de eodem A universaliter affirmatur, & negatur, propositiones non erunt contradictoriae.

E. gr. Si unus affirmat, *omnes planetas esse corpora telluri similia*; alter vero statuit, *nullum planetam esse corpus telluri simile*; propositiones non sunt contradictoriae. Similiter contradictoriae non sunt propositiones: *Omne triangulum habet duos angulos actu rectos* & *Nullum triangulum habet duos angulos actu rectos*.

§. 297.



§. 297.

*Propositiones*, quarum una universaliter negatur, quod *Contraria-*  
in altera universaliter affirmatur de eodem subiecto, dicuntur *rum proposi-*  
*contrarie*. *tionum defi-*  
*nitio.*

Hinc si alter affirmet, *omnes planetas esse corpora telluri similia*; alter vero statuit, *nulum planetam esse corpus telluri simile*; posterior dicitur *statuere contrarium* ejus, quod defendit prior. Et ita judicantes dicuntur *sibi invicem contrariari*, non autem *sibi mutuo contradicere*. Non inutile esse discrimen inter propositionum *contradictionem* & earundem *contrarietatem*: quemadmodum deinceps satis superque patebit.

§. 298.

Si *duæ fuerint propositiones particulares*, quarum una *af-* *Cur particu-*  
*firmatur de subiecto*, quod de eo in communi negatur altera; *larium nulla*  
*propositiones non sunt contradictoriae*. Etenim cum terminus sit *contradi-*  
communis, quo subiectum denotatur *per hypothesin*, adeoque *ctio.*  
vel genus, vel species (§. 114), subiectum particulariter sum-  
tum non denotat, nisi quædam ejus individua. Quamob-  
rem cum particularitatis signum non denotet individua in  
singulari; incertum est, num utrobique eadem indigentur,  
immo fieri potest, ut in utraque propositione supponantur di-  
versa. Quamobrem cum idem in contradictoriis esse debeat  
subiectum (§. 288.); propositiones in præsentī casu pro contra-  
dictoriis haberi nequeunt. Etenim si supponamus, in utroque  
casu determinata quædam individua exprimi; tum propo-  
sitiones erunt singulares, atque determinate enuncianda sunt in-  
dividua.

E. gr. Propositiones: *Quædam triangula habent duos angulos actu rectos & quædam triangula non habent duos angulos actu rectos*, non sunt contradictoriae, cum in priori casu supponantur triangula rectilinea; in posteriori spherica, vel curvilinea alia. Similiter contradictoriae non sunt: *Quidam homines sunt docti & quidam homines non sunt docti*, cum non sint idem numero homines, de quibus affirmatur, quod sint docti & quod non sint docti.

(Wolffii Logica)

Mm

§. 299.

## §. 299.

*Propositio-  
num subcon-  
trariarum  
& subalter-  
nantium de-  
finitio.*

*Propositiones* particulares, in quibus idem affirmatur & negatur de diversis inferioribus ad idem genus, vel eandem speciem relatis, dicuntur *subcontrariae*, quia sub contrariis (§. 297.) continentur: quemadmodum *subalternans* appellatur particularis, in oppositione ad suam universalem, sub qua continetur.

Explicamus hic terminos propositionum subcontrariarum & subalternarum cum inferius aliquis futurus sit eorundem usus. Exempli subcontrariarum dedimus (not. §. 298.). Subalternantes sunt: *Omne triangulum habet tres angulos* & *Quaedam triangula habent tres angulos*. Item ejusmodi sunt sequentes: *Omnes homines sunt mortales*; & *Quidam homines sunt mortales*. Nullus hominum in omnibus est sapiens & *Quidam homo in omnibus non est sapiens*.

## §. 300.

*Propositio-  
num opposi-  
tarum signi-  
ficatio vul-  
garis.*

*Propositiones* contradictoriae, contrariae, subcontrariae & subalternantes vocantur subinde communi nomine *oppositae*, quo in casu definiri possunt, quod sint propositiones non differentes nisi vel quantitate & qualitate, vel quantitate, vel qualitate sola.

Contradictoriae nimirum differunt & quantitate, & qualitate, cum altera sit particulariter affirmans, altera universaliter negans; vel altera universaliter affirmans, altera particulariter negans (§. 294. 295.). Contrariae & Subcontrariae differunt sola qualitate cum illarum una sit universaliter affirmans, altera universaliter negans; harum vero una particulariter affirmans, altera particulariter negans. Denique subalternantes sola quantitate differunt, cum una sit universaliter affirmans, vel negans; altera vero particulariter affirmans, vel negans. Dicuntur vero subcontrariae & subalternantes *improprie oppositae*.

## §. 301.

*Contradi-  
ctio in sub-  
alternis la-  
tem.*

*Propositio subalternans unius contrariarum est contradictoria alterius contrariarum*. In propositionibus contrariis idem universaliter de eodem subjecto affirmatur & negatur (§. 297.). Quod vero de subjecto universaliter affirmatur vel negatur, id etiam particulariter de eodem affirmari vel negari potest (§. 248.). Quod igitur alterutrum fiat, in casu priori particulariter affirmans erit contradictoria universaliter negans

tis

tis & in posteriori particulariter negans contradictoria universaliter affirmantis (§. 294. 265.). Enimvero propositiones istæ particulares sunt suarum universalium, sub quibus continentur, subalternantes (§. 299.) Patet itaque, subalternantem unius contrariorum esse contradictoriam contrariorum alterius.

E. gr. Propositiones contrariæ sunt: *Omnis homo est sapiens & Nullus homo est sapiens.* Subalternans prioris est: *Quidam homo est sapiens*, quæ contradictoria alterius contrariorum: *Nullus homo est sapiens.* Similiter subalternans posterioris contrariorum est: *Quidam homo non est sapiens*, quæ contradictoria contrariæ prioris: *Omnis homo est sapiens.*

## §. 302.

*Propositio contraria in casu particulari & singulari abit in Contrariam contradictoriam alterius.* Propositiones contrariæ non differunt, nisi quod altera sit affirmans, altera negans, utraque vero universalis. (§. 287.). Quodsi ergo alterutra mutetur in particularem vel singularem, applicatione in casu particulari, vel singulari facta (§. 49.); habemus propositiones, quarum una particulariter affirmat, quod altera universaliter negat, vel una particulariter negat, quod altera universaliter affirmat, consequenter propositiones contradictorias (§. 294. 295.) Patet itaque, propositionem contrariam in casu particulari, vel singulari abire in contradictoriam alterius.

E. gr. *Omne totum est majus sua parte & omne totum non est majus sua parte* sunt propositiones contrariæ. Jam si in casu particulari occurrat propositio: *Quoddam totum non est majus sua parte*, contraria abit in contradictoriam. Similiter propositiones contrariæ sunt: *Nullus planeta proprio lumine fulget & omnis planeta proprio lumine fulget.* Quodsi in casu singulari occurrat negativa: *Venus proprio lumine non fulget*; contrariorum prior: *Nullus planeta proprio lumine fulget*; abit in contradictoriam posterioris: *Omnis planeta proprio lumine fulget.*

## §. 303.

Quoniam itaque propositiones indefinitæ, in quibus sub-

M m 2

jectum

Contradictio

*latens in indefinitis.* injectum est terminus communis, universaliter (§. 249. & seqq.) explicari possunt, & particulariter (§. 248.); *propositiones indefinitæ oppositæ æquivalent contradictoriis, si altera universaliter, altera particulariter explicetur.*

E. gr. Propositiones indefinitæ sunt: *Homo est sapiens, & Homo non est sapiens.* Quodsi prima universaliter, altera particulariter explicetur; habebis contradictorias: *Omnis homo est sapiens & Quidam homo non est sapiens.* Similiter contradictorias habebis, si prima particulariter & altera universaliter explicetur, nimirum: *Quidam homo est sapiens & Nullus homo est sapiens.*

## §. 304.

*Contraria defendentium contradictio.*

Et quia propositionum contrariarum alterutra in casu particulari & singulari fit alterius contradictoria (§. 302.); *qui contrarium statuit, ius, quod alter defendit, in casu singulari & particulari eidem contradicere tenetur.*

E. gr. Si unus defendit, *omnes planetas esse corpora telluri similia*; alter vero statuit, *nullum planetam esse corpus telluri simile*, hic in casu particulari vel singulari alteri contradicere debet, propugnaturus, quod *quidam planeta non sit telluri similia corpora*, quod *Venus non sit corpus telluri simile.*

## §. 305.

*Contradictio latens in affirmativis.*

Si in duabus propositionibus affirmativis, quarum una universalis, altera particularis, vel utraque singularis, subiecto eidem tribuuntur, quæ eidem una convenire nequeunt; propositiones sunt contradictoriæ, etsi tales non appareant. Prædicata enim B & C, quæ eidem subiecto una convenire nequeunt, sunt ut B & non B. Quamobrem si dicatur: *Omne A est B & Quoddam A est C*, perinde est ac si diceres: *Omne A est B & Quoddam A non est B.* Quamobrem cum hæ propositiones contradictoriæ sint (§. 295.); etiam illæ: *Omne A est B & Quoddam A est C* in hypothesei theorematis contradictoriæ sunt, etsi tales externa specie non appareant.

Cui generaliter enunciata obscura videntur, ei exemplis reddentur clariora. Sit itaque universaliter affirmans: *Omne totum est majus sua parte*, & in casu particulari occurrat: *totum quoddam esse minus sua parte.* Quoniam quod minus est, id non est majus; ideo patet, propo-

propositionem particularem: *Quoddam totum est minus sua parte æquivalere huic alteri: Quoddam totum non est majus sua parte, consequenter universali: Omne totum est majus sua parte contradicere.* Non hic proponimus, nisi quod præsentissimum usum in demonstrationibus per indirectum sponder, ut alios usus silentio prætereamus, qui in parte practica parebunt. In casu singulari contradictoria sunt: *Petrus sedet & Petrus ambulat, quia ambulans non sedet.*

## §. 306.

*Si duæ fuerint propositiones negativæ, quarum una universalis, altera particularis, vel utraque singularis, & ab eodem sub-jecto remonentur, quorum alterutrum eidem necessario convenit; propositiones sunt contradictoriæ, utut tales non appareant.* Sint duo prædicata B & C, quorum alterutrum subiecto A necessario convenit, ita ut A vel sit B, vel C. Sit jam universalis propositio: *Nullum A est B*; particularis vero: *Quoddam A non est C.* Quoniam A vel B est, vel C: igitur cum non sit C per hypothesein; erit B. Quamobrem cum propositio: *Quoddam A est B* contradicat universali: *Nullum A est B*; etiam altera: *Quoddam A non est C*, eidem contradicere debet.

Contradictio  
latens in pro-  
positionibus  
negativis.

E. gr. Sint duo prædicata B & C majus toto & minus toto; subiectum A pars: erunt propositiones generalibus in demonstratione æquivalentes: *Nulla pars est major toto & Quædam pars non est minor toto.* Quoniam particulari æquivalere potest hæc altera: *Quædam pars est major toto*, universalis contradictoria; altera quoque ejusdem contradictoria esse debet.

## §. 307.

*Omnes propositiones singulares oppositæ sunt contradictoriæ.* Nam in propositionibus singularibus oppositis idem de individuo eodem affirmatur & negatur (§. 289.), consequenter idem eidem tribuitur & ab eodem removetur, seu idem eidem convenire & non convenire eodem tempore (§. 200.), consequenter idem esse & non esse simul dicitur. Omnes nimirum propositiones singulares oppositæ ad hanc formam in casu sin-

Contradictio  
ria singula-  
res.

gulari rediguntur: *Hoc A est B & Hoc A simul non est B.* Sunt igitur contradictoriae (§. 288.)

E. gr. Contradictoriae sunt: *Petrus scribit & Petrus simul non scribit, Caelum nunc est nubibus obductum & Caelum nunc non est nubibus obductum, Luna nunc lucet & Luna nunc non lucet.* Et sane ab hisce exemplis advenit nobis prima contradictionis notio, cum experiamur, nos non modo una quidpiam facere & non facere non posse; verum etiam in nostra potestate minime positum esse, ut idem simul esse & non esse cogitemus. Sed ea de re ex instituto dicemus in philosophia prima.

## §. 308.

*Propositiones  
indefinitae  
quando con-  
tradictoriae.*

*Si de quodam genere, vel quadam specie predicatur attributum, vel modi quaedam atque relationis possibilitas, quae per modum attributi inest; propositiones indefinitae oppositae equivalent contradictoriae.* Si enim de genere, vel specie, attributum aut quod per modum attributi inest, praedicatur; praedicatum ipsi constanter convenit (§. 65. 157.), consequenter quocunque tempore dato. Quoniam itaque genus & species respectu horum praedicatorum pro singularibus haberi possunt, ita ut propositiones indefinitae huc spectantes omnes oppositae sub his generalibus contineantur: *Hoc genus vel haec species, quae nomine A designatur, est B & Hoc genus vel haec species, quae nomine A designatur, non est B* (§. 288.): propositiones indefinitae oppositae in data hypothese pro contradictoriis haberi possunt (§. 307.)

E. gr. Numerus ternarius angularum est attributum proprium sive proprietas trianguli. Quamobrem si propositiones oppositae indefinitae: *triangulum habet tres angulos & triangulum non habet tres angulos* ita explices: *Hoc figurarum genus, quod trianguli nomine designatur, habet tres angulos & Hoc figurarum genus, quod trinniguli nomine designatur, non habet tres angulos; propositiones utique contradictoriae sunt.*

## §. 309.

*Casus alter.*

*Si de quodam genere, vel quadam specie sub expressa conditione praedicatur, quod eidem sub ista conditione semper convenit;*

venit; propositiones oppositæ indefinitæ æquivalent contradic-  
toriis. Demonstratio non absimilis præcedenti, modo propo-  
sitiones indefinitas generales ita concipias: *Hoc genus vel hæc  
species, quæ nomine a designatur, in hypothesi Cest B & Hoc ge-  
nus, vel hæc species, quæ nomine A designatur in hypothesi C non  
est B.*

E. gr. Triangulo rectilineo sub hac conditione, quod constituatur  
cum parallelogrammo super eadem basi & inter easdem parallelas sem-  
per convenit ratio subdupla ad parallelogrammum. Quamobrem si  
hæ propositiones: triangulum cum parallelogrammo super eadem basi &  
inter easdem parallelas constitutum est ejus dimidium & triangulum  
cum parallelogrammo super eadem basi & inter easdem parallelas con-  
stitutum non est ejusdem dimidium ita explicentur: Hæ figurarum  
species, quæ trianguli rectilinei nomine venit, sub hac conditione, quod  
cum parallelogrammo super eadem basi & inter easdem parallelas con-  
stituatur, est ipsius dimidium & non est ipsius dimidium; propo-  
sitiones erunt contradictoriæ. Contra si conditio omittatur, veluti in  
propositionibus: *Homo est doctus & Homo non est doctus*; contradictio  
nulla locum habet.

## §. II2.

Quæ salvis essentialibus, aut attributis, vel iis, quæ per  
modum attributorum insunt, consequenter definitione salva  
(§. 173. 175. 175. 176.), subjecto convenire nequeunt; eidem *re  
pugnare* dicuntur. Similiter quæ subjecto in data hypothesi, seu  
objectam determinationem, convenire nequeunt; ea *hypothe-  
si repugnare*; Quæ vero eidem subjecto simul convenire neque-  
unt, eam *utroque sibi repugnare* dicimus.

*Quænam re-  
pugnare di-  
cantur.*

E. gr. Essentialia Quadrati sunt laterum numerus quaternarius, eo-  
rundem æqualitas & quod omnes anguli sint recti. Enimvero salvis  
istis essentialibus, consequenter salva definitione Quadrati, quod sit  
figura quadrilatera, æquilatera & rectangula, eidem convenire ne-  
quit angulorum inæqualitas, cum omnes anguli recti sint inter se  
æquales: inæqualitas itaque angulorum Quadrato repugnat. Similiter  
rhombi attributum, quod duo anguli diagonaliter apposti junctim sum-  
ti vel sint duobus rectis minores, vel majores. Eidem igitur repu-  
gnat, quod circulo inscribi possit, cum in quadrilatero circulo inscri-  
pto anguli diagonaliter oppositi simul non possint esse nisi duobus re-

ctis

etis æquales. E contrario si Trapezium supponitur circulo inscriptum & singuli ejus anguli obliqui; anguli diagonaliter oppositi non possunt esse æquales. Cum enim simul sint duobus rectis æquales, forent singuli recti, adeoque non obliqui. *Æqualitas adeo angularum diagonaliter oppositorum in trapezio repugnat hypothese, quod circulo sit inscriptum & obliquangulum.* Denique fieri non potest, ut triangulum sit rectilinum & habeat duos angulos acutius rectus. Dicuntur igitur hæc duo inter se pugnare, vel sibi mutuo repugnare.

§. 311.

*Quenam sibi  
mutuo repu-  
gnant.*

Quoniam contradictoria simul esse nequeunt (§. 288.), neque etiam contraria (§. 297.); igitur & *contradictoria & contraria sibi mutuo repugnant.*

E. gr. Propositiones contradictoriæ sunt: *omne triangulum habet tres angulos & quadam triangula non habent tres angulos*; repugnare igitur dicitur, ut *omne triangulum habeat tres angulos & tamen sint quadam triangula, que non habent tres angulos.* Similiter propositiones contrariæ sunt: *Omnes planetae sunt corpora telluri similia & Nullus planeta est corpus telluri simile*; repugnare igitur dicitur, ut *planetae sint simul corpora telluri similia & non similia.*

§. 312.

*Cryptica-  
rum propo-  
sitionum defi-  
nitio.*

*Propositiones crypticæ* dicuntur, quarum genuina forma non apparet.

Exempli loco sunt *propositiones oblique universales* (§. 246.), qualis est ista: *In omni triangulo latus majus subtendit majorem angulum*, ubi latus majus videtur esse subiectum, signum tamen universalitatis ad ipsum referri nequit. Est igitur propositio cryptica, quæ ad manifestam reducitur: *Omne triangulum habet latus majus majori angulo oppositum*, ubi patet, subiectum esse *triangulum*, quod respicit *signum universalitatis*. Idem ostendi poterat ex definitionibus subiecti & prædicati (§. 200.). Etenim cum subiectum sit res ista, de qua judicatur, hic vero judicetur de triangulo; triangulum omnino subiectum haberi debet. Quoniam vero ea trianguli proprietates est, quod latus majus majorem angulum subtendat, & id, quod reicidam tribuitur, sit prædicatum propositionis; erit utique propositionis istius prædicatum, quod latus majus angulum majorem subtendat.

§. 313.

*Unde Cry-  
ptis oriatur*

Quoniam igitur omnis propositio constat ex subiecto, prædicato atque copula (§. 199. 201.), & subiectum quidem propter



propter signum quantitatis priori loco ponendum, omnis quo- & *dijudice-*  
que propositio suum habere debet signum ejus quantitatem pa- *tur.*  
riter ac qualitatem indicans (§. 259.), atque in negativis ne-  
gatio copulam afficit (§. 207.), sique prædicatum subiecto non  
absolute competit, determinatio adjicienda (§. 228.): *Crypti-*  
*cæ propositiones erunt omnes, ubi non statim apparet, 1. Quod-*  
*nam sit prædicatum, quodnam subiectum; 2. Utrum sint affirma-*  
*tivæ, an negativæ; 3. Utrum sint universales, an particulares;*  
*4. Quænam ad subiecti determinationem, quænam vero ad prædi-*  
*catum sint referenda.* Ad hæc qui attendit, propositiones cryp-  
ticas facile agnoscet, & ubi lateat cryptis, reperiet, ut de cryp-  
ti propositionum in species distinguenda non debeamus esse sol-  
liciti.

E. gr. In exemplo modo (*not.* §. 312.) allato subiectum latet, quia in ca-  
su obliquo effertur. Sunt porro latentis subiecti propositiones: *Dimi-*  
*dium parallelogrammi est triangulum super eadem basi & ejusdem alti-*  
*tudinis; laborandum est &c.* quarum priori subiectum ponitur loco  
posteriori, qui prædicato convenit; posteriori autem prorsus omitti-  
tur, cum ea æquipolleat huic alteri: *Homo laborare debet.* Propositio-  
nes indefinite præbent exemplum crypticarum, in quibus latet signum  
quantitatis (§. 244.) & infinitæ eum illustrent casum, ubi qualitas latet  
(§. 209.). Pertinent quoque ad casum latentis quantitatis propositiones  
oblique universales & particulares (§. 246. 247.). Cryptis occurrit  
contradictionis in propositionibus quoad externam speciem contrariis  
(§. 308. 309.) & cryptica est propositio, ubi contradictio in affirmativis  
latet (§. 305.) atque in negativis (§. 306.).

## §. 314.

*Propositiones simplices* dicuntur, quæ unum habent sub- *Propositio-*  
jectum atque prædicatum. *Compositæ* vero sunt, quæ ex plu- *num simpli-*  
ribus simplicibus coalescunt, veluti cum idem fuerit subiectum, *cium & con-*  
prædicata vero sunt diversa; vel cum idem prædicatum fuerit, *positarum*  
diversa vero sunt subiecta. *definitio.*

E. gr. Propositio: *Triangulum æquicurum habet angulos ad basin*  
*æquales, & per perpendicularum ex vertice in eam demissum dividitur*  
*in duas partes æquales,* est exemplum casus primi, de eodem enim sub-  
(*Wolffii Logica.*) Nn iecto

jecto duo diversa prædicantur, & patet, propositionem ex his duabus componi: *Triangulum æquicrurum habet angulos ad basin æquales & Triangulum æquicrurum per perpendicularum ex vertice in basin demissum dividitur in duas partes æquales.* Similiter composita est: *Triangulum vel est rectilineum, vel curvilineum,* junguntur enim eidem subiecto duo prædicata, quamvis disjunctive, quia ambo eidem triangulo competere nequeunt, alterutrum vero convenire debet. Exemplum casus secundi est: *Anguli & rectilinei & spherici contigui sunt æquales duobus rectis,* hic enim duobus subiectis idem tribuitur prædicatum. Huc quoque pertinet propositio: *Et Reges, & subditi moriuntur.* Dantur etiam exempla alia, veluti si judices, *obliquitatem ecliptica vel esse constantem, vel mutabilem.*

## §. 315.

*Propositionis  
copulativæ  
definitio.*

*Propositio composita dicitur copulativa,* si subiectum vel prædicatum conjunguntur, ita ut utrique subiecto sigillatim possit tribui idem prædicatum, vel eidem subiecto possint tribui singula prædicata, aut in negativis ab eo removeri.

Exempla propositionum copulativarum sunt: 1. *Deus est & liberrimus, & sapientissimus:* etenim quodlibet prædicatum sigillatim Deo tribui potest, resolvendo propositionem compositam in duas simplices: *Deus est liberrimus & Deus est sapientissimus:* 2. *Homines pariter atque bruta habent organa sensoria,* nam prædicatum unicuique subiecto sigillatim tribui potest resolvendo compositam in has simplices: *Homines habent organa sensoria & Bruta habent organa sensoria:* 3. In negativis: *Deus nec est mutabilis, nec finitus,* nam & hæc propositio composita negativa in duas simplices resolvitur: *Deus non est mutabilis, & Deus non est finitus.*

## §. 316.

*Propositionis  
disjunctivæ  
definitio.*

*Propositio composita dicitur disjunctiva,* ubi ex pluribus prædicatis unum tribuendum esse subiecto affirmatur, sed quodnam eorum tribui debeat, non determinatur.

E. gr. Si quis dicat: *Anima aut habet rationem existentia sue sufficientem in seipsa, aut in alio,* propositio composita disjunctiva est: etenim alterutrum prædicatorum tribuendum est animæ, quodnam vero tribuendum sit, in dubio relinquitur. Similiter si quis affirmet: *Triangulum aut est æquilatrum, aut æquicrurum, aut scalenum,* propositio composita disjunctiva est: etenim in quolibet casu unum horum prædicatorum tribui debere triangulo affirmatur; aut non determina-

tur, quodnam tribuendum sit, cum universalis determinatio non habet locum. Huc etiam pertinet exemplum vulgare: *Aut dies est, aut nox est*, in quo aliqua crypsis latet (§. 312.), cum subiectum non appareat. Sublata crypsi propositio talis erit: *Hoc tempus aut dici est, aut nox est*, vel etiam: *Omne tempus aut diurnum est, aut nocturnum*: nimirum de omni tempore predicari potest alterum um horum, quod sit dies sive tempus diurnum, aut quod nox sit, sive tempus nocturnum.

## §. 317.

Plura nec de propositionibus compositis, nec de propositionum simplicium affectionibus addimus, propterea quod non plura tradamus, quam quæ instituto nostro interviunt, & indispensabilem in praxi usum habent. Patebit vero ex sequentibus, ea, quæ a nobis traduntur, ad amplissimam Logicæ praxin sufficere, & singula ad aliquem usum non contemnendum transferri.

## §. 318.

Non tamen utilitate sua caret monuisse, nonnullos cum *Pero Ramo* termino *propositionum contradictoriarum* ampliorem significatum tribuere, quam a nobis factum fuit, ita ut omnes *propositiones oppositæ* proprie sic dictæ, in quibus nempe idem de eodem subiecto vel universaliter affirmatur atque negatur, vel universaliter affirmatur & particulariter negatur & contra, consequenter & contradictoriæ (§. 294 295.), & contrariæ (§. 297.) sub eodem comprehendantur. Immo accidit subinde, ut unus idemque Autor terminum *contradictoriarum propositionum* nunc *strictius* sumat, prout a nobis factum; nunc vero *larius*, prout hic explicamus: quemadmodum jam olim *Aristoteles* utrumque significatum adhibuit. Nos, qui ab omni ambiguitate in dicendo sumus quam maxime alieni, strictiori significatui semper inhærebimus, nunquam recedentes ab eo significatu, quem vi definitionum terminis asseruimus.

Scholion generale.

Propositione contradictoria quænam a nonnullis dicantur.

DE USU VOCUM SEU TERMINORUM  
CIRCA JUDICIA.

§. 319.

*Quot voces  
adpropositio-  
nem requi-  
rantur.*

**P**ropositiones nec pluribus, nec paucioribus constare debent vocibus, quam quæ ad significandum subjectum & prædicatum, illiusque determinationem, si qua adfuerit, atque propositionum quantitatem & qualitatem sufficiunt. Propositionibus significamus alteri, quid rebus convenire, vel non convenire judicemus (§. 41. ). Jam res, de qua judicium fertur, subjectum est; quod vero ei convenire, vel non convenire judicatur, prædicatum (§. 200. ), cumque prædicatum subiecto non absolute, sed sub certa tantum conditione tribui possit, status ejus determinari debet, sub quo prædicatio locum habet (§. 228. ); & tandem ratione qualitatis propositiones vel affirmativæ sunt, vel negativæ, ratione quantitatis vel universales, vel particulares (§. 259. ). Quamobrem ad judicium significandum sufficiunt voces, quibus subjectum & prædicatum atque illius determinatio una cum qualitate ac quantitate propositionum indigitatur. Neque ergo pluribus, nec paucioribus in propositionibus locus concedi debet.

Omnia propositionum exempla in antecedentibus data propositionem præsentem illustrent & omnes propositiones Logicæ exempli loco esse possunt.

§. 320.

*Propositio-  
nem deter-  
minatarum  
& vagarum  
definitio.*

*Propositiones dicimus determinatas, quas nec plures, nec pauciores ingrediuntur voces, quam ad judicium determinatum significandum sufficientes. Judicium vero determinatum dicitur a nobis, quod servat formam a Logica præscriptam, nempe*

nempe ut subjectum repræsentetur sub ea notione, ut in ea contineatur ratio, cur eidem conveniat prædicatum, seu id, per quod determinatur prædicatum. *Vagum* appellamus *judicium*, quod subjectum ita non exhibet, ut notio ejus includat id, per quod prædicatum determinatur. *Vaga* autem *propositio* est, qua *judicium vagum* significatur.

Mathematici determinatas amant propositiones, quamobrem earum exempla sunt singulæ in nostris *Elementis Matheſeos* obviæ. Subjectum nude positum continet id in sua definitione, per quod prædicatum determinatur; si vero sola definitio non sufficit, in hypothesis exprimuntur conditiones, sub quibus prædicatum subjecto tribui potest. Quamobrem cum nobis (§. 121. *Disc. præl.*) fuerit demonstratum, in propositionibus philosophicis conditionem accurate determinandam esse, sub qua prædicatum subjecto convenit, seu sub qua aliquid de eodem affirmatur, vel negatur, nostræ quoque Logicæ propositiones omnes determinatæ sunt, nec dabimus alias per philosophiæ partes ceteras omnes. Vulgo *judicia* nec satis determinata fiunt, nec determinate satis enunciantur: *vaga* sunt pleraque & *vagæ* propositiones, quibus *Autores* communiter utuntur, quoniam determinationes nunc omittuntur, nunc non integre apponuntur, nunc *Oratorum* more subjecto & prædicato adjiciuntur superflua, quibus in enunciatione *Logica* nullus est locus.

§. 321.

*In propositionibus non utendum est terminis nisi propriis & fixis.* Propositiones condimus cum in finem, ut alteri significemus *judicium nostrum* (§. 41.). Enimvero cum alter mentem nostram non intelligat, nisi auditis vocibus easdem in se notiones excitare valet, quæ cum terminis propositionem ingredientibus (§. 319.) conjunguntur (§. 117.); singulis invariata respondere debet notio. Non igitur in propositione utendum est terminis nisi fixis (§. 129.).

*Quales esse debeant termini,*

Porro ut quis eas vocibus auditis notiones in se excitare valeat, quæ cum terminis propositionem ingredientibus conjunguntur; utendum est terminis, quibus attribuuntur istæ notiones, quibus indigitandis destinantur, consequenter propriis (§. 138.).

Notanda hic sunt, quæ de proprio significato terminorum demonstrata (§. 148. 162.).

## §. 322.

*Definitio-  
num in pro-  
positionibus  
usus.*

Patet hinc, quanta sit definitio-  
num necessitas, ut propositiones ab altero possint intelligi.

Hæc sane ratio est, cur Mathematici definiant terminos, qui propositiones ipsorum ingrediuntur, & cur nos methodo philosophica philosophantes ipsorum institutum imitemur (§. 116. *Disc. præl.*).

## §. 323.

*Subiectum  
apparenter  
idem.*

Si in duabus propositionibus subiectum fuerit idem terminus, eidem tamen diversæ tribuuntur notiones; subiecta diversa sunt & propositiones diversæ, utut idem prædicatum. Etenim si eidem termino notiones diversæ respondent; res diversæ eodem denotantur (§. 37.), adeoque diversa sunt subiecta (§. 200.), consequenter nec propositiones eadem. Suppono etenim, propositionem eandem esse, cujus subiectum & prædicatum idem, cum ex subiecto & prædicato constet propositio (§. 100.).

E. gr. Si quis cum *Euclide* vocem *trianguli* sumat pro triangulo rectilineo, alius cum *Theodosio* pro triangulo in genere, ut præter rectilineum etiam curvilineum quodcumque & mixtilineum sub eodem complectatur; propositio, quæ eadem videtur, penes duos Autores non est eadem, etsi idem fuerit prædicatum, scilicet quod *triangulum non habeat angulum nisi unum actu rectum*. Etenim in significato *Euclideo* vera est propositio; in significato *Theodosiano* falsa. Similiter non idem subiectum est in hisce propositionibus: *Triangulum habet tres angulos duobus rectis æquales* & *Triangulum habet tres angulos actu rectos*, si in priori sumitur terminus in significato *Euclideo*, in posteriori in *Theodosiano*.

## §. 324.

*Prædicatum  
apparenter  
idem.*

Si in duabus propositionibus prædicatum fuerit idem terminus, eidem tamen diversæ respondeant notiones; prædicatum idem non est, nec propositiones eadem sunt, utut subiectum fuerit idem. Demonstratio eadem est, quæ propositionis præcedentis.

E. gr.

E. gr. Si duo affirmant, *Petrum esse doctum* alius tamen vocem *docti* in alia sumit significatione, quam alter; judicia eorum & ipsæ quoque propositiones, quibus illa significantur, pro iisdem haberi nequeunt.

§. 325.

Si in duabus propositionibus & subiectum, & prædicatum fuerit idem terminus, utrique tamen diversæ respondeant notiones; propositiones diversæ sunt. Etenim si subiectum fuerit idem terminus, sed ei respondeant diversæ notiones; subiectum idem non est (§. 323.). Si prædicatum fuerit idem terminus, utrique tamen diversæ respondeant notiones, prædicatum idem non est (§. 324.). Ergo si & subiectum & prædicatum idem fuerit terminus, utrique tamen notiones diversæ respondeant; & subiectum, & prædicatum diversum est, consequenter duæ propositiones, etsi quoad speciem externam eadem, diversa judicia significant, adeoque & ipsæ diversæ sunt (§. 41.).

Propositiones apparenter eadem.

Levioris videri poterat momenti talia moneri: apparebat tamen suo loco, magnum in praxi momentum ea habere, eorumque neglecta multas logomachias inter eruditos oriri.

§. 326.

Diversus ejusdem vocis significatus dicitur *Homonymia* atque *Æquivocatio*. Et res diversæ eodem termino denotatæ *Homonymia* seu *æquivoca* appellantur: ipse autem terminus res diversas denotans *homonymia* seu *æquivocus* vocatur.

*Homonymia definitio.*

E. gr. Vox *trianguli* æquivoca est, cum sumatur vel cum *Euclide* pro triangulo rectilineo in specie, vel cum *Theodosio* pro triangulo quocunque sive rectilineo, sive curvilineo, sive mixtilineo.

§. 327.

*Æquivocatio propositionem non reddit interpretationis dubie, modo in eodem libro, vel ab eodem Autore in scriptis suis evitetur.* Si enim in eodem libro, vel ab eodem Autore in scriptis suis evitetur æquivocatio, termino eodem eadem constanter res indigitatur (§. 326.). Quamobrem cum, quod fieri debet (§. 322.), terminus ab autore fuerit definitus; in casu quolibet constat, quamnam notio eidem sit tribuenda, consequen-

*Æquivocatio quando non molesta.*

ter judicium Autoris intelligi potest (§. 117.), neque adeo est interpretationis dubia.

E. gr. Licet *Theodosius* terminum *trianguli* generaliter sumat, quem *Euclides* nonnisi de rectilineo accipit, nulla tamen hinc propositio, quæ de triangulis quidpiam demonstratur, in *Elementis Geometriæ* est dubiæ interpretationis, cum triangulum ita definiatur, ut nonnisi rectilineo conveniat definitio, nec in iisdem *Elementis* unquam aliter, quam de rectilineo usurpetur.

## §. 328.

*Subjectum  
apparenter  
diversum.*

*Si in duabus propositionibus subjectum fuerit terminus diversus, utrique tamen eadem notio respondeat; subjectum diversum non est & accedente eodem prædicato propositiones eadem sunt.* Si enim in utraque propositione termino, quo denotatur subjectum, eadem notio respondeat; utrobique eadem res indigitatur (§. 37.), atque adeo subjectum idem est (§. 200.).

Quamobrem si idem quoque fuerit prædicatum, propositiones idem & subjectum, & prædicatum habentes eadem sunt.

E. gr. Quod stylo *Leibnitiano* dicitur *calculus differentialis*, stylo *Newtoniano* appellatur *methodus fluxionum*. Quamobrem si dicas *Calculus differentialis* inservit *tangentibus determinandis* & *Methodus fluxionum* inservit *tangentibus determinandis*; propositiones eadem sunt, subjectum in utraque idem.

## §. 329.

*Prædicatum  
apparenter  
diversum.*

*Si in duabus propositionibus prædicatum fuerit terminus diversus, utrique tamen eadem notio respondeat; prædicatum diversum non est & accedente eodem subjecto propositiones eadem sunt.* Ostenditur eodem prorsus modo, quo præcedens propositio (§. 328.).

E. gr. Cum *calculus differentialis* & *fluxionum methodus* eandem rem significant; propositiones: *Geometria seculo præterito ditata est calculo differentiali* & *Geometria seculo præterito ditata est methodo fluxionum*, idem habent prædicatum & propositiones eadem sunt.

## §. 330.

*Synonymia  
definitio.*

*Terminorum sive vocum significatus idem dicitur Synonymia;*



*nymia*; ipſi autem termini diverſi eundem ſignificatum habentes *Synonyma* aut termini *Synonymici* vocantur.

E. gr. *Calculus differentialis & fluxionum methodus*, cum eandem rem ſignificent, *Synonyma* ſunt ſeu termini *ſynonymici*.

§. 331.

*Si in duabus propoſitionibus & ſubjectum, & prædicatum fuerint Synonyma; propoſitiones eadem ſunt.* Nam ſi ſubjecta *apparenter diverſa* ſynonyma fuerint, propoſitiones idem habent ſubjectum (§. 328. 330.); ſi vero prædicata fuerint ſynonyma, idem habent prædicatum (§. 329. 330.). Ergo ſi & ſubjectum, & prædicatum fuerint ſynonyma; & ſubjectum, & prædicatum idem eſt, conſequenter propoſitiones eadem ſunt, etſi diverſæ appareant.

Patebit harum quoque propoſitionum uſus in praxi Logica: Non eadem facilitate applicantur propoſitiones, qua intelliguntur; ſicuti e contrario quædam facile applicantur, quæ difficulter comprehenduntur.

## SECT. IV.

DE

# RATIOCINATIONE

SEU

## DISCURSU IN SPECIE.

### CAPUT I.

## DE SYLLOGISMO IN GENERE.

§. 332.

**S***yllogismus* eſt oratio, qua ratiocinium ſeu diſcurſus diſtincte proponitur. *Syllogismi definitio.*

Ratiocinium nempe nobis eſt operatio mentis, quemadmodum notio & iudicium. Sicuti vero notio ſignificatur termino, iudicium propoſitione; ita ratiocinium ſyllogiſmo.

(Wolſii Logica)

O o

§. 333.

## §. 333.

Partes Syllogismi.

*Syllogismus tribus constat propositionibus, quarum duæ habent terminum commune, tertia vero combinantur termini in prioribus diversi.* Syllogismus enim distincte proponere debet ratiocinium sive discursum (§. 332.). Quamobrem cum ratiocinando ex duabus propositionibus terminum commune habentibus tertia formetur, combinando terminos in utraque diversos (§. 50.); evidens est, syllogismum constare debere ex tribus propositionibus, quarum duæ communem habent terminum, tertia vero componitur ex terminis, qui in illis sunt diversi.

E. gr. In hoc syllogismo: *Omne triangulum habet tres angulos. Omne triangulum sphericum est triangulum. Ergo Omne triangulum sphericum habet tres angulos:* duæ propositiones priores terminum *triangulum* habent commune; in tertia vero ceteri duo diversi *triangulum sphericum* & *habere tres angulos* combinantur, ut unus sit subiectum, alter vero prædicatum.

## §. 334.

Termini syllogismi in-  
gredientes.

*Syllogismus constare nequit, nisi tribus terminis.* Constat enim syllogismus tribus propositionibus, quarum duæ terminum habent commune, tertia vero combinantur termini in prioribus diversi (§. 333.). Cum igitur propositio duobus terminis constet (§. 199.); in duabus propositionibus prioribus communem terminum habentibus nonnisi tres termini continentur. Sed tertia formata per combinationem eorum, qui in iisdem propositionibus diversi sunt, non novum terminum in syllogismum invehit. Quare syllogismus constare nequit nisi tribus terminis.

E. gr. In syllogismo anteriori termini tres sunt *triangulum* in genere, *triangulum sphericum* in specie & *habere tres angulos*.

## §. 335.

Premissarum, conclusionis & illarum.

Duæ propositiones, ex quibus tertia formatur, combinando duos terminos in istis obvios, dicuntur *Premisse*, a nonnullis quoque *Sumptiones*: tertia vero, quæ ex iis dicta ratione formatur.

formatur, *conclusio* appellatur. Ipsa denique propositionis *ter-* *tianis definitio.*  
*tia* formatio per combinationem terminorum in duabus aliis *tio.*  
 terminum communem habentibus diversorum *Illatio* audit.

E. gr. In syllogismo anteriori præmissæ sunt: *Omne triangulum habet tres angulos & Omne triangulum sphericum est triangulum.* Conclusio vero est: *Omne triangulum sphericum habet tres angulos & tertia hæc propositio sive conclusio ex duabus prioribus seu præmissis inferri dicitur.*

## §. 336.

Terminus præmissarum communis vocatur *Medius*; diversi vero dicuntur *Extremi*. *Termini medii & extremi definitio.*

E. gr. In syllogismo anteriori terminus medius est *triangulum* in genere: extremi vero sunt *triangulum sphericum in specie & habere tres angulos.*

## §. 337.

*Terminus medius non potest ingredi conclusionem.* Etenim terminus medius est terminus præmissarum communis (§. 336.): conclusio vero formatur combinando terminos præmissarum diversos (§. 335.). Patet itaque terminum medium conclusionem ingredi non posse. *Cur terminus medius ex conclusione exulet.*

E. gr. In syllogismo anteriori terminus medius est *triangulum* in genere (not. 336.); conclusio vero: *triangulum sphericum habet tres angulos* (not. §. 335.). Sed hic in conclusione *trianguli* in genere tanquam termini medii nulla fit mentio.

## §. 338.

*Conclusio componitur ex terminis syllogismi extremis.* Componitur enim ex terminis præmissarum diversis (§. 335.). Sed termini præmissarum diversi sunt extremi syllogismorum (§. 336.). Ergo Conclusio componitur ex terminis extremis syllogismorum. *Termini conclusionis.*

E. gr. In exemplo nostro termini extremi sunt *triangulum sphericum in specie & habere tres angulos.* Et conclusio: *Omne triangulum sphericum habet tres angulos*, ex iis componitur.

## §. 339.

*Major terminus* appellatur extremus, qui subit vicem *Majoris & præ-*  
 Oo 2

minoris ter-  
mini definitio.

prædicati in conclusione: *Minor* autem, qui in eadem tuetur locum subiecti.

E. gr. Conclusio nostri syllogismi est: *Omne triangulum sphericum habet tres angulos*. In eo igitur terminus major est *habere tres angulos*; minor vero *triangulum sphericum*.

§. 340.

Majoris &  
minoris pro-  
positionis de-  
finitio.

*Propositio major* est præmissa, in qua terminus major con-  
struitur cum termino medio. *Minor* vero est *propositio*, in qua  
terminus minor construitur cum medio.

E. gr. In nostro exemplo terminus major est *habere tres angulos*; minor vero *triangulum sphericum* (not. §. 339.), medius *triangulum* in genere (not. 336.). In præmissa: *Omne triangulum habet tres angulos*, terminus major *habere tres angulos* combinatur cum medio, *triangulum* in genere. Est itaque propositio major. In altera præmissa: *Omne triangulum sphericum est triangulum*, terminus minor *triangulum sphericum* construitur cum medio, *triangulum* in genere. Est igitur propositio minor.

§. 341.

Syllogismi  
affirmantis  
& negantis  
definitio.

*Syllogismus affirmans* dicitur, cujus conclusio est affir-  
mans: *Syllogismus vero negans*, cujus conclusio est negans.

Exemplum, quo hætenus usi sumus ad illustrandas definitiones &  
propositiones de syllogismo in genere, fuit syllogismus affirmativus,  
nam in eo conclusio: *Omne triangulum sphericum habet tres angulos*,  
est propositio affirmativa. Negativus autem Syllogismus est: *Nullum  
triangulum habet quatuor angulos*. *Omne triangulum sphericum est tri-  
angulum*. Ergo: *Nullum triangulum sphericum habet quatuor angu-  
los*. In eo enim conclusio negativa est. Syllogismus affirmans &  
negans dicantur etiam *Syllogismus affirmativus & negativus*.

§. 342.

Syllogismi u-  
niversalis &  
particularis  
definitio.

*Similiter Syllogismus universalis* dicitur, cujus conclusio  
universalis: *Syllogismus vero particularis*, cujus conclusio parti-  
cularis vel singularis, non tamen propria: etenim jam in supe-  
rioribus propositiones illas singulares ad particulares retuli-  
mus (§. 259.).

Syllogismi anteriores (not. §. 333-341.) sunt universales. Exempla  
particularium sunt: 1. *Omne triangulum sphericum habet tres angulos*.  
*Hoc triangulum sphericum est triangulum sphericum*. Ergo *hoc trian-  
gulum*

*gulum sphericum habet tres angulos.* 2. *Omnis sapiens prospicit futurum.* *Quidam homines sunt sapientes.* Ergo *Quidam homines prospiciunt futurum.* 3. *Nullus, qui ratione utitur, affectuum impetu abripitur.* *Quidam homines utuntur ratione.* Ergo: *Quidam homines non abripiuntur affectuum impetu.* Etenim in syllogismo primo conclusio est singularis; in duobus posterioribus particularis.

## §. 343.

*In exemplis Syllogismorum (not. §. 333. 341. 342.) allatorum* *Fundamen-*  
*tum figura-*  
*rum Syllogis-*  
*morum.*  
*medius terminus est predicatum in minore, subiectum in maiore pro-*  
*positione. Occurrunt vero etiam Syllogismi, in quibus medius ter-*  
*minus in utraque præmissa est predicatum, vel etiam subiectum.*

E. gr. *Omnis sapiens eligit media fini convenientia.* *Quidam homines non eligunt media fini convenientia.* Ergo *Quidam homines non sunt sapientes.* Hic medius terminus est *eligere media fini convenientia*, tanquam communis præmissarum (§. 336.). Patet vero per se, quod bis ponitur loco prædicati. Sic in Geometria argumentamur: *Omnis Parabola habet Quadrata semiordinatarum abscissis proportionalia.* *Hæc figura non habet Quadrata semiordinatarum abscissis proportionalia.* Ergo *hec figura non est parabola.* In hoc syllogismo medius terminus habere *Quadrata semiordinatarum abscissis proportionalia* bis ponitur loco prædicati. E contrario si quis argumentatur: *Nullus stultus prospicit futura.* *Quidam stulti sunt divites.* Ergo *Quidam divites non prospiciunt futura:* medius terminus *esse stultum* bis ponitur loco subiecti.

## §. 344.

*Distinguuntur hinc Syllogismi in diversa genera, quæ Fi-* *Figurarum*  
*definitio.*  
*gurarum nomine designantur. Et Figura quidem prima Syl-*  
*logismorum dicitur, in qua medius terminus est subiectum pro-*  
*positionis majoris & predicatum minoris. Figura secunda vo-*  
*catur, in qua medius terminus est utriusque præmissæ prædica-*  
*tum. Figura denique tertia audit, in qua medius terminus in*  
*maiore & minore est subiectum.*

## §. 345.

*Quoniam vero in singulis figuris propositiones, ex quibus* *Modorum*  
*definitio.*  
*constant Syllogismi, ratione quantitatis & qualitatis differre pos-*  
*sunt (§. 259.); ideo in singulis figuris per diversitatem quanti-*

tatis vel qualitatis propositionum constituuntur Syllogismorum species, quæ *Modi* appellantur.

Exempla Modorum differentium dabimus in tractatione speciali.

§. 346.

*Dictum de omni.*

*Dictum de omni* dicitur propositio: *Quicquid de genere vel specie omni affirmari potest, illud etiam affirmatur de quovis sub illo genere vel illa specie contento.*

E. gr. De omni triangulo in genere prædicatur, quod *habeat tres angulos*; idem igitur etiam prædicari potest de quavis specie triangulorum, v. gr. de *triangulis sphericis*. Illud adeo evidens est, ut sine probatione concedatur. Si quis enim hoc dictum in dubium vocare velit, is absurditatis convincetur per principium contradictionis: statuere enim debet, idem simul esse & non esse. Atque ea de causa superius dictum de omni supposuimus in definitione propositionis universalis (§. 242.).

§. 347.

*Dictum de nullo.*

E contrario *Dictum de nullo* appellatur propositio sequens: *Quicquid de genere vel specie omni negatur; illud etiam de quovis sub illo genere vel illa specie contento negari debet.*

E. gr. De omni triangulo in genere negatur, quod *habeat quatuor angulos*; idem igitur etiam negari debet de quavis specie triangulorum, v. gr. de *triangulis sphericis*. Dictum de nullo eadem evidentia nititur, qua dictum de omni, quomobrem idem quoque supposuimus in definitione propositionis universalis (§. 242.). Omnia nimirum, quæ sub specie continentur, omnem constituunt speciem; & omnia, quæ sub genere continentur, omne constituunt genus. Quomobrem si dictum de nullo neget, vel in dubium voces, de novo impinges in principium contradictionis: debes enim admittere idem simul esse & non esse, dari e. gr. nullum triangulum, cui quatuor conveniunt anguli, & dari tamen aliqua triangula, quæ quatuor habent angulos: quod est contradictorium (§. 295.).

§. 348.

*Dictum de omni & nullo ulterius extensum.*

*Vi dicti de omni & nullo de quibusdam speciebus vel individuis sive absolute, sive sub expressa conditione affirmandum, vel negandum, quod de genere vel specie sive absolute, sive sub expressa conditione affirmari vel negari potest, sub quibus istæ species*

*species vel individua continentur.* Etenim vi Dicti de omni & nullo quicquid de genere vel specie omni, hoc est, universaliter (§. 242.) affirmatur, vel negatur, etiam de quovis sub genere vel specie contento (§. 346. 347.), consequenter de specie quavis ad genus, & de individuis singulis ad speciem quamvis pertinentibus (§. 44. & seqq.) affirmari, vel negari debet. Quod vero de aliqua specie, vel genere aliquo affirmatur vel negatur, sive absolute, sive sub expressa conditione; id de illo genere vel specie illa universaliter affirmatur, vel negatur (§. 249. & seqq.). Ergo vi Dicti de omni & nullo etiam de singulis individuis sub specie vel genere & de quavis specie sub genere contentis, consequenter & de quibusdam individuis, vel speciebus sub specie illa vel genere contentis sive absolute, sive sub eadem conditione affirmari vel negari debet (§. 248.).

Potuissemus hanc propositionem cum sequenti appellare *dictum de omni & nullo*. Enimvero cum vulgo dictum hoc ita efferri soleat, quemadmodum idem (§. 346. 347.) enunciamus: a consuetu hujus termini significatu recedere nolimus (§. 147. *Disc. prel.*), etsi dubium non sit, quod magis determinate dictum de omni & nullo enunciarum jam olim fuisset, si singula, quæ nos de notionibus & judiciis tradidimus, distincte perspecta fuissent.

## §. 349.

Quoniam generi vel speciei per definitum designatis notio in definitione eidem attributa respondet tanquam prædicatum, & vicissim generi vel speciei notione distincta completa repræsentatis definitum tanquam prædicatum tribuitur (§. 252. 254. 255.); dictum de omni & nullo etiam has propositiones sub se comprehendit: 1. *Cui definitum competit, eidem quoque competit notio integra in definitione ei attributa; competunt quoque singula sigillatim enuncianda, quæ in notione ista continentur.* 2. *Cui conveniunt notæ in definitione enumeratæ simul, eidem quoque convenit definitum.* Et contra 3. *Cui definitum non competit, de eo nec notio integra in definitione eidem attributa*

*Uterior extensio dicti de omni & nullo ad definitiones.*

*buta prædicari potest. 4. Cui non conveniunt notæ omnes in definitione enumeratæ simul, ei nec definitum convenit. Quæ in superioribus partim demonstrata (§. 253. 254. 256.), partim ex supra positis (§. 48.) manifesta sunt.*

## §. 350.

*Extensio ejusdem ad prædicationes proprias.*

Et quia nota ad individuum quoddam nomine proprio vel alia ratione designatum agnoscendum sufficiens definitionis vicem subit; vi ejusdem dicti de omni & nullo porro patet: 1. *Cui ista nota convenit; illud esse id ipsum individuum hoc nomine proprio vel data alia ratione designandum & vicissim.* 2. *Cui nomen istud proprium vel determinatio ista singularis convenit, ei quoque notam istam convenire.* Sed 3. *Cui nota ista non convenit, ei nec nomen proprium aut determinationem istam singularem tribui posse.* 4. *Cui nomen proprium vel determinatio ista singularis non convenit, ei nec notam convenire posse.*

E. gr. *Leibnitius* est Autor Theodiceæ. Hoc prædicatum ipsi soli convenit, atque adeo nota constitui potest ad *Leibnitium* ab eruditis aliis distinguendum. Quamobrem cum *Leibnitius* quoque invenerit calculum differentialem; auctori etiam Theodiceæ istud inventum tribui potest affirmando: *Autor Theodiceæ invenit calculum differentialem.* Ceterum notandum, quamvis fieri soleat, ut plures personæ eodem nomine proprio gaudeant, nos tamen nomen proprium hic sumere pro termino singulari, quatenus non nisi unicum individuum denotat (§. 241.). Quamobrem si idem nomen proprium pluribus comperat personis, ad tollendam ambiguitatem aliæ adhuc determinaciones singulares eidem adjiciendæ, ne secunda ac quarta propositio perperam applicetur.

## §. 351.

*Definitio propositio-  
num pro-  
prium.*

Propositiones singulares, in quibus prædicatum est sub-  
jecto singulari proprium, dicuntur *propositiones propriae*. Un-  
de per se patet, quod possint converti (§. 283.).

E. gr. *Propositio propria est: Leibnitius est auctor Theodiceæ.* Sed  
eadem converti potest: *Autor Theodiceæ est Leibnitius.*

## §. 352.

*Syllogismi  
proprii defi-  
nitio.*

*Syllogismus proprius* appellatur, qui constat ex propositionibus propriis.

E. gr.



E. gr. *Inventor calculi differentialis est autor Theodicea. Leibnitius est inventor calculi differentialis. Ergo Leibnitius est autor Theodicea.* Hic syllogismus proprius est, nam singulæ propositiones propriæ sunt (§. 351.): Eodem argumentandi genere utuntur Theologi, quando ex quibusdam characteribus Messiae apud Prophetas obviis inferunt, *Jesum Nazarenum esse illum promissum mundo Messiam.*

## §. 353.

*Dicto de omni & nullo nituntur omnes syllogismi.* Syllogismi enim exprimunt ratiocinia nostra (§. 332.). Enimvero in ratiociniis vel nomen tribuimus generis aut speciei quibusdam, quibus notio illi attributa convenire deprehenditur, aut ob hujus defectum illud iis tribui posse negatur (§. 48.); vel quod generi aut speciei convenit sive absolute, sive sub data determinatione, idem quibusdam tribuimus, quæ ad genus istud vel speciem istam referri debere & quibus præsentem determinationem adesse cognoscimus, aut iis tribui posse negamus in casu contrario (§. 49.), adeoque ratiocinia nostra Dicto de omni & nullo debita ratione extenso (§. 346. & seqq.) nituntur. Ergo syllogismi quoque eodem fundamento nituntur.

Fundamentum syllogismorum.

Habemus adeo firmum & inconcussum fundamentum, cui omnis de syllogismo doctrina superstruenda, a veteribus dudum animadversum, a recentioribus vero nonnullis neglectum, quod non satis fuerit intellectum.

## §. 354.

*In nullo syllogismo præmissa utraque potest esse particularis.* Cur ex meritis Omnes enim syllogismi nituntur Dicto de omni & nullo (§. 353.). Sed vi Dicti de omni & nullo de quibusdam sub genere vel specie contentis affirmatur vel negatur, quod de omni genere vel specie affirmatur vel negatur (§. 346. & seqq.) Quamobrem cum una præmissarum universaliter enunciare debeat, quod in conclusione particulariter affirmatur vel negatur; in nullo syllogismo utraque præmissa potest esse particularis.

particularibus nil sequatur.

Illustrant theorema exempla syllogismorum particularium supra (not. §. 342.) data. Minime autem concludit, si quis ita argumentetur: *Quoddam triangulum habet angulos ad basin aequales. Figura hæc est triangulum. Ergo figura hæc habet angulos ad basin aequales.* Neque

(Wolfii Logica)

P p

enim

enim necesse est, ut hæc figura, etsi triangulum sit, in numero eorum contineatur, quæ angulos ad basin æquales habent. Solet autem regula vulgo ita efferri: *Ex meris particularibus nihil sequitur.*

## §. 355.

*Cur ex meris  
singularibus  
aliquid sequi  
possit.*

Quoniam vi Dicti de omni & nullo prædicatum proprium affirmatur vel negatur de individuo ob notam singularem eadem convenientem (§. 350.), adeoque illa præmissarum, quæ prædicatum proprium effert de individuo caractere singulari designato, universali æquivalet, id quod ex collatione syllogismi proprii cum particularibus statim innotescit; *non mirum, quod ex meris singularibus hic aliquid sequatur, etsi alias propositiones singulares particularibus æquivalent (not. §. 259.).*

Ita in exemplo syllogismi proprii supra (not. 352.) allati: *Inventor calculi differentialis est autor Theodiceæ. Leibnitius est inventor calculi differentialis.* Ergo *Leibnitius est, autor Theodiceæ*: Propositio major, *Inventor calculi differentialis est autor Theodiceæ*, æquivalet universali, unde & per modum universalis efferri potest: *Quicumque est inventor calculi differentialis, ille etiam est autor Theodiceæ.* Et sane contigit, ut multi syllogismus proprius non agnoscant, si major ita efferretur. Ne autem syllogismus proprius confundatur cum alio, in quo propositiones singulares omnes particularibus æquivalent: obstat dictum de omni & nullo ad prædicationes proprias extensum (§. 350.).

## §. 356.

*Conclusio  
quando particu-  
laris.*

*Si alterutra præmissa particularis, conclusio quoque particularis, & contra.* Etenim vi Dicti de omni & nullo de quibusdam quid affirmatur vel negatur, quia illa quædam continentur sub omni, de quo aliquid affirmatur, vel negatur (§. 346. & seqq.) Quamobrem cum Dictum de omni & nullo sit fundamentum syllogismorum (§. 353.); in conclusione autem de subiecto id ipsum affirmetur, vel negetur, quod de omni affirmatur, vel negatur in præmissa; evidens est affirmationem vel negationem in conclusione esse debere particularem & contra.

Exempla syllogismorum particularium supra (not. §. 342.) data regulam illustrent. Potest regula quoque per indirectum demonstrari. Nimirum si negas, conclusionem esse debere particularem, si alterutra præmissa fuerit particularis; concedendum erit, eam posse esse uni-  
versa-

versalem. Affirmandum igitur vel negandum erit de omni subiecto, cujus nonnisi quædam sub omni altero continentur, de quo aliquid universaliter affirmatur, vel negatur: quod cum Dicto de omni & nullo e diametro repugnet (§. 310. 346. & seqq.) adeoque fundamento omnis syllogismi contradicat (§. 353. 288.); conclusio universalis esse nequit. Erit adeo particularis.

## §. 357.

*In nullo syllogismo utraque præmissa potest esse negativa.* Cur ex meris negativis nil sequatur. Omnis syllogismi fundamentum est Dictum de omni & nullo (§. 353.). Sed vi Dicti de nullo de quibusdam aliquid negatur, quia continentur sub omni, de quo idem negatur (§. 347. & seqq.). Quamobrem cum una præmissarum enunciare debeat, quædam ista, de quibus aliquid negandum, contineri sub omni, de quo idem negatur; evidens est, præmissam unam esse debere affirmativam, consequenter utramque non posse esse negativam.

Regula vulgo ita effertur: *ex puris negativis nihil sequitur.* Si quis argumentetur: *Nullus homo est immortalis. Nullum brutum est homo. Ergo Nullum brutum est immortale:* consequentiæ vis nulla est, etsi omnes propositiones sint veræ, id quod ex Dicto de omni & nullo apparet, quod solum continet omnis consequentiæ syllogisticæ rationem (§. 353.).

## §. 358.

*Si una præmissarum fuerit negativa, conclusio quoque negativa est, & contra.* Etenim vi Dicti de nullo, quod unicum consequentiæ syllogisticæ fundamentum (§. 353.), de quibusdam aliquid negandum, quia continentur sub omni, de quo idem negatur (§. 347.): Sed propositio illa, quæ de quibusdam negat, quia continentur sub omni, de quo idem negatur, est conclusio; ceteræ, quibus idem negatur de omni & quædam ista sub omni contineri affirmatur, sunt præmissæ (§. 335.). Ergo si una præmissarum negativa, conclusio quoque negativa esse debet, & contra.

Illustratur regula exemplis syllogismorum negativorum supra (not. 341.) datis.

## §. 359.

*Partis debilioris definitio.*

Præmissa particularis & negativa dicitur *Pars debilior* præmissarum.

E. gr. In syllogismo: *Omne triangulum habet tres angulos duobus rectis aequales. Hac figura (terminata duobus radiis & chorda circuli) est triangulum. Ergo hac figura habet tres angulos duobus rectis aequales*: propositio minor est particularis, adeoque pars debilior. Ast in syllogismo: *Nullus homo est immortalis. Omnis Rex est homo. Ergo Nullus Rex est immortalis*: propositio maior est negativa, adeoque pars debilior.

## §. 360.

*Conclusio cur partem debiliorem sequatur.*

*Conclusio sequitur partem debiliorem.* Si enim una præmissarum particularis, conclusio quoque particularis est (§. 356.) & si una præmissarum negativa, conclusio quoque negativa est (§. 358.). Sed præmissa particularis & negativa sunt pars debilior (§. 359.). Itaque conclusio partem debiliorem sequitur.

Exempla modo (not. §. 359.) allata rem illustrent. Etenim in priori altera præmissa particularis est; sed particularis quoque est conclusio. In posteriori una præmissarum negativa est; sed negativa quoque conclusio.

## §. 361.

*Syllogismi categorici definitio.*

*Syllogismus*, qui ex meris propositionibus categoricis constat, *categoricus* dicitur. Solet quoque dici *Syllogismus simplex*.

Et de categorico syllogismo potissimum intelligenda sunt, quæ hic de syllogismo in genere demonstrantur. Patebit autem suo loco syllogismos ceteros ad categoricos reduci posse, atque ab iis evidentiam suam mutare. Exempla syllogismi categorici sunt omnia hætenus allata (not. §. 333. 341. 342. 343.). Patet per definitionem propositionis categoricæ (§. 216.). Ceterum cum propositiones hypotheticæ formam categoricæ induere possint (§. 227.); notandum est, categoricum etiam esse syllogismum, si hypothetica sub forma categoricæ eandem ingrediatur. Nulla enim hic in argumentando diversitas oritur: quem in finem quoque Dictum de omni & nullo ad hunc casum extendimus (§. 348.).

## §. 362.

*Subsumtionis definitio.*

Propositio minor sub maiore dicitur *subsumi*, si hæc primo ponitur loco.

E. gr.

E. gr. Si quis affirmaverit: *Nullus hominum in omnibus est sapiens*, & alter responderit: *Atqui Tu es homo*, hanc propositionem *subsumere* dicitur. Sumta vero maiore ex concessio & subsumta minore propter evidentiam; sponte deinde sua sequitur conclusio: *Ergo Tu in omnibus non es sapiens*.

## §. 363.

Propositionem maiorem dicemus *assumi*, si minor primo ponitur. *Assumptionis definitio.*

E. gr. Si quis ponit: *Figura in circulo radiis duobus & una chorda terminata est triangulum*; Major: *Omne triangulum habet tres angulos duobus rectis æquales*, dicitur assumi. Vulgo propositionem minorem *assumptionem* vocant: *Aristoteles* vero promiscue eam præmissam *assumptionem* appellat, quæ ad primo positam sumitur, sive ea major fuerit, sive minor. Nobis tamen consultius videtur, diversos casus etiam verbis distingui.

## §. 364.

*Si, quod de specie absolute prædicatur, ad individua applicatur, minor esse potest propositio identica.* Etenim si species fuerit A & prædicatum ipsi absolute tribuendum C, erit individuum sub specie contentum: *Hoc A* (§. 241.) & quædam individua ejusdem speciei dicenda erunt: *Quædam A* (§. 243.). Quoniam igitur propositio major: *Omne A est C*; minor, quæ subsumi debet, erit: *Hoc A est A* vel *Quædam A sunt A*. Unde inferetur conclusio: *Hoc A est C*. vel *Quædam A sunt C*. (§. 346.).

*Propositio-  
num identi-  
carum in syl-  
logismo usus.*

E. gr. Vi elementorum Geometriæ: *Omne triangulum habet tres angulos duobus rectis æquales*. Subsume: *Hoc triangulum est triangulum* vel *Quædam triangula sunt triangula*. Inferetur hinc: *Ergo Hoc triangulum habet tres angulos duobus rectis æquales*, vel *Ergo Quædam triangula habent tres angulos duobus rectis æquales*. Apparet hinc, propositionibus identicis suum constare in ratiocinando usum. Neque enim locum habet applicatio prædicati absoluti generalis ad individua, nisi admitta in ratiocinium propositionem identicam. Atque ideo propositiones identicæ in axiomatum numerum retulimus (§. 270.). Ceterum non hic unus est casus, quo propositiones identicæ in syllogismum ingrediuntur. Sunt e. gr. etiam definitiones propositiones identicæ (§. 214.) & in earum quoque censum veniunt illæ, in quibus de defi-

nito prædicatur aliquid sigillatim, quod in definitione continetur (§. 223.), ideo inter axiomata & ipsæ relatæ (§. 268. 272.). Has autem propositiones ingredi posse syllogismos, non minus experientia loquitur, quam Dictum de omni & nullo probat. Defenderunt inter Scholasticos usum propositionum identicarum complures, quos inter *Scotum* nominasse sufficiat. Eorum sententiam calculo suo approbavit *Leibniti*us. Ego demonstrationes geometricas accuratius perveſtigans deprehendi non infrequentem eorundem in iis usum, sicque intellexi, non abhorre- re a veritate, quod de eo statuerant Scholastici, probaverat *Leibniti*us. Ratiociniorum vero fundamentum distinctius examinans rationes tandem intellexi, cur in nonnullis casibus indispensabilis esse debeat earundem usus. Immo olim in *arte inveniendi* magis præclara de usu propositionum identicarum demonstraturi sumus. Hæc ideo monemus, ne iis, qui propositiones identicas pro nugatoriis habent, steriles subtilitates comminisci videamur. Etsi enim maximi apud nos ponderis sit, quicquid ad evidentiam cognitionis accuratamque methodum ullo modo spectat; procul tamen absumus a vanitate illorum, qui accurationem superfluum affectantes in nugis sibi nescio de quo acumine gratulantur.

§. 365.

*Syllogismi  
cryptici de-  
finitio.*

*Syllogismus crypticus* est, cujus genuina forma non ap-  
paret.

Quoniam itaque de genuina syllogismi forma judicari nequit, antequam figuræ earumque modi nobis fuerint explorati; de crypti quoque syllogismorum specialia demonstrare nondum licet, utut ea ad omnes syllogismos extendatur. Trademus suo loco, quæ nobis de ea præcipi commodum fuerit visum.

## CAPUT II.

DE

## FIGURIS ET MODIS SYLLOGISMORUM.

§. 366.

*Universalitas  
majoris  
in prima fi-  
gura.*

**I**N prima figura major semper esse debet universalis. In prima figura terminus medius est subjectum in propositione majoræ, prædicatum vero in minore (§. 344.). Enimvero in propositione minore terminus minor, qui est subjectum conclusionis (§. 339.), constituitur cum medio (§. 340.), adeo-

adeoque in prima figura subjectum minoris idem est cum subjecto conclusionis. Quamobrem quia vi Dicti de omni & nullo cuidam in conclusione tribuitur vel ab eodem remove-  
tur, quod omni convenire vel non convenire sumitur (§. 346. 347.), minor autem propositio ; propterea quod ejus sub-  
jectum cum subjecto conclusionis idem est *per demonstrata*,  
enunciare debet, subjectum conclusionis sub omni contineri,  
de quo prædicatum ejus dicitur ; evidens est, propositionem  
majorem, quæ idem prædicatum tribuit omni, universalem es-  
se debere (§. 242.).

Loquuntur idem exempla. Nam syllogismus: *Omne triangulum  
habet tres angulos. Triangulum sphericum est triangulum. Ergo Tri-  
angulum sphericum habet tres angulos*, est in prima figura, cum me-  
dius terminus *triangulum* in genere sit subjectum in majore, prædi-  
catum in minore (§. 337. 340. 344.). Major vero: *Omne triangu-  
lum habet tres angulos*, universalis est (§. 250.). Similiter syllogis-  
mus: *Nullum triangulum habet quatuor angulos. Triangulum spheri-  
cum est triangulum. Ergo Triangulum sphericum non habet quatuor  
angulos*: est in prima figura; Major vero denuo universalis.

§. 376.

*In prima figura minor semper debet esse affirmans.* Con- Minor cur  
stat ex demonstratione propositionis præcedentis, quod minor affirmans in  
cum conclusione idem habeat subjectum. Enimvero vi Dicti prima figu-  
de nullo de subjecto conclusionis negandum, quod de omni ra.  
negatur, sub quo idem continetur, (§. 347.), atque adeo propo-  
sitio minor enunciare debet, quod subjectum conclusionis con-  
tineatur sub omni, de quo idem prædicatum negatur Est ita-  
que minor affirmans (§. 205.).

Patet idem in exemplo præcedente syllogismi negantis not. §. 366.).

Minor enim: *Triangulum sphericum est triangulum*, affirmativa est  
(§. 205.).

§. 368.

*Si in prima figura conclusio universaliter affirmans, utra-* Forma syl-  
*que præmissæ universaliter affirmans esse debet.* Si negas, utram- logismi uni-  
que præmissam esse universalem ; cum in prima figura major versaliter  
parti- affirmantis

*In prima figura.*

particularis esse nequeat (§. 366.), erit minor particularis. Quare cum conclusio particularis sit, si una præmissarum particularis fuerit (§. 356.); conclusio universalis esse nequit: quod quia hypothesein evertit, adeoque absurdum est, minor particularis esse nequit, consequenter utraque præmissa universalis esse debet.

Si porro negas, utramque præmissam esse affirmantem; cum in prima figura minor semper sit affirmans (§. 367.), major erit negans. Sed tunc conclusio esse debet negativa (§. 358.): quod cum denuo hypothesein evertat, utraque præmissa affirmativa esse debet.

E. gr. Syllogismus universaliter affirmans in prima figura talis est: *Omne quadrilaterum habet quatuor angulos quatuor rectis aequales. Omnis rhombus est quadrilaterum. Ergo Omnis rhombus habet quatuor angulos quatuor rectis aequales.* Hic conclusio universaliter affirmans, & utraque præmissa pariter universaliter affirmans.

#### §. 369.

*Forma Syllogismi universaliter negantis in prima figura.*

*Si in prima figura conclusio universaliter negans, major universaliter negans, minor universaliter affirmans esse debet.* Majorem esse debere universalem, jam ante demonstratum est (§. 366.). Si negas esse eandem negantem; affirmativa erit. Quamobrem cum minor quoque affirmativa esse debeat (§. 367.); conclusio negativa esse nequit (§. 358.). Erit igitur affirmativa: quod cum hypothesein evertat, major universaliter negans esse debet.

Similiter minorem esse debere affirmantem patet (§. 367.). Si negas, eandem esse debere universalem; particularis erit. Quamobrem cum conclusio in hoc casu particularis esse debeat (§. 356.) universalis esse nequit: quod cum hypothesein repugnet (§. 310.), minor universaliter affirmans esse debet.

E. gr. Syllogismus universaliter negans in prima figura est: *Nullum triangulum habet plures quam tres angulos. Omne triangulum sphaericum est triangulum. Ergo Nullum triangulum sphaericum habet plures quam tres angulos.* Hic conclusio universaliter negans & major item universaliter negans, minor autem universaliter affirmans.

§. 370.



§. 370.

Si in prima figura conclusio particulariter affirmans; major universaliter affirmans, minor particulariter affirmans esse debet. Quoniam in prima figura subjectum minoris & conclusionis idem est, per ea, quæ superius (§. 366.) demonstrata fuere, & vi Dicti de omni & nullo subjectum in conclusione tribuitur, quod de omni prædicatur, quia sub omni subsumitur (§. 346. 347.); si subjectum in conclusione particulariter ponitur, in minore etiam particulariter subsumi debet.

Forma syllogismi particulariter affirmantis in prima figura.

Minorem semper esse debere affirmantem patet (§. 367.). Si negas, majorem esse debere affirmantem; erit ea negans. Quamobrem & conclusio negativa erit (§. 358.); quod cum hypothese repugnet (§. 310.); major itidem affirmans esse debet.

E. gr. Syllogismus particulariter affirmans in prima figura est. *Omnis sapiens prospicit futurum. Quidam hominis sunt sapientes. Ergo Quidam homines prospiciunt futurum.* Hic conclusio particulariter affirmans & major universaliter, minor particulariter affirmans. Quod si argumentis: *Omnis homo est mortalis. Omnis eruditus est homo. Ergo Quidam eruditus est mortalis;* compendio ratiocinandi: duos syllogismos in unum contrahis, scilicet sequentes; *Omnis homo est mortalis. Omnis eruditus est homo. Ergo Omnis eruditus est mortalis, & omnis eruditus est mortalis. Quidam eruditus est eruditus. Ergo Quidam eruditus est mortalis.* Compendium ratiocinandi neglexit *Aristoteles* formas argumentandi simplices expositurus, in quibus consequentia naturalis est, præsertim cum in minori majore evidentia subsumit particulariter fieri possit, ut compendio non sit opus.

§. 371.

Si prima figura conclusio particulariter negans, major universaliter negans, minor particulariter affirmans esse debet. Primum jam demonstratum est ad propositionem præcedentem.

Si conclusio negativa, aliqua præmissarum negativa esse debet (§. 347.). Sed in prima figura minor propositio semper affirmativa est (§. 367.). Ergo major negativa esse debet.

Forma syllogismi particulariter negantis in prima figura.

E. gr. Syllogismus particularis negans in prima figura est: *Nullus, qui ratione utitur, affectuum impetu abripitur. Quidam homines utuntur ratione. Ergo Quidam homines affectuum impetu non abripiuntur.* Hic

(*Wolfs Logica*)

Q9

con-

conclusio particulariter negans, & major universaliter negans, minor particulariter affirmans.

## §. 372.

*Quæ sint modi in prima figura.*

*Prima figura nonnisi quatuor modos habet.* Cum omnis propositio categorica vel sit universaliter affirmans, vel universaliter negans, vel particulariter affirmans, vel particulariter negans (§. 259.), nonnisi quatuor sunt conclusiones, quæ per Syllogismos inferri possunt. Sed in prima figura conclusionum istarum quilibet nonnisi unico modo inferri potest (§. 368. & seqq.), atque adeo syllogismi in prima figura ratione quantitatis & qualitatis propositionum nonnisi quatuor modis differre possunt. Modi igitur in prima figura non sunt nisi quatuor (§. 345.).

## §. 373.

*Nomina Modorum.*

Modus syllogismorum universaliter affirmantium dicitur *Barbara*; modus universaliter negantium *Celarent*; modus particulariter affirmantium *Daris*; modus particulariter negantium *Ferio*.

Comprehendunt modorum nomina hoc versiculo:

*Barbara, Celarent, primæ Darii, Ferioque.*

## §. 374.

*Significatus essentialis eorum.*

*Significatus nominum, quibus modi syllogismorum designantur, essentialis est.* Etenim cum vocales A. E. I. O. designent quatuor propositionum categoricarum species, universaliter affirmantem, universaliter negantem, particulariter affirmantem & particulariter negantem; vocales in nominibus obviæ quantitatem & qualitatem singularum propositionum in quolibet modo indicant. Ipsum igitur nomen cum per elementa sua significet ea, per quæ modus unusquisque constituitur (§. 345.); significatus essentialis est: neque enim alia significatus essentialis notio.

Ut significatus facilius retineretur, eundem sequentibus versiculis comprehenderunt:

*Afferit A, negat E; sed universaliter ambæ:*

*Afferit I, negat O; sed particulariter ambæ.*

Nihil adeo in hac denominatione continetur, quod reprehendi possit. Immo continetur in hisce specimen artis characteristicæ combinatoriæ generalis, quæ hactenus inter desiderata latens conceptus rerum ab imaginibus

nibus separat & characteribus alligat. Continetur quoque in hisce exemplum vocum essentialiter significantium. Per præcipitantiæ statuunt, qui in denominatione ista sibi invenire videntur, quod rideant. Nos justum rebus pretium tribuimus, non statuentes, nisi re rite expensa.

§. 375.

*Habent vero nomina ista hunc usum, ut forma syllogismorum Eorundem facile retineri & in casu quovis dato examinari possit. Usus cum non neget expertus; probatione alia non opus est, quam ut eundem experiri studeamus.*

Luber igitur subjicere exempla, per quæ eundem perspicere datur.

I.

III.

BAr Omnis homo est mortalis.

DA Omnis pius Deum amat.

bA Omnis Rex est homo.

rI Quidam homines sunt pii.

rA E. Omnis Rex est mortalis.

IE. Quidam homines Deum a-

II.

IV.

mant.

CENullus homo est immortalis.

FE Nullus pius proximum odit.

IA Omnis doctus est homo.

rI Quidam homines sunt pii.

rEnt E. Nullus doctus est immortalis.

OE. Quidam homines proximum non oderunt.

§. 376.

Quoniam in syllogismis propriis major æquivalet propositioni universali (§. 355.), ceteræ autem propositiones, nempe major & conclusio, particularibus æquivalent (§. 350. 346. 347.); syllogismi proprii affirmantes ad modum Darii, negantes ad modum Ferio pertinent. Non adeo opus est, ut peculiare modum i syllogismo proprium, quamvis sæpissime obviorem, constituentur.

*Syllogismi proprii primæ figuræ cujus modi.*

E. gr. Vir summus *Isaacus Newtonus*, opere suo Principiorum philosophiæ naturalis mathematicorum prorsus *singulari*, tantam nominis celebritatem inter omnes eruditos consecutus, ut Autorem operis sine pari nemo ignoret. Optime igitur character ejus singularis seu nota definitionis singularis vicem subiens constituitur, quod sit autor Principiorum philosophiæ naturalis mathematicorum. Idem ante quinquaginta annos jam invenit telescopium catoptrico-dioptricum: cujus præstantia hoc demum tempore animadverta, quo ad observationes celestes translatus omnia telescopia astronomica, stupendæ licet longitudinis, antecellere deprehensum. Quod si ergo ita argumenteris: *Autor Principiorum philosophiæ naturalis mathematicorum est inventor telescopii catoptrico-dioptrici.* Atqui *Isaacus Newtonus est autor principio-*

Qq 2

rum

*rum philosophia naturalis mathematicorum.* Ergo *Isaacus Newtonus est inventor telescopii catoptrico-dioptrici*, & majorem ulterius hoc syllogismo proprio probes. *Autor Optica in qua traduntur novae luminis proprietates, est inventor telescopii catoptrico-dioptrici* (cum in ea inventum istud accurate describit, ut a perito artifice parari potuerit. Enimvero *Autor Principiorum philosophiae naturalis mathematicorum est etiam Autor Optica novae luminis proprietates revelantis.* Ergo *Autor principiorum est inventor telescopii catoptrico-dioptrici*; uterque syllogismus est in modo Darii, cum propositiones majores universalibus æquipol-  
leant & ad formam universalium ita reducantur: *Quicumque est Autor Principiorum philosophiae naturalis mathematicorum, is est inventor telescopii catoptrico-dioptrici* & *Quicumque est autor Optica novae luminis proprietates revelantis, is etiam est autor Principiorum philosophiae naturalis mathematicorum.* Ex hoc ipso exemplo patet, quod hoc argumentandi genere in criticis utamur & in historicis disquisitionibus. Addimus igitur quoque exemplum syllogismi proprii negativi: *Johannes Newtonus est autor astronomia & trigonometria Britannica.* Sed *Eminens ille Principiorum philosophiae naturalis mathematicorum Autor non est Johannes Newtonus.* Ergo *Eminens ille Principiorum philosophiae naturalis autor non est autor astronomia & trigonometria Britannica.* In hoc syllogismo latet una crypsis, cum videatur in formam impingere ob majorem affirmativam & minorem negativam (§. 365. 367. 369.) Enimvero si major reducatur, ad formam universalem (§. 355.): *Quicumque non est Johannes Newtonus, is non est autor Astronomia & trigonometria Britannica*; minorem infinitam esse apparet, affirmativæ æquipollentem (§. 209.): id quod ex sequente propositione clarius constabit.

§. 377.

*Quando minor infinita.* *Si terminus medius fuerit negativus, propositio minor infinita est.* In prima figura terminus medius est prædicatum in minore, subjectum vero in majore (§. 344.). Quamobrem cum in minore de subjecto conclusionis (§. 340.) enunciatur, quod eidem conveniat nota, qua distinguitur omne subjectum in majore, de quo aliquid prædicatur (§. 346.): evidens est, propositionem æquivalere affirmativæ, utut speciem negativæ habeat (§. 205.), consequenter esse infinitam (§. 209.).

E. gr. Si quis ita argumentetur: *Quaecunque figura non habet plures quam tres angulos illa est triangulum.* Atqui *hec figura non habet plures*

plures quam tres angulos. Ergo hac figura est triangulum; syllogismus est in modo Darii. Major enim est universaliter affirmans, propterea quod negatio non afficit copulam est (§. 208.); minor autem est infinita, cum æquipolleat huic affirmanti: *Hac figura est figura, qua non plures quam tres angulos habet.* Negativa particula hic syllogismum ingreditur, quia terminus medius non habere plures quam tres angulos est negativa. Eadem est ratio, si ita argumenteris: *Quodcunque nullam contradictionem involvit, illud est possibile. Sed notio entis perfectissimi non involvit contradictionem.* Ergo notio entis perfectissimi est possibilis. Similiter in negativis argumentamur: *Quaecunque figura non habet tria latera aequalia, illa est triangulum æquilaterum.* Atqui Nulla figura terminata duobus radiis circuli & chorda arcus sexta peripheria parte majoris habet tria latera aequalia. Ergo Nulla figura terminata duobus radiis circuli & chorda arcus sexta peripheria parte majoris est triangulum æquilaterum. Etenim hic quoque ob terminum medium negativum non habere tria latera aequalia minor infinita est & affirmativa æquipollet (§. 278.): *Omnis figura terminata duobus radiis circuli & chorda arcus sexta peripheria parte majoris est figura, qua non habet tria latera aequalia.* Equidem non ignoro, esse qui sibi persuadeant, steriles esse nugas, quæ de propositionibus infinitis aliisque æquipollentibus in doctrina syllogistica dicuntur, eum in finem excoGITatas, ut per præcipitantiam statuta regulæ salventur. Enimvero cum nos nihil asseramus, nisi quod ex ipsis terminorum notionibus deducere valeamus; qui ad nostras demonstrationes animum attentum affert, aliter de propositionibus infinitis aliisque in ratiocinando æquipollentibus sentiet. Usus vero talium cum praxis logica loquetur, tum accurata disciplinarum tractatio & doctrinarum ad usum vitæ applicatio unumquemque docebit.

§. 378.

*Prima syllogismorum figura omnibus conclusionibus inferendi sufficit.* Omnis enim conclusio vel est universaliter affirmans, vel universaliter negans, vel particulariter aut singulariter affirmans, vel denique particulariter aut singulariter negans (§. 259.). Eumvero conclusiones universaliter affirmantes in modo *Barbara*, universaliter negantes in modo *Celarent*, particulariter aut singulariter affirmantes in modo *Darii* & particulariter aut singulariter negantes in modo *Ferio*

Qq 3

infe-

inferuntur (§. 373. 376.). Omnes itaque conclusiones in prima figura inferri possunt.

§. 379.

Unde consequitur, quod *sola prima figura possimus esse contenti*, cum nullum occurrat ratiocinium, quod non per syllogismum in prima figura exprimi possit (§. 378.).

*Figura prima ad ratiocinandum sufficientia.*

Atque ea est ratio, cur in Germanicis Logicae elementis sola figura prima fuerimus contenti: Quod etiam ita factum a doctissimo *Thimigio* in Institutionibus philosophiae, de quibus supra (not. §. 92. *Disc. pral.*) diximus. Sola vero prima figura cum ad ratiocinandum abunde sufficiat, quae de ceteris præcipiuntur, ab iis omittantur, qui a superfluis sibi metuant.

§. 380.

*Syllogismi prime figurae cur maxime naturales.*

*Syllogismi in prima figura sunt maxime naturales, seu proxime accedunt ad Dictum de omni & nullo.* In Logica naturali non attendimus in ratiocinando nisi ad Dictum de omni & nullo (§. 48. 49. 346. 347. & seqq.); syllogismi vero in prima figura non sunt nisi distincta Dicti de omni & nullo applicatio (§. 366. & seqq.). Quamobrem syllogismi in prima figura proxime accedunt ad Dictum de omni & nullo, atque adeo maxime naturales sunt.

Evidentius idem patebit, si Dictum de omni & nullo ad formam syllogismorum reducitur; enascuntur enim syllogismi sequentes,

1. ex Dicto de omni:

I. Omne A est B.

II. Omne A est B.

Omne C est A.

Quoddam C est A.

Ergo omne C est B.

Ergo Quoddam C est B.

Nimirum omni C vel quidam C tribuitur B, quia omne C vel quoddam C sub omni A continetur.

2. ex Dicto de Nullo:

III. Nullum A est B.

IV. Nullum A est B.

Omne C est A.

Quoddam C est A.

Ergo Nullum C est B.

Ergo Quoddam C non est B.

Nimirum de omni C vel quoddam C negatur vel removetur B, quia omne C vel quoddam C sub omni A continetur, ne contradictoria admittamus, quae intellectus concipere nequit.

Jam

Jam primus syllogismus generalis exprimit modum *Barbara*, secundus modum *Darii*, tertius modum *Celarent*, quartus modum *Ferio*, adeoque syllogismi primæ figuræ absolventur distincta Dicti de omni & nullo applicatione.

§. 381.

*De quo negatur, quod de omni affirmatur, vel vicissim de quo affirmatur, quod de omni negatur; id sub omni non continetur.* Quodsi affirmes, sub omni contineri illud, de quo negatur, quod de omni affirmatur; vi Dicti de omni de eo affirmandum est, quod affirmatur de omni (§. 346.); quod cum hypothese in evertat, adeoque absurdum sit, sub omni illud contineri nequit.

Fundamentum proximum secundæ figuræ.

Quodsi jam porro affirmes, sub omni contineri, de quo affirmatur, quod de omni negatur; vi Dicti de nullo de eodem negandum est, quod de omni negatur (§. 347.): quod cum denuo hypothese in evertat, illud sub omni contineri nequit.

E. gr. De omni triangulo affirmatur, quod habeat tres angulos. Quamobrem cum de Quadrato negetur, quod habeat tres angulos; Quadratum triangulum esse nequit. Similiter de omni triangulo negatur, quod habeat quinque angulos. Quare cum de Pentagono affirmetur, quod habeat quinque angulos; Pentagonum triangulum esse nequit.

§. 382.

*In secunda figura Modi syllogismorum sunt quatuor; Conclusio semper est negativa & Major semper universalis.* In figura secunda propositio major & minor idem habent prædicatum (§. 344.). Enim vero si idem prædicatum B de diversis subjectis A & C simul affirmatur & negatur, non inde concludi potest, quod C contineatur sub A tanquam genere & specie, vel quod sub eodem non contineatur, seu nec inferri potest: *Omne vel Quoddam C est A*, nec *Omne vel Quoddam C non est A*, cum contrarietur hypothese, quod A & C sint diversa subjecta in communi. Etenim si C contineretur sub omni A, conclusio foret identica. Quodsi vero in minore vel universaliter, vel particulariter negatur, quod universaliter affirmatur in majore,

Modi & regula secundæ figuræ.

vel

vel vicissim in minore universaliter, vel particulatiter affirmatur, quod universaliter negatur in maiore; tum inferre licet in utroque casu, quod vel Omne C, vel Quoddam C non sit A (§. 381.), atque adeo habemus quatuor modos syllogismorum negantium (§. 341.), binos pro universalibus & binos itidem pro particularibus (§. 342.). Simul patet, in secunda figura conclusionem semper esse negativam & maiorem semper universalem.

Omnes nimirum syllogismi secundæ figuræ non sunt nisi distincta applicatio corollarii Dicti de omni & nullo, quod tanquam fundamentum proximum eorundem posuimus (§. 381.), cum ipso revera fundamento Dicto de omni & nullo nitantur, unde corollarium istud deducitur: id quod deinceps adhuc clarius patebit (§. 384.). Redeunt adeo omnes syllogismi figuræ secundæ ad hos quatuor generales:

I.  
Nullum A est B.  
Omne C est B.  
Ergo Nullum C est A.

II.  
Omne A est B.  
Nullum C est B.  
Ergo Nullum C est A.

III.  
Nullum A est B.  
Quoddam C est B.  
Ergo Quoddam C non est A.

IV.  
Omne A est B.  
Quoddam C non est B.  
Ergo Quoddam C non est A.

## §. 383.

*Nomina  
modorum.*

Habent etiam modi secundæ figuræ peculiaria nomina significatus essentialis, perinde ac modi primæ figuræ (§. 373. 374.). Nimirum *Cesare* dicitur modus, in quo major universaliter negans, minor universaliter affirmans, conclusio universaliter negans. *Camestres* est modus in quo major universaliter affirmans, minor & conclusio sunt universaliter negantes. *Festino* est modus, quo major universaliter negans, minor particulariter affirmans, conclusio particulariter negans: *Baroco* est modus, quo major universaliter affirmans, minor & conclusio particulariter negantes.

Habent nomina modorum in secunda figura eundem usum, quem in prima (§. 375.): quod ut appareat, exempla sequentia apponimus

I. CEs



I.

CEs Nullum triangulum habet  
quatuor angulos.

A omne Quadratum habet  
quatuor angulos.

rE Ergo nullum Quadratum  
est triangulum.

II.

CAM Omne triangulum habet  
tres angulos.

Es Nullum Quadratum habet  
tres angulos.

trEs Ergo Nullum Quadratum  
est triangulum.

III.

FEs Nullum triangulum habet  
quatuor angulos.

tI Quædam figuræ habent qua-  
tuor angulos.

nO Ergo quædam figuræ non sunt  
triangula.

IV.

BAr Omne triangulum habet tres  
angulos.

Oc Quædam figuræ non habent  
tres angulos.

O Ergo Quædam figuræ non sunt  
triangula.

§. 384.

*Omnes syllogismi secundæ figuræ æquivalent syllogismis primæ in modo Celarent & Ferio.* Etenim in modo Camestres argumentamur: *Omne A est B. Nullum C est B. Ergo Nullum C est A*, & in modo Baroco retenta eadem majore: *Omne A est B. Quoddam C non est B. Ergo Quoddam C non est A.* (§. 382. 383.). Enimvero propositionibus *Omne A est B & Quodcunque non est B, illud non est A* eadem notio complexa respondet, cum enim B concipiatur tanquam in omni A, sub omni A contineri nequit, cui non convenit B, quoniam idem simul esse & non esse non potest. Sunt igitur propositiones istæ æquivalentes (§. 278.). Quamobrem si in istis syllogismis pro majore *Omne A est B* substituitur altera: *Quodcunque non est B, illud non est A*; syllogismi secundæ figuræ abeunt in sequentes: *Quodcunque non est B, id non est A. Sed Nullum C est B. Ergo Nullum C est A*, & in casu particulari: *Quodcunque non est B, id non est A. Sed Quoddam C non est B. Ergo Quoddam C non est A.* Horum vero primum esse in modo Celarent, alterum in modo Ferio patet (§. 373.). Porro in modo Cesare & Festino argumentamur (§. 382. 383.): *Nullum A est B. Omne C est B. Ergo Nullum C est A & Nullum A est B. Quoddam C est B. Ergo Quoddam C non est A.* Enimvero propositio-

(Wolffii Logica)

R r

nibus:

*Syllogismo-  
rum secundæ  
figuræ ad  
primam re-  
ductio.*

nibus: *Nullum A est B & Quodcunque est B, Illud non est A* denuo eadem notio respondet, cum enim B concipiatur repugnare ipsi A (§. 205. 310.), sub omni A contineri nequit, cui B convenit, quoniam idem simul esse & non esse non potest. Sunt igitur propositiones istæ æquivalentes (§. 278.). Quamobrem si in istis syllogismis generalibus pro maiore *Nullum A est B* substituatur hæc altera: *Quicquid est B, illud non est A*; syllogismi secundæ figuræ abeunt in sequentes: *Quicquid est B, illud non est A. Sed Omne C est B. Ergo Nullum C est A & Quicquid est B, illud non est A. Sed Quoddam C est B. Ergo Quoddam C non est A.* Enimvero primum esse in modo *Celarent*; alterum vero in modo *Ferio* denuo patet (§. 373.).

Patet idem in exemplis specialibus modo (not. §. 383.) allatis. Etenim universaliter neganti, *Nullum triangulum habet quatuor angulos*, æquipollet hæc altera itidem universaliter negans. *Nulla figura, quæ quatuor habet angulos, est triangulum*, & universaliter affirmanti, *Omne triangulum habet tres angulos*, æquipollet hæc altera universaliter negans, *Nulla figura, quæ non habet tres angulos, est triangulum*. Quod si ergo propositiones æquipollentes loco conveniente substituas; prodibunt syllogismi in prima figura sequentes:

I.

CE Nulla figura, quæ habet quatuor angulos, est triangulum.  
IA Atqui Omne Quadratum habet quatuor angulos.  
rEnt Ergo nullum Quadratum est triangulum.

II.

CE Nulla figura, quæ non habet tres angulos, est triangulum.  
IA Nullum Quadratum habet tres angulos.  
rEnt Ergo Nullum Quadratum est triangulum.

III.

FEr Nulla figura, quæ quatuor habet angulos, est triangulum.  
I Quædam figuræ habent quatuor angulos.  
O Ergo Quædam figuræ non sunt triangula.

IV.

FEr Nulla figura, quæ non habet tres angulos, est triangulum.  
I Quædam figuræ non habent tres angulos.  
O Ergo Quædam figuræ non sunt triangula.

§. 385.

*Quid crypti-  
a sit in syllo-*

Quoniam syllogismi secundæ figuræ a syllogismis primæ in *Celarent* & *Ferio* non differunt nisi in eo, quod propositiones majores

maiores sunt propositiones externa specie differentes, sed æquivalentes (§. 384.); *syllogismi secundæ figuræ sunt syllogismi cryptici primæ (§. 365.).*

Atque adeo denuo apparet, non opus esse, ut peculiaris pro iis figura constituatur, quemadmodum pro aliis syllogismis crypticis nulla constituitur figura. Etenim si syllogismus crypticus non videatur evidens, substituitur propositio æquipollens in majore, & evidentia consequentiæ statim patebit per dictum de omni & nullo. E. gr. Si quis ita argumentatur: *Omne triangulum habet tres angulos. Omnis figura terminata duobus radiis circuli & subtensa arcus habet tres angulos. Ergo Omnis figura terminata duobus radiis circuli & subtensa arcus est triangulum:* syllogismus crypticus est (§. 365.). Etenim medius terminus bis prædicatur; adeoque syllogismus videtur esse in secunda figura (§. 344.). Enim vero in secunda figura conclusio debet esse negativa (§. 382.), adeoque syllogismus affirmans in secunda esse nequit. Nimirum latet cryptis in propositione majore: *Omne triangulum habet tres angulos:* cui æquipollens hæc altera: *Quæcumque figura habet tres angulos, illa est triangulum.* Quod si ergo æquipollentem substituas in majore, habebis syllogismum: *Omnis figura, quæ habet tres angulos, est triangulum.* Atqui *Omnis figura terminata duobus circuli radiis & subtensa arcus habet tres angulos. Ergo Omnis figura terminata duobus circuli radiis & subtensa arcus est triangulum:* quem esse in modo Barbara patet. Reducitur adeo hic syllogismus crypticus eodem modo ad primam figuram, quemadmodum syllogismi secundæ ad eundem reducuntur. Enimvero inter istiusmodi syllogismos crypticos atque syllogismos secundæ figuræ hæc differentia intercedit, quod syllogismus secundæ figuræ insit vis consequentiæ vi formæ, crypticis vero istis syllogismis tantum vi æquipollentiæ cum syllogismi primæ figuræ: quamobrem pro posterioribus ob casum particularitatis nulla forma generalis exculpi, nec modus argumentandi pro iis condi potest. Hæc differentia nisi intercederet, dubium mihi nullum est, quin modus argumentandi pro affirmantibus syllogismis in secunda figura dudum constitutus fuisset.

§. 386.

Quoniam in syllogismis propriis hic quoque major universalis æquipollens (§. 355.); *syllogismi proprii secundæ figuræ sunt in modis Festino atque Baroco.*

*Syllogismi proprii secundæ figuræ cujus sint mo-*

E. gr. Syllogismi proprii in secunda figura sunt :

## I.

*Autor Principiorum philosophiæ naturalis mathematicorum non est autor Astronomiæ Britannicæ.*

*Joannes Newtonus est Autor Astronomiæ Britannicæ.*

*Ergo Joannes Newtonus non est Autor Principiorum philosophiæ naturalis mathematicorum.*

## II.

*Autor Astronomiæ physicae & geometricæ fuit Professor Savilianus in Academia Oxoniensi.*

*Jacobus Gregorius non fuit Professor Savilianus in Academia Oxoniensi.*

*Ergo Jacobus Gregorius non est Autor Astronomiæ physicae & geometricæ.*

In his vero propositiones majores æquivalent universalibus & ad formam universalium ita reducuntur : *Quicumque est Autor Principiorum philosophiæ naturalis mathematicorum, is non est Autor Astronomiæ Britannicæ & Quicumque fuit Autor Astronomiæ physicae & geometricæ, is fuit Professor in Academia Oxoniensi.* His in syllogismis substitutis, proprii habebunt formam in modo *Festino* atque *Baroco*. Obiter noto, cum conclusiones singulares in argumentando æquipolleant particularibus, in secunda autem figura non nisi duo sint modi syllogismorum particularium, *Festino* nempe atque *Baroco* (§. 383.) ; non nisi duos esse posse modos syllogismorum propriorum in secunda figura. Et eodem prorsus modo patet, nec plures, quam duos esse modos syllogismorum propriorum in prima figura.

## §. 387.

*Syllogismorum propriorum ad primam reducitur.* Quia omnis propositio propria potest converti (§. 351.) ; *syllogismi proprii secundæ figuræ ad primam eodem modo reducuntur, quo ceteri (§. 384.).*

E. gr. Syllogismi proprii modo allati (not. §. 386.) in figura prima sunt hujus formæ :

## I.

*Autor Astronomiæ Britannicæ non est Autor principiorum philosophiæ naturalis mathematicorum.*

*Joannes Newtonus est Autor Astronomiæ Britannicæ.*

*Ergo Joannes Newtonus non est Autor principiorum philosophiæ naturalis mathematicorum.*

II. *Qui*

II.

*Qui non fuit Professor Astronomiæ Savilianus in academia Oxoniensi,  
non est Autor Astronomiæ physice & geometricæ.*

*Jacobus Gregorius non fuit Professor Astronomiæ Savilianus in Academia Oxoniensi.*

*Ergo Jacobus Gregorius non est Autor Astronomiæ physice & geometricæ*  
§. 388.

Quoniam syllogismi primæ figuræ non sunt nisi applicatio Dicti de omni & nullo (§. 366. & seqq.), istud autem Dictum per se evidens est, propterea quod intellectus concipere nequit idem simul esse & non esse (§. 346. 347. ), adeoque quivis in prima figura syllogismus suam secum fert evidentiam: syllogismi contra secundæ figuræ pendent a corollario Dicti de omni & nullo (§. 381.), adeoque evidentiam suam mutuantur a figura prima; ideo *syllogismi secundæ figuræ minus evidentes sunt syllogismi primæ.*

*Syllogismi secundæ figuræ cur minus evidentes syllogismi primæ.*

Nemo negabit, evidentiam majorem habere, quod per se evidens est, quam quod evidentiam mutuatur a demonstratione.

§. 389.

*Si Quoddam C sit A atque etiam vel omne A, vel Quoddam A fuerit C, substituta in syllogismo primæ figuræ propositio-  
ne posteriori in locum prioris, syllogismus evadit figuræ tertiæ.*  
Hypothesin non sumi impossibilem, facile probatur. Sit enim C genus ipsius A, e. gr. denotet C hominem, A vero hominem doctum; cum genus competat omni speciei, una species nonnisi quædam generis constituit, consequenter de genere particulariter prædicabitur, cum e contrario genus de omni specie prædicetur. Igitur in hoc casu generali *Quoddam C est A & Omne A est C*, vel in casu particulari, qui sub eodem continetur, *Quidam homines sunt docti & Omnis doctus est homo.* Eodem modo sese res habet, si prædicatum A, quod tribuitur quibusdam sub genere, vel specie C contentis, convenit soli generi vel speciei C, veluti si dicas: *Quidam homo est Rex*, ubi patet simul, quod *Omnis Rex sit homo*, Regis enim nomen, prout hic sumitur, non convenit nisi cuidam homini. Enim-

*Aliquot modorum tertiæ figuræ fundamentum.*

vero si de subiecto particulariter prædicetur modus aliquis, modo isto instructa nonnisi partem subiecti constituunt, atque adeo ipsum nonnisi particulariter de his enunciari potest. Si adeo Quoddam C fuerit A, vicissim nonnisi Quoddam A erit C, veluti in casu particulari, *Quidam divites sunt avari & vicissim Quidam avari sunt divites.* Non distinctius hic persequi libet omnem casuum varietatem, cum nobis ostendisse sufficiat, quod hypothesis assumpta non sit impossibilis.

Jam omnis syllogismus, qui habet præmissam particularem, ipse quoque particularis est (§. 360. 342.), adeoque si primæ figuræ fuerit vel in modo *Darii*, vel *Ferio* (§. 373.), consequenter sub his generalibus continetur (§. 380.).

## I.

*Omne A est B*

*Quoddam C est A*

*Ergo Quoddam C est B.*

Quodsi jam substituas pro præmissa particulari seu minori *Quoddam C est A* vel illam: *Omne A est C*, vel hanc *Quoddam A est C*; prodibunt syllogismi:

## I.

*Omne A est B.*

*Omne A est C.*

*Ergo Quoddam C est B.*

## II.

*Omne A est B.*

*Quoddam A est C.*

*Ergo Quoddam C est B.*

## II.

*Nullum A est B.*

*Quoddam C est A.*

*Ergo Quoddam C non est B.*

## III.

*Nullum A est B.*

*Omne A est C.*

*Ergo Quoddam C non est B.*

## IV.

*Nullum A est B.*

*Quoddam A est C.*

*Ergo Quoddam C non est B.*

In his cum sit idem subiectum A in utraque præmissa, terminus medius bis ponitur loco subiecti (§. 336.), adeoque syllogismi sunt in tertia figura (§. 344.). Quoniam vero ex *hyporbesi*, si *Quoddam C fuerit A*, etiam *Omne A est C* vel *Quoddam A est C*; in prima autem figura ex eo, quod *O. A sit B & Q. C sit A*, sequatur, *Quoddam C esse B*, & ex eo, quod *N. A sit B & Q. C sit A. Quoddam C non esse B* (§. 380.); facile patet, eo in casu,

casu, quo, si *Quoddam C est A*. etiam *Omne A est C*, vel *Quoddam A est C*, positis præmissis: *Omne A est B* & *Omne* vel *Quoddam A est C*, poni quoque debere conclusionem, *Quoddam C est B* & vicissim positis præmissis, *Nullum A est B* & *Omne* vel *Quoddam A est C*, poni quoque debere conclusionem *Quoddam C non est B*.

§. 390.

Habemus igitur hic quatuor modos tertiæ figuræ, quorum primus majorem & minorem habet universaliter affirmantem, conclusionem particulariter affirmantem; secundus majorem universaliter affirmantem, minorem & conclusionem particulariter affirmantem; tertius majorem universaliter negantem, minorem universaliter affirmantem, conclusionem particulariter negantem; quartus denique majorem universaliter negantem, minorem particulariter affirmantem, conclusionem particulariter negantem. Distinguuntur iidem perinde ac modi primæ (§. 373. 374.) & secundæ figuræ (§. 383.) nominibus essentialis significatus: dicitur nempe primus eorum *Darapti*, secundus *Datifi*, tertius *Felapton*, & quartus *Ferison*.

Habent quoque hic nomina eundem usum, quem in figura prima (§. 375.): quod ut appareat, exempla sequentia apponimus.

I.

III.

DA O. vere doctus est virtuosus.

FE N. vere doctus invidet alteri doctrinam

rAp O. vere doctus est homo.

tl Ergo Quidam homo est virtuosus.

lAp O. vere doctus est homo.

tOn Ergo Quidam homo non invidet alteri doctrinam.

Seu Quidam homines sunt virtuosi.

Seu Quidam homines non invident alteri doctrinam.

II.

IV.

DA O. pius Deum amat.

FE N. pius proximum odit.

tl Quidam pii sunt homines.

rls Quidam pii sunt homines.

l Ergo Quidam homines Deum amant.

On Ergo Quidam homines proximum non oderunt.

Primus & secundus æquipollent sequentibus in modo *Darii*, tertius vero & quartus sequentibus in modo *Ferio*.

I. DA

I.

DA O. vere doctus est virtuosus.

r I Q. homines sunt vere docti.

I E. Q. homines sunt virtuosii.

II.

DA O. pius Deum amat.

r I Q. homines sunt pii.

I E. Quidam homines Deum amant.

III.

FE N vere doctus invidet alteri doctrinam.

r I Quidam homines sunt vere docti.

O E Quidam homines non invidet alteri doctrinam.

IV.

FE. N. pius proximum odit.

r I Quidam homines sunt pii.

O E Quidam homines proximum non oderunt.

## §. 391.

Fundamentum modi  
quinti & sexti  
tertiæ figuræ.

*Quodsi de quibusdam A affirmatur vel negatur B, idem etiam B de quibusdam sub C contentis affirmari vel negari potest, quod de omni A affirmatur.* Quoniam C de omni A prædicatur, erit id vel attributum, vel essentialia, vel quidpiam, quod per modum attributi inest (§. 257.). Jam cum subjectum propositionis universalis sit vel genus, vel species (§. 242.) & non minus per attributa (§. 71.), consequenter & ea, quæ per modum attributi insunt, quam per essentialia genera & species determinentur (§. 70.); erit C vel genus quoddam superius aut inferius, vel, ubi essentialia aut attributum commune fuerit, genus quodpiam (§. 45. 46.), ubi vero attributum proprium fuerit, ipsam speciem A designabit, de qua C prædicatur (§. 175.). In casu posteriori per se patet, quædam ipsius A esse simul quædam ipsius C. In priori cum integrum A sub ipso C contineatur, etiam quædam A in eodem contineri debent, consequenter quædam A erunt simul quædam C. Quod itaque de quibusdam A affirmatur vel negatur, idem quoque de quibusdam C affirmari, vel negari potest.

Quodsi omne A denotet subjectum sub tota quædam determinatione, prædicatum C vel modus est, vel relatio, vel quidpiam, quod instar modi inest, adeoque vicem ejus præstat (§. 258.). Enimvero quoniam subjectum sub data quædam determinatione sumtum constituit certam quædam speciem: **mo-  
di**



di & relationes, quæque illorum vicem præstant, respectu hujus determinationis instar attributorum sunt (§. 65.). Valent igitur in hoc quoque casu, quæ modo demonstrata sunt in altero.

E. gr. *Quædam figuræ quadrilateræ sunt circulo inscriptibiles.* Jam vero constat, omnes figuras quadrilateras habere summam angulorum quatuor rectis æqualem. Inde igitur sequitur, quod *Quædam figuræ habentes summam angulorum quatuor rectis æqualem circulo inscriptibiles sint.* Hic de omni subiecto tanquam specie prædicatur attributum proprium, quo ipsa hæc figurarum species designatur & per quod, si ita visum fuerit, definiri potest (§. 175.). Quamobrem quædam figuræ quadrilateræ & quædam figuræ habentes summam angulorum quatuor rectis æqualem sunt revera idem subiectum bis positum. Similiter si affirmes: *Quosdam divites esse avaros,* cum constet, omnes divites esse homines, hoc ipso simul patet, quosdam homines esse avaros. Quidam enim divites continentur tanquam pars sub integra specie, sub omnibus divitibus. Quamobrem cum vicissim omnes divites sint veluti pars totius generis humani; ejus etiam pars erunt quidam divites, atque adeo quidam divites & quidam homines hic revera eadem individua denotantes sunt denuo idem subiectum sub diverso nomine bis positum.

§. 392.

Hinc consequitur: Si *Quoddam A est B & Omne A est C*; *Forma ista. Quoddam C esse B.* Item: Si *Quoddam A non est B & Omne A rum modo- est C*; *Quoddam C non esse B:* quos duos argumentandi modos rum.  
ob terminum medium A (§. 336.) bis loco subiecti positum esse in tertia figura patet (§. 344.).

Sunt duo hi modi tertiæ figuræ nonnisi distincta applicatio theorematis modo demonstrati (§. 391.), quemadmodum syllogismi primæ figuræ Dicti de omni & nullo (§. 380.).

§. 393.

Duo hi modi tertiæ figuræ sortiti sunt perinde ac ceteri *Eorum nomi- (§. 390.) nomina significatus essentialis.* Nimirum *Disamis* dicitur modus, in quo major est particulariter affirmans, minor universaliter affirmans, conclusio particulariter affirmans: *Bo- cardo* vero modus, in quo major particulariter negans, minor universaliter affirmans & conclusio particulariter negans.

(*Wolffi Logica*)

S

Habent

Habent nomina eundem usum, quem nomina anteriorum (§. 390.): quod ut appareat, exempla sequentia apponimus.

DI Quidam docti sunt invidi. Boc Quidam docti non sunt prudentes.

Am Omnes docti sunt homines. Ar Omnes docti sunt homines.

Is Ergo quidam homines sunt invidi. dO Ergo Quidam homines non sunt prudentes.

Ceterum hinc apparet, in his modis syllogismorum tertia figura medium terminum non continere rationem, unde intelligitur cur prædicatum conveniat subiecto, quemadmodum in ceteris: neque enim ideo homines quidam non sunt prudentes vel invidi sunt, quia docti, alias enim de omni docto defectus prudentiæ vel invidia prædicari posset, id quod tamen ipsi experienciæ repugnat.

## §. 394.

*Syllogismi  
figura tertia  
proprii.*

Quoniam propositiones propriæ universalibus æquipollere possunt (§. 355.), in tertia autem figura major atque minor idem habent subiectum (§. 344.); si una præmissarum sumitur ut universalis, etiam altera ut universalis sumi debet. Erunt itaque *affirmativi syllogismi proprii tertiae figure in modo Darapti & negativi proprii in modo Felapton.*

E. gr. Syllogismi proprii in tertia figura sunt sequentes.

## I.

*Isaacus Newtonus* est inventor methodi fluxionum.

*Isaacus Newtonus* est autor Principiorum Philosophiæ naturalis mathematicorum.

Ergo Autor Principiorum est inventor methodi fluxionum.

## II.

*Barrowius, Wallisus, Newtonus &c.* Mathesin præclaris inventis ditaverunt.

*Barrowius, Wallisus, Newtonus &c.* fuere Professores Matheseos.

Ergo Quidam Professores Matheseos Mathesin præclaris inventis ditaverunt.

## III.

*Aristoteles* non habuit distinctam rerum cognitionem.

*Aristoteles* fuit magni nominis Philosophus.

Ergo Quidam magni nominis Philosophus non habuit distinctam rerum cognitionem.

## IV.

*Faulhaber, Keplerus, Hugenius, Leibnitiuss &c.* non fuere Professores.

*Faulhaber, Keplerus, Hugenius, Leibnitiuss &c.* præclara in Mathesi invenerunt.

Ergo Quidam, qui præclara in Mathesi invenerunt, non fuere Professores. §. 395.

§. 395.

Patet ex dictis (§. 389. 392.), in tertia figura minorem semper esse affirmativam & conclusionem semper particularem. Et id eadem singulare habet, quod major particularis esse possit (§. 392.) quæ in prima atque secunda semper universalis (§. 366. 382.).

Exempla ante proposita (not. §. 390. 393.) regulas illustrent.

§. 396.

Syllogismi tertiæ figuræ in modis Disamis atque Bocardo æquivalent syllogismis primæ in Darii & Ferio. Syllogismus in modo Disamis generalis hic est (§. 392.); Quoddam A est B. Sed Omne A est C. Ergo Quoddam C est B. Enimvero si Quoddam A est B etiam Omne A, quod B est, est B: id quod nemo in dubium vocare potest. Jam vero porro si Omne A, quod est B, est C, patet etiam Quoddam C esse A, quod est B. Quod si ergo hæc propositiones, Omne A, quod B est, est B & Quoddam C est A, quod est B, substituantur pro æquipollentibus Quoddam A est B & Omne A est C; prodibit syllogismus: Omne A, quod B est, est B. Sed Quoddam C est A, quod est B. Ergo Quoddam C est B, quem esse in modo Darii patet (§. 372. 373.). Similiter Syllogismus in Bocardo generalis est: Quoddam A non est B. Sed Omne A est C. Ergo Quoddam C non est B. Enimvero si Quoddam A non est B, denuo patet, Nullum A, quod non est B, esse B. Quamobrem si hic quoque præmissis Quoddam A non est B & Omne A est C substituas alteras: Nullum A, quod non est B, est B & Quoddam C est A, quod non est B, prodibit Syllogismus. Nullum A, quod non est B, est B. Sed Quoddam C est A, quod non est B. Ergo Quoddam C non est B, quem esse in modo Ferio patet (§. 372. 373.).

Idem adhuc evidentius patet in syllogismis specialibus. Nimirum in modo Disamis & Bocardo ita argumentamur:

I.

II.

Dis Quidam divites sunt avari.  
AM Omnes divites sunt homines.  
Is Ergo Quidam homines sunt avari.

Boc Quidam divites non sunt avari.  
Ar Omnes divites sunt homines.  
dO Ergo Quidam homines non sunt avari.

S s 2

Reducti

Reducti vero ad primam figuram ita sonant:

I.

DA Omnis dives avarus est avarus.

rI Quidam homines sunt divites avari

I E. Quidam homines sunt avari.

II.

FE Nullus dives, qui non est avarus, est avarus,

rI Quidam homines sunt divites, qui non sunt avari.

O Ergo Q. homines non sunt avari.

Cum hic in syllogismo affirmativo medius terminus sit *esse divitem avarum*; in negativo *esse divitem, qui non est avarus*: evidens est, in hoc quoque casu, quemadmodum in syllogismis ceteris omnibus, medium terminum esse rationem, cur prædicatum conveniat suo subiecto. Est adeo in modis *Disamis* & *Bocardo* cryptis aliqua, cum medius terminus esse videatur, qui non est (§. 393.). Non igitur mirum, quod in reducendis syllogismis in *Disamis* & *Bocardo* ad primam figuram adeo se torqueant Logici nec sumto medio termino apparente & retenta conclusione in prima figura prodeat syllogismus, cui vis consequentiæ inest:

§. 397.

*Quid cryptici sit in syllogismis tertia figura.*

Quoniam syllogismi tertiae figurae a syllogisminis primæ in *Daris* & *Ferio* non differunt, nisi in eo, quod vel alterutra, vel utraque præmissa externa specie differat a præmissis syllogismorum in prima, iisdem tamen æquivalet (§. 389. 396.); *Syllogismi tertiae figurae sunt syllogismi cryptici in prima* (§. 365.).

Apparet adeo, non opus esse, ut peculiaris pro iis figura condatur. Valent hic eadem, quæ eandem ob rationem de figura secunda annotavimus (not. §. 385.).

§. 398.

*Syllogismorum propriorum tertiae figurae ad primam reductionis.*

Quia omnis propositio propria converti potest (§. 351.), *minore in syllogismis propriis conversa, prodit syllogismus proprius in prima figura.*

E. gr. Syllogismi proprii in tertia figura exempli loco (not. §. 394.) propositi ita se habent in prima:

I.

*Isaacus Newtonus* est inventor methodi fluxionum.

Autor Principiorum philosophiæ naturalis mathematicorum est *Isaacus Newtonus*.

Ergo Autor principiorum est inventor methodi fluxionum.

II.

*Barrowius, Wallisus, Newtonus &c.* Mathesin præclaris inventis ditarunt.

Q. Matheseos Professores fuerunt *Barrowius, Wallisus, Newtonus &c.*

Ergo Quidam Matheseos Professores Mathesin præclaris inventis ditarunt.

III. *Art.*

III.

*Aristoteles* non habuit distinctam rerum cognitionem.

Quidam magni nominis philosophus fuit *Aristoteles*.

Ergo quidam magni nominis philosophus non habuit distinctam rerum cognitionem.

IV.

*Faulhaber*, *Kepler*, *Hugenius*, *Leibnitius* &c. non fuere Professores.

Quidam, qui præclara in Mathesi invenerunt, fuere *Faulhaber*, *Kepler*, *Hugenius*, *Leibnitius* &c.

Ergo Quidam, qui præclara in Mathesi invenerunt, non fuere Professores.

§. 399.

*Syllogismi tertiæ figuræ sunt minus evidentes syllogismis primæ.* Demonstratum jam est (§. 388.), syllogismos primæ figuræ suam secum ferre evidentiam. Enimvero vis consequentiæ in figura tertia vel pendet ab æquipollentia cum syllogismis primæ figuræ (§. 389.), vel nititur principio per se non manifesto (§. 391.) & per reductionem ad primam figuram nova ratione institutam demum patet (§. 396.), consequenter in utroque casu syllogismi tertiæ figuræ evidentiam suam mutuuntur a prima. Syllogismi igitur tertiæ figuræ sunt minus evidentes syllogismis primæ.

*Syllogismi tertiæ figuræ cur minus evidentes syllogismis primæ.*

Equidem non ignoro, *Joachimum Jungium*, virum magni nominis, qui suo tempore unanimi omnium intelligentium consensu Demonstrator optimus habebatur, in Logica Hamburgensi lib. 3. c. 10. §. 18. monere, quod in secunda & tertia figura sæpe naturali prædicatione concludatur, quod præternaturali in prima colligitur. Enimvero rationem prædicationum præternaturalium, quas vocat, ipse allegat reductiones consuetas syllogismorum tertiæ & secundæ figuræ ad primam. Cum vero istis reductionibus non sit opus, sed a nobis aliæ fuerint ostensæ (§. 384. 389. 396. 398.), quibus insolitæ istæ prædicationes evitantur, & quas ex parte agnoscit ipse *Jungius* c. 12. §. 14.; non obstat nobis *Jungiana* ratio, nec viri ceteroquin perspicacissimi judicium. Dabimus oculatam fidem. *Jungius* syllogismum in *Camestres* c. 12. §. 11. 12. ita reducit ad modum *Celarent* communi more, ut præter metathesin seu præmissarum transpositionem utatur duplici conversione simplici, quam vocant scholastici. Ita enim argumentatur.

C*Am Omnes credentes salvantur.*

E*s Nulli Diaboli salvantur.*

r*Es Ergo Nulli Diaboli credunt.*

Ita vero syllogismus reducit ad figuram primam. Sumit minorem loco majoris *Nulli Diaboli salvantur* & sic argumentatur:

C*E Nulli, qui salvantur, sunt Diaboli.*

I*A Omnes credentes salvantur.*

r*Ent Ergo Nulli credentes sunt Diaboli.*

E. *Nulli Diaboli credunt.*

Enimvero nos istis ambagibus non habemus opus. Retinemus minorem, retinemus conclusionem; majori substituimus propositionem æquipollentem, quæ minime coactam habet formam, ita argumentantes (§. 384.).

C*E Quicumque non salvantur, illi non credunt.*

I*A Nulli Diaboli salvantur.*

r*Ent Ergo Nulli Diaboli credunt.*

Medius terminus hic apte designat rationem, cur prædicatum subiecto tribuendum, nec alia est syllogismi forma, ac si is statim in prima figura fuisset formatus. Non minus contorta vulgo est argumentandi ratio, si syllogismi tertiæ figuræ, qui sunt in modis *Ditamis* atque *Bocardo*, ad primam figuram reducuntur. Exemplum tale affert *Jungius* loc. cit. §. 15.

B*O Quoddam elementum non est visibile.*

c*Ar Omne elementum est corpus.*

d*O Ergo quoddam corpus non est visibile.*

Reductionem ita instituit in modo Darri:

D*A Omne elementum est corpus.*

r*I Quoddam non visibile est elementum.*

I*Ergo Quoddam non visibile est corpus.*

Ergo Quoddam corpus est non visibile.

Ergo Quoddam corpus non est visibile.

Enimvero nos istis ambagibus non habemus opus, modo rectificemus medium terminum (§. 396.). Ita nimirum argumentamur in *Ferio*.

F*E Omne elementum invisibile non est visibile.*

r*I Quoddam corpus est elementum invisibile.*

O*Ergo Quoddam corpus non est visibile.*

Non nego Logica naturali utentes uti subinde syllogismis secundæ ac tertiæ figuræ; sed non alia ex ratione utuntur, quam ob quam crypti-

eis eosdem uti contingit: cujus exemplum in superioribus (not. §. 385.) dedi. Nimirum in praxi ratiocinandi minor plerumque propositio primo loco formatur, nulla adhuc habita ratione majoris, quæ accedere debet. Ubi igitur ob terminum communem memoria nobis suggerit majorem, hæc ea forma occurrit, qua eandem memoriæ mandavimus. Minime attentæ ad formam syllogismi, eandem retinent, prout succurrit, nec in æquivalentem demum transmutant. Cur autem ideo pro omnibus syllogismis crypticis non constituantur modi argumentandi, in superioribus dictum est (not. §. 385.).

§. 400.

*Figura perfecta* dicitur, in qua omnes propositiones inferri possunt: *imperfecta* contra, in qua non omnes inferre licet.

*Figura perfecta & imperfecta definitio.*

Omnis propositio est vel universaliter affirmans, vel universaliter negans, vel particulariter affirmans, vel particulariter negans (§. 259.): sub particulari vero hic simul comprehenditur singularis. Unde eadem figura perfecta censetur, in qua conclusiones syllogismorum sunt & universaliter affirmantes, & universaliter negantes, & particulariter affirmantes, & particulariter negantes, & singulares.

§. 401.

*Figura prima est perfecta; secunda & tertia sunt imperfectæ.* Prima syllogismorum figura omnibus conclusionibus inferendis sufficit (§. 378.); secunda nonnisi negativis (§. 382.) & tertia nonnisi particularibus inservit (§. 395.). Est igitur prima perfecta, secunda vero & tertia sunt imperfectæ (§. 400.).

*Figura prima cur sola perfecta.*

In scientiis propositiones negativæ & particulares sunt rariores immo posteriores rarissimæ. Scientiæ enim universalium sunt & in iis docetur, quid subiecto vel absoluta, vel sub data conditione seu determinatione conveniat (§. 121. *Disc. præl.*). Evolvantur elementa *Euclidis* aut nostra *Matheseos* universæ elementa: non ibi propositiones particulares, quæ plerumque indeterminatæ sunt, nec negativæ, nisi per paucas, reperies. Atque adeo multo magis pater, nos figuris istis imperfectis carere posse in praxi. Quodsi enim contingat, ut veluti sponte sua sese nobis offerat syllogismus secundæ atque tertiæ figuræ (not. §. 399.), & de consequentia, quæ in istis figuris per se evidens non est ut in prima (§. 388. 399.), scrupulus suborietur; perinde ac in syllogismis crypticis fieri solet, quos inter & iste locum obtinet (§. 385. 397.), ad conclu-

conclusionem & medium terminum attenti nullo negotio formamus syllogismum in prima (§. 375.), minus coacta prædicatione seu *naturali*, quam vocat *Jungius*, in præmissis & eadem conclusione re-tenta (not. §. 399.).

§. 402.

*Monitum de  
nominibus  
syllogismo-  
rum.*

Veteres cum *Aristotele* cognovere, fundamentum artis ra-tiocinandi esse *dictum de omni & nullo* & hinc prodire quatuor modos syllogismorum primæ figuræ, quibus sua per se constat evidentia: quæ singula a nobis fuere in antecedentibus demon-strata. Cum porro agnoscerent, propositiones posse converti & per earum in syllogismis primæ figuræ conversionem prodi-re alios argumentandi modos; hac via incidere in modos figu-ræ secundæ & tertiæ, quos per reductionem ad figuram primam ope conversionis demonstrarunt. In significato itaque essen-tiali habita quoque fuit harum reductionum ratio, designato conversionis modo per consonantes, nec non modis figurarum sibi mutuo respondentibus per consonantes initiales. Enim-vero quoniam nos istis reductionibus non sumus usi in demon-strandis modis figuræ primæ & secundæ, sed hos in numerum syllogismorum crypticorum retulimus; ideo quoque penes nos nullus est consonantium usus. Si cui alio fine non utile visum fuerit significatum istorum nominum essentialem inte-grum cognoscere; is cum ex libellis magno numero obviis pe-tat. Nos non tradimus a scopo nostro aliena, nec quæ in spem futuræ oblivionis addiscenda.

### CAPUT III.

## DE SYLLOGISMIS COMPOSITIS.

§. 403.

*Syllogismi  
compositi  
definitio.*

**S**yllogismus compositus est, cujus vel una, vel utraque præmissa non est propositio categorica.

Opponitur enim syllogismo categorico, qui idem simplex dici-tur (§. 361.). Unde in numerum syllogismorum compositorum referendus non est, cujus præmissæ sunt propositiones copulativæ, etsi copula-tiva propositio sit composita. E. gr. Si ita argumentamur: *Quicumque*

*est*



*est & liberrimus, & sapientissimus, ille non vult nisi optimum. Sed Deus est & liberrimus, & sapientissimus. Ergo Deus non vult nisi optimum: Syllogismus categoricus est in modo Darii primæ figuræ (§. 373.). Retinemus significatum terminorum receptum, quantum salva veritate fieri potest (§. 147 Disc. pral.).*

## §. 404.

Quodsi major fuerit propositio hypothetica, *syllogismus hypotheticus* dicitur. Vocatur etiam *syllogismus conditionalis*, item *connexus*. *Syllogismi hypothetici definitio.*

E. gr. Si quis ita argumentatur: *Si Deus est & liberrimus, & sapientissimus, non vult nisi quod optimum. Atqui Deus est & liberrimus, & sapientissimus. Ergo Deus non vult nisi quod optimum: Syllogismus hypotheticus est, quia propositio major hypothetica (§. 218.).*

## §. 405.

In propositione hypothetica *antecedens* dicitur propositio, quæ particulam conditionalem habet, seu quæ conditionem de subiecto enunciat, sub qua ipsi prædicatum tribuitur, vel ab eodem removetur aut sub qua aliud quid esse affirmatur, vel negatur; *Consequens* vero vocatur propositio, in qua prædicatum subiecto isti tribuitur, aut qua aliud quid esse affirmatur, vel negatur. *Antecedenti & consequenti definitio.*

E. gr. In propositione hypothetica, *si Deus est & liberrimus, & sapientissimus, non vult nisi quod optimum*, antecedens dicitur propositio categorica, *Deus est & liberrimus, & sapientissimus*; consequens vero propositio categorica altera, *Deus non vult nisi quod optimum.*

## §. 406.

*Poni* dicitur membrum aliquod præmissæ, quod ita repetitur, ut in eadem habetur; *removeri* autem, cujus contradictorium asseritur. *Quid poni, quid removeri dicatur.*

E. gr. *Poni* dicitur antecedens propositionis hypotheticæ, si propositio categorica, qua constat, repetitur, veluti si in exemplo præcedente affirmamus, *Deum esse & liberrimum, & sapientissimum*. *Poni* dicitur consequens, si affirmatur, *Deum non velle, nisi quod optimum*. Enimvero si dixeris: *Aut dies est, aut nox est*, & negaveris *esse diem*; tum *removeri* dicitur antecedens: Quodsi negaveris, *esse noctem*, *removeri* dicitur consequens.

(Wolffii Logica)

Tt

§. 407.

## §. 407.

Fundamen-  
tum syllogi-  
mi hypothe-  
tici.

*Si in syllogismo hypothetico antecedens ponitur, ponendum quoque est consequens; si vero consequens tollitur, tollendum quoque est antecedens.* - Etenim si antecedens ponitur, propositio categorica, quæ eodem continetur, ita repetitur, prout membrum propositionis hypotheticæ constituit (§. 406.). Quare cum propositio ista contineat conditionem, ob quam subiecto consequentis prædicatum tribui debet, vel ab eodem removeri (§. 405.); antecedente posito, conditio ista admittitur, adeoque etiam consequens admitti debet, consequenter in conclusione repetendum, prout in maiore continetur. Ponendum igitur & consequens, posito antecedente (§. 406.).

Quodsi in minore consequens tollitur vel removetur, contradictorium ejus asseritur, quod in propositione categorica, quæ consequente continetur, prædicatur (§. 406.). Cum adeo propositio ista non admittatur, sed negetur, quod in ea affirmatur, vel contra affirmetur, quod in ea negatur (§. 288.); nec antecedens admitti potest, quo posito ponendum erat consequens, *vi num. 1.* Erit igitur & ipsum tollendum (§. 406.).

Omnis propositio hypothetica ita exponitur: *Si verum, est antecedens, verum etiam est consequens.* Quodsi ergo admittis, *antecedens esse verum*, admittere etiam debes, *consequens esse verum*: Si negas, *consequens esse verum*; negare etiam debes, *antecedens esse verum*: admissio enim antecedente tanquam vero, admittendum quoque erat consequens tanquam verum, quod repugnat. Enimvero nondum sequitur, quod etiam sublato antecedente tolli debeat consequens, cum consequens ex alia ratione possit esse verum. E. gr. propositio hypothetica est, *si globus ligneus ex turri deiabitur, celerrime movetur.* Quodsi ergo ponis, *globum ligneum ex turri in planum delabi*; ponendum quoque, *quod celerrime moveatur.* Si tollis consequens, *globum ligneum in plano celerrime moveri*, tollendum quoque antecedens, *quod ex turri delapsus motum istum acquisiverit.* Enimvero licet tollas antecedens, quod *ex turri delapsus motum acquisiverit*, non tamen ideo tollendum consequens, quod *globus alia ratione motum celerrimum acquirere possit.* Sublatione antecedentis non tollitur consequens nisi in casu admodum particulari, quem in sequente propositione determinamus.

§. 408.

## §. 408.

*Si antecedens unicam contineat conditionem, sub qua prædicatum in consequente subjecto tributum eidem convenire possit; sublato antecedente, tollendum quoque est consequens.* Si negas: concedendum erit, sublato antecedente, adhuc convenire posse subjecto prædicatum, quod ei in consequente tribuitur. Ergo antecedens non continet unicam conditionem, sub qua prædicatum in consequente subjecto tributum eidem convenire potest: id quod hypothesei repugnat.

Fundamentum particulare.

E. gr. In propositione hypothetica *si lapis est calidus, calefacit*, antecedens *lapis est calidus* unicam continet conditionem, sub qua prædicatum *calefacere* subjecto *lapidi* tribui potest. Quamobrem si neges *lapidem esse calidum*, negare quoque debes, quod *calefaciat*. Similiter in propositione hypothetica, *si aqua igni imponitur, ebullit*, antecedens unicam continet conditionem: unde remoto antecedente consequens tollitur.

## §. 409.

*Modi syllogismorum hypotheticorum non nisi duo sunt, quibus bi syllogismi generales respondent.*

Modi syllogismorum hypotheticorum.

## I.

## II.

*Si antecedens est, etiam consequens est.*

*Si antecedens est, etiam consequens est.*

*Sed antecedens est.*

*Sed consequens non est.*

*Ergo etiam consequens est.*

*Ergo antecedens non est.*

Etenim posito antecedente in minore, ponendum quoque consequens in conclusione (§. 407.), adeoque habemus modum primum: Similiter sublato consequente in minore, tollendum quoque est antecedens in conclusione (§. 407.), adeoque modum habemus secundum. Quodsi antecedens contineat unicam conditionem, cur prædicatum in consequente eidem tribuitur; propositio hypothetica, *si A est B, D quoque est C*, æquipollet alteri (§. 278.): *Si A non est B, D quoque non est C*. Quodsi ergo hanc illi substituas, posito antecedente ponetur consequens,

quens, nempe si admittis A non esse B, admittendum quoque erit D non esse C. Continetur adeo syllogismus sub modo primo, quo posito antecedente ponitur consequens: neque adeo opus est, ut modus peculiaris pro casu isto particulari constituatur.

Logici non habent nisi duos modos syllogismorum hypotheticorum, atque adeo patet, ex eadem ratione pro casu tertio modum peculiarem non constitui, ob quam nos supra defendimus, non opus esse ut figura syllogismorum secunda & tertia constituatur (not. §. 385-397.).

## §. 410.

*Nomina modorum.*

*Modus syllogismorum hypotheticorum, qui posito antecedente ponit consequens, dicitur ponens: contra vero modus, qui sublato consequente tollit antecedens, dicitur tollens.*

Ut modorum discrimen rectius appareat, subjicere lubet.

I. *exempla modi ponentis.*II. *exempla modi tollentis.*

I.

I.

Si Deus est liberrimus, non vult  
nisi optimum.

Si Deus non facit optimum, non est  
sapientissimus.

Sed Deus est liberrimus.

Sed Deus est sapientissimus.

Ergo Deus non vult nisi optimum.

Ergo facit quod optimum.

2.

2.

Si lapis non est calidus, non calefacit.

Si lapis non est calidus, non calefacit.

Sed lapis non est calidus.

Sed lapis calefacit.

Ergo lapis non calefacit.

Ergo lapis est calidus.

Eodem quoque modo argumentamur, si antecedentis & consequentis non fuerit idem subiectum. V. gr.

1. *in modo ponente.*2. *in modo tollente.*

Si sol movetur in eclipctica, tempestas anni variatur.

Si sol movetur in æquatore, tempestas anni eadem.

Sed sol movetur in eclipctica.

Sed tempestas anni non est eadem.

Ergo tempestas anni variatur.

Ergo sol non movetur in æquatore.

## §. 411.

*Compendium loquendi.*

Ne in minore antecedens & in conclusione consequens in ponente, nec in minore consequentis, in conclusione antecedentis contradictorium repeti sit opus in tollente; compendiose subsumimus in ponente: atqui verum est prius vel antecedens, & infer.

*inferimus: Ergo & posterius, sive consequens; contra in tollente subsumimus: Atqui falsum est posterius, & inferimus. Ergo & prius.*

E. gr. Ita argumentamur: Si Sol movetur in ecliptica, tempestas anni non semper eadem. Atqui verum est prius. Ergo & posterius. Vel: Atqui verum est antecedens. Ergo & consequens.

§. 412.

*Si antecedentis & consequentis idem fuerit subjectum & in ponentibus prædicatum antecedentis, in tollentibus prædicatum consequentis sumatur tanquam subjectum, in illo autem prædicatum consequentis, in hoc prædicatum antecedentis eidem adjicitur tanquam prædicatum; reserata conclusione & minore, propositio sic formata subit vicem majoris & syllogismus hypotheticus abit in categoricum primæ figuræ. Cum enim in modo ponente minor sit antecedens, conclusio consequens (§. 410.) & consequentis atque antecedentis idem subjectum per hypoth. minor & conclusio idem subjectum habent, adeoque ad formam figuræ primæ quadrant (§. 375.). Enimvero in eadem figura medius terminus est subjectum majoris & prædicatum minoris (§. 344.). Quamobrem ut prodeat major, prædicatum antecedentis sumi debet tanquam subjectum; prædicatum consequentis tanquam prædicatum.*

*Syllogismi hypothetici ad figuram primam facile reducibiles.*

Similiter in modo tollente contradictorium consequentis minor est, contradictorium antecedentis conclusio (§. 410.). Quamobrem cum antecedentis & consequentis idem sit subjectum, per hypoth. idemque in contradictoriis retineatur (§. 288.); minor & conclusio denuo idem subjectum habent, adeoque ad formam figuræ primæ quadrant (§. 375.). Enimvero in eadem figura terminus medius est subjectum majoris & prædicatum minoris (§. 344.). Quamobrem ut prodeat major, prædicatum consequentis sumi debet tanquam subjectum & prædicatum antecedentis tanquam prædicatum, ut formetur propositio major syllogismi categorici.

E. gr. Syllogismi hypothetici exempli loco (not. §. 410.) propositi in prima figura ita se habent.

Tt 3

I. Qui-

## I.

Quicunque est liberrimus, is non  
vult nisi optimum.

Deus est liberrimus.

Ergo Deus non vult nisi opti-  
mum.

## II.

Quodcunque non est calidum, id  
non calefacit.

Hic lapis non est calidus.

Ergo hic lapis non calefacit.

## III.

Quicunque est sapientissimus, is fa-  
cit quod est optimum.

Deus est sapientissimus.

Ergo Deus facit, quod est optimum.

## IV.

Quodcunque calefacit, id est cali-  
dum.

Hic lapis calefacit.

Ergo hic lapis est calidus.

## §. 413.

*Eorum æqui-  
pollentia cum  
categoricis.*

Apparet adeo, *syll. gismis hypotheticis, in quibus antecede-  
dens & consequens idem habent subjectum, æquipollere categoricis  
in prima figura*: id quod non mirum, cum omnis propositio  
categorica ad formam hypotheticæ reduci possit (§. 226.).

Pro his adeo syllogismis non opus erat condere formam hypothe-  
ticorum.

## §. 414.

*Evidentia  
hypothetico-  
rum syllogi-  
smorum.*

Quoniam *syllogismi hypothetici, in quibus antecedens &  
consequens idem habent subjectum, æquipollent categoricis in pri-  
ma figura* (§. 413.), syllogismi autem categorici in prima figura  
evidentiam suam mutuuntur a Dicto de omni & nullo (§. 380.);  
illi etiam hypothetici a Dicto de omni & nullo evidentiam suam  
mutuantur. Enimvero *syllogismi quoque ceteri hypothetici,  
in quibus antecedens & consequens diversum habent subjectum,  
per Dictum de omni & nullo sunt evidentes*: id quod ita osten-  
ditur. Omnes illi syllogismi in modo ponente nituntur hoc  
generali: *ubique ponitur antecedens, ibi ponendum quoque  
est consequens*. Atqui *hic ponitur antecedens*. Ergo *hic po-  
nendum quoque est consequens* (§. 407. 410.). Similiter omnes  
illi syllogismi in modo tollente nituntur hoc generali: *ubi-  
cunque tollitur consequens, ibi quoque tollendum est antecedens*.  
Atqui *hic tollitur consequens*. Ergo *hic quoque tollendum est an-  
tecedens* (§. 407. 410.). Jam vero hi syllogismi generales sunt  
evidentes per dictum de omni & nullo (§. 346. 347.). *Quam-  
obrem*

obrem cum hypothetici speciales non formentur nisi per applicationem illorum generalium in dato quolibet casu; ideo quoque iidem evidentiam suam a Dicto de omni & nullo mutantur.

Immo patet ex dictis, syllogismis hypotheticis non fore locum, sublato dicto de omni & nullo, cum non formentur nisi beneficio syllogismorum generalium, qui non sunt nisi quædam applicatio Dicti de omni & nullo. Quod enim affirmatur de omni propositione hypothetica (§. 407.); id etiam affirmari posse, de quacunque sumitur vi Dicti de omni (§. 346.). Habemus adeo syllogismos categoricos generales in prima figura, quibus ducibus formantur hypothetici in casu speciali. Id vero non modo in syllogismis hypotheticis accidit; sed in aliis quoque casibus plurimis: quemadmodum in doctrina de consequentiis immediatis exempla plura occurrent & suo tempore in Metaphysica, præsertim Ontologia, dabimus syllogismos generales, quorum vi in casibus specialibus inferuntur, quæ nulla forma inferri videntur. Ceterum cum syllogismi hypothetici, etiam illi, qui diversum habent in antecedente & consequente subiectum, vi syllogismorum generalium in prima figura formentur, atque inde evidentiam suam habeant; non opus est, ut in casu singulari ad primam figuram reducantur, etsi reductio non sit prorsus impossibilis. Atque hinc etiam accidit, ut, etsi in Logica naturali in ratiocinando non attendamus nisi ad Dictum de omni & nullo (§. 353.); syllogismis tamen hypotheticis sæpissime utamur.

#### §. 415.

*Si antecedens & consequens diversum habeant subiectum & syllogismus hypotheticus ad primam figuram reducendus; inter-  
grum antecedens constitui debet determinatio subiecti in maiore. ad figuram  
primam diffi-*  
Etenim retenta conclusione, antecedens integrum spectari debet tanquam medius terminus, cum ex conclusione exulet (§. 337.). Quamobrem cum antecedens sit integra propositio, & in prima figura medius terminus subiectum maioris esse debeat (§. 344.); illud maiorem ingredi nequit nisi sub forma determinationis subiecti (§. 228.).

Atque inde est, quod syllogismi hypothetici, quorum subiectum in antecedente ac consequente diversum est, difficulter ad primam reducantur, quemadmodum vel tentanti patebit. E. gr. In exemplo mo-

di ponentis (not. §. 410.) inferimus, *tempestatem statam variari debere, quia Sol in ecliptica movetur.* Ut hoc medio termino conclusio in prima figura inferatur, ita argumentandum:

*Quaecunque tempestas a motu Solis in ecliptica pendet, illa variari debet.*

*Sed tempestates stata a motu Solis in ecliptica pendunt.*

*Ergo tempestates stata variari debent.*

Similiter in ponente ita argumentantur:

*Si homines peccant, mundus, qui existit, non est optimus.*

*Atqui verum est prius. Ergo & posterius.*

Ex eo itaque, *quod homines peccant, inferunt, mundum hunc non esse optimum.* Ut hoc medio termino eadem conclusio in prima figura inferatur, ita argumentandum:

*Nullus mundus, in quo homines peccant, est optimus.*

*Sed hic mundus est mundus, in quo homines peccant.*

*Ergo hic mundus non est optimus.*

In exemplo modi tollentis (not. §. 410.) inferimus: *Solem non moveri in aequatore, quia tempestates stata variantur.* Ut hoc medio termino conclusio in prima inferatur, ita argumentandum:

*Cuiunque motui Solis tempestatum statarum variatio repugnat, eo Sol non movetur aut, si mavis, is Soli tribui non potest.*

*Sed motui Solis in aequatore repugnat tempestatum statarum variatio.*

*Ergo Sol eodem non movetur, aut, si mavis, motus in aequatore Soli tribui nequit.*

Quodsi nullus prorsus crypsi relinqui debet locus; syllogismus ita formari debet.

*Nullus motus, cui repugnat tempestatum statarum variatio, Soli est tribuendus.*

*Sed Motus solis in aequatore est istiusmodi motus, cui variatio tempestatum statarum repugnat.*

*Ergo Motus in aequatore non est Soli tribuendus.*

Pater utique ex exemplis allatis, in eo casu, ubi antecedentis & consequentis subiectum est diversum, non eadem facilitate reduci syllogismos hypotheticos ad primam figuram, quo reducuntur ceteri, qui pertinent ad casum oppositum (§. 412.). Enimvero modo quis in propositionibus æquipollentibus formandis fuerit versatus, ei nunquam impossibile erit syllogismos quoscunque in prima figura condere, in quibus nihil occurrit, quod aures offendit.



## §. 416.

*Syll-gismus disjunctivus est, cujus propositio major est disjunctiva.* *Syllogismi disjunctivi definitio.*

E. gr. Disjunctivus est syllogismus, si ita argumentamur:

*Anima aut habet rationem existentia sua in seipsa, aut in alio.*

*Sed non habet rationem existentia sua in seipsa.*

*Ergo eam habet in alio.*

## §. 417.

*Si propositio disjunctiva duobus constet membris, uno posito, Fundamen-*  
*tollitur alterum, & uno sublato ponitur alterum: si vero constet pluribus membris, uno posito, tolluntur cetera, & ceteris sublati* *tum syllogi-*  
*ponitur unum; uno autem sublato, ponitur indeterminate cetero-* *smorum dis-*  
*rum unum.* Nam propositione disjunctiva affirmatur, ex plu- *junctivorum.*  
 ribus prædicatis unum tribuendum necessario esse subjecto;  
 sed non determinatur, quodnam eorum ipsi tribui debeat (§. 316.). Quare si in subsumptione determinetur, quodnam debeat tribui subjecto, hoc est, si unum membrum ponatur (§. 406.); hoc ipso membrum alterum vel, si plura fuerint, membra cetera tolluntur. Et vicissim si determinetur, quod subjecto non conveniat, hoc est, si unum membrum tollatur (§. 406.); hoc ipso membrum alterum, aut, si plura fuerint, membra cetera indeterminate ponuntur, ita ut quidem certum sit eorum unum convenire subjecto, nondum tamen constet, quodnam illorum conveniat.

Quoniam ex ipsa statim definitione propositionis disjunctivæ, immo ex notione confusa, quæ exemplis singulis adhæret, patet vis illationis; ideo quoque syllogismi disjunctivi sunt admodum evidentes, quemadmodum exempla palam loquuntur, mox in medium afferenda.

## §. 418.

Quod si prædicata in propositione disjunctiva enumerata ita fuerint comparata, ut omnia simul a subjecto abesse possint, quo in casu *incompleta* est & formam saltem disjunctivæ mentitur (§. 316.); tum quidem uno posito, tolluntur cetera; sed uno sublato non ponitur alterum, vel ceterorum unum: id quod sine probatione patet.

*Scholion de*  
*propositione*  
*disjunctiva*  
*incompleta.*

(Wolffii Logica.)

Uu

E. gr.

E. gr. Si dixeris: *Petrus aut sedet, aut ambulat*, atque subsumas, *Atqui sedet*; tum utique sequitur, quod *non ambulet*, vi principii contrad. Etionis, quo idem simul esse & non esse negatur. Si vero subsumas, *Atqui non ambulat*; non inde sequitur, quod *sedeat*. Potest enim stare, cubare, saltare &c. etsi non ambulet. Enimvero ut ambiguitas tolleretur, incompletas istiusmodi propositiones ex numero disjunctivarum per definitionem nostram exclusimus (§. 316.).

§. 419.

*Modi syllogismorum disjunctivorum.*

*Modi igitur syllogismorum disjunctivorum generalibus hisce syllogismis continentur:*

1.  
Aut A est, aut B est.

Atqui A est.

Ergo B non est.

vel

Atqui B est.

Ergo A non est.

2.  
Aut A est, aut B est.

Atqui A non est.

Ergo B est.

vel

Atqui B non est.

Ergo A est.

3.  
Aut A est, aut B est, aut C est &c.

Sed A est.

Ergo B & C non sunt.

4.  
Aut A est, aut B est, aut C est &c.

Sed A non est.

Ergo aut B est, aut C est &c.

5.  
Aut A est, aut B est, aut C est &c.

Sed A non est, B non est &c.

Ergo C est.

*Exemplis res fit manifestior:*

1.  
Aut anima est substantia simplex, aut composita.

Sed est substantia simplex.

Ergo non est composita.

3.  
Aut mundus est ens a se, aut a finito, aut ab infinito productus.

Sed productus est ab ente infinito.

Ergo nec a se est, nec a finito productus.

2.  
Aut anima est substantia simplex, aut composita.

Sed non est composita.

Ergo est simplex.

4.  
Aut mundus est ens a se, aut a finito, aut ab infinito productus.

Sed non est ens a se, nec productus ab ente finito.

Ergo productus est ab ente infinito.

5. Aut

5.

Aut elementa corporum sunt substantiæ simplices, aut atomi materiales, aut massæ similes in infinitum divisibiles.

Sed non sunt atomi materiales.

Ergo sunt aut substantiæ simplices, aut massæ similes in infinitum divisibiles.

vel

Sed sunt substantiæ simplices.

Ergo nec atomi materiales, nec massæ similes in infinitum divisibiles.

Syllogismus istiusmodi disjunctivis in demonstrando sæpissime utimur, etiam ad categoricos revocari possunt.

§. 420.

*Si membri, quod ponitur, vel tollitur, prædicatum sumatur Syllogismus pro medio termino, retenta conclusione, syllogismus disjunctivus erit disjunctivus primæ figure.* Sunt enim propositiones disjunctivæ ad æquipollentes, Aut *A est*, aut *B est*, & Quodcunque est *A*, illud *non est B*, itemque Quodcunque non est *A*, illud est *B*. Unde in prima figura ita argumentamur:

1.

Quodcunque est *A*, illud non est *B*.

Atqui hoc est *A*.

Ergo hoc non est *B*.

2.

Quodcunque non est *A*, illud est *B*.

Sed hoc non est *A*.

Ergo hoc est *B*.

Si plura fuerint membra, tum quæ una ponuntur, vel tolluntur pro uno membro haberi possunt, atque adeo casus ceteri sub his duobus una comprehenduntur:

Exempla syllogismorum disjunctivorum modo (not. §. 419.) allata in prima figura ita se habent:

1.

Quicquid est substantia simplex, illud non est composita.

Sed anima est substantia simplex.

Ergo anima non est composita.

2.

Omnis substantia, quæ non est composita, simplex est.

Sed anima non est substantia composita.

Ergo anima est substantia simplex.

Uu 2

3. Quic-

3.  
Quicquid productum est ab ente infinito, id nec a se est, nec a finito productum.

Sed mundus productus est ab ente infinito.

Ergo nec a se est, nec a finito productus.

4.  
Quicquid nec a se est, nec ab ente finito productum, id productum est ab ente infinito.

Sed mundus nec a se est, nec ab ente finito productus.

Ergo mundus productus est ab ente infinito.

5.  
Nulla substantia simplex est atomus materialis, aut massa similis in infinitum divisibilis.

Atque elementa corporum sunt substantiæ simplices.

Ergo elementa corporum non sunt atomi materiales, nec massæ similes in infinitum divisibiles.

#### CAPUT IV.

### DE SYLLOGISMIS CRYPTICIS.

#### §. 421.

Ratio enthymematis.

**S**i alterutra præmissarum fuerit adeo evidens, ut ab altero eam minime in dubium vocari constet; omitti solet in syllogismo & una saltem retenta infertur conclusio.

E. gr. In syllogismo, *Omnis homo est mortalis. Sed omnis doctus est homo. Ergo omnis doctus est mortalis*, minor adeo evidens, ut nemo eam in dubium vocare possit. Omittitur ergo & ita argumentatur: *Omnis homo est mortalis. Ergo Omnis doctus est mortalis*. Similiter Mathematici majorem constanter omittunt, si fuerit propositio elementaris ex *Euclide* nota, cum elementares propositiones perspectæ esse debeant, antequam ad ulteriora progrediaris. E. gr. ita argumentatur: *Hæc duo triangula habent duos angulos sigillatim æquales. Ergo sunt similia*. Supponimus enim ex elementis constare, *duo quæcunque triangula, quorum duo anguli sigillatim sunt inter se æquales, similia esse*.

#### §. 422.

Enthymematis definitio.

Syllogismus mutilus, cujus alterutra præmissa deficit, dicitur Enthymema.

E. gr.

E.g. Si quis argumentetur: *Quadratum non habet tres angulos. Ergo non est triangulum*; vel: *Homines peccant. Ergo mundus non est optimus*; vel: *Dies est. Ergo Nox non est*; primus syllogismus est enthymema categorici, secundus hypothetici, tertius disjunctivi. In eger enim in primo casu ita habet: *Nulla figura quæ non habet tres angulos, est triangulum. Sed Quadratum non habet tres angulos. Ergo Quadratum non est triangulum*; in casu secundo: *Si homines peccant, mundus non est optimus. Atqui homines peccant. Ergo mundus non est optimus*; in tertio denique: *Aut Dies est, aut nox est. Atqui Dies est. Ergo nox non est*.

## §. 423.

*Enthymema est species syllogismi cryptici.* Syllogismus tribus constat propositionibus (§. 333.), ipse quoque hypotheticus (§. 409.) & disjunctivus (§. 419.): enthymema vero, cum altera præmissarum desit (§. 422.) non nisi duabus. Enthymema igitur syllogismus est, cujus genuina forma non apparet, consequenter crypticus (§. 365.).

Cur enthymema syllogismus crypticus.

## §. 424.

*Si in enthymemate præmissa & conclusio habent terminum communem; enthymema est vel syllogismus categorici, vel hypothetici, in quo antecedens & consequens idem subjectum.* In syllogismo categorico medius terminus in maiore construitur cum prædicato, in minore cum subjecto conclusionis (§. 339. 340.). Quoniam itaque in enthymemate alterutra præmissarum adest (§. 42.); in enthymemate syllogismi categorici præmissa & conclusio terminum communem habere debent. Enimvero si in syllogismo hypothetico antecedens & consequens idem habuerint subjectum, ad primam is figuram reducitur, retentis minore atque conclusione (§. 412.). Omissa igitur maiore, enthymema syllogismi categorici & hypothetici idem est. Quoniam itaque in categorici enthymemate præmissa & conclusio communem necessario terminum habent; idem quoque in enthymemate hypothetici accidere debet, ubi antecedentis & consequentis idem fuerit subjectum. Unde ex communi termino agnoscimus, enthymema esse vel syllogismum muti-

Criterion enthymematis categorici vel syllogismi hypothetici categorico æquipollentis.

lum categoricum, vel hypotheticum, in quo antecedens & consequens idem habent subjectum.

E. gr. Enthymema: *Quadratum non habet tres angulos. Ergo Quadratum non est triangulum*, vel est syllogismi categorici, *Nulla figura, qua non habet tres angulos, est triangulum. Sed Quadratum &c. Ergo &c.* vel hypothetici: *Si quadratum non habet tres angulos, non est triangulum: Atqui non habet tres angulos. Ergo triangulum non est.*

## §. 425.

*Quamquam  
præmissa in  
Enthymemate  
deficiat.*

*Si in enthymemate præmissa & conclusiones terminus communis fuerit subjectum conclusionis, major deficit; si prædicatum, deficit minor.* Etenim in propositione majore prædicatum conclusionis, in minore ejus subjectum construitur cum medio termino (§. 339. 340.), qui conclusionem non ingreditur (§. 337.). Quamobrem cum in enthymemate alterutra præmissarum deficiat (§. 422.); terminus præmissæ & conclusionis communis vel prædicatum est, vel subjectum conclusionis; prædicatum nimirum, si adfuerit major, adeoque ubi defecerit minor; subjectum vero, si adfuerit minor, adeoque si defecerit major.

Hoc itaque criterio patet, utrum major, vel minor in enthymemate dato deficiat. E. gr. In Enthymemate: *Omnis doctus est homo. Ergo Omnis doctus est mortalis*, præmissa & conclusio idem habent subjectum, atque adeo deficit major: *Omnis homo est mortalis.* Contra in enthymemate: *Omnis homo est mortalis. Ergo Omnis doctus est mortalis*, in præmissa occurrit prædicatum conclusionis esse mortalem. Deficit ergo minor: *Omnis doctus est homo.*

## §. 426.

*Enthymemata  
secundæ  
figure.*

*Si conclusio negativa & terminus præmissæ atque conclusionis communis præmissæ subjectum; enthymema erit in secunda figura, ubi præmissa est propositio major, & vel in secunda, vel in prima, ubi præmissa est minor.* In secunda figura prædicatum conclusionis est subjectum in majore, aut in prima idem est prædicatum majoris (§. 339. 340. 344.). Quamobrem cum in secunda figura conclusio semper sit negativa (§. 382.); enthymema in eadem erit, ubi conclusio negativa, præmissa vero major

major & in eadem terminus ipsi cum conclusione communis subiectum.

Enimvero conclusio negativa esse potest etiam in prima figura (§. 378.) & in utraque subiectum conclusionis idem est cum subiecto minoris (§. 339. 340. 344.). Quamobrem si conclusio negativa & præmissa propositio minor, in hac vero subiectum idem cum subiecto conclusionis; enthymema esse potest & in secunda, & in prima figura.

E. gr. Enthymema: *Nullum triangulum habet quatuor angulos. Ergo Nullum Quadratum est triangulum*, est in secunda figura, conclusio enim negativa, præmissa propositio maior, & in ea terminus communis subiectum præmissæ. Contra enthymema: *Omne Quadratum habet quatuor angulos. Ergo Nullum Quadratum est triangulum*, potest esse in secunda pariter atque in prima figura. Potest enim maior esse: *Nullum triangulum habet quatuor angulos* (not. §. 383.); potest etiam esse propositio: *Nulla figura, quæ quatuor habet angulos, est triangulum* (not. §. 384.).

#### §. 427.

*Si conclusio particularis & præmissa atque conclusionis terminus communis fuerit prædicatum; enthymema erit in tertia figura, ubi præmissa est propositio minor; erit idem vel in tertia, vel in prima figura, ubi præmissa est propositio maior.* In tertia figura subiectum conclusionis est prædicatum in minore, aut in prima & secunda idem est minoris subiectum (§. 339. 340. 344.). Quamobrem cum in tertia figura conclusio semper sit particularis (§. 395.); enthymema in eadem erit, ubi conclusio particularis, præmissa propositio minor & in ea prædicatum terminus cum conclusione communis.

Enthymemata tertia figura.

Enimvero conclusio quoque particularis esse potest in prima figura (§. 378.), in prima vero & in tertia prædicatum conclusionis & prædicatum maioris idem est (§. 339. 340. 344.). Quamobrem si conclusio particularis, & præmissa propositio maior, in hac vero prædicatum idem cum prædicato conclusionis; enthymema esse potest & in tertia, & in prima figura.

E. gr. Enthymema: *Quidam pii sunt homines. Ergo Quidam homines*

*mines Deum amant*, habet conclusionem particularem & præmissa est propositio minor, atque in ea prædicatum terminus cum conclusione communis. Est igitur in tertia figura. Contra enthymema: *Omnis pius Deum amat*. Ergo *Quidam homines Deum amant*, potest esse in tertia pariter atque in prima figura, prout minor fuerit vel *Quidam pii sunt homines*, vel *Quidam homines sunt pii*.

## §. 428.

*Alia figura  
tertia.*

*Si fuerit præmissa propositio major eaque particularis, enthymema est in tertia figura.* Etenim in prima figura major semper universalis (§. 366.), nec minus in secunda (§. 382.); in solatertia eadem particularis esse potest (§. 395.). Quodsi ergo in enthymemate major particularis fuerit; erit id in tertia figura.

E. gr. Enthymema: *Quidam divites sunt avari*. Ergo *Quidam homines sunt avari*, est in tertia figura. Non patet idem ex criterio præcedente (§. 427.), ex communi scilicet prædicato, quia huicetiam in prima figura locus est.

## §. 429.

*Enthymemata syllogismorum hypotheticorum.*

*Si in syllogismis hypotheticis antecedens & consequens diversa habuerint subiecta; enthymematis præmissa & conclusio terminum nullum communem habent & contra.* Etenim in syllogismo hypothetico posito antecedente ponitur consequens & sublato consequente tollitur antecedens (§. 407.), consequenter patet, non posse hic omitti minorem, quæ vel antecedens ponit, vel consequens tollit, sed semper omittendam esse maiorem, seu propositionem conditionalem. Quodsi ergo in syllogismis hypotheticis antecedens & consequens diversa habuerint subiecta, *per hypothefin*; fieri non potest, ut in enthymemate præmissa & conclusio communem aliquem terminum habeant.

Enimvero cum in ceteris syllogismis, nisi cryptis quædam locum habuerit, simile quid occurrere nequeat; enthymema, cujus conclusio & præmissa terminum communem non habent, erit in alterutro modorum syllogismi hypothetici.

E. gr. Si ita argumentamur: *Sol movetur in ecliptica*. Ergo *tempestat anni non eadem*, enthymema est in modo ponente. Si vero argu-



gumentatur: *Tempestas anni non est eadem. Ergo Sol non movetur in aequatore; erit enthymema in modo tollente (§. 410.)*, quamvis etiam sumi possit tanquam in ponente, cum non pateat, ommissa maiore, num ponatur antecedens, an tollatur consequens. Etenim quemadmodum in priori casu Syllogismus hypotheticus ita se habet: *Si Sol movetur in ecliptica, tempestas anni non eadem est. Sed Sol movetur in ecliptica. Ergo tempestas anni non eadem*; ita in casu posteriori duplex esse potest, vel in modo tollente: *Si Sol movetur in aequatore, tempestas anni eadem. Sed tempestas anni non eadem. Ergo Sol non movetur in aequatore*; vel in modo ponente: *Si tempestas anni non eadem, Sol non movetur in aequatore. Sed tempestas anni non eadem. Ergo Sol non movetur in aequatore.*

## §. 430.

Quoniam in Syllogismis disjunctivis membro uno posito alterum removetur; uno autem remoto, alterum ponitur (§. 417.), absente autem maiore non apparet, utrum utrumque ponatur, an alterutrum removeatur (§. 406. 419.), atque in hypotheticis posito antecedente, ponitur quoque consequens (§. 407.); *enthymema Syllogismi disjunctivi non differt ab enthymemate hypothetici, nec ab eo discerni potest.*

*Enthymemata Syllogismorum disjunctivorum.*

E. gr. Si ita argumenteris: *Aut Deus non est sapientissimus, aut facit quod est optimum. Sed Deus est sapientissimus. Ergo Deus facit, quod est optimum*; enthymemate: *Deus est sapientissimus. Ergo facit, quod est optimum*, haberi etiam potest pro enthymemate Syllogismi hypothetici in modo ponente: *Si Deus est sapientissimus, facit quod est optimum. Sed Deus est sapientissimus. Ergo Deus facit quod est optimum*. Similiter si quis argumentetur: *Aut dies est, aut nox est. Sed nox non est. Ergo dies est*, enthymema: *Nox non est. Ergo dies est*, haberi quoque potest pro enthymemate Syllogismi hypothetici in modo ponente: *Si nox non est, dies est. Sed nox non est. Ergo dies est.*

## §. 431.

Quoniam porro in eo casu, ubi antecedens & consequens idem habent subiectum, enthymema Syllogismi hypothetici cum enthymemate categorici idem est (§. 424\*), enthymema autem disjunctivi idem cum enthymemate hypothetici (§. 430.); evidens est, *enthymema quoque Syllogismi disjunctivi idem esse cum enthymemate categorici.*

*Cur cum enthymematis Syllogismorum categoricorum conveniant.*

(Wolffii Logica.)

Xx

E. gr.

E. gr. Enthymema: *Deus est sapientissimus. Ergo facit, quod est optimum, est enthymema syllogismi disjunctivi (not. §. 430.).* Idem vero est enthymema hujus categorici: *Quicumque est sapientissimus, is facit quod est optimum. Sed Deus est sapientissimus. Ergo Deus facit, quod est optimum.*

## §. 432.

Principium  
generale cryp-  
ticeos syllogi-  
smorum.

*Si syllogismus in regulas five generales, five speciales impingere videtur, cum tamen iis conformis sit, crypticus est.* Etenim si syllogismus regulis conformis est, formam genuinam habet, cum forma cujuslibet modi ex regulis resultet, aut, si mavis, per eas determinetur: id quod ad ea, quæ de syllogismis demonstravimus, attentus facile perspicit. Quod si tamen in regulas illas impingere videtur, genuinam formam habere non videtur: quæ adeo cum non appareat, crypticus est (§. 365.).

Habemus hic principium generale, unde syllogismorum cryptice speciales facile deducuntur. Hujus sane beneficio statim apparet, enthymema esse syllogismum crypticum; videtur enim impingere in regulam, quod syllogismus tribus constare debeat propositionibus, quarum duæ habent terminum communem, tertia vero combinantur termini in prioribus diversi (§. 333.), cum tamen eidem sit conformis, una saltem præmissa omissa.

## §. 433.

Cryptice  
synonymia.

*Si in syllogismo terminis synonymicis utaris, syllogismus crypticus evadit.* Etenim si termini synonymici in syllogismo occurrunt, vocibus diversis idem respondet significatus (§. 330.), atque adeo iidem revera sunt termini, etsi diversi appareant (§. 37.), aut, si mavis, termini æquivalentes, quorum unus alteri substitui potest. Videtur adeo syllogismus plures quam tres habere terminos, cum tamen nonnisi tres habere deprehendatur, terminis æquivalentibus sibi invicem substitutis. Cum igitur syllogismus nonnisi tribus constare debeat terminis (§. 334.); is sane, in quo termini synonymici occurrunt, crypticus erit (§. 432.).

E. gr. In syllogismo: *Omnis figura regularis est circulo inscriptibilis. Sed Pentagonum regulare est figura ordinata. Ergo Quinquangulum regulare circulo inscribi potest:* cryptice oritur ex synonymia. Terminum

enim

enim synonymici sunt *figura regularis & ordinata, Pentagonum & Quinquangulum regularc, esse circulo inscriptibile & circulo inscribi posse*, cum binis quibusvis vocibus eadem respondeat notio atque adeo binarum quarumvis idem sit significatus. Qui vero synonymiam non advertit, ei syllogismus vel sex videtur habere terminos. Substitutis sibi invicem terminis æquivalentibus, syllogismus a crypti liberatus in hunc degenerat: *Omnis figura regularis est circulo inscriptibilis. Sed Pentagonum regulare est figura regularis. Ergo Pentagonum regulare est circulo inscriptibile.* Quodsi ergo exulet synonymia ex libro Auctoris alicujus, exulabit quoque hæc cryptis. Cum vero termini synonymici frequentissimi sint, præsertim apud Autores, qui utuntur nondum definitis aut male definitis; hæc quoque cryptis frequenter occurrit. Ceterum ex hoc casu speciali clarissime perspicitur, quomodo syllogismus formam genuinam occultet, ubi in regulas syllogisticas impingere videtur. Est enim syllogismus in modo *Barbara* primæ figuræ, ubi subiectum majoris & prædicatum minoris, subiectum minoris & conclusionis, prædicatum majoris & conclusionis idem esse debet (§. 344. 335. seqq.): cum hic & subiectum majoris atque prædicatum minoris, & subiectum minoris atque conclusionis, & prædicatum majoris atque conclusionis diversum appareat.

## §. 434.

*Si eadem vox absolute posita fuerit terminus medius, sed cum determinatione adjecta sumta unus extremorum; syllogismus crypti quadam levi laborat.* Dico cryptum levem, quæ facile tollitur. Etenim cum conclusio ex terminis extremis componatur (§. 338.), eadem vox, quæ termini medii vicem subit, hic in conclusione comparet. Videtur adeo medius terminus ingredi conclusionem: quod cum fieri non possit (§. 337.), syllogismus crypti quadam laborat (§. 432.). Enimvero modo ad determinationem adjectam respicias atque ad animum tibi revoces vocem absolute positam & cum determinatione adjecta sumtam non esse unum eundemque terminum, cum diversa in utroque casu ei respondeat notio (§. 36.); cryptis illa statim evanescit, atque adeo levis admodum est.

*Cryptis levis ex mediotermino orta.*

Magis tyronibus ea negotium facessit, quam exercitatis. Tyronum tamen cum imprimis habenda sit ratio, ea prætermittenda non erat. Exemplum tale est. *Omne triangulum habet tres angulos duobus rectis*

X 2

*æquales.*

*aquales. Sed triangulum rectangulum est triangulum. Ergo triangulum rectangulum habet tres angulos duobus rectis aequales.*

§. 435.

*Cryptus ex defectu signorum quantitatis.*

*Si in præmissis & conclusione signa quantitatis omittuntur, syllogismus crypticus est.* Modi syllogismorum agnoscuntur ex quantitate & qualitate propositionum (§. 345.). Quamobrem si in præmissis & conclusione signa quantitatis omittuntur, non apparet, in quo modo sit syllogismus, consequenter non patet, num singulæ præmissæ tales sint, quales conclusio poscit. Cum adeo genuina forma lateat, syllogismus crypticus est (§. 365.).

E. gr. Si argumenteris: *triangulum habet tres angulos. Quadratum non habet tres angulos. Ergo Quadratum non est triangulum*, non statim apparet syllogismus esse in modo *Camestres*, quemadmodum id patet, ubi signa quantitatis præfiguntur (not. §. 383.). Similiter si quis argumentetur: *Homo est mortalis. Rex est Homo. Ergo Rex est mortalis*, non apparet, an in *Barbara*, an vero in *Darii* esse debeat syllogismus, quemadmodum id statim liquet, ubi signa quantitatis præfiguntur (not. §. 375.).

§. 436.

*Cryptus ex medio termino negativo orta sive negationis.*

*Si in prima figura medius terminus fuerit negativus, syllogismus crypticus est.* Etenim si in prima figura medius terminus fuerit negativus, propositio minor infinita est (§. 377.), adeoque speciem negativæ habet (§. 209.). Quamobrem si major fuerit negativa, ex meris negativis aliquid inferri videtur: si vero affirmativa, conclusio affirmativa non videtur sequi partem debiliorem (§. 359.): quod utrumque cum regulis syllogisticis repugnet (§. 357. 360.), syllogismus est crypticus (§. 432.). Vel brevius: Quia minor speciem negativæ habet *per demonstrata*, syllogismus videtur impingere in regulam, quod in prima figura minor semper esse debeat affirmans (§. 367.), consequenter crypticus est (§. 432.).

E. gr. Ex meris negativis aliquid inferre videmur, si ita argumentamur; *Nulla figura, quæ non habet tres angulos, est triangulum. Sed Nullum Quadratum habet tres angulos. Ergo Nullum Quadratum est triangulum.* Minor vero infinita est ob medium terminum negati-

vum non habere tres angulos. Conclusio non videtur sequi partem debiliorem ex eadem ratione in syllogismo sequente: *Quicumque non prospicit futura, stultus est.* Sed *Quidam avari non prospiciunt futura.* Ergo *Quidam avari stulti sunt.*

## §. 437.

*Si loco majoris in figura prima ponitur ejus conversa, syllogismus affirmativus crypticus evadit.* Si propositio convertitur, subjectum fit prædicatum & prædicatum contra subjectum (§. 282.). Cum igitur in prima figura prædicatum minoris & subjectum majoris idem sit (§. 344.); utraque præmissa idem habebit prædicatum. Videbitur itaque syllogismus esse in secunda figura (§. cit.). Sed affirmativus est *per hyporbesin*, qualis in secunda figura esse nequit (§. 382.). Est igitur crypticus (§. 432.).

*Crypsis ex propositionis conversione orta sive reciprocatio- nis.*

E. gr. Si ita argumentamur: *Omne triangulum habet tres angulos. Hac figura habet tres angulos. Ergo hac figura est triangulum;* syllogismus videtur esse in secunda figura, quod medius terminus bis prædicetur. Sed loco majoris: *Quicumque figura habet tres angulos, triangulum est,* ponitur ejus conversa: *Omne triangulum habet tres angulos.* Hæc crypsis frequentissime occurrit, præsertim cum definitiones applicantur (§. 349.). Dedimus jam supra istiusmodi exemplum (not. §. 385.).

## §. 438.

*Si præmissæ fuerint oblique universales & particulares, syllogismus crypticus est.* In propositionibus enim oblique universalibus & particularibus subjectum casu obliquo ponitur videturque subjectum esse, quod non est (§. 246. 247.). Cum igitur signa quantitatis non referantur ad subjecta apparentia; genuina syllogismorum forma non apparet (§. 345.), adeoque iidem cryptici sunt (§. 365.).

*Crypsis obliquitatis.*

E. gr. Crypsis obliquitatis conspicitur in hoc syllogismo: *In omni triangulo latus majus subtendit majorem angulum. Triangulum rectangulum est triangulum. Ergo in triangulo rectangulo latus majus subtendit majorem angulum.* Syllogismus crypsi liberatus talis est: *Omne triangulum habet latus majus majori angulo oppositum. Triangulum rectangulum est triangulum. Ergo triangulum rectangulum habet latus majus majori angulo oppositum.* Hæc crypsis adeo frequens

est, ut absque omni hæsitacione eadem utamur. Ita argumentamur in rheologia naturali: *Cujuscunque voluntas est perfectissima, is non appetit nisi optimum.* Sed *Dei voluntas est perfectissima.* Ergo *Deus non appetit nisi optimum.* Sublatis propositionibus crypticis syllogismus ita sonat: *Quicunque voluntatem habet perfectissimam, is non appetit nisi optimum.* Sed *Deus voluntatem habet perfectissimam.* Ergo *Deus non appetit nisi optimum.* Huc etiam pertinet exemplum sequens: *Cujus pars alteri toti æqualis est, id ipsum altero majus est.* Sed *qualibet pars totius parti totius, hoc est sibi ipsi æqualis est.* Ergo *totum qualibet sua parte majus est.* Continetur hic syllogismus sub generali: *Cui conveniunt nota in definitione enumerata simul, eidem quoque convenit definitum.* Atqui &c. Ergo &c (§. 349.). Respectu nimirum partis cujuslibet convenit toti definitio majoris. Unde syllogismus a crypti obliquitatis liberatus talis erit: *Omne id, cujus pars alteri toti æqualis, est majus hoc ipso altero.* Sed *omne totum est istiusmodi quid, cujus pars qualibet æqualis est parti totius toti nempe sibi metipso.* Ergo *Totum est maius qualibet sua parte.* Pars totius duplici respectu hic consideratur, primo tanquam pars totius, deinde tanquam quantitas seu magnitudo a toto diversa.

## §. 439.

*Cryptis agnata crypti reciprocationis.*

*Si in præmissa aliqua indefinita subjectum & prædicatum transponuntur, quæ retentis iisdem signis converti seu reciprocarî nequit; syllogismus crypticus evadit. Demonstratio eadem fere est, quæ crypteos reciprocationis (§. 437.).*

E. gr. Si quis argumentetur: *Dimidium parallelogrammi est triangulum super eadem basi & ejusdem altitudinis.* Sed *hæc figura est triangulum constitutum cum parallelogrammo super eadem basi, & ejusdem altitudinis est.* Ergo *hoc triangulum est parallelogrammi dimidium.* Propositio major laborat crypti transpositionis, cum prædicatum collocetur in loco subjecti. Unde syllogismus videtur esse in secunda figura, quæ tamen affirmativum respuit (§. 382.). Quodsi majorem debite enunciemus; syllogismus a crypti liber talis erit; *Omne triangulum constitutum cum parallelogrammo super eadem basi & eandem altitudinem habens est dimidium parallelogrammi.* Sed *hæc figura &c.* Ergo &c.

## §. 440.

*Cryptis translata.*

*Si determinatio subjecti, salva propositionis veritate, ab eadem ad prædicatum transferri potest, facta hac translatione in ma-*

*jore syllogismus fit crypticus.* Etenim si determinatio in majore <sup>determinatio</sup> propositione a subiecto transfertur ad prædicatum, in minore <sup>onis.</sup> autem adjicitur termino, qui subiecto majoris respondet; syllogismus videtur impingere in dictum de omni & nullo (§. 348.), consequenter crypticus est (§. 432.).

E. gr. Si quis argumentatur: *Omne triangulum est dimidium parallelogrammi super eadem basi & ejusdem altitudinis.* Sed hæc figura est triangulum cum parallelogrammo super eadem basi & ejusdem altitudinis. Ergo hæc figura est dimidium hujus parallelogrammi: Syllogismi forma non apparet genuina. In majore determinatio referri debebat ad subiectum, quæ prædicato adhæret. Facta igitur transpositione, ut major sit: *Omne triangulum cum parallelogrammo super eadem basi & ejusdem altitudinis est parallelogrammi hujus dimidium,* syllogismus formam genuinam habet (§. 348.).

## §. 441.

*Si qua propositio in syllogismo fuerit cryptica; syllogismus crypticus erit.* Etenim propositio cryptica genuinam formam non habet (§. 312.). Quamobrem cum a forma propositionum pendeat forma syllogismorum (§. 345.); si qua propositio fuerit in syllogismo cryptica, nec syllogismus formam genuinam habere potest, consequenter crypticus est (§. 365.).

*Generale syllogismorum crypticorum principium.*

Ex hoc principio generali per modum corollariorum deduci poterant, quæcunque de crypticis syllogismorum hætenus demonstrata sunt, & inde consequuntur ceteræ cryptes omnes, quæ locum unquam habere possint. Non igitur consultum judicamus, ut in iis enodandis ulterius defudemus. Ne vero unquam circa syllogismos crypticos hæreamus, modum addimus syllogismum quemvis crypticum a crypti liberandi.

## §. 442.

*Syllogismus crypticum a crypti liberaturus* 1. ex præmissis eruat medium terminum (§. 336.), 2. retenta conclusione format syllogismum in prima figura (§. 375.), vel si commodius visum fuerit, syllogismum negativum in secunda (§. 383.), particularem vero in tertia (§. 390. 396.). Datis enim conclusione & medio termino, nullo negotio formatur syllogismus in figura quacunque. Quoniam tamen syllogismi secundæ & tertiæ fi-

*Quomodo syllogismus a crypti liberatur.*

gura

guræ sunt minus evidentes syllogifinis primæ (§. 388. 399.) atque adeo ipfimet cryptici (§. 385. 397.) ad figuram primam reducuntur (§. 384. 389. 396.); præstat syllogifinos a crypti liberandos in prima figura formari. *Quodfi in conclufione lateat cryptif, vel ex medio termino ortum trahat*; in cafu priori per fubstitutionem propofitionis æquipollentis (§. 278.), in pofteriori vi fynonymiæ (§. 330.) a crypti liberabitur fyllogifinus.

E. gr. Si quis argumentetur: *Avari cupido habendi fatiari nequit. Sed Petri cupido habendi fatiari nequit. Ergo Petrus est avarus*; Syllogifinus non una crypti l. b. rat. Videtur medius terminus bis prædicari, adeoque fyllogifinus effe in fecunda figura: id quod tamen repugnat ob conclufionem affirmativam (§. 382.). Ex præmiſſis negativis videtur inferri conclufio affirmativa: id quod tamen repugnat regulis generalibus (§. 357. 358.). Sed fume conclufionem: *Petrus est avarus* & erue medium terminum, quia *ejus cupido habendi fatiari nequit*; prodibit fyllogifinus in prima figura: *Cujuscunque cupido habendi fatiari nequit, is avarus est. Sed Petri cupido habendi fatiari nequit. Ergo Petrus est avarus*. Quodfi ulterius cryptin obliquitatatis, quæ adhuc reſtat (§. 438.), tollere volueris, quamvis vix opus effe videatur, cum eadem fit familiariffima; mutetur major in æquipollentem propofitionem, in qua ſignum quantitatis ponitur in cafu recto & habebis fyllogifinum ſequentem: *Omnis homo, cujus cupido habendi fatiari nequit, est avarus. Sed Petrus est homo, cujus cupido habendi fatiari nequit. Ergo Petrus est avarus*. Facile apparet, cryptin obliquitatatis ortam fuiſſe ex medio termino, qui non niſi in cafu obliquo de ſubjecto conclufionis prædicari poterat: quamobrem prima ſtatim vice cryptin obliquitatatis ſimul tollere poteras, ſumto medio termino de ſubjecto conclufionis in cafu recto poſito prædicabili, nempe quod *ſit homo, cujus cupido habendi fatiari nequit*.

## §. 443.

*Syllogifini  
compoſiti  
cryptici.*

Quoniam in fyllogifinis compoſitis perinde ac in categoricis locus effe poteſt propoſitionibus crypticis, a propoſitionibus autem crypticis ortum trahit cryptis fyllogifinorum (§. 441.); *ſyllogifini compoſiti erunt cryptici, ſi propoſitiones crypticæ eos ingrediuntur*.

E. gr. Syllogifinus diſjunctivus: *Aut dies eſt, aut nox eſt. Atqui dies eſt. Ergo nox non eſt*, crypticus eſt, cum ipla propoſitio diſjunctiva

cliva



*Etiva cryptica sit (§. 316.), æquipollens nempe huic manifesta: Hoc tempus aut dies est, aut nox est, vel omne tempus, quod metimur motu Solis diurno, aut diurnum est, aut nocturnum. Similiter syllogismus hypotheticus: Si Sol hæret in primo ecliptica quadrante superiori, ver est. Sed Sol hæret in ariete. Ergo ver est, crypticus est, propterea quod in antecedente lateat cryptis æquipollentiæ: hære enim in ariete & hære in primo ecliptica quadrante superiori hic sibi mutuo æquipollent.*

## §. 444.

*Quodsi ergo propositionibus crypticis substituantur manifestæ Quomodo æquipollentes (§. 278. & seqq. 323. & seqq. &c.) syllogismus crypticus compositus sit manifestus. cryptis ex syllogismis compositis tollatur.*

E. gr. Si in exemplo syllogismi cryptici disjunctivi (not. §. 443.) substituatur propositio manifesta in locum crypticæ, habebis syllogismum manifestum: *Hoc tempus aut diurnum est, aut nocturnum. Sed hoc tempus diurnum est. Ergo hoc tempus non est nocturnum. Similiter eodem artificio syllogismus hypotheticus crypticus (not. §. 443.) fit manifestus: Si Sol hæret in primo quadrante superiori ecliptica, ver est. Sed Sol hæret in primo quadrante superiori ecliptica. Ergo ver est.*

## CAPUT V.

## DE CONSEQUENTIIS IMMEDIATIS.

## §. 445.

**S***I due fuerint propositiones æquipollentes, earum una admissa, Propositio admittenda quoque erit altera & contra. Propositiones enim æquipollentes sibi mutuo possunt substitui notione num æquipollentium nexus. complexa, quæ, iisdem respondet, salva (§. 278.). Quamobrem una admissa, alteram admitti debere manifestum est. Quodsi negas, id fieri debere; igitur una alteri substitui nequit. Non igitur erunt æquipollentes: id quod hypothesin evertit. Eodem modo patet, una non admissa, nec admitti posse alteram.*

(Wolfii Logica)

Y Y

E. gr.

E. gr. Propositiones æquipollentes sunt: *Sol illuminat ædificium & Ædificium illuminatur a Sole* (§. 278.). Quamobrem argumentari licet: *Sol illuminat ædificium. Ergo Ædificium illuminatur a Sole, & contra: Sol non illuminat ædificium. Ergo nec ædificium illuminatur a Sole.*

## §. 446.

*Syllogismi  
hypothetici  
ex æquipol-  
lentiã propo-  
sitionum.*

*Si propositionum æquipollentium una sumitur ut antecedens, altera ut consequens; syllogismum habebis hypotheticum.* Syllogismi hypothetici modus ponens est (§. 409. 410.): *Si antecedens est, etiam consequens est. Sed antecedens est. Ergo etiam consequens.* Jam si una propositionum æquipollentium admittitur, etiam altera admittenda (§. 445.). Quare si una spectetur ut antecedens; altera ut consequens; habebis utique syllogismum hypotheticum.

E. gr. Si admittis tanquam verum, quod *Sol illuminet ædificium; admittere quoque debes, ædificium a Sole illuminari.* Quare si prior propositio sumatur ut antecedens, altera ut consequens; hunc habebis syllogismum hypotheticum: *Si Sol illuminat ædificium, ædificium a Sole illuminatur. Sed Sol illuminat ædificium. Ergo Ædificium a Sole illuminatur.* Similiter propositiones æquipollentes sunt: *Titius est pater Caji & Cajus est filius Titii*, cum eadem ipsis notio complexa respondeat. Sume priorem ut antecedens, posteriorem ut consequens; habebis hunc syllogismum hypotheticum: *Si Titius est pater Caji, Cajus est filius Titii. Sed Titius est pater Caji. Ergo Cajus est filius Titii.* Similiter si propositiones sumantur negativæ; habebis in casu priori syllogismum hypotheticum: *Si Sol non illuminat ædificium, nec ædificium illuminatur a Sole. Sed Sol non illuminat ædificium. Ergo nec ædificium illuminatur a Sole:* in casu autem posteriori sequentem; *Si Titius non est pater Caji, nec Cajus est filius Titii. Sed Titius non est Pater Caji. Ergo nec Cajus filius est Titii.*

## §. 447.

*Propositio-  
num contra-  
dictoriarum  
nexus.*

*Si duæ fuerint propositiones contradictoriæ, earum una posita, tollenda est altera.* Etenim si propositionum contradictoriarum una fuerit universaliter affirmans, altera est particulariter negans (§. 294.) & si una fuerit universaliter negans, altera est particulariter affirmans (§. 295.). Quamobrem si concedis vel ponis in casu priori universaliter affirmantem; in posteriori-

teriori universaliter negantem; concedenda vel ponenda non erit in illo particulariter negans; in hoc particulariter affirmans (§. 288.) & contra.

E. gr. Propositiones contradictoriae sunt: *Omne triangulum habet tres angulos & quaedam triangula non habent vel hoc triangulum non habet tres angulos.* Quamobrem si ponimus, *Omne triangulum habet tres angulos*, poni non potest, quod *quaedam triangula non habeant, vel hoc triangulum non habeat tres angulos.* Vel si sumis, *quaedam triangula non habere tres angulos*; ponere nequis, quod *omne triangulum habeat tres angulos.*

## §. 448.

*Si una propositionum contradictoriarum sumatur ut antecedens, opposita alterius ut consequens; syllogismus nascitur hypotheticus.* Etenim contradictoriarum una posita, tollitur altera, seu, quod perinde est, ponitur opposita alterius (§. 447.). Sed posito antecedente ponitur consequens in syllogismo hypothetico (§. 409. 410.). Quamobrem si contradictoriarum propositionum una sumitur ut antecedens, alterius oppositum ut consequens; syllogismus nascitur hypotheticus.

Syllogismi  
hypothetici  
inde orti.

E. gr. Si contradictoriarum propositionum, *Omne triangulum habet tres angulos & hoc triangulum non habet tres angulos*, priorem sumas ut antecedens & oppositum posterioris ut consequens, habebis syllogismum hypotheticum sequentem: *Si omne triangulum habet tres angulos, falsum est hoc triangulum non habere tres angulos.* Sed *Omne triangulum habet tres angulos.* Ergo *Falsum est, hoc triangulum non habere tres angulos.* Similiter hypothetice ita argumentari licet: *Si hoc triangulum non habet tres angulos, verum non est, quod omne triangulum habeat tres angulos.* Sed *hoc triangulum non habet tres angulos.* Ergo *verum non est, quod omne triangulum habeat tres angulos.*

## §. 449.

*Si duae fuerint propositiones contrariae, earum una posita, tollitur altera.* Propositionum contrariarum una universaliter negatur, quod in altera universaliter affirmatur de eodem subiecto (§. 297.). Quod si ergo unam earum ponis, de subiecto omni A affirmas, quod sit B, vel negas, quod sit B. Ergo

Propositio-  
num contra-  
riarum repu-  
gnantia.

in casu priori de omni A non negare, in posteriori non affirmare potes, quod sit B, cum idem simul esse & non esse non possit. Posita igitur una, poni nequit altera, adeoque tollenda est (§. 406.).

E. gr. Propositiones contrariæ sunt: *Omnis planeta est corpus telluri simile* & *Nullus planeta est corpus telluri simile*. Quamobrem si ponis, quod *Omnis planeta sit corpus telluri simile*, eo ipso tollis alterum, quod *nullus planeta sit corpus telluri simile*.

## §. 450.

*Syllogismi  
hypothetici  
ex contrariis  
orti propositi-  
onibus.*

*Si propositio contrariarum una sumatur ut antecedens & per modum consequentis removeatur altera; syllogismus nascitur hypotheticus.* Etenim una contrariarum posita, tollitur altera (§. 449.). Quare cum in syllogismo hypothetico posito antecedente ponatur consequens (§. 409.); si una contrariarum sumitur ut antecedens, & in consequente removeatur altera, syllogismus habebis hypotheticum.

E. gr. Si affirmes, *'omnem planetam esse corpus telluri similem*, & falsum esse pronuncies, *nullum planetam esse corpus telluri simile*; syllogismus hypotheticus talis erit: *Si omnis planeta est corpus telluri simile, falsum est, nullum planetam esse corpus telluri simile*. Sed *omnis planeta est corpus telluri simile*. Ergo *falsum est, nullum planetam esse corpus telluri simile*.

## §. 451.

*Propositionis  
subalternantis  
cum uni-  
versali ne-  
xus.*

*Posita quacunque propositione universali, una ponitur quæ vis subalternans.* Est enim subalternans propositio particularis, quæ sub universali continetur (§. 299.). Enimvero quod de omni A affirmatur, vel negatur, idem quoque de quodam A, vel in singulari de hoc A affirmari vel negari debet (§. 346.). Quare si ponitur propositio universalis, eo ipso quoque ponitur ejus subalternans.

E. gr. Propositionis universalis: *Omne triangulum habet tres angulos*, subalternans est: *Quoddam triangulum vel hoc triangulum habet tres angulos*. Quamobrem, si ponis, *omne triangulum habere tres angulos*, eo ipso ponitur, *quoddam triangulum, vel hoc triangulum habere tres angulos*.

## §. 452.

Si propositionem quamcunque universalem sumas ut præmissam & subalternantem ut conclusionem; habebis enthymema syllogismi, cujus minor identica. Si enim omne A sit B, Quoddam quoque A vel hoc A erit B (§. 451.). Quodsi ergo argumenteris: Omne A est B. Ergo quoddam A est B; syllogismus integer erit (§. 375.): Omne A est B. Sed Quoddam sive hoc A est A. Ergo Quoddam sive hoc A est B. Quare cum eadem sit ratio in negativis, si propositio universalis sumitur ut præmissa & subalternans ut conclusio; habes enthymema syllogismi categorici, cujus minor est propositio identica (§. 422.).

Enthymema  
a subalter-  
nantibus  
pendens.

E. gr. Si argumenteris: Omne triangulum habet tres angulos. Ergo Quoddam triangulum vel hoc triangulum habet tres angulos; habes enthymema, ubi deficit minor: Quoddam vel hoc triangulum est triangulum. Similiter si argumenteris: Nullus homo est immortalis. Ergo hic homo non est immortalis, habes denuo enthymema, in quo deficit minor propositio identica, Hic homo est homo.

## §. 453.

Si propositionem universalem sumas ut antecedens & subalternantem ut consequens; habebis syllogismum hypotheticum. Etenim posita propositione universali, ponitur quoque subalternans (§. 451.). Enimvero in syllogismo hypothetico posito antecedente ponitur consequens (§. 409.). Quare si universalis fiat antecedens & subalternans consequens; syllogismus resultat hypotheticus.

Syllogismus  
hypotheticus  
a subalter-  
nante ortus.

Tales syllogismi hypothetici sunt: Si omne triangulum habet tres angulos, etiam hoc triangulum habet tres angulos. Sed omne triangulum habet tres angulos. Ergo etiam hoc triangulum habet tres angulos. 2. Si nullus homo est immortalis, nec hic homo est immortalis. Sed nullus homo est immortalis. Ergo nec hic homo est immortalis.

## §. 454.

Si de omni A negatur B, etiam de omni B negari debet A. Nexus propositio-  
Quodsi negas, de omni B negari debet A; concedendum fitionum ne-  
erit, de Quodam vel omni B affirmari posse A. Quoniam ju- gativarum.

Y y 3

dici-

dicium affirmativum in notionum conjunctione consistit (§. 204.); si de quodam vel omni B affirmatur A, ea, quæ notionibus A & B continentur, eidem subjecto una inesse possunt. Contra cum iudicium negativum notionum separatione consistet (§. cit.); si de omni B negari debet A, ea, quæ notionibus B & A continentur, eidem subjecto inesse nequeunt. Jam cum sit absurdum, quod eadem eidem subjecto una inesse & non inesse possint (§. 288.); si de omni A negatur B, de quodam vel omni B affirmari nequit A, consequenter de omni B negari debet A.

E. gr. Si nullus avarus sorte sua contentus est, etiam nullus, qui sorte sua contentus, avarus est. Similiter si nullum triangulum est *Quadratum*, nullum quoque *Quadratum* triangulum esse potest.

## §. 455.

Nexus propositionum particularium.

Si de Quodam A affirmatur B, etiam de Quodam B affirmari potest A. Quoniam enim iudicium affirmativum in notionum conjunctione consistit (§. 204.); si B de quodam A affirmari potest, ea, quæ notionibus A & B respondent, eidem subjecto simul inesse possunt. Enimvero si non repugnat, ut, quæ notionibus A & B respondent, eidem subjecto una insint, notiones quoque B & A conjungere, consequenter de quodam B affirmare A licet.

E. gr. Si quidam doctus est moderatus, etiam quidam, qui est moderatus, doctus est. Si quoddam triangulum est æquilaterum; etiam quædam figura æquilatera est triangulum.

## §. 456.

Conversa unius ex altera illatio.

Quoniam propositio Nullum B est A est conversa ejus Nul- lum A est B & propositio Quoddam B est A conversa hujus Quod- dam A est B (§. 282.); posita universaliter negante vel particulariter affirmante, ponitur etiam utriusque conversa.

E. gr. Ita argumentari licet: Nullus avarus est sorte sua contentus. Ergo Nullus, qui sorte sua contentus, est avarus. Similiter: Quoddam triangulum est æquilaterum. Ergo Quædam figura æquilatera est trian- gulum.

## §. 457.

## §. 457.

*Si propositio universaliter negans, vel particulariter affirmans sumatur ut antecedens, conversa vero ut consequens; habebis syllogismum hypotheticum.* Demonstratio eadem, quam de hypothetico syllogismo a subalternante orto dedimus (§. 453.).

E. gr. Ita hypothetice argumentamur: Si nullus avarus forte sua contentus est, nullus etiam, qui forte sua contentus, est avarus. Sed nullus avarus forte sua contentus est. Ergo nullus, qui forte sua contentus, est avarus. Similiter: Si quoddam triangulum est equilaterum, quedam figura equilatera est triangulum. Sed Quoddam triangulum est equilaterum. Ergo Quedam figura equilatera est triangulum. Dicitur hæc conversio Logici simplex, quæ sit retenta propositionis quantitate & qualitate.

## §. 458.

*Generaliter si propositione una posita simul ponatur altera, sumta una pro antecedente, altera erit consequens syllogismi hypothetici.* Patet eodem modo, quo ante (§. 453.).

E. gr. Si quis est philosophus eminens, is quoque esse debet philosophus. Quamobrem enthymema syllogismi hypothetici est: Aristoteles est Philosophus eminens. Ergo Aristoteles est Philosophus. Potest etiam haberi pro enthymemate Syllogismi categorici: Quicumque est philosophus eminens, ille est philosophus. Sed Aristoteles est philosophus eminens. Ergo est philosophus. Similiter si nihil est sine ratione sufficiente, nec mundus est sine ratione sufficiente. Quamobrem si argumenteris: Nihil est sine ratione sufficiente, cur potius sit, quam non sit. Ergo etiam mundus non est sine ratione sufficiente cur potius sit quam non sit; enthymema habes syllogismi hypothetici.

## §. 459.

*Modus ratiocinandi, quo una propositione posita simul poni alteram per rationes logicas manifestum est, dicitur Consequentia immediata.*

E. gr. Consequentia immediata est, si quis argumentatur: Equalia eidem tertio sunt equalia inter se. Ergo hi duo anguli aequales eidem tertio sunt inter se aequales. Item: Nullus homo est immortalis. Ergo Nullus, qui est immortalis, est homo. Nec non: Titius est pater Caji. Ergo Cajus est Filius Titii. Etenim consequentia in casu primo

Consequentia  
immediata  
definitio.

primo patet per solum dictum de omni (§. 346.); in secundo ex notione propositionum negativarum (§. 454.); in tertio ex notione æquipollentiæ propositionum, in relatione hic fundatam (§. 445.)

§. 460.

*Quid sint  
consequentia  
immediatæ*

Quoniam si una propositione posita simul ponitur altera, modus argumentandi est syllogismi hypothetici enthymema (§. 458.); evidens est, *consequentias immediatas esse enthymemata syllogismorum hypotheticorum, sed ubi consequentia per rationes logicas patet (§. 459.).*

E. gr. Exempla consequentiarum immediatarum modo (not. §. 459.) allata sunt enthymemata horum syllogismorum hypotheticorum:

1. *Si aequalia eidem tertio sunt aequalia inter se, hi duo anguli eidem tertio aequales sunt inter se aequales.* Atqui verum est antecedens. Ergo & consequens. 2. *Si nullus homo est immortalis, sequitur quod nullus, qui est immortalis, sit homo.* Sed nullus homo est immortalis. Ergo sequitur, quod nullus, qui est immortalis, sit homo. 3. *Si Cajus est filius Titii, Titius est pater Caji.* Sed Cajus est Filius Titii. Ergo Titius est pater Caji. Quod ratio consequentiæ pateat per rationes logicas, ostendimus paulo ante (not. §. 459.).

§. 461.

*Cur a non-  
nullis negli-  
gantur, ab  
aliis minime.*

Cum adeo consequentiæ sic dictæ immediatæ sint enthymemata syllogismorum hypotheticorum (§. 460.); ideo *plurimi Logicorum eas prorsus in super habent*, ad syllogismos hypotheticos confugientes, ubi iisdem est locus, non attenta ratione, ob quam patet consequentia. *Ceteri vero enthymemata ista pro peculiari argumentandi genere habent*, quod ratio consequentiæ per regulas logicas pateat (§. cit.), quemadmodum ex ratione simili modi syllogismorum secundæ figuræ pro peculiari argumentandi genere habentur (not. §. 385.).

Si philosophia prima excolitur, plurimi oriuntur argumentandi istiusmodi modi, ubi consequentia ob rationes generales patet. Sed talia in Logica minutim persequi velle, operæ pretium non est: nam generali consequentiarum immediatarum notione instructi, ad exemplar specierum nonnullarum in Logica evolutarum sua sponte modos plures condunt, ut in casibus particularibus compendio argumentandi utantur consequentiæ rationem in super habentes, utpote vel in Logica; vel alibi generaliter stabilitam.

§. 462



## §. 462.

Quoniam istiusmodi syllogismi hypothetici oriuntur ex propositionum æquipollentia (§. 446.), contradictione (§. 448.), contrarietate (§. 450.), subalternatione (§. 453.), conversione (§. 457.): ideo theoremata de propositionibus in istis casibus se mutuo ponentibus (§. 445. 447. 449. 451. 456.) sunt totidem modi consequentiarum immediatarum.

*Modi consequentiarum immediatarum.*

## §. 463.

Unde patet, conclusionem per consequentiam immediatam inferri beneficio syllogismi categorici, ab iis scilicet, qui modos ex Logica didicere, vel in aliis disciplinis sibi plures condidere, *cujus major est propositio generalis de propositionibus se mutuo ponentibus, minor affirmat, has propositiones, quæ nobis obviæ sunt, sub casibus istis contineri, conclusio vero infert, has quoque propositiones se mutuo ponere.*

*Consequentiarum immediatarum praxis.*

Ita praxis dirigitur his syllogismis generalibus

## 1. In Casu æquipollentiæ.

Quæcunque propositiones sunt æquipollentes, earum una posita, ponitur altera (§. 445.).

Sed hæ propositiones sunt æquipollentes.

Ergo earum una posita, ponitur altera.

## 3. in Casu contrarietatis.

Quæcunque propositiones sunt contrariæ, earum posita una, removetur altera (§. 449.).

Sed hæ propositiones sunt contrariæ.

Ergo earum una posita, removetur altera.

## 5. in Casu conversionis:

Omnis propositio universaliter negans simpliciter potest converti (§. 456.).

(Wolffii Logica)

## 2. in Casu contradictionis.

Quæcunque propositiones sunt contradictoriæ, earum una posita, removetur altera (§. 447.).

Sed hæ propositiones sunt contradictoriæ.

Ergo earum una posita, removetur altera.

## 4. in Casu subalternationis.

Quæcunque propositio est universalis subalternans, ea ponitur posita universali (§. 451.).

Sed hæc propositio est subalternans istius universalis.

Ergo hæc propositio ponitur posita ista universali.

Omnis propositio particulariter affirmans simpliciter converti potest (§. 456.).

Z 2

Sed

Sed hæc propositio est univerſaliter negans.

Ergo hæc propositio ſimpliciter poteſt converti.

Quæ hic & in aliis caſibus ſimilibus Pſychologiæ tyronibus enaſci poterant dubia, in Pſychologia tollemus. Exempla ſuperius allata hos ſyllogiſmos directorios illuſtrant. Obiter obſervo poſſe illos ſyllogiſmos etiam adhuc aliter formari, v. gr. in *caſu æquipollentiæ*, ita argumentamur: *Omnes propoſitiones æquipollentes ſibi mutuo poſſunt ſubſtitui.* Sed hæc propoſitiones ſunt æquipollentes. Ergo hæc propoſitiones ſibi mutuo poſſunt ſubſtitui.

Sed hæc propositio eſt particulariter affirmans.

Ergo hæc propositio ſimpliciter converti poteſt.

#### §. 464.

Fiendamen-  
tum quarun-  
dam conſe-  
quentiarum  
immediatarum.

*Si minor ſyllogiſmi categorici ſumitur ut antecedens, conſuſio ut Conſequens propoſitionis hypotheticæ, poſita maiore illius ſyllogiſmi, ponitur propoſitio iſta hypothetica.* Sit enim quicumque ſyllogiſmus in prima figura: *A eſt B.* Sed *C eſt A.* Ergo *C eſt B*, ubi ſigna quantitatis & qualitatis omittuntur, quia hic nulla eorum habetur ratio, atque adeo ſyllogiſmus ſumi poteſt in quolibet modo primæ figuræ. Omiſſa maiore, habebimus enthymema: *C eſt A.* Ergo *C eſt B* (§. 422.). Idem vero enthymema quoque eſt ſyllogiſmi hypothetici. *Si C eſt A, idem C erit quoque B.* Sed *C eſt A.* Ergo idem *C eſt quoque B* (§. 424.). Patet ergo conſuſionem admitti ſub conditione minoris, admiſſa maiore. Quamobrem poſita maiore, poni quoque debet conſuſio ſub conditione maioris, conſequenter propositio hypothetica, cujus antecedens eſt minor, conſequens conſuſio ſyllogiſmi hypothetici (§. 405.). Et quoniam pro ſyllogiſmo primo figuræ ſumi poteſt quicumque alius in ſecunda & tertia, atque demonſtratio eodem modo ſuccedit; inde patet, propoſitionem præſentem intelligi debere de quocumque ſyllogiſmo categorico.

E. gr. In prima figura argumentamur: *Omnis pius Deum amat. Quidam homines ſunt pii.* Ergo *Quidam homines Deum amant* (not. §. 375.). Quamobrem ſi admittis, quod *Omnis pius Deum amet*, admittere etiam debes, quod, *ſi quidam homines ſunt pii, etiam quidam homines Deum amare debeant.* Similiter in ſecunda figura argumen-  
tamur:

satur: Omne triangulum habet tres angulos. Nullum Quadratum habet tres angulos. Ergo Nullum Quadratum est triangulum (not. §. 383.). Quare si admittis, quod Omne triangulum habeat tres angulos, admittere quoque debes, quod, si nullum quadratum sit triangulum, nullum quoque quadratum tres angulos habere queat. Denique in tertia figura argumentamur (not. §. 390.): Nullus pius proximum odit. Quidam pii sunt homines. Ergo Quidam homines proximum non oderunt. Quod si ergo admittis, quod Nullus pius proximum oderit, admittere quoque debes, quod, si quidam pii sunt homines, quidam homines proximum odisse nequeant.

## §. 465.

*Species igitur consequentiae immediata est, si posita majore Species consequentiae syllogismi categorici, ponitur conclusio sub conditione minoris consequentiae im-*  
(§. 459. 464.): quo argumentandi genere utimur, ubi minor non-  
dum sufficienter probata, ut tanquam vera nondum sumi possit,  
& ubi aliis ex rationibus eandem quasi in medio relinquimus.

V. gr. Ita argumentamur: Nullus verus Christianus est contentiosus. Ergo Si quis theologus est contentiosus, nondum is est verus Christianus. Item: Qui rationem reddere valet vegetationis plantarum, is cognitionem ejus habet philosophicam. Ergo si Titius rationem reddere valet vegetationis plantarum, cognitionem ejus philosophicam habet. Quoniam hoc argumentandi genere sapissime utimur, ejus quoque peculiarem mentionem hic injici consultum judicavimus.

## CAPUT. VI.

## DE ALIIS NONNULLIS ARGUMENTANDI GENERIBUS.

## §. 466.

**S**I plures fuerint propositiones categoricae ejus conditionis, ut præ-Fundamentum unius sit continens subiectum alterius; ex iis tanquam Soritis præmissis inferre licet conclusionem, cujus subiectum idem cum categorici.

Z z 2

subje-

*subiecto primæ, prædicatum vero idem cum prædicato ultimæ.* Nimirum si omne A est B, & omne B est C, omne C est D, omne D est E & ita porro in infinitum; dico, omne A esse E. Etenim 1. Omne B est C, *per hypoth.* Sed omne A est B, *per hypoth.* Ergo omne A est C (§. 375.). 2. Omne C est D, *per hypoth.* Sed Omne A est C, *per num. 1.* Ergo omne A est D, (§. cit.). 3. Omne D est E, *per hypoth.* Sed omne A est D, *per num. 2.* Ergo omne A est E.

E. gr. Ita argumentari licet: Deus est omnipotens. Omnipotens facere potest, quicquid possibile. Qui facere potest, quicquid possibile, is facere potest, quicquid contradictionem non involvit. Ergo Deus potest facere, quicquid contradictionem non involvit.

## §. 467.

*Soritis cate-  
gorici definitio.*

Istiusmodi syllogismus, quo ex pluribus propositionibus categoricis, quarum sequentis subiectum est prædicatum proxime antecedentis, infertur conclusio, dicitur *Sorites categoricus*.

## §. 468.

*Ejus in syllo-  
gismos cate-  
goricos resolu-  
tio.*

Liquet ex demonstratione propositionis præcedentis, *Soritem categoricum in tot resolvi posse syllogismos categoricos, quos sunt medii termini*, seu termini præmissarum communes (§. 336.), aut ex conclusione exulantes (§. 337.).

E. gr. In exemplo præcedente (not. §. 466.) conclusionem, *Deus potest facere, quicquid contradictionem non involvit*, non ingrediuntur termini, *esse omnipotentem, & posse facere, quicquid possibile*, adeoque medii sunt, consequenter Sorites in duos syllogismos categoricos resolvitur sequentes: 1. *Quicumque est omnipotens, is potest facere quicquid possibile.* Sed *Deus est omnipotens.* Ergo *Deus potest facere, quicquid possibile.* 2. *Quicumque potest facere, quicquid possibile, ille potest facere, quæ nullam contradictionem involvunt.* Sed *Deus potest facere, quicquid possibile.* Ergo *Deus potest facere, quicquid nullam contradictionem involvit.*

## §. 469.

*Ejus usus.*

Quoniam in Sorite plures syllogismi contrahuntur in unum, evidens est, *Soritem esse compendium argumentandi.*

Ita in exemplo allato duo syllogismi contrahuntur in unum; in aliis vero exemplis plures: patet enim ex demonstratione (§. 466.), præ-

præmissarum numerum posse in infinitum progredi, seu nullum esse earundem numerum determinatum.

§. 470.

*Si plures fuerint propositiones hypotheticæ, ita comparatæ, Fundamentum consequens unius sit continuo antecedens proxime sequentis, positum Soritis an ecedente primæ, ponitur quoque consequens ultimæ. Sci-* *hypothetici.*  
licet sint propositiones hypotheticæ sequentes: si A est B, etiam C est D; & si C est D, etiam E est F, & si E est F, etiam G est H atque ita porro in infinitum: dico etiam sequi, si A sit B, quod etiam G sit H. Etenim posito antecedente primæ propositionis, quod A sit B, ponendum quoque est consequens, quod C sit D (§. 409.). Jam 2. si C est D, etiam E est F, *per hypoth.* Sed C est D, *per num. 1.* Ergo etiam E est F (§. cit.). 3. Si E est F, etiam G est H *per hypoth.* Sed E est F *per num. 2.* Ergo etiam G est H (§. cit.). Patet itaque, posito antecedente primæ, quod A sit B, ponendum quoque esse consequens ultimæ, quod G sit H.

E. gr. Ita argumentari licet: Si mundi elementa debent esse diversa, posito quod alius sit mundus, mundus hic productus est ex nihilo. Si mundus hic productus est ex nihilo, Deus gaudet potentia aliquid ex nihilo producendi. Si Deus gaudet potentia aliquid ex nihilo producendi, nulla datur materia ipsi coæterna. Ergo si mundi elementa debent esse diversa, posito quod alius sit mundus, nulla datur materia Deo coæterna.

§. 471.

Syllogismus hypotheticus, quo ex pluribus propositionibus hypotheticis ita inter se connexis, ut antecedens proxime sequentis sit idem cum consequente antecedentis, infertur conclusio, dicitur *Sorites hypotheticus*. *Soritis hypothetici definitio.*

Et sorites quidem hypotheticus frequentius occurrit categorico, præsertim ubi propositiones determinate enunciaveris, quo in casu plurimæ hypotheticæ evadunt, quemadmodum in Mathesi videre licet.

§. 472.

Quoniam propositionis cujusque hypotheticæ antecedente posito, ponitur etiam consequens (§. 409.); *quelibet pro-* *Soritis hypothetici in finis*

*Syllogismos  
hypotheticos  
resolutio.*

*Soritis hypothetici in syllogismum hypotheticum reſolvi poteſt.*

E. gr. Sorites hypotheticus: Si Deus eſt ſapientiſſimus, mundus fini, quem per creationem intendit, maxime convenit. Si mundus fini, quem Deus per creationem intendit, maxime convenit; omnium poſſibilium optimus eſt. Si mundus, qui exiſtit, omnium poſſibilium optimus eſt, mala non obſtant perfectioni ipſius. Ergo ſi Deus ſapientiſſimus mala quæ in mundo dantur, non obſtant perfectioni ipſius: in hos reſolvitur ſyllogiſmos hypotheticos. 1. Si Deus eſt ſapientiſſimus, mundus fini quem per creationem intendit, maxime convenit. Sed Deus eſt ſapientiſſimus. Ergo mundus fini, quem per creationem intendit, maxime convenit. 2. Si mundus fini, quem Deus per creationem intendit, maxime convenit; omnium poſſibilium optimus eſt. Sed mundus fini, quem per creationem intendit, maxime convenit, per num. 1. Ergo omnium poſſibilium optimus eſt. 3. Si mundus, qui exiſtit, omnium poſſibilium optimus eſt; mala non obſtant perfectioni ipſius. Sed mundus, qui exiſtit, omnium poſſibilium optimus eſt, per num. 2. Ergo mala non obſtant perfectioni ipſius. Patet adeo, ſi Deus ponatur ſapientiſſimus, ſequi tandem, quod mala non obſtrent perfectioni mundi.

#### §. 473.

*Ejus uſus.*

Liquet hinc ulterius, Soritem hypotheticum non minus quam categoricum eſſe compendium ratiocinandi.

Sane in exemplo modo allato tres ſyllogiſmos hypotheticos Sorites hypotheticus compingit in unum (not. §. 472.).

#### §. 474.

*Soritis in  
genere defini-  
tio.*

Quoniam omnis propositio categorica ad hypotheticam reduci poteſt, ſumta definitione ſubjecti pro conditione, ſub qua prædicatum eidem tribuitur (§. 226.), adeoque pro antecedente, prædicato autem, quatenus id definito attribuitur, pro conſequenti (§. 405.); ideo Sorites in genere definiri poteſt per ſyllogiſmum, quo ex pluribus præmiſſis ita invicem junctis, ut continuo conſequens antecedentis propositiſonis ſit antecedens propositiſonis conſequentis (§. 467. 471.), inferitur conſuſio.

Ciceroni vocatur Sorites acervalis argumentatio

#### §. 475.

*Soritis cryp-*

*Sorites crypticus dicitur, qui conſtat propositiſonibus cryp-  
pticis,*

pticis, veluti oblique universalibus, indefinitis, infinitis, & aliis, *ptici definitio.*  
quæ hypotheticis æquipollent.

E. gr. Si argumentemur, *Quem amamus, cum odio non prosequimur. Quem odio non prosequimur, ex ejus damno voluptatem non percipimus. Ex cujus damno voluptatem non percipimus, ei nullum damnum inferimus.* Ergo *quem amamus, ei nullum damnum inferimus.* Sorites cryptici multiplici laborat, sunt enim propositiones omnes indefinitæ, cum signum universalitatis distincte non exprimitur (§. 244.); sunt eadem æquipollentes oblique universalibus, cum signum universalitatis, si suppleatur, in casu obliquo eas ingrediatur (§. 246.); sunt denique infinitæ, quia æquipollent affirmativis (§. 209.). Nimirum prima præmissarum, *Quem amamus, cum odio non prosequimur*, æquipollent huic alteri, *Nullum, quem amamus, odio prosequimur*, & hæc denique affirmativæ directe universali, *Omnis homo, quem amamus, est persona, quam odio non prosequimur.* Sorites crypticus, in quo propositiones hypotheticæ æquipollentes occurrunt, est sequens: *Ubi amor, ibi nullus odio locus est. Ubi odio locus non est, ibi exultat gaudium ob infelicitatem alterius. Ubi gaudium ob infelicitatem alterius exultat, ibi studium nocendi abest. Ergo ubi amor locus est, ibi studium nocendi abest.* Etenim Sorites hic æquipollent sequenti hypothetico: *Si amor locus est, odio nullus esse potest. Si nullus odio locus esse potest, nec ob alterius infelicitatem gaudemus. Si ob infelicitatem alterius minime gaudemus, studium nocendi abest. Ergo si amor locus est, studium nocendi abest.* Obiterroneo, abunde ex doctrina syllogistica patere, quantum subsidii positum sit in propositionibus æquipollentibus, ut adeo non inutile foret exercitium propositiones datas in alias quascunque æquipollentes transfundendi.

§. 476.

Individua respectu speciei, sub qua comprehenduntur; species respectu generis, quæ eas sub se continet, & genera inferiora respectu superiorum, quæque per modum individuum, specierum & generum inferiorum concipiuntur, respectu eorum, quæ per modum specierum, generum proximorum & generum superiorum concipimus, *inferiora simpliciter appellantur*: species vero respectu individuum suorum, genera respectu specierum sub iis contentarum & genera superiora respectu inferiorum, quæ comprehendunt, quæque per modum *spec-*

*Inferiorum & superiorum definitio.*

specierum, generum proximorum & generum superiorum concipiuntur, respectu eorum, quæ per modum individuum, specierum & generum inferiorum concipiuntur, *superiora* simpliciter appellari solent.

In constituendis speciebus atque generibus ratio tantummodo habetur essentialium, vel attributorum (§. 70. 71), consequenter eorum, quæ constanter insunt (§. 64. 65.). Enimvero cum dentur prædicata, quæ de omni subiecto sub data quadam determinatione, minime constanter, efferri possunt (§. 258.); si his, per quæ species atque genera determinantur, eisdem adjicitur, species & genera abeunt in alias species inferiores (§. 72.). Atque adeo patet, dari utique, quæ per modum specierum atque generum & per modum individuum sub illis contentorum comprehenduntur. E. gr. Omnis lapis, qui ex alto decedit, ingentem imperum acquirit. Lapis designat genus quoddam vel speciem corporum propter ea, per quæ intrinsecus determinatur. Enimvero si determinatio ista externa, lapsus nempe ex alto, intrinsecus superaccedat; nova quasi constituitur lapidum species, ex alto nimirum cadentium. Omnes igitur lapides ex alto cadentes in casu singulari sunt individua illius speciei, adeoque *inferiora* sub isto *superiori* contenta. Ita in Geometria tres quasi constituimus species *angulorum* ad *peripheriam* eidem arcui cum *angulis ad centrum* insistentium, dum tres eîsus distinguimus, quorum primo crux unum anguli ad peripheriam transit per centrum, adeoque vertex anguli ad centrum in cruce ejus, qui ad peripheriam, situm est, secundo vero idem vertex intra crura anguli ad peripheriam continetur, denique in tertio extra eadem constituitur.

#### §. 477.

Fundamentum inductionis,

*Quod de singulis inferioribus affirmari vel negari potest, idem etiam de superiori universaliter affirmari vel negari debet, sub quo inferiora ista continentur.* Omnia enim inferiora simul sumpta constituunt superius, nempe singula individua simul speciem, singulæ species simul genus, singula genera inferiora simul genus superius, & quæ per modum individuum ad quandam speciem relatorum, per modum specierum vel generum inferiorum concipiuntur, simul sumpta id quod per modum speciei, vel generis proximi aut superioris concipitur (§. 476. 43. & seqq.). Enimvero de eodem subiecto idem affir-



affirmari, vel negari debere, ex terminis manifestum est (§. 205. 262.). Patet itaque de superiori universaliter affirmari, vel negari debere, quod de singulis inferioribus affirmari, vel negari potest.

Partem hujus theorematis alia ratione demonstravimus in superioribus (§. 234.).

§. 478.

Modus argumentandi, quo de superiori universaliter inferitur, quod de singulis inferioribus affirmatur vel negatur, dicitur *Inductio*. Quodsi omnia inferiora recensentur, *Inductio completa* est; si quædam deficiunt, *incompleta*. *Inductionis definitio.*

E. gr. In elementis Geometriæ in singulis casibus paulo ante (not. §. 476.) recensitis demonstratur, quod angulus ad peripheriam sit dimidius anguli ad centrum eidem arcui insistentis. Quamobrem si argumenteris: *Angulus ad peripheriam, in cujus crure est vertex anguli ad centrum eidem arcui insistentis, est hujus dimidius; Angulus ad peripheriam, intra cujus crura comprehenditur vertex anguli ad centrum eidem arcui insistentis, est ejusdem dimidius; Angulus ad peripheriam, extra cujus crura constituitur vertex anguli ad centrum eidem arcui insistentis, est ejusdem dimidius, nec datur præterea alius angulus ad peripheriam cum angulo ad centrum eidem arcui insistentis. Ergo omnis angulus ad peripheriam est dimidius anguli ad centrum eidem arcui insistentis: argumentatio inductio est, eaque completa. Si argumenteris: Hic canis latrat, iste canis latrat, ille canis latrat, nec repertus est canis, qui non latret. Ergo omnis canis latrat: inductio incompleta est.*

§. 479.

*Omnis inductio est enthymema contentum sub hoc syllogismo Reductio in categorico generali: Quicquid competit, vel non competit singulis inferioribus, id etiam competit, vel non competit omni superiori, sub quo continentur. Sed hoc competit, vel non competit singulis inferioribus. Ergo hoc competit, vel non competit omni superiori. Patet per inductionis definitionem & fundamentum (§. 477. 478.).* *ductiois ad syllogismum categoricum.*

Enthymema affirmativum hoc est: *Hoc convenit singulis inferioribus. Ergo hoc convenit omni superiori, aut, si mavis, Singula A sunt B. Ergo Omne A est B.* Enthymema negativum hoc est: *Hoc non convenit singulis inferioribus. Ergo hoc non convenit omni superiori, (Wolffii Logica) A a a aut,*

aut, si mavis, *Singula A non sunt B.* Ergo *Nullum A est B.* Hinc etiam quælibet inductio ad syllogismum categoricum reducitur, e. gr. exemplum reductionis incompletæ modo (not. §. 478.) propositum ad sequentem: *Quod singulis canibus proprium experimur, illud omni cani recte tribuitur.* Sed *latratum singulis canibus proprium experimur.* Ergo *latratus omni cani recte tribuitur.* Adde consequentiam immediatam: *Latratus omni cani recte tribuitur.* Ergo *omnis canis latrat.* Ita habes propositionem per inductionem illatam ipsissimis verbis.

## §. 480.

*Cur inductio  
peculiaris  
argumentandi  
modus  
constituatur.*

Quoniam major in quocunque casu probatur per theorema, quod fundamentum constituimus inductionis, (§. 477.), ex quo nimirum per consequentiam immediatam inferitur (§. 459.); ideo perinde ac modi secundæ & tertiæ figuræ (not. §. 385. 397.), syllogismi hypothetici (§. 407. 408.) & disjunctivi (§. 417.) atque immediatæ consequentiæ (§. 461.) *inductio pro peculiari argumentandi modo habetur.*

Patet tamen (§. 479.), quod omnis vis concludendi pendeat a forma syllogismi categorici in prima figura, consequenter a dicto de omni & nullo (§. 346. 347.).

## §. 481.

*Inductionis  
ad syllogi-  
smum hypo-  
theticum re-  
ductio.*

Quia omne enthymema syllogismi categorici idem est enthymema hypothetici (§. 424.); *Omnis quoque inductio ad syllogismum hypotheticum reducitur, cujus generalis forma hæc est: Si hoc convenit, vel non convenit singulis inferioribus, idem quoque convenire, vel non convenire debet omni superiori. Sed hoc convenit, vel non convenit singulis inferioribus. Ergo hoc convenit, vel non convenit omni superiori.*

E. gr. Exemplum inductionis incompletæ ante datum (not. §. 478.) huic syllogismo hypothetico æquivaler: *Si singuli canes latrant, omnis canis latrat.* Sed *singuli canes latrant.* Ergo *omnis canis latrat.* Consequentia majoris seu propositionis conditionalis patet per rationem logicam, istud scilicet theorema, quod constituimus fundamentum inductionis (§. 477.).

## §. 482.

*Dilemmatis  
definitio.*

Syllogismus hypotheticus, cujus consequens est propositio disjunctiva & totum tollitur, dicitur *Dilemma.*

E. gr.

E. gr. Dilemma est sequens syllogismus hypotheticus: Si triangulum plures quam tres habere potest angulos, aut rectilineum, aut curvilineum, aut mixtilineum angulos plures quam tres habebit. Sed neque triangulum rectilineum, neque curvilineum, neque mixtilineum angulos plures quam tres habet. Ergo nullum triangulum plures quam tres angulos habere potest.

§. 483.

Quoniam dilemma est in modo tollente syllogismi hypothetici (§. 482 409.), conclusio vero syllogismi hypothetici in modo tollente est remotio antecedentis (§. 409.); erit *dilemmatis conclusio negativa, si antecedens majoris affirmativum, & contra illa affirmativa erit, si hoc negativum.*

*Conclusionis in dilemma te qualitas*

E. gr. In Dilemmate, quod exempli loco (not. §. 482.) proposuimus, antecedens, si triangulum plures quam tres habere potest angulos, affirmativum est: unde ejus conclusio, nullum triangulum plures quam tres angulos habere potest, negativa est. Enimvero ubi dilemma tale fuerit: Si Deus mundum optimum non produxit, aut id fecit, quia non potuit, aut quia noluit. Sed id non fecit, quia non potuit, neque etiam quia noluit. Ergo mundum optimum, produxit: antecedens est negativum atque adeo ejus conclusio, utpote remotio propositionis negativæ, affirmativa. Qui enim dicit, falsum esse quod A non sit B, seu in casu speciali, qui pronunciat, falsum esse, quod Deus non produxerit mundum optimum, affirmare debet, quod produxerit mundum optimum.

§. 484.

Syllogismus categoricus, quem ingrediuntur propositiones compositæ, dicitur *syllogismus categoricus multiplex*. Et in oppositione categoricus sive simplex dictus (§. 361) *categoricus simplex* appellatur.

*Syllogismi categorici multiplicis definitio.*

Poterat dici syllogismus compositus, nisi vox ista jam alium significatum obtinuisset (§. 403.), quem immutare a moribus philosophi alienum (§. 147. *Disc. pralim.*). Constat vero categoricum vulgo dici simplicem in ordine ad compositum.

§. 485.

Quoniam in propositione composita vel diversa prædicta tribuuntur eidem subjecto, vel idem prædicatum effertur de diversis subjectis (§. 314.), in syllogismo autem categorico propositiones componuntur ex termino medio atque terminis ex-

*Varietas illorum syllogismorum.*

tremis (§. 335. & seqq.); in syllogismo categorico multiplici vel eadem eo clusio inferitur pluribus medijs terminis, vel eodem medio termino inferuntur conclusiones plures sive ejusdem subiecti, sive ejusdem prædicati.

E. gr. Si ita argumenteris: Omne triangulum æquicrurum per perpendicularum ex vertice in basin demissum dividitur in duas partes æquales. perinde ac basis ejus & angulus ad verticem. Hoc triangulum est æquicrurum. Ergo hoc triangulum per perpendicularum ex vertice in basin demissum dividitur in duas partes æquales. perinde ac basis ejus & angulus ad verticem: syllogismus est categoricus multiplex, in quo eodem medio termino, qui est *triangulum æquicrurum*, inferuntur tres conclusiones idem subiectum, sed diversa prædicata habentes, scilicet 1. *Hoc triangulum per perpendicularum ex vertice in basin demissum dividitur in duas partes æquales.* 2. *Hujus trianguli basis dividitur per perpendicularum ex vertice in basin demissum in duas partes æquales.* 3. *Hujus trianguli angulus ad verticem per perpendicularum in basin demissum dividitur in duas partes æquales.* Quod si ita argumenteris: Omnis figura trilatera habet tres angulos. Omne triangulum rectilinum & sphericum est figura trilatera. Ergo omne triangulum rectilinum & sphericum habet tres angulos: syllogismus denuo est categoricus multiplex, sed in quo eodem medio termino inferuntur duæ conclusiones ejusdem prædicati, sed diversi subiecti, sc. 1. *Omne triangulum rectilinum habet tres angulos,* & 2. *Omne triangulum sphericum habet tres angulos.* Denique si argumenteris: Omne triangulum rectilinum æquilaterum, vel æquiangulum per perpendicularum ex angulo uno in latus oppositum demissum dividitur in duos triangula æqualia. Sed hæc figura est triangulum & æquilaterum, & æquiangulum. Ergo hæc figura dividitur per perpendicularum ex angulo uno in latus oppositum demissum in duos triangula æqualia: syllogismus est categoricus multiplex, in quo eadem conclusio inferitur duplici medio termino. Alter enim est *triangulum æquilaterum*; alter vero *triangulum æquiangulum*. Obit moneo, si terminus medius fuerit complexus, adeoque nonnisi integro sumto conclusio inferri possit, syllogismus categoricum simplicem esse: quod idem valet in eo casu, ubi vel subiectum, vel prædicatum est terminus complexus.

### §. 486.

Quia Syllogismus categoricus multiplex vel pluribus medijs terminis eandem inferit conclusionem, vel eodem medio termino plures diversas conclusiones (§. 485.), in tot resolvi potest

*Syllogismi  
categorici  
multiplicis  
in plures*

*est syllogismus, quot sunt medii termini, vel conclusiones simplices res-  
verse.* *olutio.*

E. gr. Syllogismus categoricus medii termini duplicis modo (not. §. 485.) allatus in duos resolvitur syllogismos categoricos simplices: 1. Omne triangulum æquilaterum per perpendicularum ex angulo uno in latus oppositum demissum in duo triangula aequalia resolvitur. Sed hæc figura est triangulum æquilaterum. Ergo &c. 2. Omne triangulum æquiangulum per perpendicularum ex angulo uno in latus oppositum demissum resolvitur in duo triangula aequalia. Sed hæc figura est triangulum æquiangulum. Ergo &c. Similiter syllogismus categoricus duplicis extremi minoris paulo ante (not. §. cit.) propositus in duos resolvitur categoricos simplices: 1. Omnis figura trilatera habet tres angulos. Omne triangulum rectilineum est figura trilatera. Ergo Omne triangulum rectilineum habet tres angulos. 2. Omnis figura trilatera habet tres angulos. Omne triangulum sphericum est figura trilatera. Ergo Omne triangulum sphericum habet tres angulos.

§. 487.

Si subjecto tribui potest aliquod prædicatum, supposita non minus subjecti, quam prædicati quadam determinatione; posita determinatione & subjecti, & prædicati, subjecto tribuendum est prædicatum. Si enim subjecti & prædicati determinatio adfuerit, prædicatum tribui potest subjecto, per hypoth. Quod si ergo ponatur determinatio subjecti & prædicati; subjecto quoque tribuendum est prædicatum (§. 409.).

Fundamentum syllogismi biformis

E. gr. In propositione categorica, omnis lex posterior derogat legi priori, subjecti determinatio est posterioritas, prædicati vero prioritas legis. Æquivalet igitur huic hypotheticæ: Si lex B fuerit posterior, lex vero A prior; lex B derogabit legi A. Quare si ponas, legem B esse posteriorem, legem vero A priorem, sequetur utique: legem B derogare legi A.

§. 488.

In hoc igitur casu ita argumentari licet: Omni subjecto A sub determinatione C tribuendum est prædicatum B sub determinatione D. Sed in hoc casu subjectum A habet determinationem C & prædicatum B determinationem D. Ergo in hoc casu subjecto A tribuendum est prædicatum B.

Modus syllogismi biformis.

E. gr. In casu dato (not. §. 487.) ita argumentamur: Omnis lex posterior derogat

*derogat legi priori. Atqui lex B est posterior, lex vero A prior. Ergo lex B derogat legi A.*

## §. 489.

*Definitio syllogismi biformis.*

Vocatur autem istiusmodi *syllogismus biformis*. Unde *syllogismus biformis* definitur, quod sit is, quo posita determinatione subjecti atque prædicati, sub qua prædicatum jungi potest subjecto, prædicatum subjecto tribuitur. Quoniam itaque propositione minori affirmari debet, & subjecto, & prædicato suam convenire in casu dato determinationem; *in syllogismo biformi propositio minor duplex subsumitur sub diversis majoris partibus.*

Patet id ex allato ante exemplo (not. §. 488.). Patet idem ex aliis, v. gr. si ita argumentamur: *Omnis mathematicus & theoria & praxi instructus præstat mathematico sola theoria instructo. Sed Titius est mathematicus & theoria & praxi instructus; Mevius vero est mathematicus sola theoria instructus. Ergo Titius præstat Mevio.* Aliud exemplum tale est: *Liber methodo demonstrativa conscriptus certiore cognitionem largitur lectori, quam liber secundum scholæ methodum conscriptus. Sed hic liber est methodo demonstrativa conscriptus; ille vero secundum methodum scholæ. Ergo hic liber certiore cognitionem largitur lectori quam ille.*

## §. 490.

*Syllogismi biformis in simplices resolutio.*

*Facile syllogismus biformis resolvitur in simplices; id quod exemplis doceri sufficit. Nimirum in casu primo (not. 489.) ita argumentari licet: Omnis mathematicus & theoria, & praxi instructus præstat mathematico sola theoria instructo. Sed Titius est mathematicus & theoria, & praxi instructus. Ergo præstat mathematico sola theoria instructo. Ex hac conclusione per immediatam consequentiam porro inferitur: Ergo quicumque Mathematicus sola theoria instructus est, eo Titius præstat (§. 445. 460.). Unde porro argumentamur: Quicumque Mathematicus sola theoria instructus est, eodem Titius præstat. Sed Mevius est mathematicus sola theoria instructus. Ergo Titius Mevio præstat. Similiter in altero casu ita argumentari licet: Omnis liber methodo demonstrativa conscriptus certiore cognitionem largitur lectori, quam liber secundum scholæ methodum conscriptus. Sed*  
*hic.*

*hic liber est methodo demonstrativa conscriptus. Ergo hic liber certio- rem largitur lectori cognitionem, quam liber secundum scho- le methodum conscriptus.* Ex conclusione denuo per immidia- tam consequentiam infertur (§. 445. 460.): *Quicumque liber se- cundum scholæ methodum conscriptus, is minus certam cognitionem largitur lectori, quam hic liber.* Unde porro argumentamur: *Sed ille liber secundum scholæ methodum conscriptus. Ergo ille liber minus certam cognitionem quam hic lectori largitur, consequen- ter per immediatam consequentiam (§. cit.): Hic liber certio- rem lectori, quam ille cognitionem largitur.*

Si quis de successu in omni casu dubitet, is resolvat exem- plum generale cetera omnia sub se complexum (§. 488.) in Syl- logismos simplices, quos tales deprehendet: *Omne A sub deter- minatione C est B sub determinatione D. Sed G est A sub deter- minatione C. Ergo G est B sub determinatione D.* Unde infer- tur per immediatam consequentiam: *Quodcumque B admittit determinationem D, illud B tribui potest ipsi G, ac porro argu- mentamur. Sed hoc B admittit determinationem D. Ergo hoc B tribui potest ipsi G.* Unde porro sequitur per immediatam con- sequentiam: *Ergo G est B.*

Exemplum quoque not. §. 488. allatum talem reductionem admittit. Ita scilicet argumentamur: *Omnis lex posterior derogat omni legi priori. Sed lex B est posterior. Ergo lex B derogat omni legi priori.* Hinc se- quitur per immediatam consequentiam: *Ergo quacumque lex scilicet de eodem casu est prior, illi derogat lex B.* Unde porro argumentamur: *Quacumque lex est prior lege B, ei derogat lex B. Sed lex A est prior le- ge B. Ergo legi A derogat lex B.*

#### §. 491.

*Syllogismus adeo biformis, cum in unum compingat syl- logismos categoricos duos atque unam vel duas consequentias immediatas (§. 490.), compendium argumentandi est.* *Cur sit com- pendium ar- gumentandi.*

Exempla syllogismorum biformium (not. §. 489.) cum eorum re- solutione (§. 490.) collata dicta illustrant.

## CAPUT VII.

DE

RATIOCINATIONE POLYSYLLOGISTICA  
ET MIXTİM COMPOSITA.

§. 492.

*Concatenatio  
syllogi-  
smorum des-  
initio.*

**S**I syllogismi antecedentis conclusio sit præmissa sequentis, vel plurium conclusiones considerantur instar notionis complexæ, ac formata inde enunciatio ingreditur tanquam præmissa syllogisimum sequentem; *Syllogismi concatenari* a nobis dicuntur.

Fig. 1.

Exempla in demonstrationibus Mathematicorum plurima occurrunt. E. gr. Si ita argumentamur de triangulo æquicruro ABC circulo inscripto: *Omnis trianguli æquicruri crura sunt equalia. Sed chordæ AB & BC sunt crura trianguli æquicruri. Ergo chordæ AB & BC sunt æquales.* Et porro: *Quorum arcuum chordæ æquales sunt, illi arcus æquales sunt.* Sed arcuum AB & BC chordæ æquales sunt. Ergo arcus quoque AB & BC æquales sunt. Si, inquam, ita argumentamur, syllogismi concatenari dicuntur, quia conclusio primi, *chordæ AB & BC sunt æquales*, est simul præmissa minor syllogismi secundi. Similiter concatenantur syllogismi, si ita argumentamur: *Quicumque est sapientissimus, is eligit media fini convenientissima.* Sed Deus est sapientissimus. Ergo Deus eligit media fini convenientissima. Et porro: *Si Deus eligit media fini convenientissima, mundum creavit fini creationis convenientissimum.* Sed Deus eligit media fini convenientissima. Ergo Deus mundum creavit fini creationis convenientissimum. Denique: *Si Deus mundum creavit fini creationis convenientissimum, mundum optimum produxit.* Sed Deus mundum creavit fini creationis convenientissimum. Ergo mundum optimum produxit. Nam conclusio syllogismi præcedentis hic fit continuo præmissa sequentis. Alter concatenationis casus in Mathesi frequentissimus est. E. gr. Si duæ lineæ AB & CD sese mutuo intersecant in E prodemonstranda æqualitate angulorum o & x ita argumentamur: 1. *Omnēs anguli contigui super eadem recta sunt æquales duobus rectis.* Sed Anguli y & x sunt contigui super eadem recta CD. Ergo Anguli y & x sunt æquales duobus rectis. 2. *Anguli contigui super eadem recta sunt æquales duobus rectis.* Sed Anguli o & y sunt contigui super eadem recta AB. Ergo

Fig. 2.

Angu-



*Anguli o & y sunt æquales duobus rectis.* Jam attendentes ad duas conclusiones, *Anguli y & x sunt æquales duobus rectis & anguli o & y sunt æquales duobus rectis*, formamus hanc enunciationem: *Anguli y & x atque Anguli o & y sunt æqualia eidem tertio*, atque 3. argumentamur: *Æqualia eidem tertio sunt æqualia inter se.* Sed *Anguli y & x atque Anguli o & y sunt æqualia eidem tertio.* Ergo *anguli y & x simul sunt angulis o & y simul æquales.* Hic syllogismi concatenantur, dum ex duabus conclusionibus formamus propositionem, quæ præbet præmissam syllogismi tertii.

## §. 493.

Syllogismus, cujus conclusio est præmissa alterius syllogismi, appellatur *Profyllogismus*: Syllogismus vero, cujus præmissa est conclusio alterius syllogismi, dicitur *Episyllogismus*.

*Profyllogismi & Episyllogismi definitio.*

E. gr. Si quis ita argumentatur: *Omnis actio lege naturali prohibita est fugienda.* Sed *nimius labor est actio lege naturali prohibita.* Ergo *nimius labor est fugiendus*, & minorem probaturus argumentatur: *Quæcunque actio tendit ad corporis destructionem, ea est lege naturali prohibita.* Sed *nimius labor tendit ad corporis destructionem.* Ergo *nimius labor est actio lege naturali prohibita*: Syllogismus posterior est profyllogismus, quia per eum præmissa prioris, *nimius labor est actio lege naturali prohibita*, infertur tanquam conclusio. Contra in exemplo geometrico de arcubus æqualibus a cruribus trianguli æquicruri circulo inscripti subtenfis syllogismus posterior est episyllogismus, quia conclusio prioris, *chorda arcuum AB & BC sunt æquales*, est ejusdem propositio minor. Similiter in exemplo de mundo optimo syllogismus secundus est episyllogismus primi, quia conclusio primi, *Deus eligit media fini convenientissima*, est simul minor secundi & tertius est episyllogismus secundi, quia conclusio secundi, *Deus mundum creavit fini creationis convenientissimum*, est minor tertii.

Fig. 1.

## §. 494.

Series syllogismorum inter se concatenatorum dicitur *Ratiocinatio polysyllogistica*.

Exempli loco sunt syllogismi inter se concatenati (not. §. 492.); tum etiam syllogismus cum suo profyllogismo (not. §. 493.). Facile apparet *sortitem atque syllogismum categoricum multiplicem esse quasdam ratiocinationis polysyllogistica species* (§. 468. 472. 485.).

## §. 495.

Quodsi syllogismis categoricis & hypotheticis immisceantur (Wolffii Logica.) Bb b *Ratiocinationis mixtae.*

*sim compo-  
sitæ definitio.*

antur consequentiæ immediatæ & alii quicunque argumentandi modi, *Ratiocinationem* dicimus *mixtim compositum*. Unde *Ratiocinatio mixtim composita* definiri potest per seriem quorumcunque argumentandi modorum inter se concatenatorum.

Nimirum immediata consequentia concatenatur cum syllogismo, si conclusio syllogismi sit præmissa, unde inferitur per immediatam consequentiam nova conclusio, & e contrario syllogismus concatenatur cum immediata consequentia, si conclusio per immediatam consequentiam illata sit præmissa syllogismi. Ratiocinationis mixtim compositæ in demonstrationibus Mathematicorum ut plurimum locum habent. E. gr. Si per duos syllogismos intulimus (not. § 492.) conclusiones: *Anguli o & y simul sunt æquales duobus rectis*; & *Anguli y & x sunt æquales duobus rectis* per immediatam consequentiam inferimus: *Anguli o & y atque Anguli y & x sunt duæ angulorum summæ eadem tertiæ æquales*. Ergo *Anguli o & y atque anguli y & x simul sunt æqualia eadem tertio*. Ita immediata consequentia concatenatur cum duobus syllogismis. Dum vero porro argumentamur: *Æqualia eadem tertio sunt æqualia inter se*. Sed *Anguli o & y atque Anguli y & x sunt æqualia eadem tertio*. Ergo *Anguli o & y atque Anguli y & x sunt æqualia inter se*; Syllogismus non immediata consequentia concatenatur. Et dum porro per immediatam consequentiam inferimus: *Anguli o & y atque Anguli y & x sunt æqualia inter se*. Ergo *anguli o & y simul sumti sunt æquales angulis y & x simul sumtis*; denuo consequentia immediata cum syllogismo concatenatur. Omnes isti syllogismi & immediata consequentiæ dum inter se concatenantur; ratiocinatio oritur mixtim composita

#### §. 496.

*Probationis  
definitio.*

Si data quædam propositio ex aliis tanquam notioribus per syllogismos colligitur, *probari* dicitur. Unde *Probatio propositionis* definiri potest per syllogismum aut syllogismorum inter se concatenatorum seriem, quibus ea ex aliis tanquam notioribus colligitur.

Exempla præbent omnes demonstrationes propositionum mathematicarum, in quibus concatenatis syllogismis plerumque pluribus tandem devenitur ad syllogismum, cujus conclusio est propositio data, de qua quæritur, utrum prædicatum subiecto sive absolute, sive sub data determinatione posito conveniat, nec ne: raro autem primo statim syllogismo inferitur propositio data tanquam conclusio.

§. 497.

## §. 497.

*Probatio* quæ unico syllogismo absolvitur, dici potest *simplex*; contra vero *composita*, quæ pluribus inter se concatenatis constat. Unde *composita* est syllogismorum inter se concatenatorum series, adeoque ratiocinatio vel polysyllogistica (§. 494.), vel mixtim composita (§. 495.).

*Probationis  
simplicis &  
compositæ  
differentia*

Exempla Mathematicorum dicta optime illustrant. Sed cum inferius ex instituto de probatione propositionum æturalia in medium prolaturi simus; hic loci ad exempla Mathematicorum provocasse sufficiat. Quodsi quis Mathematicum fuerit ignarus, is attendat ad probationes propositionum, quas in Logica huc usque dedimus, ac in sequentibus daturi sumus. Quodsi omnem de syllogismo doctrinam animo comprehenderit, haud difficile eidem erit eas in syllogismos suos resolvere: quo ipso eorundem concatenatio ipsis oculis manifesta evadet.

## §. 498.

In specie autem probatio *Demonstratio* dicitur, si in syllogismis, quos inter se concatenamus, non utamur præmissis, nisi definitionibus, experientiis indubitatis, axiomatis & propositionibus jam ante demonstratis: Ut adeo demonstrationes tandem niantur definitionibus, experientiis indubitatis & axiomatis.

*Demonstrationis  
definitio.*

Qui cum attentione vel nostra Geometriæ elementa perlegit, is demonstrationes Mathematicorum hanc tenere formam experietur. Inferius idem apertius docebimus. Tenendum tamen, vulgo in demonstrationum numero non haberi nisi probationes, quæ tandem in definitiones & axiomata resolvuntur, nec admitti præmissas, quæ sola experientiæ fide constant. Enimvero cum finis demonstrationis sit certitudo cognitionis, quæ non minus obtinetur, ubi experientiis indubitatis utaris tanquam præmissis, quam ubi solas adhibueris definitiones & axiomata tanquam præmissas primas; consultius duximus, vocem demonstrationis non præter necessitatem ætioribus limitibus coerceri, quam par erat, præsertim cum Mathematici in Mathesi mixta, in primis Astronomia & Optica, e numero demonstrationem non arceant probationes, quas ingrediuntur præmissæ per observationes stabilitz. Multo minus autem probamus, si quis cum *Aristotele* demonstrationem ætioribus adhuc limitibus constringat, ut ne quidem rigidissimæ Geometrarum demonstrationes leges omnes ad impleant, censoria ideo virgula notatz a *Petro Ramo* in scholis Mathematicis. Sufficit talem concipi demon-

itationis notionem, ut per eam extra omne dubium ponatur, prædicatum convenire suo subiecto. Patebit enim deinceps, cognitionem certam ab incerta esse distinguendam, atque adeo, cum probatio tendat ad certitudinem cognitionis, sufficit eam a ceteris distingui, qua certitudo cognitionis obtinetur. Si cui aliter visum fuerit, is per nos abundet sensu suo. De verbis cum nemine litigamus. Nos eum constituimus significatum, qui scopo nostro responderet suæque se commendat utilitate.

## CAPVT VIII.

DE USU VOCUM, SEU TERMINORUM  
CIRCA RATIOCINIA.

§. 499.

*Usus vocum  
in reducendis  
rebus obvijs  
ad sua genera  
suarumque  
species.*

**S**i genera & species terminis accurate definitis distinguuntur, res nobis obvias ratiocinando ad sua genera suasque species reducere licet. Res nobis obvia fit, dum aliquam ejus nobis notionem formamus, sive rem ipsam nobis representemus (§. 34.), sive aliqua ejus prædicata cogitemus, per quæ eam menti exhibemus. Quod si ergo distinguimus, quæ in notionem rei occurrunt, vel diversâ, sub quibus eam menti exhibemus, prædicata, atque judicia intuitiva formamus (§. 39. 51.), & inter prædicata ista occurrunt, quibus definitio absolvitur generis vel speciei alicujus termino quodam tanquam nomine sibi proprio denotatæ; ex notis istis colligitur, rei obviæ convenire definitum (§. 349.), adeoque ei tribuendum esse nomen, quo genus aliquod, vel species aliqua designatur (§. 152.), consequenter res obvia ad genus vel speciem suam ratiocinando reducitur (§. 48. 50.).

Egregius hic terminorum usus ex demonstrationibus Mathematicorum elucet, nec minus patet per nostras demonstrationes logicas, ubi lector ad eas percipiendas animum attulerit sufficienter attentum, patebitque in ceteris philosophiæ partibus eodem methodo a nobis pertractandis, qua in Logica utimur. Vulgo is non agnoscitur, plerisque si

bi persuadentibus definitiones præmitti, ut propositionum pateat sensus. Sed solenne est hominibus attentionis impatientibus in uno acquiescere usu, ubi multiplex præsto est, & ut impatientiæ suæ patrocinentur, prouincio habere, qui subinde minimum in re momentum trahit: ex quo fonte plurima propullulant iudicia præcipitata, quæ suo loca notabimus.

§. 500.

*Si genera & species terminis accurate definitis distinguuntur, ad res nobis obvias ratiocinando applicare licet propositiones generales cognitæ.* Si enim genera & species terminis accurate definitis distinguuntur, res nobis obvias ratiocinando ad sua genera suasque species reducere licet (§. 499.). In propositionibus generalibus subjectum est vel species aliqua, vel genus quoddam; prædicatum vero convenit singulis speciei individuis, vel singulis generis speciebus harumque individuis (§. 242.). Quamobrem cum constet, rem obviā ad hanc speciem, vel istud genus pertinere, quemadmodum modo ostendimus; ratiocinando colligimus, quod de genere vel specie aliqua absolute in propositione universali prædicatur, seu affirmatur vel negatur, id quoque de re nobis obvia absolute affirmari, vel negari debere (§. 346. 347.). Propositiones adeo generales ad res obvias ratiocinando applicamus (§. 49. 50.).

*Usus vocum in applicandis propositionibus generalibus.*

Egregius hic terminorum usus denuo ex demonstrationibus Mathematicorum nostrisque philosophicis, ac in specie quoque logicis, elucet. Nec mirum, cum magna parte pendeat ab usu priori (§. 499.) quemadmodum ex ipsa demonstratione propositionis præsentis intelligitur.

§. 501.

*Si conditio, sub qua prædicatum convenit subjecto, terminis fixis exprimitur, ratiocinando colligere licet, num rei cuidam obvia conditio ista adsit.* Quoniam terminis fixis invariata re-

*Usus vocum in cognoscenda subjecti conditione.*

sponder notio (§. 129.), si conditio, sub qua prædicatum subiecto tribuitur, terminis fixis exprimitur, eam in casu obvio agnoscere (§. 80.) consequenter ratiocinando colligere licet (§. 48. 50.), num rei obviæ conditio ista adsit.

Qui in mathematicis fuerit versatus ei abunde sufficient, quæ ibi sese offerunt exempla. Inferius tamen aliqua trademus, quæ propositioni nostræ illustrandæ inserviunt.

## §. 502.

*Ufus vocum  
in applican-  
dis propositi-  
onibus hypo-  
theticis.*

*Si conditio, sub qua prædicatum convenit subiecto terminis fixis exprimitur, & genera atque species accuratis definitionibus distinguuntur; propositiones hypotheticas generales ad res obvias, vel casus speciales aut singulares obvias, ratiocinando applicare licet.* Si enim genera atque species accuratis definitionibus distinguuntur, res obvias ad sua genera suamque speciem reducere licet (§. 499), & si conditio, sub qua prædicatum convenit subiecto, terminis fixis exprimitur, ratiocinando colligi potest, num rei cuidam obviæ conditio ista adsit (§. 501.). Stante igitur utraque hypothesi, ratiocinando colligitur, rem obviæ esse huius vel istius generis aut speciei, eique hanc vel istam convenire conditionem. Quamobrem cum de singulis speciebus eorumque individuis sub data conditione prædicari possint, quæ de genere (§. 236.), vel specie (§. 233.) sub ista conditione prædicantur; ratiocinando colligitur, de re obvia sub conditione obvia prædicari posse, quod in propositionibus hypotheticis universalibus de subiecto enunciat (§. 218. 242.).

Exemplo denuo plurima suppeditat Mathesis, suppeditat Logica nostra, & plura occurrunt in ceteris philosophiæ partibus methodo philosophica pertractatis. Nec deerit inferius occasio quædam in scenam producendi.

## §. 503.

*Ufus vo-  
cum in ap-*

*Si terminis fixis respondet significatus & in propositionibus enunciat, ex quibus prædicatis absolute positus vel sub certa conditio-*

*ditione enunciatis agnoscatur definitum ; ratiocinando colligere licet, quod rei obviæ quoque conveniat notio in definitione definito attributa.* Si enim terminis fixus respondet significatus, invariata iisdem respondet notio (§. 129.), atque adeo agnoscere licet, num rei obviæ conveniat hoc vel illud prædicatum, sive absolute positum, sive sub certa conditione enunciatum (§. 80.), consequenter cum prædicata sive absolute posita, sive sub certa conditione enunciata ad definitum agnoscendum sufficientia vicem definitionis tucantur (§. 153.), ratiocinando inde colligimus, quod eidem conveniat definitum (§. 349.), atque inde porro inferre licet, quod eidem quoque conveniat definitio, seu notio in definitione definito attributa (§. cit.).

*plicandis definitionibus.*

Exempla in Mathesi occurrunt. Ponamus enim nos agnoscere, triangulum aliquod nobis obvium rectilineum esse æquiangulum: hinc sane concludimus, quod etiam sit æquilaterum. Unde porro inferimus, quod eidem triangulo quoque conveniat definitio trianguli æquilateri, nempe quod habeat tria latera inter se æqualia. Plura dabimus exemplum inferius.

§. 504.

Quoniam Dicto de omni & nullo omnes nituntur syllogismi (§. 353.), vi dicti autem de omni & nullo prædicata absolute, vel sub data conditione de subiecto enuncianda sub generibus ac speciebus contentis vindicantur (§. 346. & seqq.), definitiones autem ad res obvias applicantur & res obviæ ad sua genera suasque species reducuntur (§. 349.); omnis tandem nostra ratiocinatio eo tendit, ut res obviæ ad sua genera suasque species reducamus ipsisque prædicata convenientia attribuamus. Quamobrem ut hic utendum sit terminus fixis & accurata definitione explicatis (§. 499. & seqq.); *eorundem indispensabilis in ratiocinando usus apparet.*

*Vocum usus indispensabilis in ratiocinando.*

Idem quoque alia adhuc ratione evincitur, In syllogismis specialiora concludimus ex generalioribus, quemadmodum

dum ex fundamento eorum, Dicto de omni & nullo, apparet (§. 346. & seqq.), aut, si mavis, in syllogismis opus habemus propositionibus universalibus (§. 354.). Enimvero judicia universalia absque terminorum ulu formari nequeunt, quod per se patet, multo minus autem judicia determinata (§. 320.), qualibus in ratiocinando est opus (§. 333. 354. & §. 355. 352. &c.). *Terminorum adeo usus in ratiocinando indispensabilis.*

Mathematici bene ratiocinantur ob convenientem terminorum usum: in aliis disciplinis multa est in ratiocinando confusio multisque modis in formam ratiociniorum impingitur, ob rationem contrariam. Atque ea ratio est, quæ nos permovet, ut convenientem quoque terminorum usum in philosophiam introduceremus, sicque ratiocinatio accuratis in eam aditum patefaceremus.

### FINIS PARTIS PRIMÆ.





PHILOSOPHIÆ  
RATIONALIS

SIVE

LOGICÆ

PARS II.

PRACTICA.

(*Wolphi Logica*)

Ccc

LOGI-



# LOGICÆ PARS II. SIVE PRACTICA.

## SECTIO I.

### DE

# USU LOGICÆ IN VE- RO A FALSO, CERTO- QUE AB INCERTO DIJUDICANDO.

## CAPUT I.

## DE VERITATIS CRITERIO,

§. 505.



Prædicatum quodcunque, sive affirmativum, sive negativum, subiecto absolute, vel sub data conditione convenit, *propositio* dicitur *vera*; sin minus, *falsa*. Est itaque *veritas* consensus judicii nostri cum objecto, seu re repræsentata; *falsitas* vero dissensus ejusdem ab objecto. Dicitur autem hæc *veritas logica*, cum in Logica hic sit vocis significatus.

*Veritatis & falsitatis definitio nominalis.*

E. gr. *Propositio hæc triangulum habet tres angulos, vera est, propterea quod figuræ tribus lineis terminatæ conveniunt tres anguli. Falsa vero est propositio; triangulum plures quam tres habere potest angulos, cum id fieri nullo modo possit. Similiter propositio negativa,*

Ccc 2

*Quæ*

*Quadratum non habet angulum obliquum*, vera est, propterea quod prædicatum hoc negativum eidem convenit, cum omnes ejus anguli sint recti. Falsa vero est propositio negativa, *nullum triangulum habet duos angulos actu rectos*, si vox trianguli cum *Theodostio* pro quacunque figura trilatera sumitur, propterea quod triangula spherica duos angulos actu rectos habere possunt. Similiter propositio singularis, *Petrus abnegavit Christum*, vera est, quia factum istud revera contigit, & de præsentī vera est propositio singularis, *Titius scribit*, posito, quod actu scribat.

## §. 506.

*Casus judi-  
ciorum vero-  
rum.*

Quoniam propositio omnis vel universaliter affirmans, vel universaliter negans, vel particulariter affirmans, vel particulariter negans, singulari ad particularem relata (§. 259.), & in singulis subjectum vel absolute ponitur, vel certam conditionem adjectam habet (§. 216. 218.), seu sua gaudet determinatione (§. 228.); sequitur, *veram esse propositionem*, 1. Si universaliter est, quod universaliter affirmatur, 2. Si particulariter vel in casu singulari est, quod particulariter vel in casu singulari affirmatur, 3. Si absolute est, quod absolute affirmatur, 4. Si sub ista conditione est, quod sub eadem affirmatur, 5. Si universaliter esse nequit, quod universaliter negatur, 6. Si particulariter, vel singulari in casu esse nequit, quod particulariter, vel in casu singulari negatur, 7. Si absolute non est, quod absolute negatur, 8. Si sub ista conditione esse nequit, quod sub ea esse negatur (§. 505.).

Vera sunt judicia: 1. Omnis lapis est gravis, 2. Quidam lapis est calidus, 3. Virtus homini semper proficua, 4. Lapis ex alto cadens motum celerem acquirit, 5. Nullus homo est immortalis, 6. Quidam homines non sunt sinceri, 7. Nemo hominum in omnibus est sapiens, 8. Lapis frigida perfusus aqua non est calidus.

## §. 507.

*Casus judi-  
ciorum fal-  
sorum.*

Eodem modo patet, e contrario falsa esse judicia, 1. Si universaliter non est, quod universaliter affirmatur, 2. Si particulariter est, quod universaliter affirmatur, 3. Si universaliter est, quod particulariter tantum affirmatur, 4. Si absolute prorsus non est, quod absolute affirmatur, 5. Si sub certa conditione est, quod de

de subiecto absolute posito affirmatur, 6. Si universaliter est, quod universaliter negatur, 7. Si particulariter est, quod universaliter negatur, 8. Si particulariter vel in casu singulari est, quod particulariter vel in casu singulari negatur, de eodem scilicet subiecto. 9. Si absolute est, quod absolute negatur, 10. Si sub certa conditione est, quod de subiecto absolute posito negatur, 11. Si sub ista conditione est, quod sub ea esse negatur.

E. gr. Falsa sunt judicia, 1. *Omnis homo habet facultates ad omne vitium vitandum sufficientes*, cum nemo hominum gaudeat istis facultatibus, 2. *Omnes homines sunt sinceri*, cum quidam tantum sinceritate animi utantur, 3. *Quadam tantum vitia nocent*, cum vitia omnia noceant, 4. *Sol movetur motu annuo*, cum omni motu annuo destituatur, 5. *Omnis lapis est calidus*, cum calidus tantum sit is, qui calori diu fuit expositus, 6. *Nullus homo ullam veritatem cognoscere potest*, cum omnis homo plures cognoscat, 7. *Nullus homo est a partium studio alienus*, posito quod quidam homines sint a partium studio alieni, 9. *Folia nil conferunt ad incrementum arboris*, cum folia serviant incremento arboris, 10. *Nulla ellipsis alteri similis est*, cum nulla alteri similis sit, cujus axes non sunt axibus suis proportionales, 11. *Figura aequilatera circulo inscripta non habet semper omnes angulos inter se aequales*, cum necessario ejus anguli æquales esse debeant. Casus judiciorum verorum atque falsorum non sine ratione enumeramus: sapissime enim accidit, ut ad eos non attendentes judicium de veritate atque falsitate judiciorum præcipitent.

## §. 508.

Ipsa hac casuum judiciorum cum verorum, tum falsorum enumeratione innotescit, quandonam *judicium cum obiecto consentire*, quando *ab eodem dissentire* dicatur, ut adeo nullus definitionem (§. 505.) ingrediatur terminus, qui non satis intelligatur.

*Consensus  
judicii cum  
obъекto &  
ejus ab eo  
dissensus*

Nimirum ad huncce consensum atque dissensum æstimandum non modo qualitatis propositionum habenda est ratio, ne affirmetur, quod erat negandum, & e contrario negetur, quod erat affirmandum; verum etiam imprimis quantitatis propositionum atque determinationis subiecti, ne plus affirmetur, vel negetur, quam affirmari vel negari debebat. Exemplis modo allatis (not. §. 506. 507.) dicta sunt clariora.

§. 509.

*Quando uni-  
versaliter  
affirmans  
propositio  
vera.*

*Propositio universaliter affirmans vera est, si prædicatum per subjectum ejusque determinationem determinatur.* Quicquid enim de subjecto prædicatur, id de eodem prædicatur vel absolute, vel sub adjuncta conditione, consequenter vi determinationis (§. 228.). Enimvero quod de subjecto universaliter absolute prædicatur, illud vel attributum est, vel essentialia, vel modi cujusdam atque relationis possibilitas, quæ per modum attributi inest (§. 257.). Quamobrem eum essentialia & attributa, quæque per modum attributorum insunt, per se mutuo determinentur (§. 65. 157.), quæ vero de subjecto absolute posito enunciantur, sub conditione definitionis subjecto tribuantur (§. 225.), adeoque vel essentialium, vel attributorum, vel eorum, quæ per modum attributi insunt (§. 180. 181. 182.), pro definitionum scilicet diversitate; quod de subjecto absolute posito universaliter prædicatur, per subjectum aut, si mavis, subjecti notionem determinatur.

Porro quod de subjecto sub data determinatione universaliter prædicatur, id vel modus est, vel relatio quædam ad alia, vel quidpiam, quod in subjecto non concipitur possibile, nisi præsupposito quodam ejus modo (§. 258.). Quamobrem cum modi, relationes & quæ instar modorum insunt de subjecto non nisi conditionate enunciantur (§. 217.), consequenter ob adjunctam conditionem eidem tribuantur; per conditionem istam (§. 219.), consequenter subjecti determinationem (§. 228.), determinantur.

E. gr. *Propositio universaliter affirmans, omne triangulum habet tres angulos, vera est:* Quoniam enim vi definitionis *triangulum est figura tribus lineis terminata*, categorica huic hypothetica æquivalet: *Si triangulum est figura tribus lateribus terminata, tres habet angulos* (§. 226.), numerus ternarius angulorum per numerum ternarium laterum determinatur. Similiter *propositio universaliter affirmans vera est; Omnis figura æquilatera circulo inscripta est æquiangula:* per hanc enim conditionem, quod ea circulo sit inscripta, determinatur æqualitas angulorum. Pertinent huc exempla ad §. 225. 226. allata.

§. 510.

§. 510.

*Propositio particulariter affirmans vera est, quæ sub universaliter affirmante vera continetur & contra.*

*Quando propositio particulariter affirmans vera*

Propositionem particulariter affirmantem veram esse debere, quæ sub universaliter affirmante vera continetur, patet per dictum de omni (§. 346.).

Enimvero quoniam nullum prædicatum subjecto convenire potest, nisi adfit ratio determinans, cur insit (§. 4. *Disc. præl.*); illa autem ratio vel in subjecto, adeoque in essentialibus, aut attributis, aut modo, aut quod per modum attributorum vel modi instar inest (§. 63. & seqq. §. 157.), vel extra subjectum, consequenter in conditione quadam extrinseca contineri debet; evidens omnino est, ubi propositio particulariter affirmans fuerit vera, eam contineri sub universaliter affirmante vera (§. 509.).

E. gr. *Propositio particulariter affirmans, quoddam triangulum habet tres angulos, vera est, quia continetur sub universaliter affirmante vera, omne triangulum habet tres angulos.* Similiter propositio particulariter affirmans vera, *quidam lapis est calidus*, continetur sub universaliter affirmante vera, *omnis lapis per aliquod temporis spatium calori expositus est calidus*. Facile hæc perspicit, qui ex superioribus didicit, omnem propositionem particularem evadere universalem, si subjectum sufficienter determinetur (§. 228. 249. & seqq.).

§. 511

*Propositio singularis vera est, quando prædicatum determinatur per ea, quæ notioni individui in dato statu spectari insunt.*

*Quando propositio singularis vera:*

Etenim cum nullum prædicatum subjecto tribui possit, nisi adfit quædam ratio, cur eidem insit, quod eo denotatur (§. 4. *Disc. prælim*); si quod individuo, quod propositionis singularis subjectum est (§. 241.), tribuitur, ratio quoque adesse debet, cur eidem insit, quod prædicato denotatur. Enimvero ratio ista vel est in subjecto, vel in extrinsecis, quæ eidem ad sunt, vel in utroque simul. Quamobrem cum notio, qua individuum in statu dato repræsentatur (§. 74.), omnia eidem intrinseca statumque ejus determinantia extrinseca continere debeat; patet prædicatum per ea determinari, quæ notioni indi-

individui in dato statu spectati insunt. Vera igitur cum sit propositio, si, quod prædicato subiecto attributo indigitatur, eidem insit (§. 505.); propositio singularis vera est, ubi prædicatum determinatur per ea, quæ in notione individui in dato statu spectati insunt.

E. gr. Propositio singularis, *Titius scribit*, vera est, si in iis, per quæ status ejus singularis determinatur, continentur rationes ad actum scribendi determinandum sufficientes. Illæ determinationes subiecti vulgo non attenduntur. Quodsi vero cuidam volupe fuerit ad actiones suas animum asserre attentum & accurato examine facto statum determinare suum, in quo actio ipsi competit, is veritatem dictorum abunde perspiciet, nec mirabitur amplius propositiones singulares determinatas (§. 320.). Enimvero cum propositiones determinatæ hætenus fere Mathematicis solis propriæ fuerint ceteris in incerto cognitionis pelago huc illucque latis ob vagos terminos propositionesque vagas; mirum videri non debet, quod propositio determinata singularis inauditi speciem præ se ferat. Patebit tamen inferius maxima utilitas illius studii, quod in formandis propositionibus singularibus determinatis ponitur, ubi propositiones singulares ad universales revocare docebimus. Desperant homines laboris improbi impatientes de eo, quod non statim in potestate est, atque negligunt, quæ ex profundo eruta maximam utilitatem spondent.

§. 512.

*Propositio-  
nis negativæ  
vera conse-  
quens.*

*Si propositio negativa vera est, ei opposita affirmativa falsa est.* In propositione negativa significamus, prædicatum non convenire subiecto, quod opposita affirmativa eidem tribuendum (§. 288.). Quodsi ergo propositio negativa vera esse debet, necesse est, ut ejus opposita sit falsa (§. 505.).

E. gr. Quia propositio negativa, *triangulum non habet quatuor angulos*, vera est, ei opposita affirmativa, *triangulum habet quatuor angulos* falsa est; qui enim ait, *A non esse B*, is falsum esse pronunciat, quod A sit B. Unde liquet, propositionibus negativis propriè loquendo non convenire veritatem, neque adeo earum habendam esse rationem, ubi veritas accurata definitione determinanda.

§. 513.

*Veritatis lo-  
gica definitio  
realis.*

*Veritas est determinabilitas prædicati per notionem subiecti.* Propositio universaliter affirmans vera est, quando prædicatum per



per notionem subjecti sive absolute positi, sive certo modo determinati determinari potest (§. 509.). Propositio particulariter affirmans vera est, quando sub universaliter vera continetur (§. 510.), adeoque denuo quando prædicatum per notionem subjecti determinabile (§. 509.). Propositio denique singularis vera est, quando prædicatum determinatur per ea, quæ notioni individui in dato casu spectati insunt (§. 511.). In omni igitur propositione affirmante vera veritas est determinabilitas prædicati per notionem subjecti, consequenter cum propositiones negativæ censeantur veræ, quando ipsis oppositæ affirmativæ sunt falsæ (§. 512.); veritatis definitionem realem habes, si eam concipis per determinabilitatem prædicati per notionem subjecti (§. 194.).

Exempla ad illustrandas propositiones præcedentes (not. §. 509, 510, 511.) in medium allata definitionem præsentem illustrent.

## §. 514.

*Propositio affirmativa falsa est, si prædicatum notioni subjecti repugnat.* In iudicio determinato subjectum repræsentatur sub ea notione, ut in eadem contineatur ratio, cur prædicatum ipsi conveniat (§. 320.), adeoque eam ingrediuntur non modo essentialia, attributa & quæ per modum attributorum insunt (§. 220. 221. 222.), verum etiam modi aliaque extrinsecæ (§. 229.). Quodsi propositio affirmativa fuerit falsa, prædicatum subjecto convenire nequit (§. 505.), adeoque cum essentialibus, vel attributis, vel iis, quæ per modum attributorum insunt, vel cum modis in dato casu inexistentibus, vel stantibus determinationibus extrinsecis inesse nequit, consequenter notioni subjecti repugnat (§. 310.).

*Quando affirmativa propositio falsa.*

E.gr. Propositio affirmativa falsa est, *triangulum habet quatuor angulos.* Quoniam enim nomine *trianguli* denotatur figura tribus lateribus terminata, fieri non potest, ut eidem figuræ conveniat numerus ternarius laterum & numerus quaternarius angulorum, sicque prædicatum notioni subjecti repugnat. Similiter propositio affirmativa falsa est, *lapis ex alto delapsus tarde movetur*, propterea quod motus tardus repugnat lapsui ex alto; eum motus gravium cadentium continuo acceleretur.

(Wolffii Logica)

Dd d

§. 515.

## §. 515.

*Quando negativa propositio vera.*

Propositione negativa significamus, quod prædicatum sub-  
jecto convenire nequeat, salvis iis, quæ notione subjecti conti-  
nentur (§. 205.), adeoque in ea prædicatum notioni subjecti re-  
pugnat (§. 310.). Quamobrem evidenter patet, *propositionem*  
*affirmativam falsam constituere negativam veram* (§. 514.).

E. gr. Falsæ sunt propositiones affirmativæ, *triangulum habet*  
*quatuor angulos, & lapis ex alto delapsus tarde movetur.* Veræ au-  
tem sunt negativæ: *triangulum non habet quatuor angulos & lapis ex*  
*alto delapsus tarde non movetur.*

## §. 516.

*Quando veri-  
tas propo-  
sitionis agno-  
scitur.*

Quoniam veritas propositionis est prædicati per notionem  
subjecti determinabilitas (§. 513.); *veritatem propositionis agno-*  
*scit, qui perspicit, quomodo prædicatum per ea, quæ in notione*  
*subjecti continentur, determinetur.*

E. gr. Veritatem propositionis, *in omni triangulo rectilineo tres angu-*  
*li simul sumti sunt æquales duobus rectis*, agnoscit, qui perspicit, quomodo  
per tres lineas rectis spatium determinantes quantitas summæ angulo-  
rum determinetur, aut minimum quod per eas determinetur, ita ut ideo  
tres anguli simul sumti duobus rectis æquales esse debeant, quia linear  
spatium terminantes sunt rectæ eædemque numero tres (§. 219.).

## §. 517.

*Qui verita-  
tem propo-  
sitionis non  
agnoscant.*

*Qui subjecto aliquid convenire observat, veritatem propo-*  
*sitionis non agnoscit, est constet, propositionem esse veram.* Qui  
enim subjecto aliquid convenire observat, is quidem agnoscit,  
prædicatum convenire subjecto; sed non novit, quænam sint in  
notione subjecti contenta, per quæ prædicatum determinatur.  
Cum adeo determinabilitatem prædicati per notionem subjecti  
non perspiciat; veritatem propositionis non agnoscit (§. 513.).

Enimvero quoniam nihil subjecto convenire potest, nisi ad sit  
ratio cur conveniat (§. 4. *Disc. præl.*); evidens est, adesse debere  
rationem, cur id quoque ei conveniat, quod eidem convenire  
observamus. Ratio cum contineri debeat vel in definitione sub-  
jecti, vel in determinatione ejus (§. 225. 228.); utraque autem ad

notio-

notionem subjecti referatur (§. 320.); non minus evidens est, in notione subjecti contineri debere, ob quæ etiam prædicatum vi observationis eidem conveniens convenire debet, consequenter in notione subjecti contineri debere, per quæ prædicatum determinatur (§. 219.). Esti adeo veritas propositionis distincte non agnoscatur, *vi parvis primæ propositionis præsens*; constat tamen esse eam veram (§. 513.).

Nimirum agnoscimus quidem, inesse propositioni veritatem, ipsam autem veritatem, quæ latet, non perspicimus. E. gr. *Nivem esse albam* observamus. Constat igitur, in notione nivis contineri debere, per quæ albedo determinatur, ita ut iis positis ponatur etiam albedo nivis, consequenter dubium non est, propositionem hanc esse veram: *nix est alba*. Atat cum ignoremus, quænam sint ea, per quæ albedo nivis determinatur, ipsam veritatem propositionis non perspicimus. Quodsi vero Physicus ex notione nivis palam facere possit, cur sit potius alba, quam non; is veritatem demum propositionis agnoscit. Rationemur notioni veritatis antea stabilitæ (§. 513.) convenienter, nec quicquam moramur præjudicatas opiniones, quibus stantibus assertum videtur paradoxum. Neque vero in numerum subtilitatum steriliū referri debent, quæ hic stabiliuntur. Apparebit usus non contemnendus paulo inferius, ubi de veritate a posteriori eruenda erimus solliciti.

## §. 518.

*Impossibile* dicimus, quod contradictionem involvit; *Possibile*, quod contradictionem non involvit.

E. gr. *Biangulum rectilineum*, figura duabus lineis rectis terminata, impossibile est, cum ex notione rectæ sequatur contrarium, duas lineas rectas scilicet spatium comprehendere non posse. *Triangulum vero rectilineum*, figura tribus lineis rectis terminata, possibile est, quia notioni lineæ rectæ non repugnat, ut earum tres spatium comprehendant.

## §. 519.

Hinc consequitur, *notionem esse impossibilem, in qua conjunguntur, quæ sibi mutuo repugnant*; contra vero *possibilem*, *in qua conjunguntur, quæ una inesse possunt eidem subjecto, vel quæ sibi mutuo non repugnant*. Etenim si sibi mutuo repugnant, quæ in notione aliqua conjunguntur, ea eidem subjecto una inesse nequeunt (§. 310.). Nempe si A repugnat ipsi B, A

& B una ipsi C inesse nequeunt. Quamobrem si ponamus, inesse A, B non inest. Cum vero porro ponimus, etiam B inesse; propositiones B inest ipsi C & B non inest ipsi C sunt contradictoriae (§. 288.), adeoque notio ipsius C, in qua conjunguntur, quæ sibi mutuo repugnant, A & B, contradictionem involvit, consequenter impossibilis est (§. 518.).

Eodem modo patet, si in notione conjunguntur, quæ sibi mutuo non repugnant, eam esse a contradictione liberam, consequenter possibilem (§. 518.).

Exempla *Bianguli* & *Trianguli* rectilinei modo (not. §. 518.) alata propositionem præsentem illustrent.

## §. 520.

*Notio respondens judicio affirmativo vero.*

*Propositioni affirmativæ veræ notio possibilis respondet.* Enim si judicium fuerit verum, prædicatum determinatur per notionem subjecti (§. 509. & seqq.), adeoque quod prædicato indigitatur, ideo subjecto convenit, quia cetera conveniunt, quæ in notione subjecti continentur (§. 200. 219.), consequenter in notione complexa, quæ judicio affirmativo vero respondet (§. 39.), non continentur, quæ sibi mutuo repugnant (§. 310.). Notio igitur judicio affirmativo vero respondens possibilis (§. 519.).

## §. 521.

*Notio respondens judicio negativo.*

*Propositioni negativæ veræ notio impossibilis respondet.* Propositio negativa vera est, cui opposita affirmativa falsa (§. 515.). Sed si propositio affirmativa falsa, prædicatum notioni subjecti repugnat (§. 514.). Notione igitur, quæ respondere deberet propositioni negativæ veræ, contineri deberet, quæ sibi mutuo repugnant, consequenter notio ista impossibilis (§. 519.).

## §. 522.

*Conceptibilis & inconceptibilis definitio.*

*Conceptibile* dicitur, cujus formari potest notio; *Inconceptibile*, cujus nulla formari potest notio.

E. gr. *Triangulum rectilineum* est conceptibile, quia ejus formari potest notio, seu menti tanquam præsens representari (§. 34.). *Biangulum vero*

vero *rectilineum* est inconceptibile, quia ejus notio nulla formari potest, qua menti tanquam præsens exhiberetur. Cavendum vero, ne pro inconceptibili habeamus, cujus nos notionem nullam formare possumus. Potest enim aliquid esse conceptibile, etsi in nostra potestate non sit ejus formare notionem.

§. 523.

*Criterium veritatis* est propositioni intrinsecum, unde agnoscitur, eam esse veram, consequenter offert notas ad veritatem in casu quolibet dato agnoscendam, adeoque veram propositionem a falsa discernendam sufficientes, estque notio veritatis distincta. (§. 88).

*Criterii veritatis definitio.*

§. 524.

*Veritatis criterium* est determinabilitas prædicati per notionem subjecti. Determinabilitas prædicati per notionem subjecti absolvit definitionem veritatis realem (§. 513.). Cum igitur ad veritatem agnoscendam in dato quolibet casu sufficiat (§. 197.), veritatis criterium est (§. 523.).

*Quodnam sit criterium veritatis.*

E. gr. *Propositio, triangulum habet tres angulos*, vera intelligitur, quam primum intelligitur, per numerum ternarium linearum ad spatium terminandum concurrentium, qui notione subjecti continetur, una determinari numerum ternarium angulorum, ita ut positus tribus lineis ad spatium terminandum concurrentibus ponantur quoque tres anguli. Nimirum usus hujus criterii pendet a dicto de omni & nullo ad definitiones extenso (§. 349.). Ita nimirum argumentamur criterium veritatis ad usum translaturi: *Cujuscunque propositionis prædicatum per notionem subjecti determinatur, illa propositio est vera.* Sed hujus propositionis prædicatum per notionem subjecti determinatur. Ergo haec propositio vera est.

§. 525.

Per *Criterium falsitatis* intelligimus propositioni intrinsecum, unde agnoscitur, eam esse falsam.

*Criterii falsitatis definitio nominata.*

*Criterium & nota* synonyma sunt (§. 330.). Quamobrem notæ definitio generalis supra (§. 79.) tradita ad hunc casum specialem applicanda, ubi definitio criterii falsitatis desideratur. Eadem tenenda sunt de definitione criterii veritatis paulo ante (§. 523.) allata.

§. 526.

*Falsitatis criterium* consistit in eo, quod prædicatum notioni subjecti repugnet. Cum enim propositio falsa sit, in qua præ-

*Quodnam sit criterium falsitatis.*

dicatum subjecto repugnat (§. 514.); ex ista repugnantia falsitas propositionis agnoscitur. Est igitur ea falsitatis criterium (§. 525.).

E.g.r. *Propositio, Triangulum habet quatuor angulos, falsa inde cognoscitur, quod notioni trianguli, qua tanquam spatium tribus lineis terminatum representatur, repugnat numerus angulorum ternarius. Nam ex notione trianguli sequitur, quod tres habeat angulos: fieri autem non potest, ut simul tres & quatuor habeat angulos. Repugnat enim notioni subjecti, quod contrariatur ei, quod per subjectum determinatur, cum contraria simul inesse nequeant (§. 310.). Nititur criterium falsitatis dicto de nullo ad definitionem extenso (§. 349.): redit enim ad hunc syllogismum generalem: Cujuscunque propositionis prædicatum notioni subjecti repugnat, illa est falsa. Sed hujus propositionis prædicatum subjecto repugnat. Ergo hæc propositio est falsa.*

§. 527.

*Criterium  
veritatis  
propositionis  
negativæ.*

*Criterium veritatis propositionis negativæ consistit in eo, quod prædicatum notioni subjecti repugnat.* Quoniam propositio negativæ vera est, cui opposita affirmativa falsa (§. 515.), eo ipso agnoscitur, propositionem negativam esse veram, quo constat, ei oppositam affirmativam esse falsam. Falsitatis adeo & veritatis propositionis negativæ criterium idem est (§. 525.), consequenter criterium veritatis propositionis negativæ in eo consistit, quod prædicatum notioni subjecti repugnet (§. 526.).

E. gr. *Propositio negativæ, Triangulum non habet quatuor angulos, vera esse intelligitur, quod numerus angulorum quaternarius notioni trianguli repugnet, adeoque exinde, quod falsa sit propositio affirmativa, Triangulum habet quatuor angulos.*

§. 528.

*Quenam  
propositiones  
conceptibiles,  
quanam in-  
conceptibiles.*

*Propositio vera est, quæ est conceptibilis; falsa vero, quæ inconceptibilis.* Propositioni veræ notio possibilis respondet (§. 520.). Quare cum conceptibilis sit propositio, si notio possibilis eidem respondet (§. 522.); propositio vera esse debet, quæ conceptibilis.

E contrario iudicio negativo, consequenter propositioni affirmativæ falsæ (§. 515.), notio impossibilis respondet (§. 521.). Quamobrem cum inconceptibilis sit propositio, cui notio impossibilis respondet (§. 522.); propositio falsa esse debet, quæ inconceptibilis.

E. gr. *Vera est propositio, Triangulum habet tres angulos; sed eadem conceptibilis est (§. 522.). Falsa est propositio, Triangulum ha-*

*bet*

bet quatuor angulos; sed eadem inconceptibilis est. Ceterum cum omnis propositio vera sit conceptibilis, falsa vero inconceptibilis; Dn. de Tschirnhausen in Medicina Mentis part. 2. Sect. 1. p. m. 34. & seqq. criterium veritatis in eo posuit, quod verum sit, quicquid concipi; falsum vero, quod non concipi potest. Quoniam vero nullam conceptibilitatis & inconceptibilitatis definitionem dare potuit, sed in exemplis acquievit, quibus probatur, quædam posse concipi; utriusque notionem habuit nonnisi confusam, nequaquam vero distinctam (§. 88. 152.), atque adeo in applicando criterio facile aberratur. Quoniam enim ita argumentandum: *Quicquid concipi potest, illud est verum. Sed hoc concipi potest. Ergo hoc est verum, & quicquid non concipi potest, illud est falsum.* Sed hoc concipi non potest. Ergo hoc est falsum: Omnis sane cardo rei in casu speciali, vel singulari in eo vertitur, ut probetur: *Hoc posse concipi; illud vero non posse concipi.* Enimvero cum nullam dederis definitionem, in qua notæ, adeoque propositioni intrinseca (§. 79.), recensentur ad id agnoscendum sufficientes, num propositio in dato casu concipi, an vero concipi nequeat; applicatio criterii vi dicti de omni & nullo ad definitionem extensi (§. 349.) vacillat. Equidem p. 45. & seqq. confugit ad principium, quod definitionibus desideratis substituat: sed tale non est, quod locum definitionis tueri commode possit. Ait enim p. 46. inde patere, quod aliquid concipiamus, si solis verbis in alterius mente, qui id ignorat, eandem ac æque perfectam, ac ipsi ea de re habemus, notitiam excitare valeamus; in casu opposito nos eam saltem imaginari. Qui notionem habet distinctam novitque notarum terminos, is eos alteri enumerare valet (§. 89.), non tamen contra notionem distinctam destituitur, qui eas enumerare non valet (§. 90.). Unde apparet ex criterio Tschirnhusiano id utique liquere, quod ejus rei, cujus notitiam solis verbis cum altero communicare valeamus, notionem distinctam habeamus terminosque notarum eam ingredientium noverimus; nondum tamen liquet, quod in casu opposito eadem destituamur. Et quoniam dantur idæe deceptrices verbis cum altero communicabiles, ut alter perinde ac nos sibi videatur ideam rei habere, cujus nullam habet (§. 135. 136. 137.); criterium Tschirnhusianum sæpissime fallit. Accedit quod nec nostras idæas cum altero communicare solis verbis valeamus, nisi quis eandem prorsus notionem cum singulis jungat (§. 116.), ita ut & terminos habere debeat perspectos, quibus nos utimur, nosseque notiones, quæ iis sunt jungendæ (§. 118.). Quoniam vero sæpissime accidit contrarium videtur quoque nobis alter mentem nostram assequi, cum tamen ab ea sit

fit maxime alienus. Omitto alia, quæ contra istud criterium in medium afferri poterant. Id tantum addo, si illius aliquis esse debeat usus, id revocandum esse ad nostrum. Intelligimus nempe iudicio nostro respondere notionem complexam possibilem, si ostendere valemus, & notionem subiecti esse a contradictione liberam, & prædicatum per eam determinari. Ita Geometra constructione trianguli æquilateri docet, non repugnare, ut tres lineæ rectæ æquales ad spatium terminandum concurrant, consequenter notionem trianguli æquilateri esse possibilem, & deinde demonstrat, stante æqualitate laterum tres trianguli angulos debere esse inter se æquales, atque ita ipsi innotescit propositionis huius veritas: *Triangulum æquilaterum est æquiangulum*. Ceterum ex dictis simul liquet, quod *Cartesius*, dum Criterium veritatis claram & distinctam perceptionem constituit, non aliud sibi velit, quam quod notio complexa iudicio vero respondens sit possibilis. Quoniam tamen non docuit, unde possibilitas ista innotescat; insufficientia tradidit, nec notiones deceptrices exclusit. Nos igitur defectum supplemus, reducendo possibilitatem ideæ simplicis ad id, quod sit a contradictione libera, complexam vero, qualis iudicio semper respondet, ad hoc, quod prædicatum per notionem subiecti determinetur. Quomodo autem innotescat, abesse in casu priori contradictionem, adesse in posteriori determinabilitatem prædicati per notionem subiecti, mox docebimus disertius.

§. 529.

*Cur propositiones contrariæ non possint esse simul veræ.*

*Dixi propositiones contrariæ non possunt esse simul veræ.* Earum enim una universaliter affirmatur, quod in altera universaliter negatur (§. 297.). Quodsi propositio universaliter affirmans fuerit vera, prædicatum per subiectum ejusque determinationem determinari debet (§. 509.), adeoque eidem stante notatione ac determinatione subiecti convenit (§. 219.), consequenter eidem non repugnat (§. 310.). Quodsi propositio universaliter negans fuerit vera, prædicatum subiecto ejusque determinationi repugnat (§. 527.). Quare cum fieri non possit, ut idem prædicatum eidem subiecto sub eadem determinatione una conveniat & non conveniat, immo repugnet; fieri quoque non potest, ut duæ propositiones contrariæ sint simul veræ.

E. gr. Propositiones contrariæ sunt, *omne triangulum habet tres angulos & nullum triangulum habet tres angulos*. Fieri autem non potest, utraque earum simul vera sit.

§. 530.



## §. 530.

*Quodsi ergo constet, propositionum contrariarum unam esse Contraria-veram, eo ipso patet, alteram esse falsam: Quod uno in casu jam rum falsitas supra ostendimus (§. 512.). unde innote-*

E. gr. Vera est propositio, *omne triangulum habet duos angulos*: contraria igitur, *nullum triangulum habet tres angulos*, falsa est. Similiter vera est propositio, *nullum quadratum habet angulum obliquum*; falsa igitur contraria, *omne quadratum habet angulum obliquum*.

## §. 531.

*Si de subjecto absolute prædicatur, quod eidem nonnisi sub adi-* Contraria  
*cienda conditione convenit, duæ propositiones contrariæ simul falsæ quando simul*  
*sunt.* Si enim sub certa nonnisi conditione est, quod de subjecto falsæ.

absolute posito affirmatur, propositio falsa est (§. 507.). Atque adeo patet in præsentī hypothēsi propositionem universaliter affirmantem esse falsam. Enimvero quoniam prædicatur, quod subjecto absolute tribuitur, sub data quadam conditione eidem convenit, propositione tamen contrariarum negativa absolute negatur, *per hypoth.* falsa autem propositio est, qua de subjecto absolute posito negatur, quod sub certa conditione est (§. 507.); non minus liquet, propositionum contrariarum negativam quoque in hypothēsi præsentī esse falsam. Utraque igitur propositio contrariarum falsa est, si de subjecto absolute posito prædicatur, quod eidem nonnisi sub data conditione convenit.

E. gr. Duæ propositiones contrariæ, *omnis lapis est calidus & nullus lapis est calidus*, sunt simul falsæ, calor enim absolute nec affirmari, nec negari potest de lapide, qui eidem non convenit, nisi quando per sufficiens temporis spatium calori v. gr. Solis fuit expositus. Similiter propositiones contrariæ, *omne triangulum est circulo inscriptum & nullum triangulum est circulo inscriptum*, ambæ falsæ sunt, cum a Geometræ arbitrio pendeat, utrum triangulum circulo inscribere velit, nec ne, nam per notionem trianguli saltem determinatur inscriptibilitas.

## §. 532.

*Propositionum contradictoriarum altera necessario vera; al-* Cur una con-  
*tera necessario falsa.* Propositiones contradictoriæ vel sunt sin- tradictoria-  
gulares (§. 307.), vel indefinitæ determinatæ (§. 308. 309. 320.), rum necessa-  
vel altera earum universalis, altera particularis est (§. 294. 295.). rio vera; al-  
(*Wolffii Logica.*) Eec Jam tera falsa.

Jam in casu singulari omnes contradictoriæ continentur sub his formulis generalibus, *hoc A est B & hoc A non est B*, cum idem de eodem individuo eodem tempore vel sub eadem determinatione una affirmetur atque negetur (§. 288. & seqq.). Patet autem per se, eidem subjecto A idem prædicatum B vel convenire, vel non convenire, consequenter unam contradictoriarum esse veram, alteram falsam (§. 505.).

Si contradictoriæ fuerint propositiones indefinitæ determinatæ, genera & species sive absolute posita, sive sub certa determinatione, spectantur ut individua (§. 308. 309. 320. 74.), atque adeo propositiones ipsæ hoc respectu æquipollent singularibus (§. 241.). Enimvero si propositiones contradictoriæ fuerint singulares, una earum necessario vera, altera falsa, *per casum primum*. Ergo etiam si propositiones indefinitæ determinatæ fuerint contradictoriæ, altera earum necessario vera est, altera falsa.

Potest idem in hoc secundo casu alia adhuc ratione ostendi. Si propositiones fuerint determinatæ, subjectum sub ea notione repræsentatur, per quam prædicatum determinatur (§. 320.). Enimvero propositio universaliter affirmans vera est, si prædicatum per notionem subjecti determinatur (§. 509.), consequenter cum idem simul esse & non esse nequeat, negativa eidem opposita falsa esse debet (§. 505.). Quod si ergo propositiones indefinitæ ponantur, non minus patet; in hoc casu affirmativam adhuc esse debere necessario veram, negativam necessario falsam. Quod si per notionem subjecti in propositione determinata determinatur prædicatum negativum, in eadem continetur ratio, cur subjecto convenire nequeat, adeoque negativa necessario vera est (§. 506.), consequenter affirmativa vera esse nequit (§. 512.).

Quod si denique altera contradictoriarum fuerit universalis, altera particularis; aut una earum itidem necessario vera est, altera vero falsa, aut non. Ponamus posterius. Cum in uno casu propositiones contradictoriæ contineantur sub hisce generalibus, *omne A est B & quoddam A non est B* (§. 294.); fieri poterit, ut  
fal-

falsum sit, & omne *A* esse *B*, & quoddam *A* non esse *B*, aut utraque sit vera, scilicet, ut & omne *A* sit *B*, & quoddam *A* non sit *B*. Si falsum sit, omne *A* esse *B*, dari poterit aliquod *A*, quod non sit *B*, aut nullum prorsus *A* erit *B* (§. 507.). In utroque igitur casu verum est, quoddam *A* non esse *B* (§. 347.). Et si falsum sit, quoddam *A* non esse *B*, impossibile est ut detur aliquod *A*, quod non sit *B* (§. 507.), adeoque quodcunque sive omne *A* esse debet *B*. Quamobrem duæ contradictoriæ in præsentī casu non possunt esse simul falsæ. Quodsi omne *A* est *B*, vi Dicti de omni fieri nequit, ut detur aliquod *A*, quod non sit *B* (§. 346.), adeoque verum esse nequit, quoddam *A* non esse *B* (§. 505.), consequenter duæ contradictoriæ in præsentī casu non possunt esse simul veræ. Quoniam igitur nec simul veræ, nec simul falsæ esse possunt; una earum necessario vera, altera falsa est. Idem eodem modo ostenditur in casu altero, ubi contradictoriæ sunt, nullum *A* est *B* & quoddam *A* est *B*. Constat igitur in omni casu propositionis præsentis veritas.

E. gr. In casu singulari aut verum est, *Petrum scribere*, aut falsum, hoc est, *Petrus aut scribit, aut non scribit*. In casu indefinito, *Triangulum aut habet tres angulos, aut non habet tres angulos*, numerus enim angulorum per laterum numerum determinatur. Denique in casu contradictionis inter universalem & particularem intercedentis aut omne quadratum habet quatuor angulos, aut quoddam quadratum non habet quatuor angulos. Item: Aut omnis lapis ex data altitudine cadens impetum ingentem acquirit, aut quidam lapis ex eadem altitudine cadens impetum ingentem non acquirit.

## §. 533.

In propositione vera sive affirmativa, sive negativa, notio sub- Notio subjecti  
in propositionibus  
veris  
cur possibilis  
jecti possibilis esse debet. Si enim notio subjecti sit impossibilis, nec propositioni veræ affirmativæ notio possibilis respondere potest: Quod superius demonstratis (§. 520.) repugnat.

Quodsi notio subjecti fuerit impossibilis, talia eam ingrediuntur, quæ una esse nequeunt (§. 519.), adeoque non datur istiusmodi ens, cui notio talis respondeat, consequenter iudicium de eo nullum est, seu fieri non potest, ut eidem, quod non est, ali-

quid vel conveniat, vel repugnet. In propositione igitur cum negativa, tum affirmativa notio subiecti possibilis esse debet.

E.gr. Notio trianguli, seu figuræ tribus lateribus terminatæ, possibilis est: neque enim repugnat, ut tres lineæ ad spatium comprehendendum concurrant. Hinc vera formantur de triangulo iudicia cum affirmativa, tum negativa, v. gr. *Triangulum habet tres angulos, triangulum non habet quatuor angulos &c.* Contra notio bianguli rectilinei impossibilis est, cum repugnet, ut duæ lineæ rectæ spatium comprehendant. Enunciationes igitur nullæ sunt, *biangulum rectilineum habet duos angulos, biangulum rectilineum non habet tres angulos &c.* etsi prior speciem propositionis affirmativæ veræ mentiatur, cum admissa notione deceptrice bianguli rectilinei sequatur numerus angulorum binarius; posterior vero speciem propositionis negativæ veræ tueatur, quoniam numerus ternarius angulorum notioni bianguli repugnat.

§. 534.

*Quando propositio hypotheticæ veræ.*

Quoniam in propositione determinata notio subiecti continet rationem, cur prædicatum ei tribuitur (§. 320.), in categorica autem propositione prædicatum subiecto tribuitur sub conditione definitionis (§. 225.), in hypothetica sub conditione adjecta (§. 218.); *Propositio non nisi hypotheticæ veræ est, quamdiu non constat, num in categorica definitio, in hypothetica conditio adjecta possibilis.* Nimirum *veræ est propositio categorica, si definitio subiecti possibilis; veræ est hypothetica, si conditio adjecta possibilis.*

E.gr. Si Deus cum *Cartesio* definitur per ens perfectissimum, propositiones *Deus est omniscius, Deus est omnipotens, Deus est summe bonus*, tamdiu hypotheticæ veræ intelliguntur, quamdiu non probatur ens perfectissimum esse possibile: Quod jam *D. Thomas* olim observavit. Æquipollentes enim propositiones categoricæ huic hypotheticæ compositæ: *Si Deus est ens perfectissimum, omniscius, omnipotens: summe bonus est.* Constat autem consequens non poni nisi posito antecedente (§. 407.). Quamdiu igitur non constat, antecedens poni posse, v. gr. *Esse ens perfectissimum possibile*, tamdiu quoque ignoratur, poni posse consequens, nempe *enti alicui convenire omniscientiam, omnipotentiam, summam bonitatem.* Si quis alia Dei notione utatur, per se pater, non amplius locum habere, quæ respectu perfectionis summæ monentur. Ceterum jam intelligitur canon Scholasticorum de propositionibus hypotheticis: *Conditionalis nihil ponit*, qui nostra reductione propositionum categoricarum ad hypotheticas (§. 226.) multo latior factus.

## §. 535.

*Si quæ in eodem subjecto u. u. observamus, ea sibi mutuo non repugnant.* Ponamus enim, ea sibi mutuo repugnare, fieri itaque non poterit, ut eadem una insint (§. 310.): id quod hypothesein evertit, adeoque absurdum.

*Quo sibi mutuo non repugnant.*

E. gr. Observamus, ignem & lucere, & calefacere; adeoque constat, lucem & calorem sibi mutuo non repugnare. Similiter observamus, lapidem esse durum atque gravem, adeoque constat, duritiem gravitati non repugnare. Observamus quoque in triangulo tres esse angulos, adeoque sine probatione constat, ternarium numerum laterum & angulorum sibi mutuo non repugnare. Atque hac ratione ad res quotidie obvias attendentes multa cognoscimus, quæ sibi mutuo non repugnant, consequenter notionem subjecti in eadem propositione ingredi possunt.

## §. 536.

*Si, quæ in eodem subjecto una insunt, in aliis separatim deprehenduntur, eorum unum per alterum non determinatur.* Quodenim per alterum determinatur, id ideo inest, quia inest hoc, per quod determinatur (§. 219.), scilicet si A determinatur per B & subjecto C inest A, etiam B inesse debet. Cum adeo semper una inesse debeant, quorum unum per alterum determinatur (§. 407.), si in subjecto C, cui inest A, non inest B, nec B per A determinatur, hoc est, non determinantur per se invicem, quæ separatim inesse deprehenduntur, etsi in aliquo subjecto una insint.

*Quæ per se invicem non determinantur.*

E. gr. Chalybs durus est atque elasticus; lapides duri sunt, sed non elastici; ær fluidus est idemque elasticus. Quare cum durities & elasticitas quæ in chalybe conjunguntur, in lapidibus & ære separatim deprehendantur; durities per elasticitatem non determinatur. Atque hac ratione ad res quotidie obvias attendentes multa cognoscimus, quæ sibi quidem mutuo non repugnant, quorum tamen unum per alterum non determinatur.

## §. 537.

*Si utraq; præmissa alicui Syllogismi fuerit vera, conclusio quoque vera est.* Si utraq; præmissa alicujus syllogismi fuerit vera, prædicatum, quod in iisdem subjecto vel absolute, vel sub data conditione tribuitur, sive affirmativum fuerit, sive negativum, eidem vel absolute, vel sub ista conditione convenit (§. 505.). Enimvero ex iis, quæ de forma omnium syllogismorum sect. 4.

*Conclusio syllogismorum quando vera*

*part. 1* demonstrata sunt, patet, si in præmissis subjecto conveniat prædicatum, quale ipsi attribuitur, in conclusione quoque prædicatum, quod suo tribuitur subjecto sive affirmativum, sive negativum, convenire debere. Conclusio igitur vera est (§. 506.).

E. gr. In syllogismo categorico: *Omnis homo est mortalis. Sed omnis Rex est homo. Ergo omnis Rex est mortalis*, utraque præmissa est vera, adeoque & conclusio, *omnis Rex est mortalis*, vera est. In syllogismo hypothetico: *Si lapis non est calidus, non calefacit. Sed lapis non est calidus. Ergo lapis non calefacit*, utraque præmissa vera est, adeoque & conclusio, *lapis non calefacit*, in præsentem casu vera est. Similiter in consequentia immediata, *omne triangulum habet tres angulos. Ergo impossibile est dari triangulum, quod non habeat tres angulos*, conclusio vera est, quia præmissa vera. Etenim in consequentiis immediatis posita præmissa una, ponitur quoque conclusio (§. 459.).

§. 538.

*Conclusio syllogismi categorici quando falsa.*

*Si major syllogismi categorici fuerit falsa & minor vera; conclusio quoque falsa est.* Cum syllogismi secundæ & tertiæ figuræ sint syllogismi cryptici primæ (§. 385. 397.) atque a crypti liberati ad formam primæ manifestam retenta conclusione eadem reducuntur (§. 384. 389. 396.); Syllogismi autem primæ figuræ Dicti de omni & nullo non nisi distincta applicatio sint (§. 366. & seqq.); omnes tandem syllogismi categorici ad hunc generalem reducuntur (§. 348. 349.): *Quicquid sub universali A per B determinato continetur, ei convenit prædicatum C* (ubi per B omne id intelligitur, quod ad notionem subjecti requiritur, ut per eam prædicatum determinetur vi §. 320, per C autem prædicatum quodcumque, sive affirmativum, sive negativum). *Atqui D continetur sub A per B determinato. Ergo ei convenit prædicatum C.* Quod si ergo propositio major sit falsa, subjecto, quod sub universali A per B determinato continetur, non convenit C (§. 505.). Quamobrem si minor fuerit vera, D continetur sub A per B determinato (§. 506.), consequenter ei prædicatum C convenire nequit (§. 537.): quod tamen ob falsam maiorem eidem tribuitur. Est igitur conclusio, *ipsi D convenit prædicatum C*, falsa (§. 505.).

E. gr. Si quis ita argumentetur: *In omni triangulo tres anguli junctim sumti æquivalent duobus rectis. Atqui triangulum sphericum est triangulum.*

gulum. Ergo in triangulo spherico tres anguli junctim sumti sunt aequales duobus rectis; conclusio falsa est, quia major propositio falsa est, quæ de omni saltem triangulo rectilineo intelligenda; minor autem propositio vera. Neminem offendet nisi artis demonstrandi imperitum, quod syllogismum catholicum condituri dictionem ad generalem enunciationem accommodemus.

## §. 539.

*Si prædicatum in majore subiecto vel absolute, vel sub data Casus alius determinatione soli competit, minor autem fuerit falsa; conclusio quoque falsa esse debet.* Constat ex demonstratione theorematis præcedentis, omnes syllogismos categoricos sub hoc catholico contineri: *Quicquid sub universali A per B determinato continetur, ei convenit prædicatum C.* Sed *D continetur sub A per B determinato.* Ergo *ipsi D convenit prædicatum C.* Cum igitur prædicatum C non possit convenire nisi ei, quod sub universali A per B determinato continetur, *per hyporh.* ipsi D non convenit, si sub A per B determinato non continetur. Enimvero cum minor sit falsa *per hyporh.* D sub A per B determinato non continetur (§. 505.). Ipsi itaque D prædicatum C convenire nequit, consequenter conclusio in hypothese theorematis falsa est (§. cit.).

E. gr Si quis ita argumentatur: *Omne quadrilaterum circulo inscriptibile habet binos angulos diametraliter oppositos duobus rectis æquales.* Sed *omne trapezium parallelorum basium est quadrilaterum circulo inscriptibile.* Ergo *omne trapezium parallelorum basium habet binos angulos diametraliter oppositos duobus rectis æquales:* propositio major vera est & prædicatum soli quadrilatero circulo inscriptibili competit. Quamobrem cum minor falsa sit; falsa quoque est conclusio.

## §. 540.

*Si propositio major fuerit vera, minor autem falsa prædicatum vero conclusionis subiecto non repugnat; conclusio quidem vera esse potest; sed ex præmissis tamen non sequitur.* Etenim si in syllogismo catholico: *Quicquid sub universali A per B determinato continetur, ei convenit prædicatum C.* Atqui *D continetur &c.* Ergo &c. minor fuerit falsa, D sub A per B determinato non continetur (§. 507.), consequenter nec vi Dicti de omni & nullo eidem tribui potest prædicatum C (§. 348.), adeoque conclusio ex præmissis non sequitur (§. 353.). Quod si tamen prædicatum sub-

Quando conclusio vera ex præmissis tamen non sequitur.

jecto

jecto non repugnat, id minime obstat, quo minus aliam ob rationem eidem conveniat (§. 310.).

E. gr. Si quis ita argumentetur: *Omnis lapis calori solis æstivo diu expositus est calidus. Sed hic lapis calori solis æstivo diu fuit expositus. Ergo hic lapis est calidus.* fueritque minor falsa, vi syllogismi præsentis non sequitur, *lapidem esse calidum*, etsi non repugnet, eum alia de causa esse calidum, cum calorem alia ratione contrahere poterit. V. gr. quod immerfus fuerit aquæ fervidæ.

## §. 541.

*Quid ex falsa minore concludatur.*

Quoniam conclusio vera esse potest, etsi minor falsa sit (§. 540.); *Ex minore falsa non concluditur, falsam esse conclusionem, sed tantummodo, eam ex præmissis non sequi*, consequenter conclusio in medio relinquitur.

Fieri equidem potest, ut conclusio sit falsa, sed id non accedit ob vitium formæ, sed alia de causa. E. gr. Si quis ita argumentetur: *Omnis figura ordinata est circulo inscriptibilis. Omnis figura æquilatera est figura ordinata. Ergo omnis figura æquilatera est circulo inscriptibilis.* propositio minor falsa est, cum figura ordinata sit & æquilatera, & æquiangularis; falsa quoque conclusio, non tamen vi formæ, sed quia inscriptibilitas per æqualitatem laterum non determinatur, verum per angulorum rationem, quæ stante æqualitate laterum eidem vel repugnare vel non repugnare potest. Unde conclusio universaliter fallit, sed accedentibus aliis adhuc subiecti determinationibus nunc vera fieri potest, nunc falsa.

## §. 542.

*Quando conclusio in consequentiis immediatis fuerit vera.*

*Si præmissa in consequentiis immediatis fuerit vera, conclusio quoque vera est.* In consequentiis immediatis posita præmissa, ponenda quoque est conclusio (§. 459.) hoc est, si admittitur, in præmissa prædicatum convenire subiecto, admittendum quoque est in conclusione prædicatum subiecto convenire. Quamobrem si præmissa vera est, vera quoque esse debet conclusio (§. 505.).

E. gr. Per consequentiam immediatam inferimus (§. 456.): *Quoddam triangulum est æquilaterum. Ergo quædam figura æquilatera est triangulum.* Quoniam præmissa vera; conclusio quoque vera.

## §. 543.

*Quando vera*

Eodem modo patet, *in syllogismis hypotheticis conclusionem esse*



*esse veram, si minor seu subsumtio vera.* Etenim minor vel est antecedens, & conclusio consequens, (§. 407.), adeoque si in minore prædicatum convenit subjecto, prædicatum quoque eidem convenit in conclusione; vel minor est oppositum consequentis, conclusio antecedentis oppositum (§. 407. 288.), adeoque si prædicatum in consequente subjecto suo convenire nequit, nec prædicatum in conclusione eidem convenire potest. In utroque igitur casu vera est conclusio, si minor fuerit vera (§. 505.).

Idem jam monuimus supra (not. §. 407.) exponentes communem loquendi usum. Hic vero ostendere debuimus, eum esse notionibus veri ac falsi conformem.

## §. 544.

*Propositio, quæ demonstrari potest, vera est.* Propositio, quæ demonstratur, per syllogismos inter se concatenatos colligitur, in quibus non utimur præmissis nisi definitionibus, experientis indubitatis, axiomatis & propositionibus jam ante demonstratis (§. 498.). Definitiones cum sint propositiones identicæ (§. 214.), de earum veritate dubitari nequit (§. 505.), modo caveatur, ne sint notiones deceptrices (§. 135.). Ex axiomatis terminis manifestum est, prædicatum subjecto convenire, vel non convenire (§. 267. 262.), atque adeo axiomata vera sunt (§. 505.). Quod si ergo conclusio infertur ex definitionibus atque axiomatis tanquam præmissis, eam veram esse necesse est (§. 537. 542. 543.). Immo cum experientias indubitatas veras esse constet (§. 517.); vera quoque erit conclusio, quæ ex iis atque definitionibus vel axiomatis infertur (§. 537. 542. 543.). Quoniam itaque in Demonstratione syllogismos non ingrediuntur tanquam præmissæ præter definitiones, axiomata & experientias indubitatas nisi conclusiones ex iis tanquam præmissis illatæ, adeoque veræ *per demonstrata*; omnis propositio, quæ demonstratur, infertur tanquam conclusio per syllogismos concatenatos, quorum præmissæ veræ sunt, consequenter & ipsa vera est (§. §. cit.).

Exempla propositionum demonstratarum in Mathesi occurrunt & ex per demonstrationem veræ intelliguntur. Ceterum supponimus in demonstratione præsentem definitiones & axiomata veri nominis, quæ  
(Wolfii Logica) Fff per

*in hypotheticis.*

*Cur propositio vera, quæ demonstrari potest.*

per ea agnoscuntur, quæ de iis in Logica demonstravimus. Multum adhuc lucis affundet huic demonstrationi doctrina de demonstratione mox tradenda, ubi omnem ratiociniorum progressum paulo distinctius sumus exposituri.

## §. 545.

*Regularum  
logicarum  
usu in di-  
scernendo  
vero a falso.*

*Ad verum a falso discernendum regulæ logicæ sufficiunt.* Propositio cum vera sit, quæ demonstrari potest (§. 544.), verum a falso discernit, qui demonstratum esse agnoscit, prædicatum subiecto sive absolute posito, sive sub data determinatione convenire. Quoniam itaque demonstratio constat syllogismorum concatenatione, quorum præmissa sunt definitiones, experientia indubitata, axiomata & propositiones jam demonstratae (§. 498.); verum a falso ut quis discernere possit, facultatem habere debet judicandi, num definitiones, quibus utimur in demonstrandis propositionibus, sint genuinae; num experientia, quas sumimus, sint indubitatae; num axiomatis nomen mereantur propositiones, quæ pro talibus venditantur; num forma syllogismorum sit genuina; denique num syllogismi inter se rite concatenentur. Enimvero Logica tradit definiendi regulas (§. 152. & seqq.), docet formam judiciorum in universum omnium (§. 198. & seqq.), quæ adeo etiam esse debet intuitivorum ab experientia derivatorum (§. 51.); inculcat discrimen inter axiomata & propositiones demonstrabiles (§. 267. 268. 270. & seqq.); delineat formam syllogismorum (§. 332. & seqq.); monstrat denique modum syllogismos concatenandi (§. 492.). Regulæ adeo logicæ sufficiunt ad verum a falso discernendum.

Suppono in Logica tres mentis operationes legitime explicari: id quod jam factum est a Scholasticis, nisi quod distinctis notionibus fuerint destituti, quem nos defectum supplevimus. Unde & *Leibnitius* in *Actis Eruditorum* A. 1684. p. 540. §. 41. agnoscit, non contemnenda veritatis enunciatorum criteria esse regulas, communis Logicæ, quibus & Geometræ utuntur, ut scilicet nihil admittatur pro certo, nisi accurata experientia vel firma demonstratione probatum. Demonstrationem autem firmam judicat, quæ præscriptam a Logica formam (in ratiocinando nimirum) servat ut argumentatio concludat vi formæ. Ego in formam demonstrationum veterum Geometrarum inquirens, utilitatem regularum Lo-

gicæ

giæ communis deprehendi, cum valde juvenis præjudicio *Cartesii* Tractatu de Methodo & *Tschirnhusii* Medicina Mentis contracto veritatis criterium quærerem completum, *Cartesiana* clara & distincta perceptione & *Tschirnhusiana* conceptibilitate nondum satisfaciente. Atque ita probavi iudicium *Leibnitianum*, a quo antea earum alienus.

## §. 546.

*Non alio igitur criterio veritatis opus est.* Si enim opus *Eurundem* esset alio, regulæ logicæ ad verum a falso discernendum non *sufficientia*. sufficerent: id quod repugnat propositioni modo demonstratæ (§. 545.).

Per demonstrationem nimirum patet, prædicatum per notionem subiecti determinari (§. 219. 496. 498.). In hac autem determinabilitate veritatis criterium consistit (§. 524.).

## §. 547.

Quoniam propositioni affirmativæ veræ notio possibilis *Idea vera* respondet, *idea* sive *notio vera* dicitur, quæ est possibilis: e contrario *falsa discri-* *men.* *falsi* audit, quæ impossibilis. Atque adeo *in notione vera* *conjunguntur*, quæ eidem subiecto una *inesse possunt*. Contrario autem *in falsa* *conjunguntur*, quæ una *inesse nequeunt*, seu *sibi mutuo repugnant* (§. 519.).

E. gr. Notio *trianguli regularis*, quod sit figura trilatera, æquilatera & æquiangula, possibilis est, cum non repugnet, ut eadem figura habeat cum tria latera æqualia, tum angulos æquales, atque adeo vera est. Contra impossibilis est *trianguli rectilinei birectanguli* notio, in quo duo anguli ponuntur esse actu recti, cum fieri nullo modo possit, ut in spatio tribus lineis rectis terminato duo anguli sint actu recti, atque adeo notio illa falsa est.

## §. 548.

Quamobrem cum in propositionibus veris notio subiecti *Notio subje-* possibilis (§. 533. 534.); *in propositione vera notio subiecti sive abso-* *cti in propo-* *lute, sive sub data determinatione positi vera esse debet* (§. 547.). *sitione vera.*

Nempe si subiectum absolute ponitur, definitio possibilis seu vera esse debet (§. 225.): Si conditio quædam adjicitur, & definitio, & conditio possibilis sit necesse est (§. 218.).

## CAPUT II.

## DE DEMONSTRATIONE.

§. 549.

*Demonstratio  
onis ostensivae  
definitionis.*

**D***emonstratio ostensiva* five *directa* est, qua ex notione sub-  
jecti colligitur, prædicatum convenire subjecto.

Tales sunt pleræque demonstrationes Mathematicorum.  
Egr. Ex eo, quod parallelogramma constituantur super eadem basi &  
intra easdem parallelas, colligitur, quod sint inter se æqualia. Tales  
etiam sunt pleræque demonstrationes nostræ logicæ, quas hactenus de-  
dimus & in sequentibus damus.

§. 550.

*Demonstratio  
onis apogogicæ  
definitionis.*

*Demonstratio apogogica* seu *indirecta* est, qua, posito contra-  
rio ejus, quod probari debet, tanquam vero, colligitur, quod  
propositioni veræ, vel notioni subjecti contradicit.

Hac demonstratione sæpius utuntur Geometræ. E. gr. demon-  
strari duos circulos se intus tangentes non habere idem centrum, sumi-  
mus tanquam verum, quod habeant idem centrum, ac inde deducimus,  
quod pars toti æqualis sit: Id quod contradicit propositioni manifestæ,  
totum esse majus sua parte. Nos quoque in nostris demonstrationi-  
bus logicis ea subinde usi, veluti cum fundamentum proximum secun-  
dæ figuræ (§. 381.) constituimus. Dicitur quoque hæc demonstratio  
*Deductio ad absurdum* vel *impossibile*.

§. 551.

*Forma de-  
monstratio-  
nis ostensivae  
propositionis  
categoricæ.*

*Si prædicatum subjecto absolute tribuitur, demonstrationem  
ostensivam conditurus* 1. vel ex definitione integra format proposi-  
tionem, vel ex ejus partibus plures, easque sumit tanquam  
propositiones minores syllogismorum. 2. Quodsi de eodem sub-  
jecto prostent axiomata, vel propositiones jam demonstratæ,  
non attenda definitione, hæ quoque subinde sumi possunt ut  
propositiones minores syllogismorum. 3. Data jam proposi-  
tione minore in memoriam revocatur propositio alia, quæ termi-  
num cum ea communem habet, atque majorem syllogismi  
constituit. Sicque insertur conclusio (§. 335.). Quodsi *vi num. 1.*  
*vel 2.* plures propositiones minores fuere formatæ, plures quo-  
que

que hac ratione eliciuntur conclusiones. 4. Vel singula sumuntur ut præmissæ novorum syllogismorum, vel plures simul spectantur ut notio complexa formaturque inde propositio, quæ sumitur ut præmissa novi syllogismi. 5. Hisce præmissis jungitur alia ex antecedentibus nota inferturque conclusio. Atque hac ratione adhibitis, sicubi opus fuerit, consequentiis immediatis progrediendum, donec aliquo syllogismo inferatur conclusio, quæ eadem est cum propositione demonstranda (§.549.).

E. gr. Sit demonstranda propositio: *In parallelogrammo ABCD anguli diametraliter oppositi o & x sunt inter se æquales.* Quoniam parallelogrammum definitur, quod sit figura quadrilatera, cujus latera opposita sunt inter se parallela; vi hujus definitionis formatur propositio: *Latera parallelogrammi opposita BA & DC sunt inter se parallela & secantur a tertio AD.* Quodsi jam memoriam subeat propositio altera, cujus nos noticiam habere suppono, cum independenter a præsentem in Elementis Geometriæ demonstratur: *Si duæ lineæ parallele a tertia secantur, anguli interni oppositi sunt æquales duobus rectis*; sumpta propositione priori pro minore, posteriori pro majore syllogismi infertur conclusio: *Anguli o & y sunt duobus rectis æquales.* Similiter vi definitionis parallelogrammi formatur propositio: *Latera parallelogrammi BC & AD opposita sunt inter se parallela & secantur a tertio DC.* Quamobrem cum denuo memoriam subeat propositio: *Si duæ lineæ parallele a tertia secantur, anguli interni oppositi sunt æquales duobus rectis*; sumpta denuo propositione priori pro minore, posteriori pro majore syllogismi, infertur conclusio: *Anguli y & x sunt duobus rectis æquales.* Quodsi jam ad duas hæc conclusiones ex definitione deductas, *Anguli o & y* (scilicet simul sumti) *sunt duobus rectis æquales & Anguli y & x sunt duobus rectis æquales* attendas; per se patet, *summas angulorum o & y atque angulorum y & x esse æqualia eidem tertio.* Quamobrem cum memoriam subeat axioma: *Æqualia eidem tertio sunt æqualia inter se*, sumto iudicio isto intuitivo pro minore, axioma te autem pro majore syllogismi infertur conclusio: *Summa angulorum o & y est æqualis summae angulorum y & x seu, quod perinde est, anguli o & y simul sumti sunt æquales angulis y & x simul sumtis.* Jam cum investigetur relatio angulorum o & x facile intuenti conclusionem apparet, abjiciendum esse angulum communem y, atque sic intuitivum formatur iudicium: *Ab æqualibus summis angulorum y & x*

atque  $o$  &  $y$  subtrahi eundem angulum. Quamobrem cum in memoriâ revocetur axioma: Si ab aequalibus idem auferat, quæ relinquuntur aequalia sunt; sumto iudicio intuitivo pro minore, axiomate pro maiore syllogismi, inferitur tandem conclusio, Anguli diametraliter oppositi  $o$  &  $x$  sunt aequales: Quæ cum sit propositio ad demonstrandum proposita, demonstratio sic absoluta. His igitur syllogismis inter se concatenatis ex definitione parallelogrammi deducitur, quod ipsi conveniat prædicatum in propositione data absolute attributum, atque adeo patet, quod eidem posita definitione tribui debeat: quemadmodum in propositionibus categoricis fieri debet. Neminem nisi tyronem Logicæ, doctrinæ de syllogismorum cryptis ignarum, offendet, quod in syllogismis iidem termini non iidem præcise vocibus experimantur, propterea quod dictio incommoda nasceretur. Quodsi tamen quis scrupulosior fuerit, is per consequentiam immediatam æquipollentiæ inferat conclusiones syllogismi formæ manifestæ magis respondentes. E. gr. Dum propositionem vi definitionis formavit: Latera parallelogrammi opposita sunt inter se parallela & a tertio secantur; inferat inde per consequentiam immediatam: Ergo  $AB$  &  $DC$  sunt due linee rectæ, quas secat transversa  $AD$ , & in casu altero similiter:  $BC$  &  $AD$  sunt due linee rectæ, quas secat transversa  $DC$ . Porro sumatis huiusce minoribus inferat: Anguli interni oppositi simul sunt aequales duobus rectis, & inde porro per immediatam consequentiam: Ergo Anguli  $o$  &  $y$ , itemque in casu altero, Anguli  $y$  &  $x$  simul sunt aequales duobus rectis. Nec minus ubi memoriâ subit axioma: Æqualia eidem tertio sunt aequalia inter se; per immediatam consequentiam inferatur: Ergo etiam due summe duorum angulorum aequales eidem tertiæ sunt inter se aequales. Et sic in ceteris.

Eandem esse formam demonstrationum nostrarum logicarum in eodem casu, earum analyfin tentanti apparebit. E. gr. Superius (§. 177.) propositionem, quod Modi definitionem ingredi nequeant, demonstratri, vi definitionis (§. 67.) quod Modi sint mutabiles, quæ enti insunt, nec per essentialia determinentur, sumimus: Modi sunt mutabiles. Jam recordati propositionis per se manifestæ: Quæ mutabilia sunt, constanter non insunt, sumta propositione priori tanquam minore posteriori tanquam maiore syllogismi inferius: Modi constanter non insunt. Quoniam porro memoriâ subit propositio altera manifesta, quæ axiomatis instar haberi potest: Quæ constanter non insunt, rebus agnoscendis atque a se invicem discernendis inservire nequeunt (nobis enim jam res est cum rebus omni tempore discernendis); sumta conclusione antio-

ri pro minore, axioma pro maiore syllogismi inferimus: *Modi rebus agnoscendis & a se invicem discernendis inservire nequeunt.* Jam cum definitio notarum nobis succurrit, quod sint rebus intrinseca, unde agnoscuntur & a se invicem discernuntur (§. 79.), per consequentiam immediatam inferimus: *Quod rebus agnoscendis & a se invicem discernendis inservire nequit, ex notarum numero excludendum & sumta conclusione hac pro maiore, conclusione autem syllogismi anterioris pro minore novi syllogismi inferimus: Modi ex notarum numero excluduntur.* Quoniam denique recordamur propositionis antea demonstratæ (§. 153.), in definitione enumerari debent notæ nec plures, nec pauciores, quam quæ ad rem definitam agnoscendam & ab aliis distinguendam sufficiunt, per consequentiam immediatam inferimus: *Quod ex notarum numero concluditur, ex definitione exulare debet.* Sumta igitur hac conclusione pro maiore, anteriori autem pro minore syllogismi tandem inferimus: *Modi ex definitione exulare debent, quæ propositio æquipollent alteri ad demonstrandum propositæ: Modi definitionem ingredi nequeunt.*

Analysis igitur logica demonstrationis hujus logica hæc est:

- I. *Definitio.* Modi sunt mutabilia, quæ enti insunt.  
*Conclusio 1.* Ergo per immediatam consequentiam: Modi sunt mutabiles.
- II. *Axioma.* Quæ mutabilia sunt, constanter non insunt.  
*Conclusio 1.* Modi sunt mutabiles.  
*Conclusio 2.* Ergo Modi constanter non insunt.
- III. *Axioma.* Quæ constanter non insunt, rebus agnoscendis atque a se invicem discernendis inservire nequeunt.  
*Conclusio 2.* Modi constanter non insunt.  
*Conclusio 3.* Ergo modi rebus agnoscendis atque a se invicem discernendis inservire nequeunt.
- IV. *Definitio.* Notæ sunt rebus intrinseca, unde agnoscuntur & a se invicem discernuntur.  
*Conclusio 4.* Ergo per immediatam consequentiam: Quod rebus agnoscendis & a se invicem discernendis inservire nequit, ex notarum numero excludendum.
- V. *Conclusio 4.* Quod rebus agnoscendis & a se invicem discernendis inservire nequit, ex notarum numero excludendum.  
*Conclusio 3.* Modi rebus agnoscendis & a se invicem discernendis inservire nequeunt.  
*Conclusio 5.* Ergo Modi ex notarum numero excludendi.
- VI. *Propos. dem.* In definitione enumerari debent notæ nec plures, nec pau-

pauciores, quam quæ ad rem definitam agnoscendam & ab aliis distinguendam sufficiunt.

*Conclusio 6.* Ergo per consequentiam immediatam; Quod ex notarum numero excluditur, ex definitione exulare debet.

VII. *Conclusio 6.* Quod ex notarum numero excluditur, ex definitione exulare debet.

*Conclusio 5.* Modi ex notarum numero excluduntur.

*Conclusio 7.* Ergo Modi ex definitione exulare debent.

VIII. *Conclusio 7.* Modi ex definitione exulare debent.

*Conclusio 8.* Ergo per consequentiam immediatam: Modi definitionem ingredi nequeunt.

Ipsis adeo oculis manifestum est, demonstrationem constare ex octo ratiociniis inter se concatenatis, quatuor nimirum consequentiis immediatis & totidem syllogismis categoricis. Patet etiam ratiocinia ita inter se concatenari, ut conclusiones anteriores ingrediantur sequentia per modum præmissarum. Nec minus patet, cum propositio categorica sit, in qua prædicatum subiecto absolute, adeoque sub conditione definitionis (§. 225.) tribuitur, initium ratiocinandi fieri a definitione atque adeo per ratiocinia continua concatenatione inter se coherentia propositionem ad demonstrandum propositam cum definitione concatenari. Immo patet, fieri posse, ut una conclusionum anteriorum ingrediatur eundem syllogismum per modum majoris, altera vero per modum minoris. Quod vero ratiociniis istis revera in mente locus sit, dum demonstrationem præsentem concipimus, suo loco in *Psychologia* demonstrabimus.

#### §. 552.

*Forma demonstrationis ostensiva propositionis hypotheticæ.*

*Si propositio fuerit hypothetica sive formaliter talis, sive ad categoricæ formam reducta (§. 227.), demonstrationem conditurus utitur hypothese, quemadmodum in casu præcedente definitione (§. 551.), ut nempe inde formentur judicia intuitiva, quæ tueantur vicem propositionum minorum in syllogismis primis: Quibus datis concatenationem absolvit eodem prorsus modo, quo in casu præcedente fuimus usi.*

Fig. 4.

E. gr. Sit demonstranda propositio: *Si recta CD ex centro C ducta arcum AB bisecat in D, chordam quoque cognominem bisecat.* Quoniam in C est centrum per hypothesein, igitur primo formamus iudicium intuitivum: *Rectæ CA, CD, CB ex centro circuli C ad peripheriam ductæ.* Memoriam subit definitio: *Radius circuli est recta ex centro in per-*



*riphe iam ducta.* Inde per consequentiam immediatam inferitur: Ergo omnes rectae ex centro circuli in peripheriam ductae sunt radii circuli. Sumta igitur hac conclusione pro maiore & anteriore pro minore syllogismi inferitur: Rectae  $CA$ ,  $CD$  &  $CB$  sunt radii ejusdem circuli. Quoniam recordamur axiomatis: Omnes radii circuli sunt inter se aequales, sumto hoc pro maiore & conclusione proxime praecedente pro minore syllogismi inferimus: Rectae  $CA$ ,  $CD$  &  $CB$  sunt inter se aequales. Porro vi hypotheseos formatur propositio: Arcus  $AD$  &  $DB$  sunt aequales. Cum ita in memoriam revocemus propositionem ante jam demonstratam: Si arcus sunt aequales, chordae eorum aequales sunt; sumto hoc theoremate pro maiore, propositione proxima pro minore, inferimus: Chordae  $AD$  &  $DB$  sunt aequales. Jam ubi inter se conferimus conclusiones ex hypothese deductas: Rectae  $CA$ ,  $CD$  &  $CB$  sunt inter se aequales atque chordae  $AD$  &  $DB$  sunt aequales; formatur inde iudicium intuitivum: Triangula  $ACD$  &  $DCB$  sunt sibi mutuo aequilatera. Sumto igitur eodem pro minore & theoremate, si triangula fuerint sibi mutuo aequilatera, anguli aequalibus lateribus oppositi aequales sunt, pro maiore ejusdem syllogismi, inferimus: In triangulis  $ACD$  &  $DCB$  anguli aequalibus lateribus oppositi aequales sunt. Quare cum intuitive agnoscatur propositio: Anguli  $ADE$  &  $EDB$  anguli aequalibus lateribus  $CA$  &  $CB$  oppositi sunt; sumta hac propositione pro minore & conclusione anteriore pro maiore, concludimus: Anguli  $ADE$  &  $EDB$  aequales sunt. Attendentes jam ad conclusiones: Rectae  $AD$  &  $DB$  sunt aequales & Anguli  $ADE$  &  $EDB$  aequales sunt, denuo intuitivum formamus iudicium, Triangula  $ADE$  &  $EDB$  sunt ejus conditionis, ut angulus unus unius sit aequalis angulo uni alterius & latera angulos aequales comprehendentia sint sigillatim aequalia. Sumto eodem pro minore syllogismi & theoremate, cujus recordamur, pro maiore, scilicet Triangula istius conditionis habent latera aequalibus angulis opposita aequalia, concludimus: Ergo in triangulis  $ADE$  &  $EDB$  latera angulis aequalibus opposita aequalia sunt: unde per consequentiam immediatam porro colligitur: Rectae  $AE$  &  $EB$  sunt aequales & tandem hinc per consequentiam immediatam inferitur: Ergo Recta  $CD$  ex centro ducta si arcum  $AB$  bisecat, chordam quoque cognominem bisecat.

Analysis logica hujus demonstrationis talis est:

- I. Omnes rectae ex centro circuli ad peripheriam ductae sunt radii circuli.  
*Hypoth.* Rectae  $CA$ ,  $CD$  &  $CB$  ex centro circuli ad ejusdem peripheriam ductae.

Ergo rectae  $CA$ ,  $CD$  &  $CB$  sunt radii circuli.

(Wolffii Logica)

Ggg

2. Axi-

2. *Axioma.* Omnes radii circuli sunt inter se æquales.  
*Concl. 1.* Rectæ CA, CD & CB sunt radii circuli.  
 Ergo Rectæ CA, CD & CB sunt inter se æquales.
3. *Theorema.* Si arcus sunt æquales, chordæ eorum æquales sunt.  
*Hypoth.* Arcus AD & DB sunt æquales.  
 Ergo Arcuum AD & DB chordæ AD & DB æquales sunt.
4. *Theorema.* In triangulis sibi mutuo æquilateris anguli æqualibus lateribus oppositi æquales sunt.  
*Vi conclus. 2 & 3.* Triangula ACD & DCB sunt sibi mutuo æquilatera.  
 Ergo in triangulis ACD & DCB anguli æqualibus lateribus oppositi æquales sunt.
5. *Conclusio 4.* In triangulis ACD & DCB anguli æqualibus lateribus oppositi æquales sunt.  
*Prop. intuitiva.* Anguli ADE & EDB æqualibus lateribus CA & CB oppositi sunt.  
 Ergo Anguli ADE & EDB æquales sunt.
6. *Theorema.* Si duo triangula fuerint ejus conditionis, ut angulus unus unius sit æqualis angulo uni alterius, & latera comprehendentia angulum in uno triangulo sit sigillatim æqualia lateribus comprehendentibus angulum in altero triangulo; erit quoque latus tertium unius æquale lateri tertio alterius.  
*Vi conclus. 3. & 4.* Triangula ADE & DEB sunt ejus conditionis, ut angulus unus unius ADE sit æqualis angulo uni alterius EDB & latera AD & DE sint æqualia sigillatim lateribus DB & DE.  
 Ergo in triangulis ADE & DEB latus tertium unius æquale lateri tertio alterius.
7. Ergo per consequentiam immediatam: Rectæ AE & EB æquales sunt.
8. Ergo denuo per consequentiam immediatam: Recta CD ex centro ducta, quæ arcum AB bifecat chordam quoque cognominem AB bifecat: quæ est propositio ad demonstrandum proposita.
- Constat igitur demonstratio octo ratiociniis, nimirum duabus consequentiis immediatis & sex syllogismis, partim categoricis, partim hypotheticis. Concatenantur quoque ratiocinia, ut conclusiones anteriores ingrediuntur ratiocinia sequentia per modum præmissarum. Patet præterea conclusiones aliquot ex hypothesi deduci, nempe tertiam & quintam, quæ propositioni formandæ inserviunt, cujus ope propositio ad demonstrandum proposita ex hypothesi colligitur. Non tædet de hac demonstrationum analysi quam distinctissime docere, quæ tenenda sunt,

cum

cum paucissimi earum formam habeant perfectam. Non abs re igitur esse judic o, si exemplum adhuc aliquod demonstrationis logicæ adjungam. E. gr. Ubi demonstranda est propositio: *Si in duabus propositionibus subjectum fuerit idem terminus, eidem tamen diverse tribuantur notiones.* Propositiones diverse sunt, quamvis idem sit predicatum; ex hypothesi formatur propositio: *Subjectum propositionum est terminus idem, cui diverse respondent notiones.* Jam cum ex antecedentibus memoria subeat propositio: *Omni termino, cui notiones diverse respondent, res diverse denotantur;* sumta hac pro maiore, ista pro minore syllogismi, infertur conclusio: *Ergo subjecto propositionum res diverse denotantur.* Unde per consequentiam immediatam infertur: *Ergo propositiones in hypothesi theorematidis diverse habent subjecta.* Quoniam igitur porro in memoriam revocamus propositionem: *Omnes propositiones, quæ idem predicatum, sed diversa subjecta habent, sunt diverse,* sumta hac pro maiore syllogismi & formata ex conclusione præcedente ac hypothesi theorematidis minore: *Propositiones due, quorum subjectum idem est terminus, sed cui diverse tribuantur notiones, predicatum vero idem, diversa habent subjecta sed idem predicatum:* infertur tandem conclusio: *Ergo propositiones istæ diverse sunt.* Si quis plurium demonstrationum analysin logicam instituit, is diversitatem concatenationis distinctissime percipiet, quam hic particulatim persequi instituti nostri non fert ratio, ubi principiis generalibus contenti particulares tractationes aliis relinquimus vel, si alii nos non prævenerint, nobisque Deus spatium sufficiens temporis largietur, in aliud tempus reservamus. Satis nimirum patet, non semper conclusiones anteriores per modum præmissæ ingredi syllogismos sequentes absque omni mutatione. Unde subinde inexercitatis difficultatem facessit demonstrationum analysi logica: Et analyseos hujus tyrones, si plus sperant de facultatibus suis, quam in eis est, nescio, quos errores in demonstrando admissos confingunt.

§. 553.

Quoniam in demonstratione apogogica seu indirecta expostio contrario ejus, quod probari debet, tanquam vero, colligitur, quod propositioni veræ, vel notioni subjecti contradicit (§. 550.); propositionem aliquam ad absurdum vel impossibile reduci sumit ei contrariam tanquam veram eaque utitur ceu definitione atque hypothesi in demonstratione ostensiva (§. 551. 552.), ut nempe vel ipsa subeat minorem in syllogismo primo, vel inde formantur judicia intuitiva, vel per consequentiam immediatam

Forma de  
monstrationis  
apogogi-  
cæ.

Ggg 2

infe-

inferantur conclusiones, quæ præbent minores in syllogismis primis: Quibus datis concatenatio syllogismorum eodem prout modo, quo supra (§. 551.), absolvitur, eo usque progrediendo, donec syllogismo aliquo inferatur conclusio, quæ vel hypothesei, vel definitioni subiecti, vel propositioni alieui veræ contradicit.

Istiusmodi demonstrationes in Mathesi non sunt infrequentes ac negativæ præsertim propositiones per indirectum demonstrari solent. E. gr. Si demonstrandum theorema: *Duo circuli se intus tangentes non habent idem centrum*; sumimus contrarium ejus, *duo circuli se intus tangentes habent idem centrum*, tanquam verum. Quod si igitur jam  $C$  ponatur centrum commune circulorum se intus tangentium  $X$  &  $Y$ , ducaturque ex eodem recta  $CA$  ad contactus punctum  $A$ , tum altera  $CD$  secans circumulum inferiorem in  $B$ ; per intuitum patet, quod *rectæ  $CA$  &  $CB$  sint rectæ ex centro circuli interioris  $X$  ad ejus peripheriam ductæ*. Quoniam itaque memoriam subit definitio: *Radius circuli est recta ex centro in peripheriam ducta*, unde per consequentiam immediatam inferitur: *Omnes rectæ ex centro circuli ad peripheriam ejus ductæ sunt radii ejusdem circuli*, sumta hac conclusione pro maiore & iudicio intuitivo anteriori pro minore syllogismi inferitur: *Rectæ  $CA$  &  $CB$  sunt radii ejusdem circuli*. Recordari axiomatis: *Radii ejusdem circuli sunt inter se æquales*, sumto eodem pro maiore & conclusione anteriore pro minore syllogismi, inferimus porro: *Rectæ  $CA$  &  $CB$  sunt inter se æquales*. Similiter ad hypothesein, quam figura repræsentat, respiciente: intuitivè cognoscimus propositionem:  *$CA$  &  $CD$  sunt lineæ rectæ ex centro ejusdem circuli ad peripheriam ejus ductæ*. Sumta igitur eadem pro minore & conclusione per consequentiam immediatam ex definitione radii illata pro maiore, inferitur:  *$CA$  &  $CD$  sunt radii ejusdem circuli*. Sumta hac conclusione pro minore syllogismi novi & adjuncto eodem tanquam maiore axioma: *Omnes radii ejusdem circuli sunt inter se æquales*, inferitur nova conclusio: *Rectæ  $CA$  &  $CD$  sunt inter se æquales*. Conferentes iaru conclusiones: *Rectæ  $CA$  &  $CB$  sunt inter se æquales atque rectæ  $CA$  &  $CD$  sunt inter se æquales*, formamus iudicium quoddam intuitivum: *Rectæ  $CB$  &  $CD$  sunt æquales eidem tertiæ  $CA$* . Sumto hoc iudicio pro minore & conclusione ex axioma: *Æqualia eidem tertio sunt æqualia inter se*, per consequentiam immediatam deducta: *Lineæ rectæ æquales eidem tertiæ sunt æquales inter se*, pro maiore syllogismi, inferitur: *Rectæ  $CB$  &  $CD$  sunt inter se æquales*. Jam cum per se pateat,  $CB$  esse partem,  $CD$  vero totum; per consequentiam immedi-

Fig. 5.

tam hinc porro inferitur: *Pars est æqualis toti.* Hæc propositio cum contradicat axiomatici: *Pars est minor toto*; reductio ad absurdum absoluta.

*Analysis logica hujus demonstrationis apogogicæ seu reductionis ad absurdum hæc est:*

*Positis:* Duo circuli X & Y se intus in A tangentes habent idem centrum C.

I. *Definitio.* Radius circuli est recta ex centro in peripheriam ducta.

Ergo per *consequentiam immediatam*: Omnes rectæ ex centro circuli ad peripheriam ejus ductæ sunt radii ejusdem circuli.

II. *Conclusio 1.* Omnes rectæ ex centro circuli ad peripheriam ejus ductæ sunt radii ejusdem circuli.

*Judicium intuitivum.* Rectæ CA & CB sunt rectæ ex centro circuli interioris X ad peripheriam ductæ.

Ergo Rectæ CA & CB sunt radii ejusdem circuli.

III. *Axioma.* Omnes radii ejusdem circuli sunt inter se æquales.

*Conclusio 2.* Rectæ CA & CB sunt radii ejusdem circuli.

Ergo Rectæ CA & CB sunt inter se æquales.

IV. *Conclusio 1.* Omnes rectæ ex centro circuli ad peripheriam ejus ductæ sunt radii ejusdem circuli.

*Judicium intuitivum.* CD & CA sunt lineæ rectæ ex centro circuli exterioris Y ad ejus peripheriam ductæ.

Ergo Rectæ CD & CA sunt radii ejusdem circuli.

V. *Axioma.* Omnes radii ejusdem circuli sunt inter se æquales.

*Conclusio 4.* Rectæ CD & CA sunt radii ejusdem circuli.

Ergo Rectæ CD & CA sunt inter se æquales.

VI. *Conclusio 3. & 5.* Rectæ CA & CB, sunt inter se æquales & Rectæ CD & CA sunt inter se æquales.

Ergo per *immediatam consequentiam*: Rectæ CB & CD sunt æquales eidem tertiæ CA.

VII. *Axioma.* Æqualia eidem tertio sunt æqualia inter se.

Ergo per *consequentiam immediatam*: Lineæ rectæ æquales eidem tertiæ sunt æquales inter se.

VIII. *Conclusio 7.* Lineæ rectæ æquales eidem tertiæ sunt æquales inter se.

*Conclusio 6.* Rectæ CB & CD sunt æquales eidem tertiæ CA.

Ergo Rectæ CB & CD sunt æquales inter se.

IX. *Judicium intuitivum.* CB est pars & CD totum & *Conclusio 8.* CB æqualis ipsi CD.

Ergo per *consequentiam immediatam*: Pars est æqualis toti.

X. *Conclusio 9.* Pars est æqualis toti.

Ggg 3

Ergo

Ergo per consequentiam immediatam: Falsum est, partem esse toto minorem: Id quod absurdum.

Patet adeo, demonstrationem apogoticam præsentis casus constare ex quatuor consequentiis immediatis & sex syllogismis eodem modo inter se concatenatis, quo concatenantur rationes in demonstratione ostensiva.

Utitur nos quoque subinde demonstrationibus apogoticis in Logica atque iisdem utemur in aliis philosophiæ partibus. Ita e. gr. per indirectum demonstramus (§. 368.), *si in prima figura conclusio sit universalis, utramque etiam præmissam universalem esse debere*. Etenim sumimus 1. *majorem esse debere particularem*: quæ propositio cum sit contraria paulo ante demonstrata (§. 366.), absque ulla statim probatione patet, eam esse falsam (§. 530.). Sumimus 2. *minorem esse debere particularem*. Jam cum memoriam subeat demonstrata in anterioribus propositio, *si alterutra præmissa particularis, conclusio quoque particularis*, per immediatam consequentiam inferimus: *Si minor particularis, conclusio particularis*, & sumta hac conclusione pro majore, anteriore autem propositione pro minore infertur: *Conclusio est particularis*: quæ propositio hypothesei repugnat, vi cujus conclusio esse debet universalis. Patet igitur, in demonstrationibus apogoticis subinde primam statim propositionem, quæ sumitur, repugnare posse veritati demonstrata.

#### §. 554.

*Quando sorites demonstratio est.*

Quoniam sorites resolvi potest in syllogismos categoricos ejus conditionis, ut conclusio præcedentis sit minor sequentis (§. 468.); sorites continet seriem syllogismorum inter se concatenatorum, adeoque *si in eodem non occurrat propositio, nisi ante demonstrata, vel quæ in definitionum atque axiomaticum, vel experientiarum indubitatarum numero habetur; demonstratio est (§. 498.)*.

E. gr. Sorites, quem (not. §. 466.) exempli loco proposuimus, non nisi propositionibus constat evidentibus, adeoque demonstrationis locum tuetur. Fieri vero potest, ut sorites tantum partem demonstrationis constituat, si conclusio per eum collecta nondum ea est, quæ ad demonstrandum proponitur, sed instar præmissæ ingreditur syllogismos alios posteriores. Ceterum me non monente apparet, perinde de sorite hypothetico, quam categorico intelligenda esse, quæ hic de eo monentur. Lubet asserre exemplum demonstrationis geometricæ, quæ solo sorite hypothetico absolvitur. Si enim demonstrandum sit

fit theorema: In triangulo acquiruro anguli ad basin sunt aequales. Ita ratiocinamur: Si triangulum  $ABC$  est acquirurum, crura ejus  $AB$  &  $AC$  aequalia sunt. Si crura  $AB$  &  $AC$  aequalia sunt, arcus circuli cognomines aequales sunt. Si arcus  $AB$  &  $AC$  aequalis sunt, anguli  $B$  &  $C$  aequalibus arcibus insistant. Si anguli  $B$  &  $C$  aequalibus arcibus insistant, aequales sunt. Ergo si triangulum  $ABC$  est acquirurum, anguli  $B$  &  $C$  aequales sunt.

Fig. 6.

## §. 555.

Quoniam demonstratio est species probationis (§. 498.), probatio vero simplex unico syllogismo absolvitur (§. 497.), evidens est, demonstrationem quoque unico syllogismo absolvi, consequenter etiam inductione completa (§. 478.), dilemmate (§. 482.), syllogismo biforui (§. 489.) constare posse. Multo minus itaque dubitari potest, quod omnibus legitimis argumentandi modis in demonstratione sit locus.

Modi argumentandi in demonstratione adhibendi.

Si quis ad demonstrationes mathematicas animum affert attentum & in modum argumentandi inquirat, is plura istiusmodi offender exempla, quae hic cumulari supervacaneum foret, praesertim cum illos argumentandi modos jam exemplis illustraverimus.

## §. 556.

Si ex propositione aliqua colligitur, quod propositioni cuiusdam verae vel notioni subiecti verae contradicit, propositio illa falsa est, eius autem contradictoria vera. Quod propositioni verae, vel notioni subiecti verae contradicit, illud falsum est (§. 532.). Quoniam igitur modo argumentandi legitimo inferitur conclusio falsa, omnes praemissa vera esse nequeunt (§. 537.). Enimvero de omnibus praemissis, quae aliunde sumuntur, certo constare supponimus, quod sint verae; de sola propositione, quae precario fumitur, id non constat: haec igitur una falsa esse debet.

Fundamentum demonstrationis per inductionem.

Jam propositionum contradictoriarum altera necessario falsa (§. 532.). Quamobrem cum ostenderemus, falsam esse propositionem, ex qua legitima syllogismorum concatenatione, adscitis aliunde nonnisi praemissis veris, colligitur propositionis ejusdem verae, vel notionis subiecti verae contradictorium; illius contradictoria vera esse debet.

E. gr.

E. gr. Si sumimus, *duos circulos se intus tangentes idem habere centrum*, inde colligitur, *partem esse toti æqualem* (not. §. 553.). Quoniam in syllogismis, quos concatenamus, non utimur nisi præmissis, quas veras esse constat; inde concludimus, propositione sine probatione assumptam, quod *duo circuli se intus tangentes idem habeant centrum*, esse falsam: unde porro inferimus, eius contradictoriam, quod *duo circuli se intus tangentes non habeant idem centrum*, esse veram. Vulgo ita effertur propositio: *Ex quo necessaria consequentia deducitur falsum, illud ipsum falsum est*. Alii eandem brevius efferunt: *Unde falsum sequitur, id falsum est*.

## §. 557.

*Cur propositio vera quæ per indirectum demonstratur.*

Quoniam in demonstratione apogogica ex propositione præcario assumpta legitimo argumentandi modo adscitisque aliunde præmissis nonnisi evidenter veris colligitur, quod propositioni veræ, vel notioni subiecti veræ contradicit, indequinfertur propositionis assumptæ contradictoria tanquam vera (§. 553.); *quod per indirectum demonstratur, illud verum est*.

Quod vera sit propositio, quæ directe demonstratur, iam supra (§. 544.) ostendimus. Ex demonstratione enim patet, quod nonnisi de demonstratione ostensiva intelligenda sit propositio.

## §. 558.

*Quænam contradictoriarum vera, quarum una ex altera colligitur.*

*Si ex propositione aliqua directe colligitur ejus contradictoria, propositio ista falsa est, hæc autem vera.* Ponamus enim propositionem istam esse veram, unde ejus contradictoria directe seu ostensiva demonstratione colligitur. Cum vera sit propositio, quæ ex præmissis veris infertur (§. 537.); contradictoria datæ quoque vera erit, consequenter duæ contradictoriæ possunt esse simul veræ: quod cum sit absurdum (§. 532.), propositio illa, ex qua directe colligitur ejus contradictoria, falsa esse debet (§. 556.). Quoniam itaque propositionum contradictoriarum altera necessario vera, altera necessario falsa (§. 532.), quæ autem in casu præsentis infertur propositio est contradictoria ejus, unde infertur, *per hypobesin*, & quam falsam esse ostendimus; eam veram esse necesse est.

E. gr. Ex motu celerrimo rotæ infertur directe, eam motu celerrimo non



non moveri. Unde constat, propositionem primam: *Rota movetur motu celerrimo*, esse falsam; alteram vero: *Rota non movetur motu celerrimo*, esse veram.

§. 559.

Quodsi propositionis probandæ contradictoria sumatur tanquam vera & inde directe inferatur (§. 552.) propositio probanda; hoc ipso patebit, eam esse veram (§. 558.). Habemus adeo *singularem quandam speciem demonstrationis per indirectum seu apogogicæ* (§. 550.).

*Modus demonstrationis per indirectum singularis.*

Hoc demonstrandi modo usus est *Euclides* in demonstranda propositione duodecima Elementi noni. Ut is rectius intelligatur, ipsius demonstrationis analysin logicam instituere lubet. Propositio hæc est: *Si fuerit series numerorum proportionalium ab unitate incipiens, numerus primus metiens ultimum, metietur etiam proximum ab unitate, sive secundum.* *Euclides* igitur eam demonstraturus sumit, quemadmodum in demonstratione apogogica fieri debet (§. 550.). Numerum primum, qui ultimum metitur, non metiri secundum. Jam cum duo quicumque numeri, quorum unus est numerus primus, alterum vero non metitur, sint primi inter se, sumta hac propositione majoris, anteriore autem minoris loco infert: Ergo numerus primus, qui ultimum metitur, non vero metitur secundum, & hic secundus sunt numeri primi inter se. Porro quoniam duo numeri primi inter se sunt in ratione minimi; sumta hac propositione pro majore & conclusione præcedente pro minore infert: Ergo Numerus primus, qui metitur ultimum, non vero metiri ponitur secundum A sive 10. Per demonstrata liquet, fore *F* & *A* terminos in ratione sua minimos. Sit numerus iste *G*, per quem *F* metitur *E*. Habemus ergo propositionem: Numerus *F* metitur *E* per *G* seu, si numerus *E* per *F* dividatur, quotus est *G*. Recordati igitur factum ex quo in divisorem esse dividendo aequale, sumta hac propositione pro majore & anteriori pro minore, inferimus conclusionem: Factum ex *F* in *G* esse numero *E* aequale, seu  $F \cdot G = E$ . Jam cum vi progressionis terminus ultimus sit factum ex penultimo in secundum, per intuitum vero pateat, *E* esse terminum ultimum, *D* penultimum & *A* secundum, inferitur per syllogismum biformem (§. 489.) aut, si mavis, vi syllogismi biformis per consequentiam immediatam (§. 491. 489.).

(*Wolfii Logica*)

H h h

Ergo

Ergo factum ex  $D$  in  $A$  est aequale numero  $E$ , seu  $D \cdot A = E$ . Coperferentes inter se conclusiones  $F \cdot G = E \& D \cdot A = E$ ; videmus facta  $F \cdot G \& D \cdot A$  esse aequalia eidem numero tertio  $E$ . Recordati axiomatis: *Aequalia eidem tertio sunt aequalia inter se*, per immediatam consequentiam (§. 451.) inferimus: Ergo facta aequalia eidem numero tertio sunt aequalia inter se. Sumta hac conclusione pro maiore & propositione modo intuitive agnita pro minore, inferimus porro: Facta  $F \cdot G \& D \cdot A$  esse inter se aequalia, seu  $F \cdot G = D \cdot A$ . Facta hæc contemplanti apparet, eadem esse numeros productos ex duobus aliis se mutuo multiplicantibus atque inter se aequales. Jam cum memoriam subeat propositio: *Si duo numeri producantur ex duobus aliis se mutuo multiplicantibus fuerintque inter se aequales, efficientes sunt reciproce proportionales*; sumta hac pro maiore, anteriore autem intuitive agnita pro minore inferimus: Ergo Efficientes factorum  $F \cdot G \& D \cdot A$  sunt reciproce proportionales, seu  $F : A = D : G$ . Ex demonstratis constat,  $F \& A$  esse terminos in ratione sua minimos &  $D$  atque  $G$  ipsis proportionales. Quamobrem ubi in memoriam nobis revocamus propositionem: *Termini in ratione sua minimi aequè metiuntur terminos ipsis proportionales*, sumta hac propositione pro maiore & anteriori pro minore per syllogismum biformem inferimus: Ergo numeri  $F \& A$  aequè metiuntur numeros  $D \& G$ , nempe  $F$  ipsum  $D \& A$  ipsum  $G$ . Eodem modo si ponatur  $F$  metiri  $D$  per  $H$ , ostendetur, numeros  $F \& A$  aequè metiri  $C$  atque  $H$ . Si porro ponatur  $F$  metiri  $C$  per  $I$ , ostendetur ut ante, numeros  $F \& A$  aequè metiri  $B$  atque  $I$ . Si denique ponatur  $F$  metiri  $E$  per  $L$ , ostendetur denuo ut ante numeros  $F \& A$  aequè metiri  $A \& L$ , nimirum  $F$  ipsum  $A \& A$  ipsum  $L$ . Hinc per consequentiam immediatam tandem infertur (§. 458.): Ergo  $F$  metitur  $A$ , hoc est, numerus, qui metitur in progressionem geometricam ab unitate incipiente terminum ultimum, metitur etiam ab unitate proximum. Immo generaliter demonstratum est, quod metiatur omnes inter primum & ultimum intermedios. Cur conclusio ultima admittenda sit tanquam vera, ex ratione logica patet (§. 558.), qua nititur modus demonstrandi (§. 559.). Ratio vero particularis, cur iste demonstrandi modus hic habeat locum, inde est, quod vi progressionis geometricæ ab unitate incipientis numeri  $F \& A$  aequè metiuntur sibi proportionales,  $D \& G$ ,  $C \& H$ ,  $B \& I$ ,  $A \& L$ , etsi  $F$  metiatur  $A$ , perinde ac numeri primi inter se in omni casu sibi proportionales metiuntur.

Obiter hic observo, occurrere demonstrationes mathematicas, per quas propositio demonstrata non agnoscitur vera, nisi conclusionem sic illatam

*illatam admitti debere, ex Logica pateat: Ejus sane rerexemplum præbet demonstratio præsens. Etli enim quis Logica artificiali non instructus admiserit, duarum propositionum contradictoriarum alteram esse debere veram, alteram falsam; non tamen absque probatione patet, cur eam potius, quæ ex altera colligitur, quam quæ demonstrationem per modum præmissæ ingreditur, pro vera habere debeat. Immo cum non omnes omnino argumentandi modi manifesta gaudeant vi illationis, quemadmodum facile largietur, qui omnem syllogismorum ambitum attenta mente fuerit emensus; omnes tamen demonstrationem ingrediantur (§. 555.): evidens est, certitudinem de veritate propositionis demonstratæ a rationibus logicis una pendere. Hinc non mirum, ad demonstrationes geometricas primum animum appellentes vim illam non percipere, qua mens impellitur ad assensum.*

Nec hoc negligi debet, quod ex præsentī demonstratione pateat, *syllogismum biformem in demonstrationibus geometricis usum habere, sicuti jam supra monuimus (§. 555.). Quemadmodum vero in præsentē exemplo ex propositione negativa collegimus affirmativam veram; ita in exemplo motus celerrimi ex falsa affirmativa colligitur negativa vera. Demonstrationem ipsam non apponimus prolixitatis vitandæ gratia.*

#### §. 560.

Quoniam demonstratio tam ostensiva (§. 551. 552.), quam apogogica (§. 553. 559.) continua syllogismorum omnis generis concatenatione absolvitur; *syllogismorum indispensabilis in demonstrando usus in dubium revocari nequit.*

Equidem non ignoro, esse hodie complures, qui aliter sentiunt, inter tricas & nugas scholasticorum referentes, quæ de forma syllogismorum præcipiunt Logici, cum multo facilius veritas propositionis percipiat, si quis ad notiones subiecti & prædicati attendens advertat, num hæc in illa contineatur: quam sententiam amplexus est ipse de *Tschirnhausen* in *Medicina Mentis* part. 2. p. m. 28. 29. Enimvero per præcipientiam ita judicari, demonstrationum mathematicarum analysis probat, cujus exempla in anterioribus (not. §. 551. 552. 553. 559.) dedimus. Et suo tempore in *Psychologia* ostensurus sum, utique in anima, dum demonstrationem concipit, singulis ratiociniis singulisque earum partibus esse locum, utut non semper diversos animæ actus, qui iisdem respondent, distincte discernere valeamus, immo non cujusvis sit distinctam exhibere demonstrationis, quam bene concipit, analysis. Quod si quis Logicam addiscere non dedignatus in exercitiis istius-

modi analyſium frequens fuerit ; is demonſtrandi habitum multo illuſtriorem ſibi comparabit , quam ab aliis fieri ſolet , qui formam demonſtrationum nonniſi confuſe intuentur. *Tſchirnhuſius* l. c. regularum logicarum notitiam cum habitu hoc perperam confundit : id quod minime feciſſet , ſi ad communes ratiocinandi leges ratiocinia ſua ſtrictius compoſuiſſet. Conferenda hic ſunt , quæ ſupra (not. §. 545.) monuimus. Neque illud negligendum , quod habitu demonſtrandi inſtructus non omnium , quos edit , actuum ſibi ſit conſcius : id quod in omni habitu , ipſius quoque corporis , accidit.

## §. 561.

*Principiorum demonſtrandi deſinitio.*

*Principia demonſtrandi* appellantur præmiſſæ ſyllogiſmorum , qui in demonſtratione concatenantur , vel ex nozione ſubjecti derivatæ , vel aliunde adſcitæ.

E. gr. In demonſtratione elementari de æqualitate angulorum in parallelogrammo diametraliter oppoſitorum utimur tanquam principiis definitione parallelogrammi , duobus axiomatis , *æqualia eidem tertio ſunt æqualia inter ſe & ſi ab æqualibus idem ſubtrahas , quæ reſtinentur æqualia ſunt* , atque theoremate , *ſi due parallela a tertia ſecentur , anguli interni oppoſiti ſunt æquales duobus rectis*.

## §. 562.

*Quenam ſint principia demonſtrandi.*

Quoniam in demonſtratione non utimur præmiſſis , niſi definitionibus , experiētiis indubitatis , axiomatis & propoſitionibus jam demonſtratis (§. 498.) ; *in numerum principiorum demonſtrandi non aſſumuntur niſi definitiones , experiētiæ indubitæ , axiomata & propoſitiones jam demonſtrate (§. 561.)*.

Vidimus in exemplo modo (not. §. 561.) allato non alia demonſtrandi principia , quam definitionem , duo axiomata & theorema , quod ante jam demonſtratum ſupponitur. In demonſtratione logica (§. 177.) , cuius ſupra exhibuimus analyſin logicam (not. §. 552.) , principiis utimur definitionibus modi atque notæ , duobus axiomatis , *quæ mutabilia ſunt , conſtanter non inſunt & quæ conſtanter non inſunt , ea rebus agnoſcendis & a ſe invicem diſcernendis inſervire nequeunt* , atque theoremate in anterioribus demonſtrato , quod in definitione enumeranda notæ nec plures , nec pauciores , quam quæ ad definitum agnoſcendum atque ab aliis diſtinguendum ſufficiunt. Experiētiæ ingrediuntur demonſtrationes phyſicas atque morales tantum non ſemper.

## §. 563.

§. 563.

Quæ de consignandis demonstrationibus iisdemque cum aliis communicandis dicenda sunt, ea inferius trademus suis locis. Fieri autem sæpissime solet, ut formatis judiciis intuitivis sive ex definitione, sive ex hypothese propositionis, deficient propositiones aliæ, quibus majoris loco utamur ad conclusiones ex istis judiciis inferendas. Quamobrem *varius opus est artificii, quibus propositio demonstranda reducitur ad eam formam, qua ex nobis cognitis principiis demonstrabilis efficitur.* Equidem dubium non est, generales quasdam de his artificiis regulas præcipi posse: Sed ex ad *Artem inveniendi* spectant, quam a Logica distinguimus & suo tempore finitis universæ philosophiæ partibus trademus. Etsi enim Logicæ in ipsa arte inveniendi multus atque præclarus sit usus, sola tamen eam minime exhaurit. Cumque nos non tradamus nisi ea, quorum rationem reddere valemus, vel quæ firma experientia nixa ad aliorum rationem reddendam serviunt, cognitioni quippe philosophicæ intenti (§. 6. *Proleg.*), regularum autem artis inveniendi generalium ratio a notionibus ontologicis & psychologicis facultatum animæ, specialium vero a principiis disciplinarum specialium pendet; res ipsa minime patitur, ut de arte inveniendi in Logica dicamus, nisi quatenus ejus in eadem usus absque aliis principiis intelligi potest. Saponimus itaque ista demonstrandi artificia, quorum tamen hic mentio fieri debebat, ne tyronibus insufficientia de demonstratione tradidisse videamur, ubi *præparationem*, quæ demonstrationem præcedit, per regulas nostras non patere animadvertunt. *Præparationis* enim nomine comprehenduntur illa artificia, quibus propositio ex principiis nobis cognitis redditur demonstrabilis.

Scholion generale.

Demonstrationes Geometriæ elementaris abunde docent, istiusmodi præparatione quam sæpissime esse opus. Ita paulo ante in exemplo demonstrationis indirectæ (not. §. 553) ex supposito communi centro C dicitur recta CA ad punctum contactus A & altera CD secans circumulum interiore in B & exteriorem in D, ut ope axiomatis de æqualitate radiorum ejusdem circuli demonstratio apogogica absolvi queat. Si-

Fig. 5.

Hh h 3

similiter

Fig. 4.

Fig. 7.

militer in demonstratione offensiva chordæ AB per radium CD bisecta preparatio absolvitur ducendo rectas CA, CB, AD & DB. *Euclides* 32. Elem. I. demonstraturus, si trianguli ABC latus unum BC continetur in D, fore angulum externum ACD duobus internis oppositis A & B simul sumtis æqualem, theorema ad demonstrationem præparat ducendo EC lateri BA parallelam. Neque vero istiusmodi præparationibus tantum locus est in Geometria, sed in aliis quoque disciplinis. Sane ipsimet in Logica jam aliquoties theorema ad demonstrationem præparavimus. Ita demonstraturi, quando conclusio falsa esse debeat, si alterutra præmissarum falsa fuerit, omnes syllogismos categoricos reduximus ad hunc generalem: Quicquid sub universali A per B determinato continetur, ei convenit prædicatum C. Atqui D continetur sub A per B determinato. Ergo ei convenit prædicatum C (§. 538. 539. 540.). Similiter demonstraturi, quando propositiones hypotheticæ indefinitæ oppositæ æquivalent contradictoriis, propositiones istas reduximus ad formulas generales: Hoc universale, quod nomine A designatur, in hypothesi C est B & hoc universale A in hypothesi C non est B (§. 309.). Porro demonstraturi definitionem æquivalere propositioni universali præparamus theorema ad demonstrationem, dum definitum concipimus tanquam ens, cui nomen istud convenit, & notionem eidem in definitione tributam tanquam attributum ejusdem entis (§. 254.): id quod aliquid fictitii habet, suo tempore in Arte inveniendi explicandum, ubi de *fictionibus heuristics* acturi sumus, quibus doctrina ontologica cum psychologica de facultate imaginandi faciem præferet.

## CAPUT III.

## DE CERTO, INCERTO ATQUE PROBILI.

## §. 564.

*Certi atque  
incerti defini-  
tito.*

**S**I agnoscimus, propositionem esse veram, vel falsam, *propositio* dicitur nobis esse *certa*: Quod si non agnoscimus, utrum ea vera sit, an falsa, *incerta* vocatur.

E. gr. Per definitionem circuli intelligimus, quod omnes radii sint æquales; propositio igitur hæc, *omnes radii ejusdem circuli sunt inter se æquales*, certa est. Qui demonstrationem supra (not. §. 551.) allatam tenet, is agnoscit, veram esse propositionem, *quod in parallelogrammo anguli*

*guli diagonaliter oppositi aequales sint* ; ea igitur propositio ipsi certa est. Qui vero vim demonstrationis non perspicit, sive quod præmissas ignoret, sive quod formam demonstrationis animo nondum habuerit comprehensam, vel demonstrationis prorsus ignarus, vel præsentem sibi distincte non repræsentans; ei propositio incerta est. Similiter *solem lucere* cum oculorum testimonio pateat, adeoque veram esse ipso sensu constet propositionem *sol lucet* ; propositio hæc certa est in universum omnibus, qui oculorum usu pollent.

## §. 565.

Quoniam notio certi atque incerti relativa est, cum respectum ad cognoscentem involvat; fieri potest, ut eadem propositio uni sit certa, alteri vero incerta (§. 564.).

*Cur eadem propositio uni certa, alteri incerta.*

Nimirum etsi propositio omnis in se vel vera sit, vel falsa, quemadmodum mox ostendemus; non tamen omnes agnoscunt, utrum vera sit, an falsa. Non igitur mirum, si una certa sit, quæ incerta alteri (§. 564.). Exempla modo allata assertum illustrent.

## §. 566.

*Omnis propositio vel vera est, vel falsa.* Falsa nimirum est propositio, quæ non est vera (§. 505.). Quamobrem cum propositiones: *Propositio A vera est & Propositio A non vera est*, sint contradictoriæ (§. 288.), ex duabus autem contradictoriis altera necessario vera, altera necessario falsa (§. 532.); omnis omnino propositio aut vera erit, aut falsa.

*Cur omnis propositio vel vera, vel falsa.*

E. gr. Aut verum est, *omnes radios ejusdem circuli inter se esse æquales*, aut falsum est. Aut verum est, *solem lucere*, aut falsum est.

## §. 567.

*Si prædicatum subiecto convenire observamus, propositio nobis certa est* Si enim prædicatum subiecto convenire observamus, propositionem veram esse agnoscimus (§. 517.), adeoque falsam esse non posse novimus (§. 566.). Certa igitur nobis est propositio (§. 564.).

*Propositiones a posteriori certa.*

E. gr. Nivi convenire albedinem ipso oculorum judicio constat. Veram adeo esse cum agnoscamus propositionem, *nix est alba*; eadem nobis certa est. Incerta vero cæcis est, qui oculorum usu destituti nec nivem, nec ejus albedinem vident. Enimvero ne videamur

mur observare, quod prædicatum subiecto alicui conveniat, quod tamen eidem non convenit, sicque decepti certi esse putemus de propositionis veritate, quemadmodum sæpissime accidit; paulo post distinctius disquiremus, qua cautione circa judicia intuitiva opus sit, quæ ab experientia derivantur.

## §. 568.

*Propositiones  
a priori  
certæ.*

*Si prædicatum subiecto convenire sive directe, sive indirecte demonstrare valeamus, propositio nobis certæ est.* Qui enim demonstrare potest propositionem sive directe, sive indirecte, is eam veram esse agnoscit (§. 544. 557.), adeoque falsam esse non posse novit (§. 566.). Certa igitur ipsi est propositio (§. 564.).

Exemplum ante dedimus de æqualitate angulorum in parallelogrammo diagonaliter oppositorum (not. §. 564.). Atque ea ratio est, cur omnes demonstratæ a Geometris propositiones sint certæ, quam primum demonstrationes comprehenduntur. Eadem est ratio, cur nos ad certitudinem philosophiam reducturi demonstrationibus studemus.

## §. 569.

*Cujusnam sit  
ea certitudo.*

Quoniam demonstratio omnis, tam ostensiva (§. 551. 552.), quam apogogica (§. 553. 559.) mera syllogismorum concatenatione absolvitur, non una ratione instituta, præmissæ autem omnes veræ esse debent, ut vera inferatur conclusio (§. 537.); qui demonstrationis vim percipere, seu ad assensum propositioni demonstratæ præbendum compelli debet, is & singularum præmissarum veritatem perspicere, & formam demonstrationis non modo animo comprehensam habere, sed particularem quoque, quæ ipsi occurrit, generali convenientem agnoscere tenetur.

E. gr. Qui vi demonstrationis determinari debet, ut assensum præbeat propositioni: *In parallelogrammo anguli diagonaliter oppositi æquales sunt*; illi non modo definitio parallelogrammi & veritas theorematum de symptomatibus parallelarum atque axiomatum, quod æqualia eidem tertio sint æqualia inter se & quod residua æqualia sint, si ab æqualibus idem auferas, perspecta esse debet (not. §. 551.), verum idem etiam agnoscere debet, quod tali syllogismorum concatenatione non inferatur nisi conclusio vera.

## §. 570.



## §. 570.

*Veritatis ergo propositionis demonstratæ non sunt certi, qui Demonstra-*  
*præmissæ vel unus syllogismus concatenatos ingredientis veritatem tionis vim*  
*ignorant; 2. qui nullam demonstrationis genuinæ formam animo qui non per-*  
*comprehensam habent; 3. qui non perscipiunt, nam forma demon-*  
*strationis præsentis sit genuina.*  
*cipiant.*

E. gr. Si quis ignorat, utrum verum sit, nec ne, quod duo anguli inter-  
 ni oppositi inter lineas parallelas a transversa sectas sint æquales duobus  
 rectis, is, si vel maxime in demonstrando fuerit optime versatus atque in  
 casu præsentia formæ demonstrationis genuina non esse aberratum ab-  
 unde perspicitur, nondum tamen novit, utrum in parallelogrammo anguli  
 diagonaliter oppositi æquales sint duobus rectis, an vero inæquales (§ 551.).  
 Si cui principia demonstrationis singula, veluti in præsentia casu defini-  
 tio parallelogrammi, theorema modo commemoratum atque duo axio-  
 mata paulo ante (not. §. 569.) adducta, fuerint perspecta; is tamen non-  
 dum certus erit veritatis propositionis de æqualitate angulorum in pa-  
 rallelogrammo diagonaliter oppositorum, ubi formam demonstrationis  
 ostensivæ nec ex Logica sibi familiarem reddidit, nec ipso usum confu-  
 sam. Quandam illius ideam animo ingeneravit. Immo si vel maxime  
 singula ista demonstrationis principia optime noverit atque ideam for-  
 mæ demonstrationis sive confusam ipso usu, sive distinctam ex Logi-  
 ca sibi acquisiverit; quod si tamen non attenderit, an præsentis demon-  
 strationis forma ideæ illi respondeat (§. 48. 349.), an ab eadem aber-  
 reret, syllogismis in forma peccantibus, vel non legitime concatenatis;  
 propositio nostra eidem certa esse nequit. Hinc intelligitur ratio, cur  
 tyrones theoriæ geometricæ demonstrationum *Euclideanarum* vim, qua  
 assensus vel ab invito extorquetur, non percipiunt sub initium tracta-  
 tionis, quam in progressu sentiunt. Nec minus patet ratio, cur in de-  
 monstrando exercitati idem experiantur, modo tyrones ad elementa  
*Euclidis* delati, ubi novum rerum campum ingrediuntur, quarum no-  
 tiones ipsis nondum sunt familiares, ut, quoties iis aliqua offertur, ejus  
 veritatem una percipiunt. Hinc etiam liquet, cur demonstratio apo-  
 gogica, qua ex propositione data, vel assumpta inferitur ejus contradicto-  
 ria, non convincat attentum, nisi fundamentum illationis habuerit ex  
 Logica perspectum (§. 558.).

## §. 571.

*Si quis demonstrare valet, prædicatum repugnare suo sub- Certitudo*  
*(Wolffii Logica.)* *jecto; falsitatis.*

Iii

*propositionis demonstratione nixa.* *jecto; ei propositionem esse falsam certum est.* Falsa propositio est, si prædicatum notioni subjecti repugnat (§. 526.). Falsam igitur esse agnoscit, qui novit, verum esse, quod prædicatum notioni subjecti repugnet. Enimvero qui demonstrare valet, prædicatum subjecto suo seu notioni ejus repugnare, is novit, verum esse, quod prædicatum notioni subjecti repugnet (§. 544, 557.). Certum igitur ipsi est, quod falsa sit propositio (§. 564.).

E. gr. Per demonstrationem apogoticam patet, repugnare circulis se intus tangentibus, ut idem habeant centrum, cum posito eodem utriusque centro sequatur absurdum, scilicet quod pars si toti æqualis (not. §. 553.). Qui igitur vim illius demonstrationis percipit, illi certum est falsam esse propositionem, qua affirmatur, *circulos se intus tangentes habere idem centrum.*

## §. 572.

*Axiomata & postulata enuncerta.*

*Axiomata certa sunt, itemque postulata.* Axiomata & postulata sunt propositiones indemonstrabiles (§. 267. 269.), atque adeo terminis intellectis patet, prædicatum subjecto convenire, vel non convenire, quod vel eidem tribuitur, vel ab eodem removetur. Veritas itaque axiomatum & postulatorum cum illi sit perspecta, qui terminos eadem ingredientibus intelligit (§. 505.); axiomata atque postulata certa sunt (§. 564.).

Ita certum est totum esse majus sua parte itatim omnibus, qui terminos *totius, partis* atque *majoris* intelligunt, hoc est, vel confusas notionem terminis respondentibus habent. Similiter qui novit definitionem circuli & radii, vel notionem confusam habet; is veritatem axiomatis perspicit, *omnes radii ejusdem circuli sunt inter se æquales*, atque adeo axioma ipse certum est.

## §. 573.

*Requisitum ad veritatem definitio.*

*Requisita ad veritatem* appello ea, per quæ prædicatum subjecto tribuendum determinatur.

E. gr. Ad vegetationem plantarum requiritur semen fecundum, terra, cui semen committitur, ær libere fluens, calor solis, pluvia atque ros. Quamobrem si noverim, semen fecundum terræ fuisse commissum in libero aëre, quo solis radii per diem pertingunt, pluviamque atque rorem alternatim terram irrigasse; omnia adesse novi, quæ ad hoc requiruntur, ut plantæ ibi locorum crescant.

Id

In moralibus atque politicis casus quilibet determinatur per circumstantias, quibus omnibus præsentibus, intelligitur casum istum adesse. Circumstantiæ igitur illæ sunt requisita ad veritatem illius casus, ut nempe affirmari possit, casui isti hic esse locum. Per notas, quæ definitionem ingrediuntur, definitum determinatur in suo genere suaque specie. Notæ igitur sunt requisita ad veritatem definiti, ut nempe ex iis præsentibus concludi possit, definitum subiecto alicui esse tribuendum: i quod deinceps expressius ostendemus.

## §. 574.

*Qui omnia requisita ad veritatem adesse agnoscit, is veritatem certo cognoscit.* *Veritas quando certo cognoscitur.* Qui enim omnia requisita ad veritatem agnoscit, is novit adesse ea omnia, per quæ prædicatum subiecto tribuendum determinatur (§. 573.). Qui vero novit, prædicatum subiecto tribuendum per hæc determinari & ea omnia hic adesse, is determinabilitatem prædicati per notionem subiecti distincte agnoscit (§. 88.). Quamobrem cum veritas sit determinabilitas prædicati per notionem subiecti (§. 513.): veritatem distincte agnoscit, consequenter qui omnia requisita ad veritatem adesse agnoscit, is veritatem certo cognoscit (§. 564.).

Applicemus exempla modo (not. §. 573.) proposita ad theorema præsens, ut facilius intelligatur. Si cui fuerit perspectum ad vegetationem plantarum non requiri, nisi ut semen fecundum terræ committatur in aëre libero, quam sol interdiu calore suo fover atque pluvia cum rore irrigat, nec minus noverit in præsentia aliquo casu hæc omnia facta esse, is veritatem hujus propositionis certo cognoscit, quod ibi crescant plantæ, etsi ibi locorum non fuerit, ubi crescunt. Utuntur etiam hoc argumentandi modo homines quam sæpiissime in præsentia casu. Similiter si in moralibus vel politicis mihi fuerit perspectum, casum A per illas circumstantias determinari, atque mihi constet, omnibus istis circumstantiis hic esse locum; casui quoque A hic locum esse certo agnosco. Ita etiam qui novit notas singulas, quæ definitionem aliquam ingrediuntur, subiecto cuidam inesse; is certo novit, ens hoc referri debere ad hoc genus vel ad hanc speciem. Attento haud diffuciliter pater, eum, qui omnia requisita ad veritatem adesse agnoscit & inde veritatem colligit, applicare dictum de omni & nullo (§. 348. 349. 350.): quæ applicatio cum consistat in syllogismo, cujus utraque præmissa vera est, conclusio quoque ejus vera esse debet (§. 537.)

consequenter syllogismus iste demonstrationis locum tuetur (§. 555.) atque adeo certam cognitionem parit (§. 568.). Syllogismus ille catholicus, cujus hic meminimus, istiusmodi est: *Ubi adsunt omnia ista requisita, ibi verum est, subjecto hoc prædicatum convenire.* Atqui hic adsunt omnia ista requisita. Ergo hic verum est, subjecto hoc prædicatum convenire.

## §. 575.

*Rationes,  
cur prædica-  
tum conveni-  
at subjecto,  
quam sint.*

Quoniam per rationem intelligimus, cur aliquid sit, vel fiat (§. 4. *Prolg.*), ex iis autem, per quæ prædicatum subjecto tribuendum determinatur, agnoscitur, prædicatum subjecto convenire (§. 219.); ea, per quæ prædicatum subjecto tribuendum determinatur, sunt rationes, cur prædicatum subjecto conveniat, consequenter *singula requisita ad veritatem sunt rationes partiales, cur prædicatum subjecto conveniat, & omnia simul sumta constituunt rationem sufficientem.*

E. gr. Rationes, cur alicubi crescant plantæ, sunt, quod semen fecundum terræ fuerit commissum, quod sol calore suo terram foveat, quod pluvia terram, ros plantas irriget. Omnes rationes simul sumtæ constituunt rationem sufficientem, cur hic loci crescant plantæ.

## §. 576.

*Qui eas co-  
gnoscat.*

Hinc consequitur, eum, qui omnia requisita ad veritatem cognoscit, rationem sufficientem cognoscere, cur prædicatum subjecto tribuendum (§. 575.).

Exemplo modo (*not. §. 575.*) allato præsens quoque corollarium, quod ex propositione antecedente per immediatam consequentiam infertur, illustratur.

## §. 577.

*Quando ra-  
tio insuffi-  
ciens.*

Quoniam omnia requisita ad veritatem simul sumta constituunt rationem sufficientem (§. 575.), quedam eorum nonnisi rationem insufficientem præbent. Unde porro sequitur, eum, qui aliqua tantum requisita ad veritatem cognoscit, cur prædicatum subjecto tribuendum sit, rationem insufficientem cognoscere.

E. gr. Qui novit semen fecundum in libero aëre terræ fuisse commissum, ignorat autem, num tempestatis serenæ atque pluvix alternatio congrua facta sit, is aliqua tantum ad vegetationem plantæ requis-

quisita agnoscit, cetera ignorat, atque adeo non nisi insufficientem rationem perspicit.

§. 578.

Si prædicatum subiecto tribuitur ob rationem insufficientem, *propositio* dicitur *probabilis*. Patet adeo, in *probabili propositione prædicatum subiecto tribui ob quædam requisita ad veritatem*. *Probabilis propositio definitio.*

Ita qui semen sæcundum in libero aëre, quo solis radii, ros atque pluvia pertingere possunt, terræ committens iudicat, *plantas optime vegetatum iri*; is probabiliter iudicat, cum aliqua saltem norit ad veritatem requisita, nescius adhuc, num tempestas serena atque pluvia ita sit alternatura, quemadmodum vegetationi commodum accidit. Similiter cum agnoscimus, in Luna esse terram perinde ac aquas, illam calore solis foveri & pluvia atque rore irrigari, atque ignari, quod terræ committantur semina, concludimus, *dari in Luna plantas*; prædicatum subiecto tribuitur ob rationem insufficientem, atque adeo nonnisi probabilis est propositio. Ut quid actu fiat, requiritur non modo intrinseca possibilitas, sed præterea quoque causa actum determinans. Quodsi quis hac neglecta sumit, *omne intrinsece possibile aque ad actum deduci posse*; is probabiliter iudicat. Ita *Hugenius* in Tractatu de ratiociniis in ludo alexæ sortem ludentium determinaturus sumit, *sex diversos unius tessera jactus aque facile evenire posse*. Unde cum quinque sint jactus, quibus preedit numerus a senario diversus, unus autem nonnisi, qui exhibet senarium; multo probabilius iudicatur, ut *quis una tessera primo jactu non jaciatur senarium quam ut eundem jaciatur*.

§. 579.

*Probabilior igitur est propositio, si subiecto prædicatum tribuitur ob plura requisita ad veritatem, quam si tribuitur ob pauciora* (§. 578.). *Quidnam probabilius.*

E. gr. Si constet, solo fertili commissum esse semen sæcundum, ignorata adhuc tempestatis variatione; probabilius est messem fore opimam, quam ubi vel de solis fertilitate, vel de seminis sæcunditate non constiterit.

§. 580.

*Notæ definitionem ingredients sunt requisita ad id, ut definitum possit tribui subiecto*. Etenim vi Dicti de omni & nullo *Requisita ad defini-*  
Iii 3 *ad*

*tionem in  
dato casu ap-  
plicandam.*

ad definitiones exrensi definitum convenit subiecto, cui conveniunt notæ in definitione enumeratæ simul (§. 349.). Præter notas igitur definitionem ingredientibus non requiritur aliud, ut definitum subiecto tribui possit, atque adeo ipsæ requisita ad veritatem ejus propositionis censentur, qua definitum tanquam prædicatum tribuitur subiecto.

Exemplum jam dedimus supra (not. §. 255.).

§. 581.

*Probabilis  
applicatio  
definitionis.*

*Quodsi ergo ob aliquas tantum notas in subiecto animadversas definitum eidem tribueris, propositio nonnisi probabilis est.* Notæ enim aliquæ sunt quædam saltem ad veritatem requisita (§. 580.). Probabilis autem est propositio, in qua prædicatum subiecto tribuitur ob quædam saltem ad veritatem requisita (§. 578.). Ergo &c.

E. gr. Notæ, quæ ingrediuntur definitionem figuræ ordinatæ, duæ sunt, laterum nempe atque angulorum æqualitas. Quodsi cognoscas in dato aliquo casu, figuram habere æqualia latera, ignorans vero, non æquales quoque sint anguli ponas, *figuram esse ordinatam*; tum de figura judicium nonnisi probabile est.

§. 582.

*Probabile de  
genere & spe-  
cie entis ju-  
dicium.*

Quoniam per definitiones res ad suas species & genera distincte reducuntur (§. 179.), *qui subiecto obvio tribuit definitum ob aliquas tantum notas, quæ definitionem ingrediuntur, in eo animadversas, is nonnisi probabiliter de specie atque genere subiecti judicat* (§. 581.).

Vulgo etiam accidit idem in applicandis notionibus confusis, quemadmodum loquuntur exempla de ente non satis noto sibi oblato judicantium, quidnam sit.

§. 583.

*Requisitum  
ad propositi-  
onis categori-  
cæ veritatem.*

*In propositionibus categoricis requisitum ad veritatem est definitio.* In propositione enim categorica prædicatum subiecto absolute (§. 216.), adeoque sub conditione definitionis tribuitur (§. 225.). Cum igitur eidem conveniat prædicatum, propterea quod definitio convenit; prædicatum per definitio-

tionem determinatur (§. 219.), atque adeo definitio est requisitum ad veritatem (§. 573.).

E. gr. In propositione categorica, *in triangulo rectilineo tres anguli junctim sumti sunt duobus rectis aequales*, ratio angulorum ad rectum prædicatur de triangulo rectilineo ob definitionem, quod *terminetur tribus lineis rectis*. Ut igitur figuræ tribuere possis æqualitatem omnium angulorum simul sumtorum cum duobus rectis; ante constare debet, quod tribus lineis rectis terminetur.

§. 584.

In propositionibus hypotheticis requisita ad veritatem sunt definitio atque conditio subjecto adjecta, aut in hypotheticis ad formam categoricarum reductis definitio atque determinatio subjecti. In propositione hypothetica prædicatum tribuitur subjecto sub adjecta conditione (§. 218.). Cum igitur prædicatum eidem conveniat, propterea quod eidem & definitio, & conditio adjecta convenit; prædicatum per definitionem atque conditionem adjectam una determinatur (§. 219.), etsi non integra semper definitione opus sit. Definitio igitur, vel aliqua saltem ejus pars, atque adjecta conditio subjecti sunt requisita ad veritatem (§. 573.). Quod si propositio hypothetica ad formam categoricæ reducatur, conditio adjecta abit in ejus determinationem (§. 227. 228.). Unde patet, requisita ad veritatem propositionis hypotheticæ esse definitionem & determinationem subjecti (§. 573.).

*Requisitum ad veritatem propositionis hypotheticæ.*

E. gr. Hypothetica est propositio: *Si quadrilaterum sit circulo inscriptibile, anguli diagonaliter oppositi simul sumti sunt duobus rectis æquales*. In ea ratio angulorum diagonaliter oppositorum simul ad rectum de quadrilatero prædicatur sub ea conditione, quod circulo inscribi possit. Ut adeo prædicatum tribui possit subjecto, requiritur & ut sit quadrilaterum, consequenter ut ei conveniat quadrilateri definitio (§. 349.), & ut circuli inscriptibile sit.

§. 585.

Si in syllogismo categorico alterutra præmissarum fuerit probabilis, conclusio probabilis est. Ex demonstratione theorematis de conclusione falsa ex falsa majore, sed minore vera, illata (§. 538.) patet, omnes syllogismos categoricos ad hunc generalem

*Conclusio syllogismi, quando probabilis.*

ralem reduci posse: *Quicquid sub universali A per B determinato continetur, ei convenit prædicatum C. Atque D continetur sub A per B determinato. Ergo ei convenit C.* Ponamus jam majorem non esse nisi probabilem: Ei, quod sub universali A per B determinato continetur, non nisi probabiliter convenit prædicatum C. Quoniam igitur minor vera est *per hypoth.* D sub A per B determinato continetur. Ergo ei non nisi probabiliter convenit C.

Ponamus porro, minorem non esse nisi probabilem; probabile saltem est: D contineri sub A per B determinato. Quoniam igitur, posita majore syllogismi categorici, ponitur conclusio sub conditione minoris (§. 465.); evidens est, si minor saltem probabilis sit, nec conclusionem nisi ut probabilem admitti posse, hoc est, probabile tantum esse, quod ipsi D conveniat prædicatum C.

## §. 586.

*Alius casus.* Quodsi ergo hæc conclusio denuo ingreditur tanquam præmissa syllogismum alium, conclusio rursus probabilis esse debet (§. 585.). *Per syllogismorum itaque concatenationem, quorum vel unum ingreditur præmissa aliqua probabilis, non infertur nisi conclusio probabilis.*

## §. 587.

*Probationis  
probabilis  
definitio.*

*Probatio* hinc dicitur *probabilis*, si syllogismos, qui concatenantur, ingrediuntur præmissæ probabiles.

Exempla istiusmodi probationum in Astronomia occurrunt, ubi observationum nonnulla probabiliter statuuntur, unde legitima consequentia inferuntur alia. Occurrent quoque exempla in ceteris philosophiæ partibus.

## §. 588.

*Differentia  
probationis  
probabilis a  
demonstratione.*

*Probatio igitur probabilis a demonstratione non differt nisi principiis.* Nam demonstrationis principia sunt definitiones, axiomata, experientiæ indubitata & propositiones jam demonstratae (§. 562.), adeoque non nisi certa (§. 567. 568. 572.); probabilis vero admittit principia probabilia (§. 561. 587.). In de-



demonstratione autem & in probatione probabili syllogismi inter se concatenantur (§. 498. 587.). Quoniam itaque in probatione non occurrit nisi syllogismorum concatenatio & syllogismi singuli suis constant præmissis, quæ vel ipsa principia sunt, vel conclusiones inde illatæ; ideo demonstratio atque probatio probabilis non differunt nisi principiis.

Non adeo opus est, ut formam probationis probabilis hic edoceamus. Eadem enim de eatenenda sunt, quæ de demonstrationis ostensivæ pariter (§. 551. 552.) atque apogogicæ forma diximus (§. 553. 559.):

§. 589.

*Si notio subiecti probabilis fuerit, propositio nonnisi probabilis est.* Etenim in propositionibus categoricis notionem subiecti definitio, in hypotheticis definitio cum conditione adjecta absolvit (§. 320. 225. 216. 218.). Jam cum & definitio, & conditio adjecta in probatione ingrediatur syllogismos per modum præmissarum, quibus rite inter se concatenatis tandem infertur propositio, cujus subiecti notio probabilis (§. 551. 552. 553. 559. 588.); quæ vero hoc modo infertur propositio tantum probabilis sit (§. 586.): evidens est propositionem nonnisi probabilem esse, si notio subiecti fuerit probabilis.

*Propositio probabilis ab notionem subiecti probabilem.*

E. gr. Campanella Medicinal. lib. 7. c. 1. art. 2. p. 598. notionem febriis probabiliter adstruit, quod sit bellum contra morbum potestativa vi spiritus initum, seu, quod sit spontanea extraordinaria spiritus agitatio inflammatioque ad pugnam contra irritantem morbificam causam. Omnes igitur propositiones, in quibus de febris prædicantur, quæ per hanc notionem determinantur, nonnisi probabiles sunt.

§. 590.

*Si nonnisi probabiliter constet, notionem subiecti, quæ in propositione certa supponitur, enti cuidam obvio convenire; prædicatum illi attributum nonnisi probabiliter huic tribuitur.* Omnis applicatio propositionum certarum in casibus obviis hoc syllogismo catholico continetur: Cui convenit notio subiecti, quæ in propositione certa supponitur, isti etiam convenit prædicatum. Atqui huic enti convenit notio subiecti, quæ in propositione certa

*Applicatio probabilis propositionum certarum.*

(Wolffii Logica)

Kkk

sup-

*supponitur.* Ergo *Huic enti etiam convenit prædicatum in propositione certa subiecto suo attributum* : id quod facile patet per Dictum de omni & nullo rite extensum (§. 348. & seqq.). Quodsi igitur in casu particulari nonnisi probabiliter constet, notionem subiecti, quæ in propositione certa supponitur, enti obvio convenire, quemadmodum postulat *hypothesis*; minor syllogismi catholici: *Huic enti convenit notio subiecti, quæ in propositione certa supponitur*, nonnisi probabilis est. Cum adeo syllogisimum ingrediatur præmissa probabilis; conclusio; *Huic enti convenit prædicatum, quod subiecto in propositione certa tribuitur*, nonnisi probabilis est (§. 585.).

Exempla in Astronomicis occurrunt, ubi, quæ in Geometria demonstrata sunt, subinde probabiliter applicantur ad siderum motus. Et quæ in moralibus atque politicis demonstrata sunt, quam sæpissime nonnisi probabiliter applicari possunt in vita communi. Sunt qui hanc applicationem probabilem cum praxi generali in disciplina tradenda confundunt, atque ideo negant, in philosophia practica tradi posse praxin certam: Quod perinde est ac si quis in Mathesi principiorum Geometriæ elementaris certitudinem in dubium vocare vellet, quod eadem in Astronomia nonnisi probabiliter applicari intelligit.

## §. 591.

*Cur propositio probabilis falsa esse possit.*

*Si requisita quedam ad veritatem desunt, quæ ob cetera præsentia ad se supponimus in propositione probabili; erit eadem falsa.* Etenim si desunt requisita ad veritatem, non omnia ad sunt, per quæ prædicatum subiecto tribuendum determinatur (§. 573.). Prædicatum igitur, quod subiecto nonnisi sub conditione horum requisitorum convenire potest (§. 219.), in præsentī casu eidem minime convenit. Propositio ergo, in qua eidem hoc non obstante tribuitur, falsa est (§. 505.).

## §. 590.

*Cur improbabilis possit esse vera.*

Quoniam propositio probabilis quæ opponitur propositioni improbabili est, quemadmodum veræ quæ opponitur falsa (§. 530.), cum scilicet fieri haud quaquam possit, ut utraque probabilis sit, consequenter idem simul sit & non sit; evidens est, *propositionem improbabilem posse esse veram.*

Que

Quoniam probabilis notio relativa, quæ respectum ad cognoscentem involvit (§. 578.); evidens est, respectu ejusdem subjecti cognoscentis hic affirmari, quod fieri minime possit, ut eadem propositio sit simul & probabilis, & improbabilis.

## §. 595.

Explicavimus quæ de probabilitate a principiis Logicæ pendent. Notio probabilitatis, quam (§. 578.) dedimus, fecunda est, ut plura inde deduci possint. Enimvero ad æstimandam probabilitatem opus est principiis specialibus, quæ a principiis ontologicis & philosophicis aliis pendent. Sed ea constituunt *Logicam probabilium*, quam in desideratis esse *Leibniti*us jam agnovit. Commodum accidit, si ea post artem inveniendi tradatur, propterea quod principia hujus artis in ea habeant locum. Immo cum *Logica probabilium* ostendat, quomodo veritates probabiles in apricum eruantur & gradus probabilitatis investigetur; altera pars artis inveniendi recte habetur. Atque hæc quidem ratio est, cur in discursu præliminari recensentes philosophiæ partes disertam ejus non fecerimus mentionem. Quemadmodum Mathematici artem inveniendi veritatem in *Mathesi* adeoque artis hujus partem sibi propriam in *Algebra* tradunt; ita *Logicæ probabilium* specimina dedere in sorte ludorum determinanda.

*Cur non plura de probabilitate tradantur.*

Pertinent huc præter *Hugenii* tractatum de ludo aleæ *Jacobi Bernoulli* Ars conjectandi. *Remondi de Monmort* Analysis ludorum a fortuna pendentium, cujus altera editio priori auctior cum epistolis *Jeanis & Nicolai Bernoullii* prodit, atque *Abrahami de Moivre* doctrina fortis, seu Methodus computandi probabilitatem in ludis. Principia, quæ his insunt, generalia suo trademus loco, quando de *Logica probabilium* ex instituto agemus.

## CAPVT IV.

DE SCIENTIA OPINIONE, FIDE AT-  
QUE ERRORE.

## §. 594.

*Scientiæ de-  
finitio.*

**S**I quis propositionem demonstrare noverit, is eam *scire* dicitur. Atque adeo *scientia* est habitus demonstrandi, quod affirmamus, vel negamus.

Definitionem hanc jam attulimus in *discursu praliminari* (§. 30.). Postquam vero abunde docuimus, quæ de demonstratione tenenda sunt (§. 551. & seqq.); ea jam plana & perspicua sunt, quæ in definitione scientiæ difficultatibus obsepta & obscura videri poterant. Neque vero definitio nostra abhorret a communi notione: vulgo enim scientiæ nomine designant cognitionem veritatis certam, quam quod demonstratio pariat, haud difficile ostendimus.

## §. 595.

*Scientia cer-  
tam parit  
cognitionem.*

*Scientia instructus certam habet rei cognitionem.* Qui enim scientia instructus est, is demonstrare valet, quod affirmat, vel negat (§. 594.). Certa igitur nobis cum sit propositio, quam sive directe, sive indirecte demonstrare valemus (§. 568.); scientia instructus certam rei cognitionem habet.

Obiter monemus in praxi Logicæ inprimis cavendum esse, ne terminorum significatus mutetur, quem nos iisdem fixum ac determinatum vindicavimus. Alias enim accider, ut, quæ a nobis recte statuuntur, temere applicentur.

## §. 596.

*Quomodo  
scientia com-  
paretur.*

Quoniam scientia in numero habituum est (§. 594.), habitus vero omnis exercitio comparatur, quod experientia obvia unicuique abunde constat; *scientia quoque exercitio comparari debet.* Cum itaque demonstrandi habitus sit (§. 594.), demonstrationes autem Geometrarum omnes demonstrandi leges adimpleant (§. 551. & seqq.); *scientiam tibi ipso usu comparabis, si in demonstrationibus mathematicis cum attentione sedulus verseris,*

vis, , *antequam ad cognitionem veritatum aliarum progrediaris.* Quoniam denique forma demonstrationis distincte delineatur in Logica, nec ea sine omni Logicæ theoria intelligi potest (§. 551. & seqq.); *ad scientiam tendens Logicæ præcepta sibi familiaria reddere, formam demonstrationis distincte agnoscere & analysin demonstrationum logicam instituere debet*, cujus supra (loc. cit.) dedimus exempla.

Ut demonstrationis accuratæ ideam ipso usu facilius sibi comparare valeant scientiæ tyrones, in Elementis nostris Matheſeos universæ demonstrationes ita adornavimus, ut eas trutinans sponte sua instituat earum analysin, qualem dedimus in superioribus (§. 551. & seqq.), etsi eandem non intendar, immo quod eam instituat vix advertat.

## §. 597.

Quoniam methodus philosophica, qua nos philosophiam universalem tradere constituimus, cum mathematica eadem est (§. 139. *Disc. præim.*), ut adeo quoque demonstrationes nostræ philosophicæ eandem analysin admittant, quæ est geometricarum (*not. §. 551. 552. 553.*); me tacente apparet, *accurata philosophiæ nostræ tractatione ad scientiam perveniri*, cum non modo quoad habitum demonstrandi comparandum elementis Geometriæ substitui possit, verum & habitus demonstrandi effata singulis disciplinis propria acquiratur: quod posterius a Geometria expectari non licet.

*Idem ultertus ostenditur.*

Accidit hinc, ut, qui ipso usu habitum demonstrandi sibi in Matheſi compararunt, in disciplinis tamen aliis a demonstrationibus quam longissime absint, quando tales tradere instituunt. Etenim destituti demonstrandi principiis, quæ a Matheſi expectare non licet, demonstrationem condere nequeunt: quod vero sibi eam condidisse videantur, id quidem inde evenit, quod distincta notione formæ demonstrationis, neglecto Logicæ studio, quæ eam tradit & cujus ipsa principiis nititur (§. 551. & seqq.), prorsus destituantur.

## §. 598.

Quoniam demonstratio scientiam parit (§. 594.), *ea scimus, Quantum quæ demonstrare valemus; quæ vero a nobis demonstrari non possunt, sciamus. eorum scientia caremus.*

Unde apparet, rerum mathematicarum scientiam tribui non posse illis, qui quædam ejus theorematum & problematum memoria tenent iisque in praxi geodætica aut aliis praxibus utuntur. Tum enim demum scientia instructi, ubi & theorematum, quæ norunt, & problematum, quæ ad praxin transferunt, demonstrare valent. Similiter scientia logica nondum pollet, qui ejus præcepta memoria mandavit eique subinde non infeliciter applicat: etenim tum demum ea fruitur, ubi regulas logicæ demonstrare valet. Quamobrem cum nos operam dederimus, ut regulas logicæ in praxi utiles demonstraremus; scientiam logicam ejus cupidius offerimus. Flocci pendimus objectiones illorum, qui angustis nimium cancellis sic coarctari existimant scientiam humanam. Distinguenda nobis est cognitio rerum certa, quæ scientiæ est (§. 595.), ab incerta. Quid igitur inde damni metuendum est, quod scientiam illis denegemus, qui certa rerum cognitione destituuntur in disciplinis? Salva est unicuique sua, quæ pollet, cognitio, siue eam scientiæ titulo insignire, siue alio quocunque ornare velis. Ceterum hinc intelligitur, cur demonstratio probatio scientifica appelletur.

## §. 599.

*Probationis  
insufficientis  
definitio.*

*Probatio insufficientis* est, si syllogismos, qui concatenantur ingrediuntur præmissæ, de quarum veritate nondum certo constat: aut, si mavis, quæ nititur principiis nondum certis.

Opponitur adeo demonstrationi, quæ non admittit principia nisi certa (§. 562. 567. 568. 572.), & ejus aliqua species est *probatio probabilis*, quæ admittit principia probabilia (§. 587.). Enimvero cum principia incerta non omnia sint probabilia, sed quædam æmni ratione destituta sumantur a nonnullis; non omnis probatio insufficientis probabilis est.

## §. 600.

*Principii  
precarii de-  
finitio.*

*Principia*, quæ omni ratione destituta vel sine probatione sumuntur, dicuntur *precaria*.

E. gr. Si quis absque probatione sumit, *mundum cepisse*, & hac propositione utitur tanquam principio demonstrandi vel probandi, is probationem principio precario superstruere dicitur.

## §. 601.

*Cur princi-  
pium uni  
precarium  
alteri possit  
esse certum.*

Quoniam fieri potest, ut, quam unus sine probatione sumit, propositionem alter demonstrare, vel saltem probabiliter probare possit; igitur *fieri etiam potest, ut, quod uni precarium est principium, idem alteri sit certum* (§. 600. 564.).

Probe

Probe autem notandum est, nos in numerum principiorum precariorum minime referre propositiones, quæ ab aliis demonstratæ mutuo sumuntur, cum firma potius sint ista principia, quæ ab aliis demonstrata agnoscimus (§. 568.). Quoniam notio principii precarii relativa est, utpote respectum ad cognoscentem involvens (§. 601.); igitur principium precarium absolute dicitur, cujus nulla adhuc in publicum proficit demonstratio, nec probatio probabilis, aut cujus saltem probatio, quam dederat non nemo, in oblivionem adducta est. Si vero is saltem ignorat probationem, qui eodem utitur; principium precarium dicitur sensu particulari, ejus nempe, qui eodem utitur, respectu.

## §. 602.

Propositio insufficienter probata dicitur *Opinio*, quæ adeo *Opinionis vel probabilis*, si probatio probabilis; vel *precaria*, si probationem *definitio* ingrediuntur præmissæ precariæ, vel si probatio nititur principiis precariis.

Opinionum exempla non rara sunt, cum plerique in iis acquiescant, nec ad scientiam contendant, immo nec desint, qui sibi persuadent fieri non posse, ut ad scientiam perveniatur, sed omnem humanam cognitionem opinionum cancellis contineri. Pertinet huc *Huetii Tractatus de imbecillitate intellectus humani*.

## §. 603.

Cum non repugnet, immo ipsa experientia confirmetur, *Cur unus fieri posse, ut alter demonstret, quod nonnisi insufficienter alter sciat, quod probare valet; fieri utique potest, ut alter sciat, quod nonnisi opinio alteri opinio est alteri* (§. 602.).

E. gr. Mathematicus sphericam Terræ figuram, aut prope sphericam, demonstrare valet: Mathematicarum demonstrationum ignari cum eandem nonnisi insufficienter probare possint, nonnisi opinionem de eodem foveant.

## §. 604.

Similiter cum opinio nitatur probatione insufficiente (§. 602.), fieri potest ut quis agnoscat, se propositionem istam insufficienter probare, atque adeo non amplius eidem assensum præbeat. *Opiniones igitur mutabiles sunt.* *Cur opiniones mutabiles.*

Experientia opinionum mutabilitatem abunde loquitur, nostro præsertim tempore, quo unusquisque opiniones sibi peculiare fovere affectu.

## §. 605.

§. 605.

*Cur falsa esse possint.*

Et quia propositio probabilis falsa esse potest (§. 591.), opinio probabilis falsa esse potest (§. 602.).

E. gr. Probabilitate sua non destituitur opinio vulgi de motu solis atque stellarum diurno circa Tellurem. Astronomi tamen re penitus inspecti eandem falsitatis redarguunt.

§. 606.

*Hypotheses philosophicae cur sint opinioniones.*

*In numerum opinionum referenda sunt hypotheses philosophicae.* In hypothelibus enim philosophicis sumimus, quæ nondum demonstrari possunt, tanquam essent (§. 126. *Disc. pralim.*). Quare cum sufficienter probata non sint, quæ demonstrare nequimus (§. 599.); hypotheses philosophicae probatione sufficiente destituuntur, atque in numerum opinionum referendæ (§. 602.).

E. gr. Hypothesis astronomica est motus solis circa tellurem annuus in circulo eccentrico; sumitur enim in gratiam quorundam phenomenorum; sed accurata demonstratione stabiliri nequit. A Logico igitur in numerum opinionum refertur.

§. 607.

*Requisita ad veritatem hypotheseos.*

*Requisita ad veritatem hypotheseos philosophicae sunt singula phenomena, quorum inde ratio redditur & quæ per se invicem non deterninantur.* Hypothesis philosophica in se continere debet rationem phenomenorum, quorum gratia conditur (§. 126. *Disc. pralim.*); adeoque requisita ad veritatem eorundem (§. 575.), consequenter ea, per quæ phenomena determinantur (§. 573.). Quoniam itaque vicissim hypothesi per omnia phenomena simul sumta determinatur, quorum unum non determinatur per alterum; singula ista phenomena sunt requisita ad veritatem hypotheseos (§. cit.).

Inde est, quod de hypothesi iudicium laturi inquiramus, num phenomenon, quotquot nobis perspecta sunt, solvendis sufficiat.

§. 608.

*Quenam hypothesi probabilis.*

*Si qua hypothesi ob quedam phenomena admittitur, erit ea opinio probabilis: Si vero precario sumitur probabilitatem nullam habet.* Hypothesis philosophica omnis opinio est (§. 606.).

Si



Si vero ob quædam saltem phænomena admittitur, ob quædani nonnisi requisita ad veritatem sumitur (§. 607.). Est igitur tantum probabilis (§. 578.), adeoque opinio probabilis (§. 602.).

Si vero precario sumitur, omni probatione destituitur (§. 600.), atque adeo probabilitatem nullam habet (§. 602.).

E. gr. Hypothesis astronomica de motu solis circa tellurem annuo in circulo eccentrico probabilis est opinio; ex quibusdam enim phænomenis probabiliter concluditur. Cum scilicet sol spatio annuo elapso ad idem cæli punctum redeat, lineam in se redeuntem describere debet. Circulus est linea in se rediens, sed non unica. Quamobrem si sumimus, solem motu annuo in circulo circa Tellurem ferri; opinio nascitur probabilis de motu solis proprio circulari. Similiter cum observemus, solem in uno semicirculo plures dies consumere, quam in altero, & ejus a terra distantiam usque ad terminum aliquem continuo augeri, deinde vero rursus imminui usque ad terminum oppositum; facile patet, nos non posse constitui in centro illius circuli. Si ergo sumimus solem moveri motu annuo circa Tellurem in circulo eccentrico, propositio admittitur ob quædam ad veritatem requisita, atque adeo probabilis est opinio. *Cartesius* cum perpenderet, duo dari corporum totalium genera, *continentia & contenta*, atque contenta denuo in duas abire species *lucida & relucientia* sive *opaca*; triplicem materiam phænomenis explicandis sufficere ratus est, nempe *materiam subtilissimam*, sive *ignem elementarem*, unde formata sunt corpora lucida; *materiam subtilem* sive *ætherem*, ex quo constant corpora continentia sive cæli; & *materiam terrestrem*, unde facta sunt corpora opaca. Opinio itaque *Cartesii* eam materię diversitatem admittentis, quæ phænomenis explicandis sufficere videtur, probabilis est.

§. 609.

Si hypothesi philosophicæ vel unum, quod observatur, phænomenon repugnat, falsa ea est. Quoniam quæ sibi mutuo repugnant, una esse nequeunt (§. 310.), aut hypothesis est, aut phænomenon. Sed vi observationis phænomenon est. Ergo hypothesis non est, consequenter hypothesis falsa est (§. 507.).

E. gr. Si quis sumit, solem moveri motu æquabili circa Tellurem in circulo eidem concentrico; huic de motu illius proprio hypothesis inæqualitas ejus repugnat, quæ observatur. Atque hinc concluditur hypothesis ista falsa. Similiter si quis systema mundi explicatur

rus sumit, Mercurium atque Venerem orbitas describere circa Tellurem eorumque orbitas intra orbitam Solis contineri; hypothesi huic contradicunt phasæ luminis in Venere atque Mercurio per telescopium observata. Inde igitur ea concluditur esse falsa.

## §. 610.

*Hypothesis  
quando im-  
probabilis.*

*Si qua observantur phenomena, quorum ratio per hypothesin non patet, ea improbabilis est.* Cum ad veritatem hypotheseos requiratur, ut omnium phenomenonum ratio inde reddi possit (§. 607.), si quæ occurrunt phenomena, quorum ratio per hypothesin non patet, suspicio est, eam in eadem non contineri, consequenter hypothesin non esse veram. Improbabilis igitur est hypothesis (§. 578.).

Dudum secundum hoc theorema de hypothesium improbabilitate judicarunt Astronomi atque Physici. Nimirum quemadmodum probabilitatem hypotheseos inde colligimus, si multorum phenomenonum ratio inde reddi potest (§. 607. 579.); ita e contrario improbabilitatem æstimamus ex contrario, nempe si occurrunt phenomena, quorum rationem per hypothesin reddere non possumus. Obiter vero moneo, nos per *phenomenonon* intelligere, quod esse observamus, sed cuius nonnisi confusam notionem habemus, quomodo esse possit. Ita e. gr. observamus per telescopium phasæ crescentis & decrecentis luminis in Venere atque Mercurio; sed illius luminis incrementi ac decrementi non nisi confusam notionem habemus nescii per observationem, qui fieri possit, ut talia incrementa & decrementa appareant.

## §. 611.

*Fides defini-  
tio.*

*Fides* dicitur assensus, quem præbemus propositioni propter autoritatem dicentis, ipsamque propositionem *credere* dicimur.

E. gr. Titius narrat, grandinem alicubi delapsam segeti stragem intulisse: quod si dictis assentientes pro vero habemus, quod id contigerit, fidem ei habere atque *credere* dicimur, id ipsum contigisse.

## §. 612.

*Objectum fi-  
dei.*

Qui novit formam demonstrationis cum ostensivæ (§. 551. 552.), tum apogogicæ (§. 553. 559.), is haud difficulter nobis largietur, *res factæ* demonstrari non posse. Aut igitur *admittenda sunt tanquam probabiles ob circumstantias singulares nobis perspectas, aut credenda.* Quod enim demonstrari nequit, il-  
lud

huc vel ratione quadam intrinseca, etsi insufficiente nititur, quo in casu tanquam probabile admittitur (§. 577. 578.); vel rationem assensus nonnisi extrinsecam rei habemus, derivatam nempe ab autoritate dicentis, quo in casu creditur (§. 611.).

E. gr. Si Titius narret, cecidisse grandinem in agris, atque ex physicis constet, qualis tempestas grandinem comiteretur, nobisque præterea status aëris illo tempore fuerit perspectus, quo ea cecidisse dicitur; ex statu aëris probabiliter colligentes, quod ceciderit, rem facti tanquam probabilem admittimus: quodsi vero in solo Titii testimonio acquiescimus, eandem credimus.

§. 613.

*Si alteri fides habenda, certi esse debemus, tum quod ipse no-* *Requiritur ho-*  
*rit veritatem ejus, quod narrat, vel asseverat, tum quod vera di-* *minis fide di-*  
*cere velit.* Ponamus enim, narrantem, vel asseverantem non *gni.*  
nosse veritatem ejus, quod narrat, vel asseverat. Quæ igitur narrat, vel asseverat, vera non sunt, adeoque pro veris haberi a nobis non possunt. Ei igitur assentiri, consequenter fidem habere non licet (§. 611.). Patet adeo, narrantem, vel asseverantem nosse debere veritatem ejus, quod narrat, vel asseverat.

Ponamus porro, narrantem, vel asseverantem nosse equidem veritatem ejus, quod narrat, vel asseverat; nolle autem, quæ vera sunt, dicere: tum respectu ejus, qui dictis fidem habere debet, perinde est, ac si ipse veritatem ignoraret. Enimvero si veritatem ignorat, fides ei haberi nequit, *per demonstra-*  
*ta.* Ergo etiam fides haberi nequit, si vera dicere nolit.

Veritas propositionis adeo manifesta est, ut sine probatione instar axiomatis facile admittatur. Philosophi tamen est distincte docere, cur manifesta sit propositio. Intellectus scilicet non assentitur nisi ei, quod pro vero habet. Assentiri enim idem est ac judicare, propositionem esse veram. Assentiri igitur ei, quod pro vero non habemus, idem est, ac aliquid pro vero habere idemque simul pro vero non habere: quod absurdum.

§. 614.

*Quodsi probabiliter saltem noverimus, quod alteri veri-* *Fides quan-*  
*tas ejus, quod narrat, fuerit perspecta, vel quod vera dicere* *do certa,*  
*velit; probabilis.*

velit; fides nonnisi probabilis est: Si utrumque certo noverimus, fides quoque certa est. Dum enim alterius dictis assentimur, hoc utimur syllogismo: *Quæ is narrat, qui veritatem novit eamque dicere vult, ea vera sunt* (§. 613.). *Sed hoc is narrat, qui veritatem novit eamque dicere vult.* Ergo *hæc vera sunt.* Quodsi ergo probabiliter saltem noverimus, quod alteri veritas ejus, quod narrat, fuerit perspecta, vel quod vera dicere velit, sive alterutrum saltem, sive utrumque probabiliter tantum agnoscatur; minorem syllogismi probabilem esse patet. Conclusio igitur, quod narrans vel asseverans vera dicat, tantum probabilis est (§. 585.). Assensus igitur, qui præbatur propositioni probabili, consequenter fides (§. 611.) tantum probabilis.

Quoniam porro constat, si certo noverimus, narrantem, seu asseverantem & nosse, & velle dicere vera, minorem istius syllogismi veram esse debere; in eo casu conclusionem quoque veram esse manifestum est (§. 537.). Assensus igitur, qui præbatur propositioni, quam veram esse agnoscimus, certus est (§. 564.), consequenter & fides certa est (§. 611.).

Posteriorius etiam hac ratione ostendi poterat. Requisita ad hoc, ut alter dicat verum, duo sunt, nempe ut norit, quid sit verum, & quod verum dicere velit (§. 613.). Qui igitur utrumque cognoscit, is omnia requisita ad hoc cognoscit, ut alter dicat verum, adeoque certo cognoscit, quod is verum dicat (§. 574.). Fides adeo certa est (§. 564. 611.).

## §. 615.

*Requisita ad hoc, ut quis norit facti veritatem eamque alteri narrare valeat.*

*Si quis præsens sit, & omnibus facti circumstantiis attendat, & singula, quæ sensu assequitur, memoriæ infixæ retineat, & quæ novit verbis propriis efferre norit; is veritatem facti novit atque alteri narrare valet.* Per se patet, quod is, qui præsens omnibus facti circumstantiis attendit & singula, quæ sensu assecutus, memoriæ infixæ tenet, norit, quidnam factum fuerit, quid non fuerit. Qui vero novit, quid factum fuerit, quid non fuerit, is novit facti veritatem (§. 505.).

Enim-

Enimvero qui verbis propriis efferre novit, quæ memoriæ infixæ tenet, is ad denotandas res utitur verbis, quæ iis indigitandis destinantur (§. 138.), atque adeo verbis prolatis in animo audientis easdem notiones excitat, quas ipse iisdem jungit, seu quibus ipsimet factum sibi repræsentat (§. 116.). Quoniam igitur factum ita enarrare valet, ut alter idem intelligat, ac si ipsimet præsens fuerit (§. 117.); veritatem quoque facti alteri narrare valet (§. 505.).

Hinc facile patet, quando nonnisi probabiliter noverimus, utrum aliter facti veritatem norit atque narrare valeat, nec ne, modo ad notionem probabilitatis attendamus (§. 578.) atque perpendamus, quandoque probabilis inferatur conclusio (§. 586.), consequenter quando iudicium discursivum probabile (§. 51.). Sed ne justo prolixiores simus, nostrum non est de iis dicere expressius, quæ nuda applicatione principiorum a nobis stabiliturum continentur.

§. 616.

Qui narrat, quæ præsens sensu duce affecutus, dicitur *Testis oculatus*; qui vero narrat, quæ ab altero audit, *Testis auritus* vocatur. *Testis oculatus & auritus definitio.*

Vulgo dicitur, sed probabiliter, *plus valere testem oculatum unum, quam auritos decem.* Nostrum est suppeditare principia, ex quibus valor narrationis a teste aurito profectæ determinari potest.

§. 617.

*Si testis auritus, quæ ab oculato narrari audit, qui & facti veritatem novit, & eloquitur, intelligit, memoriæ infigit & eidem infixæ verbis propriis efferre novit; testi oculato æquivallet.* *Testis auritus oculato æquivalens.* Si enim testis oculatus facti veritatem novit atque eloquitur, auritus vero intelligit, quæ ille eloquitur; ille singula, quæ sensu affecutus memoriæ infixæ tenet, verbis propriis effert (§. 615.), hic vero in se easdem notiones excitat, quas cum verbis singulis conjungit alter (§. 117.). Testis adeo auritus & oculatus cum eodem prorsus modo in mente sua factum sibi repræsentent (§. 34.), perinde est ac si auritus ipse præsens fuisset atque ad ea, quæ fiebant, attendisset. Quodsi ergo porro easdem notiones memoriæ infigit eademque verbis propriis

priis effierre norit, nihil prorsus deest, quod in teste oculato requisivimus, ut & facti veritatem norit atque alteri narrare valeat (§. 615.). Nulla igitur inter ipsum & testem oculatum cum differentia intercedat; auritus hoc in casu oculato æqui-valet.

Multæ sunt determinationes subjecti, quæ rarissime locum habent. Sunt tamen casus vulgares in vita communi, ubi ob has ipsas determinationes testis auritus oculato æquivalens censetur, v. gr. si quis alterius fide refert, quinam sermonem sacrum habuerit ad populum.

## §. 618.

*Facti veritas  
in animo ob-  
literata.*

Hoc vero per se patet, si *testis oculatus*, & qui oculato æquivalet auritus quasdam facti circumstantias oblivioni dederint, in eo casu utrumque facti veritatem non amplius nosse.

Silentio hæc præterire non licet, cum in æstimanda tum veritate, tum inprimis probabilitate narrationis ratio quoque habenda sit temporis, ex quo oculatus factum vidit, auritus vero idem ab oculato accepit, propterea quod successu temporis facile quædam oblivioni dentur. Atque adeo si quis ex intervallo narrat, quæ olim sensu assecutus, inquirendum omnino est, num quædam oblivioni tradiderit, an vero omnes facti circumstantias adhuc norit: quod posterius accidit, si quæ sensu assecutus verbis propriis statim consignavit, vel sæpius eadem aliis narravit. Sed plura eam in rem nobis dicenda erunt in Logica probabilium.

## §. 619.

*Quando te-  
stis auritus  
veritatem  
facti non af-  
sequatur.*

Si testis oculatus, qui veritatem facti novit, narrat verbis vagis, quæ sensu assecutus memoriæ infixit; testis auritus veritatem facti non semper assequitur. Etenim si testis oculatus, quæ memoriæ infixit, verbis vagis narrat; iisdem non invariata constanter respondet notio (§. 129.). Quamobrem cum auritus eam voci jungat notionem, quæ ipsi familiaris est, vel quam proxime cum eadem conjunxit; sapissime accidit, ut alias, vel tantisper variatas cum verbis ab oculato prolatis notiones jungat, consequenter sensum a mente ejus alienum fingat (§. 120.). Veritatem adeo facti, quam ex hypothesis novit oculatus, minime assequitur.

Acci-

Accidit inde, ut testes auriti varient facti speciem, quam deinde notioni suæ convenienter alteri narrant. Quamobrem si traditione orali facti notitia propagetur, fieri potest hæc ratio, ut continuo magis magisque suam amittat veritatis speciem.

§. 620.

*Si testis oculatus suum de facto iudicium cum facto confundit, auritus id non advertens facti veritatem non assequitur.* Sumit enim auritus iudicium oculati pro facto. Cum adeo non factum norit, sed alterius de facto iudicium; ipse facti veritatem non assequitur.

E. gr. Si quis doceat, quomodo per systema harmoniæ præstabilite tanquam hypothesin philosophicam explicetur commercium inter mentem & corpus, eodemque non utatur tanquam principio ad stabilienda dogmata; Lucius vero, qui sibi persuader, systema istud cum libertate hominis consistere non posse, factum istud narraturus dicat, illum docere libertati contraria, vel omnem libertatem, virtutem, religionem tollere; is quidem suum de facto iudicium cum facto alterius confundit, nec ex verbis ejus facti veritatem assequi licet. Cum nihil frequentius sit, quam ut facta narrantes sua de factis iudicia cum iisdem confundant, atque hæc ipsa iudicia verbis admodum vagis efferantur; narrationes quoque testium oculatorum multoque magis auritorum a veritate ideo recedunt, hancque assecuturus sibi cavere debet, ne illa iudicia narrantis cum facto confundat.

§. 621.

*Si quis sciens & volens falsa narrat, is vel falsa narratione boni quidpiam consequendum intendit, vel ex vera mali quidpiam metuit.* Dum constat suoque loco in Psychologia expressius docebitur, nos nil appetere nisi sub ratione boni, nec quidpiam averfari nisi sub ratione mali. Quamobrem qui sciens ac volens falsa narrat, is quidpiam per eam intendere debet, quod bonum reputat; vel evitare studet malum, quod ex veritate in se proficisci posse metuit.

*Cur quis vera narrare nolit.*

Paret scilicet asserti veritas per voluntatis nostræ naturam aut, si mavis, appetitus inviolabilem legem. In eo autem applicando attendendum est ad diversas hominum, quas de eo, quod bonum malumve est, foveant notiones, ut de bono, quod falsa narrans intendit, vel de malo, quod evitare studet, iudicium fieri possit. De his vero agendum

dum est partim in Psychologia, partim in Philosophia practica. E. gr. Qui sensuum iudicio stant, bonum iudicare solent illud, unde voluptatem percipiunt. Quamobrem ubi quis voluptatem percipit ex credulitate alterius; is fallendi animo narrat, quæ sunt a veritate aliena. Similiter placet homini, si habeatur fide dignus; displicet e contrario, si dictis denegetur fides: quamobrem accidere quam sapissime solet, ut factum narraturus ex ingenio suppleat, quæ veritati, quatenus eam novit, deesse videntur, quo minus alter in assensum rapiatur. Magna hic sese offert diversitas, si ad specialia descendere vuleris: Quam tamen hic exponi nec consultum est, cum hæc discussio ad Logicam probabilium magis spectet; nec satis commodum, cum principia ex Psychologia & philosophia practica, tam morali, quam civili, sint petenda, methodus autem nostra non ferat, ut utamur principiis nondum stabilitis (§. 118. *Disc. pralim.*). Obiter itaque monemus, cum norio boni sit respectiva, eam relationem involvere vel ad mentem, vel ad corpus, vel ad statum hominis externum, opes puta, honorem, personas, quæ in felicitatem nostram quomodo-cunque influere possunt. Quænam vero sint bona intuitu mentis, corporis atque status externi, sive vera, sive apparentia, ex philosophia practica addiscendum. Neque etiam inutile iudicamus hic observasse, quod bonum sperare, vel malum metuere possimus aut a personis, quibus falsa narramus, aut ab iis, de quibus falsa narratur, aut denique ab aliis, qui vinculo quodam utrisque junguntur. Ex his autem generalibus abunde intelligitur, quam multa sint expendenda illis, qui a nimia credulitate abesse volunt, & quam difficulter in multis casibus ad veritatem liquidam pertingere possimus. Atgetur vero difficultas, quod homines non semper ex veritate, sed sapissime ex eo, quod apparet, iudicent de bono atque malo. Satis autem patet, quam multiplex sit error ex eo, quod apparet, iudicantium. Ecce tibi plures fontes, unde principia plurima Logicæ probabilium prono alveo fluunt, quorum aliquam partem ipse usus confirmavit.

## §. 622.

*Narrationis  
falsæ crite-  
rium intrin-  
secum.*

*Si qua in narratione continentur, quæ vel sibi mutuo, vel veritati certo agnite repugnant; narratio illa falsa est.* Ponamus enim narrationem esse veram. Tum evidens est, omnia illa, quæ narrantur, una extitisse (§. 505. & seqq.). Sed quæ sibi mutuo repugnant, ea una esse nequeunt (§. 310.). Narratio



tio igitur illa, vera non est, in qua continentur, quæ sibi mutuo repugnant. Est itaque falsa (§. 566.).

Quodsi in narratione continentur, quæ veritati certo agnitæ repugnant, & narratio ista ponatur vera; contradictoria simul erunt vera (§. 311.): quod cum sit absurdum (§. 532.), narratio ista vera esse nequit, atque adeo denuo falsa est (§. 566.).

Poteramus præsentem propositionem etiam exinde demonstrare, quod narrationi in præsentī casu respondeat notio falsa (§. 547.), atque adeo quæ narrantur singula esse non possint (§. 520.).

Fluunt hinc principia intrinseca per quæ narrationis veritas, vel probabilitas dijudicatur: quæ enim ab autoritate dicentis sumuntur, extrinseca sunt. E. gr. Si quis dicatur autor cædis, quem alibi locorum tunc temporis fuisse constat, quo illa patrata fuit; inde colligitur, narrationem esse falsam: repugnat enim, ut unus idemque homo eodem tempore in duobus locis simul præsens sit.

§. 623.

Si quis propositionem falsam pro vera habet, *errare* dicitur: ut adeo *Error* sit assensus propositioni falsæ datus. *Erroris definitio.*

E. gr. Falsa est propositio. *Sol est minor Tellure.* Quodsi igitur quis eam pro vera habeat, affirmans: *Solem esse Tellure minorem*, is errat eique tribuitur error, quatenus propositioni huic assensum præbet. Per inconstantiam loquendi nomen erroris subinde quoque tribuitur ipsi propositioni falsæ; sed nos ab ea abhorrentes fixum tuebimur significatum, quem voci in definitione vindicamus.

§. 624.

*Errans* adeo *affirmat*, quod erat negandum, & *negat*, quod erat affirmandum. Falsa enim est propositio, qua affirmatur, quod erat negandum, & qua negatur, quod erat affirmandum (§. 507.). Qui igitur affirmat, quod erat negandum, & negat, quod erat affirmandum; is assensum præbet propositioni falsæ, consequenter errat (§. 623.). *Errans quid affirmet, quid neget.*

E. gr. Qui errat circa magnitudinem Solis affirmat, *Solem esse Tellure minorem*, cum id negare deberet.  
(Wolffii Logica)

## §. 625.

*Error quomodo detegatur.*

Patet porro (§. 623.), *errorem detegere, si ostendatur, propositionem esse falsam, cui quis præbet assensum* (§. 545.).

Quæ igitur de propositionum falsitate superius dicta sunt, cum de criterio veritatis ageremus, in doctrina de errore applicari possunt.

## §. 626.

*Quando recta argumentandi forma in errorem deducitur.*

*Si major syllogismi categorici fuerit falsa & minor vera, vel si minor fuerit falsa, in majore autem prædicatum subjectionis vel absolute, vel sub data determinatione soli competit; vera argumentandi forma incidimus in errorem.* Etenim cum in utroque casu vera argumentandi forma inferatur conclusio falsa (§. 538. 539.), eam tamen, propterea quod utraque præmissa nobis videatur vera, pro vera habeamus (§. 537.); utique erramus (§. 623.). Recta igitur argumentandi via in errorem deducitur.

E. gr. Si quis argumentatur: *Omne corpus opacum Sole majus, a quo illuminatur, spargit umbram calathiformem.* Sed Terra est corpus opacum Sole majus, a quo illuminatur. Ergo Terra spargit umbram calathiformem; ob minorem falsam falsa inferitur conclusio. Si ergo minorem pro vera habet; recta argumentandi via in errorem deducitur.

## §. 627.

*Ex uno errore quomodo sequantur plures.*

Atque adeo liquet, *quomodo ex uno errore sequantur plures.*

Ita ex errore de magnitudine Solis sequitur error de figura umbræ. Patet etiam, errores adeo arcto vinculo inter se esse connexos, ut uno admissio admittendus etiam sit alter.

## §. 628.

*Cur id in methodo demonstrativa obtineat.*

Quoniam in demonstrationibus propositiones antecedentes ingrediuntur syllogismos, qui concatenantur, tanquam præmissæ (§. 551. & seqq.); ideo *in methodo demonstrativa ex uno errore sequantur plures* (§. 626.).

Quoniam adeo hic facillime multiplicatur error, cavendum quoque, ne circa eas præsertim propositiones errorem admittamus, quibus sæpius utimur tanquam demonstrandi principiis. Absit vero ut ideo a methodo demonstrativa abhorreamus, cum, si caute procedamus,

damus, per eandem ad certam rerum cognitionem deducamur (§. 568.).

§. 629.

*Si notionibus deceptricibus utimur tanquam veris, in erro- Error ex no-  
res incidimus.* Si enim notio fuerit deceptrix, videmur no- tione de-  
bis habere notionem termino alicui respondentem, et si revera p-ricae ortur.  
nulla eidem respondeat (§. 38.). Si vero iisdem utimur tanquam  
veris, ex iisdem perinde ac ex definitionibus veris propositiones  
formamus (§. 253. 254. 255.), quibus tanquam præmissis utimur  
in syllogismis. Propositiones istæ cum falsæ sint, quoniam alias  
notio vera termino seu definito respondere deberet, contra id  
quod demonstratum est; conclusiones per syllogismos illatæ fal-  
sæ sunt (§. 626.): quas cum pro veris habeamus (§. 537.), evi-  
dens est nos errare (§. 623.). In errores adeo incidimus, si no-  
tionibus deceptricibus utimur tanquam veris.

E. gr. Notionem bilinei rectilinei non nisi deceptricem habemus.  
Quod si ea utamur tanquam vera, ex ea hanc formamus propositio-  
nem: *Bilineum rectilineum duabus lineis terminatur.* Quare si porro  
argumentamur; *Omnis figura, quæ duabus lineis terminatur, duos habet  
angulos.* Sed *bilineum rectilineum duabus lineis terminatur.* Ergo *biline-  
um rectilineum duos habet angulos*: falsa est conclusio (§. 539.). Cum igi-  
tur eam pro vera habeamus, notionem deceptricem in errorem deducimur.

§. 630.

Syllogismus, cujus forma legitima, sed conclusio falsa ob *Vitium ma-  
præmissam falsam, vitio materiæ laborare* dicitur: ut adeo *Vitium teriæ in syl-  
materiæ in syllogismo* sit falsitas præmissæ, quæ eum ingreditur. *logismo.*

E. gr. Syllogismus modo (not. §. 629.) allatus in forma legitimus est,  
quæ & confuse eam dijudicanti apparet, si a crypti liberatur. Falsa  
vero cum sit minor, a qua proficiscitur falsitas conclusionis (§. 539.);  
vitio materiæ laborat. Quærenti igitur rationem, cur falsa sit con-  
clusio, vitio materiæ id tribuendum esse respondemus.

§. 631.

*Si quæ confuse perceptæ eadem apparent, cum tamen di- Error circa  
versa sint, atque ideo pro iisdem a nobis habentur; error circa iudicium in-  
iudicium intuitivum committitur.* Qui enim, quæ diversa sunt, tuitivum  
Mmm 2 pro commissus.

pro iisdem habet, propterea quod confuse percepta eadem apparent; is affirmat eadem esse, quæ eadem non sunt, atque adeo quod erat negandum, consequenter errat (§. 624.). Quoniam vero hic subjecto tribuimus, quod in ipsius notione comprehensum nobis intueri videmur, iudicium intuitivum est (§. 51.). Error adeo circa iudicium intuitivum committitur.

E. gr. Solis figura, quam oculis usurpamus, eadem esse apparet, quæ est disci. Cum adeo figuram Solis atque disci pro eadem habentes iudicamus, Solis figuram esse disceam, errorem in iudicio intuitivo formando committimus. Notandum vero est, me a confusa perceptione derivare, quod eadem appareant diversa: etenim si notio distincta est, non confusa, notas, quas nobis sinit, ad rem ab aliis discernendam sufficientes, distinguere valeamus (§. 88. 80.), atque adeo fieri nequit, ut pro iisdem habeamus, quæ a se invicem diversa clarescimus. In confusis autem notionibus, ubi notas non distinguimus, fieri potest, ut aliquæ earum obscure, vel prorsus non percipiantur, atque ideo confuse perceptum ob notas reliquas, quarum clara est perceptio, idem apparere potest cum alio, quod ab eo est diversum. Illustrantur dicta exemplo figuræ Solis modo in medium allato.

### §. 632.

*Error circa principia.*

Quoniam definitiones & iudicia intuitiva sunt principia probationis (§. 562. 496.); qui circa notiones deceptores (definitionum quippe locum sustinentes) atque iudicia iniusta committit error, est error circa principia commissus.

Quamobrem cum error circa principia commissus, si vel maxime methodo demonstrativa utaris, errorum circa iudicia discursiva causa sit (§. 628.); in constituendis principiis summa opus est attentione ac circumspectione. De *Tschirnhausen* in *Medicina Mentis* part. 2. sect. 3. p. m. 16. omnem errorem inde derivat, quod pro iisdem habeamus, quæ diversa sunt, propterea quod sensui atque imaginationi ea se offerunt ratione, ut nulla prorsus inter differre videantur. Sermo enim ipsi est de errore circa principia commisso, cum formam, vi cuius concluditur, parum curet (not. §. 560.) et si ultro largiatur, quod paulo ante demonstravimus (§. 627.), admissio iudicio erroneo intuitivo, frustraneum esse, quicquid agitur, atque ne unum quidem passum in via veritatis promoveri. Vera est erroris genesis, si ad iudicia intuitiva respicis, quemadmodum (§. 631.) ostendimus atque ab

**Auto-**

Autore Medicinæ mentis exemplis bene multis iisque præclaris egregie illustratur. Enimvero cum ostenderimus, errorem non minus in principiis committi, si notione deceptrice utaris tanquam vera, quam si falsum iudicium intuitivum habeas pro vero (§. 629.); formatio iudicii falsi intuitivi non unicus errorum fons est, sed eidem jungenda venit notionum deceptricium formatio, in quibus combinantur, quæ sibi mutuo repugnant. Er quia a forma, vi cuius concluditur, oriri quoque potest error, principiis omnibus se rite habentibus, nec hic errorum fons negligendus. *Hugenius*, cuius multum valer de rebus mathematicis iudicium, dudum observavit, ipsos subinde Mathematicorum errores a vitio formæ ortum trahere. Ea igitur de causa nos mox distinctius docebimus, quomodo regulis logicis violatis proveniat error.

§. 633.

*Si definitio continet notas insufficientes & major fuerit definitio inversa; ejus applicatio errorem parit.* Etenim vi Dicti de omni & nullo ad definitiones extensi (§. 349.) definitio applicatur beneficio hujus syllogismi: Cui conveniunt notæ in definitione enumeratæ simul, eidem quoque convenit definitum. Sed ipsi A seu huic enti conveniunt notæ in definitione enumeratæ simul. Ergo ipsi A seu huic enti convenit definitum. Quoniam definitio continet notas insufficientes, per hypoib. quæ nec plures, nec pauciores contineri debebat, quam quæ ad rem definitam agnoscendam & ab aliis distinguendam sufficiunt (§. 153.); propositio ex inversa orta: Cui conveniunt notæ in definitione enumeratæ simul, eidem quoque convenit definitum, in præsentî casu falsa est (§. 507.). Quoniam igitur major syllogismi falsa, minor autem vera supponitur; conclusio falsa esse debet (§. 538.). Cum tamen eam, quod majorem veram supponimus defectum definitionis non agnoscentes, pro vera habeamus, in errorem incidimus (§. 623.).

Error ex de  
finitione qua  
defectu labo-  
rat.

E. gr. Si quis definiat *Conos similes* per eos, quorum axes sunt ad diametros basium in eadem ratione; definitio quidem satisfacit *conis rectis*, quorum scilicet axes ad diametros basium sunt perpendiculares, sed non *inclinatis*, quorum axes etiam ad diametros esse debent similiter, hoc est, sub eodem angulo inclinati. Quod si igitur definitione, quæ notarum defectus laborat, utaris tanquam vera, atque argumen-

Mmm 3

teris

teris de conis inclinatis, quorum axes cum diametro non constituunt eundem angulum: Omnes conī, quorum axes sunt ad diametros basium in eadem ratione, sunt similes. Atqui conī *A* & *B* (quorum axes supponimus ad diametros basium sub diversis angulis inclinaros) sunt conī, quorum axes ad diametros basium sunt in eadem ratione. Ergo Conī *A* & *B* sunt similes; in errorem te incidere manifestum est. Atque adeo patet, quam caute sit procedendum in condendis definitionibus, ubi methodo demonstrativa uti volueris, ne erroribus pandantur fores (§. 628.).

## §. 634.

*Memoria quodam lapsu quando in errorem incidamus.*

*Si memoria quodam lapsu propositionis ante eidem mandata non rite recordemur, ita ut falsam pro vera accipiamus; ratiocinando in errorem incidimus.* Dum enim ratiocinamur ope iudicii intuitivi, quod tanquam minorem syllogismi sumimus, recordamur propositionis alterius, quæ majoris locum tuetur, atque ex hisce præmissis conclusio infertur; vel ceteris manentibus iisdem loco iudicii intuitivi sumitur conclusio per antecedens ratiocinium illata, quemadmodum ex demonstrationum forma, quam supra (§. 551.) delineavimus, manifestum est. Quoniam itaque syllogismi propositio major falsa est; conclusio quoque falsa esse debet, ut minor sit vera (§. 538.). Enimvero cum majorem pro vera habeamus lapsu memoriæ; conclusionem quoque pro vera habere debemus (§. 537.), consequenter in errorem incidimus (§. 523.).

Non ab simili modo (§. 539.) ostenditur, quando ob minorem falsam lapsu memoriæ in syllogismum introductam in errorem incidamus.

Hic errandi modus frequentissimus est atque magni etiam viri memoriæ quodam lapsu in errorem incidunt: id quod tanto facilius accidit, ubi propositiones, quarum recordantur, ipsis non sunt satis familiares. Ex eodem fonte propullulant errores calculi. E. gr. Si quis multiplicaturus 9 per 7 non recordetur, quod factum sit 63; sed ipsi occurrat 64: tum propositio minor, hic duci debere 9 in 7, vera est; sed fallit, quæ majoris locum tuetur, ex abaco Pythagorico repetita. Quamobrem cum in facto scribamus 64 loco 63, errorem in calculo committimus. Quia lapsus memoriæ facilis est, ob rationes

tiones varias, in quas inquirere hic loci non licet, errores calculi facile condonantur. Et alibi quoque absonum est insultare alteri ob errorem, qui lapsu memoriæ accidit, aut inde cum inscitia & nescio cujus alterius vitii intellectus redarguere.

§. 635.

Syllogismus regulis logicis contrarius dicitur *vitio formæ laborare*, aut *in forma peccare*: ut adeo *Vitium formæ in syllogismo* sit repugnantia ejus cum regulis logicis. *Vitium formæ in syllogismo.*

E. gr. Si in syllogismo plures sint quam tres termini, in forma peccat (§. 334). Similiter si in prima figura minor fuerit negativa in forma peccat (§. 367.). Potest nimirum syllogismus impingere cum in regulas generales, tum in speciales.

§. 636.

Syllogismus, cujus forma vitiosa crypsi tegitur, dicitur *Sophisma*; is autem, cujus forma vitiosa crypsi nulla tegitur, *paralogismus*. *Sophismatis & paralogismi definitio.*

Hinc & *Sophistica* definitur a *Jungio* in Logica Hamburgensi lib. 6. c. 1. p. m. 517. per praviū habitum falsum veri specie exornandi. Et qui istiusmodi habitu pollet *Sophista* appellatur. Dicuntur etiam *sophismata cavillationes* atque *falsæ & sophistæ cavillatores*.

§. 637.

Quoniam paralogismus vitio formæ laborat, quod crypsi nullategitur (§. 636), adeoque in regulas logicas syllogismorum siue generales, siue speciales manifesto impingit; *paralogismi facile deteguntur, si forma syllogismorum secundum regulas logicas cum generalibus, tum specialibus examinetur*: per eas enim patebit, cur syllogismus sit vitiosus. *Quomodo paralogismi detegantur.*

E. gr. Si quis ita argumentatur: *Omne quadratum est circulo inscribibile. Atqui Nullum triangulum est quadratum. Ergo Nullum triangulum est circulo inscribibile*: Syllogismus manifesto impingit in regulam logicam specialem, quod in prima figura, in qua syllogismus est (§. 344.), minor semper affirmans esse debet (§. 367.). Quamobrem si formam juxta regulas primæ figuræ examines, paralogismum statim detegis. Examen vero hoc omnium facillime institui posse, si ad nomina modorum essentialia animum advertas, in superioribus jam monui (§. 37.5) & præsentī exemplo illustrari potest. Cum enim conclusio

clusio sit universaliter negans, syllogismus est in modo *Celarent* (§. 373.). Quoniam itaque E significat universaliter negantem, A universaliter affirmantem; statim apparet, vitium latere in eo, quod maior sit affirmativa, minor negativa, cum minor affirmativa, maior negativa esse debeat. Idem etiam valet in *paralogismis hypotheticis*, qui non minus manifesti sunt, ubi eorum formæ ad regulas syllogismorum hypotheticorum retuleris. E. gr. Si quis ita argumentetur: *Si harmonia præstabili est vera, datur Deus. Sed harmonia præstabili non est vera. Ergo non datur Deus*: paralogismus hypotheticum committit, cum manifesto impingat in regulam, quod non nisi remoto consequente, removeatur antecedens, non autem antecedente etiam consequens, quia fallit propositio negativa, *si harmonia præstabili non est vera, non datur Deus* (§. 409.). Idem tenendum est de aliis syllogismorum speciebus, ubi perinde ac in categoricis & hypotheticis vitium formæ locum habet & per regulas, quibus eorum forma continetur, detegitur. Non igitur opus est, ut plura addantur de modo paralogismos detegendi. Inquirendum potius erit in sophismatum ortum, ne ea nobis imponant, cum ob cryptum, qua laborant, veræ formæ speciem mentiantur.

## §. 638.

Vitium formæ ex homonymia ortum.

*Si terminus aliquis in una syllogismi propositione aliter sumitur, quam in altera; syllogismus in forma peccat.* Etenim si idem terminus aliter sumitur in una propositione, quam in altera, seu quod perinde est, si idem terminus duos diversos habet significatus; duobus æquipollet. Quare cum præter hunc adhuc duo ingrediantur syllogismus ipso adpectu diversi; is re vera quatuor habet terminos. In regulam igitur syllogismi generalem impingens (§. 334.) in forma peccat (§. 635.).

Dici solet istiusmodi sophisma *fallacia æquivocationis*, seu *homonymiæ*. E. g. Si quis ita argumentatur: *Omne lumen potest extinguui. Intellectus est lumen. Ergo intellectus potest extinguui*; sophisma quinque terminorum condit, quo nihil concluditur ob homonymiam tum in voce *luminis*, tum in voce *extinctionis* latentem. Etenim *lumen* in maiore sumitur proprie, in minore metaphorice. Similiter *extinctio* in maiore proprie, in conclusione improprie sumitur. Quoniam ob vagum vocum significatum accidit, ut non eandem prorsus notationem cum eadem jungant omnes; sophisma hoc sæpissime com-



mittitur ab iis, qui ex aliorum assertis consequentias autoribus molestas deducere student: de quo suo loco dicemus plura. Immo unus idemque autor ob significatum vocum vagum, cui indulget, in talia sophismata incidit: quod adeo certius evitari nequit, quam ubi non utaris terminis, nisi quorum fixus est significatus. Neque differt ab hoc sophismate aliud, quod ex *equivocatione phrasæ* oritur: cum enim phrasæ ambigua in duabus propositionibus diversum habeat significatum, oriuntur hinc ut ante plures quam tres in syllogismo termini. E. gr. Referunt huc sophisma theologicum, cujus duæ præmissæ sumuntur ex scriptura sacra: *Quicquid non est ex fide, peccatum est. Lex non est ex fide. Lex igitur peccatum est.* Quis vero non vider, terminum minorem esse ex fide non in eodem significato sumi in minore, quo sumitur in maiore? Immo in aliis quoque speciebus sophismatum, quæ ab *amphibolia* seu dubia interpretatione præmissarum oriuntur, idem obtinet. Unde si qua nobis offerantur, haud difficile per propositionem præsentem abundans terminorum numerus detegatur.

## §. 639.

*Si quis in propositionibus, ex quibus syllogismus constat, vocem aliquam ad diversos terminos refert; syllogismus in forma peccat.* Etenim si vox eadem in una propositione ad alium terminum refertur, in altera vero ad alterum; terminus qui debebat esse idem in duabus propositionibus, diversus est. Syllogismus igitur ingrediuntur plures quam tres termini, adeoque is in regulam generalem impingit (§. 334.), consequenter in forma peccat (§. 635.).

E. gr. Si quis ita argumentatur: *Quicumque habet potentiam scribendi, is scribere potest. Sed homo, dum legit, habet potentiam scribendi. Ergo homo potest scribere, dum legit;* syllogismus quatuor habet terminos, dum enim in minore verba, *dum legit*, ad subiectum minoris, quod *homo* est; in conclusione ad prædicatum ejus, quod est *posse scribere*, refertur; quinque oriuntur termini, qui sunt: 1. *habere potentiam scribendi*, 2. *posse scribere*, 3. *homo, qui legit*, 4. *homo* simpliciter consideratus, 5. *habere potentiam scribendi & legendi simul*. Quoniam in hoc casu conjunguntur, quæ erant disjungenda, nempe actus legendi atque scribendi simultaneus, ideo istiusmodi sophismata appellari solent *fallaciæ compositionis*. Tale etiam est, si quis ita ratiocinatur: *Qui facit servum existentem liberum, is cum libertate donat.*  
(Wolffii Logica) Nnn Atqui

Atqui *hospis in servitutem redigens victum facit servum existentem liberum*. Ergo *hospis in servitutem redigens victum eum libertate donat*; syllogismus plures quam tres habet terminos. Etenim vox *existens* refertur in maiore ad eum, qui *liber* esse ponitur, in minore autem ad *servum*. Unde termini, qui ingrediuntur syllogismum, sunt: 1. *facere servum eum, qui liber existit*, 2. *aliquem libertate donare*, 3. *hospis in servitutem redigens victum*, 4. *facere eum liberum, qui servus existit*. Quod si quis e contrario argumentetur: *Quicumque non potest scribere, ille non habet potentiam scribendi. Sed homo scribere non potest dum legit. Ergo homo dum legit non habet potentiam scribendi*. Syllogismus denuo plures, quam tres terminos habet, eum enim ingrediuntur termini sequentes: 1. *non posse scribere*, 2. *non habere potentiam scribendi*, 3. *homo, qui legit*, 4. *homo simpliciter consideratus*, 5. *potentia scribendi legendi actui iuncta*. Quoniam hic, in maiore scilicet, disjunguntur, quæ jungenda erant, actus nempe legendi & potentia scribendi, ideo sophisma istiusmodi dicitur *fallacia divisionis*. Istiusmodi vitium, sive fallaciæ compositionis, sive fallaciæ divisionis tribuendum fuerit, optime detegitur, si retenta conclusione summoque medio termino ex minore, juxta regulas syllogisticas construatyr syllogismus: id quod in omni alio quocunque casu fieri consuevit. Ita in exemplo fallaciæ compositionis primo conclusio est: *Homo potest scribere, dum legit, seu legere & scribere simul*; medius autem terminus est *habere potentiam scribendi*. Syllogismus igitur in *Darii* talis erit: *Quicumque habet potentiam scribendi, is scribere potest, dum legit, seu scribere & legere simul potest*. Atqui *hic homo habet potentiam scribendi*. Ergo *hic homo scribere potest, dum legit, seu scribere & legere simul potest*. Haud difficulter apparet, maiorem esse falsam, atque sic vitium formæ reductum fuisse ad vitium materiæ, quorum hoc sophisma illo tegere studet (not. §. 636.). Similiter in altero exemplo fallaciæ compositionis conclusio est: *Hospis in servitutem redigens victum, eum libertate donat*; medius autem terminus: *facere servum existentem liberum, seu eum, qui existit liber*. Syllogismus adeo in *Barbara* talis emergit: *Quicumque facit servum existentem liberum, seu eum qui liber existerat, is eum libertate donat*. Atqui *omnis hospis victum in servitutem redigens facit servum existentem liberum, seu eum, qui liber existerat*. Ergo *omnis hospis victum in servitutem redigens eum libertate donat*. Per se patet, maiorem esse falsam, atque adeo denuo vitium formæ redu-

Cum

Etum est ad vitium materiæ. Denique in exemplo fallaciæ divisionis, conclusio est: *Homo non habet potentiam scribendi, dum legit, medius autem terminus: quia non potest scribere, dum legit, seu simul scribere atque legere.* Syllogismus adeo in Celarent istiusmodi emergit: *Quicumque non potest scribere, dum legit, seu simul scribere atque legere; is non habet potentiam scribendi. Sed homo non potest scribere, dum legit, seu simul scribere atque legere. Ergo dum legit, non habet potentiam scribendi.* Patet hic quoque, majorem esse falsam, atque sic denuo vitium formæ reductum est ad vitium materiæ.

## §. 640.

*Si quis generi tribuit, quod speciei qua tali convenit sive absolute, sive sub data quadam conditione; is errat.* Qui enim generi tribuit, quod speciei nonnisi convenit, sive absolute, sive sub data quadam conditione, is nititur hoc syllogismo generali: *Quicquid speciei A sub genere B contentæ & per C determinatæ convenit, id generi B convenit.* Atqui hoc speciei A sub genere B contentæ & per C determinatæ (seu sub conditione C) convenit. Ergo hoc etiam generi B convenit. Quoniam genus non continet, quæ uni speciei propria sunt (§. 45.), adeoque multo minus, quæ eidem nonnisi conditione quadam superaddente conveniunt; majorem falsam esse evidens est. Falsa igitur quoque est conclusio (§. 538.), consequenter errat, qui generi tribuit, quod speciei qua tali convenit sive absolute, sive sub data conditione (§. 624.).

*Error in argumentando a specie ad genus.*

E. gr. Si quis in systemate harmoniæ præstabilitæ animæ tanquam speciei spirituum tribuit impotentiam physicam movendi corpus seu, quod perinde est, si negat, animam per influxum physicum movere posse corpus, & alter inde concludit omni spiritui, consequenter etiam Deo, tribuendam esse impotentiam movendi corpus, seu negari debere, quod ullus spiritus movere queat corpus; is errat. Similiter qui triangulo in genere tribuit, quod nonnisi rectilineo convenit, scilicet rationem æqualitatis summatæ trium angulorum simul sumtorum ad duos rectos, is errat.

## §. 641.

*Argumentatio a specie ad genus cum sit contraria Dicto de omni & nullo (§. 346. & seqq.), tanquam regulæ fundamentalis sit.*

Nnn 2

*Qualis ista argumentatio sit.*

mentali syllogismorum (§. 353.), inter eas referri meretur, quæ in forma peccant (§. 635.).

Cum dictum de omni & nullo inter prima *Logica* principia sit referendum, contra prima ejus principia peccat, qui a specie ad genus argumentatur, v. gr. ab anima, quæ spirituum species est, ad spiritum omnem, ipsumque Deum. Istiusmodi adeo errorem, qui sciens volensque committit, ideo *pueriliter errare* censetur. Committit autem errorem sciens atque volens, qui novit se generi tribuere, quod nonnisi speciei tribuitur.

## §. 642.

*Argumentatio vitiosa a specie una ad alteram sub eodem genere contentam.*

Si quis alteri speciei tribuit, quod uni vel absolute, vel sub data conditione convenit; is in argumentando errat. Etenim qui alteri speciei tribuit, quod nonnisi uni convenit sive absolute, sive sub data conditione; is nititur hoc syllogismo generali: Quod uni speciei vel absolute, vel sub data conditione convenit, id etiam competit alteri sub eodem genere contenta. Sed b. c. uni speciei vel absolute, vel sub data conditione convenit. Ergo hoc alteri quoque speciei competit sub eodem genere contenta. Quoniam species commune non habent, nisi quod notionem generis, sub quo continentur, ingreditur (§. 45.), quod uni absolute adeoque vi definitionis (§. 225.) convenit alteri convenire nequit, adeoque multo minus illud, quod nonnisi superaddente adhuc definitioni determinatione ulteriori eidem competit. Quoniam igitur major syllogismi falsa est; conclusio quoque falsa esse debet (§. 538.), adeoque errat in argumentando, qui speciei alteri tribuit, quod uni vel absolute, vel sub data conditione convenit.

E. gr. Si quis animæ, tanquam speciei entis simplicis, tribuit vim quandam limitatam sibi representandi universum; perperam inferretur, quod ideo etiam elementis rerum materialium, tanquam speciei entis simplicis, tribuat, vel tribuere debeat eandem vim representandi universum. Triangulum rectilinum rectangulum, quod triangulorum rectangulorum species est, non potest habere angulos duos actu rectos. Qui inde concludit, nec triangulum sphaericum rectangulum, quod perinde triangulorum rectangulorum species est, posse habere angulos duos actu rectos; is paralogismum committit.

## §. 643.

## §. 643.

Quod ista argumentatio a specie una ad alteram sub eodem genere contentam sit inter vitia formæ referenda; hoc modo ostendi potest. Omnes tandem syllogismi categorici ad hunc generalem reducantur (§. 348. 349.): *Quicquid sub universali A per B determinato continetur, et convenit prædicatum C.* Atqui *D continetur sub A per B determinato.* Ergo *ipsi D convenit prædicatum C.* Per prædicatum C autem intelligimus cum affirmativum, tum negativum. Quoniam igitur syllogismus, quo a specie una ad alteram sub eodem genere contentam argumentaris, sub catholico isto tanquam species sub suo genere non continetur (§. 642.); formam genuinam habere nequit.

Idem etiam eodem, quo ante (§. 641.), modo ostenditur, cum hæc quoque argumentatio impingat in dictum de omni & nullo convenienter extensum (§. 348.).

Unde tyronem Geometriæ prodit paralogismus, quo de triangulo rectangulo spherico prædicatur, quod de rectangulo rectilineo prædicari docetur in Elementis. Nec minus tyronem philosophiæ prodit paralogismus, quo quis ad elementa rerum materialium, entia simplicia, applicanda esse infert, quæ de anima affirmantur. Poterat argumentatio hæc vitiosa a specie una ad alteram sub eodem genere contentam sub illa simul comprehendendi, qua a specie una ad genus concluditur. Etenim si vera foret hæc posterior argumentatio, vi dicti de omni & nullo (§. 346 & seqq.) vera quoque esse deberet prior.

## §. 644.

*Si quis speciei tribuit, quod individuo uni vel alteri convenire observat; is vitiose argumentatur.* Argumentatur enim ita: *Quod uni vel alteri individuo convenit, id integræ speciei convenit.* Atqui *hoc vel istud uni vel alteri individuo convenit.* Ergo *hoc vel istud integræ speciei convenit.* Sed hic syllogismus non continetur sub catholico, qui omnes sub se comprehendit (§. 643.). Vitiosus igitur est.

Patet idem ex fundamento inductionis superius (§. 477.) stabilito, vi cujus speciei tribui nequit, nisi quod singulis inferioribus competit.

Quoniam idem fundamentum inductionis quoque non permittit, ut tribuatur generi, nisi quod singulis speciebus sub eodem contentis convenit; *argumentatio* quoque a *specie ad genus* inde erroris redargui poterat. Vitiosa argumentatio ab individuis ad speciem vulgo hoc catione comprehenditur: *A particulari ad universale non valet consequentia*. Haberi quoque potest pro inductione vitiosa (§. 479.).

## §. 645.

*Argumentatio vitiosa ab hypothetice dicto ad absolute dictum.*

*Si quis generi vel speciei, aut subiecto cuicunque absolute tribuendum esse concludit, quod ei sub data conditione convenit; is in argumentando errat.* Quod enim subiecto nonnisi sub certa conditione convenit, id ei absolute convenire nequit (§. 216. 529.). Ex eo igitur, quod subiecto aliquid sub certa conditione convenire agnoscimus, inferri nequit, quod eidem absolute convenire queat. Si quis adeo ita ratiocinatur, is a vero aberrat (§. 624.).

E. gr. Ex eo, quod in *quadrilatero circulo inscripto anguli diametraliter oppositi sunt simul aequales duobus rectis*, inferri nequit, in *omni quadrilatero angulos diametraliter oppositos simul esse duobus rectis aequales*: qui igitur ita argumentatur, is errorem in argumentando committit. Similiter si quis affirmat, *contingens naturaliter non posse ad actum perducere nisi per infinitam causarum seriem*; & alter inde infert, quod is statuatur absolute, *contingens non posse ad actum perducere nisi per infinitam causarum seriem*, errorem in inferendo committit.

## §. 646.

*Argumentatio vitiosa agnata.*

*Si quid subiecto cuicunque sub data conditione convenit & id eidem sub parte istius conditionis convenire concluditur; in argumentando aberratur.* Ostenditur eodem modo, quo propositio præcedens.

E. gr. Si quis ad lapidem ex quacunque altitudine cadentem & cuiusvis ponderis applicat, quæ nonnisi de lapide dari ponderis & ex data altitudine cadente intelligenda sunt; is vitiose argumentatur. Hæc tamen argumentatio non infrequens est, propterea quod hætenus propositiones non satis determinatæ formari solent. Atque inde est, cur in vita sæpissime irritato conatu opus aliquod aggrediamur. Ex eodem fonte in Physica atque Medicina multi propullulant errores: quamvis etiam utrobique sæpissime præcedens argumentatio vitiosa errores invehat,

## §. 647.

*Si prædicatum subiecto simpliciter convenire concluditur ex eo, quod eidem certo modo determinatum convenit; argumentatio vitiosa est.* Non absimili modo ostenditur vitium hujus argumentationis, quo vitium argumentationis ab hypothetice dicto ad absolute dictum ostendimus (§. 645.).

Argumentatio a dicto secundum quid ad dictum simpliciter.

E. gr. Si quis affirmet, *calculus differentialem esse inventum præstantissimum in Mathesi pura*, & alter inde infert, *quod sit præstantissimum inventum simpliciter*; is vitiose argumentatur. Solent istiusmodi sophismata dici *fallaciæ a dicto secundum quid ad dictum simpliciter*. Et possunt ad hoc genus referri argumentationes vitiosæ, quibus subiecto absolute tribuendum concluditur, quod sub data conditione eidem convenit (§. 645.), aut minimum sub parte quadam conditionis eidem vindicatur (§. 646.). *Ordo contingens non datur sine ordinante*. Sed si quis inde simpliciter infert, *ordinem nullum dari sine ordinante*; is istiusmodi paralogismum committit.

## §. 648.

*Si prædicatum aliquod subiecto simpliciter tribuitur atque ex eo concluditur, quod etiam certo modo determinatum eidem convenire debeat; argumentatio denuo vitiosa.* Ostenditur vitium argumentationis eodem modo, quo paulo ante (§. 645.) vitiosam esse argumentationem ab hypothetice dicto ad absolute dictum ostendimus.

Argumentatio a dicto simpliciter ad dictum secundum quid.

E. gr. Si quis affirmet, *argumentum aliquod pro existentia Dei allatum probare quod erat probandum*, & alter hinc inferat, *quod existentiam Dei probet demonstrativa ratione*; is vitiose argumentatur. Similiter si quis dicat, *elemosynam esse erogantem pauperi*, & alter inde inferat, *quod elemosyna danda sit pauperi, quem eadem ad se inebriandum abuteretur*; is vitiose argumentatur. Istiusmodi argumentatio vitiosa dicitur *fallaciæ a dicto simpliciter ad dictum secundum quid*, cui frequentissime locus est, ubi propositiones non satis determinatæ efferuntur: quod cum vulgo fieri soleat, sæpissime quoque a dicto simpliciter ad dictum secundum quid argumentantur, quia ab aliis dictis pervertunt & recte dicta in errorem trahunt.

## §. 649.

*Si quis ex eo, quod propositio particulariter negatur ponitur, quæ sub universaliter negante non continetur, ejus conversionem parti-*

Sophisma ex conversione parti-

culariter negantis or-  
tum.

*sam infert; is errorem committit.* Qui enim ex particulariter negante, quæ sub universaliter negante non continetur, conversionem ejus infert; is nititur hoc ratiocinio generali: *Omnis propositio particulariter negans, quæ sub universaliter negante non continetur, converti potest.* Sed hæc propositio est particulariter negans, nec continetur sub universaliter negante. Ergo hæc propositio potest converti. Quoniam vero particulariter negans converti quidem potest, si sub universaliter negante continetur (§. 456.), sed non in casu reliquo; major syllogismi falsa est (§. 507.), adeoque etiam falsa conclusio (§. 538.). Qui igitur in casu particulari eam admittit tanquam veram, errat (§. 623.).

E. gr. Non valet consequentia: *Quidam homo non est doctus. Ergo Quidam doctus non est homo.* Falsa nimirum est propositio universalis: *Nullus homo est doctus.* Similiter non valet in Geometria consequentia: *Quædam figura quadrilatera non habent singulos angulos actu rectos. Ergo quædam figura habentes singulos angulos actu rectos non sunt quadrilatera.* Neque enim universaliter negans vera est: *Nulla figura æquilatera habet singulos angulos actu rectos.*

### §. 650.

Periculum  
errandi ex  
conversione  
particulari-  
ter negantis.

*Quodsi igitur quis ex propositione particulariter negante infert conversionem ejus simpliciter, hoc est, non attendens, utrum sub universaliter negante contineatur, nec ne; is se periculo errandi exponit.* Etenim si contingit, eam sub universaliter negante contineri, inscius incidit in propositionem veram (§. 456.); quodsi vero sub eadem non continetur, errorem committit (§. 649.). Nescius itaque vi illationis, num vera sit conclusio, quam infert, num falsa, periculo errandi sese exponit.

Si quis hæc argumentatione utitur ad fucum faciendum aliis, sophiste munere fungitur (§. 636.). Etsi autem in iis casibus, ubi falsitas conversæ aliunde satis patet, vix locus est sophismati: dantur tamen casus alii, ubi conversum esse falsam nondum unicuique aliunde constat. Exemplum geometricum confirmabit asserti veritatem penes eos, qui in Geometria elementari nondum sunt satis versati.



## §. 651.

*Si quis propositionem universalem, qua attributum commune vel aliquod essentiale, aut quod per modum attributi communis esse debet, absolute prædicatur, convertit; is errat.* Etenim si attributum, aut quod per modum attributi se habet commune est, non per omnia essentialia simul determinatur (§. 66.), adeoque prædicatum etiam aliis subjectis convenire debet, quæ essentialia ista communia habent, per quæ determinatur, hoc est, prædicatum C non competit soli A, sed etiam ipsi B. Per se igitur patet, falsam esse propositionem: *Cui convenit C, idem est A.* Sed si propositionem hanc: *Quodcunque est A, eidem convenit C,* convertas; prodit hæc altera: *Cui convenit C, id est A.* Quamobrem qui eam tanquam veram admittit, errat (§. 623.).

*Error ex conversione propositionis universalis categoricæ.*

Si aliquod essentiale de subjecto prædicatur, idem perinde ac attributum commune non soli subjecto convenit, sed aliis etiam, quæ non sunt ejusdem speciei. Unde demonstratio in hoc quoque casu adhuc subsistit.

E. gr. Si quis affirmet, *omne necessarium esse æternum*, seu *carere existendi initio atque fine*, atque alter per consequentiam immediatam inde inferat, *omne æternum esse necessarium*, is vitiose argumentatur: neque enim ex eo, quod *omne necessarium sit æternum* sequitur, *omne æternum esse necessarium*. Ita in Geometria non valet argumentatio: *Omne quadratum est circulo inscriptibile.* Ergo *Omnis figura circulo inscriptibilis est quadratum*: neque enim quadratum (si rem Logice expendas) ideo circulo inscribi potest, quia ejus latera sunt æqualia & anguli singuli recti; sed quia est & æquilatera, & æquiangula figura, vel etiam quia est figura quadrilatera & anguli diagonaliter oppositi simul sumti sunt duobus rectis æquales. Est adeo attributum, quod quadratum cum figuris regularibus, & figuris quadrilateris, quarum anguli diagonaliter oppositi simul duobus rectis æquales sunt, commune habet. Immo sunt aliæ adhuc figuræ multilateræ, non æquilateræ, quæ circulo inscribi possunt: sed non opus est, ut in determinationem inscriptibilitatis in circulo hic inquiremus.

## §. 652.

*Si quis propositionem universalem convertit, qua quid sub* Error ex  
(Wolffii Logica) O o o *qua- conversione*

*propositionis  
hypotheticæ  
ortus.* quadam condicione de subiecto prædicatur, quod etiam de aliis sub-  
iectis prædicari potest; is errat. Quoniam subiectum ad-  
iecta condicione, sub qua prædicatum ipsi convenit, ulterius de-  
terminatur; novam quadam speciem constituit ita determi-  
natum (§. 44.) & prædicatum, quod accedente hac condicio-  
ne eidem competit, non tamen soli, per modum attributi  
communis sese habet. Propositio itaque in præsentè casu æqui-  
valet categoricæ (§. 227.), in qua de subiecto attributum com-  
mune universaliter prædicatur. Enimvero qui propositionem  
categoricam universaliter affirmantem convertit, in qua prædi-  
catum est attributum commune, is errat (§. 651.). Ergo  
etiam errat, qui propositionem universalem convertit, qua quid  
sub data condicione de subiecto prædicatur, quod etiam de aliis  
subiectis prædicari potest.

E. gr. Si quis affirmat, lapidem ex alto delapsum celeriter moveri, &  
alter inde inferat, quod celeriter movetur esse lapidem ex alto delapsum,  
is errat, quia propositionem convertit minime convertibilem. Si-  
militer in Geometria demonstratur, parallelogramma super eadem ba-  
si & inter easdem parallelas constituta æqualia sunt. Si alter inde inferat  
omnes figura æquales sunt parallelogramma super eadem basi & inter  
easdem parallelas constituta; is errat: etenim alia quoque dantur fi-  
gura, veluti triangula, quæ super eadem basi & inter easdem parallelas  
constitutæ æquales sunt.

## §. 653.

*Periculum  
errandi ex  
conversione  
propositio-  
num univer-  
saliter affir-  
mantium.*

Quoniam quædam propositiones universaliter affirman-  
tes converti possunt (§. 283. & seqq.), quædam converti neque-  
unt (§. 651. 652.); qui ex propositione universaliter affirmante in-  
fert ideo ejus conversum, quia universaliter affirmans, tacite ni-  
mirum, supponens, posita universaliter affirmante poni con-  
versam ejus, is periculo errandi sese exponit. Vitiosa nimirum  
est argumentatio, quæ nititur canone: posita universaliter af-  
firmante, ponitur ejus conversæ (§. 651. 652.): quæ cum in qui-  
busdam casibus succedat, exemplis veris illustrari potest, adeo-  
que ad fucum faciendum imperitis servit, consequenter *sophis-  
tica*

*stica est consequentia immediata per conversionem propositionis universaliter affirmantis (§. 636.).*

E. gr. Si quis affirmet, *omne necessarium esse aeternum*; sophista inde infert per consequentiam immediatam, *omne aeternum esse necessarium* (§. 636 651.). Neque enim ex eo, quod *omne necessarium est aeternum*, sequitur, *omne aeternum esse necessarium*; sed, si vel maxime posterius perinde ac prius esset verum, aliunde tamen idem probandum foret. Quodsi conversio vi regularum logicarum, adeoque illatio per consequentiam immediatam (§. 459.) fieri debebat, ostendendum erat, aeternitatem esse attributum proprium necessitatis (§. 283.). Enimvero præstat in casu particulari demonstrationem contexere ex principiis propriis. Atque hinc patet ratio, cur Mathematici non utantur propositionibus conversis, nisi quas demonstrarunt, & cur in iis demonstrandis non utantur principiis nisi mathematicis. E. gr. Ex eo, quod *anguli alterni sunt æquales, si lineæ parallele a transversa oblique secantur*, non infertur in Geometria theorema conversum, quod *lineæ parallele sunt, si iisdem per transversam oblique sectis anguli alterni fuerint æquales*; sed utrumque theorema peculiari demonstratione munitur & demonstratio etiam conversi ex principiis nonnisi geometricis constat. Eodem modo nos in superioribus conversam universaliter affirmantis peculiari demonstratione firmavimus, ubi aliqua ad futuros usus servanda occurrebat. Neque tamen ideo nullius usus sunt theoremata, quæ de propositionum convertibilitate dedimus (§. 283. & seqq.): neque enim solum iisdem utimur in aliis principiis Logicæ demonstrandis, veluti ex demonstratione propositionis præsentis & præcedentis patet, verum eadem etiam in arte inveniendi & Logica probabilius usum habent, suo tempore a nobis commonstrandum.

#### §. 654.

*Si quis ex eo, quod prædicatum sub data conditione sub-* Error ex con-  
*est tribuitur, quod tamen sub alia quoque eidem convenit, infert* versione pro-  
*per immediatam consequentiam propositionem, in qua prædica-* positionis de-  
*tum fit determinatio subiecti & quæ ante erat subiecti deter-* terminata,  
*minatio, prædicatum; is errat. Si propositio universaliter affir-*  
*mans: Omni A sub determinatione B convenit C; idem tamen*  
*C eidem A conveniat quoque sub determinatione D; dico eum*  
*errare, qui inde per consequentiam immediatam infert: Ergo*  
*omni A sub determinatione C convenit B. Quodsi enim ipsi A*

sub determinatione non minus D, quam B convenire potest C; evidens est, si C eidem actu convenit, a lesse debere vel determinationem D, vel determinationem B: si enim sola B requireretur, nec præterea D locum quoque habere posset, determinatio B foret unica: quod est *contra hypothesis*. Quamobrem si sumitur ipsi A convenire C, tribuenda eidem erit vel determinatio D, vel determinatio B. Nequaquam igitur locum habet illatio, quæ seclusa determinatione D, tribuit ipsi A tantum B propter C.

Equidem fieri potest, ut si C conveniat ipsi A, ab utraque determinatione B & D participet ipsum A. Enimvero non opus est, ut in demonstratione id attendatur. Sufficit enim ex eo jam patere illegitima consequentiam, quod, si C conveniat ipsi A, prædicandum sit de eodem vel B, vel D. E. gr. Si quis argumentatur: *Lapis ex alto delapsus celeriter movetur. Ergo lapis, qui celeriter movetur, ex alto delapsus fuit*; illegitima est consequentia. Si enim lapis celeriter movetur, non necesse est ut cadendo impetum acquisiverit; potest enim impetu a projiciente vel alio quocunque modo impresso etiam celeriter moveri.

## §. 655.

*Periculum  
errandi ex  
conversione  
propositionis  
determinata  
eritum.*

Patet adeo, qui propositionem ita convertit, ut prædicatum fiat determinatio subiecti & e contrario determinatio subiecti ingret in locum prædicati, non attendens num determinatio sit unica, sub qua prædicatum subiecto convenire potest; cum nonnisi casu in conclusionem veram incidere (§. 287.), consequenter periculo errandi sese exponere.

E. gr. Si quis videns lapidem celeriter moveri infert, cum ex alto delapsus fuisse, propterea quod novit, lapidem ex alto delapsus celeriter moveri, is periculo errandi sese exponit. Quod si enim veritatem assequitur, id nonnisi casu contingit, propterea quod perinde fieri poterat, ut alia quacunque de causa celeriter moveretur, cum plures sint determinationes subiecti, sub quibus motus celer de eodem prædicari potest. Hæc fallacia sæpissime locum habet in ipsa quoque vita communi: id quod ad ea, quæ accidunt, attendendi facile manifestum evadere.

## §. 656.

## §. 656.

*Si quis pro contradictoriis habet propositiones, quæ tales non sunt, atque ex veritate unius inferat falsitatem alterius; is illegitime argumentatur.* Et si enim duarum propositionum contradictoriarum una necessario falsa, altera necessario vera, atque adeo ex veritate unius inferri possit per consequentiam immediatam falsitas alterius (§. 459. 532.); nil tamen obstat, quemadmodum exempla obvia loquuntur, quo minus propositionum, quæ pro contradictoriis habentur, cum non sint, utraque sit vera. Qui ergo ex veritate propositionum nonnisi apparenter contradictoriarum, vel earum, quæ perperam pro contradictoriis habentur, inferat falsitatem alterius, is illegitime argumentatur.

*Illegitima argumentatio ex contradictione apparente vel spurta.*

E. gr. In scriptura dicitur, quod *Luna sit Luminare*; Astronomus vero affirmat, quod *Luna sit corpus opacum omni proprio lumine destitutum*. Quod si quis arbitretur duas has propositiones sibi mutuo contradicere atque supposita veritate prioris, quod *Luna sit luminare*, inferat falsam esse posteriorem, quod *Luna sit corpus opacum, omni proprio lumine destitutum*, is illegitime ratiocinatur. Et in hoc quidem casu contingit, ut illegitima argumentatione in errorem incidat, cum ambæ propositiones sint simul veræ. Etenim *luminare* cum dicatur corpus mundi totale, quod Tellurem foriter illuminat, ut in conspectum prodeant corpora partialia; nulla est inter *Mosen* atque *Astronomum* contradictio. Neque enim Astronomus negat, lunam Tellurem illuminare; sed negat id fieri lumine proprio.

## §. 657.

*Patet similiter, a veritate aberrare, si quis vere contradictoriarum falsam pro vera habet ac inde inferat falsitatem alterius.* Etenim cum contradictoriarum altera necessario vera sit, altera vero falsa (§. 532.) & per hypoth. falsam pro vera habeamus, necesse est ut veram habeamus pro falsa, adeoque erremus (§. 623.).

*Error ex contradictione ortus.*

Error hic sæpissime committitur in controversiis, ubi plerumque qui controversiam movet, tanquam vera sumit, quæ ipsemet statuit, adeoque pro falsis habet, quæ iis contradicunt.

## §. 658.

*Qui propositiones pro contradictoriis habet, quæ tales non*

*Ignorantia elenchi desinitio.*

non sunt, dicitur *ignorare elenchum*: Ut adeo *Ignoratio elenchi* sit ignorantia veræ contradictionis, adeoque requisitorum ad contradictionem.

Ita sophisma ignorationis elenchi committit, qui Astronomum opacitatem Luna defendentem contradicere judicat *Mosi* eandem *luminare* appellanti: neque enim inter thesin scripturæ, quod *luna sit luminare*, & effatum Astronomi, quod sit *corpus opacum*, contradictio intercedit, cum corpus opacum possit esse luminare, si lumen aliunde acceptum reflexit.

### §. 659.

*Quomodo  
evitetur.*

Quoniam *ignoratio elenchi* committitur vel ob æquivocationem terminorum, vel ob ignorata veræ contradictionis requisita; eadem evitabitur, si in priori casu inquiratur in notiones terminorum æquivoco jungendas & ea eidem jungatur, quæ cum veritate consistit; in casu autem posteriori, si applicentur regulæ, quæ de vera oppositione (§. 289. & seqq.) atque in specie de contradictionis propositionibus (§. 294. & seqq.) demonstrata sunt.

In exemplo modo allato (not. §. 658.) ignoratio elenchi committitur ob æquivocationem vocis *luminare*. Quoniam enim *Moses* Solem atque Lunam communi nomine *luminaria magna* appellat, Solem autem esse corpus lucidum extra omnem controversiam positum est, ideo per *luminare* videtur intelligi corpus lucidum, quod proprio lumine fulget. Enimvero cum communis luminis notio non involvat, nisi quod in tenebris latentia in conspectum producat, seu efficiat, ut ea videri possint, atque hæc notio etiam Soli ex vero respondeat; neque diversa ab ea voci *luminare* jungi potest, quando de Luna usurpatur. Sublata igitur æquivocatione & vera notione stabilita, tollitur contradictio. Contra ob ignorata veræ contradictionis requisita ignorationem elenchi committit, qui affirmantem sibi contradicere statuit, quod *imaginatio non producat ideas nisi rerum ante perceptarum & quod ex iisdem componat ideas rerum, quas sensu nunquam attingimus*. Etenim in priori casu sermo est de ideis partialibus, in posteriori autem de compositis, quæ ex partialibus constantur. De imaginatione igitur non eodem respectu dicitur, quod non producat ideas nisi rerum ante perceptarum & quod ex iisdem componat ideas rerum, quas sensu nunquam attingimus, consequenter etiam extendatur ad objecta, quæ sensu nunquam percepimus.

## §. 660.

*Si quis assentitur propositioni, quam vel non satis intelligit, vel sufficienter probare nequit; is periculo errandi sese exponit.* Illud per se patet, fieri non posse, ut intelligat, num propositio aliqua vera sit, num vero falsa, qui nondum novit, quomodo intelligenda sit, seu quamnam singulis terminis iungenda sint notiones (§. 117.). Quamobrem si hoc non obstante confuse quodam modo agnita assentitur, fieri potest, ut falsam amplectatur tanquam veram, adeoque errat (§. 505.). Errandi igitur periculo sese exponit.

*Periculum errandi ex precipitato assensu.*

Porro si quis thesin sufficienter probare nequit, ille instar præmissarum sumit propositiones, de quibus ipsi nondum constat, utrum veræ sint, nec ne. Quoniam itaque præmissæ syllogismorum, ex quibus probatio constat, non sunt evidenter veræ, nec conclusio talis esse potest (§. 537.), consequenter nil obstat, quo minus falsa sit propositio, quam tanquam veram amplectitur. Errandi igitur periculo denuo sese exponit.

Quoniam nihil frequentius est, quam ut termini non satis explicentur, nec propositiones sufficienter probentur; ideo quoque periculum errandi a plurimis fere nunquam abest. Atque eadem de causa præcipitato assensu frequentissime in errorem incidunt, qui methodi accurata non sunt tenaces.

## §. 661.

*Periculum adeo errandi evitaturus cavere debet, ne admittat terminos nisi accurata definitione explicatos, nec propositiones nisi sufficienter probatas.* Quænam ad accuratam definitionem requirantur, docuimus in theoria Logicæ (§. 152. & seqq.): quænam vero ad sufficientem probationem necessaria sint, in praxi ejusdem paulo ante (§. 551. & seqq.) docuimus.

*Medium evitandi periculum errandi.*

Nihil adeo hic præcipitur, cui per antecedentia satis fieri non possit. Demonstravimus vero jam in *discursu præliminari* (§. 116. 117. 118.), in philosophia non utendum esse terminis, nisi accurata definitione explicatis, nec principiis, nisi sufficienter probatis, neque in eam ad-

*mitten-*

mittendam esse propositionem, nisi quæ ex principiis sufficienter probatis legitime deducitur. Ratio ea erat, quod in philosophia certam consequi studemus scientiam; ex nunc demonstratis vero alia adhuc ratione parer, fieri non posse ut scientiam certam consequamur nisi sollicite caveamus, ne admittamus nisi sufficienter explicata & probata, propterea quod in casu opposito periculo errandi exponimur. Et si autem remedium, quod periculum errandi evitaturis præscribimus generale sit; non tamen opus est ut specialiora addantur, quoniam ea nuda applicatione regularum logicarum continentur. Cui igitur volupe fuerit sibi ab erroribus cavere & ad solidam rerum scientiam pervenire; is non modo regulas logicas a nobis traditas sibi familiares reddat, sed ipso quoque usu (de quo inferius plura dicemus) habitum sibi comparat eadem ad praxin transferendi.

✠✠✠✠ ✠✠✠✠ ✠✠✠✠ ✠✠✠✠ ✠✠✠✠ ✠✠✠✠ ✠✠✠✠ ✠✠✠✠

## SECTIO II.

DE

# USU LOGICÆ IN VERITATE INVESTIGANDA.

CAPUT I.

## DE EXPERIENTIA IN GENERE.

§. 662.

*Institutum  
Auctoris.*

**N**on nobis jam propositum est artem inveniendi exponere, cujus est tradere regulas, juxta quas operationes mentis diriguntur in veritate investiganda, propterea quod regulæ Logicæ sole ne quidem ad artem inveniendi generalem, nedum specialem sufficiunt, sed aliæ bene multæ aliunde derivandæ ad eam præterea requiruntur, de quibus suo loco dicemus. *Suffecerit itaque hic ostendisse usum, quem regulæ Logicæ in veritate nobis adhuc incognita*



*gnita eruenda praeſtant.* Etſi enim ſolæ artem inveniendi totam minime exhauriant, multas tamen veritates proprio Marte earum ope conſequimur, modo iisdem rite uti didicerimus.

Hæc ideo monemus, ne inſufficientia tradidiſſe videamur. Abunde enim ſufficit, quod tradiderimus certo profutura.

## §. 663.

*Utimur autem in veritate proprio Marte eruenda vel ſolo ſenſu, vel ex aliis cognitis ratiocinando elicimus nondum cognita.* *Quot dentur modi veritatem inveſtigandi.*  
In priori caſu dicimur *veritatem eruere a poſteriori*; in poſteriori autem *a priori*.

De utroque igitur nobis dicendum eſt, ita quidem ut initium fiat a modo, quo ſenſu duce ad veritatis nondum nobis cognitæ cognitionem devenitur, cum hac ratione nobis comparemus principia, ex quibus deinde plura deducuntur a priori. E. gr. Aſtronomi primo loco obſervationes ſibi comparant, & hiſce datis ratiocinando colligant, quæ per obſervationem minime patent. Nec aliud moſ eſt Phyſicorum recentiorum, quibus ſcholæ inanes formulæ non probantur. Immo ſuo loco ac tempore patebit, nullam eſſe diſciplinam philoſophicam, in qua non idem obtineat, ſi docere noliſ ex proprio ingenio conſiſta, ſed naturæ rerum conſentanea.

## §. 664.

*Experiri* dicimur, quicquid ad perceptiones noſtras attenti cognoviſcimus. Ipſa vero horum cognitio, quæ ſola attentione ad perceptiones noſtras patent, *experientia* vocatur. *Experiri quid dicatur.*

Subinde quoque *experientiarum* nomine veniunt notiones atque iudicia ex rerum ſingularium perceptione derivata: Sed nobis cum hoc ſignificatu nihil eſt negotii, ne in conſtantia loquendi dubiæ interpretationis ſiant eſſata noſtra. *Solem lucere* cognoviſcimus ad ea attenti, quæ viſu percipimus. Unde experientia conſtare dicitur, quod *Sol luceat*. Similiter ad noſmet ipſos attenti cognoviſcimus, nos non poſſe aſſenſum præbere contradicitoriis, v. gr. non poſſe ſumere tanquam verum, quod ſimul pluât, vel non pluât.

## §. 665.

Quoniam nonniſi ſingularia percipimus, *experientia ſingularium eſt.* *Objectum experientia.*

Universalia nimirum non experimur, etsi eorum cognitionem ab iis, quæ experimur, derivemus, quemadmodum mox disertius docebimus. Et quia universalium cognitio ab experientia derivatur, ideo quoque eandem a posteriori probare licet: id quod non minus mox distinctius exponemus.

## §. 666.

*Officium ejus,  
qui ad experientiam  
provocat.*

*Ad experientiam itaque provocans casum singularem asserere tenetur, nisi talis vel obvius sit, vel alteri, cum quo nobis res est, notus.* Quodsi enim obvius fuerit, quilibet eadem experiari valet, quæ nos experti sumus, quandocunque ipsi libuerit, aut antea jam experta monitus in memoriam sibi revocare potest; quod posterius etiam in altero casu obtinet, ubi is, cum quo nobis res est, non destituitur experientia, ad quam provocamus. In utroque igitur casu frustraneus foret labor, quem in recensendis casibus singularibus consumeremus.

Si experientia, ad quam provocamus, non versatur circa obvia, aut alteri, cum quo nobis res est, minime nota; nec alteri constat, quales fuerint istæ perceptiones, unde notionem generalem vel judicium intuitivum, quod experientia tuetur, derivavit, & quomodo inde notionem suam, vel judicium intuitivum derivaverit. Primum cum sit res facti, in hoc casu, ubi sola alterius relatione nobis innotescere potest, credendum (§. 612.) : posterius vero ex regulis logicis dijudicandum esse liquet (§. 1.). Ne temere credendo fallamur, nostrum est inquirere, utrum, qui rem facti narrat, sit fide dignus (§. 613. & seqq.), nec ne, & num ipsa quoque, quæ narrantur, fidem mereantur (§. 622.). Ut igitur judicium fieri possit, quantum experientiæ alterius tribuendum sit & num is in notionibus ac judiciis intuitivis formandis rite fuerit versatus; qui ad eam provocat in casu supposito utique singularem quendam casum aut plures asserere tenetur.

Constat experientia, hæud raro ad experientiam provocare eos, qui in terminis contradictoriis versantur. Frequentia sunt penes Medicos exempla & vulgus quoque tanquam continua atque quotidiana experientia confirmatum sumit quod a rei veritate abhorret, adeoque experientia

rientiæ repugnare debet. E. gr. In re hortensi Lunæ influxui tribuitur, quod plantæ nonnullæ flores edant plenos, cum tamen idem a vero alienum esse constet. Pertinet huc tota astrologia judiciaria cum chiromantia aliisque artibus divinatricibus. Enimvero demus exempla, quibus regulæ nostræ veritas illustretur ac confirmetur. E. gr. *Aquam madefacere lignum* obvia experientia constat. Qui igitur hoc iudicium sumit tanquam principium ratiocinandi, is minime opus habet, ut ad casus singulares provocet, quibus *lignum ab aqua deprehensum fuit madefactum*, cum nemo facile sit, qui non idem sæpius viderit & visorum recordetur, quam primum voces a nobis prolatas auribus percipit; aut, si vel maxime quidam fuerit, qui neglecta attentione istiusmodi casus non recordetur, quo *aqua effusa lignum madefecit, aut lignum aquæ immersum fuit madefactum*, singulis tamen momentis idem experiri in potestate ipsius est. Enimvero si quis experientia constare affirmat, *aërem esse gravem*, non cuilibet obvii sunt casus, quibus idem experiri potest. Quamobrem si nobis minime res fuerit cum eo, qui in philosophia experimentalis recentiorum versatus, describendum erit experimentum, quod gravitatis aëris explorandæ gratia instituiamus, veluti quod globum vitreum, vel cupreum ope antriæ pneumaticæ evacuatam & contra aëris accessum probe munitam ad balancem examinantes minus ejus pondus deprehenderimus, quam cum aperto epistomio aërem deauro immitteremus. Dudum hoc observarunt Astronomi. Etenim experientia omnibus obvia quæ constant, tanquam concessa sumunt, veluti quod Sol motu diurno volvatur circa tellurem ab ortu versus occasum. Observationes vero, quæ unicuique non constant, accuratius describunt, ut de modo observandi judicare liceat, ac inde certus reddatur alter, quantum observationi sittribuendum. Quod si observationes fuerint Astronomis dudum perspectæ & Astronomo res est cum Astronomo, illi modum observandi minime describunt, nisi forsitan plures fuerint modi observandi, qui non eodem in pretio habentur ab artis peritis. Cum ab experientia derivata principia sint, quibus cognitio ceterorum superstruitur, circa principia vero commissus error in progressu continuo multiplicetur (§. 627.); *regula, quam hic tradimus, admodum tenaces in praxi esse debemus.*

## §. 667.

Quoniam illud experimur, quod ad perceptiones nostras attenti cognoscimus (§. 664.); *si cujus rei nullam habemus notionem, eam nos experientia cognovisse dici nequit.*

Quando perperam nobis aliquid experiri videamur.

E. gr. *Influxus physici animæ in corpus* nullam prorsus habemus notionem, nec, dum ad voluntatem animæ moventur organa corporis, quicquam ejus percipimus : perperam igitur dicitur, quod eundem experiamur. Similiter *vis attractiva magnetis*, quatenus eam pro causa phænomeni attracti a magnete ferri venditamus, nullam prorsus notionem habemus, nec ejus quicquam percipimus, dum ferrum a magnete attrahi observamus. Errat igitur affirmans, se vim attractivam magnetis experiri, aut per experientiam eandem patere.

## §. 668.

*Vitium subreptionis in experiundo.*

Errorem in experiundo commissum, quo nobis videmur experiri, quod minime experimur, dicimus *Vitium subreptionis in experiundo*.

Vitium hoc committunt, qui sibi experiri videntur influxum physicum animæ in corpus, vim attracticem magnetis, amorem & odium rerum inanimatarum. Multas idem chimæras in physicam scholasticam inexit.

## CAPUT II.

## DE FORMANDIS JUDICIIS INTUITIVIS ET NOTIONIBUS A POSTERIORI.

## §. 669.

*Modus perveniendi ad judicia intuitiva.*

**J**udicia intuitiva formaturus 1. attendere debet ad ea, quæ rebus insunt, aut ad quæ quomodocunque referuntur : 2. Rem, quam percipit, porro sumere debet pro subiecto, quod vero in ea deprehendit aut relationem ejus ad alia, quam observat, pro prædicato. Ita nimirum prodit judicium intuitivum.

Dum enim rem, quam percipimus, sumimus loco subiecti, & quod in ea deprehendimus aut ejus ad alia relationem tanquam prædicatum ; quod in eadem distinguimus aut cum ea simul percipimus, tanquam ab ea diversum, sed ad eandem tamen pertinens spectamus (§. 200.), adeoque de eadem judicamus

camus (§. 39.). Quoniam vero ei non tribuimus, nisi quæ in ipsius notione comprehensa intuemur; judicium intuitivum est (§. 51.). Patet adeo modo a nobis præscripto ad judicia intuitiva deveniri.

Hac ratione cognoscimus, *radios Solis calefacere, pluviam madefacere, arbores incitante vere flores protrudere, ignem urere.* In demonstrationibus sumentes vel definitionem, vel hypothesein propositionis, tanquam notionem rei præsentis, eodem prorsus modo formamus judicia, unde incipit demonstratio. Et in progressu demonstrationis sumentes plures conclusionibus syllogisticis illatas simul, vel etiam cum hypothesei aut uno vel altero, quod hypothesein ingreditur, tanquam notionem rei cujusdam præsentis, non diverso ab eo, quem præscripsimus, modo intuitiva judicia formamus (§. 551. & seqq.). Pleraque judicia, quibus in vita communi utimur, hoc pacto nobis innotuere. Et judiciorum istiusmodi formatio primus gradus est cognitionis distinctæ. Ersi autem judicia ista primum non nisi singularia sint; docebimus tamen deinceps, quomodo ad universalitatem evehantur.

§. 670.

Quodsi denuo 1. rem perceptam sumamus tanquam subiectum & 2. quod vel in aliis rebus simul, aut olim perceptis, vel in eadem olim percepta deprehendimus, in illa autem non animadvertimus, tanquam prædicatum negativum; *judicium intuitivum negativum formamus*: id quod per se patet, nec ulteriori probatione indiget, præsertim si ad ea attendas, quæ probationis loco modo ad resolutionem problematis præcedentis (§. 669.) attulimus.

*Modus formati judicij negativæ.*

E. gr. Si ferrum candens & non candens una contuemur, atque adeo in uno deesse animadvertimus, quod in altero deprehenditur; judicium intuitivum negativum formamus, quod *ferrum non candeat*. Sive autem ferrum candens & non candens una videamus, sive alterum videamus, alterius antea visi recordemur, perinde omnino esse nemo negabit. Nec minus patet, si diversa objecta una percipiamus, in quorum uno notatur, quod in altero non apparet; eodem modo judicia negativa formari removendo ab uno, quod alteri tantummodo inest. E. gr. Si pomum viride & prunum cæruleum una videmus, negative judicamus, *pomum non esse cæruleum & prunum non esse*

## 486 Part. II. Sect. II. Cap. II. De formandis

*esse viride.* Immo nec in hoc casu obscurum est, perinde prorsus esse, siue utrumque objectum una videamus, seu sensu percipiamus, siue alterius tantum recordemur. E. gr. Si prunum cœruleum videntes recordemur cerasi rubri antea visi, negative judicamus, *prunum non esse rubrum* instar cerasi. Quamobrem iudicia negativa intuitiva formaturus in memoriam sibi revocare debet olim percepta, ut ex collatione appareat, quam illi, vel his non insunt.

§. 671.

*Quando iudicia intuitiva præbeant notionem distinctam.*

*Quodsi prædicata iudiciorum intuitivorum fuerint notæ, eo ipso notionem rei perceptæ formamus distinctam.* Etenim si in iudiciis intuitivis, quæ de re percepta formamus, prædicata fuerint notæ, ea cum a re, tum inter se distinguimus (§. 39.). Sed si notas, quæ in re percepta continentur distinguimus, notio, quam habemus, distincta est (§. 88.). Patet itaque notionem rei, quam percipimus, fieri distinctam, si iudicia intuitiva formamus, quorum prædicata sunt rei notæ.

E. gr. Si quadratum contuemur, in eo deprehendimus quatuor latera; observamus, quod singula latera sint inter se æqualia; videmus denique, omnes angulos esse actu rectos. Tria igitur formamus iudicia intuitiva, 1. *Quadratum habet quatuor latera*, 2. *Quadrati latera singula sunt inter se æqualia*, 3. *Quadratum habet angulos singulos actu rectos.* Quoniam hæc iudicia inserviunt ad quadratum agnoscendum & ab aliis figuris quibuscunque discernendum; prædicata eorum sunt notæ (§. 39.) atque adeo, dum eadem a se invicem distinguimus, notionem Quadrati distinctam nobis formamus. Patet itaque, quomodo figura Geometriæ elementaris præbeant tyronibus Logicæ ansam sese exercendi in formandis notionibus distinctis.

§. 672.

*Modi observationis.*

*Si quid uno tempore in subjecto aliquo observatur, quod alio in eodem vel altero ejusdem generis, aut speciei non deprehenditur; id inter modos generis, aut speciei illius referendum.* Quod enim uno tempore in subjecto aliquo siue numero, siue genere, vel specie eodem inest, sed alio eidem non inexistit, id constanter non inest; sed inter mutabilia pertinet. Patet itaque, quod idem inter modos referri debeat (§. 67.).

E. gr. Quando pluit, *lapis madet*; quando tempestas minime pluvia, *lapis est siccus.* Apparet itaque *madorem* atque *siccitatem* inter

ter modos lapidis referri debere. Eodem modo constat, quod calor atque frigus inter modos lapidis referri debeat. *Sol* videtur instar *disci circularis*, quando supra horizontem elevatus; in horizonte autem, dum oritur, vel occidit, nonnunquam *figuram habet ovalem*. Quoniam itaque figura ovalis in eodem situ ad oculum minime constans est, inde colligitur, inter ea, quæ modorum instar de Sole prædicantur, referri debere, quod in horizonte figura ejus appareat ovalis. Principium hoc est hominibus veluti naturale, cum omnes omnino Logica naturali instructi eodem utantur ad mutabilia, quæ enti insunt, agnoscenda & a constantibus distinguenda. Ceterum ad genera & species rerum distinguenda sufficere quoque *notiones confusas*, modo fuerint *clara completa*, tum experientia constar, tum per ipsas notionis confusæ atque completæ notiones patet (§. 88. 92.). Sane mineralium, vegetabilium, animalium non habemus nisi notiones confusas, quæ tamen eo non obstante in sua genera & species distribuimus nominibusque distinguimus. Quemadmodum vero distincta cognitio in omni casu & latius patet, & accuratior est; ita quoque & plura rerum genera pluresque species distinguere & terminis certioribus construngi possunt, ubi eorum distinctam habueris cognitionem.

§. 673.

Quoniam modus, qui actu inest, vel aliquando inerat, *Observatio* inesse potest, ejus possibilitas vero tanquam rei intrinseca consideratur (§. 156.); hanc inter ea, quæ enti constanter insunt, *eorum, quæ instar attributorum se habent.* consequenter inter attributa referri debere (§. 65.) constat: *Atque adeo patet, quomodo observentur ea, quæ per modum attributorum entibus insunt.*

E. gr. *Lapis non semper calidus, sed subinde frigidus.* Patet adeo, illam dispositionem, qua posita lapis calefieri & frigesceri potest, constanter eidem inesse, aut, si mavis potentiam calefendi & frigescendi attributi instar lapidi inesse, ut omni tempore vera sit propositio: *Lapis potest calefieri, lapis potest frigesceri.*

§. 674.

*Si quid in pluribus subiectis ejusdem generis, vel speciei* Modus *constanter observatur, nec unquam, nisi eadem subiecta frequen-* *vandi attri-*  
*tis sint observationis, contrarium deprehensum; id inter attri-* *buta & essen-*  
*buta, vel essentialia referri debere probabile est. Quod enim* *tialia proba-*  
*omni enti ejusdem generis, vel speciei constanter inest, id in-* *bilis.*

ter

ter attributa vel essentialia ipsius locum habet (§. 64. 65.). Enimvero quod in pluribus subjectis ejusdem generis, vel speciei constanter observatur, & cujus contrarium nunquam fuit deprehensum; id inductione incompleta probabiliter generi, vel speciei isti constanter inesse colligitur (§. 578. 478.). Referri igitur idem debet vel inter attributa, vel inter essentialia.

E. gr. *Canem latrare* quotidie & nos, & alii observamus, nec unquam nobis occurrit exemplum canis non latrantis. *Omnem adeo canem latrare posse* inductione etsi incompleta, maxime tamen probabili colligimus. Unde *potentiam latrandi* inter attributa canis referimus. Quemadmodum omni in casu, ita quoque in presente dantur gradus probabilitatis. Etenim & numerus observationum, & tempus, quo observationes continuatae, probabilitatem auger, ita ut instar demonstrationis assensum extorqueat. Utimur vero in ipsa quoque Mathesi nonnunquam inductione ad constantes quantitatum relationes ab inconstantibus discernendas, veluti cum formulae speciales constantem quandam relationem ad quantitates datas habere, vel seriei cujusdam in infinitum progredientis termini sive ad se invicem, sive ad quantitates quasdam datas relationem invariantam habere deprehenduntur. Quamvis vero in inductione non sit acquiescendum, ubi ad veritatem liquidam ope demonstrationis perveniri datur; utendum tamen est inductione in inveniendo, ubi praestantissimum medium habetur, quemadmodum suo tempore in Arte inveniendo evidentissime demonstrabitur.

## §. 675.

*Attributorum & essentialium atque modorum aliquod discrimen.*

*Si quid salva re ab eadem auferri non potest, id inter attributa, vel essentialia ejus referendum; contrarium vero inter modos locum habet.* Quod enim re salva ab eadem auferri non potest, id ei constanter inest. Aut igitur ad essentialia pertinet, aut attributa ejusdem (§. 64. 65.).

E contrario quod salva re ab eadem auferri potest, id ei non necessario inest, adeoque nec opus est, ut constanter infit. Inter mutabilia itaque referendum, adeoque inter modos locum habet (§. 67.).

E. gr. Calor a lapide auferri potest, ut tamen maneat lapis: *Calor itaque inter modos lapidis refertur.* Numerus ternarius angulorum in figura



figura trilatera immutari nequit, nisi eam destruere velis: *ternatur* adeo *laterum numerus trianguli attributum est*. Æqualitas laterum a quadrato auferri nequit, nisi id in figuram aliam immutare velis: constat vero, *æqualitatem laterum inter essentialia quadrati referri*.

§. 676.

Quamobrem si quid a subiecto quocunque eodem salvo auferri observamus, id esse modum ejus agnoscimus. *Modi observatio altera.*

E. gr. Sulphuris accensi halitu a violis auferitur color cæruleus: patet itaque, colorem cæruleum esse modum violæ, non attributum. Hinc non mirum videri debet, quod dentur etiam natura tales, quales halitu sulphuris accensi oriuntur, nimirum colore cæruleo orbatæ.

§. 677.

Si quid ex contiguitate eorum, inter quæ constituitur, in contiguitatem contrariorum deferatur, nec, quod in eo observatur, mutatur; id vel ad attributa, vel ad essentialia pertinere probabile est; in casu contrario patet, quod ad modos pertineat. Quod enim ad modos pertinet, per essentialia minime determinatur (§. 67.), atque adeo non propterea inest, quia essentialia in sunt (§. 219.). Ratio igitur, cur inest, extra subiectum quaerenda. Quodsi ergo idem ex contiguitate eorum, quæ ipsum ambiunt, in contiguitatem contrariorum transferas, atque id, quod inesse observatur, mutetur; evidens est, rationem, cur idem inest, in extrinseco quodam contineri, consequenter idem per essentialia minime determinari, & hinc inter modos referendum esse (§. 67.). *Attributorum essentialium & modorum observatio.*

Quodsi vero non mutetur, quod inesse observaveras; ratio in iis, quæ subiectum ambiunt, non inesse intelligitur: cum tamen mutatio quædam permanens esse possit alio tempore, vel alibi aliunde profecta; probabiliter saltem colligitur, (§. 576.) idem ratione extrinseca destitui, consequenter vel ad essentialia pertinere, vel rationem suam in his habere, adeoque in numerum essentialium, vel attributorum referri debere (§. 64. 65.).

E. gr. Si cera mollis ex aëre calido in frigidum transfertur, mollem in duram abire observamus: hinc igitur certo colligitur, *mollitiem* (*Wolfii Logica*) *atque*

atque duritiem inter modos cera referri debere. Facile autem patet, nobis hic sermonem esse de iis, quæ re salva mutantur. Quodsi enim quid ex contiguitate horum corporum in contiguitatem contrariorum translatus speciem mutet, id, quod una mutatur, inter attributa locum habere potest atque inter essentialia (§. 675.). E. gr. Si glacies ex aëre frigido in calidum transfertur; durities mutatur & ex fixo corpore fit fluidum: enimvero cum glacies una destruat, hinc colligere non licet, duritiem esse modum glaciei. Patet potius contrarium, quod scilicet *durities sit attributum glaciei*, cum tolli ab ea non possit, nisi eadem destructa. Quodsi lapis durus ex aëre calido in frigidum, ex humido in siccum transfertur, vel etiam igni exponitur, aut in aquam demergitur; omni tamen in statu durus permanet: hinc maxima probabilitate colligitur, *duritiem inter attributa lapidis referendam esse*. Cur vero illatio non possit venditari pro apodictica, ejus rei ratio ex demonstratione pater. Immo ipsa experientia constat, dari exemplum in contrarium. Nam si vitrum rubrum, vel viride, aut alio quocunque colore infectum ex contiguitate quorumcunque corporum, quæ aliis mutationem inducere valent, in contiguitatem contrariorum deferas; non tamen ideo mutabitur color, utur constet, cum vitro salvo abesse posse, quoniam vitra dari colore minime imbuta nemo ignorat, consequenter eum inter modos vitri locum habere: quod idem etiam ex ipsa vitri genesi manifestum est. Et si enim vera sint, quæ illatione probabili colliguntur; non tamen ideo veritas vi illationis probabilis perspicitur. Qui certam veritatis cognitionem curæ cordique habet, is eidem omni in casu æquum statuit pretium.

§. 678.

*Quomodo notio universalis sensu ducit acquiratur.*

*Quodsi ergo perceptio singula clare representat, quæ ad rem perceptam agnoscendam & ab aliis distinguendam sufficiunt, ita ut vel peregrinis, quæ ex notione exulare debent, non sint interspersa, vel præ iis tamen magis in sensum incurrant, sensu ducit notionem universalem distinctam formabis, ubi 1. tot formaveris judicia intuitiva, quot in re percepta a se invicem distincta observas (§. 669.), 2. prædicata, quæ ceteris manentibus iisdem variari possunt, missa feceris, aut illa prædicata, quæ juncta ceteris in omni casu non sunt prorsus eadem, a determinationibus particularibus liberaveris: id quod efficies, si pluri-*

pluribus exemplis inter se collatis attenderis, in quo conveniant, in quo a se invicem differant.

Etenim si perceptio singulas notas clare exhibet, eas agnoscere atque a se invicem discernere licet (§. 80.), atque adeo omnes ingrediuntur tanquam prædicata judicia, quæ formamus *vi resolutionis*, intuitiva. Quodsi ergo inter illa prædicata non compareant nisi notæ, eo ipso habes notionem rei perceptæ distinctam (§. 671.). Enimvero si inter prædicata compareant, quæ ex notarum numero excludenda, atque adeo ea omiseris, quæ ceteris manentibus iisdem variari possunt, & quæ prorsus exulare nequeunt, a determinationibus tamen particularibus liberaveris, utpote in omni casu non iisdem, quemadmodum fieri debere præcepimus: patet, denuo non ingredi, quam formas, notionem nisi ea, quæ rebus pluribus communia sunt. Habes adeo notionem universalem (§. 54.).

E. gr. Ponamus oculis obijci figuram quandam regularem, *hexagonum* puta *ordinatum*. Si attendis ad ea, quæ in hac figura repræsentantur, latera & angulos distinguis. Quodsi latera numeras, numero sex deprehendis: si eadem ad se invicem referas, æqualia esse intelligis. Formas adeo iudicium intuitivum primum: *Hexagonum ordinatum habet sex latera æqualia*. Eodem modo formabis iudicium intuitivum secundum: *Hexagonum ordinatum habet sex angulos æquales*. Ponamus aream esse colore rubro tinctam. Erit adeo iudicium intuitivum tertium: *Hexagonum hoc ordinatum habet aream colore rubro tinctam*. Quodsi jam hæc judicia inter se conferas, facile liquet, stante numero senario & æqualitate laterum atque angulorum, colorem, quo area tingitur, variari posse, consequenter eum notionem minime ingredi, sed tanquam peregrinum ex eadem exulare debere. Restat igitur numerus senarius atque æqualitas laterum & angulorum, atque adeo prodit notio *hexagoni ordinati*, quod sit *figura sex lineis rectis inter se æqualibus terminata & totidem angulos inter se æquales habens*. De di exemplum facile, ut præceptorum vim absque difficultate perciperemus. Sed jungamus ei alterum! Ponamus itaque nos vel visu, vel auditu percepisse, quod *Titius effractus mercatoris taberna merces abstulit*. Iudicia intuitiva notia complexa, quam hic habemus, sequentia sistit: 1. *Titius effregit tabernam mercatoris*. 2. *Titius abstulit merces ex taberna*. 3. *Merces fuere mercatoris*. 4. *Mercator*

*non aderat, cum Titius merces auferret.* Quodsi notionem furis hinc derivare volueris, non eadem facilitate idem præstabis, qua paulo ante notio hexagoni ordinati fuit condita, quoniam multa adiunt peregrina, quæ ex notione furis exulare debent, & ea, quæ eam necessario ingrediuntur, particularibus determinationibus involuto, ex notione excludendis. Ut igitur a posteriori pateat, quid peregrinum hic adsit, quanam determinaciones sint particulares, in memoriam mihi revoco casum furti alium, quem alio tempore me vidisse, vel audivisse recorder, scilicet *quod Sempronius scandit in hortum Mævii ac inde arborem exoticam abstulerit.* Notio actionis hujus complexa hæc suppeditat judicia intuitiva: 1. *Sempronius scandit in hortum Mævii.* 2. *Sempronius abstulit ex horto Mævii arborem exoticam.* 3. *Arbor exotica fuit Mævii seu Domini horti.* 4. *Mævius seu Dominus horti non adsuit, cum Sempronius arborem auferret.* Quodsi hos duos furti casus inter se conferas, ex collatione intelliges, tabernam mercatoris & violentam ejus effractionem in priori, hortum Mævii & scansionem in eundem in posteriori casu esse inter peregrina referenda atque adeo ex notione furti arcenda. Pater porro, inter determinaciones particulares collocari debere, quod in priori casu ablatæ fuerint merces mercatoriæ, eaque ex taberna, in posteriori autem arbor exotica, eaque ex horto. Omissis igitur peregrinis & determinationibus particularibus, servatisque nonnisi iis, quæ utrique casui communia sunt, hæc tandem prodit furis notio, quod *sit persona auferens rem alterius infcio ac invito domino eamque suam faciens.* Rem enim alterius ablatam esse in utroque casu infcio domino, hinc manifestum est, quod dominus non adfuerit, cum eadem auferretur, nec de effractione tabernæ in priori casu, de scansionem clandestina in hortum in altero casu ei quicquam constitit. Idem vero in utroque casu factum esse invito domino liquet, quod secus non fuisset opus violenta forium effractione in casu priori, scansionem clandestina in hortum in posteriori. Notæ furti haud postremæ sunt, quod actio committatur *infcio ac invito domino, faciatque rem alienam suam, quod domino eandem aufert: sed eadem partim sub peregrinis, partim sub determinationibus particularibus quasi sepultæ sunt, ut nonnisi ratiocinando, seu per tertiam mentis operationem inde eruantur.*

§. 679.

*Quomodo definitiones a posteriori designantur.*

Quodsi notæ hoc modo detectæ fuerint sufficientes ad rem perceptam ab aliis distinguendam, notio sic formata erit defi-

definitio (§. 153.). Unde patet, quomodo definitiones a posteriori detegantur.

E. gr. Notæ furis, quas antea (not. §. 678.) deteximus, quod scilicet (1) auferat rem alienam, (2) infcio ac (3) invito domino eamque (4) suam faciat, sufficiunt ad eum agnoscendum & ab aliis personis actionem aliquam quantumvis similem patrantibus distinguendum. Quamobrem notio furis, quam a posteriori derivavimus, definitio est. Quod notio ista sufficiat ad furtum ab actionibus aliis affinibus discernendum, exemplis confirmatur. E. gr. Si quis alteri eripit enslem contraque fragmenta in fluvium dejecit; is quidem alteri invito eripit, quod est ipsius domini, sed non suum facit, consequenter furem minime agit. Videtur Grotius notionem furti eo modo investigasse, quem nos commendavimus (§. 678). Etenim lib. I. c. I. §. 10. de jure belli & pacis furari ipsi idem est ac arripere altero invito, quod ipsius est domini. Facile enim intelligitur, arripere alteri, quod ipsius est domini hic idem esse ac rem alterius auferre & suam facere. Similiter cum senarius laterum numerus eorundemque ac angulorum æqualitas sufficiat ad hexagonum regulare ab aliis figuris rectilineis quibuscunque distinguendum; notio hexagoni regularis, quod sit figura (1) sex lateribus (2) aequalibus terminata & (3) equiangulara, definitio est, nec diversa ab ea tradunt Geometriæ elementaris scriptores.

§. 680. -

Quoniam vero in definitione non plures enumerari debent notæ, quam quæ ad rem definitam agnoscendam & ab aliis distinguendam, sufficiunt (§. 153.); ex ea exulare debent, quæ per alias eam ingredientibus determinantur, consequenter quæ ideo insunt, quia insunt ceteræ (§. 219.). Quamobrem ne superflue notæ in definitione cumulentur, inquirendum est, num quibusdam positis ponantur simul aliæ superiori methodo erutæ.

Quomodo notæ superflue ex definitione arceantur

E. gr. Positis tribus lateribus ad terminandum aliquod spatium, ponuntur quoque tres anguli. Sufficit itaque, ut triangulum definiatur per figuram tribus lineis terminatam, nec in definitione mentio fieri debet trium angulorum. Peccaret nempe in regulam definiendi (§. 153.), quod non plures definitionem ingredi debeant notæ, quam quæ ad rem agnoscendam & ab aliis discernendam sufficiunt, qui triangulum definier per figuram tribus lineis terminatam & tribus angulis instructam. Cum enim figura tribus lateribus terminata necessario tres ha-

beat

beat angulos; ex eo solo jam agnoscitur triangulum, quod sit tribus lateribus terminatum, nec opus est ut una ad numerum angulorum attendis. Sed plura de definitionibus superflua continentibus dicemus inferius §. 681.

*Examen definitionum a posteriori re-  
pertorum.*

Quoniam notæ, quæ definitionem ingrediuntur, sæpissime sub determinationibus particularibus atque peregrinis adeo latent, ut vix agnoscantur, ideo consultum est, ut *definitio ex uno alterove exemplo eruta cum pluribus aliis conferatur*: etenim in uno manifesta esse possunt, quæ in altero latent, aut subinde in uno minus latent, quæ in altero profundius abscondita. Immo *nec utilitate sua caret, si definitio cum exemplis agnatis*, quæ scilicet cum definito aliquid affinitatis habent, *conferatur*: ita nimirum innotescit, num forte aliquid deficiente acumine præteriverimus, quod nimis a sensu in re percepta removebatur.

Si quis plura exempla una perpendit notionem rei inde eruturus, is facile multitudine confunditur. Præstat itaque eandem ex uno alterove, sive ex duobus, quemadmodum a nobis (*not. §. 678.*) factum est, deducere ac postea eandem examinare, inquirendo scilicet num aliis quoque exemplis conveniat. Quodsi enim quædam inter notas minus recte relata fuerint, vel alia prorsus defecerint; quod minus recte sese habet emendabitur & defectus facile hac ratione supplebitur.

#### §. 682.

*Quando notæ distinctæ obtineantur.*

*Si in re percepta non nimis multa contineantur, eorumque discrimen in sensum incurrat; singula primum sigillatim contemplatus, deinde ordinem ac nexum eorum meditatus notionem distinctam illius consequitur.* Etenim si res percepta non nimis multa contineat, multitudine eorum, quæ una eidem obijciuntur, non confunditur, adeoque cum præterea eorum discrimen in sensum incurrat, singula, quæ in eadem continentur, agnoscere & cum inter se invicem, tum a re percepta distingui possunt. Fieri adeo potest, ut ejusdem rei notionem distinctam consequamur (§. 678.). Quamobrem si ad singula actu attendimus eademque cum a se invicem, tum a re percepta distinguimus, & quo ordine se invicem consequantur ac quomodo

modo inter se cohæreant dijudicemus, formatis scilicet tum de iis, quæ insunt, tum de eorum ordine ac nexu judiciis intuitivis (§. 669.); notionem distinctam, quam *per demonstrata* consequi licebat, nos actu consequi patet.

E. gr. Si quis ingreditur molendinum structuræ internæ notionem distinctam consecuturus, ut eam consequatur, res ipsa permittit. Etenim molendinum continet partes, quarum numerum inire facile licet. Partes singulæ sunt tantæ molis, ut sensum minime effugiant, earumque discrimen ipsis statim oculis est manifestum. Quamobrem si quis successively contemplatur primum rotas, quarum ope lapis molaris agitur; deinde apparatus, qui frumento in lapidem molarem demittendo inservit; porro saccum, cujus beneficio farina a furfure separatur, atque apparatus ad hanc separationem requisitum, tum ut saccus agitur, tum ut farina ac furfur excipiantur; mox vero consideret, quomodo partes singulæ inter se cohæreant & quo ordine se invicem excipiant; notionem distinctam structuræ internæ molendini consequitur, qualem dedimus in Elementis Mechanicæ Latinis. Enimvero quoniam cista ambiens lapides molares inferiorem, quem *catinum* vocamus, tegit & ferrea, cui lapis superior, quem *metam* appellamus, incumbit, virga intra eosdem absconditur; per se liquet, notionem distinctam in his deficere, adeoque incompletam esse debere, si quis iis contentus esse juberetur, quæ solo adpectu externo consequi licet. Neque enim ideo notio esse definit distincta, etsi sit incompleta (§. 92.). Immo nec ideo notio molendini incompleta est, etsi structuræ internæ nonnisi incompletam habeas. Etenim qui tantum ea agnoscit, quæ in structura interna molendini nudo adpectui patent, optime hanc machinam ab alia quacunque distinguit, consequenter notæ, quas eodem consequitur, ad molendinum ab aliis machinis distinguendum sufficiunt, atque adeo notio ipsius completa est (§. 92.). Similiter inter res naturales iris figuram oculis distinctissime spectandam exhibet & colores, quibus in diversas partes distinguitur, sunt numero nonnisi quinque. Quamobrem qui ad figuram arcus attendit & quo ordine colores se invicem excipiant perpendit; is distinctam iridis notionem consequitur. Eadem methodus ad animam quoque transfertur. Etsi enim, quæ eidem insunt, v. gr. diversæ facultates, non sint instar rerum materialium ex determinato partium numero determinato modo inter se junctarum composita; in singulis tamen varia distinguuntur, quæ vel una existere, vel se invicem consequi intelliguntur. E. gr. Ponamus nobis curæ cordique esse notionem distinctam  
*facul-*

*facultatis appetitiva.* Attendendum igitur est ad casum istiusmodi, in quo aliquid appetitur, quod antea nondum fuit objectum appetitus. Constat enim, si quid consuetudine contracta appetitur, non satis patere ea, quæ ad appetitum requiruntur. Ponamus itaque Titio, absolutis studiis academicis, offerri spartam, quam ornare & unde rei suæ familiari optime prospicere valet. Ponamus porro eum utrumque perpendere atque ea propter illam acceptare. Casum hunc ea, quam præscripsimus, lege trutinanti apparet, 1. *Titium sibi repræsentare spartam, quæ ipsi offertur*, 2. *cum judicare, quod spartam oblata ornare possit*, 3. *eundem quoque judicare, quod si eadem ipsi obtigerit, rei suæ familiari optime prospicere possit*, 4. *ipsum his rationibus adductum decernere, quod sparta oblata sit acceptanda.* Quamobrem si determinationes particulares missas feceris, quæ in singulis judiciis deprehenduntur; intelliges Titium sibi repræsentare objectum aliquod tanquam sibi & aliis bonum atque ideo in idem propendere animum ipsius. Unde notio *facultatis appetitiva* hæc derivatur, quod sit *inclinatio anime ad objectum*, aut, si mavis, *propensio ad objectum, quod nobis tanquam bonum repræsentamus.* Quoniam non omnium eorum sumus consensii, quæ in mente nostra contingunt, præsertim si sufficienter ad scrutinium mentis acumine destituamur; fieri hic quoque potest, immo sæpiissime accidit, ut quædam, quæ ex notione exulare nequeunt, præsertim ubi definitionis nomen tueri debet, attentionem nostram effugiant. Enimvero quæ observando consequi non licet, ratione in partes vocata eruenda sunt (§. 663.): quemadmodum deinceps ostendemus. Eadem quoque methodus, quam hic commendamus, ad investigandas notiones universales, quales in Ontologia explicantur, inservit, veluti ordinis, æqualitatis, majoris, minoris: id quod olim patebit ubi easdem ex confusione, qua intricatæ sunt, extricabimus.

§. 683.

*Quomodo notiones adequatas consequamur.*

Quoniam notio distincta ab ita adequatam, quamprimum singularum notarum, quæ eam ingrediuntur, notionem distinctam habuerimus (§. 95.); evidens est, *eadem methodo perveniri ad notiones adequatas, qua pervenitur ad distinctas* (§. 682.), siquidem rei natura tulerit.

E. gr. Singulæ molendini partes, quas in structura ipsius observamus, ita sunt comparatæ, ut ex partibus aliis minoribus componantur, quæ numero non adeo multæ sunt, ac facile solo adspectu a se invicem distinguuntur. V. gr. Rota dentata cum molari eidem axi in-

fixa



fixa determinatum habet dentium numerum, quem numerando detegere licet, & earum quoque orbes, quibus dentes insunt, ex paucis partibus constant, tantæ quidem molis, ut nihil in iis, quod observari meretur, occurrat, quod visum effugere possit. Nec ligna transversa, quibus ad axem firmatur rota, aliter sunt comparata. Qui ergo attentionem ad contemplantam rotam affert, notionem ejus distinctam absque difficultate consequitur. Idem eodem modo patet de ceteris partibus molendini majoribus.

§. 684.

Nemo ignorat, microscopiis in conspectum adduci, quæ ob parvitatem visum effugiunt. Quamobrem cum oculo armato hac ratione pateant, quæ nudo latent; *microscopiorum usu notiones distinctas eorum consequimur, quæ ob parvitatem nudo oculo non nisi confuse, vel etiam prorsus non videntur.*

*Ufus microscopiorum in formandis notionibus distinctis.*

In eorum scriptis, qui observationes microscopicas dederunt, quales sunt *Robertus Hooke* in *Micrographia* & *Antonius von Leeuwenhoek* in operibus variis, plurima exempla occurrunt, quibus eadem confirmantur. V. gr. *Scintillula, quæ ex collisione chalybis atque filicis eliciuntur, adeo exigua sunt, ut oculus nudus nihil in iis distinguat.* Ast per microscopium apparet, quod sint vel *particula chalybis candentis, nonnullæ autem particule filicis liquefactæ & in vitrum transmutatæ.* Similiter nudo oculo in semine animali nihil viventis distinguitur: ast per microscopium *semen animale innumeris animalculis plenum deprehenditur.*

§. 685.

Nemo quoque ignorat, opetelescopiorum in conspectum adduci, quæ ab oculo nimis remota, vel confuse spectantur, vel prorsus non apparent. Quamobrem cum in hoc quoque casu oculo armato pateant, quæ nudo latent, *telescopiorum usu notiones distinctas eorum consequimur, quæ ab oculo nimis remota vel confuse spectantur, vel prorsus non apparent, siquidem telescopium satis amplificat speciem apparentem objecti.*

*Ufus telescopiorum in formandis notionibus distinctis.*

Exempla habemus in astronomiis, ubi observationibus telescopicis plurima debemus. E. gr. *Via lactea* oculo nudo confuse spectatur, ita ut nihil prorsus in eadem distinguere liceat. At per telescopium eam adspicientibus apparet, quod sit *stellarum innumerarum congeries.*

(Wolffii Logica.)

Rrr

§. 686.

## §. 686.

*Quomodo definitio realis corporis organici invenitur.*

Quoniam definitio genetica sive realis modum exponit, quo res fieri potest (§. 194. 195.), ex notione autem distincta structuræ corporis organici intelligitur, quomodo id componi possit; *definitio realis corporis organici invenitur, si quaeratur notio distincta structuræ ejusdem* (§. 682.). Facile autem me non monente patet, *sapius hic usus esse posse microscopia, quando nimirum per microscopium videntur, quæ visum non armatum effugiunt* (§. 684.).

Exempla præbet anatomia corporis humani, de qua scripsere Auctores longe plurimi, nec non anatomia animalium, qualem dedit *Gerhardus Blasius*. Præbet quoque exempla anatomia plantarum, quam dedere *Nehemias Grew* & *Marcellus Mulpighius*, & nos aliquando variis observationibus novis locupletabimus, quarum aliquam partem jam dedimus in operibus Germanicis. Immo ipsa exempli machinarum, quorum aliquod paulo ante in scenam produximus (*not. §. 682.*), in eundem censum veniunt.

## §. 687.

*Alius modus investigandi definitionem realem.*

Quod si ea, quæ fiunt, in oculos incurrunt, dum res quædam formatur, patet porro, *nos definitionem ejus realem consequi, si attendis ad ea, quæ fiunt, dum formatur, notionem geneseos distinctam nobis formamus* (§. 682.).

Hæc ratione consequimur definitiones reales operum artis: nec artium manualiarum tyrones alio modo nanciscuntur notiones operum perficiendorum. Similiter in naturalibus distinctam geneseos vaporum notionem consequimur, adhibitis præsertim microscopiis: quemadmodum alibi distinctius exposituri sumus. Etenim hic quoque subinde præclarum esse microscopiorum usum, ipso vaporum exemplo constat.

## §. 688.

*Quando notionem nonnisi confusam consequi debetur.*

Quod si in re clare percepta nonnisi talia contineantur, quæ sensu solo distinguere in potestate hominis minime possumus; *notionem sensu duce non licet consequi nisi confusam*. Etenim fieri non potest, ut consequamur distinctam (§. 682.). Quoniam tamen rem ipsam clare percipimus, *per hypnosesin*; omnis autem notio clara vel distincta est, vel confusa (§. 88.): patet,

in

in præfente casu nos omnino non posse consequi nisi notionem confusam.

Exemplum præfentis casus præbent colores, quos clare satis a nobis percipi constat (§. 80.), cum eos agnoscere & inter se distinguere possimus. In Phisicis ostendemus, notionem colorum multa involvere, quæ a se invicem distinguuntur & quorum notionem formare nobis minime impossibile. Enimvero adeo minuta sunt, ut nullo microscopio, ne quidem exquisitissimo, detegi possint. Nemo igitur solo sensu duce distinctam colorum notionem consequi valer. Notandum vero nos non absolute negare, quod colorum notionem distinctam consequi non liceat; sed id unice contendimus, solo sensuum usu eam obtineri non posse. Ceterum in eundem censum veniunt qualitates quoque ceteræ sensibiles præterque, si non omnes.

§. 689.

*Quodsi in re clare percepta non nimis quidem multa contineantur, sed talia tamen, quæ percipienti familiaria non sunt, hoc est, cum olim perceptis parum aut nihil affinitatis habent, & ad quæ singula contemplanda ac inter se conferenda non sufficit attentio cognoscentis; notio distincta, quam consequi exercitatus potest, non est in potestate inexercitatus, sed is non consequitur nisi confusam.* Demonstratio coincidit cum demonstratione propositionis præcedentis.

*Quando in exercitatus nonnisi confusam consequi valeant.*

E.g. Molendini structura ita comparata est, ut notionem ejus distinctam consequi detur (not. §. 682.). Enimvero si quis rerum mechanicarum fuerit prorsus imperitus, nec in machinis contemplandis unquam versatus, is solo adspæctu nonnisi confusam consequitur notionem. Quodsi de iis, ex quibus composita est machina, ipsum interroget; respondebit, se talia non intelligere: quo ipso indicat, notionem eorum, ex quibus constat machina, nihil affinitatis habere cum notionibus aliarum rerum, quas ipse antea percepit & memoriæ mandavit. Ponamus vero Titium optime concipere structuram machinæ non nimis compositæ, qualis est molendini; sed eidem offerri horologium aliquod planetarium, quod, cum singulos planetarum motus representet, admodum compositum est. Quodsi ergo nondum didicit tamdiu conservare attentionem suam, quamdiu ad perscrutandam machinam valde compositam opus est; hæud quaquam fieri poterit, ut notionem consequatur aliam, nisi confusam, structuræ horologii planetarii.

## §. 690.

*Quando quis  
sua culpa no-  
tionem con-  
fusam conse-  
quatur.*

*Quodsi in re clare percepta non nimis multa contineantur, nec nisi talia, quæ percipienti familiaria sunt; percipiens tamen singula singillatim contemplari atque eorundem ordinem ac nexum meditari negligit; notionem is tantum confusam consequitur. Demonstratio coincidit cum demonstratione anteriori (§. 638.).*

E. gr. Rerum mechanicarum apprimè gnarus & in contemplan-  
dis machinis plurimum versatus structuræ machinæ, quæ simplex ad-  
modum est, notionem non nisi confusam consequitur, si eam obiter  
tantum inspicere dignetur uno obrutu singula comprehendens. Idem  
quoque accidit aliis res alias obiter inspicientibus. Unde si quem  
in casu neglectæ attentionis interrogaveris de iis, quæ in re percepta  
continentur; responder se ad eam minime attendisse, aut se non am-  
plius eorum recordari, quod posterius itidem neglectæ attentionis in-  
diciu est.

## §. 691.

*Quando no-  
tio sensuum  
usu acquiri-  
tur inadæ-  
quata.*

Quoniam notio distincta abit in adæquatam, quam pri-  
mum singularum notarum, quæ eam ingrediuntur, notionem  
distinctam habuerimus (§. 95.), si, quæ hæctenus de causis confu-  
sæ notionis dicta sunt (§. 688. & seqq.), ad perceptiones partiales eo-  
rum applices, quæ in totali continentur; patebunt causæ notionum  
inadæquatarum sensu duce acquirarum.

E. gr. Structuræ molendini notionem inadæquatam consequitur,  
qui singularum rotarum, lapidum molarium, sacci, apparatus ad eum  
tremulum efficiendum ceterarumque partium notiones distinctas ne-  
gligit. Similiter trianguli notionem inadæquatam habet, qui in con-  
fusa lineæ rectæ & anguli notionibus acquiescit.

## §. 692.

*Notio obscu-  
raræ nimis  
exigua, vel  
nimis remo-  
ta.*

Si res perceptæ fuerint nimis exigua, vel tanto inter-  
vallo a nobis remota, ut nihil in eo sensu distinguere va-  
leat, nec eas a se invicem, vel ab aliis, quas memoria sugge-  
rit, discernere possit; notionem eorum nonnisi obscuram co-  
sequimur. Pone enim, fieri posse, ut uotionem consequaris cla-  
ram. Rem ergo perceptam ab aliis distinguere poteris: id quod  
hypothesi repugnat. Quamobrem cum omnis notio vel clara  
sit,

fit, vel obscura (§. 80.): nos notionem nonnisi obscuram in præsente casu consequi patet.

E. gr. In crepusculo e longinquo videntes in campo objectum aliquod album, in quo nonnisi albedinem, figuram perimetriægre discernimus, ignoramus, quale ipsum sit, & propius ad idem accedentesprehendimus, nos conjectando veritatem minime consecutos. Quam igitur formabamus nobis notionem, ea obscura erat. Testantur observationes microscopice, occurrere objecta adeo minuta, ut nonnisi obscure percipiantur. Immo cum remota appareant minuta, qualia sunt in vicinia, quæ visui non satis proportionata; eadem est obscuræ perceptionis in utrisque ratio.

§. 693.

*Quod si nota, quæ notionem rei formandam ingredi debent, sub aliis peregrinis sint quasi sepulta; vel aliis particularibus determinationibus immersæ; notionem obscuram consequuntur ii, quibus notas eruere non datum est.* Etenim qui notas, quæ notionem rei formandam ingredi debent, a peregrinis & determinationibus particularibus discernere non valet, is eas cum his confundit, adeoque rem oblatam non semper agnoscere atque ab aliis distinguere valet. Notio igitur, quam sensu assequitur, obscura est.

Notio obscura ob peregrina & determinationes particulares.

Et hæc quidem ratio est, cur terminorum generalium seu abstractorum, quales Ontologia tradit, plurimi non habeant notionem nisi obscuras, adeoque exempla daturi sæpius in medium afferant, quæ in censum istum referri minime debebant. E. gr. notionem obscuram *essentia* habent, qui essentias rerum a nobis non posse agnosci asserunt. Similiter obscura est notio *substantia* iis, qui eam obscurum subjectum appellant, in quo modi rerum insunt.

§. 694.

*Si quis rem perceptam sufficiente attentione minime contemplantur, eadem inter plura divisa; notionem ejus non consequitur, nisi obscuram.* Neque enim notas, quæ rei insunt, memoriæ infigit, cum obiter inspecta. facile oblivioni demus. Quamobrem cum re denuo oblata hære debeat, utrum ea sit, nec ne, quam olim alibi viderit, vel cui hoc nominis imponi soleat; notionem nonnisi obscuram habes (§. 80.).

Notio obscura ex defectu attentionis.

E.gr. Si quis videns avem peregrinam uno obtutu eam comprehendit intuentisque animus aliis cogitationibus indulget; ubi is alio tempore avem vel numero, vel specie eandem denuo videt, eam non agnoscit, nec monitus, quod eadem sit cum visa alibi, ipsemet similitudinem, vel identitatem utriusque advertit.

## §. 695.

*Notio obscura ex multitudine rerum simul perceptarum.*

*Si quis a re percepta una, quam contemplatur, ad aliam contemplandam animum statim diverſit; notionem ejus obscuram consequitur.* Quoniam enim difficulter memoriæ inhaerent ea, a quorum contemplatione ad alia statim divertimus animum, quod experientia obvia comprobatum sumimus; notæ quoque, quæ rem perceptam contemplantium animo erant præſentes, oblivioni demandantur, dum alia contemplamur. Notio igitur, quam consecuti sumus, esse nequit nisi obscura.

E. gr. Si quis in hortum ingressus plurimas plantas exoticas una contemplatur, ubi ex eodem iterum egressus semetipsum examinat, quas viderit, deprehendit, se non satis recordari, qualis fuerit hæc, vel ista planta quam primo, vel secundo loco vidit, aut cujus nomen ipsi succurrit. Obscuræ notiones tenebras offundunt disciplinis, quas adeo dispellere non poteris, nisi eas ad claras atque distinctas revocaveris. Maximum adeo damnum cum disciplinis ab obscuris notionibus imminet; eorum quoque causas uberius exponere placuit.

## §. 696.

*Causa definitio.*

Ens, quod in se continet rationem, cur alterum existat, dicitur hujus *causa*.

E. gr. Cum nihil sit sine ratione (§. 4. *Disc. prælim.*), ratio quoque dari debet, cur aqua ebulliat. Quoniam ea in ipsa aqua non datur, (alias enim semper ebulliret) extra eandem datur necesse est. Quamobrem cum ebulliat ad ignem posita, ratio ebullitionis in igne continetur. *Est igitur ignis causa ebullitionis.* Similiter si *Petrus* irascitur, quod *Titius* eum offenderit, ratio cur ille irascatur est actio *Tirii* offendentis. *Est adeo Tirius causa ira. Petri.* Rationem & causam vulgo per inconstantiam loquendi confundunt: enimvero cum significatus *rationis* nobis latior pateat quam *causæ*, atque inconstantia loquendi minime probetur (§. 143. *Disc. prælim.*); causam quoque a ratione distinguimus. Sed plura eam in rem dicemus

cemus in *Ontologia*: hic enim nonnisi obiter causæ notionem explicamus.

§. 697.

*Si enti cuidam mutatio accidit, quam primum alteri jungitur; b-c alterum causam illius mutationis esse intelligimus. Eodem fere modo ostenditur, quo in exemplo præcedente (not. §. 696.) ostendimus, ignem esse causam ebullitionis aquæ. Quoniam enim ratio hujus mutationis dari debet (§. 4. Disc. prævii.), ea autem in ente ipso, quod mutatur, non continetur, cum alias non tunc demum accideret, quando alteri jungitur; extra eandem in alio ente detur necesse est. Observamus vero mutationem statim accidere, cum alteri jungitur altero contra ablente cessare & ipsam, per hypothesin. Ratio igitur in ente hoc altero continetur, consequenter intelligimus, ens hoc alterum esse causam illius mutationis.*

*Causarum a posteriori investigatione.*

Hoc sane modo nobis innotuit (not. §. 696.), ignem esse causam ebullitionis aquæ. Similiter si solis æstivi radiis exposita cera liquefit, *solem esse causam, cur cera liquefiat*, intelligimus. Observationis adeo fide constat, *solis radios liquefacere ceram.* Si aquæ puræ immittuntur frustula ligni Brasiliensis, rubro colore ea tingitur. Experimentæ igitur fide constat *lignum Brasiliense esse causam industi coloris, seu lignum Brasiliense tingere aquam colore rubro.* Si Titius ira corripitur, quam primum audit a Sempronio narrari, quæ ipsum tangunt; *Sempronium esse causam iræ Titii* patet: recte nimirum judicatur, *Titium ad iram provocasse Sempronium narrando, quæ ipsi sunt targebant.* Plurima de causis rerum judicia hac ratione formantur, nec male, modo simul ad propositiones sequentes attenderis, ne ex præsentente plura inferas, quam quæ inde inferri possunt.

§. 698.

*Si vel in ente uno, vel in ambobus simul, ex quorum conjunctione mutatio aliqua in uno resultat, alia quædam mutatio ni. antegressa, sine qua sit minime fuisset subsequuta, unum non est se habenda causa mutationis alterius, nisi supposita mutatione antegressa sive sit ratio. in uno, sive in altero* Ponamus enim mutationem in neutro eorum, quæ conjunguntur, antegressam fuisse: non igitur amplius

plius accidet in ente B mutatio, quæ supposita mutatione alia siue in A solo, siue in B & A simul evenit, *per hypothesisin*. Quoniam adeo tunc A non amplius continet rationem mutationis in B factæ, nec amplius causa illius mutationis erit (§. 696.).

E. gr. Cum aliquando vitro, in quo antea Martem vi olei vitrioli aqua temperati solveram, notabili temporis intervallo præterit: pso, aquam infunderem, atque ligni *Brafilienfis* frustula iniecissem, loco coloris rubri (not. §. 697.) prodiit color subcæruleus, ut vitrum appareret mundum. Equidem hic (§. cit.) constabit, *lignum Brafilienfe esse causam mutati coloris*; non tamen patebat, *esse causam caloris subcærulei*: speciem enim coloris pendere a mutatione antegressa evidens erat ex eo, quod alias prodire soleat color ruber. Quod si igitur ignarus adhuc, quinam prodire soleat color, si nulla alia causa accedat, inde intulisset, frustula ligni *Brafilienfis* tingere aquam colore subcæruleo; is in errorem incidisset (§. 624.). Apparet adeo, ex propositione præcedente constare equidem, quod erit aliquod A sit causa mutationis in altero B factæ; nequaquam autem, quod sit causa unica. Ne igitur in errorem incidamus ex eo, quod A sit causa mutationis in B factæ, argumentantes, quod sit causa unica; vi propositionis præsentis investigandum, num antea quædam præcesserit mutatio, sine qua præsens non subsequitur. Atque ea non solum valent in rebus physicis, verum etiam in iis, quæ mentem nostram concernunt. V. gr. Fieri potest, ut Titius verbis Sempronii ad iram provocetur ob offensam aliam antegressam, sine qua solis verbis, quæ ille in præsentis profert, animus ejus non adeo valide fuisset commotus. Maximi momenti est præsentis propositionis ad psychologica & moralia applicatio, si veritatem in iis certo vi experientiæ consequi studueris. Immo in arte Medica plurimi quoque errores ex hoc fonte propullulant.

## §. 699.

*Error ex neglectu causarum in sensu non incurrentium*

*Si causa mutationis, quam observamus, omnes in sensu minime incurrant; ea, quæ in sensu incurrit, per errorem pro causa unica habetur.* Affirmatur enim, quod erat negandum, adeoque erratur (§. 624.).

Exempla istiusmodi multa in Chymia occurrunt: quod ipsum is causa est, ut experimenta quam sæpiissime sint dubii eventus.



§. 700.

*Quod si causa omnes in sensus incurrant, ad unum tamen tantum attentus eam pro unica habet, is denuo errat.* Patet eodem modo, quo propositio præcedens, cum perinde sit, siue causa aliqua in sensus non incurrat, siue observans ad eam non attendat. Error ex neglecta attentione ad causas plures.

Istiusmodi exempla in physicis non sunt infrequentia. E. gr. Ubi quaeritur, quænam sit causa, cur ex uno hordei, vel avenæ granulo plures progerminent: aristæ: alii hanc, alii istam allegare solent. Sed re examinata!prehendes, omnes esse conjungendas. Enimvero plura, quæ hic ului esse possunt, tradentur in Ontologia artis inveniendi principia fecunda complectente.

§. 701.

*Ne igitur pro causa unica effectus habeas, quæ talis non est; vires causæ & quantitatem effectus metiri debes.* Quod si enim hæc istis deprehenditur æqualis, evidens est, hanc solam causam sufficere. Medium evitandi errorem notatum.

Requiritur hic applicatio Matheseos ad experimenta, quam in Elementis Aërometriæ docui. Alia remedia suppeditat Ontologia a determinatione actus, siue existentie petita.

§. 702.

*Ex eo, quod quedam constanter conjunguntur, inferri nequit, unum esse alterius causam, nisi probabiliter, quamdiu exemplum in contrarium non prostat.* Quæ enim constanter conjunguntur, eorum vel unum est causa alterius, vel utrumque ab eadem causa, seu causis coexistentibus pendet, vel eadem fortuito conjunguntur: id quod in Ontologia demonstrandum hic tanquam experientie consentaneum sumimus. Quamobrem qui argumentatur: *A & B constanter conjunguntur. Ergo A est causa ipsius B;* is infert, quæ inferri non debebant. Conclusio enim talis esse debebat: *Ergo vel A est causa ipsius B, vel A atque B a communi causa, vel causis coexistentibus pendet, vel A & B fortuito conjunguntur.* Quamdiu igitur non removeris, nec A atque B vel a communi causa, Quid ex eo inferri possit, quod quedam sint conjuncta.

(Wolfit Logica)

Sss

la,

sa, vel a causis coëxistentibus pendere, nec fortuito conjungi; certo constare nequit, quod A sit causa ipsius B.

Enimvero quoniam tamen ea constanter conjunguntur, quorum unum est alterius causa, ut scilicet vel una existant, vel unum alterum sequatur; ex uno autem ad veritatem requisito judicium probabile fieri potest (§. 577. 578.): ex eo, quod quædam constanter conjuncta a nobis deprehendantur, inferri potest probabiliter, quod unum sit alterius causa.

Quoniam vero judicium probabile falsum esse potest (§. 591.), atque hic falsitas detegitur, quam primum vel semel observamus, A & B non esse conjuncta; ideo in præsentī casu non nisi probabiliter colligimus, A esse causam ipsius B, quamdiu exemplum in contrarium non prostat.

Possē quædam constanter coëxistere, quod a communi causa pendeant, experientiam consulenti minime obscurum erit. E. gr. Reditus hirundinum & protrusio gemmarum constanter conjunguntur propterea quod aer ob solis ad tropicum ascensum indies fit calidior. Nemo vero affirmaverit, *gemmas ideo ab arboribus protrudi, quod hirundines redeant, aut hirundines gemmas ex arboribus protrudere.* Similiter patet, fortuito semper conjungi posse, quorum unum ab altero prorsus non pendet. E. gr. Dum incendium noctu exoritur, vigil, qui excubias agit, semper in specula constituitur: nemo autem ignorat, *vigilem non esse incendii causam.* Exempla manifesta in medium afferō, ut assertum in dubium vocari nequeat. Cum adeo manifestum sit etiam per exempla eunti, ex eo, quod aliqua semper sint conjuncta certo inferri non posse, unum esse alterius causam; astrologia autem judiciaria non alio fundamento nitatur: ea exemplum præbet, quibus propositio præsens illustratur. Immo quoniam iisdem adspectibus non eadem semper respondet tempestas; astrologiam meteorologicam falsam esse inde apparet. Similiter in propositionem præsentem impingunt, qui physicum animæ in corpus & corporis in animam influxum inde colligunt, quod quædam in mente perceptiones & quædam mutationes in organis sensoriis semper coëxistant, nec minus ad nutum animæ moveantur organa corporis. Medici quoque haud raro regulæ huic adversa pro experientis venditant, lubricum adeo fundamentum artis salutaris constituentes.

§. 703.

*Si quis judicat, res ita sese habere, prout apparent, is subinde errat.* Patet enim ex Optica, res quam sapissime aliter sese habere, quam apparent. Qui igitur in omni casu rem non aliter sese habere judicat, quam qualis apparet; is affirmat, quod error ex apparentia objectorum visibilium oritur.

E. gr. Sol apparet instar disci plani. Qui igitur judicat, figuram ejus esse disciformem, is periculo errandi sese exponit & in præsentem quidem casu contingit, eum actu errare. Ex macularum enim observationibus deducitur, quod figuram habeat sphericam. Res aliter apparere posse, quam quales sunt, obviis experientiis unicuique constat: in Opticis autem accuratius determinantur casus, quando id accidit.

§. 704.

*Quoniam in Optica docemur, quando objecta visibilia aliter appareant, quam re ipsa sunt; precipitantiam in judicando de rebus apparentibus, consequenter periculum errandi, evitaturus, Opticorum theorematum perspecta habere debet.*

Sane ex Opticæ neglectu plures olim in Physicam irrepere errores, quos recentiorum industria detexit, qui principia optica loco conveniente applicarunt. Patebit autem in Metaphysicis, dari casus haud paucos, ubi fallacia sensuum non animadvertitur tanta facilitate, quae eadem patet in exemplis deceptionum opticarum vulgaribus.

§. 705.

*Si ex observatione constat, prædicatum judicii intuitivi esse vel attributum, vel essentiale, vel quod per modum attributi inest (§. 673. & seqq.); judicium intuitivum universale esse patet (§. 257.).*

E. gr. Experientiæ fide constat, potentiam calefendi & frigidendi attributi instar lapidi inesse (not. §. 673.). Propositiones igitur: *Lapis potest calefieri, Lapis potest frigidari*, universales sunt. Experientiæ adeo debentur propositiones universales: *Omnis lapis potest calefieri, Omnis lapis potest frigidari*. Similiter sola observatione constare potest (not. §. 675.), æqualitatem laterum inter essentialia quadrati referendam esse. Quamobrem propositio: *Quadratum habet latera æqualia*, universalis est. Atque adeo ab experientia derivari potest propositio universalis: *Omne quadratum habet latera æqualia*. Pater quoque per experientiam, duritiem esse lapidis attributum (not. §. 677.).

fizio igitur: *Lapis est durus*, universalis est. Experientia itaque in hoc etiam casu suggerit propositionem universalem: *Omnis lapis est durus*.

§. 706.

*Judicium  
intuitivum  
hypotheti-  
cum univer-  
sale.*

*Si pluribus observationibus inter se collatis constet, positis his solis, enti cuidam convenire hunc modum; judicium, quod formatur, denuo universale est.* Etenim si positis his solis enti convenit modus, conditio patet, sub qua is tanquam prædicatum de subjecto enunciandus. Enimvero modi sub data determinatione universaliter prædicantur de subjecto (§. 258.), judicium adeo intuitivum hypotheticum (§. 218.), quod formatur, & ad formam categoricam reduci potest (§. 227.), universale est.

E.gr. *Si lapis ex alto demittitur, motus ejus continuo acceleratur.* Cum vel una experientia, si ad eam sufficienter attendas, loquatur non alia re opus esse, quam ut in libero aëre descendat; propositionem hanc universalem esse constat. Revocatur autem ad universalem hanc categoricam: *Omnis lapidis ex alto demissi motus continuo acceleratur.* Similiter si quis vel semel fuerit expertus, ex bono præse sente sibi subortum esse gaudium, atque sufficiente attentione usus d. dicerit hanc solam fuisse gaudii causam, non aliam; propositionem universalem esse novit, quod bonum præsens gaudium gignat. Etenim si contrarium aliquando accidere videatur, re explorata evidens erit, adfuisse causam contrariam, quæ impedivit, quo minus ista effectum suum fuerit consecuta: id quod in genere tenendum est de omnibus judiciis, in quibus effectus prædicatur de causa, aut modus de subjecto enunciatur sub conditione causæ. Non igitur inconsultum est sequens adjicere theorema.

§. 707.

*Præcipitan-  
tia in judi-  
ciis de causis  
effectuum  
quomodo e-  
vitetur.*

*Si pluribus observationibus inter se collatis una, vel altera occurrat, in qua posita causæ non fuit subsecutus effectus, aut non facta fuit mutatio subjecti, quæ illi per alias observationes tribuitur; negandum non est, effectum illum, vel mutationem subjecti tribui debere isti causæ, antequam exploratum fuerit, an non in casu obstante adsit aliquod obstaculum, quo minus causæ effectum ei convenientem, vel viribus ejus proportionatum producere possit. Quoniam enim fieri nequit, ut causa aliqua producat effectum,*

fectum, si adsit contraria, quæ eundem impedit, aut ut effectus sit viribus causæ proportionatus, si ex parte impediatur (id quod in Ontologia demonstraturi sumus, hic vero experientiæ consentaneum sumimus): ex eo, quod in uno casu non sequatur effectus causæ cuidam attributus, qui in altero secutus fuerat, nondum sequitur, effectum istum per errorem eidem fuisse attributum. Etenim si in quibusdam casibus causæ cuidam attributus effectus in aliis non sequatur, etsi ipsa posita; concludendum erit: aut effectum causæ in casibus prioribus per errorem fuisse tributum, aut in posterioribus adesse impedimentum, quo minus effectus consequi possit impedimento ablato subsecuturus. Quod si ergo prius removeas, antequam exploraveris, num poni possit posterius; per præcipitantiam judicans errandi periculo te exponis (§. 623.): quod adeo evitaturus statuere non debes, antequam exploraveris, num in casu obstante impedimentum aliquod adsit.

Exempli loco esse potest propositio, quam de ortu gaudii ex bono præsentem modo (not. §. 706.) in medium attulimus. Etenim *si contingat, oblato bono Sempronium minime gaudere*; in obstaculum inquirenti patebit, *cum vel non agnoscere bonum, quod ipsi offertur, vel idem ipsi videre exiguum, vel eundem affectu quodam contrario vehementiori corripit*, veluti quod luctui indulgeat, & si qua alia gaudii orituri obstacula esse possunt. Adeo naturale est hominibus, ut, si quis effectus non sequatur, quem expectabant, in obstaculum non secuti inquirent, ut fere superfluum videri possit talia moneri, aut rationibus firmari. Enimvero quæ homines necessitate compulsi vi Logicæ naturalis recte faciunt, ea in artificiali distincte explicantur & rationibus confirmantur (§. 10.), ut nulla necessitate adacti, sed solis circumstantiis casus obvii invitati agamus, quod fieri convenit.

§. 708.

Etsi igitur experientia non sit nisi singularium (§. 665.), *Cognitio* *ex* iis tamen, quæ a nobis demonstrata sunt, abunde liquet, *universalis* *ad* *dari* *viam* *vi* *experientiæ* *pervenienti* *ad* *notiones* *universales* *posteriori* *distinctas* *&* *adequatas* (§. 678. 682. & seqq.), immo *ad ipsas derivandas* (§. 679. & seqq.) atque *propositiones cum categoricas*

(§. 705.), tum *hypotheticas universales* (§. 706. 707.), ut non opus sit inductione incompleta a particulari ad universale, multo minus a singulari ad universale argumentari.

Quoniam tamen Logicæ verioris ignari, vel sola naturali contenti a particulari ad universale, vel etiam a singulari ad universale argumentari sæpiissime solent; ideo cavendum, ne Logicæ verioris ignari certa via a cognitione singulari, vel particulari ad universalem ascendentes vulgi errorem errare dicantur.

### §. 709.

*Cur observationes litteris consignanda.*

*Observationes, quæ minime quotidianæ sunt, vel plura notanda offerunt, accuratissime litteris sunt consignanda.* Etenim cum sæpius opus sit, in aliis casibus minimum consultum, ut observatio occasione denuo oblata repetatur & cum anteriori conferatur, ut notiones universales atque judicia limentur, si qua in re lima adhuc habeant opus (§. 678. 681. 698. &c.); memoria autem labilis sit, ut quædam facile oblivioni dentur, quæ apprime notanda fuerant; immo cum ipsæ notiones ipsæque judicia intuitiva formanda sint observatione jam peracta, & recens quoque memoria fallat, præsertim si notio complexa eidem mandata plura involvat: adversus oblivionem remedium præsentissimum est, si singula, quæ observamus, litteris statim consignentur, nisi quotidiana sint, ut sensui præsentia listi possint, quoties eorum notione habuerimus opus.

Accidit alia adhuc ratio, quæ idem suadet, ut, si rerum observandum series fuerit longior, accuratior fiat observatio, attentione in eo, quod est præsens, unice defixa, quæ alias inter præsens atque præterita erat partienda. Exempli præbent observationes astronomica; præbet etiam philosophia experimentalis. Quoniam vero observationes non modo sunt in physicis, sed in moralibus quoque & psychologicis fieri debent, de utrisque propositionem præsentem intelligendam esse monemus. Notandum quoque plurimos errores cum in scientiam, tum in artem irrepsisse, quod circa observationes memoriæ nimis fidamus.

CAPUT III.

DE FORMANDIS JUDICIIS DISCURSIVIS  
ET DEFINITIONIBUS A PRIORI.

§. 710.

**D** *Atis notionibus specierum formatur notio generis*, si 1. specierum notiones inter se conferantur, ut appareat, quænam ceteris existentibus iisdem diversa sint, vel unius tantum speciei notione data, probe perpendatur, quænammanentibus ceteris iisdem diversimode determinari possint: 2. omittantur ea, quæ in pluribus notionibus actu diversa deprehenduntur, vel in una diversa ratione ceteris iisdem manentibus determinari posse intelliguntur. Etenim quæ remanent, notionem generis absolvent (§. 72.).

*Generum notio ex notionibus specierum derivanda.*

E. gr. Si detur *hexagonum regulare & octogonum regulare*, facile inde derivatur notio *figuræ regularis* in genere. Quoniam enim hexagonum regulare terminatur sex lateribus inter se æqualibus & totidem angulos inter se æquales comprehendentibus; octogonum vero regulare lateribus octo, quæ pariter inter se æqualia angulos inter se æquales comprehendunt, circumscribitur, ex collatione notionis utriusque apparet, differentiam nullam adesse nisi in numero laterum. Quodsi ergo determinationem numeri omittas; quæ in utraque notione remanent, eadem sunt & notionem *figuræ regularis* in genere absolvent, quod nempe sit *figura æquilaterra & æquiangula*. In exemplis geometricis patent omnia, quod notiones figurarum nihil peregrini admixtum habeant. Ipsa vero Logica naturali usi homines generum notiones confusas ex confusis specierum notionibus derivare solent, quod ex nominibus rerum receptis haud obscure colligitur.

§. 711.

Quoniam genera inferiora perinde ac species per ea differunt, quæ ceteris existentibus iisdem diverso modo determinantur

*Generum superiorum notio ex innata*

*feriorum notio-  
tionibus de-  
rivanda.* nata sunt (§. 72.), iisdem vero communia notionem generis superioris constituunt (§. 46.); eodem modo notiones generum superiorum ea notionibus inferiorum derivantur, quo notiones generum ex notionibus specierum repetuntur (§. 710.).

E. gr. Genera inferiora figuræ rectilineæ sunt *figura regularis & irregularis*. Jam cum in regularibus latera singula singulique anguli inter se æquantur; in irregularibus & anguli, & latera inæqualia esse possint: *figura rectilinea* in genere notio obtinetur, si rationem laterum atque angulorum prorsus omittas, ut remaneat nonnisi hæc notio determinatio, quod *perimeter ex lineis rectis constet*.

## §. 712.

*Notiones  
specierum ex  
notione ge-  
nerum deri-  
vanda.*

E contrario *data notione generis formantur notiones specierum*, si i. distinguantur ea, quæ in notione generis determinata sunt, a ceteris, quæ indeterminata deprehenduntur: 2. quæ indeterminata sunt, ita determinentur, ut iis, quæ jam determinata sunt, non repugnent. Quod enim diversis modis hac ratione determinari possunt, tot obtinentur species sub genere dato contentæ.

Quoniam enim generis notio ea involvit, quæ speciebus sub eodem contentis communia sunt (§. 45.), species vero per ea differunt, quæ in notione generis diversimode determinari possunt (§. 72.); data notione generis prodire debent species, si, quæ in ea determinata non sunt, ita determinentur, ut ceteris non repugnent. Pone enim, quod, quæ arbitrario determinas, repugnent ceteris, quæ in notione generis determinata sunt. Notio igitur speciei, quam formasti, erit falsa (§. 547.).

Exempla huc spectantia de triangulo rectilineo & numeris polygonis jam dedimus in superioribus (not. §. 72.). Ostendimus ibidem, quomodo diversæ triangulorum species prodeant, diversimode determinata ratione laterum. Enimvero quoniam tres quoque angulorum species sunt, triangula quoque specie angulorum differre possunt. Quamobrem si ponimus, *vel omnes tres angulos esse acutos, vel aliquem eorum esse rectum, vel obtusum*; prodibunt species triangulorum *acutangulorum, rectangulorum, obtusangulorum*. Quod si ponas *duos angulos esse debere rectos*, notioni generis hæc determinatio repugnat, cum



cum duæ lineæ rectæ ad tertiam perpendiculares, seu tertix ad angulos rectos insistentes sint inter se parallelæ, adeoque spatium terminare nequeant. Foret adeo notio trianguli rectilinei duos angulos actus rectos habentis impossibilis, seu falsa.

§. 713.

Quoniam genera inferiora superiorum respectu pro speciebus habenda sunt (§. 47. ); data generis superioris notione formantur notiones generum inferiorum, eodem prorsus modo, quo e notione generis inferioris species deducuntur (§. 712. ).

Notiones generum inferiorum ex notione superioris derivanda.

E. gr. Genus superius est *triangulum* in genere, in cuius notione numerus tantum laterum, minime autem species eorundem determinatur. Quamobrem si salvo numero ternario laterum determines speciem, v. gr. quod latera esse debeant *linea rectæ, vel arcus circuli maximorum sphaera sese mutuo secantium*; duo prodeunt genera inferiora *triangulorum rectilineorum & sphaericorum*.

§. 714.

Data notione speciei unius formantur notiones specierum aliorum, si 1. investigemus, quænam sint ea, quæ ceteris manentibus iisdem diversimode determinari possunt: 2. eadem aliis modis determinemus, quam in notione data determinata sunt, ita tamen ut determinationes istæ non repugnent iis, quæ in notione data non immutantur.

Notio speciei ex notione alterius derivanda.

Demonstratio eadem est, quæ problematis præcedentis (§. 712. ), quo ex data generis notione investigari jubentur notiones specierum. Etenim si ea investigaverimus quæ manentibus iisdem diversimode determinari possunt, his omissis, illis retentis, habemus notionem generis, qua data species eodem, quo ante (§. cit. ), modo reperiuntur.

Poterat igitur problema præsens reductione ad præcedentia ita resolvi: 1. Data notione speciei, investigetur notio generis (§. 710. ). 2. Data notione generis, investigentur notiones ceterarum specierum (§. 712. ).

Utimur hac methodo in Analyfi Geometrarum. E. gr. *Parabola Apolloniana* more *Cartesii* definitur per æquationem quadraticam  $y^2 = ax$ . Determinati exponentes 2. & 1. si mutantur in indeterminatos  $m$  &  $n$ , æquatio generalis prodit  $y^{m+n} = a^m x^n$ , qua genus quoddam (*Wolfii Logica*)

T t t

cur-

curvarum definitur, sub quo parabola *Apolloniana* tanquam species continetur. Quodsi jam porro exponentes isti indeterminati  $m$  &  $n$  per numeros determinatos explicentur, v. gr. ut  $m$  sit 1,  $n$  vero 2, 3, 4 &c. prodeunt æquationes  $y^2 = ax^2$ ,  $y^3 = ax^3$ ,  $y^4 = ax^4$  &c. quæ totidem curvarum species definiunt sub genere communi una cum parabola *Apolloniana* contentæ. Quodsi tantum  $m$  explicetur per 1,  $n$  vero denotet numerum indeterminatum, æquatio generalis abit in aliam  $y^{n+1} = ax^n$ , quæ definit genus curvarum inferius sub superiori per  $y^{m+n} = a^m x^n$  definito contentum. Etiam absque calculo algebraico exemplum hoc intelligi potest. Etenim cum curvæ distinguantur per constantem relationem punctorum ad lineam rectam positione datam; parabola *Apolloniana* definitur per curvam, in qua quadratum semiordinatæ  $PM$  æquatur rectangulo ex abscissa  $AP$  in rectam quandam constantem, quæ ipsius *parameter* vocatur. Quodsi igitur pro quadrato, quæ potentia determinati gradus est, sumas potentiam quæcunque, seu indeterminati gradus, idemque observes circa potentias primas abscissæ atque parametri; *curvarum genus* habebis, in quibus potentia semiordinatæ  $PM$  æquatur factio ex potentiis abscissæ atque parametri, quarum exponentes juncti in summi æquantur exponenti potentie semiordinatæ. Quamobrem si in hac notione generali exponentes indeterminatos determines, veluti quod sit cubus semiordinatæ  $PM$  æqualis factio ex parametro in Quadratum abscissæ  $AP$ , vel Quadratoquadratum semiordinatæ  $PM$  æquale factio ex parametri Quadrato in Quadratum abscissæ  $AP$ , notiones habes specierum curvarum sub isto genere contentarum. Eodem modo ex una syllogismi specie, nempe ex prima syllogismorum figura, data eruuntur species, seu figuræ syllogismorum ceterorum. Etiam cum in prima figura medius terminus in majore subiecti, in minore prædicati locum tueatur (§. 344.), idem autem aliter collocari possit, manentibus terminis ceteris & conclusione iisdem; mutato medi termini situ, ut idem in utraque præmissa vel subiecti, vel prædicati locum tueatur, species syllogismorum cetera prodeunt.

## §. 715.

*Notio generis inferioris unius ex notione alterius derivanda.*

Quoniam genera inferiora respectu superiorum pro speciebus habentur (§. 47.); eodem modo *ex data notione generis inferioris unius eruuntur notiones generum inferiorum ceterorum sub eodem superiori constitutorum.*

E. gr.

E. gr. *Triangulum rectilineum* est genus aliquod inferius, quod cum *curvilineo* sub eodem genere superiori, *triangulo* nempe in genere, continetur. Quodsi detur notio *trianguli rectilinei*, quod nempe sit figura tribus lineis rectis terminata; notio *trianguli curvilinei* prodit, si pro lineis rectis substituantur lineæ curvæ.

§. 716.

Quoniam notiones rerum formantur ope judiciorum intuitivorum de rebus sensu perceptis (§. 678.), ex notionibus specierum derivando notiones generum (§. 710.), vel ex notionibus generum inferiorum notiones generum superiorum (§. 711.); nec non ex notione generis notiones specierum (§. 712.), vel generum inferiorum (§. 713.); ex notione speciei unius notionem alterius (§. 714.), vel ex notione generis inferioris unius notionem generis inferioris alterius (§. 715.); exinde intelligitur, diversis modis *notiones universales comparari*, nimirum 1. *reflectendo super iis, quæ percipiuntur*, 2. *abstractendo communia*, quæ notionibus pluribus insunt, 3. *determinationes variabiles mutando in alias*.

*Modi formandi notiones*

Triplex adeo modus est formandi notiones *reflexio*, *abstractio* & *arbitraria determinatio*, quæ *duplici modo* peragitur, vel *determinando ea, quæ in notione data nondum determinata sunt*, veluti cum ex notione generis derivatur notio speciei (§. 712. 713.), vel *determinando aliter, quæ certo modo determinata sunt*, veluti cum ex notione speciei aut generis inferioris unius derivatur notio alterius (§. 714. 715.). Duo modi priores in vulgus noti, quod vel ex nominibus rerum patet, quæ absque illis imponi haud quaquam potuerunt; tertius vero parum attenditur, etsi praxi Geometrarum dudum confirmatus, ita ut ipse *Cartesius* de idea Dei ratiocinatus ejus nullam habuerit rationem. Imprimis autem ejus rationem haberi conveniebat, quod sit fons notionum deceptricium. Fieri enim solet, ut arbitraria determinatione nonnullorum, quæ notionem ingredi debent, talia combinentur, quæ sibi mutuo repugnant: quo in casu notio impossibilis evadit (§. 519.).

§. 717.

*Notio per reflexionem formata possibilis & vera est.* Notio per reflexionem formata, quæ per reflexionem formatur, non ingrediuntur, nisi quæ rei perceptæ actu inesse observamus (§. 716.). Si quæ vero

*Cur notio per reflexionem formata possibilis.*

vero in eodem subjecto una observamus, ea sibi mutuo non repugnant (§. 535.), consequenter notionem in casu præsentis non ingrediuntur, quæ sibi mutuo repugnant. Est adeo ea possibilis (§. 519.), consequenter, cum notio possibilis etiam vera sit (§. 547.), vera.

E. gr. Notio *furi*, quod sit *persona auferens rem alterius inscio ac invito domino eamque suam faciens*, formata fuit reflectendo super iis, quæ percipiuntur (not. §. 678.). Est igitur vera & possibilis.

§. 718.

*Cur notio a  
possibilibus  
abstracta  
possibilis.*

*Nozio, quæ a possibilibus abstrahitur, possibilis est atque vera.* Etenim notio, quæ ab aliis notionibus abstrahitur, non continet, nisi ea, quæ in istis notionibus continentur (§. 716.), consequenter, cum hæ notiones possibiles sint *per hypobesin*, nonnisi talia, quæ eidem subjecto una inesse possunt (§. 519.). Est igitur & ipsa possibilis (§. cit.) atque adeo etiam vera (§. 547.).

E. gr. A notionibus *trianguli rectilinei* atque *curvilinei* abstrahi potest *trianguli* in genere notio, quod scilicet sit *figura tribus lineis terminata*. Quamobrem cum possibile sit, ut *spatium* comprehendatur tribus lineis rectis, nec repugnet, ut terminetur tribus lineis curvis; dubitari nequit, quod etiam verum sit in genere, idem *terminari posse* tribus lineis.

§. 719.

*Quomodo a  
posteriori in-  
telligatur no-  
tionem per  
arbitrariam  
determinati-  
onem forma-  
tam esse pos-  
sibilem.*

*Si inter res vel olim perceptas, vel eas, quæ nunc sensui ob-  
iiciuntur, talis occurrat, cui insunt, quæ in notione per arbitra-  
riam determinationem formata continentur; hæc possibilem at-  
que veram esse intelligimus.* Si enim in re percepta ea depre-  
hendimus, quæ in notione per arbitriam determinationem  
formata continentur; ea sibi mutuo non repugnant (§. 535.). Cum adeo in notione per arbitriam determinationem for-  
mata contineantur, quæ sibi mutuo non repugnant; notio illa  
possibilis est (§. 519.) atque adeo etiam vera (§. 547.). Constat  
igitur, quod erat propositum.

E. gr. Si quis in Politica diversas rerump. formas per arbitrias  
determinationes numeri personarum regentium ac potentie iisdem  
conferendæ condit. is singulas possibiles esse probare valet, si provocat  
ad

ad formas rerum. quæ vel olim floruerunt, vel hodiernum vigent, quibus notiones istæ respondent. Similiter si quis data notione *gaudii*, quod sit *affectus ex boni presentis sensu ortus*, per arbitrariam determinationem affectuum aliorum notiones condit, quemadmodum fere factum est a *Cartesio* in *Traçtatu de passionibus animi*; is a posteriori probat notiones sic conditas esse possibiles atque veras, ubi per exempla docuerit, fieri posse ut iis de causis, quas in notionibus suis determinat, affectus in homine suborianrur.

§. 720.

*Si ex notione per arbitrariam determinationem formata colligitur, quod vel eidem, vel propositioni cuidam veræ repugnat; monstratur notio illa impossibilis est atque falsa.* Per se patet, omnem notionem reduci posse ad propositionem, cujus forma generalis hæc est: *Quæ in notione data conjunguntur, ea eidem subiecto una in se possunt.* Quamobrem si ex hac propositione colligitur, quod vel notioni datæ, adeoque notioni subiecti propositionis, ad quam ista reducitur, vel propositioni cuidam veræ repugnat, quemadmodum per *hypothesein* fieri debet; falsa est propositio, quod eidem subiecto una inesse possint, quæ in notione data conjunguntur (§. 556.). Notio igitur cum comprehendat, quæ sibi mutuo repugnant (§. 310.), impossibilis est (§. 519.); atque adeo etiam falsa (§. 547.).

E. gr. *Bilinei rectilinei* notio per arbitrariam determinationem formata reducitur ad hanc propositionem: *Duæ lineæ rectæ spatium comprehendere possunt.* Inde autem colligitur, quod duæ lineæ rectæ in duobus punctis se mutuo secare possint: quæ propositio contrariatur veræ, quod duæ lineæ rectæ sese non secant nisi in unico puncto. Atque ideo patet, bilinei rectilinei notionem impossibilem esse ac falsam.

§. 721.

*Si ex contrario notionis per arbitrariam determinationem formata colligitur, quod propositioni cuidam veræ repugnat; ideo ejus possibilitas per inductionem illa possibilis est atque vera.* Ex enim cum notio omnis ad hanc propositionem revocari possit: *Quæ in notione data conjunguntur, ea eidem subiecto inesse possunt;* illius contrarium, seu propositionis eidem respondentis contradictoria erit: *Quæ*

Ttt 3;

in

in notione data conjunguntur, ea eidem subiecto inesse nequeunt. Quodsi ergo hinc inferas (§. 553.), quæ propositioni veræ repugnant, demonstratione apogogica constat, quæ in notione data conjunguntur, ea eidem subiecto inesse posse (§. 557.). Constat ergo, notionem esse possibilem (§. 519.), consequenter etiam veram (§. 547.).

E. gr. Notio *trianguli rectilinci obtusanguli* ponatur formata esse per arbitriam determinationem, quod sit *triangulum, in quo angulus aliquis est obtusus*. Si ergo sumis, fieri non posse, ut spatium terminetur tribus lineis, sitque angulus in eodem obtusus; haud difficile inde colliges, a puncto uno positione dato ad alterum positione datum non posse duci lineam rectam: quod cum repugnet postulato *Euclideo*, a quovis puncto ad quodvis punctum posse duci lineam rectam; notionem trianguli rectanguli possibilem atque veram esse constat.

§. 722.

*Demonstratio ejusdem ostensiva.*

*Si directe demonstrari potest, notionem per arbitriam determinationem formatam non involvere contradictionem; erit ea possibilis atque vera. Patet per ipsam definitionem possibilis (§. 518.).*

Nititur nimirum demonstratio dicto de omni & nullo ad definitiones extenso (§. 349.). Exemplum dedimus in Commentatione de differentia nexus rerum sapientis & fatalis necessitatis sect. 1. §. 5. p. 9. & seqq. Notio scilicet entis perfectissimi formatur per arbitriam determinationem, aut, si mavis, compositionem. Ejus autem possibilitatem demonstravimus ex eo, quod nullam contradictionem involvere possit.

§. 723.

*Demonstratio ejusdem per genesis rei.*

*Si genesis rei exponi potest, cui notio convenit per arbitriam determinationem formata; notio possibilis est atque vera. Si enim modus ostendi potest, quo res istiusmodi fieri potest, cui notio convenit per arbitriam determinationem formata; ens istiusmodi possibile est, cui ea conveniunt, quæ in notione ista continentur: quod per se patet. Quoniam adeo in eadem nonnisi talia continentur, quæ eidem subiecto, una convenire*

venire possunt; notio illa possibilis est (§. 519.) atque adeo etiam vera (§. 547.).

E. gr. *Euclides* definit *triangulum æquilaterum* per figuram planam tribus lateribus æqualibus terminatam. Notio hæc formata fuit per arbitrariam determinationem rationis laterum ad se invicem. *Euclides* itaque demonstrat modum, quo triangulum æquilaterum constructur, ut constet, notionem ejus esse possibilem eaque nos uti posse tanquam principio demonstrandi. Similiter si in Geometria sublimiori *parabolam* definimus per figuram curvilineam, in qua quadratum semiorinatæ PM æquatur rectangulo ex abscissa AP in rectam quandam constantem; notio formatur per arbitrariam determinationem constantis relationis punctorum M ad axem AP, seu rectam positione datam. Dum vero inde deducitur modus parabolam construendi, quemadmodum a nobis factum est in Algebræ elementis, eo ipso intelligitur, notionem formatam esse possibilem. In moralibus quoque nos virtutum notiones, quas per arbitrariam determinationem formamus, possibiles esse demonstramus, ostendentes modum, quo illiusmodi habitus comparatur.

Fig. 8.

§. 724.

*Ex definitione data propositiones collecturus* 1. eam resolvere debet in propositiones, vel ut definitum sumatur loco subiecti & notio eidem attributa loco prædicati (§. 252.), vel ut de definito tanquam subiecto sigillatim prædicentur, quæ notio eidem attributa involvit (§. 254.), vel denique ut definitio invertatur, ponendo definitum loco prædicati & terminum complexum, qui denotat notionem ei respondentem, loco subiecti. 2. In memoriam sibi revocare tenetur propositiones alias, quæ cum formatis sic propositionibus terminum quandam communem habent. Quodsi enim tales ipsi succurrunt, conclusionem inferet ab assumtis diversas: sin minus, nullam conclusionem se ex definitione data eruere posse intelliget, (solum Logicæ præsidio. 3. Data autem conclusione una ex integra definitione vel ex inversa deducta; aut pluribus datis conclusionibus ex iis propositionibus, in quibus notæ definitionem ingredientibus de definito sigillatim prædicantur, collectis, solum ratiocinationis continuandum eodem modo, quem in forma demon-

Modus ex  
definitionibus deducen-  
di conclusio-  
nes.

demonstrationis declaranda uberius exposuimus supra (§. 551. 552. 553. 559.).

E. gr. Ponamus dari definitionem gaudii realem, quod nempe sit *affectus ex sensu boni praesentis ortus*. Ex hac definitione formatur haec propositio: *Qui gaudet, ille sentit bonum aliquod sibi praesens*. Jam cum memoria suggerat hanc alteram: *Qui sentit bonum aliquod sibi praesens, ille obiectum praesens agnoscit idemque bonum esse judicat*. Ergo hinc inferitur conclusio: *Qui gaudet, ille obiectum praesens agnoscit idemque bonum esse judicat*. Quodsi nobis porro in memoriam revocamus, quod *judicium vel verum sit, quod fertur, vel falsum*; si lum rationationis ulterius producturi sumimus: *judicium gaudentis de obiecto praesente, quod bonum sit, esse falsum*. Quamobrem cum porro nobis succurrat, cum, qui per errorem judicat, errorem suum agnoscere posse; prompta est illatio, fieri posse ut, qui gaudens per errorem judicat, obiectum praesens esse bonum, errorem agnoscat. Quodsi jam hanc conclusionem cum definitione gaudii conferas, illico patebit, cessare jam rationem gaudii, atque inde inferes: *Si quis per errorem judicat obiectum praesens esse bonum, agnito errore cessabit gaudium*. Unde porro deducitur *modus gaudium alterius tollendi, si scilicet alteri persuadeas obiectum praesens non esse bonum, sed non nisi per errorem tale haberi*. Occurrunt quoque in Mathesi cum pura, tum mixta exempla plurima, quibus problema praesens illustrari potest, quo modus ex definitionibus eruendi conclusiones traditur. E. gr. Si detur definitio parabola, quod sit curva, in qua quadratum semiordinatae PM est aequale rectangulo ex abscissa AP in parametrum AL; propositio ex definitione formata talis est: *In parabola Quadratum semiordinatae PM aequatur rectangulo ex abscissa AP in parametrum AL*. Cui ex elementis Geometriae occurrit: *Si quadratum fuerit aequale rectangulo, latus quadrati est medium proportionale inter latera rectanguli*; is inferet: *In parabola semiordinata PM est media proportionalis inter abscissam AP & parametrum AL*. Inde porro inferitur: *parametrum AL esse tertiam proportionalem ad abscissam AP & semiordinatam PM*. Exempli loco etiam esse potest integra demonstratio theorematis, quod *in parallelogrammo anguli diagonaliter oppositi sint inter se aequales*, eo modo proposita, quo nos eandem supra (§. 551.) exhibuimus. Sumimus enim definitionem parallelogrammi tanquam datam, parum solliciti de praedicto, quod eidem in theoremate tribuitur, & vi ejusdem duo formavimus judicia

intui-



intuitiva, quæ totius ratiocinationis fuere basis ac ea, quam in resolutione problematis præsentis commendavimus, ratiociniorum concatenatione tandem deduximus, quod *anguli diagonaliter oppositi sint inter se æquales*. Quamobrem exemplum quoque logicum *de modis ex definitione arcendis* ibidem propositum huc transferri potest. Hæc qui perpendit, novum usum clarissime perspicit, quem habet demonstrationum mathematicarum & philosophicarum analysis methodo a nobis præscripta instituta. Exercemus nimirum intellectum in meditando & habitum nobis comparamus, applicandi logicam ad veritatem a priori eruendam.

§. 725.

*Quod si ex hypothesi data, seu dato subiecto cum suis determinationibus propositiones eruende; hypothesi seu notione com-  
plexa, ex subiecto & ejus determinatione composita, utimur  
tanquam definitione in casu præcedente (§. 724.), & forma-  
tis beneficio hypotheseos judiciis intuitivis eodem modo ratiocinationis filum producimus, quo idem in demonstrationum  
analysis (§. 552.) factum.*

Modus ex  
data hypo-  
thesi dedu-  
cendi propo-  
sitiones.

Pertinent igitur huc exempla demonstrationum loco citato proposita, quod *recta ex centro ducta & arcum bisecans bisecet quoque chordam, quæ eum subtendit, & quod diversæ sint propositiones, quarum idem est prædicatum, subiecto autem diversæ respondent notiones*. Etenim in primo sumimus hypothesin tanquam datam, quod nempe *recta ducatur ex centro & bisecet arcum*, atque ex ea formamus judicia intuitiva, quæ basin totius ratiocinationis exhibent ad conclusionem nos tandem deducendis, quod *recta ista bisecet chordam, quæ arcum subtendit*. Similiter in secundo sumimus tanquam datam hypothesin, quod *in duabus propositionibus idem sit prædicatum, utriusque propositionis subiectum idem terminus & termino huic respondeant notiones diversæ*. Formamus hic quoque ejusdem beneficio judicia intuitiva & eadem tanquam basin omni ratiocinationi substernimus, qua tandem ad conclusionem deducimur, in qua subiecto tribuitur prædicatum, quod scilicet *propositiones istæ sint diversæ*. Quamobrem si quis omnes nostras propositiones logicas, in quibus prædicatum subiecto tribuitur sub data conditione eodem modo ad analyticum examen revocat, quo in isto exemplo logicam demonstrationis analysin instituimus; is artem meditandi hic præscriptam abunde exercere poterit, multo magis autem exercebit, si ceteras quoque ex elementis Matheseos universæ & ceteris philosophiæ partibus propositiones hypotheticas eadem industria

(Wolffii Logica)

U u u

perpen-

perpendere non neglexerit. Non igitur opus est, ut alia exempla in medium afferamus. Obiter notamus, patere per ea, quæ (§. 724. 725.) dicta sunt, a vero aberrare illos, qui sibi persuadent, veteres ea methodo theorematum sua invenire non potuisse, quæ eadem demonstrant. Si quis enim demonstrationes veterum rite solvere noverit, quemadmodum fieri debere docuimus (§. 551. & seqq.), eidem satis superque manifestum erit, data saltem definitione subjecti vel hypothese theorematis, ignorato vero adhuc prædicato, ratiocinatione concatenata ad theoremata perveniri potuisse.

## §. 726.

*Habitus  
theoremata  
investigandi  
quomodo  
comparatur.*

*Habitus investigandi theoremata sibi comparaturus, quantum per nudam regularum logicarum applicationem licet*, istiusmodi definitiones sumat, quibus 1. non multa continentur, & unde 2. istiusmodi theoremata deducuntur, quorum veritas ad examen revocari potest. Etenim si definitiones non multa contineant, in formandis judiciis intuitivis non adeo defatigabitur industria. Ubi vero propositiones ex definitionibus erutas extemplo ad examen revocare licet, illico patebit, utrum in ratiocinando legitimo modo fuerimus progressi, an vero in regulas inpegerimus, aut vitium materiæ admiserimus.

Commendantur enim in finem elementa Geometriæ atque Arithmetice theorematum, quæ campum istiusmodi exercitiorum amplissimum præbent, ubi tantum definitiones atque hypotheses theorematum sumis tanquam datas, prædicata autem si bjectis tribuenda fingis tanquam ignota atque ex illis eruenda. Neque enim alia re opus est, quam ut accurata analysi demonstrationum utaris supra descripta (§. 551. & seqq.), ubi nondum aliquem ratiocinandi habitum tibi comparaveris & theoremata quadam familiaria reddideris. Placuit itaque in elementis Mathematicos, Arithmetice præsertim atque Geometriæ, demonstrationes ad eam formam reducere, ut analysis ista veluti sponte sua lectori attentò sese offerat.

## §. 727.

*Cause effectuum latentium quomodo in apicem producantur.*

*Si dati effectus inquirenda est causa* 1. expendendum est, qualis res, quæ mutationem subiit, ante eandem fuerit, & qualis post eandem deprehendatur; inde enim intelligitur, qualis actio requiratur ad mutationem, quæ facta esse supponitur, inducendam. 2. Perlustrandæ sunt res nobis notæ, ut

ap-

appareat, num inter eas aliqua occurrat, a qua istiusmodi actio proficisci valet, vel an plures occurrant, quæ simul conjunctis viribus eandem edere possunt. 3. Nisi illæ fuerint solæ, a quibus istiusmodi actionem expectare lice; inquirendum an causæ illæ fuerint ibi præsentēs, ubi effectus datus fuit productus. Hac enim ratione nobis innotescere causam dati effectus, siquidem eam detegere in potestate nostra positum sit, demonstratione non est opus.

Fig. 9.

E. gr. Ponamus ex magnetis C polo septentrionali A pendere acum AB situ verticali, quemadmodum gravitas ejus postulat. Ponamus magnetis alterius D polum itidem septentrionalem E ita ad moveri ad acum AB, ut exiguo nonnisi quodam intervallo ab eodem distet: exemplo acus ex situ verticali AB dimoveretur in inclinatum AG atque in eo quiescit, quamdiu magnes D in eodem situ detinetur. Eo autem sublato, acus recidit in situm verticalem AB, quem primum obtinuerat. Constat per intuitum, magnetem D acum AB non contingere. Quamobrem cum recordemur, nullum corpus alterum movere posse, nisi id contingat; inde inferimus, magnetem D non movere acum AB ex situ verticali in inclinatum AG. Atque adeo patet, causam motus latere, etsi circumstantiæ observationis loquantur, eam cum magnete D fieri præsentem, seu eo posito, causam moventem una poni. Ne igitur fingamus vñ occultam magneti instam, cujus nullam, nisi deceptricem habemus notionem, quemadmodum olim a scholasticis factum; abunde cavetur, ubi regulas ad causas latentes in apicem producendum a nobis præscriptas ad præsentem casum applicaverimus. Per intuitum pater, acum AB ex situ verticali, quem obtinet, dimoveri in obliquum AG atque in eodem detineri. Constat præterea, acum vi gravitatis niti sese restituere in statum pristinum verticalem. Quoniam nobis succurrit, corpus grave quiescens non moveri nisi impulsu extrinsecus accepto & moveri secundum eam directionem, juxta quam impetus eidem imprimitur; inde colligitur, causam, quæ effectum præsentem producere debet, acui AB impetum imprimere debere juxta directionem BL. Cum non minus recordemur, corpus, quod vi gravitatis relabi nititur in eum situm, ex quo motu violento fuit dimotum, nisi contrario illi æquali in situ illo detineri debere; inde ulterius colligitur, acum AG vi gravitatis in situm verticalem AB relabi nitentem nisi quodam contrario æquali in obliquo AG detineri debere. Apparet itaque ex collatione situs acus, quem primum habuerat, cum altero, quem accedente magnete D obtinet, manifestam

Uuu 2

Seri

fieri actionem causæ ad effectum præsentem producendum requisitam, scilicet quod acui *AB* impetum secundum directionem *BL* imprimere ac nifum continuum in acum ex *AB* in *AG* translatum exercere debeat. Quodsi igitur jam memoria recolamus, quæ de causis moventibus nobis innotuere, atque eandem subeat, quod, si corpus grave libere pendulum extremitate sua immergatur fluido celeritate eidem proportionata moto, ipsum e situ verticali, quem vi gravitatis obtinet, in inclinatum dimoveri ac in eodem detineri; causa patet, a qua istiusmodi actio proficisci valet, qualis ad effectum præsentem producendum seu acum *AB* ex situ verticali in inclinatum *AG* dimovendum & in eodem detinendum requiritur. Enimvero antequam demonstraverimus, hanc unicam esse causam, cui istiusmodi effectus, qualis præsens est, tribui possit; nonnisi probaliter statui potest, fluidum ex polo magnetis *B* procedens & secundum directionem *BL* motum acum *AB* e situ verticali dimovere & in inclinato *AG* detinere. Quamobrem ulterius inquirendum, num istiusmodi fluido hic sit locus. Quoniam igitur corpus omne aut solidum est, aut fluidum, solidum autem nulum adest præter magnetem *D*, qui acum *AB* ne quidem in situ verticali, multo minus in obliquo contingit; nil obstat, quo minus firmiter concludamus, fluidum quoddam subtile ex polo *E* procedere, quod secundum directionem *BL* motum acum *AB* e situ verticali dimovet atque in inclinato *AG* detinet. Non inconsultum erit in re difficili aliud vulgare ac perfacile proponere exemplum. Ponamus tempore æstivo juxta fenestram radiis solis meridianis illustratam collocari ceram quandam portionem, eandem circa vespere in latum diductam superficie aquabili vestitam & ligno firmissime adhaerentem deprehendi. Quodsi ergo ea, quæ observas, tribus judiciis intuitivis complectaris atque ex iis ob subjectum commune compositum formes; recordatus eorum, quæ olim experientia duce tibi innotuere, quod materia liquefacta in latum diducantur superficiem aquabilem adipiscantur & corporum asperorum superficiebus firmiter adhaereant, colliges ceram fuisse liquefactam & postea rursus induratum. Quodsi porro experientia, quod didicisti tibi in memoriam revoces, ceram calore liquefieri & solis æstivi radiis eandem horis meridiæ proximis fuisse collustratam constet; porro hinc concludes solis æstivi calore ceram fuisse liquefactam, ab ejus autem actione liberam rursus frigesactam ac induratum esse.

Causarum.

§. 728.

*Datis causis atque effectu ab iisdem producto investigari.*

TMS

*rus, quid unaqueque illarum ad eundem contulerit*, i. notionem complexam, qua causæ cum effectu repræsentantur, resolvere debet in judicia intuitiva. 2. Cetera peragenda sunt eodem modo, quo ex data hypothese, vel definitione eruitur prædicatum subiecto tribuendum (§. 724. 725. ). Etenim propositio generalis, sub qua omnes casus speciales comprehenduntur, est istiusmodi: *Si hæ causæ effectum istum producant, hoc modo ad eundem producendum concurrunt*. Perinde igitur est, ac si ex data hypothese eruere jubearis prædicatum subiecto tribuendum. Quamobrem si notione complexa, qua causæ cum effectu repræsentantur, utaris tanquam hypothese, eodem omnino modo inde colliges, quomodo causæ ad effectum producendum concurrant, quo utimur in prædicato, quod tribuendum subiecto, ex data hypothese eruendo.

*influxus quomodo detegatur.*

Exemplo optime doceri potest, quomodo regulis hic a nobis præscriptis satisfieri queat. Experimur itaque, si vitrum exiguo collo instructum, nec aqua prorsus plenum subito invertatur, unam alteramque guttam initio delabi, deinde vero ne minimam quidem guttulam subsequi. Causæ hic concurrentes satis manifestæ sunt, nimirum ær vitro inclusus & supra aquam eminens, aqua in vitro contenta, exiguum vitri orificium & ær externus vitrum ambiens & in orificio ejus aquam contingens: quæritur vero, quomodo causæ hæ concurrant, ut obtineatur effectus observatus, scilicet ut initio guttula quedam effluat, mox autem sistatur motus & ne minima quidem sequatur. Judicium intuitivum primum hoc est, ærem inclusum ejusdem esse densitatis cum externo, dum vitrum invertitur. Recordati igitur, ærem ejusdem densitatis cum externo habere vim elasticam ponderi atmospherico æqualem, legitimo ratiocinio inferimus: ærem vitro inclusum & super aqua eminentem, dum vitrum invertitur, habere vim elasticam ponderi atmospherico æqualem. Intuentes ea, quæ in notione complexa data continentur, intelligimus, aquam & ærem inclusum conjunctis viribus premere deorsum. Combinantes igitur judicium hoc intuitivum cum conclusione ante reperta novum formamus judicium, quod ær vitro inclusus & aqua in eodem contenta majore vi nitantur deorsum, quam pondus atmosphericum resistit, seu ær externus ad orificium vitri sursum premit. Per immediatam consequentiam hinc porro inferitur, guttam orificio proximam majore vi impelli deorsum,

quam sursum. In memoriam nobis revocantes, si corpus aliquod viribus inaequalibus secundum contrariam directionem urgeatur, motum sequi versus eam partem, ubi minore vi urgetur, inferimus: guttam infusam ex vitro inverso effluere debere. Ipso facto jam patet, primum effectum eodem prorsus modo erutum fuisse, quo supra in analysi demonstrationum ex definitione, vel hypothese data deduximus prædicatum subiecto tribuendum. Facile enim patet, si plures guttæ effluant, non alia de causa delabi secundam, vel tertiam, quam delapsa fuerat prima. Semper enim eadem redit ratio, quamdiu motus aquæ ex vitro deorsum continuatur. Quodsi eadem via ulterius progrediamur, in alteram quoque effectus observari partem incidimus, quod nempe aliquot guttis elapsis nullæ amplius subsequi debeant. Etenim attendentes ad vitri orificium angustum formamus hoc iudicium intuitivum: *Vitri orificium admodum angustum est.* Recordari igitur, per vitri orificium angustum non posse simul aquam effluere & aërem ingredi super aquam ascensurum, inferimus: dum aqua per orificium effluit, aërem nullum in ejus locum in vitro succedere. Hinc per consequentiam immediatam porro colligitur: *Spatium super aqua, in quo continetur aër inclusus, fieri majus.* Qui in memoriam sibi revocat, aërem spatium liberius natum sese expandere, inde ulterius infert: *aërem vitro inclusum sese expandere.* Cum porro recordamur, aëris expansi vim elasticam minui; hinc colligimus aëris vitro inclusi elaterem fieri minorem, dum aquæ una alterave gutta ex vitro effluit. In Superioribus repereramus, elateram aëris inclusi & vim gravitatis aquæ simul excedere vim aëris externi orificium vitri ambientis & descensui aquæ resistentis. Quodsi ergo hanc conclusionem cum anteriore conferimus, fieri posse intelligimus ut, dum aqua effluente, elater aëris vitro inclusi continuo minuitur, is tandem evadat cum gravitate aquæ clateri aëris externi equalis: unde porro colligimus, guttam orificio proximam aequalibus viribus secundum contrariam directionem urgeri. Si jam nobis succurrit, corpus, quod aequalibus viribus secundum contrariam directionem urgetur, quiescere, inde inferimus, guttam orificio proximam quiescere debere, consequenter nullam amplius effluere. Qui hanc ratiociniorum seriem, seu meditationis progressum integrum cum demonstrationum exemplis superioribus (§. 551. & seqq.) confert, ille utriusque identitatem vel manibus palpabit. Diximus in superioribus, ut certi simus, nos effectus veram causam detexisse nec pro unica habere, quæ talis non est, vires causæ & quantitatem effectus mensurandas esse (§. 701.). Exemplo præsentem idem confirmare licet. Etenim

enim dum in gratiam phaenomeni sumimus, fieri posse ut elater aëris inclusi, dum aqua effluente minuitur, cum gravitate aqua simul evadat elateri externi aequalis, dubitari poterat, an eo usque minui possit. Enimvero si quis principiis aërometricis utitur, quod ponderi atmosphærico æquipolleat columna aquæ 32. pedum Rhenanorum & elater aëris minuatur in ratione densitatis imminutæ, is in dato quolibet casu æquilibrium elateris aëris interni inclusi graviati aquæ juncti atque elateris externi aëris exactissime demonstrabit. Philosophia experimentalis, qualem nos exhibuimus in operibus Germanicis & olim dabimus uberiores in Latinis, continuum est horum problematum exercitium quæ de investigandis causis effectuum latentibus & modo, quo ad effectum producendum concurrunt, tradidimus.

§. 729.

*Quoniam methodus a nobis præscripta investigandi veritatem a priori eandem prorsus formam servat, quam demonstrationes mathematicæ & philosophicæ, immo in universum omnes tueri debent (§. 727. & seqq.); qui eadem utitur, veritates philosophicas methodo demonstrativa facile proponere aut demonstrationibus, quæ affirmat, munire poterit.*

*Quomodo ad demonstrationes extrinsecas Mathematicas perveniatur.*

Plura de hoc argumento trademus inferius suo loco, ubi ostensuri sumus, quomodo detegatur, quibusnam definitionibus, axiomatis ac propositionibus aliis ad demonstrationem habeamus opus.

§. 730.

*Definitionem nominalem conditurus* 1. Ex iis prædicatis, quæ subjecto absolute tribuuntur, seligere debet, quorum unum per alterum non determinatur. 2. Rerum affinium, hoc est, plura prædicata communia habentium prædicata cum iisdem conferre tenetur, ut constet, num omnia simul etiam rei alteri convenire queant. Etenim si ex prædicatis, quorum unum per alterum non determinatur, tot combinat ad constituendam notionem complexam, quot simul rei alteri non conveniunt; definitio prodit nominalis.

*Modus investigandi definitiones nominales.*

Quod enim de subjecto absolute prædicatur, idem etiam de eodem universaliter prædicatur (§. 249. & seqq.). Quod igitur de subjecto absolute prædicatur, est vel attributum, vel essen-

essentiale, vel modi cuiusdam, atque relationis possibilitas, quæ per modum attributi inest (§. 257.). Enimvero definitum definiri potest per essentialia, per attributa, per meras etiam modorum atque relationum possibilitates, quæ per modum attributorum insunt, modo simul sumpta nonnisi definito conveniant (§. 180. 181. 182.). Quamobrem si ex prædicatis absolutis tot sèligis, quæ simul nonnisi definito conveniunt; definitionem habebis. Cumque definitiones, in quibus enumerantur essentialia, per quæ definitum determinatur, sint essentialia; ceteræ, in quibus enumerantur vel attributa, vel quæ per modum attributorum insunt, modorum ac relationum possibilitates, accidentales (§. 192.); definitiones vero cum essentialia, tum accidentales sint nominales (§. 193.); definitio, quam reperisti, nominalis est. Enimvero quia definitionem ingredi non debent notæ plures, quam quæ ad rem definitam agnoscendam & ab aliis distinguendam sufficiunt (§. 153), quod vero per alterum determinatur ideo inest, quia alterum subjecto convenit (§. 219.); superfluum foret in definitione coacervari prædicata, quorum unum per alterum determinatur. Quamobrem si ea omittis, definitionem habes accuratam.

E. gr. Si quis *triangulum æquilaterum* cognoscere studet, is intelligit, de eodem prædicari & *laterum*, & *angulorum æqualitatem*. Enimvero quoniam per demonstrationes constat, angulorum æqualitatem per æqualitatem laterum determinari, ita ut repugnet latera esse æqualia & angulos inæquales; ex definitione *trianguli æquilateri angulorum æqualitas* excluditur. Contra de *hexagono regulari* prædicamus & *laterum* & *angulorum æqualitatem*, nec non quod *circulo possit inscribi*, quod *angulus unus sit ad rectum ut 4 ad 3* &c. Quoniam per laterum & angulorum æqualitatem determinatur, quod circulo inscribi possit, & per numerum & æqualitatem laterum atque angulorum, quod *angulus unus sit ad rectum ut 4 ad 3*; e contrario autem æqualitas laterum & angulorum per se mutuo non determinantur; ideo *hexagonum regulare* definitur, quod sit *figura hexagona æquilatera & æquiangula*. Nam per numerum laterum distinguitur a figuris ceteris polygonis, per eorundem vero & angulorum æqualitatem a ceteris



ceteris hexagonis, seu sexangularibus, atque adeo in definitione continentur notæ sufficientes ad illud ab aliis figuris affinis distinguendum. Argentur vero superflua, scilicet quod figura sit circulo inscriptibilis & angulus unus ad rectum ut 4 ad 3. Ceterum pater, quod *hexagonum regulare* etiam definiri poterat per *hexagonum circulo inscriptibile*, nec non per *polygonum æquiangulum, cujus angulus unus est ad rectum in ratione sesquitertia*. Etenim per id, quod hexagonum sit circulo inscriptibile, determinatur laterum & angulorum æqualitas; immo eadem quoque determinatur per æqualitatem angulorum & rationem unius ad rectum sesquitertiam. Ea vero, quæ se mutuo determinant, in definitionibus sibi invicem substitui possunt, atque ideo pro angulorum & laterum æqualitate substitui potest inscriptibilitas in circulo, pro numero & æqualitate laterum angulorum æqualitas & unius ad rectum ratio sesquitertia.

§. 731.

Patet adeo, *definitiones nominales non posse condi, nisi ante multam rei prædicata cognoveris atque ea in essentialia, attributa & modos distinguere noveris.* *Quando definitiones concedere liceat.*

E. gr. Etsi hexagonum regulare intuitus laterum atque angulorum æqualitatem in eodem deprehendas; nondum tamen constat, utrum *hexagonum regulare* definiri debeat per *hexagonum æquilaterum & æquiangulum* nec ne: nosse enim debes, *laterum æqualitate angulorum æqualitate minime determinari*, ita ut hexagonum æquilaterum non perinde ac trigonum æquilaterum sit simul æquiangulum. In triangulo regulari æqualitas angulorum determinatur per æqualitatem laterum, atque adeo utraque inter essentialia referri nequit (§. 64.); sed sumta una pro essentiali, altera erit attributum (§. 65.). Utraque igitur simul definitionem ingredi nequit (§. 730.). Secus vero sese res habet in hexagono regulari, ubi *angulorum & laterum inæqualitas per se mutuo non determinantur*, atque adeo utraque in numerum essentialium referenda. Utraque igitur definitionem ingreditur. Ex modo prædicandi attributa, essentialia & quæ per modum attributorum rei conveniunt a ceteris prædicatis distinguuntur (§. 215.); attributa vero ab essentialibus per definitiones (§. 64. 65.). Enimvero id non semper absque omni difficultate patet, utrum attributum aliquod sit proprium, an vero commune, & utrum datis nonnullis attributis communibus determinantur omnia essentialia, nec ne: attamen nonnisi in casu posteriori attributa

(Wolffii Logica)      XXX      ista

ista simul sumta definitioni sufficiunt. Non igitur inconconsultum erit nonnulla adhuc in eum usum addere.

§. 732-

*Modus deter-  
minandi,  
quod essen-  
tialia omnia  
sint perspe-  
cta, attribu-  
tum sit pro-  
prium &  
communia si-  
mul soli rei  
convenient.*

*Si ex quibusdam essentialibus, vel ex quodam attributo, vel denique ex quibusdam attributis genesis rei deduci possit; ea non plura essentialia habet, quam quæ dantur, attributum unum est proprium, plura sunt attributa communia, quæ non nisi simul eidem rei conveniunt. Etenim si ex quibusdam essentialibus datis genesis rei deduci potest, vi identitatis modi ex data hypothese investigandi conclusiones & modi demonstrandi (§. 724. & seqq.) demonstrari potest, rei essentialia data habenti convenire hanc genesis, consequenter cum genesis rei considerata sit tanquam prædicatum tribuendum subjecto ob ista essentialia sola, alias enim ex iisdem deduci non posset, evidens est quod plura essentialia non habeat.*

Eodem prorsus modo ostenditur, quod attributum proprium sit, ex quo genesis rei deducitur, & quod attributa plura data simul non nisi eidem rei convenient, cujus genesis ex iis eruitur.

*E. gr. Euclides ex sola laterum aequalitate deducit constructionem trianguli æquilateri. Præter eam igitur determinationem essentialem triangulum istud nullam habet, quatenus nempe consideratur ut species triangulorum rectilineorum: nam numerus laterum ternarius & linearum species sunt determinationes generales. Similiter nos in Elementis Algebrae tradentes modum eam ad Geometriam sublimiorem applicandi ex proprietate seu attributo parabole, quod Quadratum semiordinata sit æquale rectangulo ex parametro in abscissam deducimus modum eam construendi: exinde adeo intelligimus attributum istud esse parabole proprium. Eodem modo patet, circuli proprietatem seu attributum proprium esse, quod quadratum semiordinatæ PM æquetur rectangulo ex segmentis diametri AP & BP.*

§. 733-

*Modus alius  
essentialia &  
attributa de-  
terminandi.*

*Si ex genesis rei integra deducuntur nonnulla, quæ per se invicem non determinantur, ea essentialia omnia sunt; si unum exinde deducitur prædicatum, erit id attributum proprium; si denique ex quadam genesicos parte deducantur unum, vel aliqua,*

*ex altera, vel ceteris aliud, vel plura alia prædicata; erunt eadem attributa communia, sed quæ simul sumta nonnisi rei datæ conveniunt.* Patet eodem modo, quo in propositione præcedente (§. 732.), ea, quæ ex genesi rei integra deducuntur, eidem ideo convenire, quod hanc habeat genesin, consequenter ei soli. Quare si ea, quæ inde deducuntur, per se mutuo non determinantur, non alia, quam essentialia erunt (§. 64.), neque pluribus essentialibus res ista habebit opus, secus enim plura posita genesi ponerentur. Quodsi vero, quod inde colligitur, nonnisi unicum fuerit prædicatum, erit id attributum proprium, cum per rei genesin, consequenter per omnia essentialia simul determinetur (§. 66.).

Quodsi vero plura prædicata simul deducuntur ex genesi rei, sed quædam ex hac, quædam ex alia ipsius parte; prædicata quidem simul omnia conveniunt rei, quia hanc habet genesin, sed singula tamen non propter genesin integram. Quamobrem singula non conveniunt eidem soli, sed rebus quoque aliis, quarum genesis quædam communia habet cum genesi rei datæ; omnia tamen simul nonnisi rei, cujus datur genesis, convenire possunt. Atque adeo attributa communia esse facile deducitur (§. 66.).

E. gr. Si figura quædam gigni concipitur, circuli peripheria in sex partes æquales divisa arcumque ductis subtenfis; ex hac ipsa genesi deducitur, hexagonum & æquilaterum, & æquiangulum esse debere. Quoniam tamen supposita in hexagono laterum æqualitate per eandem minime determinatur angulorum æqualitas; laterum & angulorum æqualitas inter essentialia figuræ, cujus genesis datur, referenda erit. Si quis elliptin ex focus motu continuo generari concipit, quemadmodum in elementis Analyseos ad Geometriam sublimiorem applicatis docemus; is per hanc genesin ex tempore intelligit, rectas ex utroque foco ad punctum quodcunque ellipseos ductas esse continuo axi majori æquales. Erit igitur hoc prædicatum attributum ellipseos. Si quadratum gigni concipimus, dum recta AB juxta ductum alterius rectæ AC sibi æqualis ita deorsum fertur, ut eidem continuo ad angulos rectos insistat; ex eo, quod AB alteri AC constanter ad angulos rectos insistat, adeoque ex parte geneseos,

Fig. II.

X x x 2

sequi-

sequitur, figuram descriptam habere latera opposita parallela. est igitur predicatum hoc Quadrati attributum commune.

§. 734.

*Modus investigandi definitiones reales ex datis nominalibus.*

*Si ex data definitione nominali realis investiganda*, 1. ex ea tot formantur judicia intuitiva, quot fieri possunt, quemadmodum supra (§. 724.) docuimus. Quodsi inde nondum appareat, quænam fieri debeant, ut definitum gignatur, 2. methodo (loco citato) præscripta superius tamdiu eruuntur conclusiones, donec ad tales perventum fuerit, ex quibus intelligitur, quænam fieri debeant, ut definitum gignatur. 3. In memoriam nobis revocare tenemur res olim cognitæ visuri, num inter eas tales occurrant, a quibus ea proficisci valent, quæ ut genesis rei prodeat requiruntur. Quodsi enim tales nobis occurrunt, genesis rei concipere licebit: id quod per se liquet, nec ulteriori probatione indiget.

*Fig. 8.*

E. gr. Si detur definitio parabola, quod sit figura curvilinea, in qua quadratum semiorinata PM aequatur rectangulo ex abscissa AP in parametrum AL, modo supra expósito (§. 724.) inde deducitur, quod semiorinata PM sit media proportionalis inter abscissam AP & parametrum AL. Quoniam parameter AL constans est, abscissæ autem pro lubitu sumi possunt; per id, quod ex definitione parabola collegimus, evidens est, punctum quodcumque M determinari posse, si inter constantem AL atque abscissam AP queratur media proportionalis. Atque adeo patet, quænam fieri debeant, ut axe AP positione & parametro AL magnitudine datis inveniantur quocumque puncta M, quæ datam ad axem relationem habent, consequenter per quæ parabola transit. Quoniam itaque ex elementis Geometriæ nobis succurrit circulus, qui mediam proportionalem exhibet inter duas lineas datas; ejus ope parabolam construere posse intelligimus. Juncta igitur parametro AL ipsi AP in directum & descripto semicirculo LNP secans infinitam AS in puncto N, prodit AN ipsi semiorinata PM æqualis. Atque sic patet parabola genesis seu definitio realis. Similiter si detur definitio nominalis vaporum, quod sint particule aquæ motu quasi spontaneo in aëræ ascendenti & investigandus sit modus, quo vapores formantur; judicium primo formamus intuitivum: vapores in aëræ quasi sponte ascendant. Quodsi nobis succurrit, omne corpus in fluido quasi sponte ascendens esse eodem specificè levius; inde inferimus: vapores aëræ esse specificè leviores. Ex definitione nominali erui-

1015

mus iudicium intuitivum alterum: *Vapores sunt particule aqueæ. Recordati aquam esse aëre specificè graviores, inde colligimus: Vapores constare ex materia aëre specificè graviori.* Hanc conclusionem conferentes cum conclusione anteriori, quod *vapores sint aëre specificè leviores*, formamus propositionem compositam, *vapores constant ex materia aëre specificè graviori suntque eodem specificè leviores.* Quamobrem si memoriam nostram subit propositio, quod, si *corpus constans ex materia specificè graviori fluido sit eodem specificè levius, cavum esse debeat*; inde ulterius colligitur: *vapores esse debere cava.* Quod si porro meminerimus, *corpuseula cava ex aqua formata esse bullulas*, inferimus tandem: *vapores bullulas esse*, easque adeo exiguas, ut nudo oculo tales non appareant. Pater itaque, ut vapores generentur, formandas esse bullulas ex guttulis aqueis valde exilibus. Quamobrem ubi memoria recolimus, quanam causa guttulas in bullulas resolvere possit, atque nobis succurrit, *aquam beneficio caloris aërem intus contentum rarefaciendo in bullulas resolvere*, vaporum genesis caloris ope producendam concipimus, siquæ definitionem vaporum realem condimus. Ex hoc exemplo apparet, quod *methodus investigandi definitiones reales rerum, quæ a causis externis producuntur, coincidat cum methodo dati effectus inquirendi causas earumque concursus* (§. 727. 728.), quamprimum res eo perducta est, ut constet, quanam ad genesis rei requirantur.

§. 735.

*Si definitiones rerum, quarum nullam adhuc notionem habemus, reales inventiendæ, entia nobis cognita pro arbitrio combinantur & ex iis, quæ nobis de iisdem innotuerunt, colligitur eadem, qua in antecedentibus usi sumus, methodo (§. 724. 725. 727. 728. 734.), quidnam eorum conjunctione gignatur.* Modus investigandi genesis rerum nondum cognitarum.

Methodo hac utimur in Geometria non minus elementari, quam sublimiori ad investigandas definitiones geneticas figurarum cum superficialium, tum solidarum: quemadmodum inprimis docuit *Isaacus Barrowius* in Lectionibus Geometricis p. 14. & seqq. Ita sumimus punctum fixum A & rectam AB circa idem mobilem: dum enim concipimus, *rectam AB circa punctum A rotari*, prodit *genesis circuli*. Similiter si *circulus AC concipitur moveri deorsum juxta directionem rectæ AB motu sibi semper parallelo*; *genesis* habemus *cylindri*. Quod si circulo substituatur *figura plana rectilinea, prismatis genesis* obtinetur. Si *recta quædam AB concipitur moveri deorsum juxta rectam AC motu sibi semper parallelo atque aquabili, eodem vero*

Fig. 12.

Fig. 13.

Fig. 17.

*tempore punctum incedit motu accelerato per rectam AB; motu hoc composito resultat genesis curvæ in genere. Non ab simili modo in Mechanicis per arbitriam combinationem machinarum simplicium reperiri possunt compositæ. Exempla quoque huc spectantia sup-  
 peditat Chymia, philosophia experimentalis, moralis & civilis; im-  
 mo in omni artis genere exempla istiusmodi obvia sunt.*

## §. 736.

*Quando ca-  
 sus ad gene-  
 ses rerum de-  
 tegendas con-  
 currat.*

*Quodsi talia combinentur, de quibus parum, aut nihil nobis fuerit perspectum; tentando geneses rerum deteguntur, ubi casui multa accepta ferenda esse, experientia constat.*

*Ita fortuita combinatione lentis convexæ atque concavæ detectum fuit telescopium, quod Galilæo adeo profuit in tot novitatibus cælestibus detegendis & Dioptricam nobis peperit veteribus mathematicis igno-  
 tam. Similiter commixtis carbonibus, sulphure & nitro casu reper-  
 tus est pulvis nitratus, cui Pyrotechniam & rem tormentariam debe-  
 mus. Nec alio modo, referente Leibnitio in Miscellaneis Beroli-  
 nensibus p. 91. & seqq. inventus fuit phosphorus. Plurima arti-  
 cum inventa ex hoc fonte originem suam ducunt.*

## §. 737.

*Quomodo de-  
 tegatur, num  
 res, cujus ge-  
 nesis reperta,  
 jam sit cogni-  
 ta.*

*Si genesis rei per arbitriam elementorum combinationem fuerit detecta, cogniturus utrum ea jam sit nota nec ne, & quod eidem nomen imponatur, 1. ex illa deducere debet rei attributa (§. 724.): 2. memoria recolere tenetur res sibi cognitæ ejusdem generis, ut ad earum proprietates attendenti innotescat, num inter eas aliqua occurrat, cui illa attributa conveniunt. Quoniam enim attributa ex genesis rei tota deducta, aut ex sin-  
 gulis ejus partibus eruta, in posteriori quidem casu simul sum-  
 ta, non conveniunt, nisi rei datam genesis habenti, quemad-  
 modum ex ante (§. 733.) demonstratis apparet; inde intelli-  
 gimus, rem istam esse eandem, cujus genesis reperimus.*

*Hoc modo in Geometria sublimiori ex genesis curvæ detectæ erimus  
 aliquam ejus proprietatem: quodsi enim nobis fuerit perspecta aliqua  
 curva, cui ista proprietas convenit, hanc eandem esse cum ea, cujus  
 genesis deteximus, absque ulla hæsitacione inferimus. Ita in Eleme-  
 ntis Analyseos finitorum ostendi, lineam istam curvam, quam in usum  
 fornicum condendarum construere docet Serlius, esse eandem cum  
 ellipti*

ellipsi Apolloniana. Monstravi quoque lineas curvas, quas in eundem usum construere docuit *Albertus Dürerus* & ex eo *Hartmannus* in Architectura civili, non alias esse quam ellipses Apollonianas. Utimur quoque in moralibus hac methodo, ubi, virtutum generis detecta, demonstramus, quodnam iisdem nomen vulgo imponatur.

§. 738.

Quoniam formatis iudiciis intuitivis sive ex definitione (§. 724.), sive ex hypothese (§. 725.), sive ex effectu (§. 727.), sive ex causis (§. 728.), sive ex definitione nominali (§. 734.), sive ex reali (§. 737.), sive ex arbitrariis combinationibus (§. 735.) datis, conclusiones inferri nequeunt, nisi memoria comprehensas habuerimus propositiones alias terminum communem cum istis habentes, nec solum ratiocinationis producere licet, nisi propositiones alia nobis cognita fuerint atque perspecta; hinc evidentissime liquet, *veritates latentes non posse erui nisi ex aliis cognitis*, ubi nempe ratiocinando, experientia inconsulta, easdem erui decreveris.

*Cur veritas latens non nisi ex cognitis ratiocinando eruatur.*

Loquuntur idem exempla singula, quibus methodos inveniendi (§. §. cit.) propositas illustravimus. Ubique enim ratiocinaturi in memoriam nobis revocare debuimus propositiones alias, quas hic de novo sigillatim recenseri & prolixum nimis, & superfluum foret.

§. 739.

Sequitur inde porro, quod *veritatem latentem erui ne queat, nisi qui eas habuerit perspectas, quæ ad formanda ratiocinia aliunde petenda, atque easdem experiatur familiariter*, ut scilicet veluti sponte succurrant, quoties iisdem habuerit opus.

*Cur non omnis eas erui possit.*

Exempla superiora, de quibus modo (not. §. 738.) diximus, idem abunde loquuntur. Pone enim, formato iudicio intuitivo, vel deductivo inde conclusione aliqua, tibi non succurrere propositionem, quæ in casu priori ad ratiocinationem inchoandam, in posteriori ad eandem continuandam requiritur; nihil omnino efficies, quocunque cognitionem tuam convertas.

§. 740.

Si ergo duo fuerint, qui arte inveniendi pollent, seu regulas hæc hactenus traditas dextre ad usum transferre valent, aliter invenire posse vero sit veritatem,

quam alter  
invenire ne-  
quit.

vero plurium veritatum cognitione fuerit instructus, alter pauciores noverit; qui pauciores novit, non est latentes detegere valet, quam qui plures noverit. Etenim ubi ille ratiocinationem ad veritatem latentem detegendam requisitam inchoare atque continuare valet, ibidem fieri potest ut hic eandem vel inchoare, vel inchoatam continuare nequeat.

E. gr. Si quis reddere jubeatur rationem, cur sub initium ex vitro inverso nec aqua prorsus pleno una alteraque gutta effluat, idem vero ignoret, aerem ejusdem densitatis cum externo habere vim elasticam ponderi atmospherico aequalem; ratiocinationem ad illam detegendam requisitam ne quidem inchoare valet (*ut. §. 728.*). Quod si eandem novit, ratiocinationem bene inchoabit: alit ubi in progressu ignoraverit, aut saltem non recordetur, si corpus aliquod viribus inequalibus secundum contrariam directionem urgeatur, motum sequi versus eam partem, ubi minore vi urgetur, illam absolvere haud quaquam poterit (§. cit.). Contra si quis utramque propositionem noverit, is ratiocinationem & inchoabit, & absolvere. Patet idem ex ceteris exemplis supra allatis,

## §. 741.

Inventor in  
uno genere  
scientiarum  
cur non idem  
sit in altero.

Hinc porro sequitur, inventorem in uno scientiarum genere, v. gr. in Mathesi, non ideo posse inventorem agere in altero. Etenim nisi instructus fuerit veritatum multarum cognitione ad alterum scientiarum genus spectantium, nil ipsi proderit ars inveniendi, quam in uno e. gr. in Mathesi exercet (§. 739.).

Experientia dicta confirmantur, quæ felices progressus in uno scientiarum genere conjunctos cum lapsu in altero loquitur.

## §. 742.

Tyronis officium in veritate investiganda.

Inde tandem conficitur, tyronem non debere inventorem agere, sed aliorum inventa primum sibi perspecta reddere. Ut vero ad veritatem proprio Marte inveniendam se præparet, applicando regulas a nobis traditas inquirere debet, quomodo illa inveniri poterint.

Quoniam analysis demonstrationum easdem prorsus sequitur leges, quas in veritate investiganda sequi tenemur (§. 728.), demonstrationes autem mathematicæ, quales præsertim a nobis traduntur in Elementis Mathematicos universæ, absque ulla difficultate eo, quem præscripsimus (§. 551. & seqq.), modo resolveri possunt; studium Mathematicos analysi demon-



demonstrationum diligenter instituta dabit exercitia, quibus tyrones ad veritatem inveniendam preparantur. Quod etiam philosophicæ nostræ demonstrationes eidem instituto inserviant, identitas earum cum mathematicis probat (§. §. cit.).

+++++

### SECTIO III.

DE

# USU LOGICÆ IN LIBRIS CONSCRIBENDIS, DIJUDICANDIS ET LEGENDIS.

CAPUT I.

## DE LIBRORUM DIFFERENTIA.

§. 743.

**I**N libris vel recensentur facta sive naturæ, sive hominum; Differentiæ vel proponuntur dogmata, seu veritates universales. Plura librorum librorum objecta dari non posse facile probatur. Quicquid enim cognoscimus, illud vel singulare est, vel universale: propositiones particulares discussis ignorantia nebulis genus quoddam universale constituunt (§. 249. & seqq.) & antequam ex ad universales revocantur in libris vix jure locum inveniunt. Enimvero propositiones singulares formantur de factis naturæ atque hominum, universales vero de eo, quod rebus pluribus commune. Atque adeo fieri nequit, ut in scriptis alia occurrant, quam propositiones singulares de factis naturæ atque hominum, vel universales, aut ob defectum cognitionis particulares de eo, quod rebus pluribus est commune, quæ *dogmatum* nomine compellamus.

(Wolffii Logica)

Y y

Equi-

Equidem *dogmatis* nomen subinde strictius sumitur pro propositione universali, cujus notitia ad felicitatem generis humani utilis: quo sensu Theologi dogmata vocant vel propositiones singulares homini salvando creditu necessarias. Enimvero nobis commodius videtur, ut veritates dogmaticas historicis opponamus, discrimine intrinseco ex ipsa propositionum indole petita.

## §. 744.

*Librorum  
historicorum  
definitio.*

*Libri* facta recensentes dicuntur *historici*. Et propositiones singulares, si fuerint veræ, *veritatum historicarum* nomine veniunt.

E. gr. Si quis observet, *cælo pluvio ac lucente Sole apparuisse iridem*, & factum idem recenscat, is veritatem historicam proponit. Et historicus erit liber, in quo plura istiusmodi facta recensentur.

## §. 745.

*Differentia  
librorum  
historicorum.*

*Libri* recensentes facta naturæ dicuntur *historiæ naturales*; quæ describunt opera artis & artes ipsas, *historiæ artium*; quæ recensent facta hominum, *historiæ absolute* appellantur.

Facile hinc colligitur *historiæ* nomen primum soli narrationi factorum hominum fuisse tributum; deinde vero ob similitudinem, quæ generi constituendo sufficit, etiam ad descriptionem operum naturæ atque artis fuisse translatum.

## §. 746.

*Historia naturalis  
variae  
speciei.*

*Historia naturalis* in varias abit partes pro diversitate objectorum, circa quæ versatur. Ita *Historia cælestis* appellatur, quæ phaenomena cælestia describit. *Historia meteororum* est, quæ meteora ex observationibus describit. *Historia animalium* est, quæ animalia describit, in specie *Historia piscum*, *avium*, *insectorum*, quæ de piscibus, avibus, insectis agit. *Historia morborum* est, in qua morbi, quibus corpus humanum obnoxium est, delineantur. Pertinet huc quoque *Anatomia*, quæ est historia structuræ corporis humani; *Botanica*, quæ est historia plantarum; *Psychologia empirica*, quæ est historia animæ &c.

Non omnes fixum vocum significatum tuerentur. E. gr. *Flamstedius* in *Historia*, quam vocat, cælesti Britannica non modo observationes phaeno-

phænomenorum cælestium describit, quas in observatorio regio Grenovicensi ipse Astronomus regius celebravit; verum etiam catalogum fixarum longe amplissimum exhibet, immo in nova editione multa alia ad Astronomiam spectantia adjecit. Enimvero etsi censoria virgula non notemus Autores meritis in scientiam & artem eminentes, ubi in libris suis plura dederint, quam titulus promittit; non tamen æquum de iis judicium obstat, quo minus in Logica fixum vocum atque determinatura tueamur significatum. Solent quoque partes speciales historiæ naturalis a nonnullis nominibus Græcis insigniri, veluti historia meteororum dicitur *Meteorographia*; historia piscium *Ichthyographia*; historia animalium *Zoographia* & ita porro. Non improbamus hunc morem, etsi ab iis terminis abstinemus, ne eorum multitudine memoriam lectoris Græcarum præsertim literarum ignari nulla urgente necessitate oneremus.

## §. 747.

Ad *historiam naturalem* referri quoque debent *descriptions experimentorum*, si in iis solis acquiescas, nec ulterius ad reddendas phænomenorum rationes progrediaris, atque artificia experimentandi una edoceas. Etenim *experimenta* versantur circa facta naturæ, etsi non nisi opera nostra intercedente contingant. Facta autem naturæ promiscue omnia sunt historiæ naturalis objectum (§. 745.). Quatenus vero rationes phænomenorum redduntur, ea, quæ cum historia naturali combinantur, ad scientiam naturalem pertinent. Artificiorum experimentandi descriptio ad artem inveniendi spectat.

*Experimenta, quatenus ad historiam naturalem referenda.*

Cum in conscribendis libris inprimis habenda sit ratio lectoris, ipsimet experimenta non nude describimus, sed singulorum quoque phænomenorum rationes reddimus & artificia experimentandi sedulo annotamus, cum *historia experimentalis* constanter conjungentes *philosophiam experimentalem*, quæ ex experimentis propositiones in usum philosophandi de rebus naturalibus condit atque easdem ad reddendas phænomenorum sequentium rationes applicat.

## §. 748.

Eodem modo historia artium pro diversitate objectorum diversa sortitur nomina. Ita *Theatri machinarum* nomine vulgo venit historia machinarum, in qua machinæ huc usque inven-

*Historia artium species.*

inventæ & ad varios vitæ usus applicatæ describuntur. Tot sane sunt *historia artium species*, quot *artes diverse*.

Artium historia hæcenus valde imperfecta, et fructuissima, quemadmodum alibi ostendimus.

## §. 749.

*Historia per eminentiam sic dicta species.*

*Historia* per eminentiam sic dicta dividitur in *civilem*, *ecclesiasticam* & *literariam*, quibus *privata* additur. *Civilis* statum & fata regnorum & rerump. atque res gestas summorum imperantium; *ecclesiastica* statum & fata ecclesiæ; *literaria* statum ac fata orbis literarii; *privata* denique facta & fata hominum privatorum describit: quo pertinent *Biographiæ*, seu vitarum descriptiones.

Nos non plura tradimus, nisi quæ Logicæ usus a nobis demonstrandus postulat. Neque enim nobis propositum est docere omnia, quæ in scriptis historicis concinnandis spectanda; sed saltem ea, quæ leges Logicæ observanda præscribunt. Atque adeo plura de differentia scriptorum historicorum non addimus.

## §. 750.

*Libri dogmatici definitio.*

*Liber dogmaticus* a nobis dicitur, qui dogmata, seu veritates universales proponit.

E. gr. *Euclides* dogmata fundamentalia circa magnitudines & figuras in *Elementis* suis demonstrat. *Elementa* igitur *Euclidæ* in numerum librorum dogmaticorum referenda. Similiter *Logica* hæc nostra dogmata de dirigendo intellectu in cognitione veritatis proponit, atque adeo & ipsa ad libros dogmaticos spectat.

## §. 751.

*Librorum dogmaticorum divisio.*

Libri dogmatici vel dogmata tantum recensent & ad summum argumenta, quibus probantur, indicant; vel eadem demonstrant, aut probant. Illos dicemus *libros dogmaticos historicos*; hos vero *libros dogmaticos scientificos*.

E. gr. *Euclides* theoremata & problematum resolutiones in *Elementis* non tantum recenset; verum etiam demonstrat. *Elementa* igitur *Euclidæ* inter scripta *scientificæ* referuntur. *Malletus* in *Geometria practica* praxes geometricas & geodericas tantum describit, demonstrationes vero omittit. Ejus itaque *Geometria practica* in numerum

rum *scriptorum dogmaticorum historicorum* referenda. Nos in Logica veritates logicas non modo exponimus; verum etiam easdem probamus, argumenta, quibus nituntur, non tantum indicando, verum etiam evolvendo. Logica igitur nostra in numerum *scriptorum scientificorum* referenda.

## §. 752.

Utraque species pro diversitate objectorum, circa quæ *Subdivisio*  
versatur, in diversas abit species inferiores. Huc pertinent *corundem.*  
*diverse Philosophiæ partes* in discursu præliminari recensitæ. Sed a scopo nostro alienum est illam differentiam hic expendere.

Enim nec de scriptis dogmaticis plura tradimus, quam quæ usus Logicæ a nobis monstrandus postulat.

## CAPUT II.

## DE CONSCRIBENDIS LIBRIS HISTORICIS.

## §. 753.

**Q**Uoniam in *historia naturali* facta naturæ describuntur *Finis histo-*  
(§. 745.), *finis* ejus duplex est: vel *ingenere animo le-* *ria natura-*  
*ctoris rerum naturalium notiones*, unde nobis oblata *lis.*  
agnosci possunt; vel *imbuere eundem principiis*, quibus in *ratio-*  
*cinis de rebus naturalibus habemus opus.*

E. gr. In *historia animalium* vel tantummodo describitur eorundem species externa & quæ verbis describere nequit Autor, ex schemate æri vel ligno inciso hauriuntur; vel simul explicatur structura interna, enarrantur actiones animalibus propriæ, describitur victus, recensentur alia ad eorum cognitionem quomodocunque spectantia. In priori casu Autor animo lectoris tantum ingenerat ideam animalium, ut eidem oblata ab eodem agnosci & ab aliis discerni possint; in posteriori eundem imbuere principiis, quibus utitur *philosophus* in physica specialissima; *Physiognomus* in conjecturis hominum moribus, *Orator*, *Poëta*, aliis in allegoriis, metaphoris, emblematis condens, *Oeconomus* in re æconomica, venatoria, piscatoria, & ita porro.

## §. 754.

Eodem modo patet (§. 748.), duplicem hunc finem *Finis histo-*  
convenire quoque *historiæ artium*, ita ut autor vel intendat *ria artium.*

*animo leſoris ingenerare rerum artificialium nōtiones, unde nobis oblata agnoſci poſſunt, vel eundem imbuere principis, quibus de operibus artis ratiocinatur opus habemus.*

E. gr. Ponamus deſcribi *artem typographicam*. Aut igitur acquieſcimus in deſcribendo omni apparatu, quibus typothetæ & typographi habent opus, ut is agnoſci & ab aliis rebus artificialibus diſtingui poſſit; vel ſimul explicamus principia, quæ de opere typographorum iudicaturis utilia ſunt.

## §. 755.

*Hiſtoria civilis finis.*

Quoniam *hiſtoria civilis* ſtatus rerump. & ſummorum imperantium deſcribit (§. 749.); in ea *ſuppediuntur exempla*, quibus *dogmata poliſca confirmantur* & unde principia prudentiæ civilis derivantur, nec non *iura ſummorum imperantium deciduntur*. In hiſtoria univerſali, eaque generali intendere quoque poſſumus, ut *nonniſi quædam noſſo ſeriei temporis leſoris animo ingeneretur*, in uſum hiſtoriæ ſpecialis finium modo in medium allatorum confequendorum gratia pertractandæ.

## §. 756.

*Finis eccleſiaſtica.*

Eodem modo (§. 749.) patet, in *hiſtoria eccleſiaſtica* proponi exempla, quibus *dogmata de regimine eccleſiaſtico confirmantur* & unde principia prudentiæ eccleſiaſticæ derivantur.

## §. 757.

*Finis privata.*

Nec minus liquet (§. 749.), *hiſtoriam privatam ſuppeditare exempla virtutum & vitiorum*, quibus præcepta dirigendi actiones ad ſuam aliorumque felicitatem confirmantur & unde principia prudentiæ privatæ derivantur.

## §. 758.

*Finis literaria.*

Quoniam in *hiſtoria literaria* ſtatus orbis literati deſcribitur; in ea docetur progreſſus ſcientiarum & artium liberalium (§. 749.): adeoque in ea intendimus docere lectorem, undenam *veritatum inventarum haurienda ſit cognitio* & principia ſuppediamus ad locupletandam *artem invenendi proſcua*.

Com-

Commemoramus scilicet fines historiarum primarios, ad quos respicere debemus eam vel condituri, vel de condita ab aliis iudicaturi. Alios usus, quos historia habere potest, hic recensere, ab instituto nostro abhorret. Fieri autem utique potest, ut autores alios quoque usus in historia scribenda intendant, adeoque iidem in numerum finium assumantur. Enimvero patebit ex inferius dicendis, fines ceteros a primariis istis, quos recensuimus, pendere, ita ut, si istis ex asse satisfiat, his quoque simul satisfactum sit, aut certe non difficile, quæ a nobis in gratiam illorum præcipiuntur, ad hos quoque utiliter transferre. Quæ enim Logica suppeditat subsidia, numero pauca sunt & generalia.

§. 759.

Quoniam historia civilis recenset statum & fata rerump. *Finis quidam generatim historia.* cum rebus gestis summorum imperantium; ecclesiastica statum & fata ecclesiæ; privata facta & fata hominum (§. 749.); ex collatione factorum & factorum leges providentiæ divinæ innotescunt. Unde inter *fines historiarum in genere* referri debet, quod *ad leges providentiæ divinæ agnoscendas manducat.*

Usum hunc historiarum maximi esse momenti per ea patet, quæ in moralibus de officiis erga Deum demonstramus. Etenim ostendimus, attributa divina distincte ac evidenter agnita fieri motiva omnium nostrarum actionum atque eo ipso, quod attributa divina motivis accedant, virtutis studium non modo facilitari, sed ipsam quoque virtutem longe aliam formam inducere, quam si motiva ab intrinseca actionum moralitate derives. Dum vero leges providentiæ divinæ ex fati rerump. ecclesiæ atque hominum privatorum scrutamur, novis continuo argumentis attributorum divinarum cognitio perinde confirmatur, ac in Teleologia finium contemplatione. Principiis nostris metaphysicis, moralibus & politicis instructus non sine animi singulari voluptate in perscrutandis ex historia legibus providentiæ divinæ utiliter versabitur.

§. 760.

*Scriptum historicum conditurus id agere debet*, ut 1. non narret, nisi vera, 2. singula eo, quo se invicem secuta fuere, *Quanam in scripto historico observanda.* ordine exponat, nec 3. quicquam eorum pratermittat, quod ad finem historiarum consequendum cognitu necessarium.

Possunt hæc axiomatum instar sumi. Etenim in scripto historico recensemus facta sive naturæ, sive hominum (§. 743. 744.), certo-

certorum finium consequendorum gratia (§. 753. & seqq.). Ponamus igitur illud conditurum narrare a veritate aliena, nec singula eo, quo se invicem secuta fuere, ordine. Evidens est, cum non narrare facta, sed ex proprio ingenio conficta: quod definitioni scripti historici repugnat (§. 744.). Ponamus porro eum quædam prætermittere, quæ ad finem historiarum consequendum cognitu necessaria sunt; eundem lector minime consequi poterit, quacunque attentione adhibita, omnibus licet subsidiis meditando instructus, quæ sectione præcedente exposuimus. Erit igitur historia vel usus nullius, vel minoris, quam fieri poterat: id quod principiis moralibus repugnare suo tempore patebit.

Nos nimirum non admittimus principiis nostris moralibus convenienter ullam rerum cognitionem, quæ non tandem tendat ad liberarum actionum determinationem atque adeo in felicitate generis humani terminetur. Abunde idem patebit ex ceteris philosophiæ partibus a nobis eadem methodo tradendis, qua Logicam nunc exposuimus. Cumque omnem cognitionem ad hunc finem dirigere constanter conati fuerimus, ipso facto didicimus, nullam dari, quantumvis abstractam atque sublimem rerum cognitionem, quæ non ad promovendam generis humani felicitatem transferri possit. Erit dies, si Deus voluerit, quod idem luculentissime demonstraturi sumus.

## §. 761.

*Quenam in historia naturali condenda observanda ad ingenerandum animo rerum naturalium ideas.*

*Historiam naturalem conditurus ea fini, ut rerum naturalium ideas animo alterius ingenerentur* 1. objecta minime obvia accuratissime delineata xri incidi ac suis nativis coloribus depingi curret: 2. partes singulas in iisdem discernibiles propriis suis nominibus indiget, aut, si nulla præstent, attenta similitudine cum rebus aliis nova imponat: 3. quæ in partibus singulis denuo discerni possunt, eodem modo enumerare studeat, donec ad partium partes observabiles ultimas perveniatur: 4. quæ nudo oculo non patent, beneficio microscopii detegat: 5. Quo ordine partes singulæ se mutuo excipiant & quomodo inter se cohæreant, sedulo explicet. Etenim ubi lector attentus objectum obivum oculis suis implemet subjicit, vel eos in minus obivii



obvii imaginem prototypo suo simillimam convertit, ratione præscripta notionem objecti adipiscetur, quantum fieri potest, distinctam & adæquatam (§. 682. 683. 684.); in ceteris vero, quæ distincte exponi nequeunt, claram, utut confusam (§. 688.). Finem adeo ab autore intentum consequi potest lector, qui sufficientem ad illius scriptum affert attentionem.

Nemo non videt, solutionem problematis generalem ad quamvis partem historiæ naturalis specialem applicari posse. E. gr. Si iridis historia tradenda, delineandus erit arcus, qualis in aëre compareret. Recensendi sunt colores eo ordine, quo se invicem consequuntur. Indicanda est ratio latitudinis ad altitudinem; nec non ratio latitudinis colorum ad eandem altitudinem, & ratio latitudinis singulorum colorum inter se. Quodsi singuli colores in ipsa arcus celestis imagine picta exhibeantur; eorum claram nanciscetur ideam, qui iridem nondum vidit, vel olim visi non satis recordatur. Quoniam supponimus in iridis descriptione non alium auctori propositum esse finem, quam ut ejus ideam animo lectoris ingeneret, quantum fieri potest, distinctam: aliorum phenomenorum mentionem nullam injicimus, illi notandorum, qui iridis theoriam physicam condere debet. Enimvero non inutile nobis videtur unum adhuc alterumque circa problematis præsentis solutionem moneri.

§. 762.

Consequitur hinc, *historiæ naturalis scriptores in delineandis ac depingendis objectis esse debere exercitiatos*. Neque enim fieri potest, ut semper iis præsto sit pictor arte excellens; nec qui lucri gratia opus perficiunt, eam in eodem perficiendo collocare solent operam, qua utuntur veritatis amore ducti. Quorum vero nonnisi confusam notionem habemus, ea cum altero solis verbis communicare non possumus (§. 88. 89.).

*Cur historiæ naturalis scriptor artis pictoriæ debeat esse gnarus.*

Ira Ludovicus Feuillée, Religiosus ex familia Minimorum, Mathematicus & Botanicus Regis christianissimi, iter in Americam meridionalem & Indiam occidentalem historiæ quoque naturalis gratia faciens ac in delineandis & pingendis objectis excellens, ipse propria manu plantas atque animalia exotica delineavit & coloribus nativis illuminavit. Immo Joannes Hevelius, Astronomus superioris seculi præstantissimus, *selenographiam* conditurus Lunæ phasies non modo ipse in charta accuratissime delineavit, verum etiam eadem industria

(Wolffii Logica)

Zz z

&

& dexteritate usus æri incidit. *Antonius van Leeuwenbæk*, observationibus microscopicis & præclaris in scientiam naturalem meritis clarus, ipsemet arte delineandi objecta destitutus erat: quomobrem pictoris opera usus non ubique satisfecit votis lectorum in delineandis objectis, qualia per microscopia comparent. *Academiæ scientiarum* alere possunt & viros ad historiam naturalem perficiendum natos, & pictores, ut conjunctis viribus agant, quod unus solus perficere non poterat.

## §. 763.

*Cur lingua  
admodum  
gnarus esse  
debeat.*

Quoniam *historiæ naturalis scriptor* singula propriis suis nominibus indicare, vel etiam juxta analogiam linguæ, qua utitur, nomina, quæ desiderantur, condere debet (§. 761.); *linguæ, qua scribit; maxime gnarus sit opus est.*

Difficultatem eloquendi, quæ in objectis clare percipimus, satis experimur, ubi verba non satis commoda succurrunt, quibus utamur, præsertim si schema, quo repræsentantur, rem nomine indigendam non satis clare exhibet.

## §. 764.

*Quando nu-  
do nomine  
contentus esse  
possit.*

*Quodsi notio nomini respondens obvia fuerit, in descriptione rei nomen nudum poni sufficit.* Etenim si notio eidem respondens obvia fuerit, ea nomine audito lectori statim succurrit. Quomobrem cum aliud non intendamus, quam ut alterius animo rei descriptæ notio ingeneretur (§. 761.); nomina eorum nuda poni sufficit, quæ rei insunt & quorum notiones obvia fuerint.

E. gr. Notio trianguli æquilateri obvia est. Quodsi ergo caput cometæ, vel stella quædam nova, aut aliud phænomenon sive æthereum, sive æreum eum habuerit situm, ut cum duabus fixis triangulum æquilaterum constituat; sufficit in descriptione phænomeni indicasse, quod cum fixis A & B formaverit triangulum æquilaterum. Quoniam enim distantia fixarum per se patet, trianguli magnitudo inde statim liquet, neque opus est, ut ad ejus magnitudinis ideam animo exhibendam quicquam addatur. Enimvero cum triangula æquicrura diversam sui speciem exhibeant, prout crura nunc fuerint basi minora, nunc majora, & ratio inæqualitatis diversa; triangulum simile ei, quo situm phænomeni describimus, vi imaginationis minime efformabit, neque in charta delineabit, nisi qui rationem crurum ad basin, vel di-

*stantiæ*

stantiæ verticis ab eadem ad eandem una noverit. Similiter idem observari debet circa nomina, quibus notiones non nisi confusa respondent. E. gr. Coloris rubri plurimæ sunt species. Si quis ergo describens avem peregrinam pennas quasdam rubras nominaverit, haud quaquam fieri potest ut lector nisi casu raro, immo longe rarissimo, incidat in eam speciem coloris rubri, quo pennæ erant tinctæ. Nisi igitur aut nomine specifico indicaverit rubedinem, aut alio modo ideam animo lectoris ingenerare studuerit; hic minime mentem scriptoris assequetur (§. 118.). Aut igitur dubius erit, qui noverit, nomine generali indigitari, quod speciali indicandum erat; aut falsam sibi efformabit rei non visæ ideam. Contra cum lævitas nonnisi gradu differat in objectis lævibus, gradus autem particulis confuse indicari possint; si quis objectum dicat esse admodum læve, a lectore facile intelligetur. Forsan nimis scrupulosos nos judicabunt, qui non perpendunt, quod fixum vocum-significatum custodientes & in eodem stabilia principia ad sensum alienum minime detorquentes negare debeamus, nos ab altero intelligi, quamdiu is non eandem cum verbis nostris jungit notionem, quam nos rem describentes cum iisdem jungebamus (§. 117.). Quodsi objeceris, impossibilem hac ratione fore rei naturalis descriptionem, quæ prorsus intelligi possit, non viso ipso objecto; tum quidem facile largior, subinde id fieri non posse, cum ideo schemata requisiverimus objecta accuratissime delineata suisque nativis coloribus illuminata exhibentia; nonnunquam idem nondum esse in potestate nostra: attamen non facile largior, ut, quæ in nostra nondum sunt potestate, ea pro impossibilibus venditentur. Erit ætas, qua patebunt, quæ nunc latent, ubi ea methodo philosophari libuerit, quam nos philosophantibus commendamus. Ne vana dixisse videar, ad sequentia attendat lector ex spe meliorum temporum voluptatem percipiens.

## §. 756.

Quoniam *Isaacus Newtonus* profunda indagine assecutus (quod suo loco disertius docebimus), quinque colores, qui ex refractione luminis solaris in prismaticæ facta prodeunt, esse primigenios, quorum commixtione prodeunt compositi ceteri omnes, atque in præclaro *Opticæ* opere lib. 1. prop. 4. p. 58. edit. sec. lat. modum docuit luminis radios heterogeneos separandi; *experimentis perveniri poterit ad distinctas colorum compositorum notiones, ita ut in descriptione rerum naturalium*

*An colores distincti describi possint.*

*experimenta necessaria facturo solis verbis communicari possit notio coloris.* Et quoniam pictores atque tinctorum ad colorem inducendum utuntur materiis ex regno minerali atque vegetabili petitis & illi inprimis ex simplicium quorundam colorum mixtione producant compositos, quibus rerum nativos colores imitantur; *ars quoque pictoria & tinctoria experimenta suppeditare poterit, quibus ad distinctas colorum compositorum notiones pervenitur.* Ac utile inprimis foret, *notiones utraque via repertas conjungi.*

Non diffitemur, rem arduam esse, quam hic commendamus; nec negamus fore ut plurima experimenta operam experimentatoris industrii ac ingeniosi ludant: nequaquam tamen laboris improbi successum desperamus, quo omnia tandem vinci dudum observatum est.

## §. 766.

*An calor distincte describi possit.*

Similiter ex historia experimentalis, quæ superiori seculo feliciter excoli cœpit & quam suo loco dabimus uberrime explicatam, constat, varia excogitata esse artificia, quibus datus quidam gradus determinari potest. *Quodsi ergo experimentum, quo gradus caloris determinatur, in descriptione corporis calidi adijciatur, experimentum reiteraturis solis verbis communicari potest notio caloris, quam nos habemus.*

Experimenta ista describemus in philosophia experimentalis.

## §. 767.

*Notiones confusæ quomodo alteri communi-  
centur.*

In genere notandum, *si experimento præscripta methodo factum illud sensibus præsens fisci possit, cujus nonnisi confusam habemus notionem; solis verbis efficere posse, ut lector experimentum reiteraturus eam, quam nos habemus, notionem confusam consequatur.*

Pater adeo novus usus philosophiæ experimentalis in transmittendis notionibus confusis per scripta ad alios, qui novum experimentorum campum aperiet. Exemplum ejus occurrit in mensura fixa experimento pendulorum ex mente *Hugenii* ad posteros & peregrinos transmittenda: de quo *Hugeniano* invento egimus in *Elementis Mechanicæ* theorematum de motu pendulorum demonstrantes.

## §. 768

## §. 768.

*Si id, cujus notionem confusam habemus, similitudinem quandam habuerit cum alio alteri noto, & similitudo distincte exponi possit; solis verbis notionem hanc confusam alteri communicare liceat, quatenus similitudinem cum re alia alteri nota involvit.* Cum enim alter nomine rei alterius audito notionem ejusdem in mente reproducat, quam olim percepta habet; ea coram inuenitur, quæ eadem sunt in re a nobis confuse percepta. Quod si igitur illa indicare potueris, similitudinem distincte exponis, nec alter ad similitudinem referet ab eadem aliena. Verbis adeo, quibus in descriptione objecti uteris, efficis, ut notionem confusam, quam habes, consequatur alter, quatenus similitudinem cum re alteri nota involvit.

*Modus communicandi  
notiones per  
similitudinem  
cum aliis.*

Methodus hæc hominibus maxime naturalis, ut sola Logica naturali usi alteri descripturi objectum, quod nunquam vidit, ejus cum aliis eidem notis comparisonem instituant. Enimvero cum similitudinem non convenientibus circumscriptant limitibus, scopum sibi præfixum minime consequuntur. Etenim alter sibi in memoriam revocans rem integram, quæ aliquid similitudinis cum alia involvit, similitudinem ultra suos limites extendit. V. gr. Si quis aures alicujus animalis alteri nondum visi dixerit esse similes auribus felis; qui hæc audit aures felis sibi visæ in memoriam revocat easque pro auribus animalis ignoti sumit. Accidit inde ut istiusmodi comparatione in singulis partibus animalis, quod describit alter, instituta lector vi imaginationis componat ideam animalis, qualem in rerum natura nullibi existit & quod toto cælo differt ab eo, quod sibi præsentare debet. Animal igitur peregrinum ipse tandem videns miratur atque faterur, se longe aliam ejus ideam animo concepisse. Quod si is, qui legit istiusmodi descriptionem, artis pictoriæ esset peritus ac ideæ suæ convenienter animal nondum visum delinearet; quantum a vero idea ipsius aberraret, palam foret alteri, qui objectum ipsum vidit. Lubrica adeo hæc via est, nisi cautione utamur, ut terminos similitudinis indigitemus. Valde autem vereor, ne majore hic opus sit circumspeditione, quam quæ in plurimos cadit. Obiter observo, exemplo hoc patere, quam facilis sit Logicæ naturalis abusus & quam bene sibi consulant, qui artificialem cum naturali conjungunt.

## §. 769.

*Experimentorum usus quidam in historia naturali.*

*Si qua in objecto, quod describitur, sensui non patent, nisi experimento facto; idem una describendum.* Cum enim alterius animo rei, quam describit, ideam ingenerare studeat autor (§. 761.); scopum sibi præfixum minime consequetur, ubi experimenti nullam mentionem facit, quo facto demum sensui patet, quod describitur. Etenim si nulla prorsus ejusdem mentio fiat, sensui per se patere lector sibi persuadet, quod nonnisi facto experimento in apicum producit, atque adeo a vero aberrat (§. 624). Si saltem in genere indicat, facto experimento demum patere, quod describit, quomodo autem idem instituendum sit minime exponit; lector veritatem facti examinaturus ignorat, quomodo eandem consequi debeat visurus, num veram animo conceperit ideam.

Exempla in anatomicis occurrunt, ubi per experimenta vasa latentia eorumque insertiones in apicum producuntur. Videbimus alia in philosophia experimental.

## §. 770.

*Modus observandi quando describendus.*

*Si modus observandi singularis fuerit lectori minime perspetus; cum una exponi convenit.* Ratio prorsus eadem, quæ theorematibus præcedentis.

Exempla apud Astronomos occurrunt: nec desunt alia in Physica. Observationes quoque microscopice modum subinde singularem postulant, quo objecta vel præparantur, vel ad microscopia applicantur. Quodsi modus observandi accurate describitur, exinde petere licet argumenta de veritate observationis, quamdiu assensus præbendus ob alterius auctoritatem.

## §. 771.

*Quanam in condenda historia naturali tenenda circa scientiarum principia.*

*Historiam naturalem conditurus ea fini, ut animum lectoris imbuat principiis, quibus in ratiociniis de rebus naturalibus habemus opus, 1. judicia intuitiva formet (§. 669.), eaque determinata (§. 320.), modos ab attributis & essentialibus, quantum datur, distinguens (§. 672. & seqq.). 2. Distinctas eorum, quæ in objectis observantur, notiones consequi studeat (§. 678.), differentiis, quæ in diversis occurrunt, cum cura annotatis.*

3. In

3. In causas latentes eorumque concursum inquireat (§. 727.), factis, sicubi opus fuerit, experimentis adhibitisque microscopiis, quibus latens in apicum producitur. 4. Definitiones & judicia universalia condant (§. 679. 705.), summopere tamen sibi cavens, ne sua de iis, quæ observat, judicia cum observatione confundat.

Ex historia naturali petiturus principia, quibus utatur in scientia condenda, desiderat vel notiones specierum, ut deinceps generum aliarumque specierum notiones inde deriventur (§. 710. 714.), vel definitiones, ut inde aliæ propositiones colligantur (§. 724.), vel denique propositiones, quibus tanquam ratiociniorum præmissis utatur (§. 724. 725. 727. 728.). Enimvero notiones generum atque specierum condi nequeunt, nisi præsupponantur notiones illæ distinctæ, quæ ab experientia hauriuntur (§. 710. 714. 88.) ac inprimis differentiæ rerum fuerint perspectæ (§. 72.). Neque definitiones condere licet eorum ope, quæ observavimus, nisi modos, attributa & essentialia accurate distinguere noverimus (§. 731.). In ratiociniis non esse locum nisi judiciis determinatis, Dictum de omni & nullo, ratiociniorum fundamentum (§. 353.), probat (§. 348.). Quoniam vero fieri potest, ut sibi experiri quis videatur, quod minime experitur (§. 667.), ac præterea in formandis judiciis de rebus perceptis a vero aberrat; de veritate judiciorum judicari nequit, si quis sua de iis, quæ observat, judicia cum observatione confundit. Ex his igitur omnibus simul perpenſis liquet, si historia naturalis ea fini conscribenda, ut animus lectoris principiis imbuatur ad ratiocinia de rebus naturalibus formanda proficiuis, ea observanda esse, quæ modo præcepimus.

Historiæ naturalis præclara exempla dedit vir in hoc studiorum genere eminens *de Reaumur*, in Commentariis Academiæ Regiæ Scientiarum, qui ab ejusdem Secretario *Fontenellio* cum illius Historia quotannis eduntur. Si quis ea attenta mente pervolvere studuerit, eadem regulis nostris conformia deprehendet.

## §. 772.

*Quomodo ex-  
perimenta  
describenda.*

*Experimenta descripturus* 1. instrumenta describat, quibus ad experimentum capiendum utitur, ut inde iudicium ferri possit, quantum eidem sit habendum fidei: 2. Singulas actiones experimentatoris iusto ordine enumeret, ex eadem ratione: 3. singula quoque phaenomena, quæ sese spectanda offerunt, recenscat: 4. propositiones, quæ inde stabiliri possunt, eruat. Ita nimirum nihil eorum prætermittetur, quod usui esse potest vel de veritate propositionis experimento stabilitæ iudicatio, vel eodem ad amplificandum scientiam usuro. Prius patet, ex fidei requisitis (§. 613. & seqq.); posterius ex iis, quæ ad stabiliendam propositionem præcedentem dicta sunt (§. 771.).

Exempla huc spectantia reperire licet in *Ottonis de Guericke* Experimentis novis Magdeburgicis & *Roberti Boyle* operibus, quæ in compendium nuper misit atque in ordinem redegit vir de arte salutari & scientia naturali bene meritus *Petrus Schaw*. Nos in philosophia experimentalis iisdem regulis, quas aliis commendamus, satisfacere studemus. Inprimis id agimus, ut palam fiat, quomodo cognitio naturæ historica cum scientifica capiat incrementa, ita ut sibi mutuas operas continuo præstent.

## §. 773.

*Historia ar-  
tis ad ingene-  
randum ani-  
mo rerum ar-  
tificialium  
ideas conden-  
da.*

*Historiam artium conditurus ea fini, ut animo lectoris rerum artificialium notiones ingeneret* (§. 754.), 1. objecta, quæ describit, accuratissime delineata æri incidi curet, ut descriptionem legens oculos in rei imaginem convertere queat quasi coram intuiturus, quæ eidem insunt. 2. Cum opera artis sint ex partibus vel continuis, vel contiguis certo modo inter se connexis composita, partes singulas sigillatim describat & modum, quo inter se connectuntur, distincte explicet: Quod si quædam in iis discernenda in oculos non incurrunt, partes integras a toto avulsas sigillatim delineari & æri incidi curet. 4. Partes majores, ubi ex aliis minoribus constant, in easdem resolvat & singulas eodem modo describat atque, si opus fuerit sigillatim deli-



delineatas æri incidi curet. Singularum partium describat materiam, figuram, rationem ad totum, vel ad partes alias, colorem superficiei inductum & si qua alia observabilia ulterius occurrunt. Ita nimirum lectoris animo ingenerabitur notio distincta & adæquata operis (§. 682. 683.), ita ut artis peritus idem efformare queat juxta ideam animo conceptam.

Exempla præbent descriptiones instrumentorum, quibus utimur ad experimentandum, in philosophia experimentalis olim exhibendæ, quales in operibus Germanicis jam dedimus. Theatra quoque machinarum conditurus in describendis machinis eadem observare tenetur; alias enim nec artis peritus juxta ideam ex libro haustam machinam condere valebit, nisi ex proprio ingenio supplere noverit, quæ in idea deficiunt.

## §. 774.

Quoniam rationes magnitudinum per numeros determinantur; si singularum partium dimensiones in mensura quadam data assignentur, earum cum inter se, tum ad totum ratio patet. *Ratio dimensionum quomodo determinanda*

Idem nos facere suevimus in describendo apparatu ad experimentandum requisito. Vulgo operibus artis v. gr. machinis æri incisis apponitur mensura, ad quam singularum partium dimensiones, quæ in imagine non variantur atque in eadem exprimi possunt, examinandæ. Enimvero cum charta madore confecta, dum schema eidem imprimitur, dilatetur; ubi vero denuo exsiccat, contrahatur: linearum longitudo variari solet. Præstat igitur descriptioni addi numeros.

## §. 775.

Quodsi materia vel corporis artificialis totius, vel saltem unius alteriusve partis fuerit mixta; in descriptione ejusdem *Mixta quomodo describenda.*  
1. enumerandæ sunt materiæ simpliciores, sive naturales, sive artificiales, quæ mixtionem ingrediuntur. 2. Indicandæ sunt rationes singularum partium ad se invicem. 3. Declarandus est modus mixtionis. Hac enim ratione mixti distinctam consequemur notionem, cum singula recensita fuerint, quæ in mixto qua tali distingui possunt (§. 682.), consequenter conditor historiæ artium scopum, quem intendit, consecutus est.

E. gr. Pulvis pyrius est corpus artificiale mixtum. In Pyrotechnia idem descripturi enumeramus materias, ex quibus inter se commixtis paratur, nitrum, sulphur & carbones. Docemus proportionem, quam habent hæc miscibilia ad se invicem pro diversitate efficaciarum, quam in pulvere pyrio requirimus. Describimus denique modum, quo mixtio perficitur, ut tandem prodeat corpus mixtum. Nemo non videt in descriptione quoque corporum naturalium mixtorum idem fieri debere. Enimvero in natura rerum mixtiones admodum absconditæ sunt & licet multo labore in easdem a multis seculis inquisiverint Chymici & Alchymistæ, hætenus tamen naturaliter mixtorum non eas habemus notiones, quæ mixtis ad arbitrium producendis sufficerent, quales de arte mixtis habemus.

## §. 776.

*Historia artium ad earum notionem animo ingenerandam condenda.*

*Artes ipsas descripturus ea fini, ut earum notionem animo lectoris ingeneret*, 1. singulas recensere debet operationes, quæ ad perficiendum aliquod opus artis requiruntur, & si ex pluribus actionibus consistent, eas eodem modo in easdem resolvere debet, quo partes in alias minores resolvimus in compositi descriptione (§. 773.). 2. Instrumenta, quibus ad singulas actiones opus habet artifex, describat eadem cura, qua artis opera describi convenit (§. cit.), cum utique sint corpora artificialia, seu opera arte parata, atque 3. accurate delineata affabre æri incidi curet. 4. Instrumentorum usum in perficiendo opéra distincte exponat. Quod enim hac ratione consequamur artis ipsius notionem distinctam, partim ex notionis distinctæ (§. 88.), partim ex artis ipsius definitione liquet, quæ hic nobis est habitus corpus artificiale producendi.

Exempla præbere possunt accuratæ descriptiones operationum chymicorum, quibus aliquod arte mixtum paratur. Occurrunt quoque exempla aliquot in Architecturæ civilis & Pyrotechniæ elementis, quæ in Matheseos opere Latino extant.

## §. 777.

*Quomodo historia artium condenda, ut supple-*

*Historiam artium conditurus ea fini, ut animum lectoris imbuat principiis, quibus in ratiociniis de rebus artificialibus habet opus*, 1. indicet fines uniuscujusque operis artificialis, si plures

res habuerit, vel præter finem ab inventore aut artifice intentum alii deinceps accesserint, vel accedere possint usus. 2. Distinctas eorum, quæ in objectis observantur, communicet notiones, quantum datur, perinde ac in casu præcedente (§. 775.). 3. Singularum partium, tam majorum, quam minorum, ex quibus ista componuntur, explicentur rationes finales, immo omnium, quæ circa singulas observantur, rationes reddantur, vel ab artifice perito addiscendæ, vel ex ipso opere deducendæ. 4. Instrumentorum quoque usus, additis & illorum, & hujus rationibus, declaretur. 5. Et singulis una satisfiat præceptis, quæ in condenda historia artium ad earum notionem animo ingenerandam requiruntur (§. 776.). Hac ratione animus lectoris imbuetur principiis ad judicia de rebus artificialibus formanda necessariis.

*ditet principia judicandi de operibus artis & arte ipsa.*

De operibus artis judicaturus inquit, num opera artis, instrumenta, quibus utuntur artifices, ipsæque artes sint perfectæ, an vero alicubi deficient, & medicatricem requirant manum. Ostendemus autem in Ontologia, perfectionem artis cujusunque ex eo judicari, si particulares rationes tendant ad finem eundem generalem. Quod si ergo intelligas finem totius operis singulosque ipsius usus atque fines singularum partium singulorumque circa eas observandorum; inde judicare licebit, num singula habeant suas rationes finales & num rationes finales particulares tendant ad generalem, an eidem adversentur; consequenter num opus sit perfectum, an vero adhuc defectibus vel nævis laboret. Idem eodem modo de instrumentis, quibus utuntur artifices, ipsæque arte patet.

Historia istiusmodi artium adhuc desideratur, neque adeo mirandum, quod careamus artium scientia, quæ inde pendet.

### §. 778.

*In historia civili, ecclesiastica & literaria sedulo cavendum, ne historicus sua de facto judicia cum facto ipso confundat, de facto cum seu recensio facti suum de eo judicium substituat.*

Aaaa 2

*Cur judicia facti non confundenda*

enim est recensere facta (§. 744.). Ejus autem de facto judicia cum non sint factum ipsum, quod per se patet; hæc eidem qui substituit, minime agit quod est historici.

Neminem fore arbitror, qui non absque probatione instar axiomatis propositionem præsentem largiatur: nec tamen facile quisquam negaverit, historiarum conditoribus nihil magis solenne esse, quam ut in regulam evidentissimam impingant. Neque adeo facile est evitare has deviationes, præsertim cum affectibus nihil dare possit historicus nisi ad eas delatus. Dedi jam in superioribus exemplum, cum de fide digno teste meam exponerem sententiam (not. §. 620.): etenim communes quoque in vita relationes huic nævo quam sapissime obnoxie sunt. Qui historicorum scripta evolvere dignatur atque eo, quod ad præsens negotium requiritur, acumine non destituitur; is largam exemplorum legetem ubivis deprehendet.

### §. 779.

*Historica civilis in usum Politicæ condenda.*

*Historiam civilem conditurus ea fini, ut dogmata politica inde confirmentur ac principia prudentiæ civilis hinc deriventur;*  
 1. statum Reip. quovis tempore, aut sub quovis imperante distinctissime describat, quoad singula capita, quæ in Politica pertractari convenit, atque a nobis pertractari solent. 2. Describantur media, quibus flos Rerump. fuit conservatus, nec non 3. impedimenta, quæ eidem obstitere, una cum causis, ob quas imminutus ac perditus. 4. Inprimis fideliter recenscantur molimina summorum imperantium una cum eorum eventu. Hac ratione ubi conscripta fuerit historia, finem intentum te consequi posse dubium nullum superest.

Etenim in Politica docemus, quinam status Reip. bene constitutæ esse debeat & quibusnam mediis sit conservandus ac collapsus instaurandus. Quamobrem si diversus Rerump. status, qualis hoc, vel isto tempore fuerit, accurate describitur, una cum mediis, quibus floridus evasit, atque impedimentis, quæ eidem obstitere, nec non causis eum depravantibus; dogmatum politicorum gnarus judicabit, quinam iisdem conformis fuerit, quinam ab illis abhorreat, consequenter eidem hinc

con-

constabit, quanam dogmata experientia corroborentur, quanam eidem repugnent. Sufficiet itaque historia ad dogmatum politicorum examen instituendum. Dum vero ulterius patet, quibus mediis flos Reip. debeat, quibus de causis fuerit depravatus; Politicam quoque novis dogmatis augebit, qui propositiones determinatas formare didicit. Denique si molimina summorum imperantium una cum eorum eventu describantur; quid prudenter ab iis factum, quid per imprudentiam peccatum, constabit; consequenter historia methodo præscripta consignata prudentiæ regulas ei suppeditabit, qui in formandis judiciis determinatis versatus. Similiter ubi mediteris media, quibus Reip. flos debetur, una cum ejus impedimentis atque causis deperditi; eadem, quam modo requisivimus, facultate instructus plures hinc prudentiæ regulas derivabit: id quod nemo in dubium vocabit, qui prudentiæ notionem intuetur, suo loco a nobis distinctius explicandam.

Quæ hic ex Politica de statu Reip. supponimus, ex *Thümmigii* Institutionibus philosophiæ peti possunt, donec olim opus politicum Latini lucui publicæ exposuerimus. Similiter nostram prudentiæ, quam hic intueri jubemus, notionem vide sis apud eundem *Thümmigium* in Institut. tom. 2. §. 198. *Phil. moralit.* Obiter hic annotamus historicum prudentiæ civilis probe gnarum esse debere, ut norit non modo momenta rerum distinguere, verum etiam ad circumstantias observatu necessarias attendat. Quod si politicæ ignarus fuerit, sapissimè accidit, ut momenta rerum minus accurata lance ponderans omitat, quæ maxime erant recensenda, & contra narret, quæ tuto poterant ignorari.

### §. 780.

*Historiam civilem ea fini conditurus, ut jura summorum imperantium decendantur*, describere imprimis debet 1. ortus imperiorum atque regnorum; 2. modum, quo imperantes summam potestatem in hac, vel ista regione consecuti; 3. matrimonia summorum imperantium; 4. pacta & conventa cum statibus & 5. foedera atque instrumenta pacis. Hos enim esse fontes,

Aaa a 3

tes,

tes, unde jura summorum imperantium derivantur, ex principiis politicis probari potest.

Me non monente apparet, utrumque finem simul intendenti observanda esse, quæ utriusque gratia (§. 779. 780.) præcipimus.

§. 781.

*In historia ecclesiastica condenda quam observanda.*

*Historiam ecclesiasticam conditurus ea fini, ut dogmata de regimine ecclesiastico inde confirmari ac prudentiæ ecclesiasticæ præcepta hinc derivari queant, 1. describere tenetur statum ecclesiæ, qualis omni tempore fuerit; 2. media, quibus flos ejusdem obtentus fuit ac conservatus; 3. impedimenta, quæ eidem obstiterunt, una cum causis, ob quas imminutus fuit atque perditus; 4. mutationes singulas, quæ acciderunt, inprimis etiam circa dogmata & mores gregis christiani. Hac enim ratione ab eo, qui principiorum politicorum de regimine ecclesiastico fuerit gnarus & propositiones determinatas formare didicit, dogmata de regimine ecclesiastico in politicis tradita confirmari posse atque locupletari, immo varias quoque prudentiæ regulas erui; eodem modo patet, quo paulo ante ostendimus historiæ civilis similem usum (§. 779.).*

Usui hic sunt historico, quæ de cura summorum imperantium circa virtutes intellectuales atque morales, nec non circa cultum divinum in politicis præcipiuntur, petenda interea ex *Thümmigii Institutionibus politicæ*, quæ tomo secundo institutionum philosophiæ *Wolfianæ* leguntur, donec a nobis singula uberius explicata tradantur in opere politico latino sermone edendo. Ceterum apparet denuo, historicum prudentiæ civilis præceptis imbutum esse debere, neque ullum superest dubium, fore, ut momenta rerum accuratius ponderet, ubi inimiorem politicæ cognitionem sibi comparaverit.

§. 782.

*In historia privata condenda quam sint tenenda.*

*Historiam privatam conditurus ea fini, ut dogmata moralia inde confirmantur ac prudentiæ private principia hinc deriventur, 1. describat quam distinctissime singulas hominum actiones ex habitu vel virtutis, vel vitii prognatas. 2. Exponat facta, quæ istas fuere comitata. 3. Inprimis annotet sollicita cura, quæ*

quæ statum animi ob actiones atque fata produnt. Etenim principiorum moralium probe gnarus hinc facile colliget, quæ ad confirmandum notiones virtutum & vitiorum atque actionum liberarum honestatem & turpitudinem intrinsecam profunt; colliget hinc media ad virtutem perveniendi & impedimenta quæ iisdem contrariantur, & ex casu alieno discens, quæ sub his, vel istis circumstantiis singularibus opportune fiant, prudentiæ regulas formabit.

Quæ hic ex moralibus præsupponuntur, interea ex *Thümmigii* Institutionibus moralibus, quæ tomo posteriore Institutionum philosophiæ *Wolfrani* leguntur, petenda sunt, donec opus nostrum morale sermone Latino conscribendum prodierit. Obiter moneo, hinc apparere, quod historicus philosophiæ moralis principiis imbutus esse debeat, quodque in historia privata condenda tanto exquisitiora dare possit, quanto intimiorem illius cognitionem habuerit. Tenendum vero imperantem quoque spectari posse instar personæ privæ, quatenus nimirum his, vel istis donibus animi & corporis præditus. Quamobrem quæ de historia privata condenda præcipiuntur, observanda etiam sunt ab eo, qui historiam civilem consignans personam imperantis atque eorum, qui maneribus publicis præficiuntur, describit, cum virtutes animique ac corporis dotes in ipsum regimen influant.

## §. 783.

*Historiam sive civilem, sive ecclesiasticam, sive privatam ea fini conditurus, ut leges providentiæ divinæ inde agnoscantur, inprimis 1. annotare debet, quæ circa rerum eventus non consilio, sed fortunæ vulgo tribuuntur, & 2. fata Rerump. ecclesiæ hominumque in singulari spectatorum cum eorum actionibus sedulo recensere tenetur. Etenim in Methaphysicis demonstramus, nexum rerum in universo summa Dei sapientia esse constitutum ex principio convenientiæ. Illam igitur convenientiam scrutaturus & regulas providentiæ divinæ eruturus fata Rerump. atque ecclesiæ cum consiliis imperantium eorumque factis, nec non fata hominum in singulari spectatorum cum eorum actionibus conferre tenetur. Quamobrem si historia huic*

*Historia condenda legum providentiæ divinæ agnoscendarum gratia.*

huic fini respondere debet, utique observanda sunt, quæ hic a nobis præcipiuntur.

Quæ ex methaphysicis hic supponuntur, interea legi possunt in Institutionibus methaphysicis *Thümmigii*, quæ extant tomo priore Institutionum philosophiæ *Wolfsianæ* donec opus nostrum metaphysicum prodierit, unde plenius omnia haurire licebit. Obiter moneo, hinc patere, quod historicus, quædam etiam Metaphysicæ principia utiliter sibi familiaria reddat, si vel maxime non consideremus, quantum ipsi ad principia moralia & politica, quibus instructus esse debet (§ 779. & seqq.). Metaphysicæ principia prosint. Ceterum jam olim Poëtæ atque Philosophi, qui sententias nobis dederunt, varias istiusmodi regulas collegerunt. E. gr. Pertinet huc illud: *Raro deseruit scelestum vindicta*. Nec minus huc spectat istud Poëtæ: *Per quod quis peccat, per idem punitur & idem*.

#### §. 784.

In historia  
literaria  
condenda  
quid obser-  
vandum.

*Historiam literariam conditurus ea fini, ut constet, unde petenda sit veritatum jam inventarum cognitio*, recensere debet 1. scripta, quæ hoc vel isto tempore de singulis argumentis prodire. 2. Indicare tenetur argumenta particularia, quæ in scriptis auctorum pertractantur. 3. Annotet opus & methodum, qua in explicandis & probandis dogmatis autor usus, si scripta fuerint dogmatica, vel quem tenuerit in scriptis historicis ordinem: quo spectant ea omnia, quæ paulo post de libris dijudicandis præcipiemus. Inprimis autem 4. caveat, ne sua de facto judicia cum factis alterius confundat (§. 778.). Quoniam enim hac ratione lectori innotescit, quænam prostant in quolibet scientiarum & artium liberalium superiorumque, quas vocant, facultatum genere scripta, quænam in singulis scriptis & qua accuratatione pertractentur; nec is ignorare potest, unde petenda sit cognitio eorum, quæ nosse desiderat.

Facile hinc apparet, historiam literariam condere non posse, quæ scopo satisfaciatur, nisi eum, qui in scientia illa vel arte, aut facultate etiam superiori, optime fuerit versatus. E. gr. Qui historiam literariam Algebræ conscribere avert, is argumenta particularia scriptorum, quæ in hoc genere prostant, recensere atque methodum, qua usi fuere, descri-



describere haud quaquam poterit, nisi Algebram calleat. Eodem modo anatomiae ignarus historiam anatomicam, quae scopo praesenti satisfaciatur, minime conscribet. Optime igitur historiae literariae confuleretur, si ad eam conscribendam animum appellerent viri scientia vel arte praestantes, de qua commentari constituerunt. Etenim in casu opposito accidit, ut autoribus affingantur sententiae a mente ipsorum quam maxime alienae; ut commendentur libri scopo, quem lector intendit, minime satisfaciunt; ut iudicia ferantur de scriptis a veritate abhorrentia, cum autores alienis oculis videntes dubiae famae atque affectui plurimum tribuant. Exemplis haec confirmari non est opus. Expertus loquor, quamvis mallet loqui non expertus: miseret enim me hominum, qui cum laude sua frui possent, turpiter sese dare solent intelligentibus virtutisque haud iniquis aestimatoribus. Dedit systema, quod e diametro oppositum *Spinosiano* contingentiam universi & differentiam inter necessitatem hypotheticam atque absolutam demonstrativa ratione adstruit atque omnes omnino hominum actiones liberas per ipsa attributa divina ita determinare docet, ut singulae fiant ad gloriam Dei; quod Deum a conceptibus tyrannicis liberatum sistit tanquam ens amore maxime dignum, ita ut ipsae poenae positivae ex hoc fonte fluant. Agnoscunt hoc intelligentes, viri cordati, a partium studio alieni, cum Germani, tum exteri, quibus, quae Latine scripta sunt, ad manus pervenire, testibus literis, quas penes me habeo. Hoc tamen non obstante adversarii mei continuo vociferantur, me fatalem omnium rerum necessitatem introducere; animam mechanismi legibus subicere; principia moralia tradere, quae ad atheismum ducant; ex Deo decernente tyrannum facere & quae sunt alia scommata ejusdem farinae plura. Quoties haec cogito, non possum non in eam abire sententiam, quod omnia insulsa, quae de veteribus philosophis circumferuntur, ipsis affingantur, quamdiu probabiliter ostendi potest, quomodo captum vulgi eruditorum superantia in perversum sensum trahi potuerint.

## §. 785.

*Historiam literariam ea fini conditurus, ut principia ad locupletandam artem inveniendi proficua suppeditet*, I. vitas auctorum describat & in iis fideliter exponat, quo in loco fuerint nati, qua educatione & qua informatione usi, quibus praceptoribus sive vivis, sive mutis profecerint &, si qua alia praeterea fuerint, quae ad studiorum & morum formationem quicquam

*Historia literaria condenda in usum artis inveniendi.*

(Wolffii Logica) Bbbb con-

conferre potuere. 2. Describat etiam statum rei literariæ, quo tempore autores vixerunt (§. 784.), una cum statu ipsorum autorum. 3. Sollicite annotet inventa, quæ anterioribus veritatibus quovis tempore accesserunt & qua ratione jam ante inventa ulterius fuerint perfecta, ut dubia abierint in certa, errores in veritatem. 4. Enarret quoque fata dogmatum, vel veritatum recens inventarum & fata inventorum. Hac enim cognitione instructus historia literaria utetur ad locupletandam artem inveniendi.

Nimirum veritatem latentem eruere non licet nisi ex aliis cognitis (§. 738.). In modum igitur inquisiturus, quo veritas aliqua in apicem fuerit producta, nosse debet veritates, quibus inventor usus in ratiociniis suis tanquam præmissis. Quodsi igitur statum rei literariæ habuerit perspectum, qualis fuerit illo tempore, quo vixit; eidem patet, quænam veritates illo tempore fuerint cognitæ ac pervulgatæ. Quodsi ulterius constiterit locus, quo inventor vixit, & qua institutione fuerit usus, quos legerit libros; inde colligere datur, num veritates illo tempore jam inventæ eidem innotuerint. Et quoniam notiones atque judicia fundamentalia a posteriori derivantur (§. 669. & seqq.); ex biographia inventoris judicare licebit, quænam eidem a posteriori innotuerint. Datis igitur veritatibus, quibus instructus fuit alter, qui veritatem aliquam detexit vel errorem emendavit; artificiorum heuristicorum, qualia in superioribus (§. 669. & seqq. & §. 710. & seqq.) dedimus, non ignarus & in meditando versatus modum deteget, quo veritas latens fuit detecta, sicque vel ars inveniendi locupletabitur novis regulis, vel regulæ, quæ jam prostant, confirmabuntur. Quoniam vero ad veritatem inveniendam non sufficit nosse veritates, unde illa deducitur, & compotem esse artis inveniendi, quæ in præsentī casu satisfacit, verum præterea requiritur, ut ansa inventori suppeditetur appellendi animum ad veritatem investigandam; ideo necesse est, ut præter biographiam nobis  
etiam

etiam perspecta sint fata cum dogmatum, seu veritatum inventarum, tum ipsorum quoque inventorum eas in lucem proferturum. Patet itaque historiam literariam fini intento satisfacere, si ea ratione fuerit conscripta, quam hic commendamus.

Hinc vero denuo patet, historicum fini huic satisfacturum illarum disciplinarum atque artium, quas describendas sibi sumsit, optime gnarum esse debere: immo patet ulterius, ipsum quoque artis invenendi compotem esse oportere, ne in annotandis iis negligentior sit, quæ scopum apprimè feriunt. Quoniam huc usque desiderantur historiæ hac ratione conscriptæ; inventi alicujus historiæ exempli loco proponere libet. Ponamus e. gr. contexendam esse *historiolam constructionis æquationum algebraicarum determinatarum per combinationem duorum locorum*. Monumenta literaria, quæ nobis prostant, consulentes & ad præcepta nobis data animum advertentes talem condimus. *Platonis ævo Delii* remedium contra pestem quærentibus ab oraculo proponebatur problema de duplicando cubo. *Hypocrates Chius* ex mercatore naufrago Geometra factus istud reduxit ad problema de duabus mediis continue proportionalibus inter duas datas inveniendi. Cum igitur hoc problema omnium Geometrarum ingenia exerceret, *Menechmus* usus notissimis principiis ex Elementis Conicis peritis per intersectionem duarum parabolarum idem solvit. Cum enim esset ex hypothese  $AB: EF = EF: GH$  &  $EF: GH = GH: CD$ , vi elementorum intulit, esse  $EF^2 = AB \cdot GH$  &  $GH^2 = EF \cdot CD$ . Ex Conicis igitur intellexit, si  $AB$  sumatur pro parametro parabolæ, fore  $EF$  semiordinatam &  $GH$  ei respondentem abscissam, & si  $CD$  sumatur pro parametro alterius parabolæ, fore  $EF$  abscissam &  $GH$  ei respondentem semiordinatam. Iunctis igitur  $SL$  &  $SN$  ad angulos rectos, circa axem  $SL$  linea datarum una  $AB$  tanquam parametro descripsit parabolam  $SMR$  & circa axem  $SN$  linea data altera  $CD$  tanquam parametro parabolam  $SMO$ , atque ita obtinuit  $PM$  sive  $SQ$  ipsi  $EF$  &  $SP$  sive  $QM$  ipsi  $GH$  æqualem, consequenter duas medias continue proportionales per intersectionem duarum parabolarum determinavit. Cum *Cartesius* inventa Arithmetica literali curvarum algebraicarum definitiones ad æquationes algebraicas, perinde ac problemata algebraice solvenda reducere docuisset; *Renatus Shusius* vocans  $AB = a$ ,  $CD = b$ ,  $EF = x$ ,  $GH = y$ , obtinuit  $x^2 = ay$  &  $y^2 = bx$ . Quoniam itaque eidem evidens erat, problema solvi per constructionem duarum æquationum localium, seu locorum primi generis; ex condi-

Fig. 14.

Fig. 14 &amp; 15.

tione problematis eruit æquationes locales alias ejusdem generis atque duobus locis rite combinatis, quemadmodum a *Menechmo* factum fuerat, incidit in methodum generalem problemata ad æquationes algebraicas redacta construendi per combinationem duorum locorum. Expofuit itaque methodum construendi æquationes cubicas & biquadraticas per combinationem duorum locorum primi generis in *Mesolabo*, primum more veterum, celatis artificijs analyticis. Mox novam dedit editionem, cui adjecit partem alteram, in qua analyfin fideliter proponit. A. 1679. *Philippus de la Hire* illam æquationum constructionem in gratiam tyronum clarius explicavit in exiguo tractatugallice confcripto, quem *Novis elementis de sectionibus conicis & locis geometricis* subjunxit: quod idem fecit *Otanam* in *Tractatu de locis primi generis* idiomate patrio A. 1687. edito, cui subiungitur *Tractatus de constructione æquationum*. Postquam *Johannes Craigius* Scotus in *Tractatu mathematico de figurarum curvilinearum Quadraturis & locis geometricis*, qui Londini 1693. prodit, formulas generales pro locis solidis proposuerat; *Marchio de l'Hospital* eorum usum in construendis æquationibus cubicis & quadraticis ostendit in *Tractatu analytico de sectionibus Conicis*, qui post fata viri de rebus geometricis præclare meriti Parisiis 1707. lucem publicam adspexit. Nos methodum *Shustanam* per formularum generalium usum mire facilitatam planissimam effecimus in *elementis Algebrae* cum Latinis, tum Germanicis, ut a tyrone citra difficultatem addisci eadem possit. Ecce tibi specimen historiae literariae, quod brevitati studentes rude, nec exasceratum dedimus. Ex hoc ipso autem specimine satis apparet, historiolum hunc ne intelligi quidem, nedum concinnari posse nisi ab eo, qui rerum algebraicarum peritus fuerit. Neque attentione sufficiente usus dubitabit, eodem modo sese rem habere, si quodcunque aliud argumentum proponatur. Obiter moneo, ne quis historiolum nostrum erroris redarguat, me satis esse persuasum, quod *Cartesius* viam illam *Shusti* analyticam construendi æquationes per combinationem duorum locorum ignoraverit. Aliis enim luminibus usus est ad regulam suam inveniendam. Sed de his dicere non est hujus loci. Nullus aurem dubito fore, ut a præjudiciis alieni historiae literariae hac lege confcriptæ utilitatem abunde perspiciant.

## §. 786.

*Usus logica  
potissimus in  
condenda hi-  
storia.*

Quoniam in omni historia describuntur nonnisi talia, quæ facta sunt (§. 744.); *Logica in condenda historia hunc potissimum præ-*

*præstat usum, ut doceat formare notiones eorum, quæ facta sunt, distinctas, quantum scilicet sufficit, ut lector mentem historici assequatur, & judicia determinata (§. 669. 682.).*

Logica præscribit regulas generales dirigendi intellectum in veritate cognoscenda. Quamobrem qui eas ad usum transferre debet in historia condenda, is principiis aliarum disciplinarum simul esse debet instructus, unde ipsi innotescit, ad quænam potissimum respiciendum sit, ubi notiones distinctæ atque judicia determinata formanda. Atque ea ratio est cur in superioribus commendata fuerint nunc dogmata politica (*not. §. 779.*), nunc moralia (*not. §. 779.*), nunc physica (*not. §. 775.*) & ita porro. Omittimus alia, quæ utiliter moneri adhuc poterant, si ad specialia descendere liceret: nobis enim nunc constitutum est nonnisi universalia tradere.

## CAPUT III.

## DE

## CONSCRIBENDIS LIBRIS DOGMATICIS.

## §. 787.

**A**utor libri dogmatici historici non intendit, nisi ut lector intelligat dogmata & ad summum norit argumenta, quibus ad eadem probanda utuntur. Patet per definitionem libri dogmatici historici. Etenim in libro dogmatico historico dogmata tantum recensentur & ad summum argumenta, quibus ea probantur, indicantur (§. 751.). Quodsi igitur dogmata tantum recensentur, lector omni diligentia & attentione adhibita in legendo libro nil efficiet, quam ut dogmata intelligat: probatione enim cum destituantur, veritatem eorum perspicere nequit. Autor adeo finem alium intendere nequit, quam quem consequi licet, scilicet ut lector dogmata proposita intelligat.

*Finis librorum dogmaticorum historicorum.*

Quodsi argumenta præterea indicat, quibus dogmata probantur, eadem autem minime evolvit; per se patet, lectorem saltem lectione libri sibi comparare notitiam historicam argu-

mentorū , ut norit , quibus ad probandum dogma utantur. Et inferius constabit , eum de veritate dogmatis convinci non posse , nisi argumentis evolutis , eo quidem modo , quem superius in delineanda demonstrationum forma (§. 551. & seqq.) proposuimus. Immo qui formam demonstrationum ibi delineatam contemplatur , statim perspiciet , si argumentum non evolvatur , nunc formam concludendi non apparere , nunc sumi tanquam certa , de quorum veritate nobis nondum constat. Autor igitur denuo finem alium intendere nequit , quam quem consequi licet , scilicet ut lector historicam sibi compareret argumentorum notitiam , quibus ad probandum dogma utuntur.

Duplicem habent scripta istiusmodi usum. Nimirum qui hebetioris sunt ingenii , quam ut veritatem demonstrativam vel probabiliter aliarum ope adstructam capere possint , memoriæ inde mandant veritates in vita utiles easque data occasione ad usum transferre valent : ii vero , quibus major obtigit ingenii acies , lectione istiusmodi scriptorum ad lectionem scientificorum præparantur , ut , dum termini ac propositiones ipsis jam sunt familiares , facilius atque celerius progrediantur , cum multum omnino temporis requiratur , antequam termini & propositiones familiares evadunt. Immo iidem eadem lectione ad cognitionem scientificam inflammantur , vique sui damnati maiorem , quam alias futura erat , voluptatem ex ea percipiunt atque ideo stimulos ad ultiores progressus sentiunt. Minime igitur scripta dogmatica historica damnamus , utur eadem scientificis longe postponamus. Suum cuique ex æquo statuimus pretium veritatis unico amore ducti , nec animi passionibus quicquam dantes.

### §. 788.

*Scriptum dogmaticum historicum quomodo condendum.*

*Scriptum dogmaticum historicum conditurus* 1. terminos singulos accurata definitione explicet , nisi iisdem vulgo respondeat notio confusa quidem , sed fixa tamen : 2. propositiones determinatas condat : 3. si ita visum fuerit , argumenta enumeret , quibus ad eas probandum utuntur , immo discrimen annotet , quod inter ea intercedit : 4. in uno loco congerat , quæ

quæ ad idem subjectum spectant. Dico hac ratione autorem scopo suo satisfecisse.

Etenim autor scripti dogmatici historici intendit, ut lector dogmata, quæ proponit, intelligat & ad summum argumenta norit, quibus ad ea probanda utuntur (§. 787.). Quamobrem cum lector mentem autoris intelligere nequeat, nisi auditis vocibus easdem in se notiones excitare valet, quæ cum terminis propositionem ingredientibus conjunguntur (§. 117.); nisi termini, cui notio confusa respondet, significatus fixus sit (§. 127.), accurata definitione idem explicandus (§. 152.). Cumque dogmata, quæ memoriæ mandantur, ad usum vitæ transferenda sint, quemadmodum modo annotavimus (not. §. 787.), nec negaverit, qui in futuram oblivionem nihil cognoscere studet; a lusum vero vitæ transferri nequeant nisi ratiocinando (§. 48. 49.): propositiones determinatæ sint necesse est (§. 320. 348. & seqq.). Quod si lectorem docere quoque intendit autor, quod non gratis asseratur, quæ memoriæ mandare jubetur, argumenta enumerare debet. Cumque hac enumeratione cognitionis scientiæ desiderium instilletur (not. §. 787.) non inutile est discrimen argumentorum indicari, ut constet, de cujus evolutione quam maxime solliciti esse debeamus. Quoniam denique facilius meminimus eorum, quæ una memoriæ fuere mandata, scripta vero historica dogmatica non nisi memoriæ consulunt; igitur consultum est, ut, quæ de eodem subjecto tenenda sunt, eodem in loco tradantur. Patet adeo, autorem scripti dogmatici historici scopo suo satisfacere, siquidem regulas a nobis præscriptas in eodem concinnando observet.

Libri plerique dogmatici historici sunt, præsertim illi, qui in usum juventutis conduntur, ut adeo non opus sit problema præsens exemplo illustrari.

### §. 789.

Quoniam historica dogmatum cognitio in usum ratiocinandi comparatur, vel ad reddendam rationem nonnullorum, quæ

*Quenam in  
scriptis do-  
gmaticis hi-  
storici tra-  
denda.*

quæ sunt, vel ad praxes quasdam exercendas, cum nemo, qui sapit, dogmata sibi familiaria reddat, quorum nullum facere potest usum; *in scriptis historicis dogmaticis illæ inprimis propositiones explicandæ, quæ vel ad reddendam aliorum rationem, vel ad praxes nonnullas utiles sunt, omittis iis, quæ nonnisi illis demonstrandis inserviunt.*

E.gr. Si quis in Dioptrica nonnisi ad historicam ejus cognitionem lectorem deducere intendit; is tantum theoremata de focus lentium & imaginibus objectorum in iis formatis explicat, atque legem refractionis, qua nituntur, declarat; cetera vero theoremata, quæ ad illa demonstranda a mathematicis in medium afferuntur, omittit. Etenim qui illa theoremata novit, non modo lentibus opportune utitur; verum etiam variorum phænomenorum dioptricum rationem promte reddit, veluti cur lentes convexæ sint causticæ & nonnisi ad datam quandam distantiam ignem excitent. Qui praxin dioptricam exercent vitra polientes atque ex iis tubos, microscopia & alia instrumenta optica conficientes; iis historica ista theoriæ dioptricæ cognitio abunde sufficit: id quod & experientia loquitur, & ratio confirmat, cum demonstrationes hunc solum habeant usum, ut veritatis propositionum convincamur, nil autem eo conferant, ut propositiones sive ad reddendum aliorum rationem, sive ad praxes quasdam dextre applicentur. Atque adeo patet, historicam disciplinarum cognitionem non usu suo destitui, modo dogmata traduntur vera, etsi qui ea sola contentus esse jubeatur, veritatem illorum ipsemet non perspiciat, sed artificii in arte sua credat. Ne tamen autor scripti dogmatici historici adferat, quæ a veritate sunt aliena; ipsemet scientifica eorundem cognitione pollere debet, aut minimum certam a posteriori cognitionem sibi comparare tenetur, nisi fide eorum niti velit, qui artifices in arte celebrantur. Quæ de Dioptrica dixi, ad theologiam, jurisprudentiam, medicinam, philosophiam facile applicantur. Immo præstat lectori nonnisi historicam insinuare cognitionem veritatum a peritis assertarum, omittis demonstrationibus, quam demonstrationes, vel probationes tradere mancas, vel prorsus falsas. Etenim in priori casu novit lector, demonstrationem ab aliis dari posse, utut ipsemet eandem capere nequeat; in posteriori autem nevos in probanda thesi admissos perspiciens in dubitationem de ejusdem veritate adducitur atque sic tandem in scepticismum incidit. Manca autem  
pror-



aut prorsus falsa probatio cum assensum extorquere nequeat, nullius prorsus utilis est. Sed ea clarius patebunt inferius, ubi methodum convincendi alios proposituri sumus.

§. 790.

*Scriptum scientificum conditurus*, 1. terminos omnes definiat, qui vel definitiones alias ingrediuntur, vel quorum definitiones ingrediuntur demonstrationes tanquam præmissæ syllogismorum; nec absque definitione admittat alios, nisi quibus notio confusa fixum vindicat significatum (§. 127.). 2. Quodsi disciplina aliqua propositionibus alterius utitur tanquam principiis in suis adstruendis, atque adeo illam supponit; terminos inde mutuo sumtos minime definire tenetur, sed definitiones suo loco traditas jure supponit. 3. Definitiones eo ordine collocet, ut ex anteriori ponantur loco, quarum definita ingrediuntur definitiones alias, hæ autem loco posteriori. 4. Definitionibus non utatur tanquam principio demonstrandi, nisi earum realitate adstructa (§. 717. & seqq.). 5. Sine probatione propositionem nullam adsumat, nisi quæ indemonstrabilis (§. 263. 264.) & in axiomatum, vel postulatorum numero habetur (§. 268. & seqq.). 6. Propositiones omnes determinatas ponat (§. 320.), ita ut in categoricis subiecto absolute posito tribuatur prædicatum (§. 216), in hypotheticis autem conveniens adjiciatur subiecti determinatio (§. 228.). 7. Propositiones, quæ ex definitionibus, vel aliis jam demonstratis demonstrari nequeunt, aliis tamen demonstrandis inserviunt, a posteriori stabiliat (§. 705. 706. 707.). 8. Propositiones demonstrativas demonstratione vel ostensiva (§. 551. 552.), vel apogogica muniat (§. 553. 559.). 9. In resolutionibus problematum singula, quæ fieri debent, distincte enumeret, eoque ordine, quo fieri debent, sumtaque resolutione pro hypothese, ex ea problema demonstret (§. 552.), hoc est, ostendat factis iis, quæ præcipiuntur, fieri quod fieri debebat. 10. Omnes propositiones eo ordine collocet, ut præcedant, quæ

*In scripto  
scientifico  
condendo  
quamvis ob-  
servanda.*

sequentibus demonstrandis inserviunt. 11. Propositiones alibi demonstratas tanquam certas supponat, easque mutuo sumat, si quando iis habuerit opus. 12. Si qua obscuriora videri poterant, ea exemplis illustret & uberius declaret, & ubi opportunum visum fuerit, dogmatum præstantiam atque usum indicet, inventores laudet, artificia inveniendi revelet, rationem ordinis non satis manifestam reddat &c. Dico, qui hæc observaverit, scopo scripti scientifici satisfacere.

Etenim libri dogmatici dogmata demonstrant vel probant (§. 751.). Quoniam igitur propositiones vel a posteriori probantur (§. 705. & seqq.), vel a priori demonstrantur sive ostensive (§. 551. 552.), sive per indirectum (§. 553. 559.); scriptum scientificum conditurus, propositiones vel ostensive, aut per indirectum demonstrare debet, vel quas a priori demonstrare nequit, a posteriori adstruere tenetur. Quoniam vero in numerum principiorum demonstrandi non assumuntur nisi definitiones, experientiarum indubitatarum, axiomata & propositiones jam demonstratarum (§. 562.); ideo scriptum scientificum conditurus definitiones, quibus in demonstrando habet opus, præmittere in axiomatum numerum non recipere, nisi quæ hoc nomen tueri possunt, & propositiones eo ordine collocare debet, sive a posteriori, sive a priori fuerint probatarum, ut ex semper præcedant, quibus in demonstrandis sequentibus habet opus. Similiter cum definitiones sequentes non intelligantur, nisi explicatis terminis, qui eas ingrediuntur, horum definitiones præmittendas esse patet. Cetera, quæ præcipiuntur, per se patent.

Scripta scientifica sunt elementa *Euclidis*, libri *Archimedis*, libri Conicorum *Apollonii* & libri Sphæricorum *Theodossi*. In eundem quoque censum veniunt nostra *Matheseos universæ elementa*. Quod si quis consideret, quomodo elementa *Euclidis* cum libris *Archimedis*, *Apollonii* & *Theodossi* condita fuerint; is non alias ab his autoribus regulas observatas esse reperiet, quam quas hic commendavimus. Neque nos in concinnandis *Matheseos universæ elementis* ad alias auctoritatem advertimus. Cunque philosophiam scientiæ tradere consti-

tueri-

tuerimus, quantum præsens rerum conditio patitur; in eas quoque oculos constanter dirigimus.

§. 791.

Quoniam *vi discursus præliminaris* methodus philosophica postulat, ut non utaris terminis nisi accurata definitione explicatis (§. 116.), nec principiis nisi sufficienter probatis (§. 117.); ut propositiones singulæ ex principiis istis deducantur legitime (§. 118.): ut termini, qui ingrediuntur definitiones sequentes, explicentur per antecedentes (§. 119.) & propositiones, quæ ingrediuntur demonstrationes sequentium, demonstrantur in antecedentibus (§. 120.); ut in propositionibus conditio accurate determinetur, sub qua prædicatum convenit subjecto (§. 121.); evidens est, *scriptum scientificum methodo philosophica conditum* (§. 790.).

*Scriptum scientificum qua methodo condatur.*

Methodum philosophicam in discursu præliminari integro capite quarto uberius exposuimus. In describenda igitur methodo, quæ scriptis scientificis convenit, brevioribus esse licet. Repetantur enim ibidem dicta & ad præsentem scopum applicentur. Quæ de stylo philosophico integro capite quinto discursus præliminaris præcepimus, ea non minus ad scripta cujusvis generis scientifica applicantur. Repetantur itaque & illa, quæ de stylo philosophico dicta sunt, atque ad scopum præsentem applicentur.

§. 793.

Apparet itaque, *methodum*, quam in discursu præliminari philosophicam diximus, *latius patere atque adeo generali nomine scientificam recte appellari.*

*Methodus scientifica quanam*

Non mirum videri debet, eandem methodum & Mathesi, & philosophiæ, & omni cognitioni reliquæ convenire: quam enim diximus *methodum philosophicam* (§. 115. *Disc. prælim.*) & cujus easdem esse leges ostendimus quam mathematicæ (§. 139. *Disc. prælim.*), ea non est nisi regularum logicarum accurata applicatio. Regulæ autem logicæ generales sunt atque in omni cognitione intellectum dirigunt, ne a veritatis tramite deflectat & in errores incidat.

§. 793.

Et si autem methodus scientifica, quæ scriptis scientificis convenit, eadem sit cum philosophica (§. 791. 792.), consequenter

*An mas Geometrarum inscri-*

ptis scienti-  
ficis obser-  
vandus.

ter cum mathematica (§. 139. *Disc. prelim.*) ; non tamen opus est, ut more Geometris recepto singulis veritatum generibus competentes definitionum, axiomatum, postulatum, theorematum, problematum, corollariorum atque scholiorum tituli præfigantur: neque enim ideo definitiones bonæ sunt, propositiones, quæ axiomata & postulata appellantur, nomen suum tuentur, theorematum in numerum propositionum demonstratarum referuntur, & ita porro, quod tituli isti præfigantur; sed quia regulis Logicæ singula veritatum genera ad accuratissima respondent. Sufficit itaque regulas Logicæ in unoquoque veritatum genere, quantum fieri potest, accuratissime observari.

Ecce igitur tibi rationem, cur nos idem studium cum Geometris collocemus in custodiendis verioris Logicæ præceptis, non tamen eorundem more singulis veritatum generibus suos præfigimus titulos. Immo ecce tibi rationem, cur hodie subinde mathematici summi illo rigore demonstrandi continuo quodam discursu veritates a se detectas proponant. Patet præterea, oppido falli, qui scientifica, aut mathematica, vel demonstrativa methodo se sua tradidisse opinantur, si singulis veritatibus competentes definitionum, axiomatum, postulatum, theorematum, problematum, corollariorum titulos præponant, etsi leges definiendi ac demonstrandi in super habeant. Neque tamen ideo prorsus inutilis est mos mathematicorum. Etenim cum unoquoque veritatis genus suas habeat regulas, juxta quas examinari debet, absque ulla ambage liquet, quibus regulis ad examen instituendum sit opus. Cumque præterea definitiones, axiomata, theorematum & problemata sigillatim numerentur; eo ipso constat, non modo quot definitionibus & axiomatis, ad demonstrandum propositiones habueris opus, verum etiam quot propositiones theoreticæ atque practicæ in libro contineantur. Præterea tolluntur hac ratione verborum ambages, quibus connexionis gratia opus est, & quæ alias dissoluta apparuerant, istis titulis medianibus connectuntur.

### §. 794.

Cur citationes  
sint ne-  
cessariæ &  
cur para-  
graphi con-

Quoniam propositiones in numerum principiorum demonstrandi (§. 562.), immo in genere in numerum principiorum probandi (§. 588.) non recipiuntur nisi jam demonstratæ, nec definitionibus atque axiomatis, vel experienciis utimur nisi

ante

ante positis (§. 790. *Log.* §. 133. *Disc. prælim.*); in scripto scientificis *tinua serie*  
*copræmissæ*, quibus utimur in syllogismis probationem constituentibus, *numerandi.*  
*citanda sunt*, ut in antecedentibus evolvi possint ab eo, cui ipsæ  
 nondum sunt familiares. U. igitur citatio faciliatur & citata fa-  
 cilis inveniantur, omnes omnino veritates continua serie numerari  
 debent.

Hunc citandi morem observavimus in elementis Matheseos univer-  
 sæ; observavimus eundem in operibus philosophicis Germanicis; eun-  
 dem quoque observabimus in operibus philosophicis Latinis, quemad-  
 modum ex præsenre opere logico intelligitur. Olim Mathematici nu-  
 merabant propositiones atque definitiones singulorum librorum; sed  
 ita citationes evadebant proluxæ atque molestæ citata evoluturo.

## §. 795.

Ex eadem ratione patet, si aliunde definitiones, vel propo- *Quanam*  
 sitiones mutuo sumuntur tanquam principia probandi, illas quoque ex *aliunde ci-*  
 iis libris, in quibus reperiuntur, citari debere. *tanda.*

Idem quoque nos facimus. Quoties enim opus habemus principiis  
 mathematicis, ea ex elementis nostris Matheseos universæ citamus, in  
 quibus singularum disciplinarum paragraphi continuo ordine nume-  
 rantur, ut adeo non opus sit nisi numero §. addere nomen disciplinæ.  
 V. gr. Citaturi propositionem, quæ continetur paragrapho centesimo  
 trigesimo quinto elementorum Geometria, scribimus breviter: §. 135.  
*Geom.* Similiter quoties opus habemus principiis philosophicis unius  
 disciplinæ in altera v. gr. Logicæ in Ontologia vel Ontologiæ in Cos-  
 mologia; ea ex disciplinis a nobis pertractatis citamus. V. gr. Si ad for-  
 mam demonstrationis ostensivæ provocabimus, quæ continetur §. 557.  
 Logicæ, breviter scribimus: §. 557. *Log.* Hæc qui observaverit, ei  
 citationes continuæ in nostris operibus nihil negotii facessent. In-  
 cludimus autem citationes parenthesisibus, ne lectorem turbent, con-  
 tractum iis non attentis perlecturum.

## §. 796.

Ex continua illa citationum serie non modo intelligitur, ni- *Citationum*  
 hil assumi, quod non jam sit adstructum; verum etiam patet, quæ- *usus.*  
 nam tanquam cognita præsupponi debeant, antequam veritatem pro-  
 positionis, quæ præmanibus est, convinci queat.

Egregium hinc pendere usum, patebit inferius, ubi ostendemus, quandonam fieri possit, ut alter veritatis vincatur.

## §. 797.

*Citationum  
usus alius.*

*Quodsi citationes istæ per singulas disciplinas continuentur, quomodo veritatis unius cognitio a veritate alterius pendeat, disciplinarumque mutuus nexus ad oculum patet. Neque enim alia re opus est, quam ut citationes adspiciantur.*

Atque ita non cæca habenda est fides asserenti, veritatis unius cognitionem a veritate alterius pendere, disciplinamque unam præsupponere alteram: Sed quilibet rerum omnium ignarus suis ipsismet oculis id videre valet. Intuitiva hæc cognitio nos certos reddit, quo tramite in studiorum ratione sit incedendum, & veritatis amore ductis calcar addit ad disciplinas recto ordine tractandas.

## §. 798.

*Quomodo  
demonstra-  
tiones ab-  
breveniuntur.*

Quoniam methodus, qua libri scientifici conscribendi, eadem cum philosophica (§. 792.) ; in propositionum demonstrationibus, vel probationibus non plura contineri debent, quam quæ lectori antecedentium gnaro sufficiunt ad revocandum cetera in memoriam ad ratiocinia complenda requisita (§. 123. disc. prælim.). Quamobrem si qua præmissa sola citatione innotescit, adjecta citatione in demonstratione omitti potest. Ex eadem ratione patet, in demonstrationibus sufficere enthymemata, cum Logicæ gnarus enthymemata datum absque ullo negotio in syllogismum completum convertere possit (§. 424. & seqq.) Quamobrem si conclusio anterior fuerit præmissa syllogismi sequentis & præmissa altera per citationem pateat conclusionem syllogismi sequentis immediate jungere licet conclusioni antecedentis.

Hac ratione demonstrationes non modo abbreviantur, verum etiam eam formam subeunt, ut Logicæ artificialis parum peritis ex syllogismis minus compositi videantur. E. gr. Superius demonstrationem theorematum, quod *recta CD ex centro C ducta & arcum AB bisecans bisecet quoque chordam cognominem*, resolvimus in octo ratiociniis, ex quibus constat, duas nimirum consequentias immediatas & sex syllogismos partim categoricos, partim hypotheticos. Demonstratio vero ita contrahitur: Cum *recta CA, CD & CB sint radii circuli, adeoque*

Fig. 4.

inter

inter se aequales, & praterea  $AD$  &  $DB$  arcuum cognominum per hypothesein equalium chorda quoque aequales sint; in triangulis  $ACD$  &  $DCB$  anguli equalibus lateribus oppositi  $ADE$  &  $EDB$  aequales sunt, consequenter in triangulis  $ADE$  &  $DEB$  bases  $AE$  &  $EB$  aequales sunt, atque adeo recta  $CD$  arcum  $AB$  bisecans in  $D$  chordam quoque bisecat in  $E$ . Q. e. d. Nimirum si demonstratio elementis Geometriæ inseritur, paragraphus citatur, in quo definitio radii continetur, atque adeo primi syllogismi non retinetur nisi conclusio, quod recta  $CA$ ,  $CD$  &  $CB$  sint radii circuli. Similiter citatur ad conclusionem secundam, cujus una præmissa est conclusio prima, paragraphus, in quo continetur axioma, quod radii unius circuli sint aequales, atque adeo conclusionem syllogismi secundi, quod recta  $CA$ ,  $CD$  &  $CB$  aequales sint, immediate jungere licet primæ. Porro cum in syllogismo tertio major, quod arcum equalium chorda aequales sint, per citationem pateat; enthymema saltem retinetur: Arcus  $AD$  &  $DB$  sunt aequales. Ergo chorda cognominæ  $AD$  &  $DB$  aequales sunt. Quoniam vero ex tribus primis conclusionibus patet, triangula  $ACD$  &  $CDB$  esse sibi mutuo æquilatera & per citationem insinuatur major, quod in triangulis sibi mutuo æquilateris anguli equalibus lateribus oppositi aequales sint, atque per se liquet, angulos  $ADE$  &  $EDB$  equalibus lateribus  $CA$  &  $CB$  oppositi; conclusiones syllogismi quarti & quinti contrahuntur in unam, quod in triangulis  $ACD$  &  $DCB$  anguli  $ADE$  &  $EDB$  aequales sint, & formata sic propositio ex duabus conclusionibus subicitur per modum illationis anterioribus junctim sumtis. Quoniam denique per citationem insinuari potest propositio, quod, si duo triangula fuerint ejus conditionis, ut angulus unus unius sit equalis angulo uni alterius & lateribus comprehendentia angulum in uno triangulo sint sigillatim equalia latera comprehendentibus angulum in altero triangulo, sit quoque latus tertium unius æquale lateri tertio alterius; minor autem patet ex conclusionibus anterioribus: ideo tantum retinetur conclusio syllogismi sexti statimque combinatur cum conclusione septima, quæ per immediatam consequentiam inferitur, ut adeo resultet propositio: in triangulis  $ADE$  &  $DEB$  bases  $AE$  &  $EB$  aequales sunt. Ex hoc igitur exemplo abundeliquet, quomodo demonstrationes sint concinnandæ, ut nihil concludatur nisi vi formæ, etsi Logicæ non satis peritus, nec in resolvendis demonstrationibus versatus nullum syllogismi vestigium sibi apprehendere videatur. Quod si citationes omittantur, quemadmodum hic a nobis factum est, demonstrationis vim ægre percipit nisi is, cui propositiones per citationem insinuandæ familiarissimæ sunt. Immo

sub-

subinde hic quoque hæret, ubi propositio aliqua non statim eidem succurrit. Enimvero si citatio adjicitur, tyro quilibet propositionem, quæ omittitur, evolvere atque adeo vim concludendi perspicere potest. Si omisiss citationibus demonstratio perspicua esse debet, propositiones per eas insinuandæ actu adducendæ sunt: quo ipso demonstratio multo praxior evadit, quæ citationum beneficio abbreviari poterat. Immo ne in hoc quidem casu demonstratio convincit nisi eum, qui propositiones istas habuerit satis cognitæ atque perspectas, haud quaquam vero illum, qui non amplius recordatur, num beneficio demonstrationis earum veritatem jam alio tempore perspexerit. Confirmatur adeo denuo, quæ de citationum usu præclaro paulo ante a nobis dicta sunt (§. 794. & seqq.).

## §. 799.

*Demonstratio  
tionis ordi-  
nata & in-  
ordinata de-  
finitio.*

*Demonstratio dicitur naturalis, aut ordinata, si propositiones eo ordine se invicem excipiunt, quo in ratiociniorum serie, in quam demonstratio resoluta abit (§. 551. & seqq.), continentur: in casu opposito inordinata appellatur.*

Fig. 4.

Exemplum demonstrationis ordinatæ præbet ea, quam modo (not. §. 798.) attulimus: id quod patet, si eam cum analysi supra (not. §. 552.) posita conferre volueris. Eadem inordinata evadit, ubi hoc modo proponitur: *In triangulis ACD & DCB æquales sunt anguli ADE & EDB, propterea quod illa triangula ob radios circuli CA, CD & CB & chordas arcuum æqualium AD & DB sibi mutuo æquilatæ sunt. Unde porro consequitur, quod recta CE, quæ per hypothefin arcum AB bisecat chordam quoque cognominem in E bisecare debeat, cum in triangulis ADE & EDB bases AE & EB æquales sint.* Ego in elementis Mathematicos operam dedi, ut demonstrationes redderem naturales: vulgo Mathematici præstantissimi amant inordinatas. Præstant autem ordinatæ inordinatis non uno nomine: Quod suo loco distinctius exponemus.

## §. 800.

*Demonstratio ordinata  
quomodo  
condenda.*

*Quod si ergo demonstrationem in sua, ex quibus constat, ratiocinia resolveris (§. 551. & seqq.); ordinatam condere haud erit difficile (§. 799.). Facta enim resolutione, datur ratiociniorum series, atque adeo patet, quo ordine collocandæ sunt propositiones, quæ retinentur.*

Exem-



Exempli loco esse potest demonstratio paulo ante (not. §. 798.) in medium allata. Obtinuimus enim naturalem (§. 799.), quod eam ex analysi logica supra (§. 552.) data cōdidimus. Quod si quis observaverit leges demonstrandi (§. 551. & seqq.) descriptas, sponte incidet exercitatus in demonstrationem naturalem. Etenim quod vulgo demonstrationes dentur inordinatæ, id ideo accidit, quod autores non meditentur quasi conclusionem ex data hypothese vel definitione subiecti ratiocinando demum reperturi (§. 724. 725.), dum demonstrationem in chartam conjiciunt; sed potius tantummodo recordentur eorum, quæ antea memoriæ mandarunt: ubi propositiones demonstrationem constituentes simul sumptæ notionem quandam complexam formant, quam intuentes nunc ad hanc, nunc ad istam animum advertunt, prout casus tulerit. Exemplo demonstrationis inordinatæ modo dicto (not. §. 799.) dicta illustrantur: in eo enim conclusiones primariæ priori loco ponuntur & rationes, unde veræ esse intelligantur, iisdem subiiciuntur.

## §. 801.

*Demonstrationem propositionis alicujus philosophicæ, aut alterius cujuscunque ad formam geometricæ reduci potest* 1. eam resolvat in syllogismos formales & 2. eorum præmissas tandiu novis prosyllogismis probet, donec præmissæ prodeant definitiones, axiomata, vel judicia intuitiva. 3. Adscribantur præmissis singulis competentes tituli definitionum, axiomatum, judiciorum intuitivorum, theorematum &c. Ita enim patebit, quænam definitiones, axiomata, observationes in usum judiciorum intuitivorum tanquam principia demonstrandi præmitti, quænam propositiones aliante mutuo peti & quo tandem ordine propositiones demonstrativæ collocari debeant. His vero datis demonstratio ad formam geometricæ reduci poterit (§. 793.).

E.g. Sit more Geometrarum demonstrandum, *aerem esse elasticum*. Deducitur propositio ab experimento. Etenim si collum vesicæ modicum aerem continens aërilissime constringitur, & vesica sub campana vitrea suspensa opeandæ pneumaticæ aer ambiens subducitur; inclusus vesicam dilatat non secus ac si inflaretur. Experimentum hunc nobis præbet syllogismus:

*Quicquid dilatatur, remota resistentia, id vi elastica præditum.  
Atqui aer dilatatur, remota resistentia.*

*Ergo aer vi elastica præditus.*

Major ulteriori probatione indiget, adeoque in numerum propositionum demonstratarum referenda. Minor quoque ulteriori probatione indiget, cum per experimentum quidem manifestum sit, *deduci vesica latera, aut firmavis, vesicam expandi*, intuitive autem non cognoscatur, quod dilateretur aer: neque enim nostra de facto-judicia cum ipso facto confundenda, ne periculo vitii subreptionis nos exponamus (§.668.). Major itaque probatur hoc prosyllogismo:

*Quicquid continuum exercet conatum sese expandendi, id vi elastica præditum.*

*Atqui illud, quod dilatatur, remota resistentia, continuum exercet conatum sese expandendi.*

*Ergo quod dilatatur remota resistentia, id vi elastica præditum.*

Major formata est ex definitione elasticitatis, adeoque probatione ulteriori non indiget. Minor equidem ulterius probari poterat: quoniam tamen per experientiam patet, exemplo *Euclidis instar axiomatis* sumitur, consequenter nec ipsa ulteriori indiget demonstratione.

Minor itaque syllogismi, *aer dilatatur, remota resistentia*, ulterius hoc prosyllogismo probatur:

*Quicquid vesicam expandit, remota resistentia; id ipsummet intra eam dilatari debet, ista remota.*

*Atqui aer inclusus vesicam expandit, remota resistentia.*

*Ergo aer inclusus remota resistentia intra eam ipsummet dilatatur.*

Major exemplo *Euclidis instar axiomatis* sumi potest: Minor est iudicium intuitivum, quod experimento debetur. Neutra igitur præmissa ulteriori probatione indiget.

Cum adeo nihil amplius restet, quod sit probandum, probatio absoluta est atque adeo ad formam demonstrationis geometricæ redigenda. Quodsi præmissas syllogismorum consideremus, patebit, unam occurrere in iis definitionem, axiomata duo & experimentum unum, quibus tanquam principiis demonstrandi utendum. Quamobrem propositio de elasticitate aeris more geometrico hæc ratione demonstratur:

DEFI-

DEFINITIO.

1. *Vis elastica* est continuus conatus sese expandendi.

SCHOLION.

2. *Si ensis incurvatur, ipsa manus sentit nifum, quo sese in statum pristinum restituere conatur. Ob hunc nifum eadem vis elastica tribuitur.*

AXIOMA. 1.

3. Quod remota resistentia dilatur, continuo sese expandere nititur.

SCHOLION.

4. *Liquet exemplo ensis, ad quod modo (§. 2.) provocavimus.*

AXIOMA 2.

5. Quicquid vesicam expandit, resistentia remota id ipsummet intra eandem dilatari debet.

EXPERIMENTUM.

6. Si collum vesicæ, in qua paucum aëris continetur, arte constrin-

gatur, atque vesica sub campana vitrea suspensa ope antliæ pneumaticæ aër externus removeatur; aër inclusus eandem expandit.

COROLLARIUM.

7. Quoniam aër inclusus vesicam expandit, externo remoto; externus resistens interno impedire debet, quo minus is vesicam expandat, consequenter aër inclusus vesicam expandit, quam primum resistentia tollitur.

THEOREMA.

8. *Aër est elasticus.*

DEMONSTRATIO.

Aër inclusus vesicam expandit, quam primum resistentia tollitur (§. 7.), ipse igitur etiam intra eandem dilatari debet (§. 5.). Cum adeo sese expandere continuo nitatur (§. 3.); elasticus est (§. 1.). *Q. e. d.*

CAPUT IV.

DE DIJUDICANDIS LIBRIS HISTORICIS.

§. 802.

**Q**uoniam scripti historici autor non narrare debet nisi vera, nec alio ordine, quam quo se invicem secuta fuere, neque quicquam eorum prætermittere eidem licet, quod ad finem illius consequendum cognitu necessarium (§. 760.), *in scripto historico logice examinando attendendum est r. ad veritatem eorum, quæ narrantur; 2. ad ordinem, quo ea recensentur;*

*Quenam in scripto historico dijudicando tenenda sint.*

Dddd 2

3. ad

3. *ad relationem eorundem ad finem scripti, et propositum; seu num sit completum.*

Nos hic non consideramus scripta historica, nisi quatenus regulis logicis subfunt: cetera nihil ad nos.

§. 803.

*Quomodo veritas scripti historici examinanda.*

*Veritas scripti historici examinanda est juxta regulas fidei* (§. 613. & seqq.). In scripto enim historico recensentur facta (§. 744.). Facta vero cum credenda sint (§. 612.), seu propter auctoritatem dicentis admittenda (§. 611.); juxta fidei regulas, quibus dicentis auctoritas determinatur (§. 613. & seqq.), utique examinanda est eorum veritas.

Patet hic usus historiae literariae, quae suppeditat argumenta, unde historici auctoritas judicatur.

§. 804.

*Veritas narratorum in particulari quomodo observanda.*

*Si veritas narratorum in particulari examinanda, tum 1.* attendendum est ad circumstantias facti, & inquirendum, num inter se consentiant, an vero sibi mutuo repugnent. 2. Consideranda sunt antecedentia & consequentia in eundem finem, an scilicet facto consentanea sint, an vero eidem advertentur: 3. perpendendum quoque est, num talia narrentur, quae veritatibus manifestis contra licunt. Dico, hac ratione constare, num narratio falsa sit, an vero ex parte sui nihil obstat, quo minus admitti possit.

Falsa enim cum sit narratio, in qua continentur, quae vel sibi mutuo, vel veritati certo agnitae repugnant (§. 622.); methodo praescripta detegere licet falsitatem narrationis, ubi quod narratur, vel absolute impossibile, vel ob antecedentia aut consequentia hypothetice tale deprehenditur. Cum in casu opposito narratio a contradictione libera sit, intrinsece possibilis est (§. 518.), cumque nec respectu antecedentium & consequentium contradictionem involvere videatur, quatenus ea nobis perspecta sunt, ex lege probabilitatis sumi potest, quamdiu nulla ratio in contrarium prostat (§. 578.), quod

quod nulla contradictio adsit. Ipsa igitur narratio tanquam probabilis admittitur.

Nimirum narrati falsa vel in se contradictoria sunt, atque adeo inter absolute impossibilia referenda; vel repugnant hominum inclinationibus atque habitibus, atque adeo pro moraliter impossibilibus habentur; vel denique non consentiunt cum antecedentibus, vel consequentibus, aut etiam concomitantibus, atque adeo hypothetice impossibilia sunt, quatenus nempe ipsa poni nequeunt, si ponatur antecedens, vel consequens, vel concomitans, seu quod ante, aut postea, aut simul factum esse perhibetur. In generalibus subsistentes fontes tantummodo indicamus, neque ad specilia descendimus, quæ ex metaphysicis potius, quam logicis principiis sunt deducenda.

## §. 805.

Quoniam corpora ad unum agendi modum per essentiam suam determinata sunt, quod experientia confirmatum hic sumere licet, alibi a priori demonstrandum; si quod in historia naturali refertur, oblata occasione, ipsimet observamus, aut experimentum, quod eo constare perhibetur, ipsimet repetimus, veritatem narrati intuitive agnoscimus.

*Historia naturalis veritas quomodo a posteriori dijudicetur.*

E.gr. Retulerat Keplerus ex aliorum observatione in libello de nova stella serpentarii c. 23. p. 115. cum A. 1605. mense Octobri sol prorsus deficeret, Antverpiæ & Neapoli circa lunam observatum fuisse annulum lucidum. Dubiæ adhuc fidei cum istud factum naturæ videretur Astronomis; ego A. 1706. cum eclipsi solis Lipsiæ propemodum totalis esset, in id oculorum telescopio munitorum mentisque aciem converti, ut observarem, num istiusmodi annulus in obscuratione totali compareret. Atque hac ratione veritatem eorum, quæ a Keplero referuntur, detexi. Quomodo iteratione experimentorum veritas eorum, quæ per ea constare perhibentur, innoteat; plurimis exemplis confirmamus in philosophia experimentalis. Eodem modo in confirmandis inventis anatomicis utuntur anatomici, & in verificandis chymicis Chymici. Inprimis omni ævo Astronomis in usu fuit reperere observationes, ad earum veritatem confirmandam.

## §. 806.

Quod si facti naturæ reperitur causa (§. 727.), vel data causa una cum effectu per observatio em, aut experimentum determinetur, quid unaquæque illarum ad eundem contulit, quomodo a

*Historia naturalis veritas quomodo a*

potest. *hijus*  
*dictur.*

(§. 728.); *veritas illius a priori innoscitur.* Methodus enima illa, qua veritatem a priori investigare jubemur, eandem prorsus formam servat, quam demonstrationes (§. 729.) atque adeo pro demonstrato haberi debet, quod per eandem fuit investigatum. Quamobrem cum verum sit istud, quod demonstrare valeamus (§. 544. 557.); patet in hypothese data veritatem facti naturam a priori innoscere.

Ideo mihi in more positum est in philosophia experimentalis, quæ per sequentia experimenta patefunt, demonstrare ex iis, quæ per antecedentia patent, usus methodo a nobis in Logica descripta, ad quam modo provocavimus.

### §. 807.

*Historia naturalis veritas quomodo probabiliter demonstratur.*

*Quodsi modum observandi, vel experimentandi, quo usi fuimus, omnemque, quam adhibuimus, industriam accurate describimus; inde de veritate ejus, quod observatione, vel experimento constat, judicare licet.* Etenim si alteri fides habenda, certi esse debemus, tum quod ipse norit veritatem ejus, quod enarrat, vel asseverat, tum quod vera dicere velit (§. 613.). Qui modum observandi, vel experimentandi, omnemque, quam adhibuit, industriam describit; is & suam in observando atque experimentando dexteritatem, & amorem veritatis prodit, ubi utroque fuit instructus. Inde igitur judicare licet, num vera & noverit, & dicere velit, consequenter num fides eidem habenda, atque adeo narratis assentiendum sit (§. 611.).

Hinc auctoritatem consequuntur observationes astronomorum & experimenta auctorum de cognitione rerum naturalium optime meritorum, veluti *Guerickii, Boylei, Mariotti, Hawksbeji &c.* Usus hunc modi observandi descripti jam indicavimus in superioribus (not. §. 770.), cum ejusdem descriptionem historię naturalis conditoribus commendaremus. Immo quoties nos experimenta & observationes describimus, ejus ideo rationem habemus, quod amore veritatis ducti omnem moveamus lapidem, ut lector veritatem eorum, quæ referimus, agnoscat atque de eadem certus sit.

### §. 808.

*Quodsi observationes & experimenta iterentur (§. 805.),*  
*vel*

*Ordo historia naturalis.*

*vel facti causæ causarumque concursus methodo nostra peruestigetur (§. 727. 728.); inde innotescit, num in historia naturali singula eo ordine recensentur, quo facta fuere. Patet id per se, nec ulteriori probatione indiget.* *lis unde dijudicetur.*

Mittimus argumenta probabilia, quæ vel ab autoritate scribentis, vel ab eo, quod factis naturæ intrinsicum est, desumuntur, cum talia ad Logicam probabilium spectent, quam olim explanatam dabimus.

## §. 809.

*In historia civili, ecclesiastica, literaria & privata ordo ex circumstantia temporis patet: id quod denuo per se liquet.* *Ordo historiae reliquæ unde constat.*

Hinc usus chronologiæ in historia elucescit, atque historici annorum seriem sequuntur in recensendis factis imperantium & fati rerum, atque ecclesiæ, nec non in biographiis. Mittimus vero & hic, quæ de ordine in factis particularibus describendis observato ex principiis intrinsicis conjectare licet, non modo quod principia metaphysica, præsertim psychologica, atque moralia præsupponantur, verum etiam quod modus conjectandi ad Logicam probabilium spectet.

## §. 810.

Quoniam denique (§. 771. & seqq.) ostendimus, quæ ratione condenda sit historia tum naturalis, tum artium, tum civilis cum ecclesiastica, litteraria atque privata, ut diversis finibus, qui per eam intenduntur, satisfiat; *dato fine ex problematum resolutionibus, quas exhibuimus, judicare licet, num singula recensentur, quæ ad illum consequendum profunt.* *Modus judicandi, num scriptum historicum sit completum*

Resolutio nimirum problematis suppeditat rationem nostræ propositionem majorem. Minor eruitur, si librum historicam evolvens attenderis, num ea recensentur, quæ resolutio in eum finem recenseri jubet. Hinc vero sponte resultat conclusio, fini intento fuisse satisfactum, quam inferimus fiducia demonstrationum, quas resolutionibus problematum subjunximus.

## §. 811.

*Quod si iis animi dotibus fueris instructus, quæ ad historiam in usum suum convertendam requiruntur; ipso facto convinceris, sufficienti, vel insufficienti tradi, ubi eam ad usum suum transferre conatus fueris. Etenim si sufficienti traduntur, convinceris.* *Quomodo ipso facto ejusdem convincamur.*

natus

natus non destituetur successu: quodsi vero, quæ traduntur, fini intento minime sufficiunt, defectum notabis, ubi ulteriorem progressum fisti animadvertis. Deficientibus enim datis filium ratiocinandi abrumpi debere non inficiabitur, qui genuinam demonstrationis formam (§. 551. & seqq.) animo habuerit comprehensam, nec ignoraverit, quod supra (§. 729.) inculcavimus, methodum a nobis præscriptam veritatem a priori, vel ex aliis cognitis ratiocinando eliciendi (§. 663.), eandem servare formam, quam demonstrationes tuentur.

Hanc ego viam ingressus sum, ubi inquirere libuit, num autores observationes ac experimenta sufficienter describant, atque ita mihi facillimum fuit detegere defectus passim obvios. Eandem vero utiliter ingredientur historiam reliquam omnem ad examen revocari. Mihi in omni casu valde probatur, si quis experientiæ atque rationis connubium intemeratum esse jubet, nec tanquam verum admittit, quod proprio experimento constare potest, nisi eodem in se ipso sumto.

## §. 812.

*Rationes, cur quis falsa narret, quomodo detegantur.*

*Si quis falsi narrare deprehenditur, rationes, cur vel fallat, vel fallat, deteges per ea, quæ de formandis iudiciis & notionibus a posteriori (§. 669. & seqq.), atque de requisitis hominis fidei digni (§. 615. 621.) præcipiuntur.* Etenim si quis falsâ narrat, vel impleret veritatem non fuit assecutus, vel eandem dicere non vult. Rationes autem, cur quis veritatem impleret non assequatur; tum per ea patent, quæ in hanc rem (§. 615) præcepimus, tum per illa, quæ de modo veritatem a posteriori eruendi inculcavimus. Rationes contra, cur quis vera dicere nolit, generatim (§. 621.) indicavimus: theorematis autem generalis applicatione in casu speciali dato eadem eruuntur.

Quoniam rationes, cur quis vera dicere nolit, a natura voluntatis derivantur (§. 621.); qui in casu particulari, vel singulari eandem scrutari debet, eum principia psychologica atque moralia, subinde quoque politica, haud parum juvabunt. Unde intelligitur, cur specialior horum pertractatio non a sola Logica pendeat, sed aliarum præterea disciplinarum opem impleret.



CAPUT V.

DE DIJUDICANDIS LIBRIS DOGMATICIS.

§. 813.

**C**um scripti dogmatici historici atque scientifici definitiones de ierimus (§. 751.), & in numerum scriptorum utriusque speciei referri debeant illi, quibus notæ in istis enumeratæ simul conveniunt (§. 349.); *ex definitionibus judicare licet, num scriptum dogmaticum, quod datur, in numerum historico- rum, an vero in numerum scientificorum referendum sit: id quod primum judicium est, quod de libro dogmatico judicaturus formare tenetur.* *Unde constat, num scriptum oblatum dogmaticum historicum sit, an scientificum.*

Nimirum dum oculo fugitivo librum percurrimus, iudicium formare licet intuitivum: *Liber datus dogmata tantum absque probatione recenset, vel argumenta, quibus probantur, tantum indicat, aut in casu opposito: Liber datus dogmata demonstrat, aut probat.* Sumta igitur in utroque casu definitione inversa pro maiore, nempe in priori: *Quicumque liber dogmata tantum recenset & argumenta, quibus probantur, tantum indicat, is dogmaticus historicus est,* vel in posteriori: *Quicumque liber dogmata demonstrat, aut probat, is dogmaticus scientificus est;* in priori casu inferitur: *Liber datus dogmaticus historicus est;* in posteriori autem: *Liber datus dogmaticus scientificus est.* Communi utimur ratiocinandi modo, quo rem oblatam ad suum genus, vel speciem suam reducimus.

§. 814.

Quoniam porro clarissime docuimus, quænam in scripto dogmatico historico (§. 788.), quænam in scientifico condendo observare debeat autor (§. 790.); *si constat, num scriptum dogmaticum ad historica, num ad scientifica referri debeat, per ea, quæ de utroque scripto condendo præcepimus, patet, utrum autor satisfecerit officio suo, nec ne (§. 348.).* *Unde innoscatur, num autor officio suo satisfecerit.*

Omne iudicium denuo colligitur syllogismo, cuius minor patet per libri lectionem attenta continuo mente ad ea, quæ de utroque scripto dogmatico condendo præcepimus, maior autem constat iis ipsis, *Ecc* *quæ*

quæ de scripto dogmatico utroque condendo in medium allata sunt. Communi utimur ratiocinandi modo, quo ad rem oblatam applicamus, quæ de genere, vel specie ipsius demonstrata fuere.

## §. 815.

*Operis completi & incompleti definitio.*

Si scripto dogmatico omnia traduntur, quæ de argumento, quod tractat, fuere reperta, *opus completum* dicitur absolute, pro ratione nimirum illius temporis, quo idem condidit autor. Quodsi certo fine conditum fuit, nec plura continet, nec pauciora, quam quæ fini isti consequendo sufficiunt; *scriptum in suo genere completum est*. In casibus oppositis dicitur *incompletum* vel absolute, vel cum addito *in suo genere*.

Lubet judicia de scriptis dogmaticis convenienter iis formanda, quæ de iisdem condendis præcepimus, ad sua genera reducere suis nominibus distinguenda, ut in casu dato redeant ad definitionum applicationem modo (not. §. 813.) distinctius declaratam.

## §. 816.

*Unde constet, an scriptum sit completum.*

Cum in historia literaria status rei literariæ eo tempore, quo vixerunt autores, describatur, & inventa sollicitè annotentur, quæ veritatibus anterioribus quovis tempore accesserunt, & qua ratione jam ante inventa ulterius fuerint perfecta, ut dubia abierint in certa, errores in veritatem (§. 785.); *an scriptum sit completum absolute tale, per historiam literariam constat* (§. 815.); *an vero sit completum in suo genere per historiam literariam & finem ab autore intentum simul patet* (§. cit.).

Supponimus in Logica historiam literariam proflare, quæ nomen suum tuetur, vel de scripto aliquo iudicatu proprio Marte fuisse comparatam. Etenim ubi deficit historia literaria; iudicium illud in tua potestate non est.

## §. 817.

*Cur iudicium de scripto completo in suo ge-*

Quoniam itaque iudicaturus, num scriptum sit completum absolute tale, sola historia literaria habet opus; iudicaturus vero, num sit completum in suo genere, præterea ostendere debet, an ex hæctenus inventis proponantur, quæ fini ab auto-

autore intento consequendo satisfaciunt (§. 816.); *judicium de scripto completo in suo genere difficilius est, quam de completo absolute tali* *nere difficilius sit, quam de completo absolute tali.*

Nobis hic negotium est cum *judicium determinatis (§. 320.) & certis (§. 364.), minimum probabilibus (§. 578.): non curamus vaga & incerta quæ deproperantur.*

§. 818.

*Quodsi successu temporis plures veritates de objecto alicujus scripti desegantur; scriptum, quod suo tempore erat completum, incompletum evadit.* *Cur scriptum completum fieri possit incompletum.* Patet per definitionem scripti completi ac incompleti (§. 815.).

Non tamen ideo reprehendi potest autor, quod scriptum condiderit incompletum: absolum enim foret postulare, ut quis libro inferat, quæ nondum sunt reperta & quæ reperire non fuit in potestate ipsius. *Judicia istiusmodi deproperata ab æquitate maxime aliena sunt.*

§. 819.

Scriptum, quod plura continet, quam quæ scopo autoris inserviunt, dicitur *nimis prolixum*: illa autem, quæ in scripto tradita ad scopum autoris non faciunt, *superflua* appellantur. Unde patet, *scripta nimis prolixa superflua continere.* *Prolixi scripti & superflui definitio.*

E. gr. Si quis compendium Geometriæ elementaris conscribit in tyronum gratia, ut ad elementa *Euclidis* proprio Marte pertractanda præparentur & praxium geodæticarum demonstrationes capiant, is præter definitiones & axiomata elementaria nonnisi eas propositiones ei inferere debet, quæ ceteris demonstrandis & praxi geodæticæ intelligendæ sufficiunt. Quodsi plura theoremata compendio suo inferat, *superflua* tradit & scriptum compendio prolixius. Unde intelligimus, *judicium hoc plura supponere cognita, quam quæ in compendio pertractari convenit.*

§. 820.

Si termini singuli accurata definitione explicantur, nisi iisdem vulgo respondeat notio confusa quidem, sed fixa tamen, & fixus significatus in condendis propositionibus constans. *Libri perspicui & obscuri definitio.*

anter continetur; *liber perspicuus* est: quodsi terminis utatur autor non definitis atque vagis, *liber obscurus* est.

Ita elementa *Euclidis* perspicua sunt, cum singuli termini accurate definiantur, nec a significato per definitiones stabilito recedatur. Vulgo autem scripta omnis generis obscuritate laborant, quod terminis utantur autores non satis explicatis, nec ipsimet eandem prorsus notionem eidem termino jungant. Ur ego quoque lectori attento fierem perspicuus, terminis fixum tribui & in posterum tribuam significatum.

§. 821.

*Cur libri*

*perspicui*  
*intelligi pos-*  
*sint, obscuri*  
*non item.*

*Libri perspicui possunt intelligi obscuri non item.* Etenim in libro perspicuo termini singuli accurata definitione explicantur, nisi iisdem vulgo respondeat notio quidem confusa, sed fixa tamen, fixusque significatus sancte custoditur (§. 820.). Lector itaque, qui definitiones istas sibi reddidit familiares, & in altero casu attentione utitur, cum singulis vocibus easdem notiones jungit, quas cum iisdem junxit autor, consequenter mentem autoris intelligit (§. 117.). Liber adeo perspicuus intelligi potest.

E contrario in libro obscuro autor utitur terminis non satis explicatis atque vagis (§. 820.). Quamobrem cum hac ratione fieri quam facillime possit, ut lector cum iisdem alias notiones jungat, quam cum iisdem iungebat autor, vel prorsus ignoret, quamnam cum iisdem notionem jungere debeat (§. 129.); mentem illius non intelligit (§. 117.). Liber adeo obscurus intelligi nequit.

Hinc vulgo definitiones nominales *libri perspicui & obscuri* formantur, quod is possit intelligi; hic minus intelligi queat. Nos autem condidimus reales, ut earum possibilitas pateret per ea, quæ in antecedentibus a nobis tradita fuere. Atque hinc patet ratio, cur quisvis lector, qui definitiones *Euclideas* sibi reddidit familiares, mentem *Euclidis* assequatur & lectores attenti omnes *Euclidem* eodem modo interpretentur, nemo autem eorum eorum sensum perversum a mente ipsius alienum. Fieri etiam eadem de causa potest, ut quis sensum nostrorum dogmatum capere queat, modo definitiones nostras sibi reddat familiares.

## §. 822.

*Quodsi lector definitiones auctoris sibi non reddit familiares, Liber per nec ad verba, quibus notio confusa, sed fixa respondet, attentionem offert; librum perspicuum minime intelligit.* Etenim si definitiones sibi non reddidit familiares, nec ad verba, quibus notio confusa, sed fixa respondet, attentionem offert; dum legit propositiones auctoris, vel hæret, quamquam cum iisdem jungere debeat notionem, vel notionem jungit diversam ab ea, quam cum eadem jungi vult auctor, adeoque in casu posteriori sensum fingit a mente ipsius alienum (§. 120.), consequenter, in utroque mentem auctoris non intelligit (§. 117.). Librum adeo perspicuum minime intelligit.

*Liber perspicuus a quonam non intelligatur.*

Accidit hinc, ut tyronibus elementa *Euclidis* sint obscura, antequam definitiones fuerint familiares, ut auditis terminis notiones iisdem respondentibus statim succurrant. *A vero igitur aberrant, qui obscuritatis auctorem accusant, quod mentem ejus intelligere nequeunt, ubi definitiones, quas præmittit sibi nondum familiares reddiderunt, nec sufficientem ad ipsius verba attentionem afferunt.* Etenim si vel maxime juxta definitionem libri obscuri nominalem judicent (not. §. 821.), in minore tamen syllogismi sui peccant, quod sumant eum intelligi non posse, quem culpa sua non intelligunt negligentes ea, quæ ad alterum intelligendum necessaria sunt.

## §. 823.

*Si quis in scripto dogmatico historico plures definitiones tradit, quam quæ ad definitiones sequentes atque subjecta & prædicata propositionum intelligenda sufficiunt; in definiendo nimius est: in casu opposito in definiendo deficit.* Cum enim scripti dogmatici historici auctor non intendat, nisi ut lector dogmata intelligat & ad summum argumenta probantia norit (§. 787.); non pluribus opus habet definitionibus, quam quæ ad definitiones sequentes atque subjecta & prædicata propositionum intelligenda sufficiunt. Quodsi ergo plures tradit, quam quæ ea fini interviunt, superfluas tradit (§. 819.), adeoque in definiendo nimius est. Quodsi pauciores in medium affert, liber obscuritate peccat (§. 820.), consequenter auctor in definiendo deficit.

*Quando auctor scripti historici nimius in definiendo & contra.*

In scriptis nimirum dogmaticis historicis definitiones non aliam habent usum, quam ut ea, quæ definiuntur, agnoscantur & ab aliis distinguantur (§. 153.). Ad hunc igitur solum attendimus, consequenter nec definimus, quæ absque definitione patent. Quamvis vero sunt ea, quæ absque definitione patent, in definitione libri perspicui (§. 820.) jam innuimus. E. gr. Si quis Geometriæ practicæ elementa conscribit in usum Geodætæ, qui a demonstrationibus abhorrent sola praxi contenti; is non opus habet, ut lineam rectam definiat, propterea, quod absque definitione & agnosci & a linea curva quacunque distingui possit, sola notione clara ex intuitu ejusdem hausta. Similiter si in usum artificum docetur ellipseos constructio, sive descriptio, non opus est ut ante definias, quidnam sit ellipsis. Ipsa enim descriptio cum intelligi possit absque definitione, eadem superflua foret. Inservit autem ipsa descriptio loco definitionis, si in casu quodam dato judicium ferri debeat, num figura proposita sit ellipsis, notione clara quidem, sed confusa, quam intuitui debemus, ad eam agnoscendam & ab aliis curvis in se redeuntibus distinguendam, si a circulo discesseris, non sufficiente.

## §. 824.

*Quando au-  
tor scripti  
scientifici in  
definiendo  
nimius &  
contra.*

*Si quis in scripto scientifico plures definitiones condit, quam quæ ad definitiones sequentes intelligendas & ad propositiones cum intelligendas, tum demonstrandas requiruntur; is in definiendo nimius est: si pauciores tradit, in definiendo deficit.* Illud per se patet, scriptum scientificum ita condi debere, ut a lectore intelligi possit. Neque adeo probatione indiget, quod eas afferre teneatur ipsius autor definitiones, quæ ad definitiones sequentes atque ad propositiones intelligendas requiruntur. Quod vero ea fini non plures afferri debeant, quam quot eidem sufficiunt, eodem modo ostenditur, quod idem de libris dogmaticis historicis ostendimus (§. 823.). Enimvero cum in scriptis dogmaticis dogmata non tantum recenscantur, ut lector intellecta memoriæ mandet; verum etiam demonstrentur, vel probentur (§. 751.), inter demonstrationum vero & probationum principia locum quoque sibi vindicent definitiones (§. 562.); eas definitiones adesse debere, quibus in demonstrando opus est, evidentissimè liquet. Quoniam autem scripti scientifici

autor

autor aliud intendere nequit, vi definitionis ejusdem scripti (§. 751.), quam ut intelligatur, & propositionum demonstratarum veritas percipiatur (§. 544. 557.); ideo pluribus definitionibus non habet opus, quam quæ utroque fini obtinendo sufficiunt. Si plures tradit, superfluas tradit (§. 819.), adeoque in definiendo nimius est: Si vero pauciores tradit, in definiendo deficit.

E. gr. *Euclidis* definitio linearum rectarum, quæ regulis logicis minime respondet, nec eidem agnoscendæ inservit, qua fini nulla quoque definitione habemus opus; nec principium demonstrandi præbet, ut adeo *Euclides* eadem nullibi utatur, sed in ejus locum axioma quoddam surrogaverit. Est igitur superflua. Non tamen foret superflua, si definitio esset bona, ut eadem in demonstrando usui esse posset. Scripta historica dogmatica cum scientificis confundunt, qui de nimio mathematicorum in definiendo studio conqueruntur, ubi animadvertunt, ab aliis definiti, quæ beneficio notionis confuse agnosci & ab aliis distinguui possunt.

§. 825.

*Scriptum dogmaticum* dicitur *utile*, quod talia tradit, quæ vel in scientiis aliis tanquam demonstrandi principia adhiberi, vel ad casus vitæ humanæ commodè applicari possunt. In casu opposito *scriptum dogmaticum inutile est*.

*Scripti utilis & inutilis definitio.*

Ita elementa *Euclidis* utilia sunt, cum propositiones *Euclidæ* serviant tanquam demonstrandi principia cum in Geometria sublimiori, tum in aliis Matheseos partibus. Et nos in hac altera Logicæ parte ostendimus Logicæ nostræ utilitatem, dum monstramus, quod præcepta nostra logica faciant ad veritatem investigandam, dijudicandam, discendam.

§. 826.

*Si autem scripti dogmatici propositiones condit determinatas, scriptum ejus utile est, in casu opposito inutile.* Etenim si propositiones fuerint determinatæ, majoris loco inserviunt in syllogismis (§. 348. 380.), consequenter eadem tanquam principia demonstrandi adhiberi possunt (§. 561.). Sunt vero etiam ad vitam utiles (§. 122. *Disc. prælim.* & §. 320. *Log.*). *Quamobrem*

*Quando scriptum dogmaticum utile & contra.*

obrem scriptum dogmaticum, in quo continentur propositiones determinatæ, utile est.

Si propositiones fuerint indeterminatæ, tum non constat, sub qua conditione subjecto tribuendum sit prædicatum (§. 320.), consequenter nec patet, num subjecto alicui dato in casu speciali, vel singulari idem prædicatum tribui debeat (§. 348.). Li-quet adeo, quod instar principii demonstrandi intervenire nequeant (§. 561.). Patet vero ex demonstratione supra (§. 138. *Discurs. prælim.*) allata, propositiones indeterminatas nec ad casus vitæ humanæ commode applicari posse. Scriptum igitur dogmaticum, in quo conduntur propositiones indeterminatæ, inutile est.

Scripta mathematicarum propositionibus nullis locum concedunt nisi determinatis, atque ea ratio est, cur sint utilia sive ad scientiam, sive ad vitam. Vulgo autem scripta philosophorum parum utilia sunt, quod propositionibus scatent indeterminatis. Nos scripta nostra philosophica utilia efficere studemus, dum propositiones condimus determinatas easque in locum indeterminatarum surrogamus. Facile autem liquet, nobis hic sermonem esse de utilitate absoluta, non respectiva, quæ obtinet respectu hujus, vel illius subjecti. Fieri enim potest, ut liber aliquis utilis sit absolute loquendo, etsi non sit utilis huic, vel isti subjecto. E. gr. Absolute loquendo elementa *Euclidis* utilia sunt (not. §. 825.): fieri tamen potest, ut inutilia sint *Sempronio*, cui mathematica cognitio parum curæ cordique esse debet pro vitæ, quod amplexus est, genere. Supponimus quoque, propositiones esse veras, non falsas. Falsis enim propositionibus nullum in libris dogmaticis locum concedimus; sed eas ex iisdem proscribendas esse præcipimus.

#### §. 827.

*Scriptum dogmaticum historicum quando ordine conscrip-  
tum.*

*Si in scripto dogmatico historico in uno loco congeruntur, quæ ad idem subjectum spectant, liber dogmaticus historicus ordine conscriptus est: in casu opposito non item.* Ostendimus enim (§. 788.) in scripto dogmatico historico in uno loco congerenda esse, quæ ad idem subjectum spectant. Quamobrem si propositiones ac definitiones singulæ eo collocantur loco, quo eas collocari convenit vi regulæ, liber ordine conscriptus.

Quod si



Quodsi contrarium obtinet, definitiones ac propositiones non collocantur singulæ eo loco, quo eas collocari convenit vi regulæ, adeoque liber dogmaticus historicus ordine conscriptus non est.

E. gr. In libro geometrico historico omnes de triangulo definitiones ac propositiones traduntur in eodem loco, nec minus definitiones ac propositiones de quadrato eodem capite continentur, ubi ordo in eodem conscribendo fuit observatus.

### §. 828.

*Scriptum scientificum ordine conscriptum est. si unum quodque eo loco collocetur, quo sequentibus intelligendis & demonstrandis inservit.* In scripto scientifico præcedere debent definitiones, quarum definita ingrediuntur sequentes, & præmittendæ sunt propositiones, quæ tanquam præmissæ adhibentur in propositionibus sequentibus demonstrandis (§. 790). Quodsi ergo singulæ eo loco collocentur, quo sequentibus intelligendis & demonstrandis inserviunt; eadem constante regula uniuscujusque determinatur locus. Scriptum igitur scientificum ordine conscriptum est.

*Quando scriptum scientificum ordine conscriptum.*

E. gr. Elementa *Euclidis* ordine conscripta sunt: definitiones enim ita collocantur, ut anteriores sequentibus intelligendis inserviant, & propositiones ita invicem sequuntur, ut anteriores ingrediantur demonstrationes sequentium. Eundem quoque ordinem nos tenuimus in scriptis mathematicis & philosophicis, quæ patrio sermone edidimus, eundemque tenere nobis constitutum est in philosophicis Latino idiomate evulgandis. Qui elementa *Euclidis* nullo ordine congesta conque-  
runtur, propterea quod non in eodem loco congeruntur, quæ ad idem subiectum spectant; illi ordinem, qui scriptis dogmaticis historicis convenit, cum eo confunduat, qui scientificis respondet (§. 827.).

### §. 829.

*Ordinem scholæ* appello, quo ad idem subiectum spectantia in eundem locum congeruntur, nulla habita ratione, quomodo cognitio unius pendeat a cognitione alterius. *Ordinem vero naturalem* voco, quo præmittuntur, quæ sequentibus intelligendis & demonstrandis inserviunt.

*Ordinis scholæ ac naturalis definitio.*

(*Wolffii Logica*)

Ffff

Illum

Illum scholæ ordinem dico, quod in scholis nostro ævo usitatus; hunc vero ordinem naturalem, quia idem cum naturæ ordine, quo singula se invicem ita sequuntur, ut ratio sequentis contineatur in antecedente. E. gr. Anatomicus in describenda corporis humani fabrica ordinem scholæ sequitur: etenim peculiari opera describit tegumenta, ossa, musculos, venas, arterias, nervos &c. At in ipso corpore humano alius tenetur ordo, cum ossa, muscoli, venæ, arteriæ, nervi, glandulæ &c. ita invicem coordinentur, prout finis uniuscujusque organi corporis requisiverit. Qui discrimen hic obvium expendit, is differentiam inter ordinem scholæ & ordinem naturalem confusa quidem, sed tamen satis clara idea sibi exhibebit.

## §. 830.

*Ordinis mixti definitio.*

Quod si ea quidem constanter præmittantur, quæ sequentibus intelligendis & demonstrandis inserviunt; hoc tamen non obstante eodem in loco pertractantur ad idem subjectum spectantia, quantum regula anterior permittit; *ordo* dicitur *mixtus*.

Mixtum appello ordinem, quod ordinis scholæ atque naturalis una habetur ratio, quantum quidem fieri potest: fieri enim non potest, ut retento scholæ ordine naturali una constanter satisfiat. Patebit hoc abunde tentanti, modo ordo naturalis fuerit in ejusdem potestate. Sane cum elementa Matheos universæ latina condituri elementa Geometria juxta scholæ ordinem d'gerere conaremur, nullo modo efficere potuimus, ut non violato rigore demonstrandi eidem ex esse satisfaceremus. Alios autores consulentes, qui meliori ordine Elementa Geometria conscripisse celebrantur, quam ab *Euclide* factum, haud multo labore deficientem in demonstrando rigorem deprehendimus. Rigorem igitur in demonstrando applausui vulgi præferentibus, de re non satis expensa per præcipitantiam statuentis, mixtum tandem custodire libuit ordinem. Hunc quoque in philosophia sequi studemus, quemadmodum ex Logica pertractatione apparet.

## §. 831.

*Quod ordo scholæ memoria inferviat.*

Quoniam ordo scholæ requirit, ut eodem in loco pertractentur, quæ ad idem subjectum spectant (§. 829.), eorum vero facilius meminerimus, quæ una memoriæ mandata fuere, quod suo loco demonstrandum tanquam experientia consonum hic sumimus; *ordo scholæ memoriæ inservit*.

Et

Ex hac quidem ratione eundem vindicavimus scriptis historicis dogmaticis (§. 827.): cum enim scripta historica dogmatica dogmatatummodo recenscant (§. 751.), alium usum habere nequeunt, quam ut intellecta, quæ in iisdem traduntur, memoriæ mandentur. Unde scripta historica dogmatica conveniunt ætati, qua memoria viget, iudicii acumen adhuc nullum, vel valde exiguum, atque hominibus hebetioris ingenii & assiduitatis ac attentionis impatientibus.

## §. 832.

Quoniam ordo naturalis postulat, ut continuo præmittantur, quæ sequentibus intelligendis & demonstrandis inserviunt (§. 829.), per demonstrationes vero patet propositionum veritas (§. 544. 557.), consequenter earum beneficio certa obtinetur rerum cognitio (§. 564.); intellectus autem officium est certæ rerum cognitioni studere, quemadmodum suo tempore in Psychologia ostensuri sumus, nec facile quisquam negaverit: ideo manifestum est, quod *ordo naturalis intellectui inserviat.*

Atque ex hac ratione eundem vindicavimus scriptis scientificis (§. 828.): etenim cum in scriptis scientificis dogmata demonstrantur, vel probentur (§. 751.), finis eorum alius esse nequit, quam ut intellectus certa rerum cognitione imbuatur.

## §. 833.

Cum ordo scholæ memoriæ (§. 831.); ordo naturæ intellectui inserviat (§. 832.); ordo autem mixtus ex utroque ita componatur, ut, ordine naturæ stricte observato, simul ordinis scholæ habeatur ratio, quantum per istum datur (§. 830.): *ordo mixtus intellectui & memoriæ una inservit.*

Nimirum si ordo mixtus custoditur, & intellectus certarum cognitione imbuatur, & dogmata ab eo comprehensa memoriæ facilius mandantur.

## §. 834.

*Si quis notiones deceptrices a veris non distinguit, is verba cum rebus confundit.* Etenim cum notio vera sola possibilis sit (§. 547.), ei quoque soli res quædam extra intellectum respondere potest: quod enim impossibile, idem esse nequit. Solus adeo rem quandam novit, qui notionem veram habet.

Ffff 2

Quod-

Quodsi notio fuerit decepatrix, termino videtur respondere aliqua notio, etsi is revera sit inanis (§. 135. 136.). Videtur adeo sibi autor rem quandam intelligere, cum solum nomen tenet, adeoque verba cum rebus confundit.

Dedimus jam supra (not. §. 135. 136.) notionum deceptricium exempla, quæ propositionem præsentem illustrant. Ceterum hæc verborum & rerum confusio subtilior est, quam ut sine acumine agnoscat. Atque adeo hic bonus quoque nonnunquam dormitat *Homerus*.

### §. 835.

Cognitionis  
rei & nomi-  
nis confusio.

*Si autor termino, quem definiturus est, nonnisi confusam jungit notionem, nec terminis definitionem, quam sibi condere videtur, ingredientibus simul sumtis aliam tribuere valet notionem, nisi eandem confusam; is solum rei nomen tradit, non vero rem ipsam declarat.* Sumo, quod rem alteri declaraturus cum docere debeat notas, ex quibus eandem agnoscere atque ab aliis distinguere debeat. Patet itaque, quod definitionem condere teneatur (§. 153.). Enimvero quæ in præsentem casu conditur definitio, revera nulla est (§. 166.). Autor itaque, qui rem declarare sibi videtur, solum nomen rei tradit, haudquaquam tamen rem ipsam declarat.

Exempla jam dedi in superioribus (not. §. 166.), quæ huc trahi possunt ad propositionem præsentem illustrandam. Pertinent etiam huc termini metaphysici scholasticorum, si non omnes, attamen bene multi. Ego enim reperi, facta accuratius inquisitione, scholasticis idem evenisse, quod *Euclidi* circa definitionem lineæ rectæ. Notiones habere confusas, utut claras, ex allatis exemplis manifestas, quorum etiam beneficio eas cum lectore communicarunt, quemadmodum *Euclidi* notio clara fuit, sed confusa lineæ rectæ, schemate oculis exhibitio communicanda. Definitiones terminorum, quibus istæ indignantur, condituri pluribus verbis, quibus singulis sigillatim minime respondent, quæ diversa in rebus insunt, eandem notionem confusam expresserunt, quemadmodum *Euclides* notionem rectæ confusam expressit vocibus *ex aquo interjacere terminis suis*. Atque adeo nullas dedere definitiones; sed nomina tantum rerum confuse perceptarum tradidere. E. gr. Definiri solet *essentia*, quod sit *entitas intrinseca præscindens ab actuali existentia*. Sed in hac definitione minime distincte indignantur, quæ

quæ rei per essentiam denotatæ insunt, & simul sumta eandem absolunt. Cum adeo nullæ notæ enumerentur, unde id, quod essentia appellatur, agnoscere atque a ceteris, quæ enti insunt, distinguere valeas; definitio utique nullæ est (§. 153.). Interim tamen terminus *essentie* non inanis est, sed notio eidem utique responder, utut confusa. Qui igitur distincte explicat, quæ confusa illa notio involvit; is non amplius nomen *essentie* docet, sed rem ipsam eodem indigitatam declarat. Fecimus nos id in superioribus, & ex instituto idem fiet in Ontologia, ubi sedes est doctrinæ de essentia in genere. Etenim dum diximus, essentiam constitui per ea, quæ rei simul atque constanter insunt, quorum tamen unum per alterum non determinatur: distincte exposuimus, unde essentia rei agnosci atque a ceteris, quæ enti insunt, distingui possit. Magnum itaque momentum in eo situm est, ut duos illos casus, quo autores verba cum rebus confundunt, & nomen tradentes rem ipsam non explicant, a se invicem discernamus. Etenim si quis verba cum rebus confundit, ea, quæ profert, rejicienda sunt: si quis vero nomen tradit, rem ipsam non declarat; ejus definitiones emendandæ sunt, notionibus distinctis in locum confusarum surrogatis. Sane quod diversos istos casus non distinxerint *Cartesius* & qui ipsum secuti sunt; Ontologiam scholasticorum tanquam mente vacuum prorsus rejecerunt, immo nonnulli eandem ludibris aliorum exposuerunt, non sine præsentissimo scientiarum damno. Nos vero ad discrimen illud attenti philosophiam primam emendare cepimus ejusque usum indispensabilem in scientiis ceteris ipsaque vita humana deprehendimus, suo loco luculenter ostendendum & aliqua ex parte ex Logicæ nostræ præceptis jamjam elucescentem.

## §. 836.

*Si quis in scripto scientifico definitionem conditurus alia cumulat, quorum unum per alterum determinatur; is propositiones cum definitionibus confundit, definitionum applicationem reddit prolixiorē, judicia format non accurate determinata, nec demonstrationum numerum contrahit.* Etenim ex definitione accurata exulare debent ea, quæ per alia in eadem definito attributa determinantur (§. 730.). Quoniam vero de subiecto prædicantur vi definitionis (§. 219.), adeoque prædicata constituunt de definito tanquam subiecto enuncianda (§. 200.); ex iis atque definito formandæ sunt propositiones (§. 41.).

Ffff 3

Quam-

*Incommoda ex cumulatione superfluarum in definitionibus enata.*

Quamobrem qui definitionem conditurus cumulat alia, quorum unum per alterum determinatur, is definitionibus ingerit, quæ ad propositiones spectant, adeoque definitiones cum propositionibus confundit.

Definitionem ad rem obviam applicaturus ante ostendere tenetur, eidem convenire notas in definitione enumeratas simul, quam constat, eidem convenire definitum (§. 349.). Quodsi ergo in definitione cumulentur superflua, quæ perpetram pro notis ad definitum agnoscendum & ab aliis discernendum requiri judicantur; plura eidem convenire ostendendum est, quam necesse fuerat, antequam ei definitum tribuere possis. Definitiones a leco applicatio iusto prolixior redditur.

Quæ de subiecto absolute prædicantur, eadem ipsi tribuntur sub conditione definitionis (§. 225.). Quodsi ergo definitio superflua continet, conditio sive hypothesis, sub qua prædicatum subiecto tribuitur, plura supponit, quam ad hoc sufficit, ut prædicatum subiecto conveniat. Iudicium igitur accurate determinatum non est.

Quoniam denique in scripto scientifico definitione non licet uti tanquam principio demonstrandi, nisi ejus realitate, seu notionis eidem respondentis possibilitate evicta (§. 790.); demonstrandum utique erit, quæ in definitione conjunguntur, eidem subiecto una inesse posse (§. 519.). Quodsi ergo in definitione continentur, quæ per alia in eadem definito attributa determinantur; demonstrandum est, hæc ideo definito convenire, quia conveniunt cetera in definitione posita, per quæ determinantur (§. 219.). Eadem igitur opus est demonstratione (§. 551.), sive id, quod per alia, quæ definitionem ingrediuntur, determinatur, instar prædicati definitio tanquam subiecto attribuas; sive idem definitione una comprehendas. Numerus adeo demonstrationum haud quaquam imminuitur, ubi in definitione cumulantur, quæ per se invicem determinantur.

E. gr. Per æqualitatem laterum simul determinatur æqualitas angulorum in triangulo æquilatere. Quodsi *triangulum æquilatrem* definitis

finias per triangulum æqualium laterum & angulorum, theorema, in triangulo æquilatere anguli sunt inter se æquales, vel triangulum æquilatrum est æquiangulum, cum definitione confundis. Ostensus triangulum dictum esse æquilaterum demonstrare teneris, idem & latera æqualia, & angulos æquales habere, cum sufficiat ad inferendum, quod in numerum triangulorum æquilaterorum referri debeat, æqualitatem laterum esse manifestam. Quod si supposita hac definitione theorema conditur, perpendiculum ex vertice in basin demissum dividit triangulum æquilaterum bisariam; idem æquivalere huic propositioni hypotheticæ: Si triangulum & latera, & angulos æquales habet, perpendiculum ex vertice in basin demissum ipsum bisariam dividit. Hypothesis adeo continet superflua, cum æqualitas laterum ad hoc sufficiat, ut perpendiculum triangulum bisariam dividat. Denique demonstraturus triangulum, quod construere docuisti, esse æquilaterum, ostendere debes non modo, quod tria habeat latera æqualia, verum etiam quod ob æqualitatem laterum anguli simul singuli sint inter se æquales, adeoque demonstrationes realitatis definitionis & theorematis, quod cum ea confunditur, combinantur. Similiter in theologia naturali ex eo, quod Deus est ens a se & in eo continetur ratio sufficiens existentie contingentis hujus universi, deduci possunt cetera, quæ de eodem cognoscimus, attributa & opera, quemadmodum a me factum est in meditationibus metaphysicis & Theologia naturalis in Institutionibus *Thümmigii* loquitur. Quamobrem *Dei* definitionem nominalem conditurus eum definiri per *ens a se*, quod in se continet rationem sufficientem existentie contingentis hujus universi, cum non modo terminos definitionem ingredientibus in antecedentibus sufficienter explicasset, sed & demonstrasset, quod ens istiusmodi detur, ut de realitate definitionis nullum superesset dubium. Quod si quis eodem, quo nos usi sumus, argumento existentiam & attributa atque opera divina demonstraturus plura, quæ Deo conveniunt, in definitione cumulari eumque definiret per *spiritum infinitum & independentem*, qui, cum a se existat, sibi ipse sufficiensissimus, nec ulla re extra se ad beatitudinem suam indigens, ex liberrimo tamen beneplacito gloriam suam demonstraturus hoc universum, quod contingenter existit, in tempore ex nihilo produxit, idemque adhuc conservat atque gubernat, sapientia sua summa ac bonitati convenienter; is omnia ista incommoda incurreret, quæ in præsentem propositionem ex cumulatione superfluum in definitionibus deduximus. Realitatem hujus definitionis demonstraturus, antequam eadem uti potest tanquam principio demonstrandi,

strandī, evincere tenetur, quæ in definitione cumulantur, sibi mutuo non repugnare, sed eidem enti convenire posse (§. 547.). Cum igitur ex contingentia universi & principio rationis sufficiens sequatur, quemadmodum a me ostensum, *dari ens a se & in eo contineri rationem sufficientem existentie universi*; ulterius demonstrandum est 1. *ens illud esse spiritum* 2. *infinite* & 3. *independentem*; 4. *idem sibi sufficere*, nec ulla re extra se indigere, 5. *habere voluntatem liberam* & 6. *decreta libera exequi posse*; 7. *mundum ab eo non fuisse productum ab eterno*, 8. *eundem fuisse productum ex nihilo*; 9. *mundum ab eodem adhuc conservari*, atque 10. *gubernari*; 11. *finem creationis esse demonstrationem gloriæ ipsius*, 12. *idem ipsum ens esse sapientissimum*, nec non 13. *bonum erga alios, seu benignissimum*. Omnes istæ propositiones cum ex eo demonstrari possint, quod Deus sit ens a se & in se contineat rationem existentie contingentis universi; plurimæ propositiones a definitione distinguendæ cum eadem confunderentur, singulæ tamen eodem modo adhuc demonstrandæ, ac si ex definitione exularent, & propositiones ceteræ de Deo non forent determinatæ, cum conditio, sub qua prædicatum de subiecto enunciaretur, plurima contineret, quorum in demonstrando nulla habenda esset ratio. E. gr. Propositio: *Deus est omniscius*, logice resoluta (§. 226.) in hanc abiret: *Si Deus est spiritus infinitus & independent, si a se existit & sibi ipse sufficit ad beatitudinem suam, nec ulla re extra se indiget, si voluntatem habet liberam & decreta libera exequi potest, si mundum in tempore produxit & quidem ex nihilo, gloriæ suæ demonstranda gratia, eumque adhuc conservat & gubernat, si denique sapientissimus atque summe bonus est; omniscius est*. Quod si quis demonstrationem omniscientiæ divinæ adornare tentet (§. 551.); is abunde satis intelliget, quod multa superflua ingrediantur hypothesin, quibus ad demonstrandam omniscientiam minime opus.

## §. 837.

*Quando superflua in scriptis dogmaticis historicis continere non debeant definitiones.*

*Si scriptum dogmaticum historicum ea fini conditur, ut ad scientifica intelligenda præparetur lector & alii discant veritates in usum vitæ; in definitionibus cumulanda non sunt verba, quorum unum per alterum determinatur.* Etenim si scriptum dogmaticum historicum ea fini conditur, ut ejus lectione ad scientifica tractanda præparetur lector; tales in eo condendæ sunt definitiones, quibus in scripto scientifico locus est. Quamobrem



obrem cum ex scientifico proscribantur definitiones, in quibus talia cumulantur, quorum unum per alterum determinatur (§. 836.); nec eadem in historico tolerari possunt, cujus lectione præparari debet lector ad scripta scientifica tractandi.

Si scriptum dogmaticum historicum ea fini conditur, ut lectores discant veritates in usum vitæ; definitiones ita formandæ sunt, ut absque ambagibus ad rem in casu dato obviam agnoscendam & ab aliis distinguendam applicari possint. Enimvero definitiones, in quibus talia cumulantur, quorum unum per alterum determinatur, absque ambagibus applicari nequeunt (§. 836.): in scripto igitur dogmatico historico in usum vitæ conscripto tolerari nequeunt.

E. gr. In Geometria practica absque demonstrationibus in usum Geodætæ conscripta in definitione hexagoni regularis non cumulanda sunt plura, quam quæ ad figuram oblatam agnoscendam & ab aliis distinguendam sufficiunt. Etenim si quis *hexagonum regulare* definirer per *figuram, quæ sex latera equalia totidemque angulos equalis habet*, quorum illa simul sumpta sunt ad radium circuli circumscripti in ratione sextupla, horum vero unus ad rectum in ratione sesquitertia; definitio praxi geodætice minime responderet. Etenim judicaturus in casu obvio, utrum figura oblata sit hexagonum regulare, nec ne, inquirere deberet, num præter sex latera equalia & angulos singulos inter se equalis, perimenter ad radium circuli circumscripti habeat rationem sextuplam, unus angulorum vero ad rectum rationem sesquitertiam. Superfluo itaque labore applicationem definitionis sibi redderet molestiam eadem usus, cum sufficeret ad agnoscendum, quod data figura sit hexagonum regulare, nosse æqualitatem sex laterum atque angulorum. Idem eodem modo se habet, si superflua cumulantur in definitione temperantiæ: etenim & ejus applicatio laborem inutilem ac subinde minime superandum facessit, ubi superflua, quæ definitionem ingrediuntur, in subiecto obvio latent, nec a nobis in apicum produci possunt.

### §. 838.

*Si scriptum dogmaticum historicum ea fini conditur, ut tantummodo constet lectori, quænam sint definiti prædicata, in sola hac notitia acquieturo; tum in ejus notione omnia prædicata* *Quando in scripto dogmatico historico defini-*  
*(Wolffii Logica)* *Gggg* *cumu-*

*notiones su-  
per sua con-  
tinere que-  
ant.*

*cumulari possunt, diciturque istiusmodi descriptio abusive definitio.* Etenim si quis rei prædicata tantummodo nosse desiderat, ut sic ferente occasione eadem enarrare possit, aut recorderetur, hoc vel istud prædicatum, de quo sermo est, illi convenire; is omnia simul memoriæ mandare debet, cum sic audito nomine rei statim succurrant omnia prædicata, vel audito prædicato uno in memoriam redeant una cetera: id quod per ea manifestum est, quæ de memoria experientia loquitur. Consultum igitur est, ut nomini rei jungantur omnia prædicata, quotquot lectori familiaria reddere intendit scriptor.

Enimvero cum sic prodeat propositio composita ejusdem subjecti (§. 314.), minime autem definitio (§. 153.); nec nomen definitionis eidem tribui potest (§. 349.). Quod si igitur propositioni huic compositæ definitionis nomen tribuitur, id per abusum fieri manifestum est.

Atque jam intelligitur ratio, cur in applicandis & dijudicandis definitionibus adeo cespitare soleant, qui istiusmodi scripta historica dogmatica ultra finem ipsis propositum extendentes, quæ ibi didicere vel ad usum vitæ, vel ad scripta scientifica intelligenda transferant. Ipsorum adeo cum non sit definitionibus ferre iudicium, quæ in scriptis scientificis & ad usum vitæ utiles deprehenduntur; mirum non est, ubi reprehenderint, quod laudare debebant, scilicet quod ex definitionibus superflua exulent. Nobis cum hoc scriptorum genere nihil negotii est, quibus non probatur, ut rerum cognitionem per se appetamus & in ea acquiescamus, sed non nisi ad usum vitæ profutura placent. Nam ipsis quoque scientias sublimes ideo excolendas præcipimus, quod ipsemet in eundem redundare valent.

#### §. 839.

*Quando defini-  
tiones mu-  
tile & que-  
nam de iis te-  
nenda.*

*Si definitio non omnia continet, quæ rei constanter insunt, nec tamen per se invicem determinantur; definitum tribuetur rebus, quibus minime convenit, nec omnia illius attributa inde demonstrari poterunt, ipsaque definitio manca, vel mutila est.* Ea, quæ constanter insunt, quorum tamen unum per alterum non determinatur, essentialia sunt (§. 64.). Quod si ergo definitio non omnia continet, quæ rei constanter insunt, nec  
tamen

tamen per se invicem determinantur; definitionem generis vel speciei requisitam nondum habes (§. 172.). Si igitur eam pro definitione venditas, mancā, vel mutilam habes.

Jam cum definitum tribui non possit nisi rei, cui omnia essentialia conveniunt (§. 349.); definitione manca usus ideam tribuere debet rei, cui ipsum minime convenit.

Denique cum ex definitione demonstrari nequeant, nisi quæ positis iis, quæ in definitione continentur, una ponuntur (§. 551.); ex definitione integra omnia attributa tam communia tum propria; ex mutila autem non nisi quædam communia inferri possunt (§. 66.). Patet igitur ex definitione mutila non omnia rei prædicata demonstrari posse.

E. gr. Definitio *figura regularis* mutila est, quod sit *figura æqualibus lateribus prædita*, cum ad figuræ regularitatem etiam requiratur *angulorum æqualitas*. Hac igitur definitione usus nomen figuræ regularis tribuet figuris æquilateris inæqualium angulorum, consequenter minime regularibus. Neque ex sola laterum æqualitate supposita demonstrabit, figuras regulares esse circulo inscriptibiles: quæ tamen in ipsa praxi utilissima est figurarum regularium proprietas.

#### §. 840.

Quoniam attributa communia per unum saltem, aut aliquot essentialia determinantur (§. 66.), consequenter per se mutuo determinari nequeunt, adeoque in abstracto considerata cum essentialibus convenire videntur (§. 64.), demonstrationem propositionis præcedentis adhuc subsistere patet, si in definitione attributa communia pauciora commemorentur, quam quot junctim sumta nonnisi definito competunt. Patet igitur, *si in definitione pauciora attributa commemorantur, quam quot junctim sumta nonnisi definito competunt; definitum tribui debere rebus, quibus minime convenit, nec omnia illius essentialia & attributa propria ac communia cetera inde demonstrari posse, ipsamque definitionem mutilam esse.*

*Alius casus  
definitionum  
mutilarum.*

E. gr. Quia figura regularis æquilatera est, singula latera ad perimetrum eandem rationem habent, Hac adeo proprietas communis est figuris regularibus cum omnibus figuris ceteris æquilateris. Quod si

ergo figuram regularem definias per eam, *cujus latera singula ad integram perimetrum eandem rationem habent*; definitio mutila est, cum addi deberet, & *angulorum singulorum rationem ad summam omnium eandem esse*, neque inde demonstrari potest, figuram regularem esse æquiangulam & circulo inscriptibilem. Similiter mutila foret definitio auri, quod *si metallum flavum & grave*, cum color flavus & gravitas etiam orichalco conveniant. Definitiones scholasticorum in Metaphysicis sæpius mutilæ sunt: unde eas salvaturi, datis instantiis, in distinctiones inutiles inciderunt, qualis foret *figurarum regularium* in eas, *quæ circulo inscriptibiles sunt & quæ circulo inscribi nequeunt*. Antequam in rerum cognitione multum profecerimus, fieri facillime potest, ut definitiones mutilas condamus: Quas tamen ideo contemneri non debemus, cum ansam dent vel earum autoribus, vel aliis eas integras efficiendi, ubi instantiis oblatis mutilæ deprehenduntur. Tum demum vitio vertuntur definitiones mutilæ, ubi integræ jam in publicum prostant atque vulgares factæ. Imponunt autem definitiones mutilæ inventoribus etsi acumine præditis, quod animum ad rem ipsis minime familiarem, vel antea nonnisi confuse percepit primum advertentes defectum notionis distinctæ, quam sibi formant, eo, quod in confusa adhuc continetur, suppleant. E. gr. Qui figuram regularem intuetur, & laterum, & angulorum æqualitatem intuetur: cum tamen laterum æqualitas magis pateat, quam angulorum; rerum geometricarum ignarus figuram regularem sibi ex æqualitate laterum agnoscere videtur, imaginatione supplente, quod notioni distinctæ deest, quæ & eandem linearum ad se invicem inclinationem exhibet, in qua angulorum æqualitas consistit. Quod si jam objiciatur figura æquilatera angulorum inæqualium, attonitus circa eandem hæret, mox in defectum definitionis inquirens ex utriusque figuræ, veræ scilicet regularis & perperam pro tali habendæ, collatione differentiam angulorum primum confuse percipit, deinde etiam distincte agnoscit. Atque sic definitio mutila integra efficitur. Qui in condendis definitionibus, quæ adhuc desiderantur, vel ab ipso ignorantur, sedulus versabitur; is propria experientia veritatem dictorum assequetur. Nec inutile est exercitium, si quis definitiones ipsemet condere studet & a se repertas cum definitionibus aliorum confert. Quod si enim aberraverit, in rationem aberrationis inquirens attentionem & acumen haud parum perficiet: id quod & in aliis quibuscunque Logicæ exercitiis locum habet.

## §. 841.

*Si quis definitiones quarum realitatem nondum adstruxit, Quando & propositiones probatione indigas, sed nondum probatas in de- principia monstracionibus, vel probationibus in numerum præmissarum ad- sint incerta mittit; is principiis utitur incertis.* Etenim si quis definitionibus & propositionibus utitur tanquam præmissis in demonstratione, vel probatione, is eadem tanquam principia demonstrandi, vel probandi sumit (§. 561.). Quodsi realitas definitionum non fuerit evicta, seu, quod perinde est, nondum constet, rem definitam esse possibilem; num vera an falsa sit definitio, adhuc latet (§. 547.). Similiter liquet si propositio, quæ demonstratione indiget, seu, quod perinde est, de qua non constat, utrum prædicatum subiecto conveniat, nec ne, sine probatione sumitur, nondum patere, utrum ea vera sit, an falsa (§. 505.). Incertæ igitur sunt definitiones pariter atque propositiones (§. 564.), consequenter qui definitionibus, quarum possibilitas nondum evicta, & propositionibus probatione indigis, sed nondum probatis, utitur tanquam præmissis in demonstrando, vel probando, is principiis utitur incertis.

E. gr. *Cartesiani* vulgo definitione *Dei*, quod sit *ens perfectissimus*, utuntur in demonstrandis existentia & attributis divinis. Theologiam adeo naturalem superstruunt principio incerto, etsi vero. Nos vero in *Commentatione de differentia nexus rerum sapientis & fatalis necessitatis* (§. 5.) ostendimus, quomodo illius realitas evincatur, ut principium certum evadat. Similiter alii probaturi existentiam *Dei* sine probatione sumunt, *mundum cepisse*, cum tamen vel ideo probatione indigeat, quod, qui *Deum* existere negant, sumunt *mundum* non cepisse. Probationem adeo denuo principio etsi vero, incerto tamen superstruunt. Quamvis enim fieri possit, ut aliis certa sint, quæ auctori incerta sunt (§. 565.) & lectori ejus, qui veritatem aliunde nondum edoctus est, incerta esse debent; non tamen ideo dici potest uti principiis certis, cum notio certitudinis non sit absoluta, sed respectiva (§. 564.). Maxime autem dicendum est, quod autor scripti dogmatici utatur principiis incertis, si nemo adhuc publice definitionis realitatem solide adstruxerit, vel propositionem, quam sumit, probaverit. Ceterum theorema præfens intelligendum est tum de

propositionibus, quæ a priori demonstrantur, tum de ceteris, quæ per experientiam stabiliuntur.

§. 482.

*Quando propositiones incertæ sint.*

Quoniam conclusio certa esse nequit, quæ probatur per principia incerta (§. 570.); *propositiones quæque incertæ esse debent lectori, si autor definitionibus utitur, quarum possibilitatem non adstruxit & propositiones ad probandum ceteras sine probatione sumit, utut probatione indigeant.*

E. gr. Si philosophus *Cartesianus* non ostenderit, *ens perfectissimum esse possibile*, & tamen notione ejusdem utatur ad demonstrandum existentiam & attributa divina; is iudice ipso *D. Thoma*, quemadmodum dudum monuit *Leibnizius* in *Actis Eruditorum* A. 1684. p. 539. existentiam Dei dubiam relinquit lectori, nisi aliunde fuerit de eadem certus. Atque ea ratio esse potest, ut autores acumine sufficiente non pollentes sibi videantur certi de propositionis veritate, quam principiis nondum probatis superstruunt, quod confundant certitudinem, quam aliunde habent, cum certitudine, quæ ex probatione ab ipsis allata nasci debet. Sane homo christianus ex scriptura sacra de Dei existentia & attributis convictus de his tanti momenti veritatibus certus esse potest, etsi nullo argumento philosophico easdem probare valeat. Quamobrem ubi principia precaria ad eas probandas affert, iisdem tribuit vim ad assensum compellendi, quam aliunde accepit. Fallitur itaque, dum sibi persuadet, hominem acumine pollentem, vel etiam alium ex scriptura sacra, aut aliunde de veritate existentie Dei nondum convictum eandem vim in se percipere debere. Non adeo sufficit, ut autor probaturus, se dogmata sua solide demonstrasse, conscientiam suam appellet testem, quod demonstrationum, vel probationum suarum vim in se perceperit. Ex principiis logicis distincte decidendum, num valida sit demonstratio, an vacillet.

§. 843.

*Principiorum precariorum definitio.*

*Principia probandi probatione indiga, sed sine probatione sumta dicuntur precaria.*

E. gr. Si quis contra atheum disputaturus postulat, ut sine probatione concedat, mundum aliquando cœpisse, quod ille stante errore suo non largitur; is inde existentiam Dei eidem demonstraturus principio precario utitur. Nisi enim aliunde eidem probaverit, mundum non esse a se, quemadmodum a nobis factum est in *Metaphysicis*, probationem

tionem ejus nunquam admittit, sed constanter urgebit, precario sumi tanquam verum, quod falsum esse ipse arbitratur, mundum aliquando cœpisse, cum antea non existeret.

## §. 844.

Patet adeo eos *principiis precariis uti, qui utuntur principiis incertis* (§. 841. 843.).

*Principiis precariis quinam utantur.*

Exempla igitur, quæ paulo ante (not. §. 841.) dedimus, huc quoque referenda sunt. Nec minus patet, propositiones incertas permanere lectori, si principiis precariis utatur autor.

## §. 845.

*Si autor scripti scientifici definitiones ab aliis datas & adstructas atque propositiones ab aliis publice demonstratas supponit, quæ tamen lectori perspectæ non sunt, atque iis utitur tanquam demonstrandi principiis; nec lector propositiones ab ipso propositas satis intelliget, nec de earum veritate erit certus.* Quando propositiones non satis intelligantur, nec earum veritas certa fit lectori. Enim si definitiones terminorum, quibus autor utitur, lector non habuerit perspectas; non satis perspicit, quasnam cum illis notiones jungere debeat (§. 152.): mentem adeo autoris non satis intelligit (§. 117.).

Quod si lectori præterea non perspectæ sunt propositiones earumque demonstrationes, quas autor alibi datas supponit, perinde illi est, ac si is uteretur propositionibus nondum probatis, tanquam præmissis in ratiociniis, quæ probationem propositionis suæ ingrediuntur, consequenter ac si uteretur principiis incertis (§. 841.). Lectori itaque ipsæ quoque propositiones ab autore probatæ incertæ esse debent (§. 842.).

Ea sane ratio est, cur schediasmata Mathematicorum, quæ Diariorum Eruditorum inserta leguntur, & difficulter, vel prorsus non intelligantur, & evidentis veritatis non agnoscantur ab iis, qui nondum omnia Mathematicorum & veterum, & recentiorum inventa, quæ ab illorum autoribus tanquam cognita præsupponuntur, perspecta habent aut familiaria sibi reddiderunt. Multo magis idem obtinet, si autor tanquam vera supponit, quæ nec ipse, nec alius adhuc publice demonstravit, propterea quod in iis probandis sibi privatim satisfecerit. Atque ea ratio est, cur schediasmata *Leibnitii* philosophica, quæ in Eruditorum

rum diariis leguntur, aliis ænigmatica, aliis prorsus chimærica visa, prout vel autoritati tanti viri aliquid deferentes facile admiserunt, non proferri ab eo in publicum, nisi circa quod sibi privatim satisfecit, vel nullam certitudinem iis inesse statuerunt, quarum nullam ipsi perspicere potuerunt.

## §. 846.

*Quomodo certitudini consulatur, ubi ab aliis data præsupponuntur.*

*Quodsi autor, quæ aliunde supponit, ex aliis autoribus citet, lector veritatem eorum, quæ probat, assequi valet, ubi ante aliunde sibi cognita & perspecta reddit, quæ præsupponuntur.* Lector enim de veritate propositionis, quam autor probat, certus non est, quod ignoret, num ea vera sint, quæ tanquam vera ab eodem præsupponuntur (§. 845.). Enimvero si ex aliis autoribus citantur, quæ aliunde cognita præsupponuntur, perinde est ac si ipse autor ea probata dedisset &, ubi lector eadem sibi cognita & perspecta reddit, de earum veritate non amplius dubitat. Ergo veritatem eorum, quæ autor tradit, assequi valet.

Veritatem asserti ipso opere assequetur, qui elementa nostra Metheos Latina evolverit, ubi in disciplinis sequentibus non sumimus, nisi quod ex præcedentibus citamus. Cum vero singulæ disciplinæ, ut ut uno volumine comprehensæ, sint quasi totidem libri a diversis autoribus scripti; perinde omnino est, ac si ex aliis autoribus præsupposita in disciplinis sequentibus citarentur. Idem experiri licebit in operibus nostris philosophicis, ubi eundem morem constanter sumus observaturi, cum hoc unice nobis propositum sit, ut lectorem nostrum ad certam atque utilem perducamus rerum cognitionem.

## §. 847.

*Quales definitiones & propositiones in scripto historico dogmatico collocande.*

*Si scriptum dogmaticum historicum ea fini conditur, ut ad scientifica intelligenda præparetur lector & alii discant veritates in usum vitæ; definitiones nullæ in eo collocari debent, nisi quarum realitas in scripto scientifico jam adstructa, nec propositio ulla in eodem ponenda, nisi quæ jam publice in scripto aliquo scientifico fuerit demonstrata.* Etenim in scripto scientifico non admittuntur definitiones, nisi quarum realitas adstruitur (§. 790.). Quamobrem si scriptum dogmaticum historicum ea fini conditur,



ditur, ut lector ad legenda scripta scientifica præparetur; definitiones in eo non aliæ collocandæ, quam quæ in scientifico usui esse possunt, consequenter quarum realitas in hoc fuit adstructa.

Quamdiu possibilitas definitionis nondum fuit adstructa, num ea vera sit, an falsa, ignoratur (§. 547.). Tuto igitur eandem ad usum vitæ transferre non licet: immo si impossibilis fuerit, per eam nunquam res definita agnosci poterit.

Similiter in scripto scientifico non locum habent propositiones nisi probatæ (§. 790.). Quamobrem si scriptum dogmaticum historicum lectorem docere debet in scientificorum lectione usui futura; nec aliæ in eo propositiones locum habere possunt, nisi quæ in scripto aliquo scientifico jam publice fuerint demonstratæ.

Quamdiu propositio aliqua nondum demonstrata, utrum ea vera sit nec ne, ignoratur (§. 570.). Tuto igitur ad usum vitæ transferri nequit: etenim si contingat eam esse falsam, falsa quoque hinc inferetur conclusio in casu obvio (§. 348. 538.).

E. gr. Si quis definitionem temperantiæ impossibilem format, is vi ejusdem homini, quem aliunde temperantem judicat, tribuet, quæ nunquam eidem convenire possunt. Quoniam itaque fieri nequit, ut in quodam unquam homine ea inesse deprehendantur, quæ in notione deceptrice temperantiæ continentur; nunquam etiam eadem homini temperanti agnoscendo inserviet. Similiter si quis de temperante judicaverit, quæ eidem convenire nequeunt; is in casu dato homini temperanti in singulari tribuet ab eodem maxime aliena. Patet igitur, quamdiu non constat, definitionem temperantiæ esse possibilem &, quæ de temperante affirmantur, esse vera; definitiones pariter ac propositiones ad vitæ usum parum utiles esse. Quæ de inutilitate in scriptis scientificis in genere demonstrata sunt, ad hunc, vel alium casum specialem absque ulla difficultate applicantur.

§. 848.

*Quodsi propositiones aliquæ in scriptis scientificis nondum fuerint demonstratæ, sed probabiliter tantummodo assertæ, quæ tamen vel in scientiis ad reddendas eorum, quæ observantur, probabilibus* *Quando propositionibus*  
*(Wolffii Logica)* *Hh hh* *ratio-*

*in scripto dogmatico historico sit locus.*

*rationes, vel ad quasdam in vita praxes utiles, quamdiu veritas ad liquidum non fuit perducta; eadem quoque scripto dogmatico historico in hypothesi theorematum præcedentis inferenda sunt, ita tamen ut propositiones certæ a probabilibus distinguantur.* Etenim in hoc casu propositiones probabiles locum demonstratarum tuentur in scriptis scientificis, quamdiu earum veritas ad liquidum perducitur, nequit. Quare cum demonstrata in hypothesi propositionis præcedentis locum habeant in scripto dogmatico historico (§. 847.); in præsentem casum probabiles quoque in eodem sibi locum vindicant. Distinguenda tamen sunt propositiones probabiles a certis, ne lector scripti dogmatici historici pro demonstrato habeat, quod tantummodo probabile est, refragaturus veritati, si quando eadem in apicem prolata probabili contrarietur (§. 591. 592.).

Exempli loco esse possunt compendia astronomica, in quibus theoricæ planetarum explicantur: quale olim dederat Purbachius. Huc enim etiam referenda sunt, quæ de hypothesibus philosophicis docuimus (§. 127. & seqq. *Disc. prælim.*).

#### §. 849.

*Quando certa cum incertis confundantur.*

*Si autor scripti dogmatici historici propositiones probabiles a demonstratis non distinguit; certa cum incertis confundit.* Propositionem veram esse agnoscimus, quam demonstratam esse constat (§. 544.). Ea igitur certa est (§. 564.). Quoniam vero propositio probabilis falsa esse potest (§. 591.), ei autem contraria vera (§. 592.); eadem incerta est (§. 564.). Quamobrem qui propositiones probabiles a demonstratis non distinguit; is certa cum incertis confundit.

In scriptis scientificis ipsa probatio, quæ propositioni adjicitur (§. 751.), ostendit, num propositio aliqua sit demonstrata, an saltem probabiliter probata (§. 580. & seqq.). Non igitur opus est, ut ibidem perinde ac in scriptis dogmaticis historicis discrimen inter propositiones demonstratas & probabiles disertis verbis inculcet.

#### §. 850.

*Alius casus.*

*Si quis propositiones pro demonstratis venditat, ad quas probandas sumis alias nondum probatas; is denuo certa cum incertis*

*certis confundit.* Etenim si probationem ingrediantur propositiones nondum probatae, propositio demonstrata non est (§. 498.). Quare cum veram esse ignoremus (§. 544.); incerta nobis eadem est (§. 564.). Quodsi ergo eam pro demonstrata, consequenter pro vera (§. 544.) atque adeo pro certa (§. 564.) venditamus; certa cum incertis confundimus.

Nihil frequentius est, quam ut autores scriptorum dogmaticorum historicorum, qui non modo dogmata recensent, verum etiam argumenta, quibus probantur, indicant, propositiones pro demonstratis venditent, quas principiis precariis superstruunt. Quis igitur non videt? quod certa cum incertis confundant.

§. 851.

*Si quis propositionis veritatem experientia constare dicit, quæ Casus tamen per eandem non patet, is quoque certa cum incertis confunditur.* Cum illud experiamur, quod ad perceptiones nostras attenti cognoscimus (§. 664.), si qua in subjecto aliquo observamus, ea eidem convenire vel absolute, vel sub data conditione, prout casus tulerit, dubitandum non est. Certa igitur sunt, quæ experimur (§. 567.). Quamobrem qui propositionis veritatem experientia constare affirmat, is eam pro certa venditat. Quodsi tamen vitium subreptionis in experiundo committitur (§. 668.), eandem veram esse experientia nondum constat, cum præcario sumatur, consequenter incertam adhuc esse liquet (§. 564.). Autor igitur certa cum incertis confundit.

E. gr. Vulgus & qui in astronomica vulgo non altius sapiunt sibi persuadent, experientia constare, quod terra quiescat & stellæ in universum omnes circa eandem ab ortu in occasum ferantur: Opticæ tamen gnarus probe intelligit, idem quoque apparere debere, si stellæ cum sole quiescant & terra motu vertiginis ab occasu versus ortum circumvolvatur. Qui igitur quietem Telluris & motum Solis atque stellarum diurnum tanquam experientia certum sumunt; ii certa cum incertis confundunt. Exemplum simile præbet influxus animæ in corpus physicus, quemadmodum supra jam ostendimus (not. §. 667.).

§. 852.

Quoniam multa cautione opus est, ne in formandis no- *Ejus specialitio-*  
Hh hh 2 *or explicatio.*

tionibus & iudiciis intuitivis modos cum attributis & attributa communia cum essentialibus (§. 672. & seqq.) confundamus, vel pro causa effectus venditemus, quæ talis non est, atque pro unica habeamus, quæ plures socias requirit (§. 697. & seqq.) & ut notiones universales (§. 678. 682. & seqq.), definitiones (§. 679. & seqq.) atque propositiones universales cum categoricas (§. 705.), tum hypotheticas universales (§. 706. 707.) rite formemus; haud obscure patet (§. 851.), *si quis in discernendis modis & attributis rerum observabilium, atque distinguendis attributis communibus a propriis & utrisque ab essentialibus, nec non in formandis notionibus universalibus, definitionibus & propositionibus universalibus atque in determinandis effectuum observabilium causis in regulas experientie a nobis demonstratas impingat, eum certa cum incertis confundere.*

Errorum hunc committunt autores cum scriptorum dogmaticorum historicorum, tum scientificorum, nec adeo facile est, eundem evitare vel commissum ab aliis detegere. Experta loquor, quæ olim experientur, acumen ad experiendum sufficiens assidua industria sibi comparaturi.

## §. 853.

*Alia certi atque incerti confusio.*

*Si autor scripti dogmatici historici argumenta, quibus propositiones probantur, tantum indicat, involuta tamen pro demonstrationibus venditat; is denuo certa cum incertis confundit.* Si prædicatum subjecto convenire sive directe, sive indirecte demonstrare valemus, propositio nobis certa est (§. 568.). Quod si igitur autor scripti dogmatici historici argumenta involuta, quæ commemorat, pro demonstrationibus venditat; is propositiones a se allatas per ea lectori certas fieri contendit. Enimvero cum argumentum involutum a forma demonstrationis genuinæ quam longissime ablit (§. 551. & seqq.), veritatis autem propositionis certus non sit, qui nullam demonstrationis genuinæ formam animo comprehensam habet, nec perspicit, num forma demonstrationis præsentis genuina sit (§. 570.); vi argumenti involuti lector intelligens veritatis propositionis certus

certus fieri nequit, nec fieri potest, ut ipse autor scripti dogmatici historici ejusdem certus evadat. Patet igitur in hoc casu certa cum incertis confundi.

E. gr. Si quis contenderet, se demonstrasse theorema Geometriæ elementaris, quod recta ex centro circuli *E* ad chordam *AB* perpendicularis *CE*, & chordam *AB*, & arcum cognominem bisecet, ubi commemoraverit, patere id per congruentiam triangulorum rectangulorum duo latera sigillatim æqualia habentium; is hoc ipso minime lector, qui ipsimet veritatem propositionis perspicere gestiret, de eadem convinceret. Similiter qui refert, Mathematicos ex umbra circulari telluris in eclipsibus lunaribus demonstrare rotunditatem illius, hoc ipso nunquam efficiet ut lector, qui aliis speciminibus demonstrationis vim percepit, vel regularum logicarum gnarus, veritatis illius asserti convincatur. Certam adeo cognitionem in utroque casu cum incerta confundit autor. Lucem huic propositioni quoque affundunt exempla supra (not. §. 570.) allata. Probe autem notandum est, nos non in dubium vocare, quod autores, qui demonstrationis vim nunquam percepere nec certam cognitionem unquam ipsimet consecuti sunt, sibi videantur certi esse de veritate propositionum ob argumenta involuta, quæ proferunt: sed certitudinem apparentem aliunde provenientem v. gr. præjudicio autoritatis debitam, cum ea confundunt.

Fig. 4

## §. 854.

*Demonstratio* dicitur *completa*, in qua omnia principia demonstrandi vel explicite, vel implicite continentur. *Incompleta* vero appellatur, quæ principia demonstrandi nec explicite, nec implicite omnia continet. *Continentur* autem propositiones in demonstratione *explicite*, quæ disertis verbis enunciantur; *implicite* vero, quæ vel per eas, quæ adsunt, vel per citationes in memoriam revocantur.

*Demonstrationis completa & incompleta definitio.*

Exemplis demonstrationum completarum abundant nostra Mathematicos universæ elementa, & in philosophia quoque demonstrationes completas in medium asserre studemus. Illustratur præsens definitio iis, quæ de abbreviandis demonstrationibus docuimus (§. 798). Demonstrationes incompletas sapius hodie amant Mathematici in schediasmatis, quæ Diarii eruditorum inferere solent, cum plura demonstrandi principia prætermittant, quæ plerique lectores nonnisi difficulter sibi in memoriam revocant, propterea quod in iis, quæ adsunt,

non continetur propinqua & determinata ratio, cur quæ absumt memoriam subeant.

§. 855.

*Demonstratio-  
tionis con-  
summata &  
inconsummata  
& definitio.*

*Demonstratio consummata* dicitur ordinata completa; *Demonstratio* vero *inconsummata* inordinata incompleta.

Si enim demonstratio & ordinata fuerit, & completa, nihil amplius ad ejus perfectionem accedere potest: id quod ex collatione utriusque definitionis manifestum est, aut ex corollario sequente, quod eidem debetur. Quodsi vero demonstratio fuerit inordinata & incompleta, limam adhuc patitur.

§. 856.

*Criterium  
definitionis  
consummata.*

*In demonstratione igitur consummata nullum demonstrandi principium omittitur, quod non per ea, quæ adsunt, vel per citationes facile in memoriam revocetur, & singula eo ordine collocantur, quo in ratiociniorum serie, in quam demonstratio resoluta abit, continentur.* Etenim demonstratio consummata & ordinata est, & completa (§. 855.), atque adeo patet, quod erat propositum, per definitionis demonstrationis completæ (§. 854.) & ordinatæ (§. 799.).

Idem quoque per indirectum ostenditur. Nimirum si quædam principia demonstrandi omitterentur, quæ per ea, quæ adsunt, vel per citationes in memoriam haud facile revocantur, demonstratio non foret completa (§. 854.); si alio ordine ponerentur, quam quæ in ratiociniorum serie, quibus constat demonstratio, continentur, eadem foret inordinata (§. 799.). Foret adeo demonstratio inconsummata (§. 855.): id quod hypothesein evertit.

Quodsi quis demonstrationes nostras mathematicas ad hunc lapidem lydiū exigere velit, quæ in elementis nostris Mathematicos universæ continentur; is demonstrationum consummatarum intuitivam consequetur cognitionem, ut & ejus formam animo rectius comprehendat, & limatius de eadem judicet. Latet in his generalis ratio, cur cognitio rerum practicarum præstet, si eas in nobis ipsis experiri datur.

§. 857.

*Cur demon-  
stratio com-  
pleta facile,*

*Si demonstratio fuerit completa, ab eo etiam lectore intelligitur, qui in eo argumento, ad quod spectat, nondum mul-*  
*tum*

*tum versatus ; si vero incompleta , ab iis vel prorsus non intelligitur , vel nonnisi difficillime , seu multo temporis ac laboris dispendio.* Etenim si demonstratio completa fuerit , nulla propositio , quæ demonstrandi principium præbet , omittitur , nisi quæ vel per eas , quæ adiunt , vel per citationes in memoriam revocari possit (§. 854.). Quamobrem si ad eam accedat lector , qui in argumento proposito nondum multum versatus , atque adeo propositiones , quæ tanquam demonstrandi principia nota sumuntur , nondum familiares habet , ut data occasione veluti sponte succurrant ; is ex conclusione & præmissa una enthymematis nullo negotio elicit alteram (§. 798. ) , vel operatione citationis adjectæ eam alibi evolvit , ut adeo perinde sit , ac si principia omnia disertis verbis enunciarentur. Cum adeo lector nullam conclusionem inferri videt , nisi quæ ex principiis , de quorum veritate dubitare nequit , consequitur ; demonstrationem utique intelligit , etsi in eo argumento , ad quod spectat , nondum multum fuerit versatus.

Jam e contrario in demonstratione incompleta omittuntur propositiones demonstrandi principia præbentes , quæ per eas , quæ adiunt , vel per citationes in memoriam non revocantur (§. 854.). Quodsi igitur ad eam accedat lector , cui ea , quæ tanquam certa præsupponuntur , non adeo familiaria sunt , ut , quoties eorum meminisse debet , veluti sponte occurrant ; is vel prorsus non ea sibi in memoriam revocare potest , atque adeo demonstrationem non intelligit , vel nunc hanc , nunc aliam propositionem sibi in memoriam revocans , vel in libris aliis , aut in antecedentibus ejusdem , qui præ manibus est , libri evolvens tentat , num ea præmissæ desideratæ vicem ad inferendam aliquam conclusionem in demonstratione contentam subire possit , consequenter nonnisi multo demum temporis ac laboris dispendio eam intelligit.

Nos in elementis nostris Matheſeos , Arithmeticæ præsertim & Geometriæ , dedimus demonstrationes completas ; *Chrysostomus* contra *Sturmii* in *Mathesi enucleata* sæpiissime incompletas , dum per modum

dum corollariorum definitionibus subjiçit theorematum, quorum veritas intime non perspiciatur, nisi demonstratione redintegrata. Quod si ergo propositionis alicujus demonstrationem in elementis nostris pendere volueris, postquam corollarium, quod eandem continet, in Mathesi *Sturmiana* trutinaveris; veritatem propositionis præsentis ipso facto experieris. Poteris etiam *Clavium*, vel autorem alium, qui perinde ac nos completas dedit demonstrationes elementorum *Euclideanorum*, consulere, postquam *Sturm* de evidentia sollicito negotium faceffit. Quoniam Geometræ primi ordinis in schediastmatis præsertim, quæ Diariis Eruditorum inferere solent, demonstrationes incompletas amant, propterea quod peritis scribunt, non tyronibus; qui eorum demonstrationes rimari voluerit, donec eas ex asse assequatur, difficultatem sibi objectam abunde sentiet. Legat, cui volupe est, opus eminens Principiorum Philosophiæ naturalis mathematicorum Viri summi *Newtoni*, qui, cum Geometris primi ordinis scripserit, incompletis demonstrationibus ut plurimum contentus: legat etiam *Leibnitii* in Actis Eruditorum contenta schediastmata: nec erit ab eo, quod modo demonstravimus, alienus. Enimvero demonstrationes incompletæ non modo negotium faceffunt tyronibus, verum etiam exercitatis, qui, cum ob alia agenda in meditationibus mathematicis continui non sint, propositiones ab aliis suppositas omnes familiares habere nequeunt. Ratio ex demonstratione patet, & constat ipsum *Hugenium*, etsi in studiis mathematicis assiduus, de difficultate operis *Newtoniani* intelligendi ob demonstrationes incompletas conquestum fuisse, quemadmodum me olim ex *Leibnitio* audivisse memini. Ceterum probe norandum est, me viris summis minime imputare, quod demonstrationes completas dare non potuerint: summam enim hoc argueret ignorantiam, & rationem modo reddidi, cur eas dare noluerint. Sane plurima absque demonstratione nullibi adhuc demonstrata, sed a se primum inventa proponunt, ut aliorum studia excitent: quis vero adeo vesanus foret, ut vel sibi, vel aliis persuadere vellet, quod demonstrationes dare non potuerint? Immo in genere notandum est, nos tantum theorematum logica demonstrare, a reprehendis autem autoribus quam longissime abesse, quibus rationes subinde esse possunt non contemnendæ, cur theorematum logica insuper habere malint, veluti cum Geometra demonstrationes incompletas affert ad exercendum aliorum ingenia, ut, dum ipsos in partem inventionis trahit, non videat voluptatem ex inventis percipiendam, quæ multa industria qua-

reban-



rebantur , quemadmodum *Cartesio* visum fuerat & *Leibnitio* arridebat , quod ita fungeretur loco cotis.

## §. 858.

*Demonstratio ordinata facillime intelligitur , animus lectoris plenius convincit & genuinae demonstrationis ideam distinctam animo ingenerat.* In demonstratione ordinata propositiones singulae , quae demonstrationem sive tanquam praemissa , sive tanquam conclusiones ingrediuntur , eo ordine se invicem excipiunt , quo in ratiociniorum serie , in quam demonstratio resoluta abit , continentur (§. 799. ). Nullo itaque negotio lector demonstrationem , dum eandem evolvit , in suos syllogismos resolvit , ut appareat , nec in materia , nec in forma habere vitium , consequenter veritatis propositionis demonstratae certus redditur (§. 570. ). Demonstratio adeo ordinata facillime intelligere datur. Suppono nimirum , quod nemo in dubium vocaverit , demonstrationem penitus intelligi , quamprimum eam resolvere datum fuerit (§. 551. & seqq. ), nec quicquam amplius circa eam dubii superesse potest , quantamcumque ingenii aciem in eadem intendas.

*Prærogativa demonstrationis ordinatae præintelligitur.*

Qui demonstrationem ita resolvit , ut certus sit , nec in materia , nec in forma latere vitium ullum ; is plenius utique convincitur de veritate propositionis quam alter , qui de utroque non satis fuerit certus. Ita autem comparata est demonstratio ordinata , ut vel invitus eam rite resolvat lector , modo attentionem ad eandem afferat , quemadmodum modo ostendimus & tentanti manifestum evadit.

Denique cum demonstrationis genuinae formam animo distincte non comprehendat , nisi qui noverit , ex quibusnam ea ratiociniis componatur & quomodo illa inter se connectantur (§. 551. & seqq. ); demonstrationem autem ordinatam , quemadmodum modo ostendimus , lector attentus perlegere non possit , quin eam vel invitus in sua ratiocinia resolvat , eaque decente ratione inter se connectat : nullum quoque dubium

(*Wolffii Logica* )

liii

super-

superesse potest, quin istiusmodi demonstrationes sæpius meditatibus genuinæ demonstrationis formam tandem animo distincte comprehendat.

Experiuntur hoc illi, qui demonstrationes nostras in elementis mathematicis sibi familiares reddunt, quas quam maxime ordinatas efficere studuimus, & postea alios autores consulunt, qui inordinatas afferre solent. Et profecto demonstrationes inordinatæ maxime in causa sunt, cur autores egregii demonstrationes extra Mathesin daturi probationes attulerint, quæ a vera demonstrandi forma quam longissime ab sunt.

§. 859.

*Demonstrationis consummata prærogativa.*

Quoniam demonstratio consummata & ordinata est, & completa (§. 855.); ea & facile intelligitur, & plenius lectorem convincit, & genuinæ demonstrationis ideam animo ejus ingenerat (§. 857. 858.). Inconsummata cum inordinata sit & incompleta (§. 855.), difficulter intelligitur, lectorem non adeo fortiter ad assertum trahit, nec genuinæ demonstrationis ideam animo ejus ingenerat (§. §. cit.).

Quod in demonstratione inconsummata remanet dubium, vel examina tollunt, vel successu temporis crebra repetitione contracta familiaritas: examina enim nos convincunt, quod bene ratiocinati simus, ubi a priori deducta fuit propositio; familiaritas vero evidentiae speciem mentitur, ubi cum acumine attentio minime conjungitur. Demonstrationes inconsummatæ confusam demonstrationis ideam, eamque incompletam & ex parte obscuram, animo ingenerant, ita ut in illa dijudicanda falli adhuc possis (§. 92. 80.). Ipsa experientia loquitur, quod brevi temporis spatio magnoque laboris compendio multam sibi scientiam comparare possint, qui istiusmodi libris ducibus utuntur, in quibus demonstrationes sunt consummatæ. Atque ea ratio est, cur elementa nostra Matheseos sedula manu evolventes, vel nostra institutione usi celeres in hoc studio experiantur progressus, cum & in istis demonstrationes proposuerimus consummatas & in lectionibus earum analysisin naturali maxime modo institutam exhibeamus.

§. 860.

*Quando sine probatione*

*Si quis in scripto scientifico in numerum axiomatum & posulatarum refert propositiones demonstrativas, is sine probatione sumit,*

*sumit, quæ probari debebant.* Si propositiones fuerint demonstrativæ, intellectus terminis nondum patet, utrum prædicatum subiecto conveniat, nec ne (§. 262.), consequenter non apparet, utrum propositio vera sit, an falsâ (§. 505.). Ut adeo constet, utrum vera sit, nec ne, demonstratione opus est (§. 544. 557.). Enimvero axiomata & postulata indemonstrabilia sunt (§. 267. 269.), adeoque ex terminis manifesta (§. 262.) probatione nulla indigent. Qui igitur propositiones demonstrativas in numerum axiomatum & postulatorum refert, is eas nulla probatione indigere censet, atque adeo sine probatione sumit, quæ probari debebant.

Exempla obvia sunt in eorum scriptis, qui methodo Geometris recepta libros conscribere ausi sunt, cum methodi illius interiora minime habuerint perspecta, idea demonstrationum nonnisi incompleta animis ipsorum inhærente. Quoniam vero abunde docuimus, quando propositiones sint indemonstrabiles (§. 263. 264.) & quam in numerum axiomatum ac postulatorum referri debeant (§. 268. 270. & seqq.); haud quaquam difficile erit in casu dato dijudicare, num autor propositiones demonstrativas in axiomatum, vel postulatorum numerum referat. E. gr. Si quis existentiam Dei demonstraturus methodo mathematica inter axiomata refert, 1. *dari ordinem universi*, 2. *ordinem universi esse contingentem*; is sine probatione sumit, quæ quidem vera sunt, attamen sine probatione nec parent, nec ab atheo conceduntur. Utrumque demonstrabimus in Cosmologia: ubi apparebit, quam multa & recondita opus sit doctrina, antequam utraque propositio demonstrativa ratione evinci possit. Quodsi vero quis demonstrationes profunde hausas capere nequit; is tamen probabiliter easdem adstruere debet: quo in casu existentia Dei exinde tantummodo probabiliter probatur (§. 586.), etsi probatio sufficiat ad assensum imperandum bene multis, qui inter certum & probabile distinguere non didicerunt.

## §. 861.

*Si quis iudicium intuitivum, quod experientie minime obvia debet, in numerum axiomatum, vel postulatorum refert; is sine probatione sumit, quod probari debet.* Qui ad experientiam minime obviam provocat, is casum singularem afferre

tenetur (§. 666.), unde scilicet iudicium intuitivum deduxit, ut appareat, num idem sit rite formatum (§. 669. & 670.) & imprimis num ad universalitatem absque præcipitantia fuerit reductum (§. 703. 706. 707.). Non igitur sine omni probatione admitti potest. Enimvero cum axiomata & postulata indemonstrabilia sint (§. 267. 269.), adeoque ex terminis manifesta (§. 262.) probatione nulla indigeant; autor, qui iudicia intuitiva experientie minime obvix debita in numerum axiomatum, vel postulatorum refert, ea nulla probatione indigere arbitrat. Atque adeo patet, quod sine probatione sumat, quæ probari, nempe per experientiam, sive a posteriori, debebant.

Nos igitur in Macheli mixta observationes circumspicte enunciamus, ne vitii subreptionis rei evadamus (§. 668.), vel alios disputatione minus cauta ejus participes reddamus, & iudicia intuitiva per modum corollariorum iisdem subijcimus. Eundem morem in philosophia quoque tenemus.

## §. 862.

*Cognitio certa quando non obviatur.*

Qui propositiones ad probandum ceteras sine probatione sumit, utut probatione indigeant; is lectorem ad certam dogmatum, quæ proponit, cognitionem perducere nequit (§. 842.). Quamobrem quæ in numerum axiomatum & postulatorum propositiones demonstrativas & iudicia intuitiva experientie minus obvia debita refert; is lectorem ad certam dogmatum, quæ proponit, cognitionem minime perducit (§. 860. 861.).

E. gr. De existentia Dei dubitantem ad certam ejus cognitionem minime perducit, qui eam demonstraturus inter axiomata refert, dari naturæ ordinem eumque esse contingentem.

## §. 863.

*Propositiones scripto dogmatico historico in usum inventorum inferenda.*

Si scriptum dogmaticum historicum in usum inventorum conditur, omnes propositiones eidem inferendæ sunt, quæ in scientificis publice demonstrata extant. Etenim veritates ex definitionibus & hypothesebus datis eruturus familiares habere debet propositiones jam inventas (§. 724. 725.). Cum vero commode fieri non possit, ut omnes omnino propositiones, quæ in libris

libris scientificis in aliquo genere scientiarum conscriptis demonstrantur, inveniendi arte pollentibus familiares sint, præsertim si in illa non sint continui; memoriæ vicem supplere debet liber dogmaticus historicus in usum inventorum conditus. Omnes igitur propositiones in scriptis scientificis demonstratæ, ne incerta cum certis confundantur (§. 568.), eidem inferendæ, ut evolvi possint, quoties necessariæ inventori minime succurrunt.

Hactenus istiusmodi scripta in ipsa Mathesi desiderantur, etsi magno usui futura inventoribus: quod alibi ostendemus & ex demonstratione propositionis præsentis colligere licet. Omnes autem propositiones, quarum idem est subiectum, in uno loco congerendæ, & subiectæ earundem ordine alphabetico collocandæ, ut absque labore reperiri possint. Videtur aliquod horum scriptorum specimen dedisse *Merseus*, dum *universa Geometria mixtaque Mathematica Synopsis* conscripsit, in qua definitiones & propositiones *Euclidis*, *Rami*, *Archimedis*, *Kepleri*, *Theodosii*, *Menelai*, *Maurolyci*, *Apollonii*, *Sereni*, *Mylogii*, *Pappi* &c. absque demonstratione, sed eo ordine proponuntur, quo apud Auctores, a quibus demonstrantur, collocantur, difficulter adeo reperiendæ, ubi eas evolvere volueris. Inservit ista synopsis potius inventoribus, ut propositiones jam inventas sibi familiares reddant, quam ut nondum familiares, quando iis habent opus, evolvant. Ceterum si scripta istiusmodi dogmatica historica prostant, hunc præterea inventoribus præstarent usum, ut inde discerent, num propositio aliqua in quam meditando incidunt, jam ab aliis fuerit inventa.

#### §. 864.

Si scriptum dogmaticum historicum ea fini conditur, ut ad *Eidem in se-  
lectionem scientificorum præparetur lector*; illæ propositiones ei-  
dem inferendæ sunt, quarum frequens est in demonstrandis aliis *usum lectio-  
nis scientificorum*. Quoniam enim veritatis propositionis demonstratæ certus non est, qui præmissarum syllogismos concatenatos ingredientium veritatem ignorat (§. 570.); ad lectionem scripti scientifici accedens demonstrationum vim facillime percipit, qui omnes propositiones, quæ præmissarum loco habentur, familiares habet. Quamobrem illæ propositiones scripto do-

gmatico historico in usum lectionis scientificorum condito inferendæ, quarum frequens est in demonstrandis aliis usus.

Qui ad studium Geometriæ elementaris accedunt, nullis adhuc cognitis definitionibus atque propositionibus, plurimum difficultatis in demonstrationibus concipiendis experiuntur, propterea quod earum principia ipsis nondum familiaria. Unde accidit, ut subito quasi lux quædam eorundem mentibus affundatur, quam primum crebra repetitione illa familiaria evasere. Magno igitur commodo tenera ætate istiusmodi scripta volvuntur, antequam adultiori ad scientifica accedas. Immo præstat tyronem omnem illorum lectionem sedulam præmittere horum lectioni, ubi celeriori tramite progredi libuerit.

§. 865.

*Eidem inferendæ in usum vitæ.*

*Si scriptum dogmaticum historicum in usum vitæ conditur, propositiones eidem inferendæ sunt, quæ ad praxin tendunt. Quæ enim in vita usui esse debent, ad praxin aliquam tendere, per se patet.*

E. gr. Geometriam elementarem in usum geodæticum scribens præter definitiones problemata ad exercendam Geodæsiam necessaria & illa theoremata eidem inferere debet, quæ in praxi Geodætica usui sunt, veluti theorema de ratione summæ omnium angularum polygoni ad rectum, quod examini inservit, num instrumento gonimetrico anguli singuli accurate fuerint capti.

§. 866.

*Propositiones inferendæ scripto scientifico in usum vitæ.*

Quoniam in scripto scientifico propositiones demonstrari, vel probari debent (§. 751.), facile patet, *si scriptum scientificum in usum vitæ conditur, præter propositiones, quæ ad praxin tendunt, eas etiam inferendas esse, quæ illis demonstrandis inserviunt (§. 864.).*

E. gr. Nos elementa nostra Matheos Germanica ea potissimum fini condidimus, ut praxen in vita utiles demonstrativa ratione traderemus. Non plura igitur theoremata inseruimus, quam quæ iis demonstrandis sufficiunt.

§. 867.

*Eidem inferendæ in usum inventorum.*

Eodem modo liquet (§. 751. 863.), *si scriptum scientificum in usum eorum conditur, qui, ubi hæcenus inventa sibi familiaria reddiderunt, propria meditatione ulteriora eruere de-*  
*creve-*

*creverunt, ei inferendas esse propositiones etiam alias, quæ ad usum vite nondum transferri possunt.*

Omnes nostræ actiones ad finem aliquem tendere debent: Cognitionis autem theoreticæ finis est praxis, vel ulterior veritas per eam eruenda. Qui inventores agere nolunt, frustra sibi familiares reddunt propositiones, sine quibus demonstrativa ratione praxes addiscere licet: aut inventorum non est negligere theorematata, quorum nulla adhuc utilitas apparet. Sufficit eadem esse vera, ut sic ferente occasione præmissas præbeant ratiociniis, quibus ulterior veritas & nonnunquam quoque usus theoriarum hætenus desideratus de-regitur. Nos opera nostra latina philosophica & mathematica eo modo condimus, ut ad ulteriora adspirantibus usui esse queant.

§. 868.

Quoniam ex fine ab autore intento iudicium fieri debet, *Usus theore-*  
num scriptum ejus in suo genere completum sit (§. 816.); *matum præ-*  
*theoremata de propositionibus unicuique scriptorum generi pro di-*  
*versitate finium inferendis inserviunt iudiciis formandis, utrum*  
*scripta sint in suo genere completa, nec ne.* *cedentium.*

Usus hic major est, quam videri poterat. Etenim non solum iudicia de utilitate veritatum detectarum præcipitant illorum ignari; verum etiam qui alios docent non satis caute seligunt discipulis profutura. Sed uberius de his dicemus in Politicis curam imperantium in promovendis virtutibus intellectualibus sub incudem revocaturi.

§. 869.

*Si in resolutione problematis si gula recensentur, quibus fa-* *Resolutio*  
*ctis obtinetur, quod ad faciendum proponebatur, resolutio proble-* *problematis*  
*matæ completa est: in casu opposito incompleta.* Problema enim *completa &*  
cum sit propositio practica (§. 276.), adeoque aliquid fieri præ- *incompleta.*  
cipit (§. 266.); ejus resolutio modum docere debet, quo ali-  
quid fieri possit, consequenter haberi debet pro notione distin-  
cta modi, quo aliquid fieri potest. Si igitur singula recenset,  
quibus factis obtinetur, quod fieri debebat, completa utique  
erit (§. 92.).

Non absimili modo colligitur, in casu opposito resolu-  
tionem exhibere notionem incompletam, adeoque & ipsam re-  
cte incompletam appellari.

Exem-

Exempla solutionum completarum habemus in elementis Matheſeos, ubi resolutiones problematum diſtincta conſtant enumeratione ſingulorum, quibus factis quæſito ſatiſfit. E. gr. Dum trianguli æquilateri conſtructio docetur, factis iis, quæ præcipiuntur, triangulum æquilaterum conſtructum eſt. Theorema præſens definitionis loco eſſe poterat: in noſtra enim libertate poſitum eſt hanc ſolutionis ſpeciem dicere completam & ei oppoſitam incompletam. Enimvero cum termino eodem jam antea uſi fuerimus & præſens caſus commodè ad anteriorem tanquam ſpecies ad genus reducat; conſultius quoque judicavi facta reductione oſtendere, quod definitionem nominalem non ſine ratione condamus.

## §. 870.

*Reſolutio ſuperflua continet.*

*Si in reſolutione problematis plura recenſentur, quam quæ fieri debent, ut fiat, quod petebatur; reſolutio ſuperflua continet.* Conſtat ex demonstratione propoſitionis præcedentis (§. 869.), reſolutionem problematis eſſe notionem diſtinctam modi, quo aliquid fieri debet. Quodſi igitur in ea plura enumerantur, quam quæ fieri debent, ut fiat, quod petebatur; ea ad reſolutionem problematis non ſpectant & eadem ſalva ac integra abeſſe poſſunt. Nullum adeo dubium, quin ſuperflua ſint (§. 819.).

Si quis reſolutiones problematum in elementis Matheſeos propoſitorum examinare voluerit, iſ experietur, nihil in iſdem contineri ſuperflui, atque adeo exempla eidem in promptu erunt, quibus theorema præſens illuſtratur. Duplici autem modo innotescit, num problematis ſolutio ſuperflua contineat, altero quidem a poſteriori, altero a priori. A poſteriori innotescit, ex reſolutione ſuperflua exulare, ſi ea ad caſum ſingularem applicetur, cum ſic appareat, num quibusdam prætermiſſæ, quæ præcipiuntur, fiat quod erat faciendum. A priori idem diſcitur, ſi attendamus, num ſingula, quæ præcipiuntur, demonstrationem ingrediantur. Utrobique cautione opus eſt, ne facto examine iudicium præcipitur. Etenim in caſu priori haud rari ſunt caſus, ubi vix ſuperflua detegere licet, niſi variis tentaminibus factis, num hoc, vel iſto omiſſo adhuc obtineatur, quod intenditur. Exemplæ præbent formulæ medicamentorum compoſitorum. In caſu poſteriori demonstrationem non ingrediuntur, quæ id præſtant, ut, quod erat faciendum, commodius fiat. Exemplæ præbet communis algorith-

mus



mus numerorum integrorum, v. gr. cum numeris summandis decenter scriptis ducitur lineæ, quæ aggregatum inveniendum ab iisdem separatur, ne numeri ad hoc spectantes per errorem ad illos referantur. Demonstrationem additionis minime ingreditur regula de linea sub numeris summandis ducenda. Problematis de lignis cadendis solutionem a superfluis vacuum dedit *Vitruvius* lib. 2. c. 9. f. m. 33. quemadmodum in Elementis Architecturæ Civilis ostendi. Enimvero si quis cum *Vegetio*, lunæ decrefcentis rationem haberi juber, superflua in eam infert.

## §. 871.

*Si demonstrari possit, factis iis, quæ in solutione problematis præcipiuntur fieri, quod erat faciendum, nec in ea præcipiantur, nisi quæ fieri posse jam constat; resolutio problematis vera est.* Omne problema reducitur ad theorema, si resolutio sumitur pro antecedente & quod fieri debet pro consequente propositionis hypotheticæ. Scilicet omnia problemata continentur sub hac propositione generali: *Si hæc fiant, fit etiam, quod erat faciendum.* Jam si nihil præcipitur in resolutione, quod non fieri possit, antecedens verum est (§. 506.). Quare si demonstrari potest positus istis fieri, quod erat faciendum; propositio hypothetica demonstrata est (§. 552.). Vera igitur est propositio hypothetica, ad quam resolutio problematis reducitur (§. 548. 544.), consequenter etiam problematis resolutio.

Exempla præbent omnia problemata Geometriæ elementaris in nostris Geometriæ elementis, immo omnia quoque ceterarum disciplinarum mathematicarum problemata. E. gr. Si triangulum æquilaterum super data recta AB construendum, ex A & B interv. llo rectæ AB intersectio in C fieri jubetur, eaque facta porro præcipitur, ut rectæ AC & BC ducantur. Reducitur adeo problema de construendo triangulo æquilatero ad hoc theorema: *Si ex punctis extremis A & B rectæ datæ AB ejusdem intervallo fiat intersectio in C & puncta A atque B cum puncto intersectionis C connectantur; triangulum constructum ACB est æquilaterum.* Nihil hic præcipitur, quod non fieri possit. Quare cum demonstrari possit, triangulum sic constructum æquilaterum esse, problematis resolutio vera est.

Fig. 16.

## §. 872.

*alius casus.*

*Si experiamur, factis iis, quæ in resolutione problematis præcipiuntur, fieri quod erat faciendum; resolutio problematis vera.* Patet ex theorematis præcedentis demonstratione, problema æquipollere theoremati, seu propositioni hypotheticæ, cujus antecedens est resolutio, consequens, quod faciendum proponitur. Veram vero esse propositionem agnoscit, qui eam experientia contentanea n deprehendit (§. 517.). Ergo resolutionem quoque vera n esse agnoscit, qui ipso opere deprehendit, factis iis, quæ in ea præcipiuntur, fieri quod erat faciendum.

Ex. gr. Si quis secundum resolutionem problematis de construendo triangulo æquilatèro triangulum construit atque illud examinans deprehendit, quod sit æquilaterum, is eo ipso intelligit, resolutionem problematis esse veram. Opus tamen hic multa cautione est, præsertim extra Mathesin: quam adhibiturus nosse debet, quæ de formandis notionibus & judiciis a posteriori integro capite septa exposuimus.

## §. 873.

*Resolutio problematis falsa.*

Qui demonstrationes theorematum præcedentium perpendit, is facile admittet, *resolutionem problematis esse falsam, si demonstrari possit, vel si experiamur, factis iis, quæ præcipiuntur, non fieri, quod erat faciendum.* Idem etiam hoc modo colligitur. Si demonstrari possit, vel si experiamur, factis iis, quæ præcipiuntur, non fieri, quod erat faciendum; resolutio vera esse nequit (§. 871. 872.). Falsum vero cum sit, quod verum non est (§. 505.); resolutio in datis hypothesibus falsa esse debet.

Exempli præbent regulæ astræ logicæ in cultura hortorum observandæ; in Geometria solutiones, quas plurimi de quadratura circuli dedere. Illæ experientia, hæ demonstratione falsitatis redarguuntur.

## §. 874.

*Resolutio impossibilis.*

*Sicæ, quæ præcipiuntur, fieri non possunt, resolutio impossibilis.* Patet absque demonstratione.

Ex. gr. Si quis parallaxin solis collatis inter se altitudine solis vera per calculum determinata & altitudine observata scrutari juberet; is problematis de parallaxi solis investiganda solutionem impossibilem daret, cum fieri minime possit, ut tam accurate computetur altitudo solis

solis vera & observetur apparens, quantum huic negotio sufficit: quemadmodum ex Astronomia abunde patet. Astronomia plura suppeditat exempla. Notandum vero non ideo ipsum problema solutu impossibile esse, quamvis resolutio ejus data sit impossibilis: Etenim non implicat, ut alio modo idem solvi possit. Ipsum exemplum, quod modo dedimus, asserti veritatem confirmat. Ut utenim impossibilis sit, quam commemoravimus, problematis de scrutanda parallaxi solis solutio; non tamen ideo ipsum problema solutu impossibile est, cum alias solutiones dederint Astronomi, quibus parallaxin solis venari licet, inelementis Astronomiæ a nobis expositas.

## §. 875.

*Quod si ea, quæ in resolutione problematis præcipiuntur, non- Resolutio a  
dum in potestate sunt, problema ad praxin transferri nequit. Patet praxi alic-  
denuo per se, nec demonstratione indiget. na.*

In hoc casu *resolutio* dicitur *moraliter impossibilis*: ratione nimirum praxeos impossibili æquipollet, cum respectu ejus, qui solutionem ad praxin transferre debet, perinde sit, sive ea, quæ præcipiuntur, per se fieri non possint, sive nondum sint in potestate nostra. E. gr. Si quis medium ditescendi chrysopæiam commendat, is problema ditescendi imperfecte solvit, ubi metalla viliora in nobiliora transmutari jubet, illam tamen transmutationem minime docet. Istiusmodi autem solutiones non prorsus contemnendæ, cum sic solutio problematis unius reducat ad solutionem alterius. E. gr. In Geometria nondum habemus quadraturam circuli & hyperbolæ geometricam: hoc tamen non obstante resolutiones aliorum problematum v. gr. constructiones curvarum, aut æquationum differentialium reducimus ad quadraturam circuli & hyperbolæ. Immo in genere problemata physicommechanica solvimus concessis curvarum quadraturis, quæ nondum in potestate sunt. Ast talia non docentur in usum vitæ; sed inventorum, qui progredi debent, quantum licet, ne in posterum eo careat genus humanum, quod usui esse potest (§. 863. 867.), & ne desit occasio exercendi artem inveniendi, quæ sine exercitio amittitur.

## §. 876.

Hinc consequitur, *in scripto cum dogmatico historico, tum Ordo proble-  
scientifico problemata ita esse ordinanda, ut solutiones posteriorum matum.  
non præcipiant, nisi quod fieri possit per præcedentia*

Kkk k 2

E. gr.

E. gr. Si in Geometria elementari docetur, quomodo per data tria puncta describatur circulus; rectam per lineam perpendicularem bifariam dividere jubemur. Sed quomodo linea recta per aliam perpendicularem bifariam dividitur, in problemate aliquo anteriore jam fuit monstratum. Hujus corollarii usus est, quando de ordine, quo libri conscripti sunt, judicium ferendum.

## §. 877.

*Veritatum  
connexio de-  
finitur.*

*Veritates dicuntur inter se connexæ, si cognitio unius pendet a cognitione alterius. Unde consequitur, 1. definitiones esse inter se connexas, si definitum unius ingreditur definitionem alteram: 2. propositiones theoreticas inter se connexas, si una ingreditur demonstrationem alterius tanquam præmissa: 3. problemata denique inter se connexas, si, quod in uno præcipitur, fieri potest per alia.*

Exempla definitionum, propositionum theoreticarum & problematum inter se connexorum reperiuntur in Elementis Matheseos universæ. Scripta etiam nostra philosophica & hoc ipsum opus logicum exempli loco esse possunt.

## §. 878.

*In quibus-  
nam scriptis  
veritates in-  
ter se conne-  
ctantur.*

*Si quis ergo scriptum scientificum condit, quemadmodum a nobis præcipitur (§. 790.); veritates omnes inter se connectuntur. Etenim in scripto scientifico terminos omnes definit autor, qui vel definitiones alias ingrediuntur, vel quorum definitiones ingrediuntur demonstrationes tanquam præmissæ syllogismorum, & propositionibus anterioribus utitur tanquam præmissis in demonstrationibus sequentium (§. 790.); immo cum propositiones in universum omnes, e quorum numero etiam problemata sunt (§. 276.), eo ordine collocet, ut præcedant, quæ sequentibus demonstrandis inserviunt (§. 790.), problemata etiam ita ordinare tenetur, ut in solutione posteriorum non præcipiat, nisi quod fieri per præcedentia possit, quemadmodum modo disertius inculcavimus (§. 876.). Patet adeo in scripto scientifico, quod modo a nobis præscripto conditur, veritates omnes inter se connecti.*

Atque

Atque hinc etiam patet, si quod scriptum alia methodo condatur, in eo veritates non esse inter se connexas, ut adeo alio criterio deficientis connexionis præter definitionem veritatum connexarum (§. 877.) opus non sit.

## §. 879.

*In scripto dogmatico historico veritates inter se connecti non possunt, nisi definitiones & problemata.* Etenim in scripto dogmatico historico dogmata tantum recensentur & ad summum argumenta, quibus ea probantur, indicantur (§. 751.). Fieri adeo nequit, ut propositiones anteriores fiant principia demonstrandi posteriorum (§. 561.), consequenter propositiones anteriores cum posterioribus connecti nequeunt (§. 877.).

*Num connexio in scriptis dogmaticis historicis locum habeat.*

Quoniam tamen in scripto dogmatico historico definitionibus locus est, quæ ad definitiones sequentes atque subjecta & prædicata propositionum intelligenda sufficiunt (§. 823.); definitionum anteriorum definita ingredi possunt definitiones sequentes, consequenter definitiones inter se connecti possunt (§. 877.).

Et quia in scripto dogmatico in usum vitæ condito propositiones sibi locum vindicant, quæ ad praxin tendunt (§. 865.), adeoque inprimis problemata, quæ propositiones practicae sunt (§. 276.); ideo caveri potest, ne in resolutionibus problematum posteriorum præcipiatur, quod quomodo fieri debeat non pateat per anteriora. Problemata igitur inter se connecti possunt (§. 877.).

*Repugnat connexioni etiam ordo, qui in scriptis dogmaticis historicis tenendus.* Ei enim satis æturus in uno loco congerere debet, quæ ad idem subjectum spectant (§. 827.), adeoque propositiones ita ordinare non datur, ut posteriorum veritas pendeat a veritate anteriorum. Ordo e contrario naturalis, quem scriptis scientificis vindicavimus (§. 828. 829.), connexionem indivulsam comitem habet: ipsi enim satisfieri nequit, nisi præmittantur, quæ sequentibus intelligendis & demonstrandis inserviant (§. 829.): quod ubi factum fuerit, veritates inter se connexæ sunt (§. 877.). Qui scripta mathematica accurata methodo exemplo Geometrarum veterum conscripta, attentione ad

illam adhibita, perlegerit; is nexum inter ordinem naturalem & veritatum connexionem necessarium abunde perspiciet. Parebit idem ex scriptis nostris philosophicis.

§. 880.

*Tenenda  
circa defini-  
tionum or-  
dinem.*

*Si termino, qui definitionem ingreditur, notio fixa, utut confusa respondet, ejus definitio eidem præmittenda non est: quodsi tamen insequentibus definitione ejusdem opus est tanquam demonstrandi principio, ea ibidem inferenda.* Etenim in gratiam definitionum definitiones plures nec in scripto dogmatico historico (§. 823.), nec in scientifico locum habent (§. 824.), quam quæ ad sequentes intelligendas sufficiunt. Jam cum terminus, cui notio fixa, utut consula respondet, non obstat, quo minus definitionem intelligas (§. 118.); ejus definitio in gratiam definitionis alterius, quam is ingreditur, minime præmittenda.

Quoniam vero in scripto scientifico unum quodque eo loco collocandum, ubi sequentibus demonstrandis inservit (§. 828.); ubi definitione illius termini tanquam demonstrandi principio opus habueris, ibi eam inferendam esse utique patet.

E. gr. *Euclides* in definitione trianguli æquilateri utitur termino æqualitatis, quam tamen non ante definivit, propterea quod fixus ejus est significatus & obvius, adeoque notio clara utut confusa, eidem intelligendo sufficit. Nos vero in philosophicis subinde utimur ex eadem ratione terminis nondum definitis, quos tamen insequentibus definimus, ubi alia per eorum definitiones demonstranda. Neque commode aliter idem fieri potest, ubi ordinem mixtum selegeris: id quod vel ex ejus definitione colligitur. Ceterum cum definitio, cujus definitum ingreditur definitionem anteriorem, posteriori loco ponitur; multa attentione opus est, ne circulus in definiendo committatur (§. 170.), qui multoties vel ea sola de causa committi solet; quod definitiones inter se minime connectantur. Neque etiam vitium hoc in definiendo commissum facile detegitur, ubi autores de rebus particularibus tractantes, quæ proponunt, ad systema aliquod minime referunt. Unde porro intelligitur, cur collatis ejusdem auctoris scriptis variis particularibus circulus in definiendo appareat, qui latet, ubi unum saltem legeris. Immo hinc ulterius inferitur, quanti sit usus, ubi quis systema aliquod sibi familiare reddit, ad quod definitiones suas omnes refe-

*referat.* Hunc finem nos quoque intendimus, dum & Mathesin, & philosophiam continua veritatum connexionione tradimus.

§. 881.

*Si propositio aliqua independentem ab alia anteriore in subsecquentibus demonstratur, quin ejus demonstrationem tanquam præmissam ingredi possit dubio caret.* Si probationem ingreditur propositio nondum demonstrata, propositio demonstrata non est, cujus veritas illa evinci debebat (§. 498.). Enimvero si in subsecquentibus independentem ab hac propositione, cujus demonstrationem ingreditur, eadem demonstratur, perinde est ac si jam ante demonstrata fuisset, quam ad demonstrandum alteram adhibebatur. Cum adeo dubio careat, propositionem, quæ demonstranda erat, rite fuisse demonstratam (§. cit.); nec in dubium vocari potest, demonstrationem alicujus propositionis, illa salva, ingredi posse propositionem, quæ in subsecquentibus independentem ab illa demonstratur.

*Quando demonstrationem ingredi possit propositio inferius demonstranda.*

Idem adhuc aliter ostenditur. Propositiones incertæ sunt auctori, si is ad eas probandum sumit alias sine probatione, utut probatione indigeant (§. 842.). Enimvero si propositio aliqua, quæ ad alteram probandam sumitur, in subsecquentibus independentem ab hac altera, adeoque sine omni vitio, demonstratur, ea sine probatione minime sumitur, quod per se patet. Propositio igitur, cujus demonstrationem ingreditur, non ideo incerta est, consequenter nil obstat, quin demonstrationem legitimam ingredi possit.

Nimirum quando præcipitur, inter principia demonstrandi non referri debere nisi propositiones jam demonstratas (§. 562.); non ideo requiritur, ut præ se in anterioribus demonstrata fuerint, sed sufficit, quod fuerint demonstrata, seu quod eorum demonstratio publice jam extet, aut auctor eam in scripto subsecuturo cum publico, sit communicaturus.

§. 882.

Quoniam ordo mixtus requirit, ut constanter quidem præmittantur, quæ sequentibus intelligendis & demonstrandis

*Monitum de ordine mixto.*

inserviunt, hoc tamen non obstante eodem in loco pertractentur ad idem subiectum spectantia, quantum regula anterior permittit (§. 830.); *in eo inprimis commodum accidit, ut propositionibus subinde ad alias demonstrandas utamur, quæ in subsequen- tibus demum independenter ab istis demonstrantur*, cum sic plures propositiones de eodem subiecto in eodem loco congerere liceat, quæ alias in alieno erant reponendæ.

Ipsimet ea de causa aliquoties in hoc ipso opere logico supposuimus in demonstratione inferius demum demonstranda, sed independenter ab iis propositionibus, ad quas probandas ea sumimus. Dicitur autem *propositio aliqua independenter ab altera demonstrari*, si nec hæc altera, nec alia demonstrationem ingreditur, ad quam probandam ista usi sumus.

### §. 883.

*Circuli in demonstratione definitio.*

Si quis ad demonstrandum propositionem aliquam utitur alia, quæ independenter ab illa demonstrari nequit, *circulum in demonstrando committere dicitur*.

E. gr. Si quis demonstraturus *dari Deum* sumit, *dari fines rerum naturalium*, & vicissim demonstraturus *dari rerum naturalium fines* sumit *dari Deum*; is circulum vitiosum committit. Istiusmodi circuli vitiosi in demonstrando facillime committuntur non advertentibus autoribus, qui eosdem committunt, eadem de causa, ob quam circulum in definiendo committi diximus. (not. §. 880.)

### §. 884.

*Quod is demonstrationem efficiat nullam,*

*Qui circulum in demonstrando committit, is neutram propositionem demonstrat, in quibus demonstrandis is committitur.* Etenim qui circulum in demonstrando committit, ad probandam propositionem A sumit propositionem B, quæ sine A tanquam certa supposita probari nequit. In demonstranda adeo propositione A supponitur ipsa A tanquam jam demonstrata, consequenter quæ contextitur demonstratio nulla est. Jam cum propositio A probata non sit, ea in probatione ipsius B sine probatione sumitur, atque adeo denuo demonstratio ejus nulla est (§. 498.). Patet igitur, quod erat propositum.

E. gr.



E. gr. Qui in demonstranda existentia Dei sine probatione sumit, *dari fines rerum naturalium, is existentiam Dei non demonstrat*. Quod si jam in demonstrandis finibus rerum naturalium tanquam certum ac demonstratum supponit, *Deum existere*, ob præsentiam, quam sibi dedisse videtur, demonstrationem; is nec demonstrat, *dari rerum naturalium fines*. Perinde itaque est ac si utramque propositionem sine probatione precario sumeret.

## §. 885.

Ordo, quo utimur in tradendis dogmatis, dicitur *Methodus*. Appellatur autem *methodus analytica*, qua veritates ita proponuntur, prout vel inventæ fuerunt, vel minimum inveniri potuerunt. *Methodus* e contrario *synthetica* appellatur, qua veritates ita proponuntur, prout una ex altera facilius intelligi & demonstrari potest. *Methodus mixta* est, quæ ex utriusque combinatione resultat.

Methodo analytica utuntur recentiores Mathematici in dissertationibus, vel schediasmatibus, quæ diariis Eruditorum inferere solent. Ex nos quoque veritates arithmeticas & geometricas bene multas analytice docuimus in Elementis Algebrae. Methodo synthetica usus est *Euclides* cum Geometris veteribus, eaque nos quoque utimur in elementis Arithmetice & Geometriae Latinis. Hjus quoque rationem potissimum habuimus in hoc opere Logico. Methodum mixtam adhibuimus in elementis Matheseos & principiis philosophiæ Germanicis, ita tamen ut potissimum analyticae rationem haberemus. In opere Latino philosophico cum ordinem mixtum sequi libuerit, syntheticae methodi magis habenda fuit ratio, quam analyticae (§. 830.). Methodus nimirum analytica ab ordine scholæ magis abhorret, quam synthetica. Methodus analytica vocatur etiam *methodus inventionis*; methodus synthetica vero *methodus doctrinae*; illa etiam *resolutoria* seu *methodus resolutionis*; hæc autem *methodus compositionis* appellatur. Utimur hic vocibus in eo significato, quem ipsis tribuit mos loquendi Mathematicorum & philosophorum recentiorum: in philosophia enim scholastica voces paulo aliter accipiuntur.

## §. 886.

Ex his adeo definitionibus judicare licet (§. 349.), qua *Qua methodo utatur Autor.*

(Wolfii Logica)

LIII

Patet

Patet idem a posteriori, definitionibus ad exempla modo proposita applicatis. V. gr. *Euclides* primo loco præmittit definitiones nominales atque axiomata & postulata, quæ sine probatione concedi possunt: inde progreditur ad propositiones demonstrativas, quæ ita collocat, prout una ex altera demonstrari potest. Non igitur lectorem nisi ad certam eorum, quæ docet, cognitionem perducere intendit. Atque adeo evidens est, quod methodo utatur synthetica (§. 885.). Judicium istis carere poteramus, nisi termini in omnium fere ore versarentur.

## §. 887.

*Cur regula  
methodi ana-  
lytica & syn-  
thetica nulla  
proponan-  
tur.*

Quoniam in superioribus abunde docuimus, quem usum præstet Logica in veritate cum a posteriori (§. 669. & seqq.), tum a priori (§. 710. & seqq.) investiganda, & quænam circa definitiones (§. 152. & seqq.), quænam circa demonstrationes omnis generis (§. 549. & seqq.) sint tenenda, regulas quoque in condendis scriptis dogmaticis tum historicis (§. 788. 789.), tum scientificis (§. 790.) observandas explicavimus & in ipso discursu præliminari de methodo philosophica, quæ cum scientifica eadem est (§. 792.) & cum synthetica, si a mixta discesseris, prorsus coindicit (§. 885.), regulas potissimas tradidimus; immo diversitatem ordinis in dogmatis tradendis observandi (§. 829. & seqq.) ejusque regulas (§. 827. 828. 863. & seqq.) inculcavimus; non opus est, ut de regulis *meth. di. analyticae & syntheticæ ag. tur.* Notatis enim definitionibus utriusque methodi (§. 885.), regulæ anteriores modo citatæ absque ulla negotio ad suam methodum referentur.

Quod si quis regulas a nobis traditas ad methodum, cui conveniunt, retulerit; is ipso facto experietur, nos plura de methodo tradidisse, quam hætenus in more positum fuit philosophis. Sane pars prima Logice, quæ theoretica est, principia utriusque methodi explicat; pars vero posterior, quæ practica est & illorum principiorum usum diversum in veritate cognoscenda commonstrat, tota in methodorum legibus stabiliendis occupatur.

## §. 888.

*Cur analy-  
tica lucem*

Cum methodus analytica veritates eo modo proponat,  
quo

quo vel inventæ fuerunt, vel minimum invenire potuere *mutuetur ab arte inveniendi.* (§. 885.); eadem lucem mutuatur ab arte inveniendi. Quamobrem ubi olim omnem artem inveniendi, quæ in exemplis latet, eruimus & novis conclusionibus inde deductis auctam publicæ luci expesuerimus, revocatis exemplis ad suas regulas; *methodus* quoque *analytica* magis patebit.

Mathematicis sunt artes inveniendi speciales, *Arithmetica practica*, *Trigonometria* & imprimis *Algebra* seu *Analysis Mathematicorum*. Unde regulas generales derivare potest, qui utitur regulis de notionis generis ex notionibus specierum (§. 710.) & notionibus specierum ex data notione unius (§. 714.) deducendis.

## §. 889.

*Compiler* dicitur, qui, quæ ea de re, quam sibi pertrahendam sumsit, per alios libros sparsa reperit, in unum cogit, insuper habita veritatum connexionem, vel in scripto dogmatico historico finis ac ordinis nulla habita ratione. *Systematis* vero *conditor* est, qui veritates apud alios autores obvias suoque fini accommodas eligit & inter se connectit. *Systema* enim dicitur veritatum inter se & cum principiis suis connexarum congeries.

E. gr. Hoc ipsum opus logicum *systema logicum* est, cum veritates plurimæ & inter se, & cum suis principiis, definitionibus nimirum ac observationibus, connectantur. Si quis vero ex pluribus Logicorum scriptis excerptis, quæ sibi arrident, & in unum cogit Logicam scripturum, vel nullo sibi præfixo fine, vel saltem non attentum, num fini suo respondeant, nec de propositionibus inter se connectendis sollicitus, ut earum veritas appareat; is Logicam suam compilavit.

## §. 890.

*Plagiarius* dicitur, qui, quæ ex aliorum scriptis hausit vel aliunde didicit, a se inventa esse affirmat. *Plagiaris definitio.*

Hinc perperam plagiarii nomen meretur, qui *systema* conditurus ab aliis inventa eidem inserit, inventoribus non laudatis: cum enim ipsi propositum sit *systema* condere, pro suis inventis non venditar, quæ aliunde hausit (§. 889.). Quando vero conveniat *systematum* conditoribus laudare inventores, ex principiis logicis non decidendum, sed

ex moralibus. Multo minus autem plagii reus est, qui aliorum inventis utitur tanquam principiis, unde ulteriora deducit.

## §. 891.

Compiler  
plagiarius.

*Si compiler aliis verbis reddit, quæ ex alterius scriptis hausit, ne ea inde hausisse videatur, plagiarius est. Vult enim pro suis haberi, quæ aliis debet, adeoque plagiarius est (§. 890.).*

In applicando theoremate attentio opus est: etenim intentio in primis probanda est, quod autor videri velit, se aliis non debere, quæ ex aliorum scriptis hausit. Sunt nimirum aliæ quoque rationes, cur ab aliis tradita repetentes aliis verbis efferamus, quam quibus usus fuerat autor, a quo illa acceperamus, e. gr. si ratiocinia, in quibus propositionibus utimur tanquam præmissis, suadent; si aliis verbis electa facilius intelliguntur; si memoria verba non reddit, sed notionem iis respondentem. Circumstantiæ casus singularis rationem produnt acumine possentiae attentionem sufficientem afferenti. In primis plagii suspicio cessat, si ea, quæ aliis verbis efferuntur, satis jam sint nota atque pervulgata. Ita ridiculum foret plagii accusare de Geometria practica commentantem, quod theorema aliquod *Euclidum* elementare aliter enunciet, quam ab *Euclide* fuerat enunciatum.

## §. 892.

Compiler  
iudicio carens.

*Si compiler verbis connectit, quorum unum ex altero non infertur, vel cumulat, quæ sibi mutuo repugnant, sine iudicio scriptum suum compilavit. Cum enim dijudicare nesciat, num propositio aliqua ex altera inferatur, & quænam sibi mutuo repugnent; iudicandi facultate destituitur; quæ ad libros scribendos necessaria (§. 790.), adeoque sine iudicio scriptum suum compilare debet.*

E. gr. Si quis de anima philosophaturus *Lockii* sententiam suam facit, quasi nihil obstat, quo minus & materialis quadam substantia cognoscendi & appetendi facultate sit prædita; *Malebranchium* vero evolvens mox quoque *Cartesii* sententiam suam facit, quod ipsæ cogitationes nostra doceant nos atque convincant, esse in nobis aliud quid præter corpus, is sibi mutuo repugnantia tradit atque adeo compilatorem sine iudicio agit. Facillimum est ut compilatores veritatis dijudicande facultate destituti tradant, quæ sibi mutuo repugnant. Si enim memoria non insigunt, quæ ex charta in chartam transcribunt,

cum

cum contrariarum sententiarum patroni ipsis sua satis probasse videantur, obliiti sententiæ ejus auctoris, quem primum evolverant, sententiam alterius, quem deinceps consulunt, perinde ac illius probant, sicque *contrarias sententias in diversis ejusdem libri locis amplectuntur*. Hæc quidem ita accidunt, ubi *contradictio* manifesta est. *Quodsi eadem latet*, cum veritatis dijudicandæ facultate destituatur compilator *ex hypothesi*, memoria satis fideli, vel *eodem in loco congeruntur, quæ sibi mutuo repugnant*. Connexionum verbalium cum reali confusio frequentissima est: quas facile apprehendet, qui genuinam probationis formam animo comprehensam tener.

## §. 893.

*Epitomator* dicitur, qui ex scripto majore ea seligit, quæ *Epitomato* dato fini interserviunt, & exinde minus componit. *definitio.*

Ita e. gr. *Thümmigius* cum intelligeret, opera nostra philosophica majora esse, quam ut lectionibus academicis intra statum tempus absolvendis commode interservire possent, ex iis potiora selegit & institutiones philosophiæ nostræ condidit, suo exemplo edocens, *Epitomatorem* systematis perinde in compendio veritates inter se connectere posse, quemadmodum in illo connectuntur. Ipsimet *epitomatoris* munere defuncti sumus, cum elementa *Matheseos Germanica* in compendium mitteremus, ut tyronum usui consuleretur. Facilius vero labor est, ubi scriptum dogmaticum historicum in compendium mittitur.

## §. 894.

Quoniam *epitomator* seligit ex opere majore, quæ dato *Compendia* cuidam fini interserviunt (§. 893.); *ex fine, quem sibi præfixit, di-* *quomodo di-* *judicandum, num completum sit compendium ejus (§. 816.). Quo-* *judicanda.* *niam vero non minus scriptum scientificum, quam dogmaticum historicum in compendium mittere potest (§. 893.); eadem* *regula in dijudicandis compendiis locum habent, quæ de scriptis* *scientificis & dogmaticis historicis inculcavimus.*

Scripta scientifica in compendium mittere non est cujusvis: ut enim propositionum subsidiarum, quæ aliis demonstrandis anice interserviunt, numerus non nimis excresecat, novis sæpius demonstrationibus opus est, & subinde quoque demonstrationes, quæ retinentur, contrahendæ, salva tamen evidentia tyronum captui proportionata. Enimvero quis non intelligit, *epitomatorem non modumethodiigna-*

rum esse debere, verum etiam in seligendis propositionibus accuratum & inæstimanda evidentia, quæ tyronibus sufficit, acutum.

## §. 895.

*Qualis rigor  
demonstran-  
di conveniat  
compendiis.*

Cum tyrones in admittendis principiis non adeo scrupulosi esse soleant, accurata vero eorundem evolutione nimis diu detineantur, immo sapissime laboris pertæsi reddantur; *in compendiis nonnulla sine demonstratione sumi possunt, quæ in systemate demonstrantur.*

Idem nos quoque fecimus in compendio Germanico & in ipsis elementis Germanicis Marhefeos universæ, quæ compendium Latinorum præbent, quod ex eorundem collatione patet. Et præstat sane in gratiam tyronum quædam sine demonstratione sumere, quam insufficienter eadem demonstrare, ne formam demonstrationis animo concipiant a veritate abhorrentem.

## §. 896.

*Demonstrati-  
ones quan-  
tum in compendio  
omittende.*

Ex eadem ratione patet, *si qua theoremata ob praxin, quæ inde pendet, compendio inferenda, quorum demonstratio difficilis; ea sine demonstratione aliunde citanda afferenda esse.*

E. gr. Si quis in compendio Geometriæ, in quo praxeos methodo scientifica tradendæ potissimum ratio habetur, modum computandi aream ellipseos docere velit, cum demonstratio theorematis, quod *area ellipseos sit æqualis circulo, cujus diameter est media proportionalis inter axem majorem & minorem*, difficilior sit, quam quæ ibidem locum habeat, eandem omittere atque theoremata in usum demonstrandæ praxeos absque eadem compendio inferere debet. Idem obtinet in theoremate *de ratione diametri ad peripheriam circuli*; quæ si sumatur ut 100. ad 314., vel ex *Hugenii* Tractatu de quadratura circuli & hyperbolæ, vel ex *Ludolphi a Genten* Tractatu de circulo & adscriptis citanda est demonstratio. Præstat enim talia sine demonstratione proponere, quam nimis longa propositionum demonstrativarum serie limites compendii excedere ac tyronibus nauseam creare.

## §. 897.

*Quinam ri-  
gor in defini-  
endo Epito-  
matori ob-  
servandus.*

Immo ex eadem ratione liquet, *ubi notio clara sufficit, non opus esse ut termini definitionem ingredientibus definiantur.*

Ita in compendio Geometriæ elementaris non definitur *altitudo figuræ* in genere, cum non demonstratur, e. gr. *in triangulo altitudi-*

*ncm*

nem esse lineam perpendicularem ex angulo uno in basin oppositam, continuatam, si opus fuerit, demissam, quemadmodum a nobis factum est in Elementis Geometriæ Latinis; sed sic ferente occasione lineam istam altitudinem appellamus. Simile exemplum præbet *diagonalis*: pertinent huc quoque *anguli verticales, alterni, oppositi* alique termini complures. Inutiles tyronibus videntur definitiones, ubi terminos ex notatione clara intelligunt; sicuti demonstrationes nullius judicantur usus, ubi propositionis veritas absque ea ipsis videtur manifesta.

## §. 898.

*Solida pertractatio* dicitur, quæ regulis methodi ad amufum respondet. *Superficiaria* vero, quæ ab iisdem aberrat.

*Solida & superficiaria tractationis definitio.*

Tradidimus regulas istas summatim in resolutione problematis de condendo scripto scientifico (§. 790.): earum vero uberior explicatio univèrſa Logicæ theoria continetur. Et quoniam methodus scientifica, quam scriptis scientificis convenire ostendimus, eadem est cum philosophica in discursu præliminari explicata (§. 792.); ad tractationis solidæ notionem animo ingenerandam conducit attentæ eorum lectio, quæ de methodo philosophica exposuimus. Immo cum integro hoc capite exposuerimus, quæ ratione regulæ de condendis libris dogmaticis traditæ ad casus obvios singulares applicentur, ut appareat, num autor iisdem satisfecerit, an vero eas neglexerit & in easdem impegnerit: Qui hic tradita sibi familiaria reddiderit, discrimen inter solidam atque superficiariam tractationem animo facile comprehendet.

## §. 899.

*Quodsi ergo quis methodi notionem falsam sibi formavit, vel inadæquatam*, quam ingrediuntur termini non satis intellecti; *is sibi videbitur regulas methodi observasse*, ubi ab iisdem aberrat (§. 348. 349.), consequenter *solide omnia pertractasse*, ubi *superficiaria tractatione fuerit contentus*. Facile apparet, idem obtinere, ubi de aliorum tractatione iudicium ferendum, num ea solida sit, an superficiaria.

*Cur multorum iudicia de solida & superficiaria tractatione fallant.*

Exempla satis obvia sunt cum eorum, qui sibi persuadent, solidam pertractationem ab ea posse esse diversam, quæ Mathematicis propria; cum etiam illorum, qui methodo mathematica sibi videntur usi, cum methodus, qua utuntur, vix externam illius speciem mentiatur. Illi falsam habent methodi notionem, hi minus adæquatam.

## §. 900.

*Solida ac superficiali tractationis discrimen.*

§. 900.

Quodnam solida rerum, de quibus agitur, pertractatio regulis methodi ad amissim respondere debet; superficialia autem ab iisdem aberrat (§. 898.); *in solida pertractatione non attendendum est terminis nisi accurata definitione explicatis, nec principiis nisi sufficienter probatis, propositiones singula ex principiis suis demonstranda vel, ubi principia certa deficiunt, probabiliter adstruenda, ac singula ita ordinanda, ut continuo præmittantur, per quæ sequentia intelliguntur, vel probantur (§. 790.). Qui igitur utitur terminis non sufficienter explicatis atque principiis precariis, nec formam probationum legitimam attendit, immo priori loco profert ea, quorum cognitio ab iis pendet, quæ posteriori collocantur; is superficialia tractatione contentus.*

Optime de superficiali tractatione judicabit, cui solidam agnoscere datum est. Quamobrem opera danda est, ut experimento in nobis ipsis facto notionem tractationis solidæ consequamur, e.g. elementa Geometriæ accurata methodo conscripta juxta regulas logicas, definitionum præsertim ac demonstrationum, resolvendo. Neque enim sufficit terminos tenere & regulas, sed singulorum potestatem animo habere debemus comprehensam: id quod nonnisi exercitio legitimo obtinetur.

§. 901.

*Quale sit scriptum solidæ ac superficiali tractationis.*

Hinc ulterius consequitur, *si solide pertractentur ea, de quibus in scriptis dogmaticis agitur, librum esse debere perspicuum (§. 820.), ordine naturali conscriptum (§. 828. 829.), demonstrationes consummatas (§. 856.), resolutiones problematum completas (§. 869.), & veritates omnes inter se connexas (§. 877.). E contrario autem patet, si autor superficiali tractatione fuerit contentus, librum fieri obscurum (§. 820.), ordineque scholæ conscribi (§. 829.), verba cum rebus confundi (§. 834. 835.), in definitionibus nunc superflua cumulari (§. 836.), nunc mutilas afferri (§. 839. & seqq.), principia admitti precaria (§. 843.), propositiones non satis intelligi, multo minus earum veritatem perspicui posse (§. 845.), certa cum incertis confundi (§. 849. & seqq.), demonstrationes, si quæ afferuntur, esse minus consummatas (§. 856.)*

*pro-*



*problematum resolutiones nunc incompletas, nunc superflua continere, nunc falsas, nunc prorsus impossibiles, vel minimum a proxi alienas esse (§. 869. & seqq.), veritates nullas inter se connecti (§. 877.), nec certam ex istiusmodi libro rerum hauriri posse cognitionem (§. 862.).*

Singula cum in antecedentibus fuerint exemplis illustrata, non opus est, ut alia hic proferantur.

## CAPUT VI.

DE LEGENDIS LIBRIS TUM HISTORICIS,  
TUM DOGMATICIS.

## §. 902.

**Q**ui libros legit, operam dare debet, ut, quæ in iis narrantur *Officium ejus facta, vel traduntur dogmata, intelligat & memoriæ mandet sibi profutura.* *qui libros legit.*

Instat axiomatis hoc sumo sine probatione. Sane omnes, quas tradimus, regulæ illuc tendunt, ut mentem auctoris assequamur & quæ ibi legimus ac e re nostra fore judicamus, memoriæ firmiter infigamus. Datur equidem casus, quo libros cum fructu legimus, etsi parum intellectos, nimirum si inde ansam arripimus de iis rebus meditandi, quarum alias animum non subiret cogitatio. Enimvero hæc lectio inventorum est atque adeo ad artem inveniendi spectat. Et tum auctores intelligere negligimus, vel quod intelligi nequeant, vel saltem difficulter intelligantur: de veritate igitur, non de mente auctoris solliciti, cum illam hac non intellecta eruere nobis detur, de hac parum laboramus. Nobis hæc lectio multum profuit, hodiernumque prodest: sed ea non est in potestate nisi illius, qui systema aliquod veritatum jam animo tenet. Tum enim demum inquirere licet, num juxta nostra principia verba auctoris sensum fundant verum: quem ubi deprehendimus, sine nostro potiti sumus, qui est cognitio veritatis.

## §. 903.

*Si quis librum sive historicum, sive dogmaticum intellige.* *Quando verba aucto-*  
(Wolffii Logica) Mmm m *re*

*vis intelligamus.* *re debet, easdem cum verbis singulis notiones conjungere tenerur, quas cum iisdem jungit autor.* Is enim mentem alterius intelligit, qui audita voce eandem in se notionem excitare valet, quam cum ea conjungit alter (§. 117.). Ergo mentem quoque autoris tum demum intelligimus, quando cum verbis singulis eas notiones conjungimus, quas cum iisdem junxit autor, dum librum conscripsit.

Equidem non ignoro, plures fore casus, in quibus scripta vel dogmatica, vel historica prorsus intelligi non posse judicandum erit, ubi juxta theorema nostrum ferendum judicium: sed veritatis amor impedit, quo minus ignorantiae patrocinemur. Absit autem, ut quis arbitretur, notiones cum verbis alterius conjungendas semper esse debere distinctis: etsi enim distinctæ præsent confusis, ad mentem tamen alterius intelligendam sufficiunt confusæ. Qui igitur, quæ de notionibus in genere prædicamus, ad distinctas restringit, theorema nostrum in perversum sensum trahit (§. 120.). Quamvis autem id ipsum planissimum sit, ut a nemine indubium vocari possit; sapissime tamen in idem impingitur atque ex eo plurimi aliis imputantur errores, a quibus quam longissime absunt, quod cum verbis eorundem aliæ jungantur notiones, quam cum iisdem ipsimet conjunxerunt. Ipse scripturæ sacræ sensus hoc modo, non alio pervertitur, neque enim nunc in rationes inquirimus, cur lectores alias cum verbis autorum conjungant notiones, quam ipsemet librum scribentes conjungebant.

## §. 904.

*Quid faciendum, si autor terminos definit.*

*Quodsi igitur autor terminos, quibus utitur, explicat, definitiones eorundem nobis familiares reddere atque juxta eas illos interpretari tenemur.* Secus enim qui, facit, alias cum verbis autoris notiones jungit, quam ipse jungi jubet, adeoque illum non intelligit (§. 903.). Nisi autem sibi familiares reddiderit definitiones, terminos legendi non succurrunt, ut vel tardiosum sit eas evolvere, vel periculum, ne ex præcipitantia significatum verborum immutet.

Neglectus hujus regule perversam interpretationem sapissime gignit: id quod expertus loquor. V. gr. In *Meditationibus metaphysicis de Deo, anima & mundo* definiti *mundum per seriem sim-*  
mul.

*multaneorum & successivorum inter se connexorum & stante hac definitione non unum de mundo prædicavi, quod in alio sensu non habet locum. Unde sensum verborum meorum pervertentes nunc vocem mundi sumunt pro compage corporum mundi totalium, nunc pro statu quodam particulari telluris, nunc pro genere humano, nunc pro hominibus impiis & ita porro. Ipsimet non inficiantur, neglectum hujus regulæ inde esse, quod habeant intellectum a voluntate pendulum: sed nostrum jam non est in rationes illius neglectus inquirere. Sufficit regulam illustrari exemplo, quo una ejusdem veritas confirmatur. Nemo, qui definitiones Euclidis tenet, theoremata ejus in perversum sensum trahit. Ab omni tempore, quo elementa ejus manibus trita, eodem omnino sensu eadem acceperunt.*

## §. 905.

*Hinc consequitur, si autor terminos aliunde cognitos supponit, definitiones eorundem ex aliis libris esse repetendas & ad eos applicandas (§. 349.).* *Quid facient, si autor definitiones supponit.*

*E. gr. In Geometria & omni parte reliqua Matheseos supponimus terminos ex Arithmetica, in Astronomia ex Arithmetica, Geometria, Trigonometria, Optica: ex Arithmetica igitur repetendæ sunt definitiones in Geometria; ex Arithmetica, Geometria, Trigonometria, Optica in Astronomia. Similiter qui nostra scripta legit, terminorum, quos in anterioribus definivimus, definitiones ex istis repetere debet, qui posteriora legit. Immo in eodem libro in partibus, sectionibus & capitulis posterioribus terminorum definitiones ex anterioribus repetere debet, qui posteriora legit.*

## §. 906.

*Quod si autem utatur voce, qua utimur in communi sermone, non definita, in significatum inquirendum est (§. 150.), quem ipsi tribuit usus loquendi. Etenim cum autorem, qui librum conscripsit, se intelligi voluisse supponamus (qui enim non vult intelligi, nec debet legi), intelligi autem non possit, nisi terminos, quibus utitur, vel ipse definiat, vel alibi definitos supponat, vel vocibus utatur in eo significato, quem ipsis tribuit usus loquendi (§. 903.); ubi termino utitur nec a se definito, nec ab aliis, in communi tamen sermone obvio, ei*

Mummm 2

uti-

utique eundem significatum tribuere debemus, quem ipsi tribuit  
usus loquendi.

Ubi hic sunt, quæ de notionibus universalibus sensu duce acquir-  
endis præcepimus (§. 678.). *Quodsi autor non sine judicio scribit, ex  
communis usu loquendi non supponere debet vocum significatum tanquam  
perspectum, nisi cui notio fixa, utut confusa responderet.* Suppono enim,  
quod velit intelligi: si vero supponit terminos vagos non fixos, aut  
prorsus non, aut dubie intelligitur (§. 129. 118.).

§. 907.

*Idem ulterius  
deducitur.*

*Quodsi significatus (§. 150. 906.) repertus propositionem red-  
dat falsam, vel prorsus manifesto absurdam, nec autor fuerit com-  
pilator judicio carens; concludendum erit, ipsum ab usu lo-  
quendi recedere, adeoque ubi significatus tantisper variatus pro-  
ducit sensum propositionis vel verum, vel saltem non manifesto ab-  
surdum, is voci non definita tribuendus.* Etenim si autor non  
fuerit compilator judicio carens, is non verbis tantum conne-  
ctit, quorum unum ex altero infertur, nec cumulat, quæ sibi  
mutuo repugnant (§. 892.). Quamobrem ubi admissio vocum,  
quem iisdem tribuimus, significatu, propositio evadit manife-  
sto falsa, cum ejus falsitatem perinde ac nos perspicere debue-  
rit ad vocum significatum attentus, adeo pueriliter errasse  
præsumi nequit, consequenter nec verbis ejus tribui potest signifi-  
catus, qui adeo manifesto absurdum sensum producit. *Quodsi  
ergo is eidem tribui nequeat, tribuendus utique erit alius, qui  
occurrit, illo tantisper variato, nec sensum adeo manifesto ab-  
surdum parit, sed vel verum, vel errorum non statim in oculos in-  
currentem.*

Contra hanc regulam plurimi quotidie impingunt, præsertim illi,  
qui in aliorum scriptis errores magis quærunt, quam inveniunt.  
Immo cum respectu lectorum, qui definitiones ab autoribus traditas  
vel negligunt, vel saltem non adeo familiares sibi reddunt, ut defi-  
nito audito menti statim præsens sit notio eidem respondens, vel  
succurrat oratio, qua eadem significatur, in eandem quoque impin-  
gunt haud pauciores, qui autorum propositiones non secundum defi-  
nitiones ab iis traditas interpretantur. E. gr. Nos definivimus mun-  
dum

dum per seriem omnium simultaneorum & successivorum inter se connexorum & in hoc significato vocis demonstravimus, *posito miraculo nec per aliud restituto, quod naturaliter illo non posito secuturum fuerat, per omne subsequens tempus mundum differre ab eo, qui futurus erat, miraculo non patrato.* Qui definitionem nostram non legerant vel saltem sibi familiarem non reddiderant, vocem mundi in significato communi pro compage corporum totalium sumentes propositionem ita interpretabantur, quasi defenderem, *miraculum non posse patrari, nisi Sole & Luna e locis suis divulsis.* Inde intulerunt, stante hac hypothesis miracula esse neganda, ac hinc porro alia, quæ recenseri a præsentis scopo alienum. Immo eadem de causa fieri solet, ut viris summis ab hominibus rerum sublimium parum peritis & a profunda cognitione alienis errores admodum pueriles impudentur. Novum hic habemus argumentum, quo fides historię philosophicę communis labefactatur, supra in dubium vocata (not. §. 784). Nec iis idem inutile erit, qui historiam hæreticorum non satis certam esse existimant, ubi perversa subinde voluntas in causa est, ut ab altero sane ac prudenter, vel saltem non malo animo dicta in perversum sensum trahantur. Exemplum domesticum modo allatum idem illustrat atque confirmat.

## §. 908.

Ex eadem ratione liquet, *si autor non fuerit compilator* *judicio carens & significatus verborum a nobis repertus producat sensum propositionis a libi ab autore stabilitis contrarium; tantisper autem variatus iis consentientem; non illum, sed hunc esse verborum auctoris sensum.* Idem etiam inde ostenditur, quod nemo cum *judicio* scribens sibi contradicere præsumatur, quamdiu a contradictione liberari potest.

*Quid facendum, si autor sibi contradicere videtur.*

Ratio equidem hæc probabilis tantummodo est; sed in eo casu, ubi autor nec terminos ipse definit, nec ab aliis definitos supponit, nec in communi sermone fixus, sed vagus est significatus eorum, rationi probabilis locus est. Aliter vero sese res habet, ubi sensus contrarius infertur per nostras notiones a definitionibus auctoris diversas: tum enim demonstrativa ratione patet, sensum contradictorium a mente auctoris esse alienum. Enimvero hic casus non est hujus loci: continetur enim aberratione a regula, quam de propositionibus ex definitionibus auctoris explicandis tradidimus.

## §. 909.

*Aliter casus.*

Quoniam tamen experientia dudum comprobavit, fieri facillime posse, ut, licet per definitionem terminus a significato vago ad fixum ab autore fuerit revocatus, idem tamen per precipitantiam, aut memoriæ lapsū alicubi ab eodem recedat; si propositio aliqua per definitiones auctoris falsū evadat, ab eis autem si tantisper recedat, sua eidem constet veritas; non prior, sed posterior sensus auctori tribuendus. Idem fieri debere prorsus evaleas, ubi probatio allata non subsistit, nisi hoc verborum sensū admisso.

Impingit hic auctor in regulas methodi, quæ fixum tueri significatum jubent. Cum hæcenus accurata methodus extra Marhesin parum colatur, lapsus iste pro nullo censetur, nec vitio vertitur auctori, si nunc hoc, nunc alio utatur significato. In scripto tamen scientifico ferri non potest (§. 143. *Disc. præl.*).

## §. 910.

*Sensus in  
scriptis scien-  
tificis quo-  
modo crua-  
tur.*

Quoniam in scripto scientifico termini non admittuntur, qui non fuerint definiti, nisi iisdem notio confusa fixum vindicet significatum (§. 790.); in scripto scientifico propositiones omnes per definitiones auctoris sunt explicandæ, nec admittendus alius earum sensus, nisi qui inde prodit, excepto casu unico, ubi auctor in methodi regulas ex defectu attentionis in, egit (§. 909.).

Suppono autorem scripti scientifici & nosse regulas methodi, & eas applicare posse: secus enim scriptum ejus non erit scientificum, etsi id tale videri velit. Quis enim pro scriptis scientificis habuerit, quæcunque hodie sub titulo demonstrativæ methodi in publicum prodeunt, in quibus tamen nulli hujus methodi regulæ fuit satisfactum ab hominibus in definiendo, demonstrando & connectendo rudibus, aut saltem non satis exercitatis? Quod si igitur auctor scripti scientifici a definitione sua recedit, defectu attentionis idem utique tribuendum: etenim si definitionem suam distincte expendere voluisset, in ejus applicatione (§. 349.) aberrare huc quaquam potuisset. Cum ego scientifica methodo scripta philosophica Germanica condens fixo vocum significato per definitiones iisdem vindicato inheream, ab adversariis quoque meis constanter postulavi, ut propositiones meas non aliter interpre-

ten-

tentur quam per definitiones a me datas: verum cum sic non prodiret sensus perversus, unde consequentias mihi molestas nescire poterant, id quidem ab iisdem obtinere non potui, licet a me & aliis, qui causam meam adversus ipsos egerunt, vel quindecies admoniti. Moneo igitur lectores, ut scripta quoque mea latino idiomate de philosophia evulganda non aliter interpretentur, quam ut propositionibus eum tribuant sensum, qui definitionum mearum applicatione prodit.

## §. XII.

Patet adeo, in scripto scientifico lectori attento sensum auctoris ubivis esse certum, nec perverti posse, quin sensus perversus demonstrativa ratione refellatur.

*Scripti scientifici sensus cur certus & perverti nescius.*

Dedi jam superius (not. §. 821.) exemplum provocans ad elementa Euclidis. Addi possunt scripta Archimedis, Apollonii, Theodosii, Menelai, Ptolemai aliorumque Mathematicorum. Non negamus sensum perverti posse ab iis, qui ad definitiones non attendunt, cum in more positum ipsis non sit propositiones ex definitionibus explicare. Neque enim desunt exempla eorum, qui vel Mathematicis nescio quæ absurda imputant ob terminos male intellectos definitionibus neglectis. Immo subinde accidit, ut Mathematicus Mathematici propositionem falso interpreteretur, si definitiones terminorum, quas supponit alter nondum fuerint satis trita. Ita cum aliquando Jacobus Gregorius primo ordinis Geometra, Francisco Eschinardo, mathematicum communium non imperito, proposuisset problema: *Curva parabolica, vel ejus portionis data centrum gravitatis invenire, supposita circuli & hyperbolæ quadratura*; hic per curvam parabolicam intelligens parabolicam planam superficiem problema Gregorianum falso interpretatus idem vulgare judicavit ac tritum, ab Archimede & Lalovera solutum, referende Gregorio in Postscripto, quod vocat, ad veram circuli & hyperbolæ quadraturam p. 60. 61. Hic nimirum per curvam parabolicam intelligebat lineam curvam, qua superficies ista plana terminatur. Hoc ipso autem exemplo confirmatur, quod perversa interpretatio demonstrativa ratione refelli queat. Similiter ego, cum adversarii mei non attentis definitionibus terminorum, quas dederant, propositionibus metaphysicis nonnullis sensum perversum affingerent, eum demonstrativa ratione refellere facillimo negotio poteram definitionibus ad propositiones applicatis. Nec falso propositiones nostras in hoc opere logico & secuturis ceteris operibus philosophicis interpret-

interpretabitur, quin exemplo per definitiones interpretationis falsitas demonstratur.

§. 912.

*Quid tenendum de lectione scripti historici.*

Quoniam in scripto historico nonnisi facta recensentur (§. 744.), adeoque terminis non alius convenire potest significatus, nisi quem iidem vel in communi sermone, vel in scriptis dogmaticis obtinent omnium manu tritis; *in lectione scripti historici sufficit, ut ad singula verba attenti eas cum vocibus singulis jungamus, notiones, quas vulgo cum iisdem in sermone communi, vel in scriptis dogmaticis tritis conjungunt* (§. 905. & seqq.).

Plura scilicet subsidia non affert Logica: unde omittimus cetera, quæ aliundè petenda, utut ex hoc principio demonstranda. V. gr. In historia civili ad intelligendum mentem autorum opus habemus Geographia, Chronologia, Genealogia. Sine Geographia non intelligimus nomina locorum; sine Chronologia non distinguimus tempora, ad quæ facta referuntur; sine Genealogia non novimus personas, quarum facta & fata enarrantur. Quis vero non videt, nos remitti ad Geographiam, quatenus inde petenda est notio locorum nominibus jungenda? Quis non videt, nos ablegari ad Chronologiam, ut constet, quænam notiones conveniant nominibus, quibus designatur tempus? Quis denique non videt, nobis commendari Genealogiam, ne desint notiones, quæ nominibus personarum respondeant? Eodem igitur modo hic sese res habet, ac si lector ad scripta Geometrarum ablegatur, ut inde petat notiones terminis geometricis convenientes, quibus utitur historicus in historia Geometrix, vel in biographia Geometræ, vel in elogio viri docti de Geometria bene meriti, aut aliis cæsis. Patet adeo regulam de usu Geographiæ, Chronologiæ & Genealogiæ in studio historico sub regula nostra contineri, per modum speciei sub suo genere. Similiter quando ex chronologicis principiis discernimus personas ejusdem nominis, nec hic chronologia alium præbet usum, quam ut cum nominibus autoris eam notionem jungamus, quam autor cum ea conjunxit. Unde redeunt denuo modo dicta.

§. 913.

*Ignoranti terminos, quos autor*

*Quodsi lectori definitiones terminorum, quas autor supponit, non fuerint perspectæ, vel olim memoriæ creditæ non succ.*



*succurrant ; mentem illius assequi non potest.* Etenim per se *supponit, cur* patet, quod in hoc casu notiones cum terminis conjungere *liber obscu-* nequeat lector, quas cum iis conjuavit autor. *rus.* Quamobrem fieri nequit, ut autoris mentem assequatur (§. 117.).

Ita schediafmata Mathematicorum diatri Eruditorum infertatyronebus obscura sunt, quod terminos, quos supponunt, non intelligunt. Ex eadem causa librum medicum non intelligit, qui terminos medicos ignorat, nec juridicum, qui juridicos nescit.

## §. 914.

*Si quis termini, quem autor supponit, definitionem ignorans* *Explicatio*  
*vi etymologiae vocis notionem quandam sibi fingit cum ea conjun-* *per etymolo-*  
*gendam; is mentem autoris non intelligit, nisi ratio denominandi* *giam fallax.*  
*fuerit a notione petita.* Patet enim, si ratio denominandi fuerit a notione petita, etymologiam vocis notionem termino jungendam animo nostro insinuare. Eam igitur cum termino jungentes mentem autoris assequimur (§. 117.).

Enimvero ubi ratio denominandi in notione cum termino jungenda minime continetur, etymologia diversam ab ea prodit, quæ cum termino connectenda. Quodsi ergo lector eandem cum eodem jungit; is sensum fingit a mente autoris alienum (§. 120.).

E. gr. Si quis ignorat, quod astronomi nomine *stella fixa* intelligant & vi etymologiae vocem interpretatur *de stellis, quæ fixum*, seu constanter eundem *in celo tuerentur locum*, is beneficio etymologiae sensum autoris assequitur. Enimvero si quis ignorat, quid iisdem nomine *motus veri Solis* designetur, & vi etymologiae (verba enim, *motus verus termino composito æquivalent*) concludit, eo denotari motum Solis; qualis revera in se est, non qualis nobis Tellure visus apparet, is sensum fingit a mente astronomorum prorsus alienum.

## §. 915.

*Si autor definitionem ex terminis extruit, quibus simul sum-* *Quando defi-*  
*mis non aliam tribuit notionem, quam confusam definito respon-* *nitionis in*  
*dentem; ea propositionibus ac definitionibus, quas ingrediuntur, interpretan-*  
*intelligendis non inservit.* In hoc enim casu cum ejus definitio *do nullus*  
*(Wolffii Logica)* *Nnnn* *nulla* *usus.*

nulla sit (§. 166.); perinde est ac si termino absque definitione usus fuisset. Quoniam itaque mentem autores intellecturus cum termino, quoties occurrit, jungere tenetur notionem confusam definito usu loquendi attributam eamque aliunde haustam (§. 117.); definitio in propositionibus ac definitionibus aliis intelligendis nulli usui est.

Ita *Euclidis* definitio linearum rectarum, quæ huic nævo obnoxia (not. §. 166.), propositionibus de lineis rectis in medium allatis ac definitionibus, quas notio rectarum ingreditur, intelligendis minime inservit. Et idem iudicium ferri debet de plerisque definitionibus terminorum metaphysicorum a scholasticis datis.

### §. 916.

*Casus alius.*

*Si definitionem auctoris ingrediuntur termini improprii & vagi; propositionibus ac definitionibus intelligendis inservire nequeunt.* Terminum vago cum invariata non constanter respondeat notio (§. 129.), lector hæere debet, quamnam cum eodem conjungi velit auctor, adeoque nescit, quamnam sit mens auctoris (§. 118.), consequenter ex definitionibus judicare nequit, quinam sit propositionum ac definitionum, quas ingrediuntur termini perperam definiti, sensus. Si terminus improprie sumitur, ad aliud quid denotandum transfertur, quam cui indigitando destinatur (§. 138.). Quamobrem si auctor præmissa definitione significatum improprium non explicet; lector denuo hæere debet, quamnam cum termino improprio notionem conjungere debeat. Patet igitur ut ante, eum ex definitionibus judicare non posse, quinam sit sensus propositionum ac definitionum, quas ingrediuntur termini perperam definiti.

E. gr. Si quis intellectum definit per lumen mentis, vocem luminis improprie sumit. Definitionis igitur nullus est usus in interpretandis propositionibus, quæ de intellectu aliquid enunciant. V. gr. Si quis affirmaverit, emendationem hominis non incipi debere ab intellectu; definitio ad propositionem intelligendam minime conducit. Si enim definitionem in locum definiti substituas, hæc prodit propositio altera, emendationem hominis non incipi debere a lumine

MM

mentis, quæ non melius intelligitur anteriori. Similiter si quis rationem definit per *catenam veritatum*, nec quid hic voce *catena* indiget explicat; definitio ejus minime in causa est, ut propositio hæc *ratio non contrariatur revelationi* rectius intelligatur, quam ubi voce rationis utaris nondum definita. Aliter sese res habet, ubi voci *catena* notionem jungis huc quadrantem, tum enim eadem proprium sortitur significatum (§. 146.), nec definitio amplius præsentis est casus. Accidit scilicet sæpiissime, ut lector defectum auctoris suppleat: sed tum eundem non intelligit ex defectu in scripto ejus obvio, sed ex proprio supplemento.

## §. 917.

Si quis in definitionibus utitur terminis nondum definitis, Casus adhuc & quibus nulla notio fixa confusa respondet; definitiones ejus alius. propositionibus ac ceteris definitionibus intelligendis inservire nequeunt. Si enim termini, qui definitionem ingrediuntur, nondum sunt definiti, nec ulla notio fixa, utut confusa, iisdem respondet; lector denuo hæreere debet, quanam iisdem notio sit jungenda, consequenter definitionem intelligere nequit (§. 117.). Quamobrem cum propositionem, vel definitionem aliam, ex definitione interpretemur, dum eam pro definito substituimus, quod per se & ex modo (not. §. 916.) allato exemplo apparet; si terminos definitionem ingrediētes non intelligimus, nec definitionem ipsam, consequenter nec ipsius beneficio propositiones ac definitiones alias intelligimus.

E. gr. Si quis eum Aristotelicis definit sapientiam per scientiam rerum sublimium; quid vero sint *res sublimis* non explicat; definitio ejus non inservit intelligendis propositionibus de sapientia. Ponamus enim autorem hanc scientiæ definitionem tradentem affirmare, *timorem Domini esse initium sapientiæ*, ubi definitionem sapientiæ pro definito substitueris, prodibit hæc altera: *timor Domini est initium scientiæ rerum sublimium*. Sed hæc non clariorem fundit sensum, quam anterior, quamdiu ignoratur, quid rerum sublimium nomine veniat.

## §. 918.

Si quis tradit definitionem mancā, & propositionem juxta eam interpretatur, in qua prædicatum definito juxta complementum. Definitio-  
nes manca  
ple-

cur in inter-  
pretandis  
propositioni-  
bus errorem  
pariant.

pletam notionem competit; sensus propositionis erroneus evadit. Etenim ubi mutila fuerit definitio, definitum tribuitur rebus, quibus minime convenit (§. 839.). Quamobrem si contingat, prædicatum definito non competere nisi juxta definitionem completam, propositio autem explicetur secundum mutilam; prædicatum quoque tribuetur rei, cui minime convenit. Sensus igitur propositionis erroneus evadit (§. 505. 623.).

Vidimus superius (not. §. 839.), mancā esse definitionem *figura regularis*, quod sit *figura aequalium laterum*. Quamobrem si occurrat theoremata: *Omnis figura regularis est circulo inscripibilis*, idque juxta definitionem mancā interpreteris, quod *omnis figura aequalium laterum circulo inscribi possit*; sensus theorematis erroneus est. Dantur enim figurae æquilatere, quæ circulo inscribi nequeunt.

#### §. 919.

Definitiones  
abundantes  
quæ incom-  
moda in in-  
terpretando  
pariant.

*Si in definitionibus cumulentur, quæ per se invicem determinantur, propositiones per easdem explicatæ sunt identicæ, vel non satis accurate determinatæ.* Etenim si in definitione cumulantur, quæ per se invicem determinantur, demonstrandum utique est, ut constet, definitionem esse possibilem, id, quod per alterum determinatur, definito convenire, quia convenit eidem hoc alterum (§. 219.). Prædicatum adeo propositionis hujus jam continetur in definitione, adeoque cum subjectum sit definitum, in ipsa notione subjecti. Est igitur prædicatum cum subjecti parte idem, consequenter propositio in numerum identicarum recte refertur (§. 213.).

Quodsi prædicatum propositionis categoricæ non est in numero eorum, quæ in definitione cumulantur; vi tamen definitionis eidem tribuendum (§. 349.). Enimvero cum plura cumulentur in definitione, quam quæ eam ingredi debent, *per hypobesin*; non vi integræ definitionis, sed saltem nonnullorum in ea contentorum prædicatum subjecto convenit. Perinde igitur est ac si in propositione hypothetica conditio plura contineret, quam quæ ad hoc requiruntur, ut prædica-

dicatum subjecto tribui queat (§. 218. 225.); consequenter propositio accurate determinata non est (§. 320.).

E. gr. Si *triangulum æquilaterum* definiatur per *triangulum æquialium laterum & angulorum*; ante demonstrandum est, figuram triangularem & æquilateram, & æquiangulam esse posse, hoc est, ideo esse æquiangulam, quia æquilatera. Propositio vero, *triangulum æquilaterum angulos habet inter se æquales*, ita vi definitionis explicanda: *triangulum, quod latera & angulos inter se æqualia habet, angulos inter se æquales habet*. Ecquis vero negabit, propositionem sic fieri identicam. Quod vero propositiones sic non fiant satis determinatæ, in superioribus jam demonstravimus & exemplo confirmavimus (not. §. 836.). Unde quæ ibi demonstrata sunt respectu demonstrationis; eadem hic quoque locum habent respectu explicationis: quæ adeo ratio est, cur demonstratio in utroque casu eadem sit, prout conferenti patebit. Etenim qui propositionem categoricam demonstrat & definitione instar hypothesis utitur (§. 551.), is revera subjectum per definitionem explicat. Quod vulgo talia non advertantur, id quidem inde est, quod propositiones per definitiones explicare & categoricas ex iis demonstrare hætenus negligant autores ab accurata methodo alieni.

#### §. 920.

*Quodsi definitio vel defecerit, vel ad interpretationem parum apta tradita fuerit; eæ cum verbis auctoris conjungendæ sunt notiones, quas vel exempla in medium allata, vel probatio propositioni adjecta insinuant.* Etenim si mentem auctoris intelligere voluerimus, eæ cum verbis ejusdem conjungendæ sunt notiones, quas ipsemet cum iisdem conjunxit (§. 903.). Jam si exempla ab ipso in medium allata, vel probationes propositionibus adjectæ notiones aliquas insinuant, quæ sensum fundunt illis consentientem; quin autor easdem, dum sua scripsit, in animo præsentibus habuerit, dubium non est.

Notiones ex  
exemplis &  
probationi-  
bus derivan-  
de.

Loquimur scilicet de autore, qui propositiones ipse condidit. Quod si quis sine judicio sua compilaverit, quæ lectori proponit; sensum scrutamur non compilatoris, sed illorum, unde sua desumpsit, autorum. E. gr. Ponamus *Titium* in scripto historico appellari *temperantem* & probationis loco adduci, quod nunquam comederit ad satietatem, sed frugali cæna contentus a cibo capiando destiterit, cum

sapor appetitum ulteriorem cieret, omnemque cibum averſurus fuerit, quem ſibi, vel aliis nocuum expertus fuerat, utut ſaporem ſuaviſſimum judicaret. Facile apparet, animo hiſtorici eam inſediſſe *temperantia* notionem, quod ſit habitus appetitum moderandi in capiendo cibo, ne ſtomachum nimio oppleamus, nec ſanitati adverſum eidem ingeramus. Similiter ſi philoſophus ſcholasticus definit *uniſerſale inſeſſendo*, quod ſit *unum aptum inſeſſe multis univoce & diſiſſim*, ut homo Petro atque Paulo; exemplum adjectum animo noſtro inſinuat notionem termino *uniſerſalis* jungendam, quæ per definitionem autoris non ſatis patet. Etenim cum maniſeſtum ſit, *Petrum* atque *Paulum* vocari *hominem* propter ea, quæ utrique communia, vel in utroque eadem ſunt, conſequenter quatenus entia ſimilia ſunt; haud obſcure intelligitur, *uniſerſale* eſſe notionem ſimilitudinis, quæ inter plura entia intercedit. Nimirum definitioni autoris, quæ nulla eſt, ſubſtituimus, genuinam, quam dare intenderat. Quodſi hoc non fuerit in poteſtate, ad mentem ejus intelligendam ſufficit conſuſa notio ab exemplo derivata. Et ſane poſteriori modo Metaphyſicam ſcholasticorum genuinis definitionibus deſtitutam intelligere datur, quæ etiam ratio eſt, cur non retentis definitionibus, quæ plerumque nihil explicant, audito termino exempla ſuccurrant, quibus notio clara, ſed conſuſa eidem jungenda adhæret. Idem obtinet alibi, ubi termini vel proſuſ non explicantur, vel male definiuntur.

## §. 921.

*Senſus erroneus dubius autori non tribuendus.*

*Quodſi notio, quam verbis autoris jungimus, ſenſum producat erroneum, nec tamen probari poſſit, ex intentione autoris eam cum iſdem notionem eſſe jungendam; præſtat conſiteri, nos mentem ejus non aſſequi, quam errorem eidem tribuere, præſertim ubi judicii & acuminis dederit ſpecimina alia. Quamdiu enim probari nequit, nos eas cum verbis autoris jungere notionem, quas cum iſis junxit ipſe dubium; eſt utrum mentem ejus aſſequamur, nec ne (§. 903.). Cum igitur nondum certi ſimus, ſenſum, qui ex noſtra interpretatione prodiit, erroneum eſſe ſenſum verborum autoris, ſed fieri poſſit, ut a nobis alia notionem, quam fieri debeat, verbis juncta inferatur; evidens omnino eſt, nos autori eundem tribuere non poſſe errorem.*

*In*

In casu adeo dubio præstat confiteri, quod mentem autoris assequi non valeamus, quam ei errorem tribuere, a quo censeri poterat immunis. Idem multo magis fieri debere eo in casu, ubi autor iudicii & acuminis specimina alia dedit, per se patet.

Facile apparet, nos hic supponere, per regulas antea traditas sensum verborum autoris erui non posse. Veteribus Philosophis, quorum non amplius extant scripta, sed ab aliis tantummodo concessis verbis relatæ sententiæ prostant, neglecta hac regula frequenter tribuuntur errores a mente ipsorum dubio procul quam maxime alieni.

§. 922.

*Æquus in interpretando* appellatur, qui verbis autoris non alium tribuit sensum, quam quem iisdem convenire, demonstrare, aut, ubi minime erroneus fuerit, probabiliter adstruere valet. E contrario *iniquus in interpretando* est, qui verbis autoris tribuit sensum erroneum, quem iisdem convenire demonstrare nequit. Dantur autem gradus huius in interpretando iniquitatis, ita ut major sit, ubi per regulas antea traditas, seu argumentis insitis, probari potest, sensum erroneum esse a mente autoris alienum, & adhuc major, si quis sensum erroneum verbis autoris tribuere pergit, ubi falsæ interpretationis fuerit admonitus & verus verborum sensus demonstratus.

Æquæ interpretationis regulas hætenus stabilivimus: quas qui observaverit, autori nunquam tribuet sensum a mente ipsius alienum, & in casu dubio ultro confitebitur, se mentem autoris assequi non posse. In regulas istas cum impingitur, iniquæ interpretationi locus est.

§. 923.

Cum in scripto scientifico lectori attento sensus ubivis certus sit, nec perverti possit, quin sensus perversus demonstrativa ratione refellatur (§. 911.), in eodem autem omnes propositiones per definitiones autoris sint explicandæ (§. 910.); manifesta sane iniquitas est, si quis verbis autoris offingat sensum definitionibus ejus contrarium.

Mani-

Manifesta evadit iniquitas in interpretando hoc in casu, ubi definitiones auctoris pro terminis, quibus notio a mente auctoris aliena jungitur, substitueris. Etenim cum hunc verum esse sensum auctoris nullo modo dubitari queat (§. 910.), diversus tamen is sit ab eo, quem lector verbis auctoris tribuit; iniquum fieri interpretationem verborum auctoris ad oculum patet. Qui sensum verborum meorum in Meditationibus metaphysicis & moralibus perverterunt, ut mihi imputare possent consequentias molestas, eorum iniquitatem in pervertenda mente mea hoc pacto in conspectum omnium produxi. Exemplum dedi superius (not. §. 907.), cui hic etiam locus est.

## §. 924.

*Iniquissima interpretatio.*

*Quod si ergo quis ne monitus quidem semel, vel aliquoties, ab interpretatione definitionibus auctoris adversa desistat, quin et iniquissima omnium sit dubitari nequit.* Etenim cum initio iniqua interpretatio vel ignorantiae regulæ de propositionibus per definitiones in scriptis scientificis interpretandis (§. 910.), vel præcipitantiæ tribui poterat, quod definitionem evolvere neglexerat interpres; ubi idem monitus contra evidentiam falsitatis in interpretando (§. 911.) nititur, nullo modo excusari potest. Non major vero in interpretando iniquitas concipi potest, quam ubi excusationi nulli prorsus est locus.

Monui jam superius, eos qui propositiones quasdam metaphysicas de mundo, non attenta definitione mundi falso interpretati fuerant, ne quindecies quidem admonitos ab hac interpretatione destitisse (not. §. 910.). Unde intelligitur, casum præsentem esse possibilem, nec a nobis afferri theorematum nulli usui futura.

## §. 925.

*Rationes interpretationis iniquissimæ.*

*Si quis ne monitus quidem ab interpretatione verborum auctoris definitioni ejus contraria desistat, is ei inhaeret vel ex odio erga autorem, vel ex fastu inani, vel ex supina negligentia.* Etenim cum manifesta sit iniquitas, quæ ipsi sensui patet, si quis verbis auctoris affingit sensum definitionibus ejus contrarium, attamen ne monitus quidem a perversa interpretatione desistit; si aut non dignatur veram interpretationem definitioni conformem intueri, multo minus eam perpendere, aut errorem, quem



quem in interpretando committit, confiteri reuit. In priori casu supinam esse negligentiam, nullo modo condonandam, præsertim ubi ex falsa interpretatione deducuntur consequentia auctori molestæ, nemo est qui diffiteri ausit. In casu posteriori cum ratio non in intellectu hæreat, in voluntate utique quaerenda. Aut igitur errorem confiteri non vult, quod auctori nocere intendit, aut ne negligentia, vel ignorantia ipsi vitio vertatur. Quod auctori nocere intendens odium erga ipsum animo conceperit; qui vero negligentia vel ignorantia reus haberi non vult, fastu inani turgat: denuo satis manifestum esse arbitror, ut idem ulteriori probatione non indigeat.

Equidem nemo sanus negaverit, minus vitio verti præcipitantiam in falsa interpretatione primum commissam, quam vel odium, quo auctorem prosequentes famæ, vel fortunæ ipsius insidiamur, vel fastum inanem, quasi ultra humanam sortem evecti errare non possumus: hoc tamen non obstante mos inter eruditos obtinuit, ut malint contra evidentiam falsæ interpretationi inhærere, quam præcipitantiam suam confiteri. Ratio nimirum hæc est, quod sibi persuadeant, fieri non posse, ut aliis innotescat, nos contra evidentiam malo animo niti, adeoque propositum nocendi auctori, vel fastum inanem interpretis certo agnoscant. Enimvero qui theoremata nostra perspexerit, hæc non amplius in eorum numerum referet, quæ fieri non posse judicantur. Doleo, quod viri eruditi non magis famæ suæ rationem habeant!

§. 926.

*Si compiler non utitur definitionibus, quas vel in eodem, Quando pro-*  
*vel in diversis scriptis assert, ubi earum applicatione prodit sensus positiones*  
*propositionum vel falsus, vel nullus; propositiones per definitiones compileris*  
*interpretari non licet. Etenim cum verbis singulis notiones per definitiones*  
*conjugere tenemur, quas cum iisdem jungit auctor (§. 903.). nes non expli-*  
*canda.*  
 Sed ubi compiler per alios libros sparsa in unum cogens insuper habita veritatum connexione (§. 889.) definitionibus, quas assert, non utitur; ipse terminos in propositionibus obvios per definitiones non explicat, adeoque non attendit, utrum sensus earum sit hisce consentaneus, nec ne. Non igitur pro-

(*Wolffii Logica*)                      O o o o                      posi-

positiones per definitiones interpretari licet, ubi sensus prodit vel falsus, vel nullus, nisi iniquus in interpretando esse volueris (§. 922.).

E. gr. Cum non nemo definiret *possibile per id, quod potest fieri, nec tamen sit*, hac definitione vero non obstante affirmaret, *Deum non posse facere nisi possibilia*; iniquum fore pronunciavi, si quis ejus propositionem de Deo per definitionem possibilitatis interpretaretur. Etenim si ea substituitur in locum definiti, sensus propositionis talis evadet: *Deus non potest facere, nisi quæ fieri possunt, nec tamen sunt*. Quoniam itaque vi hujus definitionis dicendum erat, autorem statuere, quod Deus eorum, quæ actu sunt, nihil faciat, consequenter nec mundum producere possit; malui judicare, autorem definitionibus suis non uti, quam ipsi tribuere sententiam, quam forte ne somnando quidem assecutus, etsi is suas in mea scripta notiones inferens definitionibus meis parum consentaneas istiusmodi sensus perversos mihi attribueret ac prono alveo inde fluentes consequentias absurdas atque impias mihi tanquam dogmata publice disseminata impuraret.

### §. 927.

*Quando liceat uti definitione a definitione auctoris diversa in interpretando.*

Quoniam unius ejusdemque termini, non variato significato (§. 141.). plures dari possunt definitiones (§. 172. & seqq.); sensus propositionis verus prodit, quæcumque substituere pro termino volueri, definitionem. Non igitur iniquus est in interpretando, qui per definitionem ab auctoris definitione diversam, modo veram propositionem ejus interpretatur (§. 922.).

E. gr. *Parabola* in Geometria diversis modis definiri potest v. gr. quod sit *curva*, in qua *semiordinatarum quadrata sunt ut abscissa*; item quod sit *curva*, in qua *quadratum semiordinata æquatur rectangulo ex abscissa in rectam quandam constantem, seu parametrum*; item quod sit *curva*, in qua *recta ex foco ad perimetrum ducta æquantur abscissa respondenti & distantia foci a vertice &c.* Alius autor hac utitur definitione, alius alia. Quæcumque vero definitionem in propositione data loco definiti substituas, modo eadem non sit propositio ipsa, sensus propositionis semper erit verus, nec identicus. Ponamus enim affirmari, in parabola subtangentem esse abscissa duplam; vera erunt propositiones: 1. Si in curva semiordinatarum quadrata sunt ut abscissa, subtangens est abscissa dupla; 2. Si in curva quadratum semiordinata æquatur rectangulo ex abscissa in parametrum, subtangens est abscissa dupla;

3. si recta ex foco curva ad perimetrum ducta æquantur abscissa respondentis & distantia foci a vertice, subtangens est abscissa dupla &c. Quacunque igitur ratione propositionem explices, nunquam tamen auctori tribues sensum erroneum, sed eum, quem ultro concedere debet, si veritatem propositionis & æquipollentiam definitionum intellexerit. Ubi non laboramus nisi de propositione intelligenda, utique nobis sufficit, si predicatum eidem tribuamus subjecto, cui autor idem tribuit, sive subjectum nobis sub hac notione repræsentemus, sive sub alia, quæ perinde ac ipsa sufficit ad idem agnoscendum atque ab aliis discernendum. Patebunt hæc magis, ubi inferius de usu Logicæ in vita communi differuerimus, applicationem definitionum ac propositionum monstraturi ad casus obvios.

§. 928.

Si quis in scripto scientifico demonstrationem auctoris definitione nixa intelligere voluerit, per eas præcise definitiones propositiones interpretari tenetur, quas autor condidit, non per alias eidem æquipollentes. Etenim in scripto scientifico propositiones demonstrantur aut probantur (§. 751.). Enimvero si demonstratio definitione nititur, prima iudicia ex definitione formantur (§. 551.). Eam igitur intellecturus definitioni auctoris non aliam, et si æquipollentem, & quæ sensum verum producit (§. 903.), substituere licet.

Quando idem non liceat.

E. gr. *Leibniti*us in desideratis habuit *analysin situs*, qua ea in Geometria elementari demonstrarentur, quæ a situ pendent & ope calculi literalis, qui magnitudinum calculus est, demonstrari nequeunt. Quod si quis *analysin situs* ex abyssu in lucem protraheret eademque in elementis Geometriæ uteretur; novæ quoque condendæ forent definitiones, qualis e. gr. est *puncti*, quod sit *situs sui unicum*. Cum demonstrationes per *analysin situs* non subsistant nisi vi definitionum a situ petitarum; in explicandis quoque propositionibus Geometriæ elementaribus non aliis eo in casu uti liceret definitionibus, quam quæ ab autore præmitterentur. Patet attendenti ad exemplum demonstrationis theorematum de angulis parallelogrammi diagonaliter oppositis supra (not. §. 551.) allatæ; in hoc theoremate interpretando, si demonstratio subsistere debeat, non aliam posse sumi definitionem, quam quæ in demonstratione supponitur, scilicet quod *parallelogrammum sit figura quadrilatera, cujus latera opposita sunt inter se parallela*,

etsi vera quoque sit definitio, quod sit *figura quadrilatera, qua per diagonalem in duo triangula aequalia dividitur*. Etsi enim hæc definitio in propositione pro nomine parallelogrammi substituta non producat sensum erroneum; eam tamen non fert demonstratio ibidem allata.

## §. 929.

*Quo successu in interpretando notio distincta confusa substituitur.*

*Quodsi autor cum quibusdam terminis conjungit notionem confusam, lector autem distinctam, & utraque eadem res representatur; lector mentem auctoris intelligit & melius explicat.* Et enim si notione auctoris confusa & lectoris distincta eadem res representatur; uterque eundem terminis tribuit significatum (§. 142.). Idem adeo prædicatum cum tribuat uterque eadem subjecto; quin lector auctoris mentem intelligat dubitari nequit.

Enimvero cum is, qui notionem distinctam habet, modo notarum eandem ingredientium terminos noverit, singulas alteri enumerare valeat (§. 89.), idem autem ab eo, cui tantum confusa notio est, expectari nequeat (§. 88.); patet utique, quod lector in interpretanda propositione auctoris notionem distinctam confusæ substituens mentem ejusdem melius explicet, quam ab ipsomet fieri poterat.

Plurimum adeo falluntur, qui sibi persuadent, propositiones receptas in sensum alienum detorqueri, ubi notionibus confusis, quæ vulgo cum terminis conjunguntur, substituuntur distinctæ: id quod cum a me fieri soleat, nec defuere, qui cum verba a rebus distinguere non valerent, mihi objecere, quasi propositionibus receptis diversum prorsus ab eo tribuerem sensum, qui vulgo obrinet. Mihi inprimis propositum est, ut veritates ab aliis confuse agnitas distincte exponam: antequam enim distincte explicentur propositiones, a priori demonstrari nequeunt. Exemplum dedi superius geometricum (not. §. 142.), quod etiam hic locum habet.

## §. 930.

*Quando praxis suggerat notio-*

*Si autor terminis rerum practicarum jungit notionem, quas praxis ipsa eidem suggestit; mentem ejus non rectius intelligit, quam qui ipsa praxi easdem in se notiones excitat.* Tum enim

enim mentem auctoris intelligimus, si cum verbis singulis eas jungimus notiones, quas ipsemet cum iisdem conjunxit, cum librum conscriberet (§. 903.). Quamobrem ubi auctor terminis eas jungit notiones, quas praxis ipsa eidem suggestit & nos eadem praxi notiones terminis jungendas in nobis excitamus; nullum profecto dubium est, quin easdem prorsus notiones singulis terminis attribuamus, quas iisdem assignavit auctor, cum librum scriberet. Rectius adeo mentem ipsius intelligere non datur.

Monui in notis ad Orationem de Sinarum philosophia practica; *Confucium*, Sinarum philosophum, firmiter fuisse persuasum, absque exercitio veras rerum moralium notiones comparari non posse, nec obtineri nisi umbras earum & inanes ac sæpe falsas imagines. Vide not. 106. III. Et ibidem jam annotavi not. 136, id inprimis fieri debere, ubi auctor in confusis notionibus acquiescit. Idem ego expertus sum, atque adeo theorema præsens quantivis pretii iudicio. Quoniam igitur Logica est disciplina, quæ tota quanta ad praxin tendit, nosque cum terminis singulis, quibus utimur, eas jungimus notiones, quas attenti ad praxin domesticam regularum, quas præscribimus, in nobis deprehendimus; nulli quoque dubitamus fore, ut mentem nostram optime assequantur dictorumque veritatem facto experimento in seipsis experiantur, qui indefessum collocabunt studium in regulis nostris ad praxin transferendis. Ita uberrima lux ipsis affunderetur in singulis rite intelligendis.

§. 931.

*In lectione historię naturalis cum verbis auctoris eæ conjungende sunt notiones, quæ rebus præsentibus in animo hominis excitantur.* Etenim qui historiam naturalem condit, facta naturæ describit (§. 745.), hoc est, res corporeas in mundo obvias & phænomena naturalia. Non alias igitur cum verbis jungit notiones, quam quæ in animo suscitabantur, dum res illas, de quibus loquitur, coram intuebatur. Etenim qui recenset ac describit, quæ ipse non vidit, vel observavit; cum ejus verbis conjungendæ sunt notiones auctoris, qui sibi visâ & observata descripsit & cujus fide ceteri eadem recensent. Quamobrem

obrem mentem autoris in historia naturali affecuturus cum verbis ejus eas jungere tenetur notiones, quæ rebus præsentibus in animo excitantur (§. 903.).

Facile apparet, hanc regulam quoque observandam esse in legendo scripto quocunque alio, ubi ad historiam naturalem spectantia traduntur. E. gr. Si in historia naturali asseritur, *Solem oriri*; non alia cum his verbis notio jungenda est, quam quæ Solem orientem intuentibus præsens est, hoc est, quæ a re præsentē abstrahitur. Cum igitur Solem orientem intuentes non observemus, nisi quod appareat in horizonte, cum antea latuisset; notio *ortui Solis* respondens non est alia, quam quod sit *apparentia Solis antea latentis in horizonte*. Similiter quando *Sol* dicitur *moveri circa tellurem*; cum his verbis non alia conjungenda est notio, quam quæ ad hoc phænomenon attendentibus præsens, seu quæ a phænomeno præsentē abstrahi potest. Jam si ad Solem per diem fuerimus attenti, nil quicquam aliud observamus, nisi quod *situs ejus respectu puncti fixi in Tellure dati continuo mutetur*. Cum *motu* igitur *Solis circa terram* non aliam jungere licet notionem, quam quod sit *continua situs Solis mutatio respectu puncti fixi in Tellure dati*. Eodem modo hic res sese habet, ac si notionem tribuimus nomini animalis, vel plantæ alicujus respondentem. Nunquam notionem ingredi possunt, nisi quæ animali, vel plantæ actu inesse observamus: id quod per se patet. Similiter notio phænomeni non continere debet, nisi quæ in eodem, dum observatur, actu deprehenduntur. Regula hæc utur manifesta sit, vulgo tamen negligitur, & historia naturalis falsæ ejus neglectu exponitur interpretationi.

### §. 932.

*Quinam rectius eam interpretentur.*

*Non igitur rectius historiam naturalem interpretatur, quam qui ipsa rerum naturalium observatione notiones sibi comparat, scilicet formandi notiones, quantum datur, distinctas instruens.*

Convenit hæc regula cum anteriori, qua notiones rerum præclararum propria exercitatione nobis comparare jubemur, ut autores de iisdem scribentes rectius intelligamus (§. 930.). Eum in finem in anatomicis subjecta ipsa oculis eorum subjiciuntur, quorum interest nosse organa, ex quibus corpus humanum, vel animale componitur. Medicus materiam medicam explicans medicamenta simplicia

plia sensui auditorum subicit, ut visu, olfactu & odoratu notiones consequantur nominibus eorundem jungendas. In Botanicis herbarum monstrantur ipsae & in oras peregrinas plantarum cognoscendarum gratia profecti parant herbaria viva. Deficientibus objectis ipsis sensui exhibendis, eorum imagines aeri incisae oculis spectandae proponuntur (§. 761.): & praestaret objecta eadem depingi a pictore perito, ut nativis coloribus conspicua sisterentur & alia paterent, quae in schemate aeri inciso non aequè exhiberi possunt.

§. 933.

Facile absque demonstratione ulteriori patet, si in scripto historico occurrant termini facta hominum, vel opera artis denotantes, perinde ac in historia naturali (§. 931.) non alias jungendas esse notiones, quam quae a rebus praesentibus abstrahuntur.

Notiones in historia reliqua interpretanda requisitae.

Pertinenthuc etiam nomina officiorum & dignitatum, & istiusmodi alia. Et sane ideo successu temporis, rebus illis non amplius existentibus, sive quod in desuetudinem abierint, sive quod perditae fuerint, scripta autorum non amplius intelliguntur, quae suo aëvo erant lectori perspicua.

§. 934.

Hinc ulterius consequitur; non rectius scriptum historicum intelligi nisi ab eo, qui rerum praesentium, de quibus sermo est, notiones ipso usu sibi comparavit.

Quinam eam rectius intelligant.

E. gr. Qui bello nunquam interfuit, nec accuratis schematis, quae ibi contingunt, delineata vidit; is descriptionem belli alicujus non aequè intelliget ac alius, qui ipsemet bello interfuit & singula in eo usitata proprio sensu usurpavit.

§. 935.

Eodem modo patet, si autor historiae naturalis verbis eam notionem jungit, quam facto experimento sibi comparavit; eandem quoque verbis ejus esse jungendam, nec rectius mentem ejus intelligi quam ab eo, qui notionem experimento repetito acquisivit.

Notiones ex experimento acquisite quando usut in interpretando.

E. gr. Si quis ipsemet iteravit experimentum, quo Hauksbejus affricu vitri per contactum manus lumen excitavit; is hujus luminis notio-

notionem eandem, quam ille habet, atque adeo rectius mentem ejusdem intelligit, dum descriptionem illius legit, quam si nunquam ipse idem lumen oculis usurpasset. Similiter quæ de reflexione ac refractione luminis dicuntur, is rectius intelligit, qui in camera obscura sumto experimento notionem reflexionis & refractionis venatus est, quam qui eadem destituitur.

## §. 936.

*Notionum  
deceptricium  
quinam in  
interpretan-  
do usus.*

*Si autor cum verbis suis conjungit notionem deceptricem, lector mentem ejus intelligit, ubi eandem notionem deceptricem iisdem jungit.* Qui enim mentem autoris intelligere debet, is eandem cum iisdem notionem jungere tenetur, quam jungit autor (§. 903.). Quamobrem si notionem deceptricem cum iisdem jungit, ille eandem cum iisdem jungere debet. Ponamus enim autorem cum iisdem veram jungere; sensus igitur prodibit a mente autoris diversus (§. 120.): id quod fini intentioni repugnat (§. 902.).

E. gr. Si quis affirmaverit, *figuram rectilinearum omnium simplicissimam esse bilineum rectilineum*; is bilinei rectilinei nonnisi notionem deceptricem habet, dum id fingit esse *spatium duabus lineis rectis terminatum*. Et si igitur verbis *spatium duabus lineis rectis terminatum* nulla respondeat notio, sed ea potius sint sine mente sonus; propositionem tamen, quam de bilineo rectilineo in medium attulimus, interpretaturus, bilineum rectilineum per spatium duabus lineis rectis terminatum explicare debet, ut mentem autoris assequatur. Plurima occurrunt in physica scholasticorum exempla, ubi notionibus deceptricibus opus est, si mentem autoris intelligere voluerimus. Neque enim jam agitur de veritate propositionis, sed de mente autoris: quæ si erronea fuerit, nostra interpretatione non potest fieri vera.

## §. 937.

*Notionum  
imaginariorum  
usus in  
interpretan-  
do.*

*Si autor terminis, quibus utitur, notionem imaginariam jungit; lector mentem ejus affecuturus cum iisdem eandem notionem imaginariam jungere debet.* Patet eodem modo, quo propositio præcedens.

E. gr. Plerique *spatii* nonnisi imaginariam notionem habent, dum sibi istud representant tanquam *extensum continuum uniforme*, seu  
cujus



*enjus partes aequales non differant nisi loco.* Quamobrem si quis hanc notionem cum voce *spatium* conjungit; lector a mente ejus aberraret, si aliam cum eadem jungere veller, v. gr. quod sit *ordo simultaneorum*, vel, ut *Leibniti*us loquitur, *coëxistentium*. Notiones metaphysicæ plerisque nonnisi imaginariæ sunt, quemadmodum in philosophia prima & ceteris Metaphysicæ partibus ostendemus, ubi differentiam notionum realium & imaginariarum atque ambarum usum sumus expositori.

§. 938.

*Si autor supponit in propositione definitionem realem, mentem ejus clarius intelliges, ubi re per genesin suppeditatam producta notionem ejus claram, sive distinctam, sive confusam fueris consecutus.* Cum enim verba autoris interpretari debeamus per definitiones, quas tradit (§. 904.), nisi constet, quod in propositionibus ab iisdem recedat (§. 909.); ubi definitionem rei termino aliquo denotatæ dedit realem, terminus iste per hanc definitionem realem explicari debet. Enimvero cum genesi rei raro inserviat eidem, quando nobis obvia est, agnoscendæ & ab aliis distinguendæ; non inutile est, ut præterea ejusdem notionem aliam completam habeamus, sive distinctam, sive confusam. Hanc igitur ubi cum definitione reali combinamus, clarius nobis evadit propositio, cum magis pateat, cuinam subjecto propositio sit tribuenda. Quamobrem cum eandem notionem adipiscamur, ubi rem præsentem inuenimur, per genesin autem res præsens fisci possit; ut eam hac via venemur mentem autoris clarius intellecturi, e re nostra esse quis dubitet?

*Definitionum realium in interpretando usus.*

E. gr. *Definitio circuli realis est, quod sit figura, quæ describitur, si recta quadam circa punctum fixum in orbem rotetur.* Quodsi igitur autor præmissa hac definitione affirmet: *triangulo cuique circumscripti posse circulum*, clarius mentem ejus intelliges, ubi vel nominalem simul habueris, vel confusa ejus idea animo observetur.

§. 939.

*Si quis ea, quæ in scripto historico quocunque legit, eo modo expendit, quo notionem distinctam venamur; eadem memoria (Wolfii Logica)*

Ppp

ria

attentione  
legenda.

*ria facile retinet.* In scripto enim historico recensentur facta sive naturæ, sive hominum, vel opera naturæ ac artis describuntur (§. 744. 745. 747.) & in scriptis dogmaticis historicis dogmata & argumenta, quibus probantur, commemorantur (§. 751.). Quodsi igitur legis, quæ de facto aliquo narrantur, vel operis alicujus sive naturæ, sive artis descriptionem, & eodem labore defungeris, quem notioni distinctæ formandæ impendis; singula, quæ discerni possunt, sigillatim contemplaris ac deinde ordinem atque nexum expendis (§. 682.). Constat vero experientia, ejus rei ideam memoriæ facile imprimi, in qua cogitationes ita defigimus, ut attentionem ordine ad singula promoveamus, quæ in eadem discerni possunt. Quamobrem si ad narrationem facti, vel descriptionem operis eandem attentionem afferimus, qua in venanda notione distincta utimur; eandem quoque memoriæ facile imprimere debemus.

Quodsi in scripto dogmatico historico eadem cum cura verferis, in definitione definitum & notas, quæ eam ingrediuntur, singulas, ubi nominalis fuerit (§. 192. 193.), vel quæ in genesi ejus ullo modo discerni possunt, ubi realis fuerit (§. 194.), in propositionibus subjectum & prædicatum una cum adjectis determinationibus, si categoricæ non fuerint (§. 199. 200. 228.), & argumenta, quibus probatio continetur, a propositionibus probandis distingues. Quamobrem patet, ut ante, ea quæ legis memoriæ facile imprimi debere.

Veritatem propositionis unusquisque in seipso experiri valet: discernimen enim haud exiguum est, quo distincte expensa & confuse percepta memoriæ infiguntur, sive facilitatem spectes, qua eidem demandantur, sive firmitatem, qua eidem inhaerent. Habenda tamen hic quoque est ratio diversitatis memoriæ in diversis subjectis obvia. Loquimur enim hic de eodem subjecto, non attenta differentia memoriæ in diversis: unde jubemus, ut unusquisque experimentum in seipso sumat. Ceterum in re facili exemplum non addimus, nisi quod moneamus, in expendendis factis hominum locum habere versiculum vulgarem, quo circumstantiæ comprehenduntur: *Quis, quid, ubi, quibus auxiliis, cur, quomodo, quando?* Nec hoc silentio præteriri debet, usui esse in histo-

histo-

historia civili & ecclesiastica notiones morales & politicas, in historia naturali notiones rerum naturalium & experimentorum ac in omni historia notiones metaphysicas, præsertim ontologicas: omnis nempe hic utilis cognitio est, quæ formationem notionis distinctæ juvat, docens in ea formanda observatu necessaria.

§. 940.

*De probabilitate vel veritate rei narratæ judicaturus in auctoritatem testis oculati atque auriti inquirere (§. 615. 617. 619.), simulque dispicere debet, num in narratione occurrant, quæ vel sibi mutuo, vel veritati certo cognitæ repugnant.* Etenim veritas historica examinanda est juxta regulas fidei, quæ auctoritate testimonium nititur (§. 803.); in particulari autem innotescit, si ob circumstantias singulares sive ex ipsa narratione, sive aliunde nobis perspectas relata ideo admittimus, quod nec sibi mutuo, nec veritati evidenter cognitæ repugnent, adeoque possibilitate non destituantur (§. 804.). Quare ratio nulla est, cur narrationem auctoris in dubium vocemus, cujus & auctoritas minime suspecta, & narratio non continet, quæ impossibilia sunt, consequenter de probabilitate, vel veritate rei narratæ judicaturi non majore circumspeditione uti valemus, quam ubi & in auctoritatem historici, & in rei narratæ possibilitatem inquirimus.

*Veritas rei narratæ quomodo judicanda.*

Non negamus praxin regulæ difficilem esse, nec nisi multo exercitio & varia cognitione prævia pro diversitate objecti fieri expeditam. Sed in Logici potestate non est, ut in potestatem nostram regat, quæ in ea posita non sunt: satisfacit is officio suo, si regulas observatu necessarias ubivis inculcet. Ceterum hinc apparet, tyronis non esse, ut de rei narratæ veritate judicet, nisi ubi obvia sunt, quæ expendi merentur. Sufficit eidem, si, quæ legit, intellexerit & memoriæ mandaverit. Immo primi tyrones subinde memoriæ infigere debent olim profutura, quæ non satis intelligunt, suo tempore clarius perspicienda, ubi eorum animus alia cognitione fuerit imbutus. E. gr. In historia civili notiones sæpe morales & politice penes lectorem supponuntur, a quibus adhuc vacuus est animus adolescentium historicam veritatem memoriæ in futurum usum mandantium. Non igitur satis intelligunt, quæ in futurum usum memoriæ mandant. Postquam vero rerum moralium

& politicarum cognitione animum imbuerunt, clara tandem ipsis evadunt, quæ antea adhuc fuerant obscura. Ceterum quæ hic præcipiuntur, de veritate historiarum naturalis quoque intelligenda sunt (§. 807.).

## §. 941.

*Veritatis historia naturalis cognoscenda modus peculiaris.*

Quoniam historiam naturalem rectius interpretaturus ipsa rerum naturalium observatione & repetito experimento notiones sibi comparare debet (§. 932. 935.); qui historiarum naturalium rectius intelligenda studet, eo ipso veritatem ejusdem perspicit (§. 805.).

Exempla dedi in superioribus (not. §. 805.). Ceterum hinc patet, quod collegia experimentalia utiliter a Sturmio, Professore quondam Matheseos & Physicæ Altorfino in Academiis Germanicis fuerint introducta. Difficilius est in historia naturali veritatem narratorum a priori cognoscere (§. 806.): quod primo statim intuitu patet.

## §. 942.

*Que tenenda ei, qui historiam ad usum translaturus.*

Si quis historiam civilem, ecclesiasticam atque privatam ad usum suum transferre voluerit, is & Ethicæ atque Politicæ cognitione instructus & Logica utente pollere debet. Historia civili utimur ad confirmanda dogmata politica & comparandam prudentiam civilem (§. 755.), historia ecclesiastica ad confirmanda dogmata de regimine ecclesiastico & comparandam prudentiam ecclesiasticam (§. 756.); historia denique privata ad confirmanda præcepta dirigendi actiones ad suam aliorumque felicitatem & comparandam prudentiam privatam (§. 757.). Apparet adeo dogmata politica & moralia eidem esse debere perspecta, qui exemplis in historia civili, ecclesiastica atque privata obviis eadem tanquam examinibus comprobare intendit, observaturus veritatem dogmatum in exemplis. Nec minus liquet prudentiam ex historiarum lectione sibi comparaturum ab exemplis regulas abstrahere, aut notiones sibi imprimere debere, quas alias in casu simili imitaturus intueatur. Enimvero dogmata politica & moralia ad casus singulares non applican-

## De legendis libris historicis & dogmaticis. 669

cantur nisi ratiocinando (§. 348. & seqq. §. 353.), quo tandem omnem Logicam tendere haud ignorat, qui ejus theoriā accurate expendit. Regulas ab exemplis abstrahere & notiones actionum circumstantiis datis convenientium formare nequit, nisi qui Logicæ præcepta ad praxin transferre didicit (§. 669. & seqq.). Historiam igitur civilem, ecclesiasticam & privatam ad usum suum translaturus Logica utente pollere debet (§. 12.).

Veritatem hujus theorematis in semetipso experietur, qui historiæ applicandæ experimentum sumit. Quoniam philosophiam moralem atque civilem post Logicam demum tradimus; exemplo idem illustrare nondum licet. A superficialia enim illustratione abstinemus, cum superficialia magis noceant, quam prosint.

### §. 943.

*Si quis ex historia leges providentiæ divinæ derivare voluerit, is inquirere debet, quomodo fata singulorum hominum, tum etiam rerump. & ecclesiæ convenient illorum actionibus, & quomodo bona & mala physica respondeant morali.* *Legum providentiæ divinæ scrutatio.* Etenim leges providentiæ divinæ in eo consistunt, quod in factis hominum contineatur ratio factorum sapientia divina digna. Unde eas in aprium producturus inquirere debet in hanc rationem, factis & fati distincte expensis.

Breviter hæc indicamus potius, quam pro dignitate explicamus, cum multa rerum moralium & politicarum scientia atque theologiæ quoque naturalis notitia instructus esse debeat, qui leges istas curatius scrutari voluerit. Interim tamen plures quoque sunt, quæ facili attentione agnoscuntur & vulgo in proverbialia abiit. Sed de his plura dicendi locus alibi erit. Me vero non monente apparet, talia non convenire tyronibus, quæ de historia ad usum transferenda docentur. Etsi enim lectio historica omnium facillima sit, modo terminorum adsint notiones confusæ; usus tamen non adeo facilis est proprio Marte a lectore tentandus.

### §. 944.

*Ex historia literaria artem inveniendi locupletaturus Ars inveniendi.*  
1. notet tempus, quo veritas quæcunque data fuerit inventa; *endi ex historia literaria.*  
2. ve-

ria quomodo  
locupletetur.

2. veritates illo tempore de eodem objecto perspectas cum aliis aliis sibi familiares reddat ; 3. inquirat in modum, quo ex his continuo ratiociniorum filo illa deduci possit, usus regulis supra sect. 2. c. 2. & 3. (§. 669. & seqq.) uberius expostitis & artificiiis aliis, vel aliunde cognitis, vel meditati veluti sponte sese offerentibus. Hac ratione enim patebit modus, quo illo tempore ad veritatem, quæ tum inventa supponitur, pervenire datum fuit.

Quodsi ex circumstantiis vitæ autoris constiterit, quasnam veritates habuerit perspectas, cum non uno modo ad eandem veritatem pervenire possimus; modum, quo inventor usus fuit, certius hariolari licebit.

Si vero ne tempus quidem constiterit, quo veritas aliqua primum in apicem producta ; artem inveniendi tamen excolet atque sic ferente occasione novis artificiiis locupletabit, ubi inquisiverit, quomodo ex veritatibus aliis ante discendis, quam illam capere possimus, inveniri queat.

Quoniam ita in omni casu patet modus, quo ad veritatem aliquam latentem ex aliis cognitis pervenitur; ubi ejusdem notionem distinctam attentione sufficiente usi nobis formaverimus (§. 678.), patebunt regulæ, quibus dirigitur intellectus in veritate latente investiganda in casu dato. Ars inveniendi regulas istas tradere debet (§. 662.). Quamobrem si jam fuerint perspectæ, novo hoc exemplo confirmantur & confirmatæ clarius ac certius intelliguntur. Quodsi contingat esse in eorum numero aliquas, quæ nobis nondum cognitæ fuerant ; artem inveniendi sic regulis novis locupletari patet.

E. gr. Constat ex dissertatione historica, quam de vero telescopii inventore edidit *Borellus*, telescopium primum fuisse inventum, cum artifex ex perspicillis poliendis victum quærens vitrum concavum & convexum forte fortuna combinaret. Et licet *Joannes Baptista Porta* in *Magia naturali* lib. 17. cap. 10. dudum ante monuerit, si vitrum concavum & convexum recte conjungere noveris, & longinqua, & proxima majora & clara videri; attamen ex novem, quas de re-  
fractio-

fractione Neapoli A. 1593. in lucem emisit, *libris* & speciatim libro octavo, ubi de perspicillo convexo & concavo agit, satis intelligitur, quod idem nonnisi lentium combinatione sive fortuita, sive ex instituto facta didicerit. Pater igitur, *si res diversa variis, quibus fieri potest, modis combinentur, sola attentione ad ea, quæ inde sequuntur, nova, seu incognita hætenus, sive nobis solum, sive etiam aliis, detegi possent.* Habemus adeo regulam artis inveniendi usus multiplicis, quæ mihi hac ratione innotuit & quam superius in numerum regularum detegendi geneses rerum retuli (§. 736.). Quoniam perinde est, sive quædam actu conjungas & observes, quænam inde consequantur; sive tantummodo eadem conjungi cogites & ex iis, quæ tibi de iisdem innotuere, colligas, quidnam inde sequatur; regula anteriori inventa, quæ ad methodum veritatem a posteriori detegendam spectat, ei respondens altera una innotescit ad methodum veritatem a priori investigandam referenda, quam itidem in numerum regularum genesin rerum investigandi retuli (§. 735.). In Arithmetica communis numerorum algorithmus ante extractionem radices quadrata traditur, cum hanc perficere non possit nisi qui multiplicandi, dividendi atque subtrahendi habitu pollet. Quodsi jam inquisiveris, num theorema, quo ea nititur, de compositione numeri quadrati inveniri ab eo possit, qui non tenet, nisi numeri quadrati definitionem & communem multiplicandi modum; id ita procedere intelliges, si singula facta per multiplicationem prodeuntia sigillatim scribas. Et enim si singulis jungas nomen generale indicans, quod in omni casu reliquo prodire debeat eo in loco; theorema habebis desideratum, quemadmodum schema adjectum docet.

38 Radix.

48

64 Quadratum partis secundæ.

240 } Facta ex parte prima in secundam.

240 }

900 Quadratum partis primæ.

1444 Numerus quadratus radices in duas partes divisæ.

Quodsi jam attendas, quibus artificiis hic fueris usus, ut theorema arithmeticum de compositione numeri quadrati, cujus radix duabus partibus constat, inveniatur; haud difficulter intelliges, duobus potissimum artificiis hic esse locum, nimirum ut 1. *exemplum eo modo scribatur, quo distincte representantur notionem formandam ingredientia* & 2.

& 2. *singularia*, quæ insunt, generaliter denominentur, quo ipso notio universalis evadit. Artificia hæc in Arithmetica plurimum habent usum, nec difficulter ad regulas generales revocantur, ut iisdem quoque extra Arithmeticam sit locus. Veritas historica, quæ hic supponitur, hæc est, quod theorema de compositione numeri quadrati post communem numerorum algorithmum fuerit inventum, nec inventor aliis luminibus usus, quam quæ ab illo mutuari possunt. Equidem non nego, haud raro nos sic incidere in methodum diversam ab ea, qua inventor fuit usus. Enimvero parum refert, si scopum præsentem spectes, utrum hoc, an alio modo primus inventor veritatem repererit: sufficit eam hoc modo reperiri potuisse eundemque modum in aliis casibus utiliter adhiberi. Sed plura huc spectantia, si Deo ita visum fuerit, olim trademus in Arte inveniendi.

## §. 945.

*Quomodo in scripto dogmatico continua orationis obvia distinguenda a se invicem.*

*Si scriptum dogmaticum continuo orationis filo fuerit contextum, singula definitiones ac propositiones inde eruendæ ac beneficio definitionum (§. 152. 191. 267. 269. 275. 276.) ad suas species reducendæ (§. 349.), ac quæ ad demonstrationem seu probationem, quæ ad scholia pertinent, ab iisdem discernenda. Etenim scriptum dogmaticum legens memoriæ mandare debet sibi futura (§. 902.), hoc est, quæ vel ad alias veritates intelligendas & probandas, vel ad casus in vita humana obvios applicari possunt. Ad veritates alias intelligendas (§. 910.) & res in vita humana obvias agnoscendas serviunt definitiones (§. 349.); ad propositiones demonstrandas cum definitiones, tum propositiones (§. 551. & seqq.), in vita humana ad ferenda judicia de rebus obviis propositiones (§. 348.). Probationes vero ac demonstrationes veritati propositionum vel probabiliter (§. 586. 587.), vel certo agnoscendæ (§. 544. 557.) inserviunt; & quæ propositionum ac definitionum illustrandarum gratia in medium afferuntur, veluti exempla, aut ad eas uberius declarandas adjiciuntur, ad easdem rectius intelligendas & magis confirmandas faciunt: id quod cum unusquisque in se experiri queat, sine ulteriori probatione sumimus. Solæ igitur definitiones atque propositiones memoriæ mandandæ, consue-*



quenter ex scripto, quod continuo orationis filo contextum est, extrahendæ & a ceteris, quæ ad probationem seu demonstrationem ac ad scholia pertinent, secernendæ.

Quodsi quis veritates, quas sibi familiares reddidit, alios docturus, ipsas etiam probationes probabiles atque demonstrationes una cum scholiis, quibus illustrationes ac declarationes uberiores aliaque monita opportuna continentur, memoriæ utiliter mandat; non minus eum in finem definitiones & propositiones a ceteris distinguere teneatur: quod facile absque probatione hic concedetur.

Enimvero quoniam definitiones ac propositiones in futurum usum memoriæ non infigendæ, antequam constet, eas esse accuratas, seu regulis logicis conformes, ex iis autem, quæ de definitionibus atque propositionibus c. 4. *sect. 2. & sect. 3. integra part. 1.* demonstrata sunt, sufficienter intelligitur, alias esse definitionum, alias propositionum, nec singularum specierum in utroque genere easdem, regulas; ut accuratum de definitionibus ac propositionibus judicium logicum fieri possit, singulas utique ad suas species reducere tenemur. Idem vero aliter quam beneficio definitionum fieri non posse, quas de definitionibus atque propositionibus earundemque singulis speciebus dedimus, ipsum Dictum de omni & nullo ad definitiones (§. 349.) extensum & in ipsa propositione præsentè citatum palam facit.

E. gr. *Cartesius* partem primam Principiorum philosophiæ ita auspiciat: *Quoniam infantes nati sumus & varia de rebus sensibilibus iudicia prius tulimus, quam integrum nostræ rationis usum habereamus, multis præjudiciis a veri cognitione avertimur: quibus non aliter videmur posse liberari, quam si semel in vita de iis omnibus studeamus dubitare, in quibus vel minimam incertitudinis suspensionem reperiemus. Quatuor hisce verbis continentur propositiones, quarum prima est: Omnis homo multa habet præjudicia; secunda: Omnis homo præjudiciis a veri cognitione avertitur; tertia: sese a præjudiciis liberare; quarta denique: Veritatem inquirens semel de omnibus in vita dubitare debet. In propositione prima, secunda & quarta aliquid de homine tantum*  
*(Wolffii Logica)* Q 999 quarta

quam subiecto affirmatur, scilicet in prima, quod *multa habet præjudicia*; in secunda, quod *præjudiciis a veri cognitione avertitur*; in tertia, quod *veritatem inquisiturus semel de omnibus in vita dubitare debeat*. Sunt igitur theoreticæ (§. 266.), cumque earum veritas terminis intellectis nondum pateat, propositiones demonstrativæ (§. 262.), consequenter theorematæ (§. 275.). In tertia docetur, aliquid fieri posse, nempe ut a *præjudiciis liberemur*, atque adeo ea practica est (§. 266.), cumque modus, quo id fieri possit, terminis intellectis nondum sit manifestus, nec pateat nos a præjudiciis liberari, si *semel in vita de omnibus dubitamus*, in quibus vel minimam incertitudinis suspicionem reperimus, demonstrativa (§. 262.), consequenter problema (§. 276.), cujus solutio continetur his verbis. *semel in vita de iis omnibus dubitandum esse, in quibus vel minimam incertitudinis suspicionem reperiemus*. Prima propositio inde probatur, quod *infantes nascimur & varia de rebus sensibilibus judicia seramus, quam integram rationis usum habemus*; secunda sumitur sine probatione tanquam experientiæ consentanea; tertia denuo probatur & ex lemmate in margine adjecto, *veritatem inquirenti semel in vita de omnibus, quantum fieri potest, esse dubitandum*, apparet, propositionem quartam esse primariam, quam autor dare intendit, ceteras nonnisi ejus probandæ gratia adduci. Hac ratione primum articulum principiorum philosophiæ Cartesii logice resolvimus, quantum præsens propositio præcipit. Quæ enim ad interpretationem & examen propositionum atque earundem probationis spectant, hujus non sunt loci, sed partim a superius traditis, partim ab iis, quæ sequuntur, pendent. Id unice notamus, determinationem subiecti propositionis quartæ unice ex lemmate patere: quod ubi abesset, ex scopo totius scripti foret supplenda, ne interpretatio iniqua evaderet (§. 922.).

## §. 946.

*Quænam  
scripta dog-  
matica le-  
ctura faciliora.*

Hoc igitur labore logice resolvendi contextum carere potest lector, ubi ipse autor singula a se invicem distinguit. Atque hinc ulterius patet, *lectionem scripti dogmatici, in quo autor ipse definitiones a propositionibus; propositiones ab earum probationibus, probationes a scholis distinguit, faciliorem esse, quam alterius, cujus autor continuo orationis filo usus illa a se invicem distinguenda lectori relinquit*. Nemo enim negabit, *lectionem fieri*

fieri faciliorem, ubi lectori minus laboris incumbit, sublato labore, qui & multam Logicæ theoriam, & praxin supponit (§. 945.).

Apparet itaque ratio, cur Mathematici singulis veritatum generibus convenientes titulos *definitionum*, *axiomatum*, *postulatorum*, *theorematum*, *prolematum*, *corollariorum*, *scholiorum* & *demonstrationum* præfigant, ut scilicet lector liberetur a labore, quo maxime habet opus, cum ad quodlibet veritatis genus examinandum, antequam ea memoriæ mandetur, tum ut inprimis constet, quænam memoriæ mandari debeant. Et eadem est ratio cur nos, etsi a titulis istis abstinuerimus, nisi quatenus definitionibus suum in lem-mate titulum tribuimus, alia tamen ratione & definitiones a pro-positionibus, & propositiones a probationibus, & probationes a scholiis distinxerimus: ut ut ea ratio non sit sola, sed plures eidem accedant ex sequentibus intelligendæ.

§. 947.

*Definitio nominalis a lectore in tot resolvenda est propositio- nes, quot notæ eandem ingrediuntur, quarum quidem commune subjectum est definitum, prædicata vero sunt singulæ notæ illam ingredients.* *Resolutio de- finitionis nominalis.* Definitionum nimirum ope res obvias ad suas species suæque genera reducere debemus (§. 179.). Enimvero cum definitum non conveniat nisi rei, cui notæ omnes in definitione enumeratæ simul conveniunt (§. 349.); ante constare nequit, ad quodnam genus, vel ad quamnam speciem eadem referri debeat, quam in casu dato ostenderis singulas notæ definitionem ingredients eidem convenire, consequenter tot probaveris propositiones, quot sunt notæ definitionem ingredients, quorum subjectum commune est res obvia, prædicata vero sunt istæ singulæ notæ. Definitionem igitur sibi cognitam atque perspectam redditurus eam in propositiones istiusmodi resolvere debet.

E. gr. *Figura regularis* definitur, quod sit *aquilatera* & *equiangula*. Eam igitur lector in duas resolvit propositiones: 1. *Figura regularis est aquilatera*, 2. *Figura regularis est equiangula*. Hinc enim patet, ut in casu dato appareat, figuram aliquam esse regula-

gularem, probari debere; 1. quod sit æquilatera, 2. quod sit æquiangula. Similiter ubi *matrimonium* definitur per *societatem inter marem & feminam initam sobolis generandæ & educandæ gratia*, definitio resolvitur in propositiones sequentes 1. *Matrimonium est societas*; 2. *Matrimonium initur inter marem & feminam*; 3. *Matrimonium initur sobolis procreandæ gratia*; 4. *Matrimonium simul initur sobolis educandæ gratia*. Probaturus enim definitionem applicando matrimonium inter duas personas intercedere, ostendere debet, quod (1) mas & fœmina (2) iniciunt societatem (3) sobolis procreandæ & (4) educandæ gratia.

## §. 948.

*Definitionum  
nominalium  
illustratio.*

Quoniam definitionem intellecturus cum singulis terminis notatum eam ingredientium notiones jungere debet, quæ iisdem respondent (§. 117.), illarum autem notarum notiones habet, quæ rem præsentem intuetur & in ea distinguit, quæ sibi obvia in eadem deprehendit (§. 34.); *definitionem intellecturus ad exemplum applicare debet, attendendo scilicet, num inter prædicata iudiciorum, quæ format, intuitivorum (§. 669.) singula notæ definitionem ingredientibus compareant.*

*Fig. II.*

Perinde vero est, sive res definita sit sensui præsens, an saltem imaginationi obijciatur. Geometræ utuntur figuris in charta vel tabula expressis, quæ visui obijciuntur. E. gr. Delineatur *figura quadrilatera ACDB* in charta, ut ipsi oculis discerni possint & quatuor latera, & eorum æqualitas, & quod anguli sint recti. In moralibus utimur exemplis ad arbitrium confectis, ea tamen lege, ut singulæ notæ definitionem ingredientibus in iisdem observare liceat. Dedimus talia in superioribus (*not. §. 678.*) ad notionem furti & (*not. §. 682.*) ad notionem voluntatis illustrandam. Ipsæ in hoc opere logico notiones constanter exemplis illustramus & idem institutum exequemur in ceteris philosophiæ disciplinis. Ita lector sola attentione ad exempla allata opus habet, nec ipse talia demum proprio Marte conquirere tenetur. Quamobrem ipsa operis huius lectione veritatis propositionis præsentis convincimur.

## §. 949.

*Veritatis de-  
finitionum  
examen.*

Et quis notio vera non est, nisi in qua coniunguntur, quæ eidem subjecto una inesse possunt (§. 547.), definitiones vero

vero in notionum numero habentur (§. 152.), definitionem nominalem examinaturus inquirere debet, num inter res perceptas olim, vel eas, quæ nunc sensui obijciuntur, talis occurrat, cui insunt, quæ in definitione continentur (§. 719.), aut possibilitas per indirectum an demonstrari possit (§. 721.), aut num ostensiva demonstrationis idem firmari queat (§. 722. 723.) disquirendum.

E. gr. Ubi figura regularis definitur, quod & æquilatera sit, & æqui-angula; inquirendum nobis est, an fieri possit, ut figura æquilatera simul æquiangula sit; id quod per constructionem patet. Quoniam demonstrationes possibilitatis definitionum subinde denum in progressu ab autore in medium afferuntur; a lectore, qui tales in potestate non habet, tamdiu differenda est hæc cura, donec in ulteriores lectione sese obtulerint. Exempli vera veritatem definitionum a posteriori loquuntur & ubi methodo analytica, vel mixta procedimus, ex anterioribus patet, in definitione non conjungi, nisi quæ eidem subjecto simul inesse possunt (§. 885.): quemadmodum ipsa hujus operis lectio prodit, in quo condendo mixta usi sumus methodo (not. §. 885.).

## §. 950.

Inprimis etiam inquirendum est, an in notarum numerum Superflua referantur, quæ per alias definitionem ingredientibus determinan- rum ex defini- tur, & eadem ex definitione eliminanda sunt, antequam in me- tionibus moriæ mandetur. Etiam definitionum ope res obvias ad suas eliminatio- species suæque genera reducere debemus (§. 179.), ut propositionibus generalibus ad casus singulares in vita communi, tam etiam ad speciales in veritate investiganda applicandis sit locus (§. 348.). Enimvero si in definitionibus cumulentur, quorum unum per alterum determinatur, earum applicatio præter necessitatem justo prolixior redditur (§. 836.). Eliminanda igitur ex iis sunt superflua, quæ scilicet per alias notas definitionem ingredientibus determinantur, antequam eadem ad futuros usus memoriæ mandentur.

Exempla superius (not. §. 836.) data facile huc applicantur, ut aliis opus non sit.

*Quomodo si-  
perflua in de-  
finitionibus  
detegantur.*

*Inquisiturus num in definitione contineantur, quorum unum per alterum determinatur*, 1. notam unam vel aliquot sumat pro definitione integra & aliam, quam per illas determinari suspicio est, pro attributo rei definitæ: 2. ea methodo utatur in apicum producturus, num hoc attributum rei contractius definitæ conveniat, qua ex definitione data propositiones colliguntur (§. 724.).

Etenim si definitionem ingrediuntur, quæ per alia in eadem contenta determinantur; ea sub conditione ceterorum de definito prædicanda sunt (§. 219.). Habemus adeo propositionem, cujus subjectum est determinatum per cetera, quæ definitioni insunt, prædicatum vero illud attributum (§. 200.). Quamobrem cum ea, per quæ prædicatum istud determinatur, absolvant notionem subjecti, cui ipsum tribui potest; pro definitione hæc notio recte habetur (§. 153.). Patet adeo perinde esse, ac si ex definitione propositionem colligere iubearis.

Aliter quæsito satisfiet a posteriori, ubi observaveris, num in aliis subjectis sejuncta deprehendantur; quæ in definitione combinantur.

Etenim quæ per se invicem determinantur, eorum uno posito ponitur etiam alterum (§. 219.), consequenter fieri nequit, ut insit unum, nisi simul insit alterum. Certissimum adeo indicium est, ea per se invicem non determinari, quæ uni subjecto simul insunt, in aliis tamen separatim deprehenduntur.

E. gr. Si quis *triangulum æquilaterum* definit per triangulum, cujus & latera, & anguli inter se æquantur; inquisiturus, num æqualitas angulorum per æqualitatem laterum determinetur, investigare debet, num triangulum, cujus singula latera inter se æqualia sunt, habeat quoque angulos æquales: quod cum demonstratum sit ab *Euclide*, æqualitatem angulorum ex definitione eliminandam esse hinc apparet. Evidens hic est, definitionem esse hanc orationem, *triangulum æquilaterum est, cujus latera singula sunt inter se æqualia*; theorema vero hanc

hanc propositionem, *triangulum æquilaterum est etiam æquiangulum*, & elementa Geometriæ loquuntur, theorema ex definitione a priori demonstrari. Innotuit adeo ea methodo, qua propositionem ex definitione colligimus, æqualitatem angulorum per æqualitatem laterum in triangulo determinari. Si in definitione *auri* cum *flavidine mollitiei* combinetur; a posteriori constat, flavidinem per mollitiem, vel mollitiem per flavidinem non determinari, quod plumbum deprehendatur molle instar auri, etsi flavum non sit; orichalcum vero flavum, ut ut mollitiæ careat.

## §. 952.

*Cavendum quoque, ne definitiones memoriæ mandentur, antequam constet, notas, quæ eas ingrediuntur, esse ad rem definitam agnoscendam & ab aliis distinguendam sufficientes.* Etenim definitionum ope res obvias ad sua genera suasque species reducere debemus (§. 179.), ut propositionibus generalibus ad casus singulares in vita communi, tum etiam ad speciales in veritate investiganda applicandis sit locus (§. 348.). Quodsi jam in definitione pauciores contineantur notæ, quam quæ ad definitum in dato casu agnoscendum sufficiunt, definitum tribuetur rei, cui minime convenit, legitima ratiocinandi forma (§. 839. 840.), consequenter ulterius tribuentur prædicata, quæ ab eadem sunt aliena (§. 348.). Errorem adeo evitaturus definitionem memoriæ ad futuros usus mandare minime debet, antequam constet, notas in ea enumerari sufficientes.

*Cur lector a definitionibus mancis sibi cavere debeat.*

E. gr. Definitio manca *quadrati* est, quod sit figura quadrilatera æquilatera, cum notæ eadem etiam rhombo convenient. Quamobrem si quis illam memoriæ in futuros usus mandaret, rhombum obviū pro quadrato haberet, consequenter eidem quoque per errorem tribueret, quæ de quadrato demonstrantur, v. gr. quod is circulo inscribi possit, quod latus ad diagonalem sit ut 1 ad  $\sqrt{2}$ . Ostendimus vero jam in superioribus (§. 681.), quomodo examinandæ sint definitiones, ut a posteriori pateat, utrum notæ in ea sufficientes enumerentur, nec ne: id quod in eo præsertim casu succedit, ubi definito ex communi usu loquendi notio respondet confusa, per quam res definita agnosci potest. Idem quoque inde conficitur, si ex definitione nominali realis deduci potest (§. 734.).

## §. 953.

Quando judi-  
cium de defi-  
nitione diffe-  
rendum.

Quoniam de definitionibus nominalibus iudicium fieri nequit, nisi ante multa res predicata cognoveris atque ea in essentialia, attributa & modos distinguere noveris (§. 731.); ubi definitio expendenda, antequam hanc cognitionem fueris consecutus, eamque tibi ad interpretandas propositiones sequentes familiares reddere teneris (§. 904.); iudicium de eadem tantum per seponendum, donec demonstrationes subsequentes expendaris.

E. gr. *Euclides* initio statim elementorum præmittit definitiones figurarum & inter eas *trianguli æquilateri*, quod sit triangulum, cujus tria latera æqualia sunt. Ex definitione nondum perspicere licet, num istiusmodi triangulum possibile sit & an per tria latera simul determinentur anguli, qui præterea eidem insunt. Hæc igitur definitio tantisper sumitur pro explicatione termini, quæ arbitraria est, atque in dubio relinquitur, utrum aliqua eidem notio respondeat, nec ne, donec constructionem trianguli æquilateri, quam prop. 1. tradit *Euclides*, perspicere datum fuerit: quo facto evidens est, triangulum æquilaterum esse possibile, cum construi non posset, si nullum possibile foret, & per latera simul angulos determinari, cum alias ex solis lateribus construi non posset. Et ita tandem patet, definitionem trianguli æquilateri esse & veram, & notis sufficientibus instructam, a superfluis vero vacuum. Id ubi cognoverimus, notionem trianguli æquilateri ad futuros usus memoriæ firmiter imprimere & tenaciter retinere debemus. Similiter si *figura regularis* definitur, ante traditas demonstrationes, quod sit æquilatera & æquiangula; tyro Geometriæ judicare nequit, an figura aliqua possit esse æquilatera, quæ eadem non est æquiangula, & num prorsus fieri possit, ut singula figuræ rectilineæ latera sint æqualia. Definitionem itaque pro arbitraria explicatione termini sumit eamque sibi ad intelligendas propositiones familiares reddit, donec constructionem figurarum regularium fuerit edoctus, per quam ut ante manifestum evadit, figuram rectilineam multilateram, æquilateram & æquiangulam esse possibilem, ad ejus constructionem & latera æqualia, & angulos æquales requiri, ut ut quantitas anguli seu ejus ad rectum ratio per numerum laterum determinetur, angulorum autem æqualitatem per laterum æqualitatem mini-



minime determinari. Atque tum demum de definitione figuræ regularis iudicium ferre licet: quo lato memoriæ ad futuros usus opportune mandatur. Ceterum hinc intelligitur ratio, cur nobis in more positum sit, quantum datur, observationes ac demonstrationes, quibus nituntur definitiones, ante præmittere, quam easdem condamus, consequenter cur mixtam methodum syntheticæ præferamus (§. 885.).

§. 954.

*Propositiones memoriæ mandare non debet lector, antequam constet, eas esse determinatas.* Etenim propositiones vel ad res singulares in vita obvias, vel ad casus speciales in veritate investiganda applicamus (§. 724. & seqq.). Jam vero propositiones applicare nequimus citra periculum errandi, antequam constet, num prædicatum subiecto absolute, an sub data quadam conditione conveniat (§. 348.). Constare igitur debet, utrum ex sint determinatæ, nec ne, antequam citra periculum errandi in dato casu applicari possint (§. 320.). Quamobrem nec eas memoriæ mandare debet lector antequam perspexerit, eas esse determinatas.

*Propositionum quodnam examen institui debeat.*

Pertinent huc, quæ in discursu præliminari (§. 122.) de utilitate propositionum determinatarum inculcavimus. Ceterum nunc liquet, cur Mathematici non nisi determinatas in medium afferant propositiones & cur nos quoque eundem morem in philosophiam introducamus, ut tota pragmatica evadat.

§. 955.

*Propositio tam categorica, quam hypothetica, quæ demonstrari potest, determinata est.* Etenim propositio omnis, quæ demonstrari potest, sive directe, sive per indirectum, vera est (§. 544. 557.). Enimvero in propositione vera prædicatum per notionem subiecti determinatur (§. 513.), consequenter (§. 219.) in propositione categorica prædicatum convenit subiecto, quia eidem convenit definitio (§. 225.); in hypothetica vero ideo convenit, quia locus est conditioni adjectæ (§. 218.), seu determinationi subiecti (§. 228.). Quamobrem cum determinata sit propositio, si subiectum sub ea notatione exhibetur, per quam

*Quomodo a priori innoscatur, propositioem esse determinatam.*

prædicatum determinatur (§. 320.); propositio tam categorica, quam hypothetica, quæ demonstrari potest, determinata est.

In Geometria propositiones omnes demonstrantur: unde per ipsas demonstrationes liquet, eas esse determinatas. Etenim ubi sufficienter determinatum non fuerit subiectum, fieri nullo modo potest, ut propositio demonstretur, cum integra subiecti notio, per quam prædicatum determinatur, demonstrationem ingrediatur (§. 551. & seqq.). Ideo etiam nos constanter ex notione subiecti deducimus, quod prædicatum eidem conveniat.

### §. 956.

*Quomodo  
idem pateat  
a posteriori.*

*Si per observationem constet, prædicatum esse vel attributum, vel essentialiale, vel quod per modum attributi inest, aut quibusnam positus modus subiecto conveniat; propositiones determinatæ sunt.* Talia per observationem constare posse, nec adeo impossibilem esse hypothesein, ex superioribus constat (§. 673. & seqq.). Jam vero attributa prædicantur de subiecto sub conditione essentialium (§. 220. 221.), nec minus ea, quæ per modum attributorum insunt (§. 222.), essentialia vero propter attributa, vel ea, quæ per modum attributi insunt (§. 224.), consequenter cum in priori casu subiectum per essentialia (§. 180.), in posteriori per attributa, vel ea, quæ per modum attributorum insunt, definitum supponatur (§. 181. 182.), sub conditione definitionis, atque adeo absolute (§. 225.). Propositiones adeo in hoc casu determinatæ sunt (§. 320.).

Quodsi porro per observationem constet, quibusnam positus modus conveniat subiecto atque adeo in propositione subiecto adjiciantur ea, ob quæ prædicatum ipsi convenit; propositio denuo determinata est (§. 320.).

Huc sane tendit omnis nostra theoria Logicæ, ut propositiones determinatas & definitiones accuratas venari liceat. Inprimis etiam id egimus, ut ostenderemus, quomodo experientiæ beneficio cum definitiones (§. 679. & seqq.), tum propositiones determinatas reperimus (§. 705. 706.), cum sic demum disciplina reddantur ad vitam utiles & viam ad ulteriora sternant.

## De legendis libris historicis & dogmaticis. 683

### §. 957.

Patet adeo, nisi autor ipse accuratas suppeditet definitiones, earumque veritatem adstruat, & propositiones determinatas in medium offerat earumque probationes ex notione subiecti deducat, vel determinationes a posteriori stabiliat, nonnisi difficillimo labore & cui perpauci lectores pares sunt, cognitionem ad vitam utilem ex ipsius libro hauriri posse.

*Ex quorum librorum lectione parum proficere de-  
tur.*

Quoniam Mathematici in tradendis dogmatis suis omnes methodi scientificæ numeros adimplent, lectori de examine definitionum ac determinatione propositionum non multum est laborandum. Atque eadem de causa ex scriptis Mathematicorum solidam ac utilem haurit cognitionem lector attentus. Nos quoque solidæ cognitionis facilitatem in scriptis nostris intendentes ea ad normam methodi scientificæ componimus & eandem normam in tradenda auditoribus nostris philosophia tenemus. Atque ea ratio est, cur industria, quæ requiritur, utentes pauco temporis intervallo solidam rerum notitiam consequantur, qui libros nostros attente legunt, vel disciplinæ nostræ sese tradunt. Et hinc tam avidè nostris inhiant, qui solidam ac utilem doctrinam curæ cordique habent, ringentibus licet, convitiantibus, caluminiantibus, vexas abominandas creantibus, & novas quotidie insidias struentibus invidis, qui sibi valde metuunt, ne, si solida ac utilis doctrina invalescat, eorum collabatur auctoritas.

### §. 958.

*Demonstrationes ac probationes ita resolvendæ sunt, ut non modo singule syllogismorum, ex quibus constant, præmissæ animam subeant, sed earum etiam forma appareat, annotatis in charta conclusionibus, quæ syllogismos sequentes sive sigillatim, sive in unum confuse tanquam præmissæ ingrediuntur. Demonstrationes adjiciuntur propositionibus, ut constet, eas esse veras (§. 544. 557.) atque eas evolvit lector, ut de veritate earum certus evadat (§. 568.). Enimvero vi demonstrationis ad assensum compelli nequit, nisi qui singularum præmissarum, quæ syllogismos, ex quibus illa constat, ingrediuntur, veritatem perspicit & formam ejus genuinam esse agnoscit (§. 569.). Singulæ igitur*

*Demonstrationum ac  
probationum  
analysis.*

tur præmissæ animus lectoris subire debent, ut judicare possit, an in numero definitionum, experientiarum indubitatarum, axiomatum ac propositionum jam demonstratarum locum habeant (§. 562.). Cumque forma demonstrationis legitima sit, si syllogismi, ex quibus ea constat, legitimam habeant formam eidemque decenter inter se concatenentur (§. 551. & seqq.); demonstrationem ita concipere debet lector, ut & legitima singulorum syllogismorum forma, & eorundem decens concatenatio, consequenter totius demonstrationis forma appareat.

Quoniam vero in demonstratione vel conclusiones syllogismorum anteriorum sigillatim ingrediuntur tanquam præmissæ syllogismos sequentes, vel ex pluribus tanquam notione complexa spectatis formatur propositio præmissæ locum subiens (§. 551. & seqq.); cum illæ conclusiones in usum sequentem sint servandæ, eas in charta conferibi consultum est, ut oculis pateant, quæ alias memoria retentæ imaginationi præsentibus sibi deberent. Hoc enim artificio evolutionem demonstrationis minus defatigare attentionem lectoris ipso opere docemur.

Dénique cum probatio probabilis a demonstratione non nisi principiis differat (§. 588.), adeoque eandem cum demonstratione formam teneat; per se patet, quæ de demonstrationum analysi præcipiuntur, ea quoque de probationis alterius cujuscunque analysi tenenda esse.

Exempla jam dedimus demonstrationum tam offensivarum (not. §. 551. 552.), quam apogogicarum (not. §. 553. 559.) legitime resolutarum, ut earum forma appareat. Quamobrem non opus est, ut alia hic in medium proferamus, vel eadem denuo reperamus. Facile autem patet, demonstrationes illas evolventi hæc earum schemata in charta esse designanda.

Fig. 3

1. Ubi demonstrandum, in parallelogrammo  $ABCD$  angulos diagonaliter oppositos  $\theta$  &  $x$  inter se aequales esse; schema tale est (§. 551.).

BA & DC sunt inter se parallelæ, *per hyp.*

BC & AD sunt inter se parallelæ, *per hyp.*

Anguli o & y sunt duobus rectis æquales.

Anguli y & x sunt duobus rectis æquales.

Anguli o & y sunt æquales angulis y & x simul.

Angulus o æqualis est angulo x

II. Ubi demonstrandum, *modos definitionem ingredi non posse*; Schema tale prodit (§. 551.):

Modi sunt mutabiles *per def.*

Modi constanter non insunt.

Modi rebus cognoscendis & a se invicem discernendis non inserviunt.

Modi ex notarum numero excludendi.

Modi ex definitione exulare debent, seu eam ingredi nequeunt.

III. Ubi demonstrandum, *rectam ex centro C ductam CD arcumque AB bisecantem bisecare quoque chordam cognominem*, Schema tale est (§. 552.):

Fig. 4.

Rectæ CD, CA, CB ex centro circuli ductæ, *per hyp.*

Arcus AD & DB æquales sunt, *per hyp.*

Rectæ CA, CD, CB æquales sunt.

Arcuum AD & DB chordæ æquales

Anguli ADE & EDB æquales sunt.

Rectæ AE & EB æquales sunt.

IV. Ubi demonstrandum, *si in duabus propositionibus subjectum fuerit idem terminus, eidem tamen diversæ tribuantur notiones, propositiones diversas esse, quamvis idem sit predicatum*; Schema tale prodit (§. 552.):

Subjectum propositionum est terminus idem, cui diversæ respondent notiones, *per hypoth.*

Propositiones in hypothese theorematidis diversæ habent subjecta.

tur præmissæ animum lectoris subire debent, ut ju-  
an in numero definitionum, experientiarum  
axiomatum ac propositionum jam demonst-  
beant (§. 562.). Cumque forma demon-  
si syllogismi, ex quibus ea constat, legi-  
eidemque decenter inter se concen-  
demonstrationem ita concipere  
ma singulorum syllogismorum  
concatenatio, consequenter te-  
pareat.

Quoniam vero in  
logismorum anteriorum  
missæ syllogismos seque-  
complexa spectatis  
ens (§. 551. & sequo-  
tem sint servand-  
oculis pateant  
sentes fisti d-  
strationis  
cemur.

nisi  
idem, quantum datur, ex eadem ratione in philoso-  
tie

§. 960.

*Demonstrationes, ubi fuerint intellectæ, memoriæ mandare non  
tenetur lector.* Demonstrationem intelligere studemus, ut propo-  
sitio nobis certa fiat (§. 568.). Quam primum adeo eam intelli-  
mus, propositio nobis certa est, atque adeo eadem non amplius  
habemus opus. Non igitur eam memoriæ mandari necesse est.

Sufficit nimirum, ut demonstrationis confuse recordari non dubi-  
temus, quin vera sit propositio, quoties eadem in dato casu opus  
habemus. Sive enim propositione demonstrata uti volueris ad ul-  
teriore veritatis investigationem, sive eam transferas ad usum vi-  
tæ; eam nosse sufficit, nec applicationem ullo in casu demonstra-  
tio ingreditur, immo ne hulum quidem ad eandem confert, Atque

legendis libris historicis & dogmaticis:

DC sunt inter se parallelæ, per b, g, f, h, i, k, l, m, n, o, p, q, r, s, t, u, v, w, x, y, z.

non quodam rectis & p, q, r, s, t, u, v, w, x, y, z.

et u, l, k, m, n, o, p, q, r, s, t, u, v, w, x, y, z.

et u, l, k, m, n, o, p, q, r, s, t, u, v, w, x, y, z.

et u, l, k, m, n, o, p, q, r, s, t, u, v, w, x, y, z.

non tenetur  
tenetur  
tenetur

ratio, cur nuda propositionum notitia praxi æque inserviat ac  
a earundem cognitio: ut adeo etiam, qui ingenii hebetis ac tar-  
veritates sibi familiares reddere atque ad usum vitæ trans-  
Ita e. gr. qui praxi optica operam navant, theoremata  
demonstrationem ignorant, feliciter in dato casu appli-  
tet, cur scripta dogmatica historica in usum invento-  
nec non in usum vitæ, in quibus dogmata tantum re-  
bitis demonstrationibus (§. 751.).

§. 961.

in lectio etiam ab inexercitato absolvi-  
natiatur desiderari suam. Etenim  
nes accuratæ traduntur, & de-  
ositiones convenienter deter-  
uniuntur, completis mini-  
ur principia nisi ante sta-  
locantur, ut præcedant,  
viunt, & si qua obscuriora  
antur (§. 790.). Quæ igitur circa  
an, illustrationem, examen (§. 947. &  
ositionum examen atque demonstrationum  
§. 955. & seqq.) a lectore observanda sunt, ea veluti  
ua sese eidem offerunt, nec demum aliunde sollicite  
onquirenda, cum singula eam teneant formam, quam conspi-  
cere debet lector de veritate certus reddendus. Nil igitur ob-  
stat, quo minus lector inexercitatus, hoc est, in theoria & praxi  
terioris Logicæ hospes, veritatis certam consequatur cogni-  
tionem, modo in legendo assiduus sit & definitiones ac propo-  
sitiones palmarias sibi familiares reddiderit.

Veritatem asserti probant exempla eorum, qui ad Mathematicorum  
scripta legenda accedunt verioris Logicæ prorsus ignari, atque solidam  
& certam rerum mathematicarum cognitionem sibi comparant: ubi in-  
primis celeres experiuntur progressus, si demonstrationes, quæ phuri-  
mum negotii facessere solent, fuerint consummatæ.

§. 962.

Si liber methodo scientifica non fuerit conscriptus, eo, quem Quinam li-  
brinisi ab præ-

Cur libri  
scientifici ab  
inexercitato  
methode præ-  
scripta legi-  
possint.

Propositiones, quarum subiectum est idem terminus, cui diversæ respondent notiones, prædicatum vero idem, diversa habent subiecta, sed idem prædicatum.

Propositiones istæ diversæ sunt.

Fig. 5.

V. Ubi per indirectum demonstrandum, *duos circulos se intus tangentes non habere idem centrum*, schema istius modi emergit (§. 553):  
Circuli  $x$  &  $y$  se intus in  $A$  tangentes habent idem centrum  $C$ .

Rectæ  $CA$  &  $CB$  sunt inter se æquales.

Rectæ  $CD$  &  $CA$  sunt inter se æquales.

Rectæ  $CD$  &  $CB$  sunt inter se æquales.

Pars  $CB$  est æqualis toti  $CD$ .

### §. 959.

*Quenam demonstrationes resolutæ faciles.*

Quoniam in demonstratione consummata nullum demonstrandi principium omittitur, quod non per ea, quæ ad sunt, vel per citationes facile in memoriam revocetur, & singula eo ordine collocantur, quo in ratiociniorum serie, in quam demonstratio resoluta abit, continentur (§. 856.); *demonstrationis consummatæ resolutio lectori nihil negotii facessit.*

Atque ea de causa nos in Elementis Matheseos universæ operam in primis dedimus, ut demonstrationes efficeremus quam maxime consummatas. Et idem, quantum datur, ex eadem ratione in philosophia molimur.

### §. 960.

*Cur demonstrationes memoriæ mandandæ non sint.*

*Demonstrationes, ubi fuerint intellectæ, memoriæ mandare non tenetur lector.* Demonstrationem intelligere studemus, ut propositio nobis certa fiat (§. 568.). Quam primum adeo eam intelligimus, propositio nobis certa est, atque adeo eadem non amplius habemus opus. Non igitur eam memoriæ mandari necesse est.

Sufficit nimirum, ut demonstrationis confuse recordati non dubitemus, quin vera sit propositio, quoties eadem in dato casu opus habemus. Sive enim propositione demonstrata uti volueris ad ulteriorem veritatis investigationem, sive eam transferas ad usum vitæ; eam nosse sufficit, nec applicationem ullo in casu demonstratio ingreditur, immo ne hilum quidem ad eandem confert. Atque



ea est ratio, cur nuda propositionum notitia praxi æque inserviat ac scientifica earundem cognitio: ut adeo etiam, qui ingenii hebetis ac tardioris sunt, veritates sibi familiares reddere atque ad usum vitæ transferre valeant. Ita e. gr. qui praxi optica operam navant, theoremata optica, quorum demonstrationem ignorant, feliciter in dato casu applicant. Ex hinc patet, cur scripta dogmatica historica in usum inventorum condiqueant, nec non in usum vitæ, in quibus dogmata tantum recensentur, insuper habitis demonstrationibus (§. 751.).

§. 961.

*Librorum scientificorum lectio etiam ab inexercitato absolvi potest, modo industriam non patitur desiderari suam.* Etenim in scripto scientifico definitiones accuratæ traduntur, & decente ordine collocantur, propositiones convenienter determinantur, & demonstrationibus muniuntur, completis minimum, si non ordinatis, nec admittuntur principia nisi ante stabilita, immo propositiones eo ordine collocantur, ut præcedant, quæ sequentibus demonstrandis inserviunt, & si qua obscuriora videri possunt, exemplis illustrantur (§. 790.). Quæ igitur circa definitionum resolutionem, illustrationem, examen (§. 947. & seqq.) & circa propositionum examen atque demonstrationum analysin (§. 955. & seqq.) a lectore observanda sunt, ea veluti sponte sua sese eidem offerunt, nec demum aliunde sollicite conquirenda, cum singula eam teneant formam, quam conspiciere debet lector de veritate certus reddendus. Nil igitur obstat, quo minus lector inexercitatus, hoc est, in theoria & praxi verioris Logicæ hospes, veritatis certam consequatur cognitionem, modo in legendo assiduus sit & definitiones ac propositiones palmarias sibi familiares reddiderit.

*Cur libri scientifici ab inexercitato methodo præscripta legi possint.*

Veritatem asserti probant exempla eorum, qui ad Mathematicorum scripta legenda accedunt verioris Logicæ prorsus ignari, atque solidam & certam rerum mathematicarum cognitionem sibi comparant: ubi in primis celeres experiuntur progressus, si demonstrationes, quæ plurimum negotii facessere solent, fuerint consummatæ.

§. 962.

*Si liber methodo scientifica non fuerit conscriptus, eo, quem Quinam libri nisi ab præ-*

*artis inveniendi per scriptis præscriptis modo legi nequit nisi ab eo, qui in arte inveniendi probe exercitatus.* Etenim si liber methodo scientifica scriptus non est, utut autor alias fecerit, quod erat officii sui; ex eo tamen demonstrationes exulant, nec eo ordine propositiones collocantur, quo veritas unius a veritate alterius pender (§. 788.). Enimvero deficientibus demonstrationibus nec de definitionibus iudicium ferri potest, quod utique ferendum, antequam eas ad futuros usus memoriæ mandaveris (§. 953.), nisi in arte inveniendi fueris probe versatus (§. 949. 951.), nec propositio determinata agnoscitur (§. 955. 956.), id quod tamen fieri debet, antequam ad futuros usus memoriæ infigenda (§. 954.). Patet itaque ubi liber methodo scientifica scriptus non est, eum illo, quem (§. 947. & seqq.) præscriptimus, modo legi non posse, nisi ab iis, qui in arte inveniendi probe fuerint exercitati.

Veritatem propositionis in se ipsis experiuntur, qui, ubi accurata methodo conscriptos libros Mathematicorum attenta mente ac industria assidua perlustrarunt, ac definitionum accuratarum & propositionum determinatarum certam cognitionem sibi compararunt, in libris more vulgari compositis ubivis hærent, cum tanquam sibi perspecta & vera admittere nequeant, quæ sibi adhuc obscura esse persentiscunt & quæ dubiis involuta observant (§. 841. & seqq.). Ab omnibus ferro seculis communi intelligentium consensu approbatum & ab iis, qui illorum echo sunt, ingeminatum esse constat, studio Matheos acui intellectum: id quod eo in casu verum esse in Elementis Matheos universæ (§. 53. Method.) ostendi, quo lector in discendis mathematicis methodi rationem habet. Quoniam igitur in libris vulgari more compositis cœcutire solet, qui acumine intellectus pollet veritatem quamlibet, ad quam cognoscendam animum appellit, accuratius, quam alii solent, dijudicandi; qui rationes ex demonstrationibus nostris petendas perspicere nequit, vel inde colliger, illos destitui eo lumine, quo ad veritatem pervidendam opus. Quamobrem aut consistendum est, certam in disciplinis cognitionem obtineri non posse, quæ scepticorum sententia est; aut omnibus viribus eo connitendum, ut libri dogmatici accurata methodo conscribantur. Ego a Scepticismo hodie adeo invalescente & profanitatem gignente alienus in posterius incumbo:

quo

quo successu, illi judicent, qui methodi leges perspectas habent atque in iis applicandis non sunt inexercitati. Quod si quis in arte inveniendo fuerit non infeliciter versatus; is libros vulgari more a compilatoribus (§. 889.) confarcinatos legit, ut meditandi materiam inde hauriat, veritatem proprio Marte indagaturus, quam ex lectione libri venari nequit.

§. 963.

*In lectione libri methodo scientifica conscripti definitiones ac propositiones singulas rite intelligitur earumque veritatem perspicitur anteriores sibi familiares reddere tenetur, antequam ad posteriores progrediatur.* In scripto scientifico propositiones omnes per definitiones auctoris sunt explicandæ, nec admit- tendus alius earum sensus, nisi qui definitionibus in locum definiti substitutis prodit, unico casu excepto, ubi auctor in methodi regulas ex defectu attentionis impegit (§. 910.). Definitiones adeo lector non modo memoria tenere debet, ut verba, quibus constant, audito definito, mentem ejus sub- eant, sed notio quoque eidem respondens eadem comitetur. Quoniam itaque eadem tunc lectori dicuntur familiares; ecquis non videt, quod is definitiones anteriores sibi familia- res reddere debeat, antequam ad posteriores progredia- tur sive definitiones, sive propositiones, quas illarum defini- ta ingrediuntur (§. 790.)? In scripto scientifico propositiones omnes eo ordine collocantur, ut præcedant, quæ sequenti- bus demonstrandis inserviunt (§. 790.). Quamobrem cum veritatis propositionis demonstratæ certus esse nequeat, qui præmissæ vel unius syllogismos in demonstratione concate- natos ingredientis veritatem ignorat (§. 570.); veritatem pro- positionum sequentium perspicitur de veritate anteriorum securus esse debet: quod ut fiat, eas sibi adeo familiares red- dere tenetur, ut non modo veluti sponte succurrant, quo- ties iisdem in demonstratione sequentium habet opus; ve- rum etiam recordetur, se vi demonstrationis (§. 568.), vel observationis (§. 567.), vel terminorum (§. 262. & 572.) veri- tatem earum perspexisse atque de ea esse certum. Evidens

*Quamdiule-  
ctor scripti  
scientifici  
in anteriori-  
bus subsistere  
debeat.*

adeo est, in scripto scientifico ad propositiones sequentes lectionem progredi non posse, antequam anteriores sibi familiares reddiderit.

Ipso facto docemur, quam tædiosa sit demonstrationum sequentium evolutio, ubi propositiones anteriores, quæ tanquam præmissæ eas ingrediuntur, nondum fuerint familiares. Cui idem experiri volupe fuerit, is evolvat aliquam in Elementis *Euclidis* demonstrationem, antequam propositiones anteriores sibi familiares reddiderit, utur terminorum singulorum, qui in illa occurrunt, notitiam habuerit.

## §. 964.

*Preparatio  
ad lectionem  
librorum  
scientifico-  
rum.*

Apparet hinc utilitas scriptorum dogmaticorum historiarum, quibus lector ad lectionem scientificorum preparatur, cum iisdem & definitiones, & propositiones inferantur, quarum frequens est in demonstrando usus (§. 847. 864.). Eorum igitur lectio lectioni dogmaticorum præmittenda.

E. gr. Antequam ad elementa Geometriæ *Euclidæ* accedas, eorum lectionem haud parum facilitaris, ubi ante ex aliquo libello terminos Geometriæ elementaris una cum palmariis theorematis atque præcipuis problematis tibi reddideris perspectos. Et idem eodem modo sese habet in omni reliquo scientiarum genere.

## §. 965.

*Quomodo ea  
fiat ipsorum  
scientifico-  
rum subsidio.*

Quoniam in scripto dogmatico historico nullæ collocantur definitiones, nisi quarum realitas in scripto scientifico adstruitur, nec propositiones aliæ, nisi quæ ibidem demonstrantur (§. 847.) & quarum frequens est in demonstrandis aliis usus (§. 864.); si autor in scripto scientifico definitiones a propositionibus, propositiones a demonstrationibus atque demonstrationes a scholiis distinguit, scriptum dogmaticum scientificum præbebit usum historici, quo ad illius lectionem præparamur, ubi saltem definitiones ac propositiones cum scholiis, demonstrationibus tantisper sepositis, tibi familiares reddideris.

E. gr. In hoc ipso opere Logico non modo propositiones, demonstrationes & scholia diverso typorum genere distinguuntur, verum etiam definitiones a propositionibus ubivis discernuntur. Quamobrem ad ejus lectionem sese præparaturus primum tantummodo definitiones atque

atque propositiones libri cognitæ & perspectæ sibi reddere debet, demonstrationibus prorsus insuper habitis, sed illustrationis gratia scholis in subsidium vocatis. Similiter in ceteris disciplinis philosophicis, quas eadem methodo tractabimus, præparatio ad lectionem scientificam instituetur.

§. 966.

Quoniam tamen in scriptis scientificis plures propositiones continentur, quam quæ ad præparationem istam necessaria sunt (§. 854. 8666. 867.); si scriptum scientificum simul vicem dogmatici historici sustinere debet, quo ad illius lectionem præparatur, definitiones ac propositiones asterismo aliquo vel alio signo notandæ, aut in fine operis indicandæ, quarum historica cognitio ad præparationem sufficit.

Quomodo scientifica scripta ad lectionem præparatoriam aptentur.

Dabimus inferius directorium in usum lectionis præparatoriæ operis hujus Logici, eorum potissimum gratia, qui adhuc hospites sunt in hoc studiorum genere.

§. 967.

Cum in lectione scripti scientifici proficere non detur, nisi definitiones ac propositiones anteriores tibi familiares reddideris, antequam ad sequentes progrediaris (§. 963.) & nec definitiones, nec propositiones memoriæ mandare liceat, nisi examine instituto (§. 949. & seqq. & §. 954.); illud autem nonnisi aliquo temporis intervallo obtineri, hoc multam attentionem desiderare ipso facto experiamur; in lectione scripti scientifici lento gradu progredi debet, qui in isto genere, ad quod illud refertur, nondum fuerit versatus & methodo scientificæ nondum adfectus.

De præparata lectione librorum scientificorum cur rejicienda.

Hæc sane ratio est, cur scripta scientifica vel prorsus non, vel male intelligant, qui in iis legendis nimis festinanter procedunt, immo subinde fugitivo nonnisi oculo percurrunt, etsi in methodo scientifica sint prorsus hospites nec rerum demonstrativa ratione pertractatarum historicam habeant cognitionem. Inde accidit, ut autoribus nescio quas insulas opiniones affingant, quæ sunt a mente ipsorum quam maxime alienæ.

## CAPUT VII.

DE INTERPRETATIONE SCRIPTURÆ  
SACRÆ.

§. 968.

*An singulis  
scripturæ S.  
verbis notio-  
nes quædam  
respondeant.*

**U**sum Logicæ in interpretanda scriptura sacra ostensurus suppono, *singulis scripturæ sacræ verbis suas responderi notiones, ex intentione Dei cum iisdem jungendas.* Si negas; in scriptura sacra occurre debent verba, quibus notio nulla respondet. Cum igitur verba sint signa notionum (§. 36.); si qua occurrunt, quibus notio nulla respondet, erunt ea sine mente sonus: quod cum de scriptura sacra cogitare impium sit, singulis verbis singulæ respondere debent notiones, ex intentione Dei, tanquam illius Autoris, iis jungendæ.

Logicæ adeo usum in scriptura sacra interpretanda ostensuri id potissimum agemus, ut doceamus, quomodo illius beneficio investigentur notiones cum subjectis ac prædicatis propositionum jungendæ ac inde, quantum datur, nexus inter subjectum & prædicatum intercedens eruatur. De subsidiis aliis aliunde petendis nostrum non est agere, cum alia non tradamus, nisi quæ ex jactis in anterioribus principiis deducuntur.

§. 969.

*Quando S. S.  
intelliga-  
mur.*

*Scripturam sacram adeo intellecturus cum singulis verbis eas conjungere debet notiones, quæ ex intentione Autoris cum iisdem jungendæ.* Etenim mentem auctoris cujuscunque tum demum intelligit lector, ubi cum verbis singulis eas conjungit notiones, quas cum iisdem jungit auctor (§. 903.). Quamobrem cum & singulis scripturæ S. verbis ex intentione Dei suæ respondeant notiones (§. 968.), eam tum demum intelligimus, ubi notiones illas cum verbis jungimus inter legendum.

E. gr. Dum *Josua* stare solem jussit, idea quædam animo ipsius observabatur, quæ verbis ore prolatis respondebat. Mentem igitur  
*Josua*

*Iesus* intelligit, qui eandem ideam in se excitat, dum verba illius legit, vel ab alio recitata audit. Similiter quando *Oculus* Deo tribuitur, voci huic respondere debet aliqua notio, qua quiddam Deo conveniens repræsentatur. Quamobrem qui eam in se excitat, ubi *oculum* Deo tribui legit; is scripturam sacrum intelligit. *Paulus* se vocat *Servum Jesu Christi*. Dum verba illa protulit, in mente ipsius hæc sit notio, quam iisdem expressit. Quodsi ergo lector eandem in animo suo excitat, dum illa legit; mentem *Pauli* intelligit. Paret itaque nostrum jam esse ut doceamus, quidnam a Logica præsidii expectare liceat in notionibus istis investigandis, ut de sensu verborum scripturæ S. certi esse possimus (§. 968.).

## §. 970.

*Notiones cum verbis S. S. inter legendum conjungendæ non immediate a Spiritu S. in animo legentis excitantur, sed vi verborum, quæ leguntur.* Si negas; sit contrarium verum. Excitet scilicet Spiritus S. immediate notiones cum verbis S. S. inter legendum conjungendas, ipsis verbis nihil huc conferentibus. Nulla igitur apparet ratio, cur id non perinde fieri debeat, si quis digitum ad verba textus authenticæ admovens ea intelligere optat, aut eorum sensum a Spiritu S. sibi manifestari Deum precatur, quam ubi versionem lingua sibi vernacula factam legit: neque ulla amplius est ratio, cur ex versione male facta non perinde verus S. S. sensus, prævia Numinis seria invocatione, eruatur, quam ex altera, quæ textui authentico ad amissum respondet. Enimvero neutrum horum fieri & experientia loquitur, & in confesso est apud omnes. Quare certum est Spiritum S. non immediate in animo legentis excitare notiones cum verbis S. S. conjungendas.

Quodsi ergo Spiritus S. non immediate in legente notiones excitat, quæ ex intentione Dei cum verbis S. S. conjungendæ sunt; non aliud relinquitur, quam quod ipsa verba, quæ leguntur, tanquam signa notionem ipsis respondentem in animo legentis excitent: quemadmodum idem in aliis scriptis quibuscunque fieri debet, nisi autor ea scripserit, quæ a lectore attento intelligi nequeunt, aut sine mente dederit sonos.

Sane si Spiritus S. immediate in animo legentis excitare deberet notiones verbis S. S. jungendas, nullo prorsus opus foret verbi externi apparatu, atque sic cum neglectu lectionis verbi divini in enthusiasum incideret, qui illam sibi persuaderet sententiam. Sed in remanifesta verbis pluribus non est opus.

§. 971.

*Quoniam notiones in S. S. finitio, non alia præsupponi notio a Deo potest, quam que animo penes lectorem supponantur.*

*Quodsi in scriptura sacra vocis alicujus nulla traditur de- finitio, non alia præsupponi notio a Deo potest, quam que animo nostro jam inhaeret, aut quam in nobis habemus, dum ipso opere in nobis experimur ea, de quibus ea loquitur.* Etenim verba, quæ legimus, in nobis excitare debent notionem cum iisdem jungendam (§. 970.). Enimvero cum verba sint notionum signa (§. 36.); non alio modo eas in mente nostra excitare valent, quam quomodo signum in ea producit notionem rei significatæ, revocando scilicet in memoriam notionem eo denotatam. Quoniam itaque nulla in memoriam revocari potest notio, nisi quam jam habemus (§. 32.); verbis scripturæ sacræ jungenda notio penes lectorem supponi nequit, nisi eam jam habuerit.

Quodsi autor terminis rerum practicarum notiones jungit, quas praxis ipsa eidem suggerit; mentem ejus intellectuiri eas iisdem jungere debemus notiones, quas ipsa praxi in nobis excitamus (§. 930.). Quamobrem ubi scriptura S. de spiritualibus hominis mutationibus, corruptione naturali & aliis agnatis loquitur; non alias supponere potest notiones, quam quas lector in eo statu positus in seipso intuetur, ubi ad semetipsum attendit.

E. gr. Dum Paulus se vocat *servum Jesu Christi*, quid voce servi denotatum velix non explicat. Eam igitur supponit notionem, quam eidem ex usu loquendi ii jungebant, ad quos scribebat. Similiter dum Moyses Solem atque Lunam *luminaria* appellat, quid voce luminaris designet, minime definit. Eam itaque notionem supponit, quam de luminari habemus. Eodem modo patet, ubi Christus ad Nicodemum de regeneratione loquitur, cum vocis definitionem nullam tradat, eam eidem jungendam esse notionem, quam



quam homo in seipso intuetur, dum regeneratur. Atque adeo claret, verba Scripturæ S. quibus praxis Christianismi continetur, non plene intelligi nisi ab eo, qui eidem vacat. Etenim quamvis ab iis, penes quos sunt illorum notiones, utcunque notiones agnatas in nobis excitare valent, quæ aliquam cum istis similitudinem habent, ut aliquo modo eadem intelligere nobis videamur; cum tamen tunc demum verba S. S. intelligamus, quando iis jungimus notiones ex intentione Dei jungendas, ex Dei autem intentione non aliæ quàm illæ jungi iisdem debent, quas in nobis ipso opere experimur in eum statum delati, de quo loquitur scriptura; patet omnino sensum verborum S. S. non plene assequi posse eum, qui ea, de quibus loquitur S. S. nunquam in se ipso fuit expertus. Neque hic quicquam accidit, quod non in omni alio casu simili locum habeat, ubi nonnisi de rebus mere naturalibus sermo fuerit. Pone enim, venatorem loqui de animali a te nunquam viso. Cum ejus nullam habeas ideam, nonnisi eam alter tibi communicare poterit, quatenus similitudinem cum re alia tibi nota habuerit (§. 768.). Monui vero jam (not. §. cit.) & res ipsa loquitur, non modo valde lubricam esse hanc viam, verum etiam eandem difficultatibus, quæ plerisque insuperabiles sunt, circumseptam esse. Pertinent huc quæ de historia naturali (§. 932.) & reliqua (§. 934.), nec non experimentis (§. 935.) & rebus practicis rite intelligendis (§. 930.) diximus.

## §. 972.

Hinc consequitur, non alias in scriptura sacra supponi posse *Quomodo ad notiones, quam quæ a rebus præsentibus abstrahuntur, consequenter notiones in S. S. supponi* si quis ab iis diversas verbis scripturæ jungit, eum fingere sensum a mente Autoris sacri alienum. *perverniatur.*

E. gr. *Josua* solem stare jubens non aliam stationis ideam habuit, quam quæ a rebus, quas tunc contuebatur, in animo ejus excitari poterat, & qui mentem *Josue* intelligere cupit, is eandem, non aliam, quam ipse habuit, eidem voci jungere debet (§. 117.). *Josua* solem respiciens & regionem in Tellure sibi circumjectam, non observabat nisi situm, quem sui respectu erga Terram habebat. Dum igitur eum stare iussit, nil aliud intendere potuit, quam ut eundem retineret situm, nec eum mutaret. *Stare* igitur hic idem est ac *situm suum non mutare*. Qui vero vocem idem significare contendunt ac *motum inhibere suum*, ut solem circa tellurem quiescentem

move-

moveri hinc inferre possint; illi menti *Josue* affingunt, quod est ab alienum. Similiter cum *Moses* Solem atque Lunam *luminaria* appellat, non aliam notionem supponere potest, nisi quam habemus, dum corpora illa mundi totalia coram intuemur. Enimvero non videmus, nisi quod Sole ac Luna presentibus in conspectum prodeant corpora terrestria nobis circumposita, quæ iis absentibus tenebris sepulta fuerant. Quamobrem *luminaris* notionem aliam non habemus, nec aliam scriptura penes nos supponere potest, nisi quod sit *corpus corpora opaca terrestres in conspectum producent tenebris disjunctis*. Si quis vero luminare explicat per corpus, quod *lumen sibi proprium emittit, vel quaquaversum diffundit*; is verbis *Mosis* affingit sensum a mente ipsius alienum. *Paulus* ad *Romanos* scribens, ubi se *servum Jesu Christi* appellat, notionem non alienam supponere potest, nisi quam *Romani* habebant. Erant autem ipsis servi proprii, quas adeo tanquam *personas* sibi representabant, quæ omnes operas suas pro arbitratu Domini in ejus usum convertere tenebantur. Non aliam igitur, quam hanc voci servi jungere licet, ita ut *Paulum* tanquam servum *Jesu Christi* nobis concipientes cogitare debeamus, ipsum omnes suas animi corporisque vires in conversionem gentium a Christo ipsi injunctam impendere obligatum fuisse, nec adeo in hoc negotio quicquam facere potuisse suo arbitratu, sed totum pependisse a jussu Domini sui, immo nec hic quævisse quicquam, quod suum erat sed iisdem potius sepositis non nisi ea, quæ sunt Christi. Cui notionis distinctæ defunt, is minimum confusas iis æquipollentes terminis hisce jungere debet, ubi sensum scripturæ sacræ assequi voluerit: id quod eum in finem moneo, ne quis arguetur, quasi scripturam sacram nonnisi ab eo intelligi statuamus, qui verbis distinctas jungere novit notiones. Etenim hoc absolum fore nemo non intelligit, cui perspectum est, nos mentem alterius intelligere, modo eandem notionem cum voce jungamus, quam cum ea conjungit alter (§. 117.), sive distincta ea fuerit, sive confusa; etsi mentem alterius, consequenter & scriptorum sacrorum, melius explicare valeamus, ubi notiones jungimus verbis distinctas (§. 929.). De distinctis adeo notionibus in interpretanda scriptura sacra potissimum laborare debent, qui eam aliis explicare tenentur; tum etiam (quod deinceps patebit) qui nexum veritatum revelatarum intimius perspicere cupiunt. Ceterum ipsa vox *servi* insinuat, quinam usus sit *Antiquitatum* in scrutando scripturæ sensu, scilicet ut pateant notiones earum rerum, quæ in consuetudinem abiire, nec inter nos amplius usu receptæ sunt.

## §. 973.

*Si quæ in scriptura sacra occurrant voces, quibus respondentes notiones habere non valemus; pro terminis inanibus eadem habendæ non sunt.* Etenim nemo nescit dari voces bene multas, quibus notiones suæ conveniunt, etsi nos eas in mente nostra minime habeamus, cum constet aliis easdem non deesse. Quoniam itaque scripturæ sacræ autorem Deum esse immota fide tenemus, nec minus pro certo ac explorato habemus, cum nobis in eadem revelasse, quæ rationis usu assequi non possumus; ubi constat, sermonem esse de rebus, quæ Deo perspectæ esse possunt, veluti cum de seipso suisque operationibus loquitur, nobis autem minime earum notionem assequi licet, cum nihil iis simile in nobis experiamur, pro terminis inanibus habendæ non sunt voces, quibus respondentes notiones in nobis excitare minime valemus.

*Quenam voces non pro inanibus habendæ.*

Res vocibus istiusmodi denotatæ *mysteria* dici solent, quarum nec per intuitivam cognitionem notiones in nobis habemus, cum nihil iis simile in nobis, vel in mundo materiali experiamur, nec demonstrationis beneficio acquirere valemus, cum in alias notiones, quas natura habemus, resolvi nequeant. Pertinet huc vox *Trinitatis*, quæ, etsi in scriptura sacra non legatur, significarum tamen obtinuit scripturæ sacræ conformem, ut alia sint ejusdem verba, quibus eadem notio respondet, quam ad vocem *Trinitatis* referimus. Ceterum eundem casum occurrere in humanis facile patet. Pone nimirum, venatorem loqui de feris, quas nunquam vidisti, vel artificem de instrumentis, quæ oculis tuis exposita nunquam fuere. Etsi noveris, voce venatoris aliquam denotari feram, termino artificis instrumentum aliquod, quo ad artem suam exercendam habet opus; nullam tamen feræ istius, nullam quoque instrumenti notionem habes. Quoniam vero nullus dubitas venatorem loqui de re sibi perspecta, idemque de artifice renes; deridendus tibi videretur, qui illorum voces sine mente sonos appellare non erubesceret. Propositio autem nostra non modo de verbis *mysteria* significantibus, verum etiam de aliis capienda est, quæ ob circumstantiarum historicarum ignorantiam, vel alia quacunque de causa nobis obscura sunt, ut notiones iis jungendas frustra

straneo conatu venemur. Accidit idem in aliis quibuscunque scriptis, quæ a nobis ideo non intelligi confitemur, minime autem sensu omni destituta venditamus. Inde patet, quem usum in interpretanda scriptura sacra habeat Antiquitatum, Historiæ, Chronologiæ, Geographiæ & Philologiæ studium. Sed cum nobis non propositum sit nisi generalem regularum logicarum ad scripturam sacram interpretandam applicationem ostendere; de singulis istis apertius dicere ab instituto nostro alienum foret.

## §. 974.

*Nec adeo rejicienda.*

Consequitur hinc, ob voces istius modi scripturam sacram minus recte obscuritatis accusari, & perperam eas rejici tanquam inanet, vel etiam res iis denotatas.

Ita v. gr. Trinitatem perperam rejiciunt Antitrinitarii, quod voci huic respondentem notionem distinctam sibi formare non norunt. Alia exempla præbent verba scripturæ, quibus mysteria alia designantur.

## §. 975.

*Notiones in S. S. explicanda non admittenda.*

Si notio subjecti constiterit, ea prædicati notio admitti nequit, quæ eidem repugnat & contra. Etenim si prædicatum subjecti notioni repugnat (id quod ex notionibus utriusque inter se collatis (§. 553.), patere debet); propositio falsâ est (§. 514.). Enimvero cum S. S. autor sit Deus falli ac fallere nescius; nulla in ea propositio occurrere potest, quæ falsâ deprehenditur. Ergo sensus propositionis admitti nequit, quem erroneum esse demonstrare licet; consequenter si notionem subjecti noverimus, eam prædicati notionem admittere nequimus, quæ eidem repugnat (§. 526.).

Quod si aliunde certo constiterit, notionem datam prædicato jungendam esse, notione autem subjecti admissa, quam quis eidem jungit, prædicatum subjecto repugnet; nemo non videt, ea, quæ notionibus subjecti & prædicati continentur, eidem enti simul inesse non posse (§. 310.). Notio igitur propositioni respondens impossibilis est (§. 519.), consequenter ipsa propositio vera esse nequit (§. 520.). Unde ut ante porro conficitur, si notionem datam prædicato jungendam esse constite-

stiterit, eam admitti non posse subjecti notionem, quæ eidem repugnat.

E.gr. Constat sensu S.S. Deum concipi debere spiritum, consequenter immaterialem, atque adeo in notione ejus contineri, quod sit spiritus idemque immaterialis. Quamobrem si quis Deo organum visorium tribuere vellet, ubi in sacris *Oculi* ejus mentio fit; is eidem tribueret, quæ enti immateriali repugnant, consequenter notioni subjecti in ea propositione *Deus habet Oculum* notio prædicati repugnaret. Patet adeo per *oculum* Dei non intelligi posse organum sensorium, quale res corporeæ sentientes habent, consequenter significatum quendam *oculi* generalem esse admittendum, qui & organo visorio, & attributo divino affinitatem quandam cum isto habenti convenit. Nimirum propterea quod oculum habet homo, fieri potest ut objecta sibi præsentia intuitive cognoscant. In significatu adeo generali *oculus* dicit possibilitatem intuitivæ cognitionis rerum præsentium, quemadmodum in sensu speciali organon corporis denotat, vi cujus intuitiva rerum cognitione in animantibus ac homine possibilis. Significatus generalis Deo omniscio & singulorum, quæ sunt ac fiunt atque esse ac fieri posse intelliguntur, cognitionem intuitivam habenti convenit, atque adeo generalis ista, non specialis notio voci jungenda, quando oculi Dei fit mentio.

### §. 976.

*Quodsi per interpretationem S. S. prodeat propositio contradictoria ejus, quæ vel a posteriori certa est, vel demonstrata, præstationis vel per alia S. S. loca manifesta; in notione sive subjecti, sive criterium prædicati determinanda aberratum esse constat.* Propositio enim, quæ vel a posteriori certa est, vel demonstrata, vera est (§. 517. 544. 557.). Quamobrem quæ eidem contradicit, falsâ esse debet (§. 532.). Quodsi ergo per interpretationem S.S. prodit propositio contradicens alteri, quæ vel a posteriori certa est, vel demonstrata; falsâ sit necesse est. Eodem adeo, quo ante (§. 975.), modo patet, interpretationem esse falsâ, consequenter in ea conjungi, quæ eidem enti una inesse nequeunt (§. 547.), atque a deo vel in notione subjecti, vel prædicati determinanda fuisse aberratum.

T t t 2

Quodsi

Quodsi per quædam S.S. loca sensus alicujus propositionis fuerit manifestus, quin eadem sic intellecta vera sit nemo non largitur, qui divinam S.S. auctoritatem in dubium non vocat. Quamobrem si per interpretationem aliorum S. S. locorum prodeat propositio, quæ illi manifesto contradicit; eadem falsa esse debet (§. 532.). Unde eodem, quo ante, modo conficitur, in interpretatione istorum locorum aberratum esse vel circa notionem subjecti, vel prædicati.

Prior propositionis pars consentit cum principio hodie unanimi omnium consensu recepto, quod *veritas revelata non possit contradicere naturali*, cum lumen revelationis ac rationis eundem autorem habeat Deum. Pars vero propositionis posterior cum illo Exegetarum canone conspirat, quod *scripturam sacram juxta analogiam fidei interpretari debeamus*, propterea quod fidei analogia constituitur per ea S.S. loca, quorum sensus adeo manifestus est, ut, nisi verbis vim inferre volueris, alias ea notiones non admittant, quam quas cum iisdem jungis, & quæ dicta classica dicuntur, veluti doctrinarum sedes. Ceterum non inutile est propositionem præsentem, quemadmodum ceteras, exemplis illustrari. E. gr. Deum *penituisse* legimus Gen. VI. 6. *quod fecerit homines*. Quodsi *penitentiam* explices per *tristitiam ex eo ortam*, quod *aliquid a nobis male factum agnoscimus*, quemadmodum terminus vulgo sumi solet, atque hinc verba scripturæ ita interpreteris, quasi Deus cognoverit, male a se factum, quod condiderit homines, propterea quod eorum flagitia non præviderit, atque ideo animo conturbatus & contristatus, immo sibi ipsi indignatus fuerit, prout in simili casu a nobis fieri solet; interpretatio & propositionibus in Theologia naturali demonstratis, & manifestis S. S. verbis contradicit. Et enim in Theologia naturali ostenditur, Deum ab æterno prævidisse mala hominum facta, nec ea ipsi ignota fuisse, cum decretum de condendo homine formaret. Videantur interea *Thimmigii* Institut. Philosoph. §. 23. 73. Theolog. natur. Et ipsa S. S. disertis verbis 1. Sam. I. 29. a Deo *penitentiam* removeret tanquam ipsi repugnantem, addita hac ratione, quod *homo non sit, ut penitentiam agat*. Unde concluditur interpretationem illam humano more factam a sensu S. S. abire, canonibus isti conformiter, quod, *quæ de Deo humano dicuntur, more, intelligenda sint ea, quæ ipsum decent, ratione*. Decla-

rat homo pœnitens, se detestari malum, quod ex facto suo emergit, atque ejus intuitu se nunquam fuisse facturum, quod fecerat: ad quæ si attendimus, notionem *pœnitentiæ* formare licet Deo convenientem, scilicet quod *pœnitere* idem sit ac *declarare*, se detestari malum, quod ex facto emergit, nec ejus intuitu factum fuisse decretum & executioni demandatum. Etenim si Deus dicatur declarasse hominibus, quod detestetur ipsorum flagitia, nec eorum gratia genus humanum condiderit, immo porius aliis deficientibus finibus nunquam idem conditurus fuerit; nihil in his continetur, quod naturæ ipsius non conveniat & aliis S. S. locis, unde attributorum divinorum cognitio hauritur, non sit consentaneum.

## §. 977.

*Si notio subjecti fuerit certa, ea admittenda est prædicati* *Notio prædicati per notionem subjecti determinatur.* Quod si enim notio prædicati per notionem subjecti determinetur, quod notio prædicati involvit ideo subjecto convenit, quia eidem convenit, quod notione subjecti continetur (§. 219.). Quoniam itaque certum est *per hypothesin*, eam subjecti notionem formandam esse, quæ sumitur, nullo sane modo dubitari potest, quin ea prædicati admittenda sit notio, quæ per illam determinatur, ubi divinam S. S. auctoritatem admiseris.

Claret scilicet vel a priori, vel a posteriori, utrum prædicati notio per notionem subjecti determinetur. A priori idem patet, ubi ex notione subjecti demonstrare potueris (§. 551. & seq.) prædicatum eidem convenire debere; a posteriori autem liquet, si in nullo subjecto deprehendatur, quod notio subjecti involvit, quin in eodem una adsit, quod notione prædicati continetur. Exempli loco esse potest ipsa *pœnitentiæ* notio, quam Deo convenientem formavimus (not. §. 976.).

## §. 978.

*Linguae authenticæ hunc solummodo habent usum, ut judicium fieri possit, num versio rite facta, seu an voces linguae authenticæ & in versione iisdem respondententes eandem rem designent.* *Linguarum authenticarum in S. S. interpretanda usus.* Versionem tum demum rite factam esse, ubi voces linguae authenticæ & in versione iisdem respondententes eandem

rem designant, consequenter utrobique eadem notio locum habet (§. 331.), nemo non largitur, cum alias versio menti Auditoris intelligendæ non sufficeret (§. 969.), sed lector sibi fingeret sensum ab ea alienum (§. 120.). Quamobrem cum linguæ authenticæ gnarus norit, quænam voces v. gr. linguæ sibi vernaculæ vocibus linguæ authenticæ respondeant; iudicium is ferre potest, num versio rite facta fuerit

Enimvero aut linguæ authenticæ alium adhuc in interpretanda S. S. usum habent, aut non. Habeant, si ita visum fuerit, usum adhuc alium. Quoniam scripturam sacram intellecturus & eandem aliis explicaturus id agere debet, ut cum singulis verbis jungat notiones, quæ ex intentione Dei cum iisdem jungendæ sunt (§. 969.), non alium usum habere possunt quam in venandis notionibus, quæ verbis respondent. Grammatica vero vocis explicatio ad venandam notionem ei convenientem nil confert, nisi quando ratio denominandi fuerit a notione petita (§. 914.): id quod ante constare nequit, quam notio aliunde fuerit perspecta. Usum adeo in venandis notionibus nullum habet lingua authentica, consequenter alium usum habere nequit, quam ut ejus beneficio iudicium fieri possit, utrum versio rite facta fuerit, nec ne.

*Casparus Neumannus*, Theologus eminens, pro eo, quo pollebat, ingenii acumine, hypothesin quandam commentus est de significatione literarum hebraicarum hieroglyphicæ, vi cujus voces significationem quandam essentialem obtinent. Legi ea de re potest liber, quem sub titulo: *Clavis Domus Hebrææ* edidit, vel legant, qui brevitatem amant, *Bigam difficultatum physico-sacrarum de Gemmis Urin & Tinnim dictis & de cibo Samariæ obfessæ ad Leibnitium* scriptam A. 1707. In ea hypothesi linguæ Hebræicæ etiam aliquis usus esse videri poterat ad notiones, quæ verbis conjungendæ sunt, venandas. Enimvero cum voces vi literarum, ex quibus componuntur, nonnisi generalem obtineant significationem, emphasi earum explicandæ inferviem, quam primum res iis denotæ cognitæ fuerint atque perspectæ; non alius hic linguæ Hebræicæ usus esse potest quam est etymologiæ vocis in lingua quacunque alia, ubi ratio denominandi



a notione rei fuit petita. Cavendum itaque in omni casu, ne viety-  
mologiæ aut compositionis vocis grammaticæ rei tribuantur, quæ  
eidem minime conveniunt.

## §. 979.

*Si quæ propositiones in scriptura sacra occurrunt, quæ etiam rationi pervestigabiles sunt; quin eadem ex notione subjecti demonstrari possint, dubium nullum est.* Pone enim, eas ex notione subjecti demonstrari non posse. Quoniam methodus ex definitionibus seu notione subjecti & ejus determinationibus eruendi propositiones eadem prorsus est cum demonstrandi methodo, ita ut vi demonstrationis eadem in aprium producantur (§. 724. 725.); eadem ex principiis rationis investigari non poterunt, consequenter, rationi impervestigabiles sunt: quod cum hypothesein evertat, absurdum est. Propositiones adco S. S. quæ rationi pervestigabiles sunt, demonstrari possunt.

*Quoniam S.S. propositiones demonstrari possunt.*

Vocantur a Theologis istiusmodi articuli, qui ex utroque lumine cum rationis, tum revelationis innotescunt, *articuli fidei mixti*. Tales sunt propositiones omnes, quibus attributa divina de Deo enunciantur, nec non omnes, quæ de moralitate actionum & rebus in natura obviis sententiam dicunt. Unde apparet, philosophiam, quæ methodi scientificæ legibus satisfacit, haud exiguum habere usum in concordia revelationis cum ratione quoad articulos mixtos adstruenda: id quod haud postremam utilitatem præstat ad S. S. divinam autoritatem iis persuadendam, quibus ea dubia videntur. Etenim concordia ista arguit, rationem ac revelationem eundem habere autorem, nempe Deum, quem autorem rationis ipsa ratio demonstrat.

## §. 980.

*Quodsi in propositione, quæ sola revelatione innotescit, notio distincta subjecti innotuerit, ex ea prædicatum eidem convenire demonstrari potest, in subsidium vocatis propositionibus aliis, quæ vel per revelationem, vel rationem innotuerunt.* Etenim qui veritates revelatas intimius meditatus fuerit & methodi scientificæ praxin in potestate habet; is non negabit, non absurdum ei inter illas intercedere nexum, qualis inter veritates

*Quoniam propositiones pure revelatae demonstrabiles sunt.*

tes

tes naturales intercedere deprehenditur, ita ut veritatis unius ratio per alteram reddi possit. Enimvero in Ontologia & Cosmologia demonstrabimus, veritates naturales ideo demonstrabiles esse, quod unius ratio per alteram reddi possit. Unde conficitur, veritates quoque revelatas eadem de causa demonstrabiles fieri.

Enimvero quemadmodum veritates naturales demonstrari nequeunt, nisi suppositis quibusdam definitionibus atque axiomatis, tanquam principiis indemonstrabilibus (§. 551. & seqq.); ita similiter revelatarum demonstratio nulla concipipotest, nisi admissis quibusdam tanquam primis & indemonstrabilibus.

Quoniam veritates revelatas demonstrare non licet, nisi quædam tanquam indemonstrabiles axiomatum instar sumantur, ideo eodem modo patet, propositionem per modum conclusionis illatam proprie revelata habendam esse, quo supra (§. 585. 586.) evicimus, propositionem nonnisi probabilem esse, si demonstrationem vel unicum principium probabile ingrediatur. Non igitur metuendum est, ne rationis decempea emetiri velimus, quæ ejus sphaeram transcendunt. Alia vero adhuc ratione stabiliri poterat nexus veritatum revelatarum, quem experientia intelligenti constare diximus. Etenim Eph. III. 10. affirmatur, ex opere redemptionis, quod objectum divinæ revelationis est, sapientiam Dei innotescere. Sapientiam concludimus ex consensu finium & mediorum atque adeo ex ipso illo nexu, qui inter veritates revelatas intercedit. Quamobrem ubi scriptura sapientiam ex opere redemptionis colligi jubet; de nexu inter veritates illuc spectantes dubium nullum superesse potest. Sed nondum hic nobis suppetunt principia, per quæ hæc uberius deducere valeamus. Veritates istæ, quæ sola revelatione innotescunt, *articuli puri* appellari solent. Scilicet si qua propositio in numerum articulorum fidei purorum refertur, tum vel notio subiecti sumitur tanquam possibilis auctoritate S.S. utrum eam possibilem esse demonstrare non potueris, & ex ea tanquam possibili sumpta legitima demonstrandi forma deducitur, prædicatum eidem convenire; vel articuli quidam puri auctoritate S.S. sumuntur tanquam veri & inde cum realitas subiecti ostenditur, tum prædicatum eidem convenire evincitur. Apparet adeo, demon-

monstrationes istas nonnisi nomen suum trahi penes eos, qui immota fide tenent possibilitatem notionum assumtorum, vel articulorum fidei purorum, qui tanquam principia demonstrandi prima, seu axiomata sumuntur. Quodsi quis fide ista destitutus, vel probabiliter tantum divinam S. S. auctoritatem agnoscit, vel eam prorsus in dubium vocat; is demonstrationes istas non nisi tanquam hypotheticas admittit, pro veris habendas, quam primum certo constiterit, assumpta esse certa. Neque hic quicquam affirmamus, quod non perinde locum habeat in humanis & rationi nostræ conveniat. Et enim inter principia demonstrandi referimus experientias indubitatas (§. 554.), quæ perinde nonnisi fide tenentur ab iis, qui ipsimet non experti sunt, quod tanquam experientiæ consonum sumitur. Cur igitur non perinde inter ea referre debemus, quæ fide divina vera esse tenemus, præsertim cum ea firmior longe sit assensus, quam humana? Quodsi excipere velis fieri posse, ut ipsimet experti, quæ tanquam experientiæ conformia sumuntur, certam eorum obtineamus cognitionem; haud difficilis erit responsio, posse quoque certam veritatum revelatarum cognitionem acquiri ab iis, in quibus Spiritus S. fidem operatur. Nulla adeo inter utrumque casum disparitas est. Quodsi vero quis contenderet, se universum veritatum revelatarum systema ex principiis rationis demonstrare velle, hæc is nugari merito censeretur, cum articuli puri, quales sunt Trinitatis & Incarnationis mysterium, rationis sphaeram transcendant.

## §. 981.

Apparet adeo, *scripturam sacram explicaturum non modo Quænam S. S. in notiones verbis singulis ex intentione Dei jungendas inquirere interpretatio debere* (§. 972. & seqq.), ut genuinus eorum sensus appareat, *utilis.* & hinc constet, quænam tanquam vera affirmet S. S. *verum etiam nexum prædicati cum subiecto* (§. 977.), & *veritatum revelatarum inter se perveſtigare posse* (§. 979. & 980.), ut per consensum S. S. cum ratione quoad articulos mixtos, & per non repugnantiam purorum cum veritatibus naturalibus hostes S. S. evidentius ac firmitus confutentur, scrupuli circa religionem subinde in animis hominum orientes certius eximantur & ex opere redemptionis attributorum divinorum notitia

(Wolffii Logica) Uuuu eru-

eruat, quo ipso idem Deo dignum deprehenditur, & in pietatis mysterium abit.

Quæ hic sumimus rationibus uberioribus confirmare non est hujus loci, cum aliis, quam Logicæ principiis, quæ sola supponi hic possunt, opus habeamus. Evidentiora hæc evadent, ubi Theologiæ naturalis & philosophiæ practicæ principia fuerint perspecta. Si quis vero veritatum revelatarum systema harmonicum condet, in quo aliarum ratio per alias redditur; omnium evidentissime singula constabunt.



## SECTIO IV.

DE

# USU LOGICÆ IN VERITATE CUM ALIIS COMMUNICANDA.

CAPUT I.

DE MODO ALIOS CONVINCENDI.

§. 982.

*Convictionis  
definitio  
nominalis.*

**C**onvincere dicimur alterum, dum efficimus, ut propositio ipsi certa evadat. Et hinc *convicti* dicimur in casu quocunque dato, quam primum propositio aliqua nobis certa est.

E. gr. *Calcem frigidam affusa aqua frigida adeo in calefcere, ut manus calorem ferro nequeat*, si quis dubitet; veritatis convictus dicitur, ubi experimento factò certus fuerit, rem ita sese habere. Similiter si quis dubitet de veritate asserti Geometrarum, quod *curva quedam habeant*

*habeant asymptotos*, hoc est, quod duci possint lineæ rectæ, quæ in infinitum continuatæ continuo propius accedunt ad curvam, nunquam tamen cum eadem coincidunt, & demonstrationibus intellectus certus evadit, dari omnino curvas, quæ asymptotos habent; tum convictus dicitur hujus veritatis.

## §. 983.

Propositio nobis certa est, quando agnoscimus eam esse *veram*, vel *falsam* (§. 564.), quamobrem *alterum convictum* *efficere debemus, ut agnoscat, propositionem esse veram vel falsam* (§. 982.). *Quid alterum convictus intendat.*

E. gr. Alterum convicturus, *calcem frigida affusa incallescere*, efficere debet, ut is agnoscat, propositionem hanc esse veram. Similiter convicturus alterum, *dari curvas, quæ asymptotos habent*, efficere debet, ut is agnoscat, asserto Geometrarum constare veritatem suam.

## §. 984.

*Quodsi ergo nostrum de probabilitate propositionis judicium verum esse alter agnoscit; convictus erit probabilitatis propositionis.* *Probabilitatis quando convincamur.*

Nimirum convincitur veritatis judicii nostri, quod data propositio sit probabilis. Quamobrem cum hoc ipso agnoscat propositionem datam esse probabilem eamque tanquam probabilem admittit, certus est, eam propositionem probabilem esse, atque adeo convictus probabilitatis.

## §. 985.

*A posteriori alterum convicturus eum eo adducere debes, ut res presentes, quarum notio exhibetur, vel de quibus judicatur, coram intueatur, atque adeo, si de rebus practicis sermo fuerit, earum veritatem in se ipso experiat.* *Modus alterum convincendi a posteriori.* Si prædicatum subiecto convenire observamus, propositio nobis certa est (§. 567.). Enimvero si alterum eo adducere possis, ut res extra se positas observet, vel rerum practicarum notiones ipso opere in se ipso excitet; re ipsa experitur, in propositione data prædicatum convenire subiecto, modo judicia intuitiva formare

Uuuu 2

didi-

didicerit (§. 669.). Propositio igitur ipsi certa est. Eum adeo veritatis ejusdem convicisti (§. 982.).

Similiter notionem veram atque possibilem esse intelligimus, si inter res vel olim perceptas, vel eas, quæ nunc sensui obijciuntur, talis occurrat, cui insunt, quæ in notione data continentur (§. 719.). Quamobrem si alterum eo adducas, ut res præsentēs, quarum notio exhibetur, coram intueatur, vel, quod perinde est, si ei in memoriam easdem revoces, ut earum imagines quasi oculis oberrantes contempletur; reipsa experietur, num ea iisdem insint, quæ in notione data continentur. Atque sic notionem veram atque possibilem esse intelligit. Eum igitur veritatis atque possibilitatis notionis convicisti (§. 983.).

Patet hinc observationum, experimentorum & exercitiorum in rebus practicis usus. Methodo huic convincendi plurimum tribuit *Confucius* (not. §. 930.), cum non alia uteretur doctrina, nisi ab experientia derivata. Immo eandem commendat ipse *Christus* Joh. VII. 17. *Si quis, inquit, voluerit voluntatem Dei facere, cognoscet de doctrina, utrum ex Deo sit, an ego a meipso loquar.* Eandem itaque & ego jam commendavi (§. cit.), ut veritatum logicarum convincamur. Eodem consilio veritates practicæ Mathematicorum, veluti opticæ & mechanicæ, hodie experimentis confirmantur, in eorum præsertim gratiam, qui demonstrationes capere nequeunt. Et nos, quantum datur, per universam philosophiam non alio finerationis atque experientie connubium innumeratam esse jubemus, confirmantes a posteriori, quæ per rationes a priori stabilita fuere. Ita nimirum & eos, qui demonstrationibus ad assensum compelli non possunt, doctrinas ad judicandum & ad praxin vitæ utiles docere licet, ut non minus eas rite intelligant, quam veritatis earum plene convincantur.

### §. 986.

*Quenam hic  
regula obser-  
vanda.*

Quoniam regulæ complures observari debent, ubi vitium subreptionis in experiundo evitare ac certam rerum cognitionem a posteriori obtinere volueris (§. 669. & seqq.), imprimis ubi judicia universalia (§. 705. 706.) ac notiones universales, defini-

definitiones inprimis (§. 708.) curæ cordique habueris; alterum a posteriori convicturus in dato quolibet casu applicare debes regulas, quæ ad notiones, definitiones ac propositiones cum categoricas, tum hypotheticas præscribuntur.

E. gr. Si iudicium intuitivum formandum, alterum convicturus de ejus veritate, ipso attendente ad perceptionem præsentem, in eo formando procedere debet juxta regulas ea fini (§. 669) propositas. Similiter si alterum a posteriori convinci juberis, in data propositione de subiecto prædicari modum, aut quod per modum attributorum inest, aut attributum vel essentialiale quoddam; quid fieri debeat, monstrabunt theoremata de modis, attributis, essentialibus, & iis, quæ per modum attributorum insunt, observandis (§. 672. & seqq.). Si notio universalis a posteriori stabilienda, utendum est regulis formandi notiones universales (§. 678. 682. & seqq.). Si definitionum veritatem docere volueris, tenendæ sunt regulæ delegendi definitiones a posteriori (§. 679. 680. 681. 686. 687.). Si a posteriori alterum convincere volueris datam causam datum producere effectum; theoremata ea fini inservient, quæ de causis a posteriori investigandis agunt (§. 697. & seqq.). Si denique veritatis iudicii hypothetici universalis veritas a posteriori stabilienda; theoremata de formando iudicio hypothetico universali satisfaciunt (§. 706.). Non igitur opus est, ut diversitatem casuum alios a posteriori convincendi hic expendamus.

### §. 987.

Quoniam propositiones historicas quascunque non rectius intelligit, quam qui rerum præsentium notiones ipso usu sibi comparavit (§. 932. 934. 935.), nec res practicas cujuscunque generis penitus novit, quam qui earum notiones ipsa praxi in se excitat (§. 930.); evidens est, eadem opera a posteriori & propositiones penitus intelligi, & earum veritatem agnoscere.

*Cur propositiones a posteriori eadem opera intelligantur & vera agnoscantur.*

Commendanda hoc nomine venit cognitio a posteriori comparanda. Falluntur tamen, qui eam omni in casu facilem esse sibi persuadent. Etenim quam difficile sit vitium subreptionis vitare, quo admissio nulla datur certa rerum a posteriori cognitio, ipso opere experientur, qui in rem præsentem venturi sunt. Immo qui demonstrationibus multum operæ dederunt, illo demum acumine sese præditos esse deprehendent, quod ad propositiones ac notiones

tiones determinatas a posteriori formandas requiritur. Unde nova patet ratio connubii continui rationis ac experientiae. Ceterum exemplo hic nobis sunt Astronomi, quorum acumen in observando demonstrationibus, deberi nemo ignorat, qui omnem Astronomiae veteris ac recentioris ambitum animo complexus fuerit.

## §. 988.

*Quando ad  
autoritatem  
provocan-  
dum.*

*Quodsi in potestate tua positum non fuerit efficere, ut alter ipse observe, unde notiones & propositiones deducuntur a posteriori stabiliendae; autoritas observatoris stabilienda (§. 613. & seqq.).* Etenim si qua ab altero observata tanquam certa admittere debes, ea credere teneris (§. 612.), consequenter assensus nittitur autoritate observatoris (§. 611.). Eam igitur stabiliri convenit.

Desumuntur nimirum argumenta a requisitis hominis fide dignis, quae (§. §. cit.) abunde demonstravimus. Facile autem patet, nulla hic opus esse probatione, ubi hic vulgus notum est observatorem vel experimentatorem esse fide dignum. V. gr. *Cassini, Flamsteadii, Hallgi* in observationibus astronomicis autoritatem nemo in dubium vocaverit, cui eorum in hoc genere merita fuerint perspecta. Absolum itaque foret probare eorum autoritatem, ut observationes ipsorum recipiantur tanquam fide dignae. Non exiguum tamen pondus accedere credibilitati observationum ac experimentorum, quae a pluribus reperita unanimi consensu confirmantur, nemo in dubium vocabit. Quamobrem in stabilienda autoritate observatoris habenda quoque est ratio multitudinis idem experrorum, etsi nihil hinc praesidii expectare liceat, ubi rationibus standum: id quod mox luculentius ostensuri sumus.

## §. 989.

*Falsitatis ob-  
servationis  
& experi-  
menti alte-  
rum convin-  
cendi modus.*

*Quodsi falsitatis observationis, vel experimenti alterum a posteriori convincere volueris; observatione, vel experimento ipso praesente reperito monstranda est differentia, quae inter utrumque intercedit.* Etenim si contrarium ejus ipse observat, quod ab aliis relatum pro certo sumit; cum contraria simul vera esse nequeant (§. 529.), falsa esse, quae tanquam a se observata alter refert, evidenter perspicit.

Cau-



Cautione tamen hic opus est, ne duas observationes, vel experimenta non prorsus eadem pro iisdem habeamus. Diversa enim pro iisdem habens in errorem incidit (§. 631.).

§. 990.

*A priori veritatis vel falsitatis alterum convincimus vi demonstrationis; probabilitatis autem vi probationis probabilis.* Si prædicatum subjecto convenire sive directe, sive indirecte demonstrare valemus, propositio nobis certa est (§. 568.) & demonstrare valemus, prædicatum suo repugnare subjecto, certum nobis est propositionem esse falsam (§. 571.). Quamobrem si vi demonstrationis ab altero assensum propositioni demonstratæ præbendum extorquere possis; certus erit, propositionem datam esse veram, vel falsam, consequenter vi demonstrationis eum convicisti (§. 983.).

Quoniam probatio probabilis præmissas probabiles continet (§. 586.), ceteroquin vero a demonstratione non differt (§. 588.); vi probationis probabilis attente perpensa propositio probata probabilis intelligitur, seu, si quis probationem probabilem contextere valet, ei certum est, propositionem probatam esse probabilem. Quamobrem ubi vi probationis probabilis assensum ab altero extorquere possis; certus erit, propositionem datam esse probabilem, consequenter vi probationis probabilis eum convicisti (§. 984.).

Hoc a priori convincendi modo utuntur Mathematici, præsertim Geometræ, nec infelicitè. Constat sane per tot secula omnes, quotquot animum ad veritatem theorematum geometricorum intelligendam appulerunt, ejus quoque fuisse convictos. Quantuscunque adeo sit in rebus aliis dissensus, nullus tamen circa theoremata *Euclidis*, *Archimedis*, *Apollonii*, *Theodosti*, *Menelai* notatur, &, quod maximum est, ne quidem inter eos, qui in aliis in diversas prorsus sententias abeunt. Exemplum Mathematicorum nos impulit, ut, ratione tantæ certitudinis, quæ penes ipsos est, detecta, eandem, quantum datur, semitam in philosophia calcaremus, præsertim cum nobis pateret, alia via certam rerum cognitionem obtineri non posse: etenim si cognitionem demonstrati-

vam

vam prorsus seponas, nec in ea, quæ a posteriori hauritur, vitium subreptionis declinabis experientiæ adeo inimicum (§. 668.), nec in formandis definitionibus (§. 680. 681.) atque propositionibus determinatis sive categoricis (§. 705.), sive hypotheticis (§. 706.) tuto semper tramite procedes. Omnium optime ex philosophia experimentalis eo modo pertractata, quo a nobis traditur, apparet, quantum valeat experientia demonstrationis lumine adjuncta, quamvis & ceteræ philosophiæ nostræ partes lectorem attentum idem docere valeant.

## §. 991.

*Quenam hic principia sint supponenda.*

*Alterum vi demonstrationis convicturus eam eo usque continuare debet, donec in syllogismis, qui eandem ingrediuntur, perveneris ad præmissas ei certas, vel, ubi in principiis prorsus adhuc hospes est, ad definitiones, axiomata & experientias indubitatas.* Etenim qui vi demonstrationis ad assensum compelli debet, is singularum præmissarum veritatem perspicere debet (§. 569.), consequenter præmissæ singulæ eidem certæ sint necesse est (§. 564.). Quamdiu adeo in demonstranda propositione sumitur aliqua præmissa, quæ convincendo nondum certa est; eadem ulterius demonstranda, donec præmissæ sumtæ omnes eidem certæ fuerint. Quodsi ergo omnium principiorum fuerit ignarus, pergendum utique est usque ad principia demonstrandi prima, definitiones nempe, axiomata & experientias indubitatas (§. 562.).

Idem adhuc alia ratione sic ostenditur. Qui vi demonstrationis se convictum fuisse expertus fuit, is successive omnes definitiones & propositiones expendit sibi que familiares reddidit, quæ tanquam præmissæ syllogismos in demonstratione (§. 551. & seq.) concatenatos ingrediuntur, antequam vi demonstrationis ad assensum propositioni datæ præbendum compelli potuit, consequenter veritatis ejus convictus fuit. Quamobrem ubi alter perinde ac ipse ejusdem veritatis convinci debet; easdem definitiones ac propositiones successive expendere sibi que familiares reddere tenetur. Eum adeo vi demon-

stra-

strationis convicturus eo usque eandem continuare debes, donec in syllogismis, qui eam ingrediuntur, perveneris ad præmissas convincendo certas, vel a prima usque demonstrationis principia, ubi eadem ignoraverit.

E. gr. In demonstratione geometrica theorematis, quod recta ex centro ducta & arcum bisecans chordam quoque ejusdem bisecet, sumuntur definitio radii, axioma de æqualitate radiorum ejusdem circuli, & tria theoremata, sc. 1. quod arcuum æqualium chordæ sint æquales, 2. in triangulis sibi mutuo æquilateris anguli æqualibus lateribus oppositi æquales sint, 3. in duobus triangulis æquales sint bases, si crura sigillatim fuerint æqualia & angulus iisdem comprehensus idem (not. §. 552.). Quodsi ergo convincendo tria ista theoremata fuerint perspecta, ulteriori analysi opus non est. Enimvero ubi illorum theorematum veritatem is nondum perspexit, eorum quoque demonstrationes sunt evolvendæ, donec ad principia alteri perspecta aut ad principia prima perveneris. Similiter in demonstratione logica theorematis, quod *modi ingredi nequeant definitionem*; sumimus definitiones modi atque notarum, duo axiomata, sc. 1. quod *mutabilia constanter non insunt* & 2. *que constanter non insunt*, rebus agnoscendis atque a se invicem discernendis inservire nequeant, atque theoremata, quod *in definitione nec plures, nec pauciores note enumerande, quam que ad rem definitam agnoscendam & ab aliis distinguendam sufficiunt* (not. §. 551.). Quodsi ergo convincendo definitiones ac axiomata ista una cum hoc theoremate fuerint perspecta, eum convicturus veritatis theorematis demonstrationem non nisi ad hæc usque principia evolvi necesse est. Enimvero si circa definitiones hæserit, ejus dubia ante tollenda sunt; si axioma concedere noluerit, demonstratione per indirectum ante absurditatis convincendus (§. 553. 559.); si denique theoremati assensum denegaverit, ejus demonstratio in medium afferenda & eo usque continuanda, donec ad principia concessa, vel ad ipsa prima perveneris.

## §. 992.

*Si, quæ in demonstratione ex antecedentibus sumuntur, Modis datæ continuo citantur, ubi paragraphos citator continuis evolvit, gendi principia donec ad tales perveneris, in quibus nulla amplius reperitur; pia convincendo tan- absque ullo labore recensere licet definitiones, axiomata, obser- quam nota (Wolfii Logica) Xxxx varioproposende*

vationes, propositiones demonstrativas ante cognoscendas, quam convictio in casu dato habeat locum. Etenim si perpendimus, qua ratione Autor vel alius quicumque, qui eidem assentitur, veritatis, vel probabilitatis propositionis datæ convictus fuerit; tum quidem evidens erit, id inde esse, quod singula successive principia, quæ demonstrationem quomodocunque ingrediantur, perspexerit sibi que familiaria reddiderit. Quamobrem si alter eodem modo convinci debet, eadem quoque principia successive perspicere sibi que familiaria reddere tenetur: secus jure ab eo non requisiveris eum assensum, quem tumet propositioni datæ præbes.

Patet adeo usus citationum singularis, qui absque iis vel prorsus non, vel nonnisi difficillime expectari poterat. Atque ideo non modo veritates mathematicas in elementis Matheseos inter se ita connexas dedimus, ut beneficio citationum singula ad prima seu principia reducantur, addituri proxime complures, quæ adhuc desiderari poterant, ipsasque sublimiores; verum simile quid circa philosophiam universam meditamur & in hoc opere logico idem institutum executi sumus. Quodsi ergo quis convincendus fuerit veritatis eorum, quæ de *eliminatione superfluatorum ex definitionibus præcipiuntur*, consulendi erunt, qui citantur, §. 179. 348. 836. Quodsi §. 179. evolvis, citantur ibidem §§. 154. 64. 65. 67. 156. 157. 158. 177. 178. 172. 173. 174. 70. 71. 153. 90. Porro §. 154. citantur §. 153. 79. & §. 153. citantur §§. 152. 92. 123. 41. 37. Et si porro singulos §§. hic citatos evolvis, respondebunt (1) §. 56. §. 67., (2) §. 157. §§. 66. 155., (3) §. 158. §. 67., (4) §. 177. §§. 67. 79. 153., (5) §. 178. §§. 158. 177., (6) §. 172. §§. 64. 79. 72. 92. 123. 152., (7) §. 173. §§. 66. 92. 130. 152., (8) §. 174. §§. 157. 172., (9) §. 70. §§. 60. 65. 66. 67., (10) §. 71. §. 66., (11) §. 90. §§. 36. 34. 88. 89., (12) §. 37. §§. 36. 34., (13) §. 155. §. 4., (14) §. 72. §§. 70. 45. 46., (15) §. 130. §§. 92. 88. 36. 124. 123. 116. 129., (16) §. 89. §§. 88. 36. 37., (17) §. 124. §§. 88. 123. 89. 122., (18) §. 116. §§. 36. 37. 32., (19) §. 122. §. 109. Ab his citationibus omnibus pender §. 179. Quodsi §. 348. evolvis, ibidem citatos reperies §. 242. 346. 347. 44. & seqq. 249. Si jam porro hos singulos evolvis, respondebunt (1) §. 249. §§. 237. 242. 233. 228. 44. 235. 250. 237. 238. (2) §. 248. §§. 242. 243. (3) §. 237. §§. 225. 179. 44. (4) §. 233. §§. 44. 219. (5) §. 235. §§. 225. 152. 45. 44. (6)

(6) §. 250. §§. 235. 242. 236. (7) §. 237. §§. 225. I. 2. 46. 235. (8) §. 238. §§. 47. 236. (9) §. 225. §§. 69. 215. 220. 221. 222. 224. 180. (10) §. 236. §§. 44. 45. 233. (11) §. 69. §§. 64. 65. 61. 63. 64. 67. 62. (12) §. 215. §§. 69. 157. 61. (13) §. 220. & 221. §§. 66. 218. (14) §. 222. §§. 157. 219. (15) §. 224. §§. 65. 157. (16) §. 180. §§. 63. 64. 179. 153. (17) §. 61. §§. 60. 36. 44. seqq. (18) §. 62. §. 60. (19) §. 179. §§. 154. 64. 65. 67. 156. 157. 158. 177. 178. 172. 173. 174. 70. 71. 153. (20) §. 153. §§. 152. 92. 123. 41. 37. (21) §. 154. §§. 153. 79. (22) §. 158. §. 67. (23) §. 178. §§. 158. 177. (24) §. 130. §§. 92. 88. 36. 124. 123. 116. 129. (25) §. 116. §§. 36. 37. 32. Denique si §. 836. evolveris, ibidem citatos reperies §§. 730. 219. 200. 41. 349. 225. 790. 519. 551. Si jam porro hos singulos evolvis, respondebunt (1) §. 730. §§. 249. seqq. 257. 180. 181. 182. 192. 193. 183. 153. 219. (2) §. 349. §§. 252. 254. 255. 256. 48. (3) §. 790. §. 717. & seqq. (4) §. 519. §§. 310. 518. (5) §. 257. §§. 215. 250. 251. 249. (6) §. 193. §§. 192. 64. 291. 66. 157. 173. 174. 91. (7) §. 183. §§. 45. 74. (8) §. 252. §§. 152. 200. 242. (9) §. 254. §§. 200. 154. 242. (10) §. 255. §§. 214. 213. 252. 37. (11) §. 256. §§. 152. 153. 294. 194. (12) §. 717. §§. 716. 535. 519. 547. (13) §. 310. §. 173. 175. 176. (14) §. 251. §§. 250. 237. 238. (15) §. 291. §§. 228. 290. (16) §. 294. §§. 287. & seqq. 207. 243. (17) §. 716. §§. 678. 710. 711. 712. 713. 714. 715. (18) §. 535. §. 110. (19) §. 175. §§. 65. 153. 79. (20) §. 176. §§. 157. 136. (21) §. 290. §. 37. (22) §. 287. §§. 200. 228. (23) §. 207. §§. 205. 204. 201. (24) §. 678. §§. 669. 80. 671. 54. (25) §. 710. §. 72. (26) §. 712. §§. 45. 72. 547. (27) §. 713. §§. 47. 712. (28) §. 715. §. 47. (29) §. 310. §§. 173. 175. 176. (30) §. 136. §. 34. *Log. & §. 4. Disc. pralim.* (31) §. 37. §§. 36. 34. (32) §. 201. §§. 40. 41. (33) §. 659. §. 200. 39. II. (34) §. 671. §§. 39. 88. (35) §. 54. §§. 44. 45. 46. (36) §. 40. §§. 39. 34. (37) §. II. §§. 8. 9. 2. 10. (38) §. 2. §. I. *Log. & 30. Disc. pralim.* Antequam igitur ea vi ad assensum compelli poteris juxta nostra principia, quam nos præbemus propositioni de *eliminatione superfluum ex definitionibus*, utique tibi perinde ac nobis perspecta atque familiaria esse debent, quæ §. 4 & 30. *Disc. pralim. & Log.* §§. I. 2. 4. 8. 9. 10. II. 32. 34. 36. 37. 39. 40. 41. 44. 45. 46. 47. 48. 54. 60. 61. 62. 63. 64. 65. 66. 67. 69. 70. 71. 72. 74. 79. 80. 88. 89. 90. 91. 92. 109. 116. 122. 123. 124. 129. 130. 136. 152. 153. 154. 155. 156. 157. 158. 172. 173. 174. 175. 176. 177. 178. 179. 180. 181. 182. 183. 192. 193. 194. 200. 201. 204. 205. 207. 213. 214. 215. 218. 219. 220. 221. 222. 224. 225. 228. 233. 235. 236. 237. 238. 242. 243. 248. 249. XXXX 2

250. 251. 252. 254. 255. 256. 257. 287. 290. 291. 294. 310. 346. 347. 348. 349. 518. 519. 535. 547. 551. 669. 671. 678. 710. 711. 712. 713. 714. 715. 716. 717. 730. 790. 836. continentur. Si vel unica definitio aut propositio, quæ in locis hic citatis reperitur, mihi perspecta non esset; ego veritatem ejus, cum qua nobis hic negotii est, non agnovissem, sed potius circa eam hæsissem assensum tamdiu suspendens, donec in notitiam ejus pervenissem, quod adhuc desiderabatur (§. 569.). Quamobrem nisi alios, qui nostra legunt, assensum præcipitare velim; nec ab iis jure requisivero, ut eundem propositioni nostræ præbeant adeo firmum ac immotum, qualem ego eidem præbeo, antequam singulas definitiones ac propositiones locis citatis repriendas sibi adeo familiares reddiderint, quales ego easdem experior. Magnum momentum in eo situm est, ut ad hæc attendamus. Quamobrem me non piguit non sine omni tædio conquirere loca, quæ ad gignendum assensum quicquam contribuerunt. Et sane inter eas rationes, quæ me permoverunt, ut veritates philosophicas inter se connecterem, non postrema hæc fuit, ut pateret attendentibus, quæ ratione gignatur assensus singulis propositionibus præbendus, idque, ubi opus fuerit, manifesta ratione doceri possit, quemadmodum hic a nobis factum. Fateor lubenter, non in omni casu assensum tot principiis niti, neque enim omnes propositiones adeo procul a primis principiis remotæ sunt: ingenue tamen profiteor, me hoc exemplum non studio elegisse, sed primum quærenti oblatum arripuisse, nec diffiteri possum, dari in aliis philosophiæ partibus (de Mathesi enim nemo idem ignorat, nisi qui in eadem aut penitus hospes, aut valde tyro fuerit) propositiones, quæ a primis principiis majore longe intervallo distantes multo majore principiorum apparatu indigent, antequam convictioni a priori detur locus. Ceterum cum non implicet, testibus exemplis, quæ Mathesis suppeditat, ut una eademque propositio diversis modis demonstretur; nec impossibile prorsus est, ut aliquis minore principiorum apparatu utatur ad assensum gignendum, quam alter. Quodsi aliquam operis *Newtoniani* de principiis philosophiæ naturalis mathematicis eodem, quo ante, modo ad principia sua revocare liberet, multo major evinceretur eorum cumulus, ut prorsus obstupesceret ad eorundem conspectum, qui ad talia animum nunquam advertit. Hæc probe notent velim, qui certam rerum cognitionem adeo facilem somniant, ut ei comparandæ lectionem fugitivæ oculo factum sufficere

ficere existiment & de conclusionibus remotis iudicium sibi sumant, principii nondum intellectis. Utile vero ipsis est ad sequentia quæ attendere.

## §. 993.

Quoniam assensus vi demonstrationis aut probationis probabilis extorquendus ab evidentia principiorum pendet, quæ successive perspecta familiaria sibi reddidit convincendus (§. 991.); evidens omnino est, *assensum non instanti, sed successive gigni, qui veritati propositionis demonstratæ, vel probabiliter evictæ præbendus.* *Assensus successive generatio.*

Ea de causa homines, qui intimiori Logicæ cognitione destituti eundem assensum in se in instanti gigni desiderant, quem in aliis nonnisi successive diuturno tempore ac labore genitum esse constat, simillimi mihi videntur ei, qui, ut puer ad staturam virilem unus diei intervallo excresecat, omnem illum cibum ac potum, quo per tot annos usus est alter, unico die ab eodem capi præciperet. Immo qui ignoratis principii assensum adeo firmum atque immortum expectant, qualem alter nonnisi illis debet, simillimi videntur ei, qui absque cibo ac potu solo aëre gula ingesto pueros in instantiadolescere posse sibi persuaderet. Quæ nonnisi successive ex aliis ante positis enascuntur, ea ut in instanti iis nondum positis enascantur desiderare velle summa profecto vesania est. Ceterum propositionis veritatem exemplo suo confirmant omnes, quotquot non sine successu in Mathesi pura versati sunt. Etenim singuli successive sibi familiaria reddiderunt principia & tum demum assensum firmum enatum esse compertisunt, ipsimet nihil ejus sentientes, dum enascebatur. Quodsi nemo hominum adeo temerarius tibi videatur, ut absque principii perspectis eundem sibi polliceatur assensum, quem alter nonnisiisdem debet; exempla non longe petenda sunt, quæ idem doceant. Nonne per longam annorum seriem tot inter eruditos circa systema terræ motæ, quod *Copernicanum* vulgo appellatur, Astronomis contradixere, quorum firmus adeo ac immotus assensus principii astronomici debetur ipsis parum intellectis? Nonne ideo *Copernicus* professus est, -se horum hominum iudicium tanquam temerarium rejicere, quod in se cadere posse assensum sibi persuaderent, qui non nisi multis Matheseos puræ, Opticæ atque Astronomiæ principii

successive progigni potest, etsi omnium illorum principiorum essent prorsus ignari?

§. 994.

*Quinam sit  
ad convin-  
cendum ido-  
neus.*

*Si quis vi demonstrationis veritatis, vel falsitatis alicujus propositionis, aut vi probationis probabilis probabilitatis ejusdem convincendus; in demonstrando, vel probabiliter probando jam aliquandiu versatus esse debet, donec demonstrationem, vel probationem probabiliter in dato casu agnoscere valeat.* Etenim qui vi demonstrationis ad assensum compelli debet, is formam demonstrationis non modo animo comprehensam habere, sed particularem quoque, quæ ipsi occurrit, generali convenientem agnoscere tenetur (§. 569.). Quoniam itaque formæ demonstrationis notionem ipso usu sibi comparat, qui in demonstrando aliquandiu versatur (§. 930.); nec eam sibi familiarem reddere atque facultatem in dato casu speciali eandem applicandi (§. 349.) conciliare valet nisi crebro exercitio, quo omnem habitum comparari constat, in casu dato demonstrationem agniturus, consequenter veritatis vel falsitatis propositionis convincendus, aliquandiu in demonstrando versatus esse debet, donec scilicet demonstrationem in casu dato agnoscere valeat.

Quoniam probatio probabilis a demonstratione non nisi principiis (§. 588.), adeoque forma non differt, quæ vero respectu convincendi de demonstratione jam evicta sunt, non demonstrationis principia, sed formam respiciunt; igitur patet eodem modo vi probationis probabilis probabilitatis propositionis convinci non posse nisi eum, qui in probabiliter probando tamdiu fuerit versatus, ut probationem probabilem in dato casu agnoscere valeat.

Ipso facto hoc experiuntur, qui ad Mathesin addiscendam animum appellant: ab initio enim vim demonstrationum minime percipiunt, donec aliquandiu in eadem versati & principia sibi familiaria reddiderunt, & formam demonstrationis animo comprehenderunt. Idem experiri licet in legendis scriptis nostris, in quibus for-



formam demonstrandi tenemus, quantum datur: quippe quæ eadem esse debet in probationibus quoque ceteris, quæ ex principiis nondum prorsus evidentibus construuntur. Unde in iis legendis minorem difficultatem sentiunt, qui in demonstrationibus Mathematicorum jam multum fuere versati. Immo hinc intelligitur ratio, cur in demonstrationibus ordinatis versati inordinatis fastidiant & repugnantiam quandam ad assensum hinc extorquendum in se experiantur. Non ignota mihi sunt exempla, quorum fide hæc refero. Conferenda hic sunt, quæ superius de demonstratione consummata & inconsummata (§. 859.) evicti dedimus.

## §. 995.

Quoniam nostra demonstrationum ac probationum analysis, quam in usum lectionis librorum dogmaticorum commendamus (§. 958.), formam demonstrationis in dato quolibet casu ipsis oculis spectandam quam distinctissime exhibet (§. 551. 552. 553. 559.) & Logica (§§. c. r.) eam distincte exponit; ut quis vim demonstrationis vel probationis probabilis facilius percipiat, nec in utraque agnoscenda fallatur, & genuinam demonstrandi formam ex Logica sibi cognitam atque perspectam reddere, & demonstrationes ac probationes probabiles in casu quocumque dato juxta eam resolvere debet.

*Quomodo ad  
convictionem  
facilem  
disponatur  
animus.*

Qui in Mathefi in demonstrationibus inconsummatis acquiescunt, nec genuinam demonstrandi formam animo distincte concipiunt, in disciplinis aliis sibi demonstrasse videntur, quæ a demonstratione quam longissime absunt. Ubi vero demonstrandi forma distincte fuerit exposita; ibi Autor non solum propositiones datas demonstrare valet, sed etiam demonstrare potest se demonstrasse. Non igitur verendum est, ne sibi pro propositione demonstrata, vel probabiliter probata venditari patiat, quæ nec demonstrata, nec probabiliter probata, quantum sufficit, ut assensum præbere possit.

## §. 996.

Quoniam vi demonstrationis vel probationis probabilis, quæ eandem cum ipsa formam tenet (§. 588.), convinci nequit, nisi qui aliquandiu in demonstrando fuerit versatus; studium Geometriæ jam ab antiquissimis temporibus philosophiæ serat

*Quid studi-  
um Geome-  
triæ huc con-  
ferat  
præ-*

*præmittendum esse judicarunt viri intelligentes, ita ut parum idoneus philosophiæ auditor habitus fuerit Geometriæ ignarus.*

Studium scilicet Geometriæ indispensabilis necessitatis ad philosophiam utiliter tractandam judicarunt philosophi veteres, non propter principia inde haurienda, sed propter methodum, cum ipsimet latis experirentur, inidoneum esse qui veritatis convincatur, ubi idem genuinam demonstrationis formam animo nondum comprehendit & eam in casu dato applicandi (§. 349.) habitu adhuc destituitur (§. 570.). Evidens vero est Geometriæ studio & formam demonstrationis animo comprehendendi (§. 930.), & eam applicandi facilitatem contrahi, cum omnis habitus crebro exercitio comparetur. Unde alibi (in continentatione de methodo mathematica Elementis Matheseos præmissa (§. 54.) jam monui, fructus hujus, quem ex studio Matheseos maximum percipere licet, participes non fieri, quotquot praxes quasdam mathematicas aliasque parum mathematici habentes, vulgo tamen ad eandem referri solitas addiscunt, cum neminem judicii acumine ac inveniendi habitu beent, nonnisi a seria demonstrationum meditatione expectando. Et quamvis hic philosophica scripta nostra eundem usum promittant (§. 597.); non tamen ideo Geometriæ studio valedicendum esse existimamus: etenim demonstrationes Geometriæ tyronibus captu faciliores sunt, quam philosophicæ, propterea quod Geometria beneficio figurarum ipsis oculis spectanda obijcit, quæ in philosophia ab imaginibus separantur. Huc accedit; quod notiones Geometriæ aliis non adeo implexæ sint, quemadmodum philosophicæ, quæ sensui vel imaginationi exhiberi nequeunt, nisi multis peregrinis admissis, sub quibus sapissime quasi sepulta sunt, quæ ad illas pertinent.

#### §. 997.

*Proposito  
convincendo  
quando ex-  
plicanda.*

*Antequam alterum veritatis, vel probabilitatis propositionis data convincas, eadem ipsi explicanda, nisi eam jam intelligat. Quodsi enim propositionem nondum intelligit, notiones non novit cum singulis verbis jungendas (§. 903.), consequenter vel definitiones, quas ipsum convicturus supponis (§. 910. 928.), vel experientias, quibus nitentur notiones confusæ verbis respondentes (§. 688. 689.), ignorat. Eum igitur convicturus vi demonstrationis, aut probationis probabilis eandem*

dem eo usque continuare debes, donec ad definitiones & experientias istas perveneris (§. 991.). Ab his igitur principiis cum exordiamur demonstrationem (§. 551. 552.), vel probationem probabilem (§. 588.); evidens est propositionem ante esse explicandam, quam alterum veritatis, vel probabilitatis ejusdem convincas (§. 910. 928. 906. 930. 932. & seqq.).

E. gr. Alterum convicturus veritatis propositionis (§. 950.), *inquirendum est, an in notarum numerum referantur, quæ per alias definitionem ingredientibus determinantur, & eadem ex definitione eliminande, antequam ea memoria mandatur, ubi eam non intelligit, explicandi sunt termini notarum, determinationis & definitionis.* Notarum ac definitionis dedimus definitiones (§. 79. 152.). Quamobrem per easdem propositio nostra explicanda (§. 904.). Determinationi non jungimus nisi notionem confusam (§. 63. & seqq. 219.). Exemplis adeo ab experientia alteri obvia petitis efficiendum, ut notionem confusam voci conjungendam consequatur (§. 88.). Equidem demonstratio propositionis præsentis ubi in prima principia resolvitur, a pluribus adhuc aliis definitionibus pender (§. 991.): enimvero ea non faciunt ad propositionem præsentem, sed ad alias intelligendas, quibus tanquam principiis utimur in præsentē demonstranda.

## §. 998.

*Qui convincendus est, eam afferre debet ad demonstrationem, attentio con-*  
*vel probationem attentionem, ut agnoscat nullum sumi principium, vincendi*  
*quod non sit certum, nec a forma demonstrandi vel probandi ab-* *qualis esse*  
*errari.* Convictus enim certus esse debet propositionem da- *debeat.*  
 tam esse vel veram, vel probabilem (§. 983. 984.). Enimvero veritatis propositionis demonstratæ certus esse nequit, qui præmissa vel unius syllogismos concatenatos ingredientis, adeoque vel unius principii demonstrandi (§. 561.), veritatem ignorat, nec perspicit, num forma demonstrationis præsentis sit genuina (§. 570.). Qui adeo convincendus est veritatis alicujus demonstrationis attendere debet, ut agnoscat, & nullum principium sumi, quod ipsi non sit certum, & formam demonstrandi esse genuinam.

Quoniam probatio probabilis non nisi principiis a demon-  
 (Wolff's Logica) Y y y stra-

stratione differt (§. 588.), quæ sunt præmissa probabiles (§. 587.), ut convincendus agnoscat, & formam probationis esse genuinam, & inter principia probandi sumi propositiones quasdam, quas probabiles esse novit; ea fini sufficiens attentio denuo afferenda.

§. 999.

*Medium illius assentionis.*

Quoniam adeo ad banc attentionem requiritur, ut & demonstrandi & probandi principia, & forma inprimis demonstrandi familiaria sint (§. 998.), utrumque autem nonnisi cum die, nec sine assiduo labore obtinetur, qui assentionem ad convictionem requisitam afferre vult, is & crebro demonstrandi exercitio, observata analysi nostra (§. 551. 552. 553.), formam demonstrandi, & successive crebra repetitione ac meditatione principia (§. 992.) sibi familiaria reddere debet.

Idem abunde patet a posteriori. Pone enim Titium principiorum Geometriæ prorsus ignarum incidere in Elementa Euclidis: quocunque duce is utatur, fieri tamen non poterit, ut ea utatur attentione, quæ sufficit ut veritatis ullius propositionis convincatur. Nisi igitur ab ovo, quod ajunt, elementorum ordinaris interpretationem, prætermisso nonnisi iis, a quibus demonstratio propositionis, cujus veritatis alterum convincere debes, minime pender, ac sufficiens alteri concedat temporis spatium, quo rite intellecta ruminari, concoquere atque in succum & sanguinem convertere valet; in eo convincendo oleum & operam perdes. Impossibile enim experieris, ut alter utatur attentione sufficiente. Idem experiri licet in scripto quocunque alio scientifico.

§. 1000.

*Assensus convicti qualis.*

Convictus non assentitur nisi propositioni sufficienter explicata & probata (§. 997. 985. & seqq. §. 991. 992.).

Quenam vero explicatio, quamnam probatio sit sufficiens, ex antecedentibus propositionibus abunde intelligitur. Unde convictio passive sumta definiri poterat per assensum, qui præbatur propositioni sufficienter explicata ac probata, nempe ideo, quod eam sufficienter explicatam ac probatam intelligimus, judicantes vel juxta notiones confusas, quas scriptorum scientificorum assidua tractatione nobis comparavimus, vel juxta notiones distinctas ex Logica hausas.

1001

§. 1001.

*Qui igitur assensum præbet propositioni nondum sufficienter Persuasionis explicatæ ac probatæ, is falso sibi persuadet se esse convictum (§. 505.) propositio*  
Unde persuasio passivè sumpta definiri potest per assensum, qui præbetur propositioni nondum sufficienter explicatæ ac probatæ, vel saltem non sufficienter probatæ.

Sufficiens nempè ratio ad assensum est, si & propositionem satis intelligimus, & eam certam esse agnoscimus. Illud obtinetur explicatione; hoc probatione sufficiente (§. 1000.): quamvis ex demonstratione propositionis de sufficiente explicatione ad convictionem requisita (§. 997.) pateat, sufficientem probationem absque sufficiente explicatione dari non posse, cum e contrario exemplum propositioni illustrandæ adjectum loquatur, propositionem sufficienter explicari posse, quantum scilicet ad eam intelligendam sufficit, quæ sufficienter probari nequit. Patet quoque ratio a priori, si notionem demonstrationis (§. 551. & seqq.) stabilitam cum theoremate (§. 903.) conferre valeamus, quod notionem propositionis intelligendæ exhibet.

§. 1002.

*Qui sibi persuadet se esse convictum, cum tamen convictus Ratione non sit; is vel ignorat, quanam ad convictionem requirantur, vel persuasionis ad principia ac formam demonstrationis, aut ad alterutrum horum non satis attendit.* Etenim qui ignorat, quanam ad convictionem requirantur; is judicare nequit, utrum in casu dato convictus sit, nec ne (§. 348.). Quodsi tamen ob probationem insufficientem, quam ob ignorantiam istam cum sufficiente confundit, propositio data eidem certa videtur; convictus sibi videtur, cum tamen non sit (§. 982.). Falso igitur sibi persuadet, se convictum esse ob ignorantiam eorum, quæ ad convictionem requiruntur. Quodsi ad principia atque formam demonstrationis non attendit, fieri potest, ut illa tanquam evidentia, hanc tanquam genuinam admittat, cum nec illa evidentia sint, nec hæc legitima. Falso igitur sibi persuadet, se convictum esse ex defectu attentionis (§. 570. 982.).

Non abfimili modo idem ostenditur, ubi de modo convincendi a posteriori sermo fuerit (§. 985. 986.).

Maxima pars eruditorum nullius fere veritatis convicta est, cum & propositiones universales non nisi per inductionem incompletam a posteriori inferant, & genuinam demonstrationis formam ne confuse quidem norint, cum ne unicuique quidem unquam expenderint. Hinc mordicus defendunt, quæ nec satis intelligunt, nec sufficienter probare valent. Ex defectu attentionis peccant etiam eruditi primi ordinis, vel quod in sola notione formæ demonstrandi confusa acquiescant, neglecta distincta ex Logica haurienda, vel quod sine probatione admittant, quæ probari debebant.

§. 1003.

*Præcipientia in judicando.*

Actus assentiendi propositioni nondum sufficienter probatæ ac explicatæ dicitur *præcipientia in judicando*.

Persuasio nimirum cum præcipientia in judicando conjungitur. Scilicet qui judicium *præcipitat*, aut *deproperat*, is propositionem pro vera, vel falsa, vel probabili, vel minus probabili habet, antequam sufficienter fuerit explicata, ut eam satis intelligat, vel sufficienter probata, ut de veritate, falsitate & probabilitate judicium fieri possit. Pro vera igitur habet, vel falsa, vel probabili, vel minus probabili, quam veram, falsam, probabilem, vel minus probabilem nondum agnovit. Atque ea de causa sibi persuadet, se esse convictum, cum tamen convictus nondum sit. Oritur adeo persuasio, dum assentimur propositioni nondum sufficienter probatæ ac explicatæ. Actus ille assentiendi est præcipientia in judicando, ipse autem assensus illi datus constituit definitionem persuasionis geneticam. Ceterum quid sit assensus, distincte in Psychologia exposituri sumus. Sufficit hic obiter monuisse, nos per *assensum* intelligere judicium de veritate, falsitate & probabilitate propositionis. Unde patet, assensum minus fallacem secundum regulas logicas oriri debere, vi quarum certum de veritate, falsitate & probabilitate propositionum judicium formatur. E. gr. Si quis de veritate vel falsitate propositionis, quod *Deus condiderit mundum optimum*, judicium sibi sumit, antequam cognovit, quid termino *mundi optimi* indigetur, eamque falsim pronunciat, probatione ex attributis divinis deducta nondum expensa; is judicium suum de falsitate propositionis hujus deproperat & ob rationculas aliunde conquisitas, veluti quod malum physicum & morale insint huic mundo, sibi per-

persuadet, se esse convictum falsitatis propositionis, cum tamen convictus non sit, propterea quod precario sumit, *mundum non esse optimum, in quo malum physicum ac morale extat*, & in notione confusa mundi optimi acquiescens contradictionem inter notionem mundi optimi & existentiam mali physici ac moralis ostendere nequit: unde tamen falsitas propositionis evidenter agnoscenda (§. 527.).

## §. 1004.

*Rationes assensus ex notione subjecti desumptæ dicuntur intrinsecæ; quæ vero aliunde petuntur, extrinsecæ.*

E. gr. Si quis ob æqualitatem laterum atque angulorum largitur, figuram regularem circulo inscribi posse; is propositioni, quod *figura regularis sit circulo inscriptibilis* assentitur ob rationes intrinsecas. Si quis vero tæetur, *non plures dari lineas curvas primi generis, quam sectiones cónicas*, propterea quod unanimi Geometrarum consensu idem affirmatur; is assentitur asserto Geometrarum ob rationem extrinsecam.

*Rationum intrinsecarum & extrinsecarum definitio.*

## §. 1005.

*Rationes intrinsecæ eadem sunt, ob quas prædicatum subjecto convenit.* Quoniam in propositione categorica prædicatum de subjecto enunciatur, nulla conditione adjecta (§. 216.); in hypothetica autem sub adjecta conditione (§. 218.); omnis propositio vel categorica est, vel hypothetica. Jam in propositione categorica prædicatum subjecto tribuitur sub conditione definitionis (§. 225.), in hypothetica vero propter subjecti determinationem (§. 223.), adeoque vel propter modos, vel res quasdam extrinsecas (§. 229.), a quibus scilicet actus ejus, quod inest subjecto, determinatur. Ratio igitur, cur prædicatum subjecto convenit, in categoricis a definitione; in hypotheticis a definitione & determinatione subjecti (§. 4. *Discurs. Prelim.*), consequenter in utroque casu a notione subjecti (§. 34. 152.) petitur, atque adeo intrinseca est (§. 1004.). Patet adeo rationes intrinsecas easdem esse, ob quas prædicatum subjecto convenit, vel per quas prædicatum determinatur.

*Rationes intrinsecæ quales sunt.*

E. gr. Ratio intrinseca, quod figura regularis intelligatur circulo inscriptibilis, est æ qualitas angularum & laterum (*not. 1004.*): sed eadem est ratio, cur figura regularis circulo inscribi possit. Tolle enim vel iterum, vel angularum æqualitatem, ut alterutra saltem ponatur, nec amplius figura circulo inscriptibilis intelligetur. Similiter ratio intrinseca, unde intelligitur, quod Deus considerit mundum optimum, derivatur ab attributis divinis & a fine, quem iis convenienter per creationem intendit Deus; sed eadem sunt rationes, ob quas mundum optimum condidit. Pater adeo, eum, qui ob rationes intrinsecas propositioni datus essentitur, ob easdem ei assentiri rationes, ob quas prædicatum subiecto tribui debet, seu quibus positus ponendum quoque est prædicatum.

## §. 1006.

*Assensus vi demonstrationis extortus rationibus.*

*Si quis vi demonstrationis convincitur, is assentitur ob rationes intrinsecas.* Etenim in demonstratione rationes, cur prædicatum conveniat subiecto, ex ipsa subiecti notione desumuntur (§. 551. 552.); nec minus inde petuntur rationes, cur prædicatum subiecto repugnet (§. 553.). Rationes vero, quæ ex notione subiecti desumuntur, intrinsecæ sunt (§. 1004.). Assensus adeo vi demonstrationis extortus intrinsecis nititur rationibus.

Quoniam in Mathesi, præsertim pura, demonstrationibus assensus extorquetur; ideo is ibi non aliis nititur rationibus, nisi intrinsecis, ubi demonstrationum vim perceperis. Qui vero demonstrationes insuper habent, vel in historica propositionum mathematicarum notitia acquiescentes, vel examina seu demonstrationes mechanicas demonstrationibus substituentes, vel fide Autorem nitentes; illi rationes intrinsecas non perspiciunt, neque adeo per easdem gignitur eorum assensus. Similiter nos in philosophia operam damus, ut assensus per rationes intrinsecas extorqueatur, qui firmior atque magis immotus est altero, qui rationibus extrinsecis quibuscunque debetur. Quod tamen quis nostra legens ad rationes, quibus nituntur propositiones, non attendit, historica earum cognitione contentus, vel, quod per exempla, quibus eadem illustrantur, earundem veritas ipsi videatur manifesta, rationum discussionem superfluum iudicans; in eo non gignitur assensus per rationes intrinsecas, saltem non per distincte intellectas, si vel maxime concedas exempla



pla illustrandæ propositionis gratia allarâs rationes intrinsecas confuse repræsentare. Nobis cum distincta cognitione negotium est, non cum confusa.

## §. 1007.

*Si quis subjecti notionem nonnisi confusam habet, is prædicatum eidem tribuere nequit, nisi ob rationes extrinsecas.* Etenim si notionem subjecti nonnisi confusam habet, judicia intuitiva inde formare nequit (§. 724. 725.), consequenter, cum ab iis demonstrationem ordiri teneatur demonstraturus vi notionis subjecti prædicatum eidem tribui debere (§. 551. 552.), demonstrare haudquaquam valet, in propositionibus categoricis vi definitionis, in hypotheticis vi definitionis ac determinationis prædicatum subjecto convenire. Fieri adeo nequit, ut prædicatum subjecto convenire agnoscat ob rationes intrinsecas (§. 1004.). Ergo ob intrinsecas idem eidem tribuere debet (§. cit.).

*Assensus quando rationibus extrinsecis nitatur.*

Experientia veritatem propositionis abunde confirmat. Cum enim notiones distinctæ extra Mathesin adhuc raræ sint; tantum non omnes ad rationes extrinsecas confugere videas, quotiescunque probari debet subjecto dato prædicatum datum convenire, v. gr. quod sit experientiæ consentaneum, quod viri docti unanimiter idem affirmant, quod nitatur unanimi omnium gentium consensu, quod simile quid obtineat in casu simili, quod contrario hoc vel istud ob stare videatur. Nos igitur omnem movemus lapidem, ut in philosophia ex rationibus intrinsecis ratiocinemur, quemadmodum in Mathesi hætenus moris fuit, nec principiis extrinsecis concedamus locum, nisi ubi probabilitati, in præxi præsertim vitæ, litandum.

## §. 1008.

*Si quis ignorat principia vel formam demonstrationis, is Alius casus. prædicatum subjecto tribuere nequit, nisi ob rationes extrinsecas.* Etenim si principia, vel formam demonstrationis ignoret, utut vel maxime subjecti notionem distinctam habuerit, impossibile tamen est ut demonstrationem actu condant, vi cuius evincitur, in notione subjecti contineri, per quæ prædicatum eidem tribuendum determinatur (§. 551. 552.). Certus adeo esse nequit,

ob

ob notionem subjecti prædicatum eidem convenire (§. 570.), consequenter rationes, ob quas idem eidem tribuit, aliunde petere debet. Tribuit itaque prædicatum subjecto ob rationes extrinsecas (§. 1004.).

Idem perinde experientia confirmat. Etenim demonstrandi principia sunt definitiones & propositiones determinatæ (§. 562.), quippe quæ sola demonstrari possunt (§. 551. 552. 320.). Definitiones autem, quæ nomen suum tueri possunt, atque propositiones determinatæ raræ sunt hætenus extra Mathesin. Quamobrem non modo demonstrationes, verum etiam probationes probabiles, quæ nomen suum tueri possunt, extra eandem rarissimæ sunt. Ceterum patet hinc ratio, cur nos in philosophia definitiones ac propositiones determinatas introducere studeamus.

## §. 1009.

*Quomodo præcipitantia in iudicando evitetur.*

*Præcipitantiam in iudicando evitaturus assensum tamdiu suspendere debet, donec vel a posteriori, vel a priori veritatis, aut falsitatis, aut probabilitatis fuerit convictus.* Etenim qui assensum tamdiu suspendit, donec vel a posteriori, vel a priori, aut veritatis, aut falsitatis, aut probabilitatis propositionis data fuerit convictus, is non assentitur nisi propositioni penitus intellectæ & cuius veritatem agnoscit, (§. 987. 990. 997.), adeoque nonnisi sufficienter explicatæ ac probatæ. Præcipitantiam itaque in iudicando omnem evitat (§. 1003.). Patet adeo, quod eam evitaturus assensum tamdiu suspendere debeat, donec fuerit convictus.

Hoc medio utuntur Mathematici ad præcipitantiam in iudicando evitandam: vulgo autem iudicium tantum non semper præcipitatur

## §. 1010.

*Discussio ad præcavendum præcipitantiam in iudicando necessaria.*

Quoniam a posteriori convincendus res ipsas præsentés intueri & rerum practicarum veritatem a posteriori in se ipso experiri (§. 985.) & in dato casu regulas ad notionés, definitiones ac propositiones determinatas eruendas præscriptas applicare debet (§. 986.), aut ubi res præsentés coram intueri non datur, auctoritatem observatoris juxta regulas fidei examinandam stabilire

bilire (§. 988.); qui autem a priori convincendus, & demonstrationes ac probationes probabiles ad prima sua principia revocare (§. 991.) & habitu demonstrationem ac probationem probabilem in dato casu agnoscendi pollere debet (§. 994.): igitur apparet, *quam discussione opus sit, nisi assensum præcipitare volueris, vel a posteriori, vel a priori instituenda.*

Hac ratione sati fecimus regulæ, quam *Cartesius* ad evitandum præcipitantiam in judicando inculcat, qui *de iis omnibus dubitare nos jubet, in quibus vel minimum incertitudinis suspicionem reperimus.* Et enim jam constat, unde appareat, nullam amplius incertitudinis suspicionem superesse. Et quoniam studio Geometriæ ad convincendum idonei reddimur (§. 996.); igitur jam patet, cur in Mathematicis non sine successu versati præcipitantiam in judicando rectius evitent alijs, qui in eadem sunt hospites. Nec minus speramus fore ut nostra methodo philosophaturi in posterum non adeo per præcipitantiam statuam, quam vulgo fieri solet.

## §. 1011.

*Præjudicium* appellatur iudicium erroneum per præcipitantiam latum. Unde patet *modus præjudicia evitandi*, scilicet *si non ante judicemus, quam vel a posteriori, vel a priori veritatis, aut falsitatis, aut probabilitatis fuerimus convicti.*

*Præjudicium definitio & modus, id evitandi.*

Non multum adeo laborandum est de evitandis præjudicijs. Opera danda est cognitioni rerum solidæ, ubi assensus non præbetur nisi sufficienter explicatis & probatis: hoc ipso præjudicium quodvis declinatur. Docet idem praxis Mathematicorum, qui vi demonstrationis solius in Mathesi pura, vi observationis exactæ demonstrationi junctæ in mixta præjudicia felicissime evitant de iis evitandis parum cogitantes. Quamobrem nos quoque de præjudicijs non longam institumus tractationem.

## §. 1012.

Quoniam de multis judicare solemus, antequam a posteriori iudicia universalia (§. 705. 706.) atque notiones universales, & definitiones imprimis (§. 708.) formare, nec non demonstrationem, vel probationem probabilem agnoscere didicerimus, prout in vulgus constat; regulis tamen istis ignoratis (*Wolffii Logica*)

Zzz z

(§. 986.)

*Examen eorum, quæ didicimus, antequam ad convincendum idonei fuimus.*

(§. 986.), nec forma demonstrationis ac probationis probabilis adeo familiari, ut eam in casu dato agnoscere nobis detur (§. 994.), convictioni locus nullus est; evidens est nos de multis judicare, antequam convicti esse possimus veritatis, falsitatis, vel probabilitatis propositionis alicujus data, consequenter antequam propositio sufficienter nobis fuerit explicata & probata (§. 987. 997.), atque adeo per præcipientiam (§. 1003.).

*Quamobrem ubi judicia universalia & notiones universales cum definitionibus a posteriori formare & formam demonstrationis in dato casu agnoscere didicimus, judicia omnia, quæ memoriæ mandavimus, ad examen revocanda, ut veritatis, falsitatis vel probabilitatis eorum convincamur.*

Hoc examine non modo opus habent ex veritatibus cognitis alias incognitas eruturi, ne præjudiciis a cognitione veri avertamur; verum etiam eas ad praxin vitæ translaturi, ne eventu, quem speramus, destituamur. Ceterum, quæ hic inculcamus, eadem sunt cum regula Cartesii Princip. Philos. part. I. §. 1. qua præjudiciis ante integrum rationis nostræ usum conceptis liberandos semel in vita de omnibus dubitare jubet, in quibus minimam incertitudinis suspensionem reperimus, nisi quod nos more nostro magis determinate singula enunciamus, ne per præcipientiam statuentes nos jam integrum rationis nostræ usum possidere, nec in iis, quæ subincudem denao revocavimus, minimam amplius incertitudinis suspensionem reperire, in nova præjudicia irruamus, dum veteribus animum exuere studemus. Monui jam superius (not. §. 994.), a tyronibus Matheſeos initio vim demonstrationum non percipi, donec aliquandiu in eadem versati & principia sibi familiaria reddiderunt, & formam demonstrationis animo comprehenderunt. Quamobrem ubi Matheſi operam navantes animadverterint, se ad eum statum pervenisse, omnem demonstrationum seriem ab ovo ordiri debent, ut veritatis propositionum omnium, quas memoriæ mandarunt, convincantur atque adeo certi fiant, se nullo prorsus præjudicio teneri, quo ad errores seduci & a veri cognitione averti queant. Idem quoque sibi notent velim, qui ad nostra legenda animum appellant, ut certam rerum cognitionem inde consequantur.

## §. 1013.

Cum vel experientia constet, viros etiam in arte sua præclaros subinde errare; a veritate aberrat, qui simpliciter sumit vera esse, quæ a viro in arte sua præclaro affirmantur; falsa, quæ ab eodem negantur. Quoniam iudicium hoc per præcipientiam formatur (§. 1003.); in præjudiciorum numero habetur (§. 1011.). Solet autem præjudicium autoritatis appellari: ut adeo *Præjudicium autoritatis* sit iudicium, quo vera esse statuiamus, quæ ab altero affirmantur, vel falsa, quæ ab eodem negantur, propterea quod nobis constet, ipsum eadem affirmare, vel negare. Et hinc in casu particulari ex *præjudicio autoritatis statuere* dicimur, cujus non aliam reddere noverimus rationem, quam quod alter idem affirmet, vel neget, quem verum a falso discernere eo in casu posse sumimus.

E. gr. Si quis rationem sphaeræ ad cylindrum circumscriptum ut 2 ad 3 sumit veram, propterea quod norit, *Archimedes* ejus inventorem celebrari & hoc suum inventum tanti fecisse, ut idem tumulo suo inscribi jusserit; is ex præjudicio autoritatis de theorematibus geometrici veritate statuit. In cognitione probabilis, qua in praxi vitæ sæpissime carere non possumus, argumento quoque ab autoritate petito locus est: unde enatum illud pervulgatum, *artifici in arte sua esse credendum*. Sed quatenus eodem uti possimus, ne præcipienter judicemus & præjudicio autoritatis obnoxii reddamur; in Logica probabilium doceri debet. Multa in Logica probabilium probantur alio fine, quæ in Logica demonstrativa sine itidem alio rejiciuntur. Vulgus subinde in negotiis vitæ humanæ obviis non male utitur principiis Logicæ probabilium, quæ in disciplinis perperam applicantur ab iis, qui demonstrativam cognitionem cum probabilis confundunt. E. gr. In probabilibus stabiliendis plures probationes conjunctæ efficacius probant, quibus singulis sigillatim sumtis tanta vis ad inclinandum assensum non inest, & rationi intrinsecæ incompletæ pondus aliquod ab extrinseca accedit; ast demonstratio una ad convictionem plenariam sufficit, nec ab alia quidpiam ponderis superaddi potest. Hæc & alia ex notione probabilis a nobis data (§. 578.) demonstrari poterant, nisi ad aliud forum spectarent. Sufficit hic notasse, cognitionem demonstrativam

a probabili in omni casu esse distinguendam, ne utriusque leges inter se confundentes in *præjudicia methodi* incidamus.

## §. 1014.

Medium  
avertendi  
præjudicium  
autoritatis.

*Ne in præjudicium autoritatis proni simus, notandi sunt lapsus virorum præclarorum, immo eximiorum artificum in ipsa arte sua.* Etenim cum hac ratione appareat, fieri posse, ut in errorem incidant, quorum magna alias esse solet autoritas; ipso opere intelligimus, quod autoritati alterius parum tuto fide re liceat.

Quoniam vero omne præjudicium evitatur, ubi nihil per præcipitantiæ statuitur (§. 1011.); igitur a præjudicio quoque autoritatis semper erit procul remotus, qui assensum tamdiu suspendens, donec vel a posteriori, vel a priori veritatis, aut falsitatis, aut probabilitatis fuerit convictus, quæ fide aliorum tenet, in medio relinquit (§. 1009.).

Mathematici a præjudicio autoritatis alieni sunt, propterea quod non cedere adfuerit nisi demonstrationibus. Dum certæ rerum cognitioni inhiant eamque a minus certa distinguere didicerunt, præjudicium autoritatis veluti sponte sua evanescit. Cum nobis in more positum sit veritatem quoque philosophicam rationibus intrinsicis stabilire; illos, quos nostra juvant, a præjudicio autoritatis immunes experimur, utut de eo exuendo nunquam cogitarunt.

## §. 1015.

Præjudici-  
um nimie  
confidentie  
& ejus spe-  
cies quædam  
singularis.

Judicium erroneum de viribus propriis ad veritatem cognoscendam sufficientibus *præjudicium nimie confidentie* dicitur. Species hujus præjudicii est, quod viris doctis primi ordinis familiare esse solet, quasi vires sufficiant veritatem beneficio notiorum confusarum perspicendi, aut iis saltem subinde in demonstrationes admissis, neglecta accuratiori analysi, qualem supra commendavimus (§. 958.).

Præjudicium nimie confidentie affine est præjudicio autoritatis. Quemadmodum enim hoc plus tribuitur alienis viribus, quam par erat, ita illo de viribus propriis plus speratur, quam in iis est. Quoniam deinceps de viribus ad veritatem cognoscendam requisitis et instituto agemus; hujus quoque præjudicii ratio ac modus idem eviran-

evitandi clarius patebit. Ceterum viri magni, multiplici casu edocti, quod, quæ in notionibus confusis veluti per transennam videntur, accurata discussione facta vera deprehenderint, hanc tanquam superfluum tandem insuper habent & ad eam impatientes evadunt. Unde in errores incidere solent, quos evitare utique fuerat in ipsorum potestate. Optandum itaque foret, ne accurata analysis demonstrationum, quæ in distincta ratiociniorum evolutione & logicorum examine consistit, inter exercitia juvenilia, vel prorsus puerilia rejiceretur! Sed plura eam in rem, quemadmodum modo monuimus, dicemus deinceps.

§. 1016.

*Ne in præjudicium nimiae confidentiæ sumus proni, considerandi sunt lapsus non modo nostri similibus, sed aliorum etiam, qui nostri ingenio, acumine ac aliis animi dotibus vincunt, quarum in veritate pervestiganda usus est.* Ita nimirum ipso opere convincemur, quam facile falli possit, qui exacta notionum discussione neglecta per præcipitantiam judicare sibi sumit. *Medium illud declinandi.*

Non inutile itaque est, si in rationes lapsus virorum præclarorum inquiramus, ut appareat, quomodo in errores inciderint, quos evitare potuissent, modo attentione sufficiente uti ipsis datum fuisset. Ex alieno casu discere, quæ vites, prudentis est; sed viris præclare meritis errores, quos commiserunt, in opprobrium vertere, levis animi indicium. Ceterum cum præjudiciorum fons sit, quod homines de viribus vel propriis, vel alienis plus sperent, quam in iis est; sequens de iisdem tractatio maximo erit adjumento ad quodvis præjudiciorum genus feliciter fugandum.

## CAPUT II.

## DE MODO ALIOS REFUTANDI.

§. 1017.

**A**lium *refutare* idem est ac demonstrare falsitatem propositionis, quam is pro vera habet. Ipsa quoque *propositio*, cujus falsitas demonstratur, *refutari* dicitur. *Refutatio nis definitio.*

Zzz 2 3

E. gr.

E. gr. Ante usum telescopii ipse *Keplerus* in Paralipomenis ad *Virellionem* p. 261. 262. Veneri ac ceteris planetis nativum tribuit lumen. Quodsi quis ex observationibus phasium Veneris ac Mercurii & utriusque transitu per Solem demonstrat, planetas hosce omni lumine proprio destitui & hinc falsitatem sententiæ *Keplerianæ* concludit (§. 532.); is & *Keplerum*, & sententiam *Keplerianam* de lumine Veneris ac ceterorum planetarum nativo refutasse dicitur.

## §. 1018.

*Impugnatio-  
nis definitio.*

*Alterum impugnare* dicitur, qui insufficienter probat falsitatem propositionis, quam is pro vera habet. Ipsa quoque *propositio*, cujus falsitas insufficienter probatur, *impugnari* dicitur.

E. gr. Si quis *Kepleri* sententiam falsam esse probaturus provocat ad Lunam planetarum unum, & hinc infert, ceteros quoque planetas nonnisi mutuatitio lumine splendere debere; is insufficienter probat falsitatem ejusdem, atque adeo eam perinde ac ipsum *Keplerum* impugnasse, nequaquam vero refutasse dici potest. Ita qui mihi adversantur, sententias quasdam meas impugnarunt, minime autem refutarunt, cum nullius falsitatem demonstrare potuerint, sed ad demonstrandum provocati non comparuerint. Equidem vulgo *notiones* refutationis & *impugnationis* inter se confundunt; sed male: eas enim plurimum a se invicem differre ipsa definitionum collatio manifestat. Parebit etiam ex sequentibus, non inutile esse, ut discrimen notetur. Philosophi vero est *notiones* diversas in usum futurum a se invicem discernere.

## §. 1019.

*Quanam  
propositiones  
refutari,  
quam im-  
pugnari por-  
sint.*

*Propositio vera impugnari, non refutari; falsa & impugnari, & refutari potest.* Pone enim propositionem veram refutari posse. Ergo demonstrari potest eam esse falsam (§. 1017.): quod cum hypothese in evertat, absurdum est.

Quodsi propositionem quandam falsam precario sumis tanquam principium probandi & probatio insufficientis erit (§. 843.), & conclusio falsa, seu veræ contraria (§. 529.), inde inferri potest (§. 538. 539.). Vera igitur propositio impugnari potest (§. 1018.).

Cum



Cum demonstrari possit vel per indirectum (§. 553.) propositionem aliquam esse falsam, vel directe (§. 551. 552.) contrariam falsam esse veram; propositio falsa refutari potest (§. 1017.).

Quoniam vero demonstrandi habitu non pollens insufficiens probat, quod demonstrari non repugnat; ideo propositio falsa impugnari quoque potest (§. 1018.).

E. gr. Nemo refutare potest theorema elementare, quod *parallelogramma super eadem basi & inter easdem parallelas constituta aequalia sunt*, cum illud verum esse vi demonstrationis pateat. Tyro tamen Geometriæ, vel in eadem hospes idem impugnare posset. Enimvero falsum est *cibum in ventriculo vi triturationis digeri*. Hypothesis itaque triturationis & refutari, & impugnari potest. Refutatur e. gr. si absque trituratione pisces minores a majoribus deglutitos digeri observatione clara eviceris: impugnatur, si objeceris, ossa a canibus devorata esse duriora, quam quæ trituratione seu motu ventriculi digeri possint. Quamprimum ergo constiterit propositionem aliquam esse veram, eo ipso liquet eandem a nemine unquam refutatum iri, cum nullus facere possit, quod est impossibile.

## §. 1020.

Quoniam propositio vera impugnari tantum potest nequaquam autem refutari (§. 1019.), ubi veritatis ejus vel a posteriori (§. 987.), vel a priori (§. 990.) fueris convictus, hoc ipso certus es, antagonistas eam tantummodo impugnasse, minime autem refutasse, utut eorum scripta non videris.

Ita e. gr. qui elementorum *Euclidis* veritatem cognovit, non assensum præbebit asserenti, quod elementa *Euclidis* a *Ramo* in scholis mathematicis sint refutata, utut *Rami* librum nunquam viderit. Nec eum per præcipitantiam judicare, quod *Ramus* elementa *Euclidis* tantum impugnaverit, per propositionem præsentem manifestum est. Nemo similiter conceder, hostes religionis christianæ refutasse scripturam sacram, utut eorum scripta ipse non perlustraverit, propterea quod illam verbum Dei esse agnoscat, refutari nescium.

Quando constat adversarium non refutasse propositionem datam, non viso ejus scripto.

## §. 1021.

*Siquis ad refutationem eam attentionem offert, quæ ad Quando refutatus er-*

*rorem agnoscat.* convictionem requiritur; is errorem a se commissum agnoscit. Quoniam refutatio est demonstratio falsitatis propositionis, quam alter pro vera habet (§. 1017.), qui ad refutationem eam affert attentionem, quæ ad convictionem requiritur, is eam afferre debet, quam convincendus affert ad demonstrationem, consequenter quæ sufficit ut agnoscat, nullum summi principium, quod non sit certum, nec a forma demonstrandi aberrari (§. 998.). Certum adeo ipsi est, falsam esse propositionem, quam pro vera habuerat (§. 569.), consequenter se errasse agnoscit (§. 623.).

Inde est, quod Geometra refutationi cedat, nec errorem agnitum defendat, sed corrigat. Ceterum cum agnitione erroris minime confundenda est ejus professio, cum non una ratio esse possit, cur errorem agnitum confiteri nolint refutati. Nemo tamen alterum pertinaciz in errore defendendo arguere valet, nisi ubi demonstrare potuerit, se alterum non modo impugnasse, sed confutasse, & eum ad refutationem attulisse attentionem, quæ ad convictionem requiritur. Secus qui faciunt, per præcipitantiam statuunt aut nimis gloriose sese, aut inique de aliis sentientes, aut utroque vitio præditi.

## §. 1022.

*Quanam demonstratio conveniat refutationi.*

Quoniam refutatio erroris admissi demonstratio est (§. 1017.), demonstratio autem indirecta (§. 557.) perinde ac directa (§. 544.) veritati stabilien-  
*veritati stabilien-  
dæ sufficit; in refutatione non minus locus est demonstrationi indirectæ, quam directæ.*

E. gr. Si quis affirmet, *Venerem esse corpus lucidum*, & tu indirecte demonstres, *eam esse corpus opacum*, cum hoc ipso appareat *eandem non esse corpus lucidum* (§. 530.), in illo refutando directa uteris demonstratione. E contrario si indirecta demonstratione ex ea propositione, *Venus est corpus lucidum*, deducas, quod observationi repugnet, v. gr. quod nullas admittat luminis crescentis vel decrescents *phasen* instar lunæ; in eodem refutando ad demonstrationem indirectam confugis.

## §. 1023.

*Differentia refutationis directæ ab indirecta*

*Directa* igitur seu *ostensiva refutatio* est, quæ nititur demonstratione directa seu ostensiva. Contra *indirecta* seu *apologica*

*gogica refutatio est*, quæ absolvitur demonstratione indirecta seu apogocica.

Exempla modo (not. §. 1022.) allata differentiam utriusque refutationis illustrent.

§. 1024.

Si demonstratio, qua nititur refutatio, sive ostensiva, sive apogocica, contextitur ex aliis propositionibus ac definitionibus tanquam suis principiis (§. 562.), *refutatio* dicitur *a priori*. Quodsi vero supposita generali Logicæ demonstratione propositioni refutandæ opponitur observatio, vel experimentum, seu experientia contraria, *refutatio a posteriori* vocatur.

*Differentia inter refutationem a priori & a posteriori.*

Utriusque discrimen mox clarius patebit ex iis, quæ de utroque refutandi genere in medium afferemus, ut adeo nullis hic opus sit exemplis.

§. 1025.

Quoniam impugnatio a refutatione nonnisi forma differt scilicet quod illa probatione insufficiente, hæc demonstratione nitatur (§. 1017. 1018.), probatio autem insufficientis a demonstratione principiis differt (§. 588.), scilicet quod hic non admittantur nisi certa (§. 562. 567. seqq.), ibi vero etiam precaria sumantur (§. 843.), adeoque incerta (§. 569. 564.); *nullum sane superest dubium, quin eadem differentia inter impugnandi diversos modos intercedat, quæ inter modos refutandi diversos obtinet.*

*Impugnatio nem eodem modo differre, quo refutatio differt.*

Idem liquet a posteriori, si modos ad examen revocare libuerit, quibus usi sunt auctores aliorum dogmata, vel hypotheses impugnantes.

§. 1026.

Est itaque *Impugnatio* alia *directa*, sive *ostensiva*, quæ nititur probatione directa, utut in sufficiente, ea scilicet, quæ servat formam demonstrationis directæ. Contra *impugnatio indirecta*, sive *apogocica* est, quæ nititur probatione insufficiente indirecta, ea scilicet, quæ formam demonstrationis apogocicæ servat. Unde ulterius intelligitur, quando *impugnatio a priori* fiat, quando *a posteriori* in utroque casu (§. 1024.).

*Impugnatio nis differentia.*

(Wolfii Logica)

A a a a a

§. 1027.

## §. 1027.

Cur propositio explicanda, antequam refutetur vel impugnatur.

*Antequam propositio refutetur vel impugnetur, eadem explicanda est, nisi sensus fuerit manifestus.* Etenim propositionem refutaturus demonstrare intendit, eam esse falsam (§. 1017.), consequenter prædicatum subiecti notioni repugnare (§. 526.) atque adeo, quæ in notione prædicati continentur, salva notione subiecti eidem convenire non posse (§. 310.). In notiones adeo subiecti atque prædicati inquirere debet, nisi satis manifestum fuerit, quas cum terminis istis jungit Auctor, antequam refutationem aggredi possit, atque adeo propositio explicanda (§. 117.).

Quoniam propositionis impugnatio a refutatione non differt, nisi quod refutator demonstratione, seu probatione sufficiente, impugnator insufficiente utatur (§. 1017. 1018.); facile patet, nec impugnari posse propositionem, nisi ante explicatam.

E. gr. Si quis refutare voluerit hypothesein vulgarem, quod *Sol spatio diurno circa Terram quiescentem revolvatur*, explicatione nulla opus est, cum notio complexa eidem respondens obvia sit & in vulgus nota. Enimvero si quis impugnare voluerit dogma Theologiæ naturalis, quod *Deus condiderit mundum optimum*, in notionem mundi atque mundi optimi inquirere debet, ex intentione auctoris affirmativam tuentis terminis istis jungendam, cum uterque terminus nondum admittat significatum determinatum communiter receptum.

## §. 1028.

Cur & quomodo explicatio demonstranda.

Quoniam is, qui alias cum terminis notiones jungit quam auctor, quem impugnandum sibi sumsit, sensum fingit a mente ejus alienum (§. 120.), nec ipsius placita impugnat, vel refutat, sed alia ab iis diversa (§. 323. 324.); *ab impugnando vel refutando altero tamdiu desistendum, donec demonstraveris hunc, non alium esse verborum ipsius sensum*, principiis scilicet supra positis (§. 904. & seqq.) ad casus datos applicatis (§. 348.).

Exemplum dedimus in superioribus (not. §. 120.), quod huc trahi potest. Cum in scripto scientifico propositiones omnes per definitio-

nes auctoris explicandæ sint (§. 910.), omnium facillime hic demonstrari potest, hunc, non alium esse verborum ipsius sensum. Vide, quæ supra (not. §. 910.) illustrationis gratia dicta sunt. Plurimæ inter eruditos lites cessarent, nisi in regulam præsentem impingeretur.

## §. 1029.

Impugnatio propositionis, cui respondentem notionem *Logomachia* veram agnoscit impugnans, sed quam ipse aliis verbis exprimit, *definitio*. *L. gomachia* dicitur.

Si quis impugnat propositionem, quod *Deus mundum optimum condiderit*, & tamen admittit, *Deum condidisse mundum fini a se intento*, scilicet gloriæ suæ illustrandæ, *maxime convenientem*, qui a nobis *optimus* appellari solet; ejus impugnatio nonnisi logomachia est.

## §. 1030.

Patet adeo *logomachiam evitari, si propositio non impugnetur nisi sufficienter explicata & sensu ejus demonstrativa ratione stabilizo* (§. 1027. 1028.). *Medium evitandi logomachiam.*

Quoniam hætenus notiones vagas easque confusas amant auctores, eo autem in casu difficilior est explicatio, quam ut communibus studiis innutritus exactam dare possit (§. 906. & seqq. 920. & seqq.); non mirum videri debet logomachias eruditorum esse adeo frequentes.

## §. 1031.

Quoniam in scripto scientifico lectori attento sensus auctoris ubivis certus est, nec perverti potest, quin sensus perverfus demonstrativa ratione refellatur (§. 911.); *scripta scientifica ad præcavendas logomachias plurimum conducunt.* *Scriptorum scientifico-rum utilitas in præcavendis logomachiis.*

Hæc sane ratio est, cur inter Mathematicos rarissimæ sint logomachia, etsi Mathematicum ignari, quando impugnant, quæ non intelligunt, logomachias de rebus mathematicis excitent. Pertinent huc disceptationes *de infinite parvo & viribus centralibus* Mathematicorum, quibus Mathematicum periti aures non præbent. Inter eas rationes, quæ nos permoverunt, ut philosophiam scriptis scientificis comprehenderemus, hæc quoque numeranda est, quod logomachias, quæ viros eruditos dedecent, eliminare studeamus, quantum datur. Neque enim in nostra potestate est, ut ab eorum lectione arceamus lectores, qui definitiones nostras sibi familiares reddere & nonnisi juxta eas propo-

sitiones nostras interpretari nolunt (§. 904.), quemadmodum in scripto scientifico fieri necesse est (§. 910.). Logomachia tamen iis, qui nostra attente legerunt & intellecta memoria mandarunt, statim manifestæ evadunt.

## §. 1032.

An refutati-  
ni locus sit ob  
incommo-  
dum dictio-  
nem.

*Si quis verbis notionem possibilem jungit, quibus vulgo impossibilis respondet; is equidem refutari nequit, admoneri tamen potest, ut dictionem corrigat.* Etenim si verbis notio possibilis respondet, propositio ex iis conflata vera est (§. 547.). Quamobrem cum propositio vera refutari non possit (§. 1019.); nec is refutari potest, qui verbis possibilem tribuit notionem, quibus vulgo impossibilis respondet.

Enimvero cum in philosophia a recepto significato verborum non sit recedendum (§. 142. *Disc. Prelim.*) & idem eodem modo in omni alio casu ostendi possit, quo (*loc. cit.*) de philosophia id evictum dedimus; multo magis cavendum, ne notionem possibilem jungamus verbis, quibus impossibilis respondet. Nullum itaque dubium esse potest, quin qui id facit admoneri possit, ut dictionem corrigat, ne in interpretandis aliorum scriptis non satis versatis, hoc est, plurimis (§. 904. & seqq.) ansam praebeat ipsi errorem imputandi, vel præjudicio autoritatis detentos, dum verba ejus falso interpretantur, in errores seducat (§. 1013. 528. 623.), consequenter fini a se intento adversetur, qui alius esse nequit, quam lectorem deducere ad cognitionem rerum ipsi profuturarum (§. 902.).

Exemplo hic nobis est *Augustinus* lib. 5. de civitate Dei c. 1. ubi sententiam tenere, linguam corrigere jubet eos, qui *fati* nomine decreta divina, vel voluntatem Dei appellant. Nos quoque ansam aliis non daturi, quæ non sine ratione reprehendant, necessitatem hypotheticam in Cosmologia adstruentes a *fati* nomine abstinemus, etsi eandem *fatum hypotheticum* ac *christianum* appellarint Theologi orthodoxi, propterea quod *fati* nomine necessitas absoluta eaque bruta vulgo designetur.

## §. 1033.

Præstantis-  
simus resu-

*Si quis ostendit modum, quo alter in errorem incidit, vel quod*

*quod assumptis principia falsa, vel quod in formam syllogismorum impiegit; is alterum refutat.* Etenim in utroque casu patet, quod erret (§. 626. 638. & seqq.), consequenter quod propositionem falsam pro vera habeat (§. 623.), atque adeo refutatur (§. 1017.).

Hunc refutandi modum, ubi eidem locus est, ceteris omnibus præferimus, cum fontem erroris aperiat, ut is evidentissime omnium appareat. Habet autem iste locum in omni casu, ubi autor propositiones probat, terminos definit. Nec is convenit nisi intelligentibus, cum refutans & principia tenere, & formam demonstrandi ac probandi animo comprehendere debeat, antequam genuinam rationem indicare possit, cui error debetur. Atque ea de causa raro adhibetur, cum aliis impugnandis delectari soleant, qui rerum parum periti & ab earum solida cognitione procul remoti deprehenduntur.

## §. 1034.

Quoniam in superioribus ostendimus, quomodo error circa judicia intuitiva committatur (§. 631.), vel ex principiis precariis (§. 626.), aut memoriæ quadam lapsu oriatur (§. 634.); quando forma syllogismorum vitiosa evadat (§. 638. & seqq.) & ex tradita notione demonstrationis cum ostensiva (§. 551. & seqq.), tum apogogicæ distincta (§. 553. 559.) pateat, num ejus neglectui error tribuendus sit; *modum, quo quis in errorem incidit, demonstraturus, regulas de errore circa judicia intuitiva commisso, ex principiis precariis, vel lapsu memoriæ orto, tum ex forma syllogismorum, vel demonstrationum vitiosa enato ad casum datum applicare debet* (§. 348.).

Atque hinc abunde confirmatur, quod modo (not. §. 1033.) diximus, hunc refutandi modum non esse ejusvis, sed eum nonnisi intelligentibus convenire. E. gr. Si quis falsam dedit circuli quadraturam, falsitatem facile ostendit per indirectum, si eam contrariam esse monstret approximationi *Ludolphi Colonienfis*, nec multa hic Geometriæ notitia ac demonstrandi peritia præsupponitur. Enimvero & major Geometriæ notitia, & demonstrandi habitus requiritur, ubi ostendendum est, quibus principiis falsis, vel qua vitiosa argumentandi, aut demonstrandi forma alter fuerit inductus, ut falsam circuli quadraturam

enquam veram fuerit amplexus. Mathematici primi ordinis hoc refutandi modo utuntur, dum admissos in mathematicis notant errores. Utimur vero etiam eodem in arguendis erroribus calculi, qui plerumque lapsui memoriz debentur.

§. 1035.

*Refutatio  
per demon-  
strationem  
propositionis  
veræ.*

*Si quis propositionem veram demonstrat, eo ipso contrariam refutat.* Etenim dum propositionem veram demonstrat, sive directe, sive indirecte, eo ipso vera esse intelligitur (§. 544. 557.), consequenter contraria falsa esse colligitur (§. 530.), atque adeo refutata est (§. 1017.).

Ea quidem ratio est, cur nos de refutandis erroribus parum solliciti omnes ingenii nervos eo intendamus, ut veritatem in aprico ponamus: quam qui certo cognovit errores eidem oppositos nunquam amplectetur. Ea de causa etiam Mathematici in demonstranda veritate omnem collocant operam, neglectis erroribus eidem oppositis, cum nemo iisdem obnoxius fieri possit, qui vi demonstrationis veritatis fuit convictus. Demonstra veritatem, ut ea absque hesitatione agnoscatur, errores omnes sua sponte evanescent, nemine fugante. Tota ecclia vero aberrant, qui majorem in erroribus confutandis, vel impugnandis, quam in veritate demonstranda operam collocandam esse existimant. Quod si eruditi tantum in veritate demonstranda studium ponerent, quantum in impugnandis, qui ipsis videntur, erroribus consumunt; errores dudum facti fuissent rariores. Nobis a prima juventute ea animo sedis sententia, errores non rectius fugari quam veritate iisdem opposita demonstrata: que nos veritatis maxime cupidos impulit, ut omnes ingenii nervos ad detegendas tantæ in Mathesi evidentie rationes & ceteras disciplinas ad eandem, quantum daretur, perducendas intenderimus. Quamobrem in philosophia tradenda hunc morem tenemus, ut erroribus veritatem opponamus & eam stabilire satagamus, ut sic veritas inde locupletior fiat. Prostant hujus instituti exempla cum in discursu præliminari, tum in hoc opere logice, quæ lector attentus facile deprehendet.

§. 1036.

*Modi refu-  
tandi dire-  
cti.*

*Alterum adeo directe refutaturus propositionem veram falsæ oppositam, vel modum, quo is in errorem incidit, directe demonstrare debet.* Etenim in utroque casu alter refutatur

(§. 1033.)



(§. 1033. 1035.) & refutatio nititur demonstratione ostensiva per *hypothesein*. Est igitur in casu utroque directa (§. 1023.).

Modus prior sufficit errori agnoscendo & fugando (§. 1035.): posterior autem, dum fontes errorum recludit, attentionem confert ad eos facilius evitandos, cum sic devia, in quæ inciderunt alii, rectius evitare discamus. Consultum adeo est, ut uterque modus conjungatur, eo præsertim in casu, quo diserta erroris confutatione opus est, veluti cum error in lucem protruditur ante veritatem detectam, vel nondum sufficienter stabilitam. Solenne hoc est Mathematicis, qui ubi errorem alterius notarunt eundem quoque corrigunt, ut eorum moribus nemini jus convenire videatur alterius lapsus publice notandi nisi ei, qui meliora dare valet. Si quis meliora dare nescius comparuerit, ei metuendum est, ne publice provocatus fugam arripere cogatur, manifesto indicio, quod rebus alienis inconsulto se immisceuerit. Idem institutum aliquando nos quoque secuti (not. §. 1018.). Directi refutandi modi magis familiares fient eruditis, ubi præcipitantia in iudicando valedicentes veritati demonstrandæ majorem operam navabunt, quam qua nunc utuntur.

#### §. 1037.

*Qui cum erroris convincere studet, quem refutat, is non uti debet principiis nisi ab eodem concessis, nec quicquam efficiet, nisi alter ad refutationem eam offerat attentionem ut & agnoscat, nullum sumi principium, quod non sit certum, nec a forma demonstrandi aberrari.* Etenim alterum refutatione erroris convicturus eum vi demonstrationis convincere intendit (§. 1023.). Enimvero vi demonstrationis alterum convicturus eam eo usque continuare debes, donec ad præmissas ei certas, seu, quod in præsentē casu perinde est, ad principia ab eo concessa perveneris (§. 991.), neque fieri poterit, ut hisce observatis actu vincatur alter, nisi eam offerat attentionem, quam in propositione requirimus (§. 998.). Patet adeo ab utraque parte fieri debere, quod requirimus, si quidem erroris convincendus est, quem refutas.

Posterior jam ex eo manifestum est, quod nemo errorem a se commissum agnoscat, nisi ad refutationem eam attentionem offerat, quæ ad

convictionem requiritur (§. 1021.). Qui vero convincendus est erroris, eo utique adducendus, ut eundem agnoscat (§. 983.).

§. 1038.

*Refutatio  
sine successu  
tentata.*

Hinc consequitur, *in refutando eo, qui principia ignorat, & eam addibere nequit attentionem, quæ ad convictionem requiritur (§. 998.), inanam operam sumi.* Etenim cum assensus, quem principiis demonstrationis proximis debemus, nonnisi successive gignatur (§. 993.), nec sine multo sapius labore (§. 992.), eaque attentio, quæ ad convictionem requiritur (§. 998.), non sine multo studio ac temporis dispendio comparatur (§. 994.); rarissimus profecto erit casus, quo alteri persuadeas, ut & tempus sufficiens, & studium improbum impendat cum principiis intelligendis, tum attentioni comparandæ, atque adeo tantum non semper in eo refutando inanam operam sumes, qui principia ignorat, nec attentione uti valet, quæ sola ad convictionem sufficit.

Agnoverunt veritatem propositionis præsentis, qui inculcant, *contra ignorantem principia non esse disputandum.* Sed addere debebant: *Contra inhabilem non esse disputandum.* Utrumque observant viri, quibus solida rerum cognitio curæ cordique est: neque enim cum ignaris principiorum ac inhabilibus rem habere volunt, intelligentes autem tacite refutant, dum veritatem erroribus eorum oppositam demonstrant (§. 1035.).

§. 1039.

*Modus refutandi per indirectum.*

*Alterum per indirectum refutaturus sumit propositionem, quam alter pro vera habet, tanquam veram & inde syllogismorum concatenatione infert propositionem, quam ipse falsam agnoscit.* Etenim in refutatione indirecta per indirectum demonstrari debet, propositionem, quam alter pro vera habet, esse falsam (§. 1023.). Enimvero in demonstratione indirecta sumimus propositionem falsam tanquam veram & inde perinde ac ex definitione, vel hypothese data continuo ratiociniorum filo deducimus conclusionem, quæ falsa ab altero agnoscitur, quem convincere intendimus (§. 553.), cum assumpta hinc falsa colligatur

gatur (§. 556.). Ergo idem utique in refutatione indirecta fieri debet.

Sane omnes demonstrationes per indirectum, quarum complures in Mathesi occurrunt, sunt totidem exempla refutationis indirectæ seu apogogicæ: etenim propositionem per indirectum demonstrare idem prorsus est ac propositionem contrariam ei, quæ demonstrari debet, refutare. E. gr. Cum in superioribus (not. §. 553.) exempli loco per indirectum demonstravimus, *duos circulos se intus tangentes non habere idem centrum*, non aliud egimus, quam ut contrariam, quod *habebant idem centrum*, refutaremus. Similiter cum (§. 368.) per indirectum demonstrarem, *si in prima figura conclusio sit universalis, utramque etiam præmissam universalem esse debere*, non aliud egimus, quam ut duas propositiones contrarias refutaremus, nimirum 1. quod *in prima figura, si conclusio sit universalis, major sit particularis*, & 2. quod *stante eadem hypothese minor sit particularis*. Quoniam itaque rerum practicarum notiones ipsa praxi omnium optime nobis comparamus (§. 930.); notionem refutationis indirectæ acquisiturus demonstrationes per indirectum sibi familiares reddere debet. Quamobrem & nos cum in Mathesi, tum in philosophia huic demonstrationum generi locum concedimus, etsi non desint, qui demonstrationibus ostensivis magis delectati eas prorsus exterminari optant. Quemadmodum vero artis demonstrandi parum periti nullam refutationis ostensivæ notionem habent nisi confusam, eamque incompletam; ita similiter notione distincta completa refutationis indirectæ destituuntur. Cum tamen indirecte alios impugnare malint, quam directe; vulgo in aliis impugnandis male versantur atque indirecta refutatione non uno modo abutuntur: ut adeo consultum indirectam impugnacionem a refutationem spuriam a genuina distinguere.

#### §. 1040.

*Si quis alterius sententiam consequentiis onerat, hoc est, Modus refutationis* propositiones falsas inde consequi affirmat, *quas inde fluere demonstrare nequit; is eandem minime refutat.* Pone enim sententiam alterius ab eodem refutari: evidens est, quod demonstraret, ex ea consequi propositiones manifesto falsas (§. 1039.). Quod est contra hypothesein, adeoque absurdum.

(Wolfii Logica)

B b b b b

Pro-

Propositio hæc adeo evidens est, ut instar axiomatis assumi possit. quæ etiam ratio est, quod absque multa ambage demonstrari poterit. Neque facile quisquam erit, qui eandem in dubium vocet, nisi contradictoria se concoquere posse fateri velit. Hoc tamen non constante tota die in eam impingunt, qui in impugnandis aliis conestescunt & contabescunt. Ipiemet insulsam hunc impugnandi modum expertus, ut plura in medium afferre liceret exempla. *E.g. systema harmoniæ præstabilitæ Leibnitianum* impugnatur vociferatur, *in eodem destrui libertatem*: quod perinde est ac affirmare, *systemate harmoniæ præstabilitæ sequi hominem nullam habere libertatem*, cujus contrarium cum Jaquelotus & alii dudum demonstraverint, eo ipso assertum jam fuit refutatum (§. 1035.). Nemo autem eorum ausus est hanc consequentiam secundam formam demonstrationis indirectæ ex notione harmoniæ præstabilitæ deducere. Systemata igitur istud minime refutatum, sed male impugnatum fuit.

## §. 1041.

Quando refutatio indirecta absoluta.

Si ex propositione, quam alter pro vera habet, juxta formam demonstrationis indirectæ unica colligitur propositio falsa illa jam refutata est: superfluum vero ex ea ulterius inferre aliam. Etenim si ex propositione data unica colligitur propositio falsa, adeoque veræ contraria (§. 530.) aut contradictoria (§. 532.); falsa ea est (§. 556.) &, ubi falsa hæc propositio demonstratione indirecta infertur, eam falsam esse vim demonstrationis percipienti certum est (§. 568.). Propositio igitur, quam alter pro vera habet, sufficienter refutata est (§. 1017.).

Enimvero cum in genere constet, in methodo demonstrativa, qua in refutatione uti debemus (§. 1017.), ex uno errore sequi plures (§. 628.), immo idem obtineat, si non adeo rigidus sis in probando (§. 627.); superfluum sane est erroneas consequentias cumulari, ubi aliud non intendis, nisi ut propositionem erroneam refutes.

E. gr. Si ex *systemate harmoniæ præstabilitæ Leibnitiano* necessaria & legitima consequentia, quæ per formam demonstrationis indirectæ manifesta evadit, colligi posset, *libertatem homini nullam esse*; eo ipso systema illud esset sufficienter refutatum, & superfluum prorsus forent consequentiæ ulteriores, quod sic omnis virtus, omnis reli-

gio tollatur, & quæ sunt his gemina. Eæ nimirum ad refutationem nil quicquam conferunt, quæ absoluta, antequam ipsæ superaddantur. Sapientis cum sit a superfluis abstinere; ideo viros intelligentes, qui sapiunt, a cumulandis consequentiis abhorrereprehendimus.

## §. 1042.

*Si quis errorem ab altero admissum ridiculum, vel periculosum esse probare velit, is ex una propositione falsa, quam collegit, continuo infert alias, donec in casu priori, & tales pervenerit, quæ risum movent, minimum imperitis, adeoque plurimis; in posteriori autem istiusmodi errores prodeant, qui in Rep. non tolerantur, nisi prima statim ridicula, vel periculosa appareat.* Quando consequentiarum cumulantur.

Propositio per se patet, cum alias in neutro casu consequi finem possit, qui propositionem alterius vel refutandam, vel impugnandam sibi sumit.

Falsitas propositionis ex una propositione falsa, quæ inde consequitur, seu una consequentia, patet (§. 1041.). Refutandi igitur animo plures afferri nequeunt, quarum una ab altera pendet. Quamobrem ubi afferuntur, alia adesse ratio debet. Illa autem, in qua subsistit, manifesto loquitur, quænam ea sit. Nimirum si non subsistit, antequam ad propositionem perveneris, quæ adeo absurda habetur, ut risum moveat; quis non inde colligit, tibi propositum esse ostendere, errorem ab altero admissum ridiculum prorsus esse. Quodsi vero tum demum consequentiarum illationem finis, ubi ad errores perveneris, quos in Rep. tolerari non convenit; ecquis non videt, te monstrare velle, quam periculosus sit error. Exempli loco nobis esse possunt, qui *systema Copernicanum*, seu *terra mota* impugnarunt. Etenim qui contendebant, idem adeo absurdum esse, ut derideri mereatur, affirmabant, *admissio motu vertiginis Telluris ædificia omnia collapsura esse & corpora terrestria quacunq; cælum versus excussum iri, aves e nido in ærem evolantes cum non iterum repetere posse, globum tormento versus orientem explosum post tormentum prolabi, lapidem ex altissima turri demissum versus occidentem extra orbem in campo decidere &c.* In primis enim consequentiis subsistebant, cum primæ statim essent ridiculæ. Plures tamen a se invicem non dependentes cumulabant, ut tanto absurdior videretur hypothesis terræ motæ. Contra qui eandem valde periculosam esse

monstrare decreverant, eam scriptura sacra manifesto contradicere sumebant, atque hinc porro inferebant, quod eandem defendendi abvinam Scriptura Sacra auctoritatem rejiciat, consequenter religionem revelatam in fabularum numerum referat & ideo atheismi suspicionem incurrat &c.

## §. 1043.

*Consequentiarum definitio.*

*Consequentia* hic dicitur propositio falsa, quæ ex alia, quæ pro vera venditur, infertur. Unde qui propositionem aliquam per indirectum impugnant, vel refutant, *consequentiam eam impugnare, vel refutare* dicuntur.

Iti consequentiis partim ridiculis, partim periculosis systema *pernicianum* impugnatum esse, modo vidimus (not. §. 1042.). Nequaquam fugit, vulgum eruditorum, qui modos refutandi detectos non caput (§. 1033. 1035.), in consequentiis omne suum præsidium collocare, cum nemo sit tam imperitus, quin ex propositionibus parum intellectis fluere ipsi videantur, quæ falsa, ridicula & impia atque periculosa videntur, præsertim cum extra rationis spheram constituti adeoque rationibus extrinsecis inhiantes (§. 1042.) in judicando ab appetitu sensitivo pendeant.

## §. 1044.

*Refutatio indirecta multiplex.*

Si quis ex propositione, quam alter pro vera habet, juxta formam demonstrationis indirectæ plures propositiones falsas a se invicem non dependentes colligit; is pluribus diversis modis eam refutat. Etenim una consequentia in hoc casu sufficit refutationi (§. 1041. 1043.), cumque unaquæque earum sibi peculiari demonstratione colligatur, tot utique prodeunt refutationes, quot sunt consequentiæ. Quamobrem una eademque propositio diversis modis refutatur.

Idem eodem modo valet, ubi propositio aliqua saltem impugnatur: quo in casu exempli loco esse possunt absurda, quæ ex hypothese terræ motæ fluere continebant ejus adversarii (not. §. 1042.).

## §. 1045.

*Imputatio consequentiarum molestæ.*

Si quis alteri consequentias ridiculas & periculosas imputat, hoc est, si contendit, alterum eas pro veris habere; ille alteri nocere intendit. Ponamus enim, quod alteri, ex cuius senten-

sententia consequentias ridiculas, vel periculosas colligit, nocere non intendat. Non alio igitur animo eas elicit vel eas inde fluere contendit, quam ut ostendat, sententiam alterius esse ridiculam, vel periculosam (§. 1042.), aut ut saltem evincat, eam esse falsam (§. 1039.). Sed hic sufficit, ut demonstret, consequentias istas inde fluere (§. §. cit.) Ergo alia adesse debet ratio, cur easdem alteri imputet. Intrinseca ex notione refutationis derivata ratio cum nulla hic adsit (§. 1004.), extrinseca adesse debent (§. cit.), adeoque in præsentem casum a facultate appetitiva petendæ. Quoniam itaque liquet eum, qui impugnatur, vel refutatur, vi consequentiarum ridicularum minimum imperitis, adeoque plurimis, deridendum propinari, vi consequentiarum autem periculosarum famæ ac fortunæ periculum eidem creari, ubi imputationi fides habetur; evidens omnino est consequentias ridiculas & periculosas animo nocendi imputari.

Idem omnium evidentissime eo in casu apparet, si is, cui consequentiæ molestæ imputantur, diserte eas respuit, cum propositionibus iisdem contrariis defendat. Major vero iniquitas est, si quis demonstrare non noverit consequentias molestas, quas alteri invito imputat, & ut aliqua veri specie imputatio fiat, affirmet alterum propositiones iis contrarias non alio fine defendere, quam ut lectorem a periculo sententiæ suæ animadvertendo divertat. Immo adhuc major iniquitas erit, ubi quis ne monitus quidem ab imputandis consequentiis desistit, etsi demonstrationes provocatus dare nequit, verborum detorsionibus, quibus nititur, evidenter refutatis. Dantur adhuc alii iniquitatis hujus gradus, sed qui logiei fori non sunt. Ab exemplis abstinemus: dolemus enim, quod communia hodie studia non emolliant mores, sed feros esse sinant.

§. 1046.

*Consequentiarum* dicuntur, qui consequentiis alio fine utantur, quam animo refutandi. Vocantur etiam *Judices consequentiarum*, nec non, *consequentiarum fabri*.

*Consequentiarum definitio.*

Judices consequentiarum appellantur, quia ex consequentiis, quibus dissentientes onerant, temere de iisdem judicant; consequentiarum vero fabri, quia consequentias fingunt, quas ex propositionibus inter-

Bb bb b 3

pugna

pugnatis fluere nullo modo demonstrare valent, cum refutator non urgeat consequentiam, nisi quam legitima ratiociniorum concatenatione ex ea, quam refutandam sibi sumit, propositione deducere vellet (§. 1039.).

## §. 1047.

*Cur consequentiarium primam consequentiam precario sumat & alterius verba in sensum alienum detorqueat.*

Quoniam *Consequentiarium* non animo refutandi consequentias profert, sed alium finem intendit sub refutationis prætectu (§. 1046.); ideo sibi religioni non ducit, primam consequentiam precario sumere, ut alias alteri molestas porro inde deducere valeat, immo ut aliqua veri specie eandem sumere impertitis videatur, verba alterius in sensum perversum detorquere non veretur: quod utrumque refutationis notioni repugnat (§. 1039.).

Confirmat idem prohi dolor! experientia, cum solida rerum cognitione exulante consequentiarium nullo pudore suffundantur. Consequentiarium vero manifesto se prodit, ubi ne monitus quidem a falsa interpretatione desistit, verborum detorsionibus, quibus eximitur, refutatis & vero sensu demonstrativa ratione stabilito, & provocatus ut demonstraret, si possit, consequentiam precario assumam ex propositione impugnata fluere, demonstrationem dare nequit, immo non obstante demonstratione in contrarium, quam impugnare nullo modo valet, consequentiam precariam impudenter repetit. Etenim refutatio veritatis amore fit (§. 1017.), cui repugnant, qui tanquam consequentiarium signa modo adduximus.

## §. 1048.

*Consequentiariorum praxis.*

Quoniam consequentiarium sub prætectu refutationis alium finem intendit, quam refutationem (§. 1046.), alius vero intendi nequit, quam ut autorem, quem impugnat, vel aliis deridendum propinet, vel exolum reddat, & adeo vel famæ, vel fortunæ, immo vitæ noceat; igitur *consequentiarium* consequentias querit vel ridiculas, vel periculosas, minimum plerumque opinione tales; ubi istiusmodi consequentia non prima se offerunt, consequentias consequentiarum eo usque continuat, donec ad tales pervenerit; nec in eis cumulandis subsistit, quandoque tales



tales offeruntur (§. 1042.), tandem denique molestas istas consequentias alteri imputat (§. 1045.).

Si quis ad signa consequentiarum modo (not. §. 1047.) memorata atque alia istis affinia attendere voluerit; is propositionem presentem experientia confirmari haud difficulter agnoscat, ut adeo exemplis hic non sit opus.

## §. 1049.

*Argumentum ab invidia ductum* appellari sueverunt rationes, quibus in aliorum placita odium concitatur, quo opprimantur: ut a leo appareat, *argumento ab invidia ducto uti consequentiarum* (§. 1046.).

*Argumenti ab invidia definitio & quibus conveniat.*

Facile apparet, quod, quemadmodum viris, qui veritatis ac virtutis amore ducuntur, infame est consequentiarum nomen, ita iidem ab argumento abhorreant, quod ab invidia duci solet.

## §. 1050.

Quoniam *Eusebius Amore*, Canonicus regularis Lateranensis in ecclesia ad S. S. Crucem & S. S. Salvatorem in Polling superioris Bavariz ac Philosophiz Professor, in novis philosophiz planetarum & artis criticæ systematibus, & quidem p. 34. *Logica* argumentum ab invidia ductum ex *Johannis Clerici* dissertatione de argumento theologico ab invidia ducto optime in compendio proposuit; nobis suffecerit verba ejus huc transcribere. Ita autem ille: 1. *sententia*, inquit, *quæ oppugnatur, male explicatur.* 2. *Cum invidiosorum hominum dogmatis conferatur.* 3. *Nominibus invidiosis infamatur.* 4. *Exaggeratur momentum questionis.* 5. *Invidiosi redduntur boni, quod consuetis non utantur vocibus ac loquendi formulis.* 6. *Studiose celantur rationes, quibus sententia impugnata nititur.* 7. *Tacentur incommoda, quibus premitur sententia, quæ defenditur.* 8. *Prætermittuntur ea, quæ invidiam amoliri possent.* 9. *Invidiosæ consequentiæ colliguntur ex eorum sententia, qui impugnantur.* 10. *Malignis suspitionibus premuntur.* 11. *Novitas illis obijciatur quasi crimen.* 12. *Consensu hominum potentiorum opprimuntur.*

*Praxis argumendi ab invidia ducti.*

*muntur. 13. Miscentur in disceptationibus multa, quæ ad rem nihil faciunt, sed quæ invidiæ creandæ apta sunt. 14. In deteriorē partem accipiuntur indifferentia. 15. Provocatio fit a peritis iudicibus ad imperitos. 16. Adversarii quasi immorigeri magistratibus infamantur.*

Non opus est, ut more nostro singula asserta rationibus confirmemus, cum hoc argumentum non decere existimemus virum intelligentem, cordatum atque honestum. Sufficit adeo ad experientiam provocare eamque domesticam, adeo evidentem, ut in casu singulari demonstraturus, singulis argumenti partibus esse satisfactum, demonstrationem superfluum reputaverint, qui eodem erant usi, juxta illud vulgatum: *Non opus est verbis, ubi rerum testimonia adsunt.*

#### §. 1051.

*Persecutoris definitio.*

Qui sub prætextu veritatis defendendæ dissidentes in discrimen famæ, fortunæ, immo vitæ adducere conatur, *persecutor* appellatur.

Ita *Paulus*, antequam converteretur, erat persecutor Christianorum, qui sub prætextu veritatis religionis Judaicæ defendendæ vi civili doctrinam Christianorum opprimere iisque ægre facere studebat. Similiter *Socratis* persecutores erant, qui ipsum errorum nocuorum postulantes non ante conquiescebant, quam eum supremo supplicio affectum esse triumphare possent. Summo omnem persecutionem fieri sub prætextu veritatis defendendæ, neque enim veritatis defensio remediis istiusmodi violentis opus habet: id quod cum ex iis patet, quæ de errorum refutatione legitima dicta sunt (§. 1036. 1037), tum olim magis elucescit, ubi principia politica erunt evoluta, quibus officia magistratus civilis circa errores continentur.

#### §. 1052.

*Quinam consequentiarum in persecutorem degeneret.*

Quoniam consequentarius, qui periculosas consequentias alteri imputat, dissidentes ferre nequit iisque nocendi animum habet (§. 1048. & seqq.); persecutor vero sub prætextu veritatis defendendæ dissidentes in discrimen famæ, fortunæ, immo ipsius vitæ adducit (§. 1051.); *consequentarius periculosa*

*fas consequentias alteri imputans in persecutorem facile degenerat, modo non desint vires.*

Cum ex antecedentibus satis pateat, consequentiariorum & persecutorum praxes non a solo intellectu, sed a voluntate imprimis seu facultate appetitiva pendere, cujus determinatio multas admittit rationes: quando consequentarius idem sit persecutor, aut ad persequendum dissentientes se facile adduci patiatur, hic quidem loci accuratius determinari nequit. Historia cum literaria, tum ecclesiastica abunde loquitur, consequentarios periculosas consequentias dissentientibus imputantes fuisse persecutores. Utinam nec hic experta loquerer!

## §. 1053.

*Si propositioni, quam alter pro vera habet, observatio, vel experimentum, seu experientia contraria opponitur; propositio eo ipso est refutata.* Veram enim esse constat propositionem, qua subjecto tribuitur prædicatum, quod eidem convenire observamus (§. 517.), consequenter si experientia propositioni, quam alter pro vera habet, fuerit contraria, eo ipso patet, contrariam eidem esse veram. Quoniam itaque evidens est, si propositionum contrariarum una vera sit, alteram esse falsam (§. 530.); quamprimum propositioni, quam alter pro vera habet, experientia contraria opponitur, illam falsam esse intelligimus, consequenter eadem refutata est (§. 1017.).

Ecce tibi demonstrationem logicam generalem, quam supponit refutatio a posteriori, in casu quolibet dato applicabilis, sed præter necessitatem non iteranda.

## §. 1054.

Quoniam iudicium ferre nequit, utrum experientia sit propositioni, quam alter affirmat, contraria, nec ne, nisi qui doctrinam de propositionibus contrariis & regulas experientie animo comprehendit, ut & contraria agnoscere (§. 348. 349.) possit atque certus sit, perperam applicatis experientie regulis vitium subreptionis non fuisse commissum (§. 668.); a posteriori alterum refutaturus (§. 1053.) nolle debet doctrinam de propositioni-

(Wolfii Logica)

C c c c c

tioni-

*tionibus contrariis & præterea quoque probe perspecta habere, quæ de formandis judiciis intuitivis & nozionibus a posteriori (§. 669. & seqq.) integro capite docuimus, inprimis regular, quæ de observandis attributis & essentialibus (§. 674. 677.) nec non in, quæ per modum attributorum insunt (§. 673.), de definitionibus a posteriori detegendis (§. 679.) & limandis (§. 680. 681.), de causis investigandis (§. 697. & seqq.) & judiciis universaltibus intuitivis (§. 705. 706.) præcipiunt.*

Patet hinc abunde, non adeo facilem esse in omni casu refutationem a posteriori, quemadmodum vulgo creditur, ita ut sapiens ipsa refutatione a priori difficilior evadat. Exempla præclara in Astronomia obvia sunt, quibus simul probatur, in refutatione a posteriori viam demonstrationum haud raro una calcandam esse. Illud autem per se intelligitur, non sufficere, ut quis regulas istas memoræ infixas teneat, sed inprimis requiri, ut eas dextre applicandi habitu polleat.

## §. 1055.

*Cur de usu  
rationum extrinsecarum  
in impugnandis aliis  
non agatur.*

Solent etiam sapissime, qui aliorum sententiam impugnant, rationibus extrinsecis uti, iisque propterea abutuntur consequentarii, præsertim persecutores, quod non modo impugnare sueverint, quæ minime intelligunt, verum etiam quod norint rerum imperitos, adeoque plurimos, per rationes extrinsecas assensum determinare (§. 1004.). Qui dissentientium sententiam opprimere nititur, is media quævis probat, quibus finem sibi præfixum obtineri posse putat. Enimvero cum nostrum non sit malignas docere artes, quousque vero in impugnandis aliorum sententiis rationibus extrinsecis locus sit, in Logica probabilium doceri debeat; de eo in præsentem, ubi Logica demonstrativa traditur, dicendum non est.

E. gr. Tale argumentum extrinsecum est, quod petitur a consensu multorum & ab autoritate virorum in dignitate constitutorum, immo a pluralitate collegiorum idem sententium. Unde consequentarii persecutores alios instigare solent, ut dissensum suum quoque publice testentur & consequentias male sanas ac malignas probent, quo imperitis pondus aliquod habere videantur.

§. 1056.

## §. 1056.

*In refutatione abstinendum est a verbis, quæ contumeliam, vel injuriam redolent: multo magis autem, ubi refutandum erroris convincere studet. Idem quoque in impugnatione valet. Aliter enim refutaturus demonstrare tenetur falsam esse propositionem, quam is pro vera habet (§. 1017.). Demonstrationes contextuntur ex propositionibus determinatis, sive ostensivæ fuerint (§. 551. 552.), sive apogogicæ (§. 553. 559.), consequenter nec plures, nec pauciores ingredi refutationem possunt voces, quam quæ notioni subjecti, per quam prædicatum determinatur, & notioni prædicati significandæ sufficiunt (§. 320.). Nullus adeo locus est verbis, quæ contumeliam, vel injuriam redolent.*

*Aquibuscumque verbis in refutatione & impugnatione sit abstinendum.*

Quodsi alterum, quem refutare intendis, erroris convincere volueris, nil quicquam efficies, nisi is ad refutationem eam afferat attentionem, ut & agnoscat, nullum sumi principium, quod non sit certum, nec a forma demonstrandi aberrari (§. 1037.). Enimvero si verbis, quæ contumeliam vel injuriam redolent, utaris, refutandus iisdem ad iram concitatur tuique odium concipit, quod ex principiis psychologicis demonstrandum hic tanquam experientia confirmatum sumimus. Quoniam itaque non minus a posteriori constat, iram pariter ac odium impedire animum, ne verum cernere possit; si quis alterum erroris convicturus verbis utitur contumeliosis, vel in eum alio quocunque modo injuriis, is impedit, quo minus veritatem principiorum & legitimam demonstrandi formam percipiat, consequenter impedit, quo minus idem vincatur erroris, quem fovet (§. 1037.). Ab iis igitur abstinere debet, qui refutandum convincere studet.

Cum impugnatio a refutatione nonnisi in eo differat, quod hæc demonstratione (§. 1017.), ipsa vero probatione insufficiente nitatur (§. 1018.), adeoque in refutatione non admittantur nisi principia certa (§. 562. 567. & seqq.), in impugnatione etiam

probabilia (§. 587.), immo precaria (§. 843.); de impugnacione eodem modo ostenditur, quo idem de refutatione demonstravimus, abstinendum esse a verbis contumeliosis & in eum injuriis, quem impugnandum tibi sumisti.

Pater adeo, nec in notione refutationis, nec impugnacionis contineri rationem, cur verbis in alterum quomodocunque injuriis ut liceat. Qui ergo iisdem utuntur, iis rationes extrinsecæ sunt (§. 1004.). Oriuntur nimirum ab animi passionibus & in casu dato principiorum psychologicorum gnarus ex ipsis verbis speciem istius passionis colliget. Viri adeo solida rerum cognitione ac virtute eminentes, qui amore veritatis ducti errores quosdam refutant, occasione sic ferente, vel dubias aliorum opiniones impugnant, ut facta discussione accurata collatis viribus tandem in aprium protrahatur veritas, ab omni animi passione alieni non utuntur vocibus, nisi quæ determinatis propositionibus sufficiunt. Quod autem vulgo contrarium obtineat, pravis hominum affectibus debetur, quibus amore veritatis destituti ducuntur, quod ex rationibus intrinsicis statuere non valentes judicium ab appetitu sensitivo pendulum habeant, quemadmodum jam supra notatum est (§. 1045.).

#### §. 1057.

*Consequen-  
tarius quib-  
us utatur  
verbis.*

Cum *consequentarius* alium suum intendat, quam refutationem (§. 1046.), alium vero intendere non possit, quam ut autorem, quem impugnat, vel aliis deridendum propinet, vel exosum reddat, & adeo vel famæ, vel fortunæ, immo vitæ noceat, ideo non mirum, si is utatur verbis maxime contumeliosis & in alterum injuriis.

Accidit id ipsum, ubi vel maxime semetipsos modestos predicant, quod alias fieri non poterat, ut ob rerum testimonia modestiæ laus ipsis tribueretur. Ab hac laude autem alienus est, qui consequentarius agit, cum notiones consequentiariorum & modestiæ sibi mutuo repugnent: id quod ex principiis moralibus patebit. In primis in consequentarios eadem non cadit, ubi argumento ab invidia ducto utuntur (§. 1049.), cum ejus praxis modestiam non ferat (§. 1050.), quippe quæ non patitur, ut aliorum meritis ac famæ detrahamus & vano fastu elati moliamur, quod viribus nostris impar.

#### CAPUT

CAPUT III.

DE MODO SESE DEFENDENDI.

§. 1058.

**S**ese defendere idem est ac demonstrare, se ab altero non fuisse refutatum. Et *propositio* ab altero impugnata dicitur *defendi*, ubi demonstratur, eam ab altero non fuisse refutatam.

*Defensionis definitio.*

E. gr. Cum systema *Copernicanum* consequentiis ex motu vertiginis terræ deductis impugnaretur supra commemoratis (not. §. 1042.), *Copernicani* idem defendebant ostendentes, absurda illa ex admissio motu vertiginis non sequi, propterea quod una cum tellure atmosphæra & quæ in eo sunt corpora eodem motu cieantur. Idem se defendebant adversus consequentiarios objicientes, quod Scripturæ Sacræ autoritatem rejiciant, religionem revelatam in numerum fabularum referant & ideo atheismi suspensionem incurrant, dum negabant Scripturam Sacram motum solis diurnum statuere, utpote quæ hoc phænomenon recenset, non solvat, cum scopo ipsius phænomeni notitia sufficiat, neglecta ejus causa physica.

§. 1059.

Qui ergo demonstrare nequit, se ab altero non fuisse refutatum, in *defensionem* molitur; sed irritò successu.

*Defensio irritò successu tentata.*

Eodem scilicet modo differunt *defensio* & *tentamen defensionis*, quo supra differre diximus refutationem & impugnationem. Quoniam igitur communis loquendi usus fert, rebus exemplis supra (not. §. 1020.) allatis, ut ob istud discrimen refutatio ab impugnatione distinguatur; non improbandum nobis videtur, ubi & defensionem ab ejus tentamine distinguimus.

§. 1060.

*Tentamen* adeo *defensionis* appellamus, si quis insufficienter probat, propositionem, quam pro vera, vel probabili habet, ab altero non fuisse refutatam.

*Tentaminis defensionis definitio.*

Ita e. gr. *Copernicani* sese defendere tentarunt adversus consequentiarum fumens motum telluris Scripturæ Sacræ repugnare, dum reposuere, eam loqui secundum opinionem vulgi, cum id demonstrari non possit. Quamobrem defensori idem systema adversus eosdem evicimus (not. §. 972.), ex Scriptura Sacra decidi non posse, utrum terra moveatur, an Sol, cum motus Solis phrasi S. S. designet variationem situs respectu puncti fixi telluris.

§. 1061.

*Quando defensionem non sit locus.*

*Si propositio aliqua fuit refutata, contra refutationem defendi nequit; etsi ab imperitis defensio tentari possit.* Etenim si refutata fuerit propositio, falsitas ejus demonstrata fuit (§. 1017.). Cum adeo fieri non possit, ut eadem propositio & falsa sit, & non falsa; impossibile est ut demonstretur, eam non esse falsam, consequenter non esse refutatam (§. cit.). Defendi adeo contra refutationem nequit (§. 1058.).

Quoniam tamen non repugnat, ut insufficienter probetur, propositionem non fuisse refutatam, quæ refutata est, cum in probatione insufficiente locum habeant principia sine probatione assumpta, quæ falsa esse possunt, adeoque falsam pariunt conclusionem (§. 538. & seq.); nil sane obstat, quo minus defensio contra refutationem ab imperitis, qui eam agnoscere minime valent, tentetur. Tentamen adeo defensionis adversus refutationem locum habet (§. 1060.).

Utrumque experientia confirmatur. Mathematici, qui demonstrationem agnoscunt, contra evidentiam non nituntur; nec errorem refutatum defendunt. Similiter errores calculi nemo sanus defendit, cum evidenter demonstrari atque adeo refutari possint (§. 1017.). Demonstrationum autem parum periti, qui vim earum minime percipiunt, quæ peritis evidentia sunt, impugnant, atque adeo errores quoque refutatos defendere tentant. Sunt & aliæ rationes, quibus subinde adducuntur eruditi, ut errores refutatos contra refutationem defendere tentent, nimirum quando ipsorum interest, ne se errasse constentur, aut nimia causæ fiducia refutationem non expendunt, quantum satis. Ceterum hinc intelligitur ratio, cur intelligentes cum imperitis ferream contentionis reciprocare nolint, scilicet quia defendere audent, quæ defendi nequeunt, nec evidentiam cedunt.

§. 1062.



## §. 1062.

*Si propositio vera impugnatur, cujus nondum in publicum prostat, vel ab impugnante ignoratur demonstratio; dum demonstratur, defenditur.* Etenim dum propositio demonstratur, eam veram esse patet (§. 544. 557.), consequenter hoc ipso demonstratur, quod refutata non fuerit, sed saltem impugnata (§. 1019.). Dum igitur demonstratur, defenditur (§. 1058.).

*Defensio pro positionis nondum publice demonstrata a priori.*

E. gr. Pone Mathematicum suppressa demonstratione publicasse aliquod inventum, quod ab altero impugnetur: quamprimum demonstrationem publicaverit, impugnatio consensu omnium Mathematicorum censebitur nulla. Ridebitur impugnator, si impugnationi insistere velit, nec dignus judicabitur, cui respondeatur.

## §. 1063.

*Non absimili modo ostenditur, propositionem impugnata defendi, si experientia confirmetur subjecto convenire predictum (§. 567.).*

*Ejusdem defensio a posteriori.*

E. gr. Si quis sumeret, dari in satellitibus Jovis maculas variabiles, & alter assertum impugneret, quod in stellulis telescopicis maculas distinguere impossibile sit; idem defenderetur allata in medium observatione *Cassini* atque *Maraldi* ex Commentariis Academiae Regiae Scientiarum Parisinis, quam in Elementis Astronomiae descripsimus.

## §. 1064.

*Quamobrem si ab imperito impugnetur propositio, quae vel demonstrata, vel a posteriori confirmata peritorum judicio certa est; defensione nulla opus est.* Si enim defensione adhuc esset opus, eo ipso non defenderetur, dum demonstratur, vel experientia confirmatur: id quod absurdum (§. 1062. 1063.).

*Quando impugnatio contemnenda.*

Nemo sane Mathematicorum ad argumenta attendit, quibus Mathematicum imperiti propositiones in Mathesi demonstratas impugnant. Nec videas eruditos primi ordinis curare objectiones, quae ab imperitis adversus ea protruduntur, quae non intelligunt. Exemplo nobis est *Newtonus*, qui theoriam luminis, quam dedit, novam adversus *Ignatium Gastonem Pardies*, *Linum* & alios defendit, donec sibi

sibi satisfactum vel publice, vel tacite profiterentur; objectiones autem imperitorum sprevit. Vid. *Lodivorp* in Compendio Transactionum Anglicanarum Vol. I. p. 137. & seqq. Nimirum cum contra inhabilem & principia ignorantem non sit disputandum (§. 1038.), nec contra cum veritas defendenda. Si cui scrupuli quidam reliqui fuerint, is repetat superius (not. §. 1035.) dicta.

§. 1065.

*Defensio in vindicando verborum vero sensu consistens.*

*Si quis verba alterius in sensum alienum detorquet & sententiam a mente ejus alienam impugnatur; defensio absoluta est, ubi verus verborum sensus fuerit demonstratus.* Etenim si demonstratur verus verborum sensus, eo ipso certum est, sententiam verborum detorsionibus innixam non esse suam, consequenter cum eadem sit, quæ ab altero impugnatur, eam, quam ipse fovet, non esse impugnatam, nedum refutatam. Defensio adeo absoluta est (§. 1058.).

E. gr. Nos in cosmologicis stabilivimus in mundo materiali nexum rerum sapientem, quem per dependentiam a causis efficientibus & finalibus explicamus & unde in Teleologia sapientiæ divinæ per opus creationis demonstratæ argumenta petimus. Cum quidam nexum rerum & earum concatenationem pro synonymis haberent, quodque *Spinoza* fatalis ac brutæ necessitatis assertor termino concatenationis utitur, illum quoque per fatalem necessitatem interpretarentur ac inde consequentias periculosas colligerent, quasi providentia, immo existentia Dei hoc ipso negaretur, omnis religio cum christiana, tum naturalis subverteretur &c. non alia defensione opus erat, quam ut verum verborum sensum vindicarem: id quod (§. 91.) demonstrativa ratione fieri poterat, cum nullis in definiendo nexu usus fuero terminis, nisi ante explicatis. Equidem novi non deesse, qui sibi persuadent, defendentem ad singula respondere debere, quæ contra ipsum in medium proferuntur, consequenter non sufficere, ut verum verborum sensum vindicet sicque omnes objectiones uno impetu a se amoliat: enimvero ratio nulla logica idem fieri suadet. Num aliæ esse possint rationes, cur superfluum videri nequeat, quod tale censi debet, quamdiu solius veritatis habetur ratio, ex moralibus ac politicis principiis decidendum. Stantibus rationibus logicis, nec ulteriore defensione opus est, ubi alter sententiam

tiam, quæ verbis in alienum sensum detortis respondet, prorsus refutavit. Etenim ubi sententia, quæ a mente tua aliena, refutata fuit, tuum non est eam defendere.

## §. 1066.

Si quis sententiam impugnet, vel prorsus refutet, quam verba alterius fundere videntur, nec verus horum sensus demonstrativa ratione patere possit; defensio erit absoluta, ubi is verba sua ita interpretatur, ut sensum fundant impugnanti, vel refutanti probatum. Etenim si notio, quam verbis alterius jungimus, sensum producat erroneum, nec tamen probari possit, ex ejus intentione eam cum iisdem notionem esse jungendam; confiteri præstat, nos mentem ejus non assequi, quam errorem eidem tribuere (§. 921.). Quodsi ergo ipsemet verba sua interpretatur, ut sensum fundant, quem impugnans vel refutans admittere tenetur; multo minus errorem invito obtrudere debet. Quamobrem cum non habeat amplius, quod impugnet, vel refutet, defensio absoluta (§. 1058.).

Defensio ob-  
nens sensu  
verborum  
dubio.

Qui veritatis amore ducuntur, in hac defensione lubentes acquiescunt: neque enim quidpiam agendum amplius restat, quod veritatis amor suadeat. Postquam sensus dubius explicatus, ut in perversum verba amplius trahi nequeant, nec metuendum est amplius ut autoritate invaleseat error. Hinc enatum est illud pervulgatum: Quemlibet esse verborum suorum optimum interpretem.

## §. 1067.

Quoniam persecutores sub prætextu veritatis defendenda dissentientes in discrimen famæ, fortunæ, immo vitæ adducere conantur (§. 1051.) & consequentarii nocendi animo consequentias cumulant, donec ad ridiculas, vel periculosas pervenerint (§. 1048.), neque, ut hoc fieri possit, primam consequentiam precario sumere, immo ut aliqua veri specie eandem sumere imperitis videantur, verba alterius in sensum perversum detorquere verentur (§. 1047.); persecutores pariter ac consequentarii interpretationem verborum propriam, quæ nullum errorem parit, non admittunt, consequenter pro defensione nulla eam habent.

Cur persecu-  
tores & con-  
sequentarii  
eam non  
agnoscant.

(Wolfii Logica)

D d d d d

Hinc

Hinc audias consequentarios urgere erroris recantationem, quem alteri invito obtrudunt; non modo in casu interpretationis dubiæ, verum etiam in casu manifestæ. Videas quoque persecutores in obtrudendis erroribus in utroque casu persistere, ad erroris confessionem, si quidem fieri possit, alterum vi adactus, ut, cum error crimen habeatur publica magistratus animadversio dignum, finem a se intentum consequi possint (§. 1048. 1051.). Utinam hæc praxis ab iis esset aliena, qui puriora sacra se profiteri gloriantur & christianismi collapsi restauratores appellari amant!

## §. 1068.

*Defensio contra impugnationem directam, quæ sit probando contrarium.*

*Si quis propositionem aliquam directe impugnaturus ei contrariam directe probare nititur; illam defensurus ostendere debet, vel quod sumat principia precaria, aut prorsus falsa, vel quod in formam syllogismorum ratiocinando impingat. Si ostendit, alterum sumere principia precaria, aut prorsus falsa, vel in formam syllogismorum ratiocinando impingere; eo ipso patet, contrarium ejus, quod impugnat, nondum fuisse demonstratum (§. 562. 635.). Quamobrem nec inde colligi potest, propositionem, quam impugnat, esse falsam (§. 530.). Demonstratum adeo est, propositionem impugnatam non fuisse refutatam (§. 1017.), adeoque eandem defensam esse liquet (§. 1058.).*

Se defendere hoc in casu idem est ac contrarium refutare, quod impugnator tanquam verum amplectitur, ostendendo modum, quo in errorem incidit, ut vel falsum, vel dubium pro certo reputet (§. 1033.).

## §. 1069.

*Defensio contra impugnationem directam, quæ nititur fonte erroris.*

*Si quis propositionem aliquam directe impugnaturus modum ostendere nititur, quo in errorem incidit alter, vel quædam principia falsitatis arguens, vel vitium formæ imputans; illam defensurus principia illa demonstrare, vel a posteriori confirmare tenetur, nisi sint adeo manifesta, ut ad peritos provocare liceat; vitium vero formæ per ignorantiam Logicæ imputari demonstrare debet. Etenim si demonstret, vel a posteriori con-*

confirmet principia, quæ falsitatis arguit impugnator; eadem certa esse constat (§. 567. 568.). Demonstratum adeo est, propositionem, quæ impugnata fuit, non esse refutatam (§. 1033.), consequenter eadem defensa est (§. 1058.).

Quodsi impugnans ignoret principia, quæ manifesta esse peritis dudum constat; in eo refutando inanis opera sumitur, neque adeo contra eum disputandum est (§. 1038.). Quamobrem hic sufficit provocare ad consensum peritorum allegatis inprimis autoribus, qui veritatem principii, quod falsitatis perperam arguitur, vel demonstrarunt, vel a posteriori confirmarunt. Etenim cum tum perinde sit ac si ipsemet idem denuo præstitisset; patet ut ante, defensionem esse propositionem quæ impugnatur.

Denique si impugnator imputet peccatum in forma admissum atque beneficio principiorum logicorum ostendatur, quod per eorum ignorantiam pro tali habeatur, quod iisdem consentaneum; illud ex falso imputari demonstratum est. Constat igitur denuo sententiam impugnatam non esse refutatam (§. 1033.), consequenter ea sufficienter defensa (§. 1058.).

E. gr. Cum hypothesis de *origine fontium ex aqua pluviali* impugnaretur, quod *aqua pluvialis eadem non sufficiat*; eam defensus *Mariottus* experimentis ea fini factis ingenioso calculo probavit in *Tractatu de motu aquarum* part. 1. disc. 2. Oper. p. 338. & sequ. nonnisi tertia parte opus esse. Si quis in numerum principiorum precariorum referret *gravitatem aëris*; eam defensus non alia re opus habet, quam ut impugnatorem ad *Ottonem de Guericke*, *Robertum Boyleum* aut alium auctorem ableget, qui eam experimentis stabilivit. Si quis demonstrationem in forma impugnet, quod non conclusio syllogismi anterioris continuo ingreditur tanquam præmissa sequentem, quemadmodum in sorte demonstrativo accidit (§. 554.); eum docere reperis concatenationem syllogismorum, quæ fit ex conclusionibus plurium syllogismorum tanquam notione complexa formando iudicium intuitivum præmissæ vicem in syllogismo sequente obtineas adductis ex elementis Geometriæ exemplis.

## §. 1070.

*Defensio contra impugnationem indirectam vi consequentia minime absurda.*

*Si propositio indirecte impugnetur & ex ea deducta consequentia tantum habeatur pro absurda; illam defensurus aut demonstrare debet, hanc esse veram, aut ostendere minimum, quod sine probatione tanquam absurda sumatur. Etenim si demonstrari potest, propositionem esse veram, quam tanquam absurdam eam, quam impugnat, colligit alter; propositionem impugnatae minime refutatam fuisse in dubium vocari nequit (§. 1041.). Hac ipsa igitur demonstratione defensa est (§. 1058.).*

*Quodsi nondum constet, propositionem, quae ex impugnata colligitur, esse falsam; nec dum certum est, eam fuisse refutatam (§. 1041.). Quamobrem impugnatae defendis, ubi urges, consequentiam sine probatione, adeoque precario tanquam absurdam, & probationem postulas (§. 1058.).*

*E. gr. Ricciolus motum vertiginis terrae indirecte impugnans tanquam absurdum urget, quod illo admissio gravitas ejusdem corporis foret major versus aequatorem, quam versus polos. Illum itaque defensurus opponit observationes Gallorum aliorumque, qui de motu pendulorum didicerunt, gravitatem versus aequatorem omnino diminui. Similiter sententiam D. Augustini de mundo optimo impugnatae ex eo, quod hinc sequatur absurdum, mundum sine malo esse deteriores mundo, in quo malum datur, defendis, ubi urges, sine probatione pro absurdo haberi, quod tale esse minime probatum demonstratum non sit, mundum sine malo morali fore meliorem altero, in quo datur malum: quemadmodum a nobis factum est in Metaphysicis.*

## §. 1071.

*Defensio contra impugnationem consequentia precaria nimiam.*

*Si quis propositionem indirecte impugnans consequentiam unde eam falsitatis redarguit, sumit, non syllogismorum concatenatione colligit; illam defensurus monere debet, eam precario sumi atque urgere ut demonstretur, quomodo inde fluat. Etenim quantumdiu consequentia ex propositione impugnata legitima syllogismorum concatenatione, quae in demonstrationibus apagogicis locum habet (§. 553 556.), minime colligitur, tamquam*

quoque non constat, quod inde fluat, consequenter propositio, refutata non est (§. 1039.). Dum adeo mones, consequentiam precario sumi, & ut demonstretur, quomodo inde fluat, urges, eam defendis (§. 1058.).

E. gr. Qui *systema harmonie preestabilitæ Leibnitianum* impugnare, precario sumunt consequentiam, quod *eo stante nulla sit libertas*: illud adeo adversus hanc impugnationem indirectam defendis, ubi observas, consequentiam istam ex conditionibus istius systematis legitimo ratiociniorum nexu non colligi, sed gratis sumi, atque postulas, ut impugnatores dent, si possint, demonstrationem hujus propositionis: *in systemate harmonie preestabilitæ nulla est libertas*. Etenim ubi impugnator demonstrationem, quam petis, dare nequit, sed aut tacet, aut consequentiam precariam urgere pergit; hoc ipso tacite confitetur, se eam precario sumere, nec sibi constare, utrum ex illo fluat, nec ne.

## §. 1072.

*Iisdem positis, propositionem impugnatam defendit, qui contrariam consequentiæ precariæ directe inde colligit, vel ex assumpta consequentia colligit, quod propositioni impugnatæ, vel ejus hypothesei repugnat.* Etenim si contrarium consequentiæ precariæ directe inde colligitur, nempe quod posita propositione impugnata A sit B, vel quod eadem posita A non sit B; verum est, posita propositione impugnata in casu primo A esse B, in secundo A non esse B (§. 544.). Quamobrem cum hoc ipso pateat, falsum esse in primo casu, quod A non sit B, in secundo quod A sit B, posita propositione impugnata (§. 530.); si impugnator, vel consequentiarius in casu primo tanquam consequentiam urget, quod A non sit B, in secundo quod A sit B, demonstrativa ratione patet, eum falli, consequenter propositionem, quam impugnat, ab eo non esse refutatam (§. 1039.). Ea igitur defenditur, contrarium consequentiæ precariæ inde colligendo (§. 1058.).

Quod si ex assumpta consequentia per modum demonstrationis indirectæ (§. 553.) colligitur, quod propositioni impugna-



ta, vel ejus hypothefi repugnat; per indirectum demonstratur, stante propositione impugnata, consequentiam non esse veram (§. 556.). Atque adeo patet, quod tanquam consequentia urgetur, ex propositione impugnata minime consequi, consequenter propositionem istam non fuisse refutatam (§. 1039.). Defenditur itaque ex assumpta consequentia colligendo, quod eidem vel ejus hypothefi repugnat.

E. gr. Si *systema harmoniæ præstabilitæ Leibnitianum* consequentia precaria impugnatur, quod libertatem tollat; idem defendis, ubi cum *Jaqeloto* ostenderis, libertatem in eodem salvam & integram persistere. Fieri enim nequit, ut libertas in eodem salva sit & una per idem tollatur. Atque adeo consequentia precaria falsa intelligitur. Similiter quando *systema* idem impugnatur consequentia precaria, quod *singula actiones liberae externae in eodem per miracula fiant*, consequenter perpetua in eodem miracula sint admittenda; idem defenditur per indirectum sumendo propositionem istam tanquam veram & inde colligendo, quod *Deus ad nutum animæ potentia extraordinaria producat motus in corpore*, naturaliter non secuturos. Quoniam id *systemati harmoniæ præstabilitæ* repugnat; eo ipso constat, in eodem actiones externas per miracula non produci, consequenter miracula perpetua in eodem non admittenda esse. Unde de novo apparet, consequentiam esse precariam.

## §. 1073.

Defensio in  
casu conse-  
quentiarum  
cumulata-  
rum.

Si *consequentiae cumulantur, quarum una ex altera inferitur, propositio impugnata tantummodo defendenda est contra earum unam; si vero plures cumulantur, quarum una ab altera non pendet, contra singulas*. Etenim si propositionem contra consequentiam unam defendis; hoc ipso palam fit, eam inde colligi non posse, aut per errorem sive materiæ, sive formæ vitio inde collectam esse (§. 1071. 1072.). Quod si ergo ceteræ consequentiæ ex illa inferantur, adeoque non nisi illa posita ponantur; simul patet, quod nec ceteris consequentiis locus sit. Non igitur opus est, ut contra singulas propositionem impugnatam defendas.

Enim-



Enimvero si plures consequentiæ cumulantur, quarum una ab altera non pendet; propositio pluribus diversis modis impugnata fuit (§. 1044. 1025.). Defendenda igitur est contra singulas, ut pateat, nullo modo eandem esse refutatam.

Scilicet in hoc casu posteriori perinde est, ac si plures diversis modis adversus eandem propositionem insurgerent. Quis vero est, qui ignorat, in hoc casu fieri posse, ut unus eam, ubi falsa fuerit, refutet, etsi ceteri eandem male impugnent? Dixi superius, consequentiarum ex consequentia precaria, quod in *systemate harmonia præstabilite Leibnitiano libertas tollatur*, inferant alias de *virtute, penis, religione christiana & naturali* sublati. Idem defensurus ubi ostenderit, libertatem in eodem salvam esse, quemadmodum videte est in *Thümmigii Institut. Phil. Tom. 1. Psych. §. 256.* non opus habet ut ulterius prober, virtuti, pœnis, religioni cum revelatæ, tum naturali in eodem esse locum. Aliter vero sese res habet, ubi præter libertatem in eo systemate jugulatam urgentur perpetua miracula: quo in casu idem ab utraque consequentia liberandum. Etenim si vel maxime libertas subsistat in systemate *Leibnitiano*; non tamen ideo repugnat, ut actiones externæ sint totidem miracula & contra.

## §. 1074.

*Contra verba, quæ contumeliam, vel injuriam redolent, nulla defensione opus est.* Etenim verba ista nullum habent in refutatione momentum (§. 1056.). Quamobrem cum propositionem impugnatam defensurus demonstrare teneatur eam non esse refutatam (§. 1058.); verborum istorum nullam habere tenetur rationem in defensione.

*Defensione contra verba injuriosa cur non sit opus*

In Logica logicas damus rationes, iisque contenti sumus: morales non sunt hujus loci. Equidem librorum censores non ferre debebant, quod est contra bonos mores. Sed ea nondum est felicitas seculi nostri, ut verba istiusmodi bonis moribus repugnare putentur: immo videas viros singulari modestiæ ac pietatis laude inter suos eminentes, qui, cum rationibus destituti impugnationes injustas probare non possint, juvenes petulantes instigant, ut virorum bene meritorum famam convitiis ac calumniis lacestant.

## §. 1075.

§. 1075.

*propositionem impugnans ignorat principia, vel demonstrandi ac probandi methodum, vel utrumque; sese defensurum demonstrare debet.* Sese enim defensurus demonstrare tenetur, quod ab impugnatore non fuerit refutatus (§. 1053.). Quamobrem cum ignorans principia, vel demonstrandi ac probandi methodum, neminem refutare possit (§. 1017. 501.); te ab impugnatore non esse refutatum demonstrasti, ubi ostenderis, quod vel principia, vel demonstrandi ac probandi methodum, vel utrumque ignoret. Hoc igitur pacto te defendisti.

Argumenta desumuntur vel ab ipsa impugnatione, quæ satis prodit ignorantiam impugnatoris, vel ex ejus scriptis, quæ publici juris fecit. Et si hæc defensio molesta accidat hominibus imperitis, quos indignos fortuna extulit; haud quaquam tamen ipsis sit injuria. Impudent enim sibi, non defensori, quod impugnaverint, quæ non intelligunt, & cui refutando, si vel maxime fallum fuerit, haud quaquam pares sunt, sicque illum ad defensionem ipsis molestam coegerint. Absonum vero est, ubi non habentes, quod reponant, defensorem immodestæ accusant.

§. 1076.

*In primis contra consequentiarium & persecutorem in eo casu.*

Quoniam *consequentarius & persecutor* sub prætextu veritatis vindicandæ alteri nocere intendit (§. 1048. 1051.); ubi *principia & methodum demonstrandi ac probandi ignoraveris, multo magis id demonstrandum*, ne fidem habeant dicenti, qui per se de veritate propositionis impugnatæ statuere nequeunt.

Rationes morales, quas nunc seponere jubemur, suo tempore in moralibus dabimus. Immo sunt præterea alia, quas Politica suppeditat. Ita Christus ipse Phariseos cæcutes probavit, quod veritati cælesti repugnantes ipsius dogmata tanquam erronea traducerent.

§. 1077.

*Defensio contra persecutores.*

*Contra persecutorem sese defensurus demonstrare debet, quod sit persecutor*, h. e. quod sub prætextu veritatis defendendæ se in discrimen famæ, fortunæ, immo vitæ adducere conetur (§. 1051.)

(§. 1051.) *Et cur sit persecutor.* Etenim cum persecutores sub pretextu veritatis defendendæ dissidentes in discrimen famæ, fortunæ, immo vitæ adducere conentur (§. 1051.); sese defensurus id agere debet, ut eorum propositum pateat, tum ut in ruborem det ipsos persecutores, nisi prorsus omnem pudorem exuerint; tum ne tam facilem penes alios inveniant fidem. Demonstrandum itaque est, quod sint persecutores & cur tales agant.

Nec hic desunt rationes morales ac politicæ, quas alibi dabimus, in logica tantisper sependendæ. Exemplo vero nobis iterum Christus est, qui contra Phariseos sese defensurus ipsis exprobravit, quod ipsum e medio tollere conentur, addita ratione, quod diabolum patrem revereantur facturi, quod eidem arrideat, eosque mendaces appellavit.

## §. 1078.

*Si quis alteri imputat consequentias ridiculas & periculosas, quales opiniones ipsemet fovet; sese defensurus demonstrare debet, eum persequendi animum habere ac ipsummet fovere opiniones ridiculas & periculosas.* Etenim istiusmodi consequentiarum cum in persecutorem facile degeneret, modo non desint vires (§. 1052.), quod persequendi habeat animum demonstrandum est (§. 1077.), tanto minus in eodem ferendum, quod ipsemet foveat opiniones ridiculas & periculosas; quo ipso facti indiguitas clarius elucescit.

*Defensio contra imputationem consequentiarum.*

Exemplo nobis denuo Christus est, qui, cum Pharisei ipsi imputarent, quod Samarita cum Diabolo commercium habeat, retorfit ipsos facere opera Diaboli patris sui & a Dei cognitione alienos esse. Pendent hæc a jure retorsionis alibi explicando.

## §. 1079.

*Scripta polemica dicuntur, quibus errores refutantur aliorumque sententiæ impugnantur vel defenduntur, vel earum defensio tentatur. Subinde quoque eristica appellantur. Apologetica vero vocantur, quibus continentur defensiones ad-*

*Scriptorum polemicorum & apologeticorum definitio.*

(Wolffii Logica)

E e e e

ver-

versus imputationes errorum ridiculorum & periculoforum ,  
nec non adversus persecutores.

E. gr. Theologia polemica appellatur ea theologiæ pars, in qua  
objectiones dissentientium discutiuntur. Apologias scripsere chris-  
tiani doctores adversus imputationes iniquas gentilium. In hunc  
quoque censum veniunt tria scripta apologetica, quæ adversus con-  
sequentiarium persecutorem idiomato Germanico edidi.

§. 1080.

*Regula in  
istis conden-  
dis observan-  
da.*

Quoniam in antecedentibus (§. 1017. & seqq. atque §. 1058.  
& seqq.) docuimus, quæ refutandi, impugnandi & defendendi  
animo fieri debeant; *scriptum polemicum & apologeticum condi-  
turus observare debet, quæ de refutando & defendendo a nobis  
præcipiuntur (§. 1079.).*

Non igitur opus est ut ad specialia descendamus. Sufficiat nobis  
hoc unum addidisse, quod cum in scriptis polemicis vel errantem,  
vel adversarium, vel alios erroris aut impugnationis male factæ, in  
apologeticis præterea iniquitatis adversarii & persecutoris convin-  
cere lectores intendas, usui hic quoque esse possint, quæ de modo  
alios convincendi (§. 982. & seqq.) capite integro tradidimus.

§. 1081.

*A scriptis  
eristicis cur  
abhorreant  
intelligentes  
& virtute  
præditi.*

Quoniam si propositio vera demonstratur, eo ipso con-  
traria refutatur (§. 1035.), alter vero per indirectum refutatur,  
si erroneam, quam tuetur, sumis tanquam veram & inde syllo-  
gismorum concatenatione infers aliam, quam ipse falsam agno-  
scit (§. 1039.), hoc est, si veram indirecte demonstras (§. 553.);  
consequentiariorum vero praxis (§. 1047. & seqq.) a bonis mo-  
ribus & virtute abhorret (§. 1045.); ideo *viri intelligentes ac vir-  
tute præditi a scriptis eristicis abhorrent.*

Nostri moribus scriptis eristicis inclarescere student, qui solida  
rerum cognitione destituti methodique ignare dare nequeunt ad scien-  
tiæ incrementa proficua. Et tanto quis doctior habetur, quanto in  
praxi consequentiariorum exercitior & in verbis impudentior.  
Hac via cum ad gloriam contendant, qui famam nullam merentur,  
juvenibus incautis imposituri; contra doctrinam solidam Acheron-  
ta movent.

§. 1082.

## §. 1082.

Cum argumento ab invidia ducto odium concitetur in *Scripta apo-*  
 aliorum placita, ut ea opprimantur (§. 1049.), & ipsis autori- *logetica*  
 bus aut defensoribus famæ, fortunæ, immo vitæ periculum *quando ne-*  
 creetur (§. 1050. & seqq.); *scriptis apologeticis opus est, quando cessaria.*  
*interest generi humano, ne veritas opprimatur, & qui verita-*  
*tem profitentur fumæ, fortunæ ac vitæ periculum a se depellere*  
*tenentur.*

Rationes morales atque politicas in Logica seponimus, hoc uni-  
 ce notato, quod philosophia civilis pariter ac moralis suppeditet re-  
 gulas in scriptis apologeticis & polemicis observandas, ne a virtutis  
 tramite recedamus: id quod facile fieri poterit, ubi indignitati con-  
 sequentiariorum & malitiæ persecutorum irascimur.

## CAPUT IV.

## DE METHODO DISPUTANDI.

## §. 1083.

**D**isputatio nostris moribus est mutua propositionis alicujus *Disputatio-*  
 impugnatio vel refutatio ac defensio in loco publico fa- *nis definitio.*  
 cta. Hinc *disputare* dicitur, tum qui thesin impugnat,  
 vel etiam refutat; tum qui eam adversus impugnationem de-  
 fendit, vel refutationi tandem cedit.

Obtinet hic mos in Academiis, ubi specimen publicum edituri,  
 quantum in doctrinis, quibus animum imbuerunt, defendendis va-  
 leant, disputare solent.

## §. 1084.

Propositio ad disputandum proposita dicitur *Thesis*. Qui *Opponentis*  
 thesin impugnat, vel refutat, si fieri possit, vocatur *Opponens*; *Respondentis*  
 qui eam contra impugnationem defendit, vel refutationi tan- *ac Præsidis*  
 dem cedere cogitur, *Respondens*; qui partes respondentis susci- *definitio.*

Eccce 2

pit,

pit, *Præses* vocatur : ut adeo appareat, *Præsidis ac Respondentis easdem esse partes*. Omnes communi nomine *Disputantes* appellantur.

## §. 1085.

*Contradictio  
disputan-  
tium mutua.*

*Disputantes in terminis contradictoriis versari debent.* Quoniam qui thesin defendit, eam pro vera aut minimum probabili habet, qui vero eam impugnat, vel prorsus refutat, probare nititur, eam esse falsam, vel minus probabilem, aut idem prorsus demonstrat (§. 1017. 1018. 1058.); ubi opponens negat, propositionem datam esse veram vel probabilem, respondens idem affirmare tenetur, & e contrario ubi opponens affirmat, propositionem datam esse veram vel probabilem, respondens idem negare debet. Versantur adeo in terminis contradictoriis (§. 288.).

E. gr. Si respondens affirmat, *mundum hunc, quem Deus condidit, esse omnium possibilem optimum*; opponens idem negare atque tantquam verum sumere debet, *mundum hunc non esse omnium possibilem optimum*, vel, quod inde sequitur, *possibilem esse mundum, qui a Deo conditus fuit, meliorem*.

## §. 1086.

*Consensus disputantium  
in notionibus  
subiecti &  
prædicati.*

*Disputantes convenire debent in notionibus subiecti & prædicati*, ut nempe utrique non jungant, nisi eandem. Etenim in terminis contradictoriis versari debent (§. 1085.). Quamobrem cum in propositionibus contradictoriis idem prorsus esse debeat subiectum atque prædicatum, nec minimi quicquam in utroque immutare liceat, terminis singulis in eodem significato sunt (§. 288. 290.) & antequam de contradictione iudicari possit, determinata cum subiecti, tum prædicati notiones constituendæ, siue termino simplici utrumque indigitetur, siue complexo (§. 293.); evidens omnino est, quod in notionibus subiecti & prædicati convenire debeant.

E. gr. Si, qui affirmat, *mundum hunc, quem Deus condidit, esse omnium possibilem optimum*, per *mundum* intelligit omnem rerum cum

*simultanearum, tum successivarum inter se connexarum seriem, ita ut futurus beatorum status ad eam simul pertineat; optimum vero mundum dicit eum, qui fini a Deo per creationem intento magis quam ceteri convenit; contra eam oppositurus terminos singulos in eodem significatu accipere atque adeo negare debet, omnem rerum creaturam seriem fini a Deo per creationem intento magis convenire, quam quamcunque aliam. Etenim alias non disputat contra alterum, qui hanc, non aliam thesin defendit.*

## §. 1087.

Unde consequitur, *opponentem propositionem, quam impugnandam sibi sumit, ante explicare debere, quam opponat, nisi sensus fuerit manifestus*, ut scilicet respondens tempestive monere possit, si is ab opponente vel prorsus, vel parumper mutetur. Idem quoque hoc modo ostendi potest: Opponens impugnat propositionem, quam respondens defendit (§. 1084.). Sed antequam propositio impugnetur, explicanda est, nisi sensus fuerit manifestus (§. 1027.). Ergo & opponens propositionem, quam impugnandam sibi sumit, explicare debet, antequam opponat.

*Propositionis explicatio oppositioni præmittenda.*

In explicanda propositione usui sunt, quæ in investigando verborum sensu, dum librum legimus, inculcavimus (§. 903. & seqq.).

## §. 1088.

*Quod si opponens in explicanda propositione alias notio res sub- Respondentis officium circa falsam propositionis interpretationem ab opponente factam.*  
 1088. & prædicato jungit, quam respondens, ut prodeat in sensu a mente ipsius diversus; respondens propositionem in eo sensu rejicere ac opponentem docere debet, quas utrique termino notiones jungere teneatur, ut oppositio contra thesin fiat, quam defendit. Patet per se: neque enim respondens defendere potest thesin aliam, quam suam (§. 1084.). Est vero thesis alia, quam opponens impugnat, ubi is vel subjecto, vel prædicato, vel utrique notiones alias jungit, quam respondens (§. 325.).

Evitantur etiam hac ratione logomachia (§. 1030.), quæ disputantes minime decet.

E e e e e 3

§. 1089.

## §. 1089.

*Officium oppon-  
entis ubi  
sensus verbo-  
rum Respon-  
dentis obscu-  
rus.*

*Si sensus verborum respondentis non satis pateat opponenti, ex respondente querat necesse est, quamnam cum singulis notiones jungat.* Opponens enim cum respondente in notionibus sub-  
jecti & prædicati convenire debet (§. 1086.). Quamobrem  
ubi ipsi hariolari non datur, quamnam notiones subjecto & præ-  
dicato jungat respondens; ab ipso ut eas doceatur opus est.  
Ne igitur in sinistram interpretationem incidat, a respondente  
per ambages demum corrigendam (§. 1088.); ex ipso querere  
tenetur, quamnam sint subjecti ac prædicati notiones.

Hac ratione præcavetur, ne respondens, ubi opponenti respon-  
dere non amplius valet, ipsemet variet verborum suorum significa-  
tum, ut oppositio non videatur contra ipsum directa, sicque tempus  
disputando fallatur.

## §. 1090.

*Propositionis  
explicatio  
opponendo  
elicienda.*

*Quodsi respondens notiones singulis terminis jungendas abop-  
pugnante rogatus explicare nolit, opponens eas elicere debet im-  
pugnando propositionem ob obscuritatem.* Etenim si opponens  
propositionem obscuritatis accusat, hoc vel alio aequipollente  
argumento adversus eam insurgit: *Cujuscunque propositionis ter-  
minis notiones nullæ respondent, illa est sine mente sonus.* Atqui  
*terminis propositionis, quam respondens defendit, notiones nullæ  
respondent.* Ergo *propositio, quam respondens defendit, est sine  
mente sonus.* Majorem cum negare non possit respondens,  
contra minorem defensus ostendere debet, singulis propositio-  
nis suæ terminis respondere notiones (§. 1085.); id quod cum  
aliter fieri nequeat, nisi ut notiones iisdem jungendas indicet,  
opponens hac ratione notiones ex respondente elicit, quas ro-  
gatus explicare volebat.

Quodsi notiones nec dum dare possit, id utique indicio est, quod  
vel nullas habeat, vel admodum confusas, consequenter ipse non  
intelligat, quid sibi velit propositio ab aliis hausta: quo in casu di-  
sputationi nullus est locus. Necesse enim est, ut respondens intel-  
ligat thesin, quam defendere debet.

## §. 1091.



## §. 1091.

*Sensu propositionis impugnandæ, vel refutandæ certo, opponens ei contrariam probare, vel demonstrare debet.* - Opponens enim thesin respondentis vel impugnat, vel refutat (§. 1084.). *Probatio ab opponente requisita*  
 Quamobrem cum alter impugnetur, vel refutetur, ubi propositionem veram dubiæ, vel falsæ oppositam probas, vel demonstras (§. 1036.); opponens propositionem thesi respondentis contrariam probare, vel demonstrare debet.

E. gr. Oppositorus contra thesin, quod *mundus a Deo conditus sit omnium possibilium optimus*, probare debet propositionem contrariam, *mundus a Deo conditus non est omnium possibilium optimus.*

## §. 1092.

Cum probatio atque demonstratio vel directæ sit, vel indirectæ (§. 549. 550.), & in refutatione ac impugnatione demonstrationi ac probationi cum directæ, tum indirectæ locus sit (§. 1022. 1025.): *Probationis species.*  
*opponens propositionem thesi respondentis contrariam probaturus, vel demonstraturus, uti potest probatione, vel demonstratione, non minus indirecta, quam directa.*

E. gr. Opponens impugnaturus D. Augustinum, quod *mundus a Deo conditus sit optimus*, asserentem vel directe probare debet, *possibilem esse mundum eo, qui existit, meliorem; vel per indirectum ostendere, posito, sed non concesso, mundum hunc esse optimum, inde consequi, quæ vel notioni optimi, vel aliis veritatibus manifestis repugnant.*

## §. 1093.

Quoniam *opponens* respondentem erroris convincere intendit, nimirum quod affirmet, quod erat negandum, vel quod neget, quod erat affirmandum (§. 1083. 1084.), non uti debet nisi principiis a respondente concessis (§. 1037.), atque adeo *Probationis termini.*  
*probationem vel demonstrationem eo usque continuare debet, donec ad principia a respondente concessa pervenerit.*

Evidentius hæc patent ei, qui ad animum sibi revocat, quæ de convictione (§. 991. & seqq.) demonstrata sunt. Etenim ab iis evidentiæ propositionis præsentis pendet (§. 992.).

## §. 1094.

## §. 1094.

*Quando oppositio non habeat locum.*

*Quodsi ergo nulla sint principia, in quæ opponens & respondens consentiunt, vel ad talia nonnisi per ambages nimium probas perveniri detur; opponens contra ignorantem vel negantem principia disputare non debet.*

E. gr. Si quis neget, quæ *Newtonus* de ponderibus planetarum demonstravit, idem vero fuit Mathematicum prorsus imperitus; cum opponens demonstrare debeat propositiones *Newtonianas* (§. 1091.), in demonstratione non perveniet ad principia a respondente concessa. Frustranea igitur est omnis disputatio. Opponens igitur cum respondente de ponderibus planetarum disputare non debet.

## §. 1095.

*Cur formaliter sit disputandum.*

*Opponens syllogismos singulos, ex quibus ipsius probatio vel demonstratio constat, in forma sigillatim proponere debet.* Cum enim opponens respondentem erroris convincere intendat (§. 1083. 1084.); eam ad probationem, vel refutationem ipsius respondens afferre debet attentionem, quæ sufficit, ut agnoscat, & nullum summi principium, quod non sit certum, nec a forma demonstrandi aberrari (§. 1037.). Ut igitur respondens indicare possit, quænam admittat, quænam adhuc ulteriori probatione digna judicet, & quæ circa formam demonstrandi, adeoque & singulorum syllogismorum, ex quibus ea constat (§. 551. 552. 638. & seqq.), monenda sibi videantur; opponens utique est singulos syllogismos in forma proponere eosque sigillatim respondenti expendendos sistere.

## §. 1096.

*Unde oppositionis initium fieri debeat.*

*Opponens incipere debet a syllogismo ultimo, qui demonstrationem vel probationem ingreditur.* Etenim syllogismus ultimus in demonstratione; vel alia quacunque probatione, si ea directa fuerit, propositionis impugnatae contrarium; si vero indirecta fuerit, propositionem manifesto falsam, seu consequentiam absurdam, tanquam conclusionem infert (§. 551. 552. 553. 588.), vel subinde in casu posteriori ex propositione, quam impugnat,

pugnat, ejus contradictoriam colligit (§. 559.), & ubi a syllogismo ultimo ordine retrogrado ad anteriores ascenditur, præmissæ primo propositorum ex disciplinis minime notæ tanquam conclusiones inferuntur per anteriores, aut ex pluribus conclusionibus anteriorum formantur (§. §. cit.). Quamobrem si ab ultimo syllogismo ad anteriores continuo ascenditur, respondens non modo videt, quod a scopo minime aliena proferantur, sed quæ ad thesin ipsius impugnandam faciunt; verum etiam opponens facto ipso intelligit, quousque probationem continuare debeat. Opponens adeo a syllogismo ultimo incipere tenetur, qui demonstrationem, vel probationem ingreditur.

Uthæc & sequentia rectius intelligantur, sumatur exempli loco demonstratio logice resoluta (not. §. 551. 552. 553. 559.) & ordine retrogrado a syllogismo ultimo ad anteriores ascendatur. E. gr. Si quis affirmaret, *modos ingredi posse definitionem*, contra eam oppositurus demonstrare debes, *modos non posse ingredi conclusionem* (§. 1085.). Hanc igitur propositionem probaturus incipis a consequentia immediata: *Modi ex definitione exulare debent*. Ergo *definitionem ingredi nequeunt*: Vel integrum formas syllogismum: *Quicquid ex definitione exulare debet, id definitionem ingredi nequit*. Atqui *modi ex definitione exulare debent*. Ergo *modi definitionem ingredi nequeunt*.

§. 1097.

Ex demonstratione propositionis præcedentis simul liquet, si probationem contrariæ thesios, vel illationem consequentiæ absurdæ ex thesi, quam impugnas, eo modo logice resolvas, quo demonstrationes resolvuntur (§. 551. & seqq.); modum oppositionis hinc fieri manifestum.

*Modus oppositionis quomodo innoteat.*

Ita nimirum præcaveretur, ne in dato casu proferas, quæ ad præsens negotium nequaquam spectant: etenim hoc pacto vides, quam viam ingredi tenearis, ne quisquam habeat, quod in forma oppositionis reprehendat; immo singula, quæ facis, demonstrativa quadam ratione tueri vales. Nec minus hoc pacto innoteat, ubi ab aliis fuerit aberratum, quando in formam oppositionis impingunt. In hac vero analysi logica consistit præparatio ad oppositionem formæ legitima.

(Wolffii Logica)

Fffff

§. 1098.

## §. 1098.

*Quando respondens dicendus sit ignorare principia.*

Quoniam in syllogismis, quæ probationem vel demonstrationem ab opponente allatam ingrediuntur, præmissæ duplicis generis occurrunt, quarum alix sunt propositiones ex disciplinis petitz, quo spectat argumentum, de quo disputatur; alix vero conclusiones per syllogismos, quorum concatenatione fit probatio, vel demonstratio, illatæ, aut propositiones ex pluribus istiusmodi conclusionibus per modum propositionis intuitivæ formatæ (§. 551. & seqq.); respondens autem thesin impugnata defensurus nosse debet definitiones ac propositiones, quæ ex disciplinis, quo illa spectat, mutuo sumuntur & a petitis certæ agnoscuntur; respondens *dicendus est ignorare principia, quando ignorat definitiones ac propositiones ex disciplina, quo thesi impugnata spectat, in usum præmissarum mutuo petitis* (§. 562.).

E. gr. Si in exemplo paulo ante (nos. §. 1096.) allato, facta ab Opponente oppositione juxta formam analyseos logicæ supra (nos. 551.) datæ, respondens ignoraret *definitionem modi atque notarum*, nec non *axiomata*, quod *mutabilia non constanter insunt*, & *que constanter non insunt, rebus a se invicem discernendis inservire nequeant*, ac propositionem quod *in definitione nec plures, nec pauciores enumerande sint notæ, quam quæ ad rem definitam agnoscendam sufficiunt*, aut saltem harum præmissarum unam vel alteram, tum vel principia omnia, vel aliqua eorum ignorare dicendus est. Hæc probe tenenda sunt, ne abusus fiat regulæ communis, contra ignorantem principia non esse disputandum.

## §. 1099.

*Assumptionis argumenti & responsionis ad idem definitio.*

Syllogismus ab opponente prolatus contra thesin respondentis, quam impugnat, vocatur *argumentum*. *Syllogismus* vel *argumentum* a respondente *assumi* dicitur, dum ab eodem integer repetitur, prout ab opponente fuit prolatus. Idem respondens dicitur *respondere ad argumentum*, sive *syllogismum*, dum monet, quamnam præmissam concedat, seu tanquam veram admittat; quamnam vero adhuc in dubium vocet probationem

tionem ejus desiderans , & num formam syllogismi legitimam agnoscat, an vero vitium aliquod in eadem deprehendat.

E. gr. Si opponens ita argumentatur: *Quicquid ex definitione excludere debet, id eandem ingredi nequit.* Atqui *modi ex definitione excludere debent.* Ergo *eandem ingredi nequeunt*; respondens syllogismum assumit, dum singulas propositiones, ex quibus is constat, eodem ordine repetit. Dum vero inquit, *se concedere majorem, negare minorem, aut petere probationem minoris*, ad argumentum respondet, formam tacite approbans, dum nihil in ea reprehendit.

#### §. 1100.

Ut appareat, *respondentem mentem opponentis rite percipisse, syllogismos, singulis assumere debet.* *Cur respondens argumentum assumere debeat.*

Argumenti igitur assumptio axiomatis instar admittenda, cum ejus necessitas pateat, quam primum notionem assumptionis (§. 1099.) affectus faciat. Unde non probatur, si respondens respondere velit ad argumentum, antequam idem assumerit.

#### §. 1101.

*Respondens ad syllogismos singulos ab opponente prolatos respondere debet.* Opponens thesin respondentis vel impugnatur, vel refutat (§. 1084.), adeoque vel demonstrat (§. 1017.), vel probare nititur, falsam esse propositionem, quam pro vera habet respondens (§. 1018). Quoniam vero constare nequit, utrum a parte opponentis stet veritas, nec ne, nisi quando respondens agnoscit, nullum sumi principium tanquam præmissam in syllogismis, ex quibus demonstratio vel probatio constat, quod non verum esse concedat, atque nihil ullibi in forma fuisse peccatum (§. 1037.); necesse utique est, ut respondens ad singulos syllogismos moneatur, quantum præmissarum concedat, quamnam in dubium vocet, & num circa formam aliqua sint reprehendenda. Ad singulos igitur syllogismos respondere tenetur, quos opponens profert.

*Cur ad idem respondere debeat.*

Ubi maxime distincte respondere voluerit, argumento assumpto, & majorem & minorem cum adjecta responsione denuo repetere debet. E. gr. Syllogismo anteriore (not. §. 1099.) assumpto, ait: *Quicquid ex definitione excludere debet, id eandem ingredi nequit, concedo majorem, &*

porro: *Atqui modi ex definitione exulare debent, nego minorem, vel probetur minor.*

§. 1102.

*Quando alterutram præmissam transire jubeat respon-*

*Quodsi respondens utramque præmissam in dubium vocet, unam tamen probationi magis indigam existimet, quam alteram; illas probationem petit, hanc tantisper seponit (id quod indicare potest hæc verbis: transeat major, vel minor), donec illa sue sit absoluta. Etenim si utramque præmissam in dubium vocat respondens, fieri non poterit, ut ab opponente convineatur, quamdiu is utramque non ita probaverit, ut nec quoad principia, nec in forma quidpiam desideret respondens (§. 1037.). Quoniam tamen utraque præmissa una probari nequit, necesse utique est, ut nonnisi unius probationem urgeat, alteram vero tantisper seponat, donec probatio ista fuerit absoluta. Et cum magis suspicari liceat, fore ut sufficienter probari nequeat præmissa, quæ minorem veri speciem præ se fert, quam altera; hujus autem probationem ubi dare non potest opponens, omnis ejus oppositio in cassum cadat, si vel maxime præmissa altera respondenti dubia visâ demonstrari possit (§. 538. & seqq.): igitur eam utique seponere debet, quæ majorem veri, aut minorem falsi speciem habet, donec altera fuerit probata, ne inanem operam in probando sumat opponens.*

§. 1103.

*Quando utramque ne-*

*Quodsi utroque præmissa eadem incertitudine respondens laborare videatur, utramque etiam negare debet, arbitrio opponentis relicto, utram primoloco probare velit. Etenim cum nulla adsit respondenti ratio, cur alterutrius præmissæ probationem priori loco petere debeat; id utique opponentis arbitrio relinquendum.*

E. gr. Si in exemplo anteriori (not §. 1101.) minor a respondente negata ab opponente hoc prosyllogismo probetur: *Quod ex notarum numero excluditur, ex definitione exulare debet. Modi ex notarum munera excluduntur. Ergo modi ex definitione exulare debent; ex analysi si logica demonstrationis propositionis, quod modi definitionem ingre-*

## De methodo disputandi.

— 5 —

nequeant, patet a respondente a maiorem, & minorem negari cum utraque sit conclusio per alium syllogismum illata (not.

### §. 1104.

*Quodsi contingat, utramque præmissam esse adeo evidentem, Quando totum argu-*  
 respondente in dubium vocari non possit; totum argumentum  
*concedendum.* Concedenda enim est utraque præmissa, vi  
*mentum concedat.*  
*theor.*, adeoque & conclusio, quæ, si præmissæ fuerint veræ,  
 ipsa vera est (§. 537.).

E. gr. In exemplo anteriori vi analyseos logicæ (not. §. 551.) tandem devenitur ab opponente ad syllogismum. *Quæcunque mutabilia sunt, ea constanter non insunt. Sed modi sunt mutabiles.* Ergo *modi constanter non insunt.* Quoniam major est axioma; minor per definitionem modi patet: neutram præmissarum respondens in dubium vocare valet, atque adeo totum argumentum concedere debet. Ridetur enim, qui concessis præmissis conclusionem negaret, tanquam ignorans Logicæ principia (§. 537.), quas nosse debent disputantes.

### §. 1105.

*Propositio dicitur restringi, si notio subjecti, vel quod ad Restrictio-*  
 notionem subjecti & prædicati refertur, ita determinatur, ut  
 subjecto conveniat prædicatum, quod sine ista determinatione  
 convenire non poterat. Illa autem determinatio *Restrictio ap-*  
 pellari solet & quidem in casu primo *recta*; in altero *obliqua.*  
*nis definitio & differen-*  
 Propositio, in qua subjecti vel prædicati notio non sufficienter  
 determinatur, vocatur *irrestricta*, vel *restringenda*; propositio  
 vero, in qua determinatio sufficiens datur, *restricta*, aut *re-*  
*strictiva.*

E. gr. Propositio, *quæ difficilia sunt, pulchra sunt*, est irrestricta, neque enim in omni casu vera est, cum non quævis difficilia intelligenda sint, sed nonnisi ea, *quæ bona, aut quæ virtutis sunt, vel laude digna.* Unde propositio restricta talis erit: *Bona difficilia pulchra sunt, vel quæ difficilia in genere virtutis sunt, pulchra sunt, vel difficilia laude digna pulchra sunt.* Et hæc quidem propositio exemplum præbet restrictæ rectæ restrictione: obliqua vero restrictione gaudet hæc altera, *Ptolomaus est princeps Astronomorum veterum*, cui irrestricta respondet *Ptolomaus est princeps Astro-*  
*nomo-*

*nonnulla. Denique res illa, quæ respectu exemplum est, Aer est levis respectu fluidorum sensibilium, cui respondet: nescit, non est levis.*

§. 1106.

*Limitata  
propositionis  
definitio.*

Quodsi determinatio subiecti, vi cuius prædicatum eidem competit, sit vel aliqua ejus pars, vel modus, *proposito* dicitur *limitata*: si ea omittatur, *illimitata* appellatur.

Patet adeo differentia, quæ inter propositionem restrictam & limitatam intercedit. Nimirum in propositione limitata determinatio sumitur ab intrinseco; in restrictiva ab extrinseco. Ita in exemplo propositionis recta restrictione restrictæ, *Difficilia in genere virtutis, vel laude digna*, aut *difficilia, quæ bona sunt, pulchra sunt*, determinatio difficilis desumitur ab extrinseco, neque enim in notione difficilis continetur ratio, cur sit in genere virtutis, vel laude dignum, vel bonum. Similiter dum *Ptolemaus princeps Astronomorum veterum* appellatur, determinatio a tempore desumpta extrinseca est. Nec aliter sese res habet in restrictione respectiva, *Aër est levis respectu fluidorum*, ubi determinatio respectu subiecti, quod aër est, itidem extrinseca. Enimvero exemplum propositionis limitatæ est, *æthiops est albus quoad dentes*, ubi determinatio desumitur a parte subiecti, & illimitata propositio eidem respondens hæc est: *æthiops est albus*. Similiter ubi dixeris: *Lapis, quatenus calidus est, calefacit*, seu quod idem est, *omnis lapis calidus calefacit*, determinatio, in qua consistit limitatio, quatenus calidus est, desumitur a modo. Sunt qui terminos restrictionis & limitationis invicem permutant: Sunt & alii, qui utramque *limitationis* nomine designant. Cum in disputando nullum in eo situm sit momentum, utrum determinatio, quæ subiecto additur, vel ei, quod ad subiecti aut prædicati notionem refertur, intrinseca sit, an extrinseca; nec hic opus est, a restrictione limitationem distingui. Minime igitur refragamur, si quis utramque determinandi modum communi limitationis nomine designet. Si propositiones limitatæ ubivis Geometrarum more introducerentur, nec limitationi, nec restrictioni unquam foret locus in disputando, vel interpretando: quæ etiam ratio est, cur nos in disciplinis non ferentes propositiones nisi sufficienter determinatas in theoria Logicæ nullam restrictionis atque limitationis mentionem fecerimus.



## §. 1107.

Quando respondens præmissam syllogismi vel restringit, vel limitat, hoc est, determinationem omissam supplet, sub qua prædicatum subiecto convenit, sive ea ab extrinseco, sive ab intrinseco petatur (§. 1105. 1106.); *distinguere* dicitur & applicatio illius determinationis ad subiectum vel prædicatum *distinctio* appellari suevit.

E. gr. Si propositio *lapis calefacit* limitatur, adjecta determinatione, ubi fuerit *calidus*; inter *lapidem calidum* & *non calidum* sive *frigidum* distinguitur & *lapidem calidum calefacere* affirmatur, *lapidem non calidum* sive *frigidum calefacere* negatur. Similiter si propositio irrestricta *Ptolemaus est princeps Astronomorum*, restringitur, adjecta determinatione, quod sit *princeps veterum*, non *recentiorum*; inter *Astronomos veteres* & *recentiores* distinguitur. *Ptolemaum esse principem Astronomorum veterum* affirmatur. *Ptolemeum esse principem Astronomorum recentiorum* negatur.

## §. 1108.

Si opponens tanquam præmissa utitur propositione non sufficienter determinata, aut si mavis, irrestricta vel illimitata, seu restringenda & limitanda; respondens distinguere & applicata distinctione monere debet, quando maiorem vel minorem concedat, quando eandem neget. Etenim respondens ad argumentum opponentis respondere debet (§. 1101.), adeoque monere num præmissam aliquam concedat, num eam neget (§. 1099.). Quamobrem si contingat, cum propositionem aliquam, qua tanquam præmissa utitur opponens, certa adhibita restrictione vel limitatione concedere, ea autem deficiente aut alia adhibita restrictione vel limitatione negare; idem utique monere tenetur, ne absolute neget, quod ipsemet aliquo in casu concedere debet, atque adeo absolute negare nequit, consequenter distinguere & distinctione ad argumentum applicata indicare debet, quando maiorem vel minorem concedat, quando eandem neget (§. 1107.).

E. gr. Si opponens ita argumentetur: *Quodcunque est leve, illud non est grave. Sed aer est levis. Ergo aer non est gravis*; propositio, *aer*

*aër est levis, restringenda est restrictioe respectiva dicendo, aërem esse levem respectu fluidorum sensibilium ceterorum (§. 1105.). Respondens igitur cum minorem omni sensu negare non possit, distinguere inter levitatem respectivam & absolutam & distinctione hac ad argumentum opponentis applicata distincte monere debet, quid concedat, quid neget, dicendo: Quicquid est absolute leve, illud non est grave, concedo maiorem. Sed aër est absolute levis, nego minorem. Quicquid est respectively leve, respectu scilicet ceterorum fluidorum sensibilium, illud non est grave, nego maiorem. Sed aër est respectively levis, hoc est, levior ceteris fluidis sensibilibus, concedo minorem.*

## §. 1109.

*Quomodo distinctio inveniat.*

Quoniam distinctio consistit in applicatione restrictionis, vel limitationis ad subjectum propositionis limitandæ vel restringendæ (§. 1107.), restrictio vero vel limitatio in determinatione subjecti vel ejus, quod ad notionem subjecti vel prædicati refertur (§. 1105. 1106.); *distinctio invenitur inquirendo in determinationem subjecti, vel ejus, quod ad notionem subjecti aut prædicati refertur, qua stante prædicatum subjecto competit.*

Ita in exemplo præcedente (not. §. 1108.) distinctionem inter levitatem respectivam & absolutam suppeditavit restrictio minoris respectiva, quod nimirum aër sit levis respectu fluidorum sensibilium ceterorum.

## §. 1110.

*Opponentis officium, si respondens negat, vel distinguit, aliam præmissam.*

Cum respondens conclusionem tanquam veram admittere nequeat, quamdiu utramque præmissam tanquam veram non admittit (§. 537.); *Opponens præmissam a respondente negatam probare & distinctionem, ubi distinguit, vel rejicere, vel contra eam argumentari, hoc est, propositionem sic restrictam vel limitatam probare debet, prout eam negat respondens.*

E. gr. Si respondens concedit, *aërem esse levem respectively*, sed negat *esse levem absolute*; opponens *levitatem absolutam* probare tenetur, nisi respondenti manus victas dare voluerit.

## §. 1111.

*Enthymemate quando sit utentulum.*

*Si altera præmissa fuerit adeo manifesta, ut eam a respondente negari non posse certum sit; opponens per enthymema argumentari debet (§. 421.).*

E. gr

E. gr. In exemplo superiori (not. 1103.) major syllogismi, *quæcunque mutabilia sunt, ea constanter non insunt. Sed modi mutabiles sunt.* Ergo modi constanter non insunt, est axioma adeo evidens, ut in dubium vocari haud quaquam possit. Opponens itaque brevius argumentatur per enthymema: *Modi sunt mutabiles.* Ergo constanter non insunt.

## §. 1112.

*Si opponens syllogismo utitur hypothetico, in quo posito antecedente non ponitur consequens, antecedens licet verum sit; respondens consequentiam negare debet.* Et enim si antecedens verum sit, poni potest (§. 406.), adeoque a respondente concedendum. Cum tamen antecedente licet tanquam vero concessio poni nequeat consequens, seu tanquam verum concedi (§. cit.); a respondente utique neganda est consequentia, cum alias etiam consequens concedere teneretur (§. 407.).

*Quando consequentia in syllogismo hypothetico neganda.*

E. gr. Si opponens ita argumentetur contra existentiam mundi optimi, quem respondens defendit: *Si in mundo, qui existit, dantur mala physica & moralia, mundus hic non est optimus.* Sed verum est prius. Ergo & posterius; respondens antecedens, quod in mundo dentur mala physica & moralia, concedere teneretur. Quoniam adeo consequens negare nequit (§. 407.), consequentia neganda. Negandum scilicet est, ex eo, quod in mundo dantur mala physica & moralia, sequi, mundum non esse optimum.

## §. 1113.

*Si opponens utitur syllogismo hypothetico, in quo consequens falsum est, non tamen eodem sublato antecedens tollitur; denuo respondens consequentiam negare debet.* Et enim si consequens falsum est, recte tolli potest (§. 406.), adeoque a respondente negari nequit, quod idem recte tollat opponens. Cum tamen respondens concedere nequeat, ut tollatur antecedens, quod per hypothesein consequente sublato non tollitur; consequentiam utique denuo negare debet.

*Casus alter.*

E. gr. Si opponens contra existentiam mundi optimi hoc argumentum insurgit: *Si mundus est optimus, non dantur in eo mala physica & moralia.* Sed falsum est posterius. Ergo & prius; respondens concedere debet, falsum esse, quod in mundo non dentur mala physica

G g g g g

fica

*fica & moralia.* Cum tamen idem non concedat, *mundum hunc optimum non esse*; utique negare debet, *ex eo, quod mundus sit optimus. sequi, quod nulla in eo sint mala physica & moralia.*

## §. III4.

*Quando in  
syllogismo  
hypothetico  
antecedens  
negandum.*

*Si opponens in syllogismo hypothetico antecedens ponit, nec respondens integrum argumentum concedere, neque consequentiam negare potest, antecedens negare debet.* Etenim cum posito antecedente ponendum sit consequens, ubi consequentia admittitur (§. 407.), consequens tamen concedere nequeat respondens; antecedens omnino negare debet, seu, quod perinde est, negare tenetur, ab opponente antecedens poni posse; seu antecedens esse verum.

E. gr. Si opponens contra existentiam mundi optimi hoc argumento insurgit: *Si mundus sine malo morali melior eo, in quo idem locum habet, mundus qui existit optimus non est.* Atqui verum est prius. Ergo & posterius; respondens antecedens negare debet, scilicet *quod mundus sine malo morali melior sit eo, in quo idem locum habet.* Similiter si opponens ita argumentatur: *Si in systemate harmonia praestabilita nulla datur libertas, systema istud absurdum est.* Atqui verum est prius. Ergo & posterius; respondens negare debet antecedens, quod scilicet *in systemate harmonia praestabilita nulla sit libertas*, hoc est, affirmandum ipsi, *libertati in eodem esse locum.*

## §. III5.

*Quando con-  
sequens con-  
cedendum.*

*Si opponens in syllogismo hypothetico tollit consequens, quod tamen sublato antecedens tolli nequit, nec consequentia negari potest; respondens consequens concedere debet, hoc est, negare illud tolli posse.* Etenim si negari non possit consequentia, sublato consequente antecedens tolli debet (§. 407.). Cum tamen integrum argumentum concedere non possit respondens antecedens tolli non posse sibi persuasus; ideo negare debet consequens esse falsum seu tolli posse. Idem adeo tanquam verum concedere debet.

E. gr. Si opponens argumentatur: *Si systema harmonia praestabilita possibile, libertas in eo subsistit.* Sed libertas in eo non subsistit. Ergo non est possibile, vel brevius: Atqui falsum est posterius. Ergo & pri-

*Et prius; opponens concedere debet consequens, quod libertas in systemate harmonia subsistat; id quod idem est ac negare, libertatem in eo subsistere non posse, seu falsum esse, quod libertas in eo non subsistat, Quodsi opponens ita argumentatur: Si celeritas maxima non est impossibilis, rota eadem circa axem gyron nequit. Sed rota maxima celeritate circa axem gyron potest. Ergo celeritas maxima est possibilis, seu brevius: Sed falsum est posterius. Ergo Et prius; respondens concedere debet consequens, quod sc. rota circa axem maxima celeritate gyron nequeat: quod idem est ac negare idem esse falsum.*

## §. III6.

Quoniam modus disputandi non differt ab analysi demonstrationis logica (§.1097.) atque ea ad eandem attentio affertur, ut & appareat, nullam admitti præmissam nisi sufficienter probatam, nec ullum syllogismum nisi in forma legitimum (§.1098. & seq.); in disputatione adeo vis ab opponente factæ demonstrationis, aut defectus probationis omnium optime percipitur (§.569.), atque hinc vel propositionem ab opponente propugnatam certam (§.568.), vel dubiam esse evidentissime omnium constat (§.586.). *Ex disputatione adeo, si ad finem perducitur, opponente ac respondente officio suo satisficientibus, evidentissime innotesceat, utrum propositio aliqua certa sit, an incerta.*

*Andisputando veritas erui possit.*

Equidem non ignoro vulgo affirmari, quod disputando non eruatur veritas, experientia quotidiana in contrarium adducta. Sed ea nostro asserto minime repugnat. Nos enim loquimur de genuina disputandi forma, quæ Logicæ principiis consona in antecedentibus delineata fuit: a qua cum vulgo recedatur, mirum profecto non est, quod finis disputationis exulet. Plura inferius in eam rem dicendi occasio suppeditabitur.

## §. III7.

*Si per quæstiones disputare libuerit, opponens incipere a Quomodo per syllogismo primo, qui demonstrationem vel probationem ingredi- quæstiones sit tur, Et ex respondente querere debet, num hoc vel istud princi- disputandum. pium, quo tanquam præmissa utitur, concedat Et conclusionem inde illatam admittat, ordine hinc progressurus ad ceteras, donec*

Ggggg 2

ad

*ad ultimum perveniatur.* Etenim ubi per quæstiones disputatur, per quæstiones consensum respondentis in principiis eliciamus & inde propositionem contrariam ei, quam impugnamus, vel refutandam sumimus (§. 1091.), vel consequentiam absurdam ex thesi respondentis inferimus (§. 1092.). Quoniam itaque in demonstrationibus a principiis ad conclusiones descendimus (§. 551. & seqq.); a syllogismo primo incipere debet opponens inde ad sequentes continuo progressurus, donec ad ultimum perveniat, nec aliud quid ex respondente quærere valet, nisi an hoc istudve principium concedat & concesso eodem ulterius hanc, vel istam conclusionem.

Si quis ad analyfin logicam demonstrationum supra allatarum (not. §. 551. & seqq.) attendit; ei manifestus evadit omnis mos per quæstiones disputandus. Cum tamen utramque disputandi methodum inter se conferenti appareat, *methodum syllogisticam* multo evidentiorē esse *methodo erotematica*; illam huic præferre nulli dubitamus. Neque adeo de erotematica plura in medium afferre libet, præsertim cum nostris moribus minime conveniat.

## CAPUT V.

## DE METHODO DOCENDI.

## §. III8.

*Docere quid sit.*

**D**ocere hic nobis idem est ac rerum alteri incognitarum notitiam verbis viva voce prolatis ejus animo ingerere.

E. gr. *Titius* Geometriam *Sempronium* docet, si eorum, quæ in Geometria traduntur, notitiam ejus animo viva voce implantare studet. Similiter *Mevius* Logicam *Cajum* docet, si doctrinas logicas cum eodem viva voce communicat.

## §. III9.

*Requisita ad docendum.*

Patet adeo, *docentem eorum, quæ docturus est alterum, notiones habere ac facultate instructum esse debere singulas ver-*  
bi

*bis convenientibus exprimendi.* Etenim nemo dubitat, quod docens ea, quæ docturus est alios, ipsemet intelligere debeat. Pone autem eum non habere eorundem notiones: verba igitur, quæ profert, erunt sine mente sonus, consequenter nil quicquam eorum intelligit, quæ alterum docere debet.

Quoniam vero verba sunt signa notionum, quibus eas alteri indigitamus (§. 36.), alterum vero docturus easdem in animo ejus excitare debet notiones, quas ipse habet, *per parrem primam hujus & definitionem præcedentem* (§. 1118.); facultate utique instructus esse debet notiones singulas cum discente communicandas verbis convenientibus exprimendi.

E. gr. *Geometriam alios docturus* notiones habere debet figurarum & ejus proprietatum ac relationum ad se invicem, de quibus in Geometria tractatur, nec minus eidem perspecti esse debent termini, quibus illas exprimunt Geometræ. Ita *Logicam alios docturus* regularum logicarum & terminorum in ea usitatorum notitia instructus esse debet. Etsi autem hæc adeo evidentia videantur, ut de iis dicere supervacaneum habeatur; praxis tamen contraria non sine discipulorum damno a moribus nostris non abhorret. Rationem ipsa propositio insinuat, quod scilicet non perpendunt, se non intelligere ea, quorum nullas habent notiones, nec notiones deceptrices, quæ verbis ipsorum respondent, discernere valent.

#### §. 1120.

*Si discens rei alicujus nondum habet notionem, nec docens* *Notionis communicatio.*  
*habet nisi confusam, hic eandem alteri aliter communicare nequit, nisi ut rem præsentem ei percipiendam sistat.* Etenim hæc ratio-  
ne docens eam, quam possidet, notionem affecutus: nec alter iisdem cognoscendi facultatibus instructus alia via ad eandem perducere potest, nullo hic existente verborum usu.

E. gr. Qui vulgo Geometriam practicam docent, figurarum non habent nisi notiones confusas ex earum conspectu hausas, definitionibus neglectis. Eas igitur cum discente communicaturi figuras in charta vel tabula delineatas oculis ejus spectandas subijciunt. Similiter Botanicam & materiam medicam docentes herbas & materias medicamentorum discipulis spectandas, immo olfaciendas &

gustandas exhibent. Ita operationum mentis notiones cum discen-  
te communicare licet in Logica, si docens eo adducit discentem, ut  
operationibus istis ipsemet fungatur eumque ad easdem attendere  
jubet.

## §. 1121.

*Notionis di-  
stinctæ com-  
municatio.*

*Si discens rei alicujus nullam adhuc habet notionem, habet  
tamen notiones notarum, quæ notionem illius distinctam ingre-  
diuntur, novitque præterea terminos, quibus singulæ indigitantur;  
docens notionem distinctam illius rei cum eo communicaturus re-  
censere debet notas singulas, quæ eam ingrediuntur. Etenim  
dum docens notas singulas enumerat, ex quibus notio distin-  
cta componitur, terminos profert, quibus eadem significan-  
tur. Quamobrem cum discens habeat notarum istarum no-  
tiones novitque terminos, quibus singulæ indigitantur per hy-  
pothesin; ei terminis a docente prolatis notæ singulæ in memo-  
riam revocantur (§. 116.). Quodsi ergo illas combinet, seu si-  
mul sumtas eidem subiecto tribuat; notionem distinctam ean-  
dem habet, quam docens. Is itaque eandem in hypothesi  
theorematis præsentis cum discen- te communicaturus non alia  
re opus habet, quam ut notas singulas enumeret, quæ notio-  
nem distinctam ingrediuntur.*

E. gr. Ponamus tyronem Geometriæ notiones habere claras, etsi  
confusas, quaternarii, æqualitatis, anguli recti & lineæ rectæ. Cum  
eodem notionem quadrati distinctam communicaturus eum docere  
debet, quod figura ista, quæ quadratum dicitur, terminetur lineis re-  
ctis numero quatuor ac inter se æqualibus, quæ junguntur ad angu-  
los rectos.

## §. 1122.

*Alius casus.*

*Quodsi ergo discens notarum, quæ notionem distinctam in-  
grediuntur, notiones vel nullas, vel obscuras habuerit, antequam  
docens notionem distinctam cum eodem communicare possit (§. 1121.)  
notiones notarum minimum confusas animo ejus ingenerare debet  
(§. 1120.).*

E. gr. Si tyro Geometriæ nondum habuerit notionem anguli recti;  
cum



cum in charta delineatum oculis ejus minimum subijcere debet docens, ut confusam saltem consequatur.

## §. 1123.

*Docens definitionem nominalem explicaturus discenti singulas notas sigillatim indicare debet, quæ eam ingrediuntur.* Et enim definitiones nominales sunt cum essentielles, tum accidentales (§. 193.). In essentialibus essentialia; in accidentalibus attributa, vel quæ per modum attributorum insunt, enumerantur (§. 192.), adeoque notæ recensentur (§. 79.), quot scilicet ad rem definitam agnoscendam & ab aliis distinguendam sufficiunt (§. 153.). Definitionem adeo distincte cogniturus singulas notas, ex quibus eadem constat, a se invicem discernere debet (§. 88.), consequenter docens discenti singulas sigillatim iadicare tenetur.

*Resolutio definitionum nominalium.*

E. gr. Si in Arithmetica definitio numeri quadrati explicanda est, docens discntem monere debet, 1. quod numerus quadratus sit aliquod factum & 2. quod hoc factum ab aliis differat æqualitate factorum, seu quod multiplicandus & multiplicator sint idem numerus. Similiter in Geometria definitionem quadrati explicaturus discntem sigillatim pendere jubet, 1. quod figura ista terminetur quatuor lineis rectis, 2. quod quatuor ista lineæ sint inter se æquales, 3. quod eadem invicem jungantur ad angulos rectos. Hac ratione notas singulas tanquam totidem definiti prædicata memoriæ infigit discens: id quod in applicatione definitionum usui est. Coincidit hæc regula cum ea, quæ resolutionem definitionis nominalis in propositiones præcipit lectori (§. 947.).

## §. 1124.

*Si in definitione nominali termini quidam occurrant, discnti vel nondum noti, vel nondum satis familiares; docens in casu priori notionum iis respondentium sive distinctarum (§. 1121.), sive confusarum (§. 1120.) communicatione intelligibiles eos reddere debet.* Etenim si discens terminos notarum vel prorsus ignorat, vel saltem non adeo familiares experitur, ut iis auditis notiones respondentes animum statim subeant; vel nullam iis jungit notionem, vel a vera diffidentem, consequenter definiti

*Explicatio earum.*

finiti notionem minime assequitur. Quamobrem cum docentis sit ejus animo ingenerare notiones, quas non habet (§. 1118.); igitur cum eorum, quorum non meminit, memoriam discenti refricare, tum quæ nondum didicit, docere eum tenetur.

E. gr. Si in definitione numeri quadrati terminus *facti*, itemque *factoris* discenti nondum fuerit familiaris; docens utriusque definitionem repetit, ut ejus memoria discenti refricetur, scilicet quod *factum sit numerus, qui ex multiplicatione unius per alterum prodit, & factores sint numeri, qui per se invicem multiplicantur*. Has definitiones ubi in definitione numeri quadrati substituit docens, ea jam discenti clarior evadit, quod pauciorum terminorum notitiam præsupponat. Etenim loco definitionis, *Numerus quadratus est factum, cujus factores sunt æquales*, prodit propositio, *si idem numerus per se ipsum multiplicatur, qui inde prodit est numerus quadratus*. Similiter si discenti in definitione quadrati terminus *anguli recti* non fuerit familiaris, vel ejus repetenda est definitio in anterioribus data, vel angulus minimum rectus in charta delineatus oculis discantis subijci debet, ut definitionis saltem confuse recorderetur.

#### §. 1125.

*Illustratio  
earum.*

*Docens definitionem nominalem discenti explicaturus eam ad exemplum applicare atque monstrare debet, inter prædicata judiciorum intuitivorum, quæ exempli beneficio format (§. 669.) esse notas, ex quibus definitio nominalis componitur.* Definitionem enim intellecturus eam hoc pacto ad exemplum applicare debet (§. 948.). Quoniam itaque docentis est omnem adhibere curam, ut discens definitionem, quam non intelligit, ipsius opera intelligat (§. 1118.); ipse eam modo præscripto ad exemplum applicare tenetur.

Mos hic dudum in Mathesi introductus. E. gr. *Numeri quadrati* definitionem explicaturus eam exemplo illustrat. *Sic, inquit, numerus datus 7 & ducatur is in seipsum, erit factum 49, quod vi abaci Pythagorici prodit, numerus quadratus septenarii.* Similiter in Geometria definitionem quadrati explicaturus figuram in charta, vel tabula delineatam oculis tyronis subijcit, & in ea numerat latera, digitoque monstrat lineas rectas æquales litteris suis notatas & angulos rectos, scilicet quadratum ABDC terminari ait quatuor rectis AB, BD,

*Fig. 11.*

BD, DC & CA, esse  $AB = BD$ ,  $BD = DC$  &  $DC = AC$  atque angulos A, B, D, C rectos. Ita nimirum cognitio symbolica, quæ verbis continetur, reducitur ad intuitivam, quæ tyronibus præsertim evidentior, quia clarior. Exempli loco simul esse possunt, quæ in hoc ipso opere logico ad definitiones illustrandas in medium suis locis protulimus.

## §. 1126.

*Si docens definitionem realem sive geneticam discentem docet, singillarim recensere debet singula, quæ ad genesis rei concurrunt, & quid unumquodque eorum ad eam conferat.* Cum enim ad hæc attendere debeat definitionem conditurus (§. 196.); in iisdem quoque attentionem suam defigere tenetur eam distincte intellecturus. Quoniam itaque docens discentem ad eam distincte intelligendam manu ducit, ea, quæ hic attendenda sunt, recensere debet docens, consequenter non modo singula, quæ ad genesis rei concurrunt, verum etiam quid unumquodque eorum ad eandem conferat.

*Resolutio de  
definitionum  
geneticarum.*

E. gr. Si genesis quadrati cum discente communicanda, moneri is debet, ad eam requiri duas lineas rectas AB & AC inter se æquales; rectam AC concipiendam esse fixam in dato plano, alteram vero AB mobilem; mobilem fixæ in A jungendam esse ad angulum rectum & deorsum movendam, ita ut motu sibi semper parallelo ex situ AB in situm CD deferatur, puncto A lineæ AC continuo in hærente; perinde denique hic esse, quacunque celeritate & num constanter eadem, an vero variata; num motu continuo, an subinde interrupto recta AB feratur. Ultimum ideo monetur, ne tyro dubia nectat, quæ definitione sufficienter intellecta evanescent. Exempli etiam huc trahi possunt, quæ supra de notitia ad definitionem geneticam requisita (not. §. 196.) dedimus.

*Fig. II.*

## §. 1127.

*Eodem vero, quo ante, modo ostenditur, in explicandis & illustrandis definitionibus realibus eadem tenenda esse, quæ observanda sunt in explicandis & illustrandis nominalibus (§. 1124-1125.).*

*Definitio-  
num geneti-  
carum expli-  
catio & illu-  
stratio.*

E. gr. Si tyroni terminus anguli recti in definitione quadrati vel ignotus, vel nondum satis familiaris; ejus notionem in eo excitare  
(*Wolffii Logica.*)                      H h h h h                      debet

Fig. m.

debet docens. Idem tenendum est de termino *motus paralleli*, quo recta constanter defertur in situm primo, quem in A habuerat, *parallelum*, & ipso termino *paralleli* vel *linearum parallelarum*. Similiter in definitione *obligationis* explicandi sunt termini *motivi* & *actionis liberae*, nec non *connexionis*. Speciatim illustrationi in priori casu servit figura in plano delineata, aut si magis regula ad ductum alterius fixæ seu lineæ fixæ convenienter deorsum lata, ut appareat, uno ejus extremo rectæ AC inhaerente extremum alterum decurrere per rectam BD; in posteriori inserviunt exempla, quæ si ea cautione seligantur, ut diversos casus, quo unus alterum obligat, veluti magistratus summus inferiorem vel subditum, pater filium, herus servum, amicus amicum &c. repræsentent, inductione definitionis veritatem & cum usu loquendi conformitatem confirmant (§. 478.).

## §. 1128.

*Propositionis  
resolutio.*

*Propositionem expositorum docens hypotesin a thesi distinguere & sic propositionem in duas alias ejusdem subjecti resolvere, immo si hypotesis plures determinationes continet, hanc denovo in tot resolvere tenetur, quod adsunt determinationes.* Etenim propositio omnis aut hypothetica est, aut categorica (§. 216. 218.). In hypothetica hypothesis constituitur per conditionem expressam subjecto adjectam (§. 218.) atque adeo exprimitur vel per propositionem, cujus idem est subjectum, quod in propositione hypothetica data, sed absolute positum; thesis autem prædicato determinatur, exprimenda adeo per propositionem, cujus idem est subjectum quod hypotheseos, prædicatum vero idem quod propositionis hypotheticæ datæ; vel hypothesis constituitur per propositionem diversi subjecti, quod ad subjectum hypotheticæ oblique refertur, & thesis integra propositione perinde atque hypothesis jam exprimitur. Quod si conditio plures determinationes admittat, propositio composita prædicati multiplicis est hypothesis, in plures adeo simplices ejusdem subjecti resolvable (§. 314.). Quoniam in propositione hypothetica prædicatum subjecto non tribuitur, nisi ob conditionem adjectam (§. 218.) adeoque subjecti determinatio

nationem (§. 228.); posita hypothesi, ponenda quoque est thesis (§. 406.). Propositionem adeo hypotheticam intellecturus distincte hypothesin atque thesin expendere, consequenter ita resolvere tenetur, quemadmodum præscribimus (§. 682.).

Propositio categorica ad hypotheticam reduci potest (§. 226.), definitione subjecti sumta tanquam conditione, sub qua prædicatum ipsi tribuendum, seu determinatione ejus (§. 225.). Patet adeo definitionem hic eodem modo tractandam esse, quo conditio in hypothetica tractatur, nisi notione subjecti confusa contenti simus, quæ resolutionem nullam admittit (§. 88.).

E. gr. Si theorema geometricum explicari debet, si latus trianguli *ACB* unum *BC* continuatur in *D*, angulus externus ex ejus continuatione ortus æqualis est duobus internis oppositis simul sumtis; in duas hæc propositiones resolvitur: 1. Latus unum *BC* trianguli *ACB* continuatur intervallo indefinito, seu quocunque & 2. Angulus externus ex continuatione lateris ortus *DCA* est duobus internis *A* & *B* oppositis simul sumtis æqualis. Posito quod angulus *DCA* sit ortus ex continuatione lateris *BC*, ponendum quoque est, quod sit æqualis angulis *A* & *B* simul sumtis. Quod si theorema ad formam propositionis categoricæ reducatur, quemadmodum hic in thesi a nobis factum, vel hypothetice ita efferatur, si angulus *DCA* oritur ex continuatione lateris *BC* trianguli *ABC*, erit is angulis *A* & *B* simul sumtis æqualis; hypothesi & thesi erunt ejusdem subjecti. Illa scilicet est: Angulus *DCA* oritur ex continuatione lateris *BC* trianguli *ABC*; hæc vero: Angulus *DCA* est angulus *A* & *B* simul sumtis æqualis. Posito priore ponendum quoque est posterius.

Fig. 7.

## §. 1129.

Eodem vero modo, quo supra (§. 1124. 1125.) ostenditur, propositionem explicari communicatis notionibus terminorum discenti vel ignotis, vel minus familiaribus & illustrari exemplis, quibus cognitio symbolica ad intuitivam reducitur.

Propositio.  
non expli-  
catio & illu-  
stratio.

E. gr. Propositionem (§. 221.), attributa communia prædicantur de subjecto sub conditione essentialium nonnidorum, quæ cum aliis entibus eidem sunt communia, explicaturus in discentis animo notiones attributi communis (§. 66.) & essentialium (§. 64.), nec non subjecti & prædicati (§. 200.) excitare debet, nisi singula fuerint eidem adeo

H h h h h 2

fami-

familiares, ut vocibus auditis veluti sponte succurrant. Illustrationis loco est exemplum supra (§. 221.) ea fini allatum, ubi *numerus ternarius angulorum* tanquam attributum, quod *triangulo rectilineo* cum *curvilineo & mixtilineo* commune est, de *rectilineo* prædicatur propter aliquod essenziale, nempe *numeri ternarium laterum*.

## §. 1130.

*Demonstrationum resolutionis.*

*Docens demonstrationes ac probationes ita resolvere debet, ut non modo singula præmissæ syllogismorum, ex quibus iidem constant animus discantis subeant; sed earum etiam forma eidem appareat. Nec inconsultum est, si conclusiones, quæ syllogismos sequentes sive sigillatim, sive in unum confusæ tanquam præmissæ ingrediuntur, in tabula annotentur, ut conspectui discantis pateant, in demonstrationibus præsertim longioribus.* Demonstrationem jam dedimus in superioribus (§. 958.).

Exempla ibidem data etiam huc trahi possunt.

## §. 1131.

*Regule docenti cum le-  
ctore libri  
communes.*

Quoniam docens librum vel historicum, vel dogmaticum discanti explicans eundem finem penes discantes intendit, quem lector intendere debet, nimirum ut quæ in iis narrantur facta vel traduntur dogmata intelligat, & sibi profutura memoriæ mandet (§. 902.), discantem manu ducens in iis, ubi sibi met ipse nondum sufficit; *ei tenenda sunt regule omnes, quæ de legendis libris historicis, tum dogmaticis traduntur* (§. 903. & seqq.) capite integro.

Librum dum tyroni interpretatur docens, ea in ejus gratiam facere tenetur, quæ ipse facturuserat, ubi sui gratia lectionem institueret: ubi tamen probe observandum, quod non plura tum penes eum supponere debeat, quam penes tyronem supponere licet. Cautio hæc vulgo negligitur, ut docens tyroni perspicua judicet, quæ sibi perspicua experitur, & eidem convincendo sufficere putet, quæ sibi convincendo sufficere intelligit. Ceterum non facile est eandem rite observare ac ubique, cum multa Logicæ ac Psychologiæ notitiis ea fini in docente præsupponatur, quæ logica applicatione acumen quoddam docenti apprimè necessarium conciliavit. Experta loquenti fidem habebunt, quos idem experiri juvabit.

## §. 1132.

## §. 1132.

Cum porro docens, ubi in historica cognitione discenti communicanda non acquiescit, eum veritatis propositionum intellectuum convincere intendat; *eidem quoque usui sunt regulae, quæ de modo alios convincendi integro capite (§. 982. & seqq.) exhibentur, ubi non solum historicam cognitionem curæ cordique habet.*

*Quando methodus alios convincendi usui sit docenti.*

Hic quoque cautione ista opus est, quam modo (not. §. 1131.) commendavimus, ubi imprimis meminisse juvat, quæ de assensus successiva generatione demonstravimus (§. 992. 993.).

## §. 1133.

*Quodsi docens propositionem falsam refutare, vel dubiam impugnare tenetur; methodi refutandi leges capite integro (§. 1017. & seqq.) stabilitas observare tenetur: id quod per se patet.*

*Methodo refutandi quando habeat opus.*

Nec hic negligenda est cautio, de qua paulo ante (not. §. 1131.) diximus. Usui quoque erunt & hic, & in antecedentibus nonnulla, quæ de æstimandis viribus ad cognitionem requisitis in sequentibus proponuntur.

## §. 1134.

Quoniam in libris dogmaticis non occurrunt, nisi definitiones ac propositiones, docens autem utrasque dijudicare tenetur, ne ad errores seducat discentes, & ex theoria pariter atque praxi Logicæ constat, non minus definitionum, quam propositionum determinatarum rationem in Logica tradi; *quod docens theoriam pariter ac praxin Logicæ omnem perspectam habere debeat, dubitandum non est.*

*Cur omnis theoria & praxi Logicæ docenti necessaria.*

Facile hinc colliget, qui attentione uti didicit, eorum imprimis, qui docentium munere funguntur, esse ut non modo Logicæ theoriam atque praxin sibi familiarem reddant; verum etiam Logicam utentem continuo exercitio sibi comparent, ne discipulis sumum vendant. Sane ideo tyrones docentis opera utuntur in disciplinis addiscendis, quod ipsimet Logicæ præsidio destituti ignorant, quo studio quave cautione opus sit, ut ad solidam & utilem rerum cognitionem perveniatur.

## SECTIO V.

DE

# USU LOGICÆ IN ÆSTIMANDIS VIRIBUS AD RERUM COGNITIONEM REQUISITIS.

## CAPUT I.

## DE ÆSTIMANDIS VIRIBUS AD VERUM INVENIENDUM ET DIJUDICANDUM REQUISITIS.

§. 1135.

*Quando vi-  
res veri-  
tatis ex  
a priori  
principiis  
inveniuntur.*

**S**i quis novit principia, ex quibus veritas investiganda eruitur, nec non artificia heuristicæ, quibus ad eam eruendam opus est, atque ratiocinandi habitu pollet, quali in demonstrationibus opus est (§. 551. & seqq.); ejus vires veritati a priori inveniendæ sufficiunt. Methodus enim ex definitionibus, vel assumptis, aut datis hypothesibus eruendi propositiones cum eandem prorsus formam servet, quam demonstrationes (§. 724. & seqq.), ad demonstrationes autem contexendas opus sit cum propositionibus nonnullis atque definitionibus, quibus tanquam præmissis in syllogismis utaris, tum ratiocinandi habitu minime vulgari (§. 551. & seqq.); si quis ista principia no-  
vit



vit & ratiocinandi habitu egregio pollet, is viribus ad veritatem a priori investigandam instructus est. Enimvero cum artificiiis heuristiceis præter artem ratiocinandi adhuc aliis opus sit, teste experientia inventoribus obvia; igitur & ea perspecta habere debet veritatem inventurus. Quodsi igitur constat, aliquem & principiorum, & artificiorum heuristicorum notitia & ratiocinandi habitu pollere, ejus vires ad veritatem datam investigandam sufficere palam est.

E. gr. Proprio Marte inventurus theorema, quod *recta ex centro C ducta & arcum AB in D bisecans bisecet quoque chordam cognominem*, nosse debet a) tanquam principia definitionem radii, axioma de æqualitate radiorum ejusdem circuli, & theorematum 1. de æqualitate chordarum chordæ æquales subtendentium, 2. de triangulis sibi mutuo æquilateralis etiam sibi mutuo æquiangulis, 3. de congruentia triangulorum angulum æqualem æqualibus cruribus comprehensum habentium: β) principium heuristicum Geometrarum lineas datas & quæsitas ad latera triangulorum & arcus datos ad angulos eorundem reducentium: γ) Modum ratiocinandi ex hypothesi inchoandi & continua connectione continuandi, donec ad quæsitum pervenias, qui in omni casu idem est, si generales spectes regulas, & ad praxin transferri nequit nisi ab eo, qui habitu ratiocinandi pollet. Patent, quæ diximus, singula ex analysi demonstrationis logica (not. §. 552.), quæ modum inveniendi manifestat (§. 725.).

Fig 4.

§. 1136.

Quoniam non constat, quibus præcise principiis opus sit ad veritatem investigandam, nisi ubi jam fuerit inventa, præterquam quod generaliter constet, qualia præsupponantur, ideo nonnisi probabiliter judicare datur, utrum vires veritati investigandæ sufficiant, nec ne (§. 578.).

Cur æstimatione virium plerumque nonnisi probabilis.

E. gr. Si veritas investiganda ad philosophiam moralem spectat, principia inventori perspecta esse probabiliter colligis, ubi eum multa principiorum moralium notitia imbutum esse noveris, etsi nondum constet, num ea præcise teneat, quæ in casu dato requiruntur. Sufficit autem probabilis æstimatio ad tentamen ingrediendum. Succellus tentantis probat, num probabilitati aliquid veritatis sublit.

§. 1137.

§. 1137.

*Virium ad  
veritatem  
investigan-  
dam insuffi-  
cientia.*

Certo tamen constat, *si quis vel principia in eo generi ignoret, ad quod veritas investiganda spectat, vel artificia benefica in universum nescit, vel nullo prorsus ratiocinandi habitu possit, eum ad veritatem investigandam ineptum esse.* Etenim cum tria ista requisita simul adesse debeant, ubi vires veritati investigandæ sufficiunt (§. 1135.); uno eorum deficiente non amplius sufficere possunt. Nullas autem adesse palam est omnibus deficientibus.

E. gr. Si quis ignorat phaenomena motus proprii Planetarum, quæ ab Astronomis fuere observata; is de *systemate mundi* inveniendis frustra cogitat. Tale enim concipi debet, ut inde eadem phaenomena directe colligantur. Ita *differentiam inter naturam & gratiam* pervestigare nequit, qui nec vires animæ naturales distincte cognovit, ut norit, quorumnam actus per eas determinari queat, nec intelligit, quemnam perfectionis gradum, docente scriptura sacra, beneficio gratiæ homo attingere possit. Similiter moralia methodo demonstrativa tradere nequit, qui ejus distinctam notionem nondum habet, malto minus eadem uti novit.

§. 1138.

*Quando quis  
ad invenien-  
dum sese  
aptum red-  
dere valeat.*

*Quod si quis requisitis quibusdam ad inveniendum destituitur, ea tamen sibi comparare valet; is veritatis inventionem in potestate sua adhuc habet.* Etenim si requisita sibi comparare valet, quibus adhuc destituitur, aptum se ad veritatem inveniendam reddere valet (§. 1135.). In potestate igitur adhuc ipsius positum est, ut veritatem quasitam inveniat.

E. gr. Si quis fuerit principiorum arithmetico- & geometricorum probe gnarus, in astronomicis tamen non multum versatus, ac in geometricis atque arithmetice se inventorem præstitit; is principia astronomica sibi familiaria reddere valet, atque adeo ad veritatem astronomicam investigandam aptus evadere potest. Si quis in psychologicis fuerit probe versatus & principii theologiæ naturalis imbutus, in iisque accurata methodo usus; is principia moralia sibi familiaria reddere & ea methodo philosophica pertractare valet. Enimvero si quis connexionis veritatis nullam habet notionem, nec

in

in demonstrationibus ac inveniendi unquam tempus consumsit, atque animæ notitia destitutus veritatum moralium nonnisi confusam & vagas notiones ex compilatoribus hausit aliisque negotiis impeditus ea studia, quæ neglexit, tractare nequit, quantum ad intellectum perficiendum ac dotibus adhuc deficientibus instruendum sufficit; ab eo frustra requisiveris, ut moralia methodo demonstrativa tradat.

§. 1139.

*Si vel principia non omnia fuerint nota, vel quedam non satis familiaria, notiones tamen communes in eo genere familiares; defectus librorum evolutione tollitur, optimumque hic præsidium foret scriptum dogmaticum historicum in gratiam inventorum conditum.* *Ignorantia principiorum quomodo mederi liceat.*  
Etenim si quis notiones communes in aliquo scientiarum genere experitur familiares, is scripta eo spectantia legere valet, quemadmodum paulo post independenter ab hisce uberius ostendetur, utut tanquam communi experientia suffultum a nemine in dubium vocari queat. Quamobrem libros in eo genere evolvens, ubi principia quædam, quorum notitia præsto esse debet, continentur; ea inde haurire valet.

Quoniam vero in scripto dogmatico historico, quod in gratiam inventorum condendum, omnes propositiones ad idem subiectum spectantes in uno loco congerendæ, & subiecta eorundem ordine alphabetico collocandæ (§. 863.); facile apparet, hac ratione absque difficultate reperiri posse principia desiderata ut adeo majus præsidium hic ne optari quidem possit.

Si quis principiorum geometricorum fuerit prorsus gnarus, is nec ex Geometrarum sublimiora tractantium scriptis principia in dato casu desiderata evolvere valet, cum nihil eorum intelligat, quæ ibidem legit. Si quis principiorum logicorum fuerit prorsus ignarus, vel ex compilatoribus nonnisi confusis quibusdam ac vagis notionibus animum oplevit; is principia logica in dato casu desiderata ex hoc nostro opere logico evolvere nequit. Ceterum scripta historica in usum inventorum condenda non incommode *Alphabetum*  
(*Wolphi Logica*) tum

*tum inventorum dixeris, & quidem Alphabetum inventorum geometricum, si veritates omnes geometricas ordine alphabetico digestas complectitur; Alphabetum inventorum morale, si omnes veritates morales eodem ordine in eodem disponuntur & ita porro.*

## §. 1140.

*Notiones distinctas qui-  
nam conse-  
qui possit.*

*Si quis in judiciis intuitivis formandis fuerit versatus & sermonis probe gnarus; is notiones distinctas rerum obviarum consequi valet.* Qui enim in judiciis intuitivis formandis fuit versatus, is attendere novit ad ea, quæ rebus insunt, aut ad quæ quomodocunque referantur, eaque a subjecto, cui insunt, distinguere adfuevit (§. 669.). Quodsi porro sermonis fuerit gnarus, singula, quæ distinguit, suo nomine efferre valet. Quamobrem cum notio distincta formetur, si ea, quæ rebus insunt, singula sigillatim contemplemur, ac deinde ordinem & nexum eorum meditemur (§. 682.); qui in judiciis intuitivis formandis fuerit versatus ac sermonis usu pollet, ea præstare valet, quæ ad notiones distinctas formandas requiruntur, consequenter in iis venandis non inanem operam sumit.

Facile apparet, hic supponi, quod quis de eodem subjecto multa judicia intuitiva formare noverit, ubi idem id patitur. Unde consequitur, quo quis majore acumine gaudet in iis discernendis, quæ subjecto insunt, eo quoque majoribus eum pollere viribus notionum distinctarum formandarum. Si quis judiciis intuitivis formandis operam non dedit aliam, quam necessitate extortam occasione sic ferente; is a notionibus distinctis formandis procul adhuc abest. Intelligitur hinc ratio, cur ab iis procul absint plurimi. Ceterum huc præterea pertinent, quæ de notione distincta ab inexercitatis non consequenda docuimus (§. 689.).

## §. 1141.

*Definitiones  
nominales  
in cujusnam  
sint potestate.*

Quoniam definitiones nominales condi nequeunt, nisi ante multa rei prædicata cognoveris atque ea in essentialia, attributa & modos distinguere noveris (§. 731.); definitionem nominalem in ejus potestate esse colligimus, quem rei definiendæ multa prædicata cognita habere ac inessentialibus, attributis atque modis distinguendis probe exercitatum novimus.

S

Si quis ad definitiones Geometrarum nominales attendit, is veritatem propositionis præsentis ipso facto experietur. Geometræ essentialia ab attributis & attributis communia a propriis vi definitionis (§. 64. & seqq.), etsi confusæ agnitæ, distinguunt, dum ex demonstrationibus intelligunt, quænam ea sint, quorum unum per alterum non determinatur, & quæ per se mutuo determinantur. In aliis rebus idem difficilius agnoscitur, quamvis præter demonstrationem (§. 732. & seqq.) etiam experientia suppetias ferat (§. 672. & seqq.) hætenus non satis expensas, ut adeo mirum non sit, quod definitiones bonæ sint adeo rare.

§. 1142.

Quoniam plures tradidimus regulas ad veritatem cum a posteriori, tum a priori detegendam necessarias duobus capitulis integris (§. 669. & seqq. atque §. 710. & seqq.); si quem regulas veritatem quampiam a posteriori, vel a priori investigandi ad praxin transferre promte valere intelligimus, eum illius inventionem in potestate habere colligimus.

*Specialis utrum dijudicatio unde pendeat.*

Multa igitur theoremata, quæ hic loci condi poterant, unusquisque sibi met ipse haud difficulter condet, quoties iisdem opus habuerit, qui doctrinam logicam animo probe comprehensam ad praxin transferre didicit. Plures olim suppeditabit ars inveniendi.

§. 1143.

Consequitur hinc, innotescere nobis 1. quod quis causas a posteriori vel priori investigare, 2. notiones generum ac specierum formare, 3. notionum possibilitatem detegere, 4. ex definitionibus & hypothesebus assumptis propositiones eruere, 5. definitiones reales invenire valeat; quam primum constat, quod regulis 1. investigandi causas a posteriori (§. 697. & seqq.) & priori (§. 727. & seqq.), 2. determinandi notiones generum & specierum (§. 710. & seqq.), 3. evincendi notionum possibilitatem (§. 717. & seqq.) 4. eruendi ex definitionibus & hypothesebus propositiones (§. 724. & seqq.) atque 5. inveniendi definitiones reales sive a posteriori (§. 686. 687.), sive a priori (§. 734. & seqq.) satisfacere possit, editis specimenibus.

*Speciatim 1. in casu judicii affirmativi.*

Judicium in genere minime fallax; in casu tamen dato ob rationem supra adductam (§. 1136.) nonnisi probabile.

## §. 1144.

2. in casu judicii negati-  
vi.

Quoniam tamen a nobis demonstratum non est, regulas istas esse unicas, quibus veritas quæsitæ in dato casu sive a posteriori, sive a priori colligitur, ne judicium præcipitur, *veritatis investigationem in dato genere non esse in potestate alterius colligere, ubi demonstrare poteris, seu aliunde certo noveris, eum nec regulis a nobis præscriptis satisfacere posse, vel easdem prorsus ignorare, nec præterea eidem perspectas esse alias, quibus idem, quod nostris præstatur.*

Supponimus hic istiusmodi casus, ubi per regulas generales (§. 1135.) inveniendi facultas non patet. Alias enim non opus est, ut ad speciales descendatur.

## §. 1145.

Requisita extrinseca ad veritatem a posteriori inveniendam.

*Si veritas a posteriori detegenda in potestate esse debet, occasione & externo, si quo opus est, instrumentorum apparatu aliisque subsidiis destituti non sumus opus est.* Patet per se, aut, si rigorosius loqui velis, per principium generale in Ontologicis stabiendum, quod actus non determinetur, quamdiu vel minimum desit ad rationem sufficientem.

Nimirum ut veritas a posteriori detegatur, extrinsecorum requirerum nullum deficere debet. E. gr. Ex transitu Veneris per discum Solis in locis differentis admodum latitudinis observato parallaxis Solis, docente *Hallejo*, accuratius determinari potest, quam per methodos alias: Sed cum phænomenon rarissimum, nec observatorem locum in locis valde diffitis alere cujusvis sit, hic modus parallaxin Solis definiendi vix ac ne vix quidem unquam in potestate est. Ad observationes astronomicas requiritur observatorium cum instrumentorum apparatu, nec experimenta physica absque instrumentis, sumtu aliisque externis commoditatibus capere licet. Ita anatomica postulant cadavera; phytologica hortum vel agrum.

## §. 1146.

Vires quando sufficiant vero a falso discernendo.

Quoniam ad verum a falso discernendum regulæ logicæ sufficiunt (§. 545.); *Verum a falso discreturus non modo regulas logi-*

*logicas probe perspectas habere, verum etiam habitu eas applicandi pollere debet.*

Regularum istarum vel distincta notitia ex Logica hauritur, vel confusa ipsa rerum solida tractatione, v. gr. studio Matheſeos, comparatur. Habitus utendi regulis nonnisi posteriori modo acquiritur. Ruit hinc obſectio, quod veritatem agnoscant & verum a falso distinguant, qui Logicam nunquam didicerunt: quamvis hic cavendum quoque sit, ne veri a falso distinguendi facultatem tribuamus iis, qui eadem destituuntur. Plerique homines, immo & eruditi plerique, nonnisi obviam veritatem agnoscunt, de ceteris per præcipitantiæ statuunt: id quod cum perspiciant acutiores, in scepticismum tandem incidunt. Præterea probe notandum est, non alias hic intelligi regulas, quam quibus solida rerum tractatio continetur. Unde lapidem Lydium Logicæ artificialis proposui in Prolegomenis (§. 26. & seqq.) & Logicam perversam atque inutilem delineavi (§. 17. seqq.). Ne igitur regula generalis perperam applicata fallat, alia specialiora adhuc nobis superaddenda.

§. II47.

*Si quis formam demonstrationis legitimæ cum directæ, tum indirectæ dijudicandi habitu pollet; is verum a falso a priori discernere valet.* Etenim qui hoc habitu pollet, is iudicium ferre potest minime fallax (§. 348. 349.), utrum propositio data fuerit demonstrata, nec ne. Quamobrem cum vera sit propositio, quæ vel directæ (§. 544.), vel indirectæ (§. 557.) demonstrari potest; utrum vera sit propositio, nec ne, is utique dijudicare valet.

*Quinam verum a falso a priori distinguere possint.*

Ita Mathematici demonstrationis lumine veritatem agnoscunt; alii demonstrationis notionem nullam habentes, multo minus demonstrandi habitu pollentes, cœcutiunt & veritatis sibi videntur certi, quando eam agnoscere impossibile ipsis erat.

§. II48.

Immo cum ex ipsa forma demonstrationis legitimæ (§. 551. & seqq.), & ejus definitione (§. 498.) pateat, non alia probatione, nisi demonstratione certo constare posse a priori, propositionem datam esse veram; recte omnino colligimus, ab eo, *Quinam verum a falso a priori discernere non valeat.*

*qui formæ demonstrationis legitimæ notiore nullam habet, vel minimum eam in casu dato dijudicandi habitu destituitur, veritatem a priori dijudicari non posse.*

Experientia satis obvia iis, qui verum a falso distinguendi habitu pollent, assertum confirmat. Quoniam vero nondum est ea sæculi nostri felicitas, ut virium suarum defectum agnoscant eruditi plures sperantes de facultatibus suis, quam in iis est; igitur accidit, ut in veritate dijudicanda iudicis partes sibi arrogant, qui ad verum a falso discernendum ineptissimiprehenduntur. Non procul petenda sunt exempla, mallem ea in Germania, nonnullis præsertim Academicis, esse rariora.

§. 1149.

*Cujus sit iudicium de demonstratione data.*

*Si quis demonstrationis tum ostensivæ, tum apogogicæ formam animo distincte comprehendit novitque principia demonstrationem datam ingredientia esse certa; is judicare valet, utrum propositio data sit demonstrata, nec ne. Quod si notio formæ demonstrationis fuerit incompleta, in iudicando falli potest. Si denique alterutrum requisitorum prorsus deficit; iudicium de demonstratione data nullum ferre licet. Etenim qui formam demonstrationis ostensivæ animo distincte comprehendit, ei perspectum est, quomodo ex definitione subjecti, vel hypothesei data formentur iudicia intuitiva & inde ad primos syllogismos fundamentales perveniatur atque cum iisdem ceteri, qui demonstrationem ingrediuntur, concatenentur (§. 551. & seqq.). Quod si apogogicæ formam distincte comprehendit, ei patet, quomodo a propositione datæ contraria ratiocinandi initium fiat & syllogismi concatenari debeant, donec ad manifesto falsam conclusionem perveniatur (§. 553.), vel in dubium vocata ex contradictoria directe inferatur (§. 559.). In dato igitur casu demonstrationis ostensivæ, vel apogogicæ dijudicare valet, num syllogismi legitime inter se connectantur & ex suo fonte deducantur (§. 348.). Quod si ergo & noverit principia eam ingredientia esse certa; in iis non haberi agnoscit nisi propositiones jam ante demonstratas, vel quæ in definitionum, axiomatum*

*aut*



aut experientiarum indubitatarum numero sunt (§. 554.). Judicare adeo valet, utrum propositio data sit demonstrata, nec ne (§. 498.).

Quodsi notio formæ demonstrationis fuerit incompleta, qui eadem imbutus est, notas omnes ad eam agnoscendam sufficientes non distinguit (§. 92.) atque adeo ex parte obscura est (§. 80.), ex parte distincta (§. 88.). Fieri adeo potest, ut secundum notionem incompletam judicans in errorem incidat (§. 633.), consequenter propositionem demonstratam esse affirmet, quæ demonstrata non est (§. 624.).

Denique cum aliter agnosci non possit, demonstrationem esse genuinam, nisi ut & formam legitimam, & principia certa esse agnoscas (§. 551. & seqq.); ubi vel formam, vel principia dijudicare non valueris, nec certo judicare poteris, utrum propositio data demonstrata sit, nec ne.

In Mathesi exempla obvia sunt. Etenim si quis novam proponit demonstrationem, eam genuinam agnoscimus tum ex forma legitima, tum ex principiis certis. Quodsi principia quædam, quibus autor demonstrationis utitur, alteri nondum fuerint perspecta, etsi circa formam nihil desideret, se tamen judicare nondum posse agnoscit, utrum propositio data demonstrata sit, nec ne, quamdiu principiorum istorum veritatem non perspicit. Qui studio Mathematicæ notionem formæ demonstrationis incompletam sibi comparant in ejus applicatione aberrant, ubi extra eandem demonstrationes dare conantur. Accidit hoc ipsi *Cartesio*, demonstrationem existentiae Dei evoluturus more Geometrarum in Meditat. de prima philosophia p. m. 85. & seqq. quem formam demonstrationis distincte animo non comprehendisse vel exinde constat, quod syllogismos formales ad eam minime necessarios judicet, quorum tamen concatenatione forma demonstrationis legitimæ absolvitur (§. 551. & seqq.). Ceterum patet cum temeritas, tum arrogantia illorum, qui de forma demonstrationum judicium sibi sumunt, ubi nullam prorsus demonstrationem animo unquam conceperunt, nec in veritatem principiorum inquisiverunt, aut de forma demonstrationis ex notione falsa, vel incompleta statuunt.

§. 1150.

*Qui demon-  
strare vale-  
at, num de-  
monstratio  
sit ordinata,  
completa &  
consummata.*

*Si quis demonstrationis datæ analyfin logicam (not. §. 551. & seqq.) dare valet, is judicare potest, utrum demonstratio data sit completa, num incompleta; utrum ordinata, an inordinata; utrum consummata, an inconsummata.* Etenim ex analyfi demonstrationis logica (not. §. 551. & seqq.) patet, quot syllogismi ingrediantur demonstrationem & quænam in iis principia occurrant. Facta igitur analyfi judicare licet, utrum principia omnia sive explicite, sive implicite in demonstratione data contineantur, consequenter utrum completa ea sit, an incompleta (§. 854.).

Porro ex eadem analyfi liquet, quo ordine syllogismi concatenati sese invicem excipiant, consequenter judicare licet, num in demonstratione data propositiones eo ordine se invicem excipiant, quo in ratiociniorum serie, in quæ demonstratio resoluta abit, continentur. Judicare adeo licet, utrum demonstratio sit ordinata, nec ne (§. 799.).

*Qui judicare valet, utrum demonstratio sit ordinata & completa, nec ne; is etiam judicare potest, num sit consummata (§. 855.).* Patet vero per *demonstrata eum*, qui analyfin logicam demonstrationis datæ instituere novit, judicare posse, utrum demonstratio data sit ordinata & completa, nec ne. Ergo dubitari amplius nequit, eum quoque judicare valere, num sit consummata.

Ecce tibi novum analyseos logicæ demonstrationum usum, quam jam in aliis casibus perutilem deprehendimus. Quoniam vero analyfis illa hæctenus parum expensa; ideo non mirum, quod perpauco sit præsens judicium. Multo minus autem mirum videri debet, quod demonstrationes consummatæ sint adeo raræ, etsi solæ, quæ distinctum formæ demonstrationis notionem animo ingenerant.

§. 1151.

*Quinam  
notionem  
veram a*

*Si quis possibilitatem notionum vel a priori, vel a posteriori stabilire valet (§. 717. & seqq.); is veras a deceptricibus distinguere aptus est.* Etenim qui possibilitatem notionis sive a priori,

priori, siue a posteriori stabilire novit, illi certum est, notionem non esse impossibilem (§. 567. 568.), consequenter nec deceptricem. Veram adeo a deceptrice distinguere aptus.

*deceptrice  
distinguere  
valeat.*

A priori, seu vi demonstrationis Mathematici notionem veras a deceptricibus distinguunt in Mathesi pura; a posteriori seu vi observationis in Mathesi mixta, veluti in Opusca, Astronomia, Mechanica.

§. 1152.

*Si quis essentialia, attributa communia atque propria, quæ per modum attributorum insunt, a se invicem discernere atque demonstrare valet, se essentialia omnia, attributa vero communia quæque per modum attributorum insunt tot enumerasse, quot definitio agnoscendo sufficiunt; is iudicium ferre potest, utrum definitio legitima sit, nec ne, hoc est, regulis logicis respondeat.* Etenim definitiones constant vel essentialium (§. 172.), vel attributorum (§. 173. 175.), vel eorum, quæ per modum attributorum insunt (§. 176.), sufficiente enumeratione. Qui ergo essentialia, attributa & ea, quæ per modum attributorum insunt, a se invicem discernere atque demonstrare valet, se illa omnia, ea atque hæc sufficienter enumerasse; is iudicium ferre potest, num definitio data regulis logicis respondeat, adeoque legitima sit.

*Quinam de  
definitiones na-  
minales di-  
judicare por-  
fit.*

Demonstrationes enarrationis sufficientis pendent a principiis specialibus disciplinarum. E. gr. Ex notionem societatis in genere constar, societates differre cum personis, qui eam ineunt; tum sine, cujus gratia contrahuntur. Quomobrem piter in definitione alicujus societatis essentialia, per quæ scilicet ea in esse suo determinatur, sufficienter enumerari, si socii omnes enumerentur & finis integer indigetur, v. gr. quod societatem nuptialem ineant mas atque fœmina lobolis procreandæ & educandæ gratia.

§. 1153.

Quoniam regulæ logicæ complures observandæ sunt, ut definitio sit a navis omnibus libera, quas integro capite (§. 153. & seqq.) tradidimus; de definitionibus judicaturus, utrum a navis omnibus libera sint nec ne, & regulas logicas de definitionibus sint a navis libera.

(Wolffii Logica)

Kkk kk

tion-

*tionibus familiares experiri, & dextre ad casum præsentem applicare debet.*

Sæpissime hic peccare videas logicarum regularum ignaros, qui vitio vertunt, quod laudari merebatur. Ita non desunt, qui reprehendunt in definitionibus non cumulari, quæ per se invicem determinantur, cum tamen plura incommoda inde resultent, utique vitanda iis, qui cognitionem solidam ac utilem curant (§. 836.). Ceterum hic quoque usui sunt, quæ de definitionibus dijudicandis jam tradidimus (§. 835. & seqq.).

## §. 1154.

*Quinam  
verba a re-  
bus discer-  
nere valeat.*

*Qui notiones veras a deceptricibus distinguere novit, is verba a rebus discernere valet.* Pone enim, quod verba a rebus discernere non valeat. Illas igitur cum his confundit: id quod absurdum (§. 834.).

Mathematici notiones veras a deceptricibus distinguunt (not. §. 1151.): nominibus vero ideo sibi imponi non patiuntur. Contra philosophi verba cum rebus sæpissime confundunt; sed nec iidem notiones veras a deceptricibus semper discernere valent. Exempla plurima occurrunt in physica scholasticorum.

## §. 1155.

*Idem ulterius ostenditur.*

*Quoniam notiones veræ a deceptricibus distinguuntur vel vi demonstrationis, vel observationis (§. 1151.); verba a rebus distinguere valet, qui notionum iis respondentium possibilitatem vel demonstrare, vel experientia stabilire novit.*

Pater hinc ratio, cur pauci in omni casu nomina a rebus distinguere apti sint.

## §. 1156.

*Quinam axiomata & postulata discernere va-  
leat.*

*Si quis acumine pollet notionem prædicati in notione subiecti indivulso nexu cum ea coherentem pervidendi; is axiomata & postulata a propositionibus demonstrativis discernere valet.* Etenim qui acumine isto pollet, is propositiones indemonstrabiles, seu quæ demonstratione non indigent (§. 262.), a demonstrativis discernere valet (§. 263. 264.). Sed propositiones indemonstrabiles sunt axiomata & postulata (§. 267. 269.). Er-

go axiomata & postulata a propositionibus demonstrativis discernere valet.

Illustrationi inserviunt exempla, quæ (not. §. 263. 264. 268. 270. & seqq.) in medium adduximus, cum propositionum indemonstrabilium atque axiomatum rationem exponeremus. Habet autem acumen, de quo nobis sermo est, rationes varias, tum logicas, tum ontologicas. Logicas tradidimus (§. §. cit.): ontologice nituntur principiis generalibus, quæ inter eminent principium contradictionis, quod idem simul esse & non esse nequeat, atque principium rationis sufficientis, quod nihil sit sine ratione sufficiente. Quamobrem sequentem adhuc propositionem addimus.

§. 1157.

*Qui rejecto axioma, vel postulato in dato quovis exemplo palam facere potest, vel contradictoria, vel quæ sunt absque ratione admittenda esse; is indivisum nexum prædicati cum subiecto intuetur.* Etenim cum contradictoria simul esse nequeant, nec absque ratione sufficiente quicquam esse possit; qui videt, aut axioma, vel postulatum admittendum esse, aut contradictoria, vel quæ sunt absque ratione concedi debere; is perspicit, prædicatum a subiecto non posse divelli, adeoque in notione subiecti necessario contineri notionem prædicati, consequenter dum idem in dato exemplo intuitive cognoscit, indivisum nexum prædicati cum subiecto intuetur.

*Quinam nexum indivisum prædicati cum subiecto intuetur in casu dato.*

E. gr. Inter postulata Euclidis refert, quovis intervallo & quovis puncto describi posse circulum. Si negas, id fieri posse; vi principii rationis sufficientis perspicias, adesse debere aliquam rationem, cur id fieri nequeat. Pone igitur punctum quodvis in plano quocunque & ex eo educlineam rectam, nec quicquam obstare percipies, quo minus eam circa punctum istud in orbem agas, consequenter in quovis exemplo palam est, sine ratione admittendum esse, quod recta intervallo quodam protensa circa punctum fixum moveri nequeat. Pater adeo postulati veritas intuitiva quadam ratione. Similiter si negares axioma Euclidis, *radios, unius circuli esse aequales*, negare deberes, circulum describi, quemadmodum definitio habet, eadem recta circa punctum fixum lata, atque adeo contradictoria admittenda esse perspicias. Optimum ego iudico hunc modum ve-

ritatem axiomatum in aprium producendi, ubi quis eam perspicere non valet, si in dato exemplo, seu casu ejus singulari beneficio principii vel contradictionis, vel rationis sufficientis absurdum palam fiat ex eo negato resultans.

§. 1158.

*Unde agnoscatursufficienspropositionisdeterminatio.*

*Qui propositionem ex notione subjecti demonstrare valet; is eam sufficienter determinatam esse agnoscit.* Etenim si ex notione subjecti demonstrari potest propositio, eo ipso patet, per eam prædicatum determinari (§. 219. 551. & seqq.). Propositio adeo sufficienter determinata est (§. 320.).

Sane demonstrationi debent: Geometræ, quod non habeant propositiones nisi determinatas. Ubi eam insuper habent Mathematici in Mathesi mixta, veluti Astronomia, in vagas non infrequenter incidunt propositiones, quarum applicatione non satis caute, seu promiscue facta periculum errandi creatur. Et sane extra Mathesin propositionibus vagis nihil frequentius, propterea quod demonstrationes exulant. Vagæ propositiones cum aliquo in casu possint esse veræ, in alio falsæ, in disceprationem abeunt, aliis affirmativam, aliis negativam non sine omni veritatis specie defendentibus.

§. 1159.

*Quinam a posteriori veritatem dijudicare valeant.*

*Si quis per observationem ostendere valet, prædicatum judicii intuitui esse vel attributum, vel essentialiale, vel quod per modum attributi inest (§. 673. & seqq.), vel ex pluribus observationibus inter se collatis palam facere potest, positis his solis prædicatum convenire subjecto; is veritatem propositionum universalium a posteriori dijudicare valet.* Etenim in utroque casu judicium universale verum est (§. 705. 706. 517.). Veritatem adeo propositionis universalis in hypothese propositionis præsentis dijudicare licet.

Exempla superius (not. §. 673. & seqq.) data propositionem præsentem illustrent. E. gr. Omnem lapidem esse durum a posteriori probamus, quod eum durum deprehendamus in aëre non minus calido, quam frigido, & non minus in humido, quam sicco, consequenter ratio duritiei intrinseca eaque constans esse debeat.

§. 1160.

§. 1160.

*Qui novit requisita ad veritatem omnia, seu rationem sufficientem, cur prædicatum subiecto tribuendum; is in dato casu singulari probabilitatem æstimare valet.* Etenim qui novit, quot requisita ad veritatem requirantur; is in dato casu judicare valet, utrum omnia adsint, nec ne, si quæ quædam deficiunt, quotnam eorum adsint, quotnam deficiant. Quoniam itaque in propositione probabili prædicatum subiecto tribuitur ob quædam requisita ad veritatem (§. 578.); qui omnia requisita ad veritatem novit, is de probabilitate in dato casu speciali vel singulari judicare valet.

*Quinam probabiliter  
dijudicare  
possit.*

E. gr. Ita probabilis est spes de messe divite concepra, si semen fecundum agro probe stercoreato fuerit commissum, ob ignorantiam tempestatis, cujus magnum est in vegetatione momentum. Enimvero cum multa requiratur demonstrativa rerum cognitio, ubi in praxi præsertim vitæ probabiliter judicandum; in Logica probabilium regulæ particulares exhibendæ, quæ beneficio principii nostri generalis ex principii demonstrativis disciplinarum stabiliendæ. Atque tum probabilitatis dijudicatio in casibus specialibus facilius redditur, ut plurimum evadat, cum beneficio principiorum generalium nonnisi paucorum esse queat.

§. 1161.

Quoniam requisita ad definitionem (§. 580.), & ad propositionis cum categoricæ (§. 583.), tum hypotheticæ (§. 584.) veritatem stabilivimus ac inde definitionum ac propositionum applicationem probabilem (§. 581. 590.) deduximus; qui regulæ de applicatione definitionum ac propositionum probabili vim tenet, is de eadem in dato casu judicium ferre poterit (§. 348. 349.).

*Quinam de  
probabili de-  
finitionum &  
propositio-  
num appli-  
catione judi-  
care valeat.*

Non igitur opus est, ut de his distinctius agamus, quæ levi attentione adhibita manifesta sunt. Etenim intuitive requisita ad veritatem in dato casu cognoscis & beneficio theorematum de requisitis ad veritatem definitionum atque propositionum in subsidium vocatis, ubi opus fuerit, aliis regulis logicis, quædam deficere

Kkk kk 3

col-

colligis, consequenter probabilem tantummodo applicationem locum habere intelligis, quemadmodum regulæ inculcant.

## §. 1162.

*Quinam de probabilitate hypotheseum philosophicarum judicare aptus sit.* Qui novit phenomena, quorum gratia hypothesis aliqua philosophica condita fuit, & ex hac sive directe, sive indirecte conclusiones colligere valet; is de probabilitate hypotheseos judicium ferre potest. Etenim cum requisita ad veritatem hypotheseos philosophicæ sint phaenomena, quorum inde reddenda est ratio & quæ per se invicem non determinantur. (§. 607); ubi hypothesis vera fuerit, ea, quæ vel directe, vel indirecte ex ea colliguntur, cum illis consentire debent, seu, quod perinde est, quæ ex hypothesis a priori deducuntur, eadem sint necesse est cum phaenomenis, quæ per observationem patent. Quodsi ergo quis & phaenomena novit, & a priori cum directe, tum indirecte colligere valet, quæ inde consequuntur; ex collatione conclusionum a priori deductarum & phaenomenorum observatorum consensus eorundem innotescit. De hypotheseos adeo probabilitate judicare valet.

E. gr. Astronomi norunt phaenomena motus proprii planetarum atque ex hypothesis Copernicana demonstrativa ratione deducere valent, quæ inde consequuntur. Ex consensu itaque eorum, quæ inde fluunt, atque phaenomenorum, quæ observant, veriore illam judicant.

## §. 1163.

*Quinam certius de ea judicare possit.* Quoniam consensus eorum, quæ ex hypothesis philosophica colliguntur, atque phaenomenorum major est, si ad ipsas determinationes mathematicas extenditur; quæ ea, quæ mathematicas determinationes admittunt, per principia mathematica ex hypothesis pariter atque observatis eruere valet, ut in iis quoque consensus liquido appareat; is de probabilitate hypotheseos judicium multo certius ferre potest.

E. gr. Astronomi ex hypothesis Copernicana formam calculi geometrici motus planetarum exsculpunt & juxta eum loca eorundem ad datum tempus determinant mox observaturi, num eodem ibidem



ibidem sint comparaturi. Consensus calculi cum observatis ab alia hypothesi non expectandus iisdem persuasit, hypothesin Copernicam esse veriore.

CAPUT II.

DE ÆSTIMANDIS VIRIBUS AD LIBROS  
CONSCRIBENDOS, DIJUDICANDOS ET  
LEGENDOS NECESSARIIS.

§. 1164.

**S**I quis notiones distinctas &, quantum datur, adequatas for-  
mandi habitum pollet atque singula suis nominibus efferre no-  
vit; is scriptum historicum ea fini condere potest, ut rerum in  
natura & arte obviarum factorumque notitiam inde hauriat lector.  
Etenim qui notiones distinctas &, quantum datur, adequatas for-  
mandi habitum pollet, is quæ in re diversa insunt, a se invicem di-  
stinguit, atque adeo in rebus corporeis, cum naturalibus, tum  
artificialibus partes singulas in iisdem discernibiles a se invicem  
distinguit & in iis porro a se invicem discernit, quæ discerni pos-  
sunt, donec ad partium partes observabiles ultimas perveniat,  
nec minus in factis perpendendis eodem modo versatur (§. 79.  
88. 95.). Quodsi ergo porro singula suis nominibus efferre  
novit, quæ in rebus vel factis distinguit enumerare valet. Ea  
igitur præstare potest, quæ ad historiam naturalem atque arti-  
um, immo & proprie sic dictam condendam requiruntur, qua-  
tenus ea sufficit rerum naturalium (§. 761.), artificialium (§.  
773.), artium (§. 776.) & factorum hominum notionibus animo  
lectoris ingenerandis.

Scriptum hi-  
storicum qui-  
nam condere  
possit ad re-  
rum & facto-  
rum notiti-  
am inde  
haurien-  
dam.

Notiones distinctæ hic non confundendæ sunt cum definitioni-  
bus, ut adeo complectantur, quicquid in re describenda observa-  
tur. Immo cum historia singularium sit, omnibus quoque modis &  
rela-

relationibus in iisdem locus est. Quoniam notiones distinctæ pendent a iudiciis intuitivis (§. 1140.); in iis formandis (§. 669.) multum esse debet, qui in hoc scriptorum historicorum genere muneris sui partes adimplere voluerit,

§. 1165.

*Quibus rationibus apti reddamur adscripta historica condenda.*

Quoniam cum in ontologicis docetur, quænam in notionibus distinctis diversorum entium formandis tenenda sint, & ex disciplinis specialibus patet, quidnam in entibus diversarum specierum attendendum sit, ubi in dato casu singulari notionem distinctam adipisci volueris; *qui in illo genere scientiæ, ad quod res describenda refertur, notiones generales sibi comparavit; is ad conscribendum scriptum historicum ea fini, ut notiones rerum descriptarum animo lectoris ingenerentur, peraptus erit.*

E. gr. Notio *compositi*, quæ in Ontologicis traditur, generatim monstrat, quænam in notione distincta, corporis cum naturalis, tum artificialis formanda attendenda sint. Notio *temperantiæ*, quæ in Moralibus stabilitur, ad formandam notionem distinctam temperantiæ *Aristidis* præluceat. Ceterum hic quoque ad notiones cum generales ontologicas, tum speciales ex aliis disciplinis hauriendas non modo notæ referendæ sunt, quæ definitionem ingrediuntur; verum etiam cetera omnia, quæ ex definitionibus deducuntur, rei prædicta. Habent adeo disciplinæ, si quidem solida rerum cognitione imbuunt animum, in concinnandis scriptis historicis usum haud contemnendum. Exemplo nobis est Astronomia, quæ, quo magis excolta fuit, eo attentiores & accuratiores facti sunt Astronomi in observando. Nec difficulter quis intelliget, eum multo rectius hominem prudentem & ejus actiones descripturum, qui prudentiæ notionem fecundam ex moralibus hausit.

§. 1166.

*Quinam historiam naturalem & artium in usum*

*Si quis in iudiciis intuitivis, iisque determinatis, formandis, modis ab attributis & essentialibus distinguendis, causis rerum & rationibus finalibus inquirendis probe versatus fuerit; is historiam & naturalem, & artium ea fini condere poterit, ut animum lectoris principiti imbuat, quibus in re*

110

*tiociniis de rebus naturalibus & artificialibus opus est.* Etenim non alia requiruntur ab eo, qui hoc sine historiam sive naturalem (§. 771.), sive artium condit (§. 773.). Qui vero in iisdem præstandis multum versatus, is ea præstare utique valet, quæ requiruntur.

Qui novit, quæ ad attributa & essentialia a modis distinguenda (§. 672. & seqq. 732. & seqq.), judicia determinata formanda (§. 705. 706.), causas rerum (§. 697. & seqq.) atque rationes finales pervestigandas requiruntur; is me non monente intelliget, quot animi dotes requirantur ad scripta historica in hoc genere condenda.

§. 1167.

*Historiam civilem, ecclesiasticam & privatam conditurus ea fini, ut dogmata politica & moralia inde confirmentur ac prudentia civilis & privata principia hinc deriventur, notionibus moralibus atque politicis determinatis instructus, in judiciis intuitivis formandis exercitatus & in discursivis ab intuitivis distinguendis promptus esse debet.* Etenim qui historiam civilem atque ecclesiasticam ad confirmanda dogmata moralia & politica & prudentiæ civilis ac privata principia inde haurienda condit, statum Reip. atque Ecclesiæ una cum mediis florem ejus conservantibus ac impedimentis & remediis (§. 779. 781.), nec non hominum actiones honestas atque turpes (§. 782.) distincte describere tenetur. Ut igitur eorum omnium notiones distinctas sibi formare atque singula proprio suo nomine efferre possit, notionibus moralibus atque politicis determinatis instructus (§. 1165.), atque idem in judiciis intuitivis formandis probe exercitatus esse debet (§. 1140.).

*Quinam ad historiam in usum civilem atque moralem condendam aptus.*

Porro historiam civilem, & ecclesiasticam atque privatam conditurus sedulo cavere debet, ne sua de facto judicia cum facto ipso confundat (§. 778.). Factum ergo cum sit judicium intuitivum, nostrum autem de eo judicium sit discursivum (§. 51.), utpote ex facto, seu intuitivo mediante aliqua notione generali elicited (§. 348. 349.); & in judiciis intuitivis

(*Wolfii Logica*)

LIII

for-

formandis probe exercitatus, & in iisdem a discursivis distinguendis promptus esse debet.

Non hic agimus, nisi de iis historici dotibus, quæ ex principijs logicis demonstrari possunt. Ceterum ex iis Logicæ quoque usus palam fit, quem historicus ab ea expectare potest.

## §. 1168.

*Quinam ad historiam in usum legum providentiæ agnoscendam aptus.*

*Historiam civilem, ecclesiasticam & privatam in usum legum providentiæ divini cognoscendarum conditurus notionibus moralibus, politicis & Theologiæ naturalis instructus, in judiciis determinatis formandis promptus & in rationibus pervestigandis probe exercitatus esse debet.* Historiam enim ea fini conditurus, quæ circa eventus rerum consilio, quæ fortunæ tribuenda, a se invicem distinguere debet & rationem convenientiæ factorum cum actionibus hominum in attributis divinis perscrutari tenetur (§. 783.). In rationibus adeo pervestigandis probe exercitatus sit necesse est, idemque principijs Theologiæ naturalis probe instructus.

Quoniam præterea fata Rerump. ecclesiæ hominumque in singulari spectatorum cum eorum actionibus sedulo conferre tenetur (§. 783.), ut eorundem convenientia pateat; eadem dijudicaturus animum habere debet notionibus moralibus atque politicis probe imbutum & in judiciis determinatis formandis exercitatum (§. 348. 349.).

Ex his & antecedentibus satis innotescit, historicum philosophum simul esse ac Logicam artificialem utentem maxime familiarem experiri debere (§. 12.).

## §. 1169.

*Quinam historiam literariam in usum discensionum condere aptus.*

*Historiam literariam ea fini conditurus, ut constet, unde petenda sit veritatum jam inventarum cognitio, principia illius disciplinæ, cujus historiam dare intendit, familiaria experiri, qui ad eam spectantes prodire libros perlegere & verum a falso, certum ab incerto, probabile a minus probabili distinguendi facultate pollere debet.* Etenim historiam literariam in hypo-

theti

thesi propositionis conditurus alicujus disciplinæ, qui ad eam pertinentes prodiere libros recensere & argumenta particularia ab autoribus pertractata indicare debet (§. 784.). Necesse igitur est ut eos perlegat. Quoniam porro methodum, quæ in explicandis & probandis dogmatis usus, explicare (§. cit.), adcoque quantum in veritate enodanda præstiterit referre tenetur; non minus probationes ad examen revocare, quam in veritatem ac probabilitatem propositionum inquirere debet. Principia igitur disciplinæ eum familiaria experiri (§. 1149.) & facultate verum a falso, certum ab incerto, probabile a minus probabili distinguendi pollere oportet.

Patet adeo historiam literariam condere difficilius esse quam librum dogmaticum: neque enim hic sufficit in disciplina probe esse versatum & solida rerum eo pertinentium cognitione imbutum; verum multa etiam lectione opus est eaque non fugitivo oculo, sed omni attentione ad legendum scriptum dogmaticum requisita absolvenda, si quidem & officio suo satisfacere, & finem intentum consequi velit Autor. Atque hæc ratio est, cur viri in aliquo scientiarum genere eminentes historiam tamen literariam in eo condere non audeant, tum quod librorum apparatu necessario non sint instructi, tum quod a multa illa & rædiosa lectione abhorreant, quæ plurimum temporis consumit, ubi accurato examini subicere volueris, quæ tibi nondum explorata sunt: id quod profecto fieri debet, nisi nimia erga autores fiducia subinde falli & rursus lectores historiæ tuæ fallere volueris.

§. 1170.

*Historiam literariam ea fini conditurus, ut ars inveniendi inde locupletetur, nosse debet quænam veritates unoquoque tempore jam fuerint inventæ & quarum notitiam habuerit, qui alias adhuc incognitas ulterius invenit.* Patet ex iis, quæ in historia literaria in usum artis inveniendi condenda enarranda sunt (§. 785.).

*Quinam literariam in usum artis inveniendi condere possit.*

Exemplum ibi propositum multam quoque lucem huic theoremati affundit. Nec inutile fuerit conferre ea, quæ de arte inveniendi ex historia literaria locupletanda dicta sunt (§. 944.).

§. 1171.

*Quoniam  
scriptum dog-  
maticum  
historicum  
condere pos-  
sit.*

*Scriptum dogmaticum historicum conditurus in scriptis scientificis probe versatus esse atque propositionum in demonstrandis aliis atque praxibus usum sibi familiarem reddere debet: imprimis etiam nosse tenetur, quænam ad singula rite intelligenda necessaria sunt.* Etenim in scripto dogmatico historico, si quidem ejus lectione ad scientifica facilius intelligenda præparari, vel veritates in usum vitæ inde addiscere debet lector, non collocandæ sunt definitiones, nisi quarum realitas in scripto scientifico jam adstructa, nec propositiones, nisi quæ jam publice in scripto aliquo scientifico fuerint demonstratæ (§. 847.), & probabiles ad quandam in vita praxin utiles a demonstrativis distinguendæ (§. 848.). Istiusmodi adeo scriptum conditurus in scientificis probe versatus esse debet, ut & norit, quænam definitiones & propositiones sint demonstratæ, quænam tantummodo probabiliter adstructæ. Idem ulterius sic patet. In scripto historico non collocandæ sunt propositiones, nisi determinatæ (§. 788.). Enimvero utrum propositiones sint determinatæ, nec ne, vi demonstrationis agnoscitur (§. 1158.). Quamobrem cum demonstrationes in scriptis scientificis reperiantur (§. 790.); in iis probe versatus esse debet, qui in historico dogmatico condendo utilem operam præstare intendit.

Porro in scripto historico dogmatico non locum habent propositiones, nisi quarum frequens est in demonstrandis aliis usus (§. 864.), vel quæ ad praxin tendunt (§. 865.). Istiusmodi adeo scriptum conditurus usum propositionum cum in demonstrandis aliis, tum in praxibus perspectum habere, consequenter eundem sibi familiarem reddere debet.

Denique in scripto dogmatico historico termini singuli accurata definitione sunt explicandi, nisi iisdem vulgo respondeat notio confusa quidem, sed tamen fixa (§. 788.), neque plures definitiones tradendæ, quam quæ ad definitiones sequentes atque subjecta & prædicata propositionum intelligendum suffi-

sufficiunt (§. 823.). Scriptum adeo istiusmodi conditurus nosse tenetur, quænam ad singula rite intelligenda necessaria sunt.

Vulgo librorum dogmaticorum historicorum cura ab iis adjicitur, qui vel scientifica condere, vel nova in lucem inventa proferre valent, dedecori sibi ducentes minus præclara dare, cum magis præclara dare possint. Sed per præcipitantiæ statuentes eandem ad alios ablegant, qui scopum istiusmodi scriptis præfixum attingere minime valent. De viribus ad scriptum condendum requisitis non judicandum ex viribus lectorum, quorum usui istud destinatur. Male consultur scientiæ & utilitati generis humani, quod vulgo scripta tyronum usui destinata ab iis condantur, qui nequidem scripto historico dogmatico genuino explicando, nedum condendo pares sunt.

§. 1172.

Quoniam in scripto dogmatico historico, quod in usum inventorum conditur, omnes propositiones inferendæ, quæ in scientificis publice demonstratæ extant (§. 863.); *librum dogmaticum historicum in gratiam inventorum conditurus omnes evolvere debet autores, qui non tantum aliis jam dicta reperiunt, verum etiam nova superaddunt, quæ apud alios nondum extabant.*

*Librorum lectio ad scriptum historicum dogmaticum in usum inventorum condendum necessarium.*

§. 1173.

*Scriptum scientificum conditurus in aliquo scientiarum genere & definitiones ac propositiones illuc spectantes perspectas habere & habitu methodo scientifica utendi pollere debet: immo in illis etiam disciplinis probe versatus sit opus est, unde principia demonstrandi mutuanda.* Etenim scripto scientifico, quod in usum vitæ conditur, inferendæ sunt propositiones, quæ ad praxin tendunt & præterea aliæ, quæ his demonstrandis inserviunt (§. 866.); in eo autem, quod in usum eorum conficitur, qui ad ulteriora progredi decreverunt, etiam aliæ, quæ ab usu vitæ alienæ (§. 867.). Istiusmodi adeo scriptum conditurus in aliquo scientiarum genere propositiones illuc spectantes probe perspectas habere debet, ut non ignoret, quibusnam praxes in vita utiles superstruantur, quibus tanquam principis opus sit in disciplinis aliis, quibus denique instructus esse de-

*Scriptum scientificum quinam condere possit.*

beat in eodem genere veritates adhuc latentes proprio Marte eruturus.

Scripta scientifica methodo philosophica (§. 791.), consequenter scientifica (§. 792.) conduntur. Eam igitur methodum familiarem experiri debet scriptum scientificum conditurus.

In scripto scientifico propositiones demonstrativæ demonstratione vel ostensiva, vel apogogica muniendæ sunt (§. 790.): In numerum autem principiorum demonstrandi non assumendæ sunt propositiones tanquam principia, nisi quas demonstratas esse constat (§. 562.), ideo citandæ ex iis libris, in quibus reperiuntur (§. 795.). Quamobrem librum methodo scientifica conditurus in iis disciplinis probe versatus esse debet, unde principia demonstrandi mutuatur.

E. gr. Astronomiam methodo scientifica traditurus inventa Astronomorum cognita atque perspecta habere, methodum mathematicam, qua utuntur Geometræ & quæ eadem cum philosophica (§. 139. *disc. prælim.*), consequenter cum scientifica (§. 792.), familiarem experiri & principiorum Arithmeticæ, Geometriæ ac Trigonometriæ utriusque, nec non Sphæricorum *Theodosii* optime gnarus esse debet. Quod si unum horum requisitorum deficiat, autor non dabit, quæ regulis logicis satisfaciunt. Et eodem modo sese res habet in omni aliæ scientiarum genere.

#### §. 1174.

*Quinam more Geometrico describere librum possit.*

*Qui probationem alicujus propositionis in syllogismos seriales ita resolvere novit, ut præmissæ ulterioris probationis indigæ continuo probentur per prosyllogismos, donec ad tales perveneris, quorum præmissæ probatione nulla indigent; is eadem methodo extra Matthesin uti potest, qua Geometræ uti solent. Intuitiva ratione idem agnoscere licet, siquidem ad exemplum attendere velis, quo modum propositionem datam more geometrico demonstrandi illustravimus (not. §. 801.).*

#### §. 1175.

*De libris dogmaticis*

Quoniam supra integro capite (§. 813. & seqq.) exhibuimus



buimus regulas de scriptis dogmaticis iudicium ferendi, scilicet *quinam judicare possit.* an scriptum sit in suo genere completum (§. 815. & seqq. 868.); an prolixum nimis & superflua contineat (§. 819.); an sit perspicuum (§. 820.); an utile (§. 825.), an ordine (§. 827. & seqq. & accurata methodo digestum (§. 836. & seqq.); *qui regulas istas d. jud. candi libros dogmaticos sibi familiares reddit & eas ad casus obvios dextre applicandi habitum sibi comparat, is non modo iudicium exactum de iisdem ferre, verum etiam idem demonstrare valet.*

Applicantur regulæ a nobis propositæ ad casus obvios ubi iudicaveris, num scriptum, quod offertur, ita sit comparatum, ut definitiones vel hypotheses theorematum in idem quadrent. Etenim datis hisce iudiciis ope illarum definitionum (§. 349.) & istorum theorematum (§. 348.) inferuntur iudicia quæ sita. Et modus applicandi regulas nostras idem est cum modo demonstrandi. Qua ratione in iis applicandis versaris, ut certus sis atque securus de veritate iudicii tui; eadem quoque ratione veritatem iudicii tui alteri persuades. Demonstrationem contexere licet (§. 151. 152.) sumtis iis, quæ definitionibus ac hypothesibus theorematum nostrorum convenienter ex conditione scripti eruantur, tanquam hypothesi, & regulis nostris tanquam principiis demonstrandi. Etenim si quis principia impugnare velit, is eorum veritatem ex opere hoc logico perspicere debet: quod si studium in eo legendo collocare noluerit, contra eum non erit disputandum.

§. 1176.

*Si quis demonstrationes logice resolvere novit atque regulas Logicæ in universum omnes familiares experitur; is judicare valet, num liber scientificus accurata methodo sit conscriptus.* Etenim qui demonstrationes propositionum logice resolvit, eidem constat, num demonstrationes sint completæ, ordinatæ aut prorsus consummatæ (§. 1150.) & num autor probabilia a veris distinguat (§. 586.), immo num principia demonstrandi non alia adhibeantur, quam quæ vel in antecedentibus stabilita fuere, vel aliunde citantur (§. 551. & seqq.). Quod si præterea Logicæ regulas in universum omnes familiares experitur, de unoquo-

quoque veritatum genere judicare valet, num singula rite se habeant (§ 348. 349.), v. gr. num definitiones sint veræ & accuratæ; axiomata & postulata talia, quæ sine demonstratione concedi possunt; observationes exactæ; ratiocinia legitima &c. Logice adeo qui demonstrationes resolvere novit & Logicæ regulas quascunque dextre applicare potest, is de accurata libri methodo judicare valet (§. 790.).

Logicam hic non intelligimus quamcunque, sed eam, quæ lapidem Lydium (§. 26. & seqq.) non veretur. Inprimis autem hoc iudicium laturus attendere debet, num termini, qui ingrediuntur definitiones sequentes, in antecedentibus explicentur, vel alibi explicati præsupponantur, nec ne, & num propositiones, quibus tanquam præmissis ratiociniorum uteris in demonstrando, in anterioribus fuerint probatæ, aut alibi probatæ præsupponantur (§. 790.). Hoc enim directorio deducere sensum sensimque ad cetera, in quibus examinandis Logicæ regulis opus est.

## §. 1177.

*Propositiones in scripto scientifico quibusdam intelligere possit.* Si quis definitiones auctoris, tum etiam eas, quas alibi datas supponit, familiares experitur; is in scripto scientifico propositiones intelligere valet. Etenim qui definitiones auctoris, quas vel ipse exhibet, vel alibi datas supponit, familiares experitur; is per eas propositiones ejusdem explicare valet. In scripto autem scientifico propositiones omnes per definitiones auctoris sunt explicandæ, nisi ubi auctor ex defectu attentionis in methodi regulas impiegit (§. 910.), sive ipse eas dederit (§. 904.), sive eas alibi datas supponat (§. 905.). Qui ergo utrasque definitiones familiares habet, is propositiones in scripto scientifico explicare, consequenter intelligere valet (§. 903.).

Ita propositiones *Euclidis* intelligit, qui definitiones ejus sibi familiares reddidit, ut idea definito respondens in dato qualibet casu statim animo occurrat. Temerarium adeo est sibi de sensu propositionum in scripto scientifico sumere iudicium, antequam definitiones perpensæ, nedum familiares factæ fuerint. Ipso autem opere convincimur, definitiones probe intellectas nonnisi successive familiares fieri. Mirum adeo non est hominum methodi imperitorum

in pervertendo sensu propositionum, quarum explicatio demonstrativa ratione stabiliri potest (§. 911.), præcipitantiam esse adeo frequentem.

§. 1178.

*Si quis in significatum inquirere valet, quem ipsi usus loquendi tribuit; is intelligere potest autorem vocibus communibus absque definitione utentem.* Etenim si autor velit intelligi, vocum communium significatum receptum non immutare debet, nisi idem diserte monuerit. Quamobrem qui significatum determinare valet, quem ipsi usus loquendi tribuit; is cum verbis autoris eas notiones jungit, quas cum iisdem ipsemet conjungit. Autorem adeo intelligit (§. 903.).

*Quinam intelligat autorem vocibus in definitis communibus utentem.*

Difficilior sane est interpretatio, quando autores vocibus indefinitis, quamvis communibus utuntur, ubi non satis fixa iisdem notio confusa vulgo respondet, quam ubi terminos adhibent accurata definitione ante explicatos.

§. 1179.

*Si quis in demonstrando, vel propositionibus determinatis a posteriori stabilendis fuerit probe exercitatus & principiorum in dato genere notitia instructus atque significatus prædicari pateat; is in casu dubio propositionem explicare valet.* Etenim qui principiorum in dato genere notitia instructus atque in demonstrando peritus, is dato prædicato per significatum ejus certum investigare valet, qualis esse debeat notio subjecti, ut prædicatum istud eidem convenire possit (§. 724.). Quamobrem cum in casu dubio auctori non tribuendus sit sensus erroneus, quamdiu commodus locum habet (§. 907. 908.); patet in hypothesi propositionis sensum a priori dijudicandi explicationem fieri posse.

*Quinam in casu dubio propositionem interpretari possit.*

Idem eodem modo patet quoad alteram hypotheseos partem, si nempe lector fuerit exercitatus in propositionibus determinatis a posteriori stabilendis, ut experientia obstetricante subiecto prædicatum datum conveniat.

Nil moror objicientes, quod nimis difficilis a nobis hac ratione reddatur interpretatio. Oportandum enim foret, ne vulgo adeo facile (*Wolffii Logica*)

M m m m

cilia

cilia viderentur; quæ ardua profecto & difficilia sunt: expulsa nimirum oscitantia & præcipitantia ex orbe literario, non vanitati amplius in aliis perstringendis, nec iniquitati in vexandis, sed veritati ac virtuti litaretur.

## §. 1180.

*Quinam aptus ad legendum scriptum dogmaticum continuo orationis filo contextum.*

*Si quis scriptum dogmaticum continuo orationis filo contextum legere voluerit, ut dogmata inde hauriat; is Logica utente artificiali pollere debet.* Scriptum enim dogmaticum continuo orationis filo contextum lecturus singulas definitiones ac propositiones inde eruere ac beneficio definitionum ad suas species reducere; quæ ad demonstrationem seu probationem, quæ ad scholia pertinent, ab iisdem secernere debet (§. 945.). Quodsi lectionem instituat ea fini, ut dogmata inde hauriat vel ad ulteriorem veritatis investigationem, vel ad usum vitæ utilia, consequenter propositionem nullam memoriæ mandet antequam ipsi constet eam esse determinatam (§. 954.), vel vi demonstrationis (§. 955.), vel vi observationis (§. 956.); in demonstrando ac judiciis determinatis ex observationibus eruendis exercitatus esse debet. Patet adeo, eum pollere debere habitu regulas Logicæ ad praxin transferendi, consequenter Logica utente (§. 12.).

Tentet, cui volupe fuerit, resolutionem logicam alicujus textus eo modo, quo articulum primam Principiorum philosophiæ *Cartesii* (not. §. 945.) resolvimus, & ipso facto experietur, quanta Logicæ notitia instructus esse debeat lectionem utiliter absoluturus.

## §. 1181.

*Quinam libri absque Logica utente utiliter legantur.*

Quoniam in libris Mathematicorum & methodo philosophica conscriptis nulla resolutione contextus logica opus est, propterea quod autor ipse singula a se invicem distinguit (§. 946.) nec propositiones afferuntur nisi determinatæ, demonstrationes nisi consummatæ aut ordinatæ & completæ locum habere debent (§. 790.); *hos libros legere aptus est, qui Logica nec docente, nec utente pollet, immo librorum istiusmodi lectione Logica utens naturalis comparatur.*

Atque

Atque hinc est, quod lectione elementorum Geometriæ *Euclidis* vel eadem methodo ab alio traditorum intellectus acui, dicatur. Quodsi quis tamen logica docente pollet, cum ad istiusmodi scriptorum lectionem accedit; is Logicam utentem artificialem sibi comparat. Sed de eo ex instituto paulo post dicemus.

§. 1182.

*Qui demonstrationum analysin logicam (not. §. 551. & seqq.) dare novit; is scripta dogmatica scientifica legens demonstrationes facillime intelligit.* Etenim demonstrationem intelligit, qui vel confuse agnoscit ex præmissis conclusiones rite inferri, nec sumi præmissas nisi certas. Qui demonstrationum logicam analysin dat (not. §. 551. & seqq.), is formam singulorum syllogismorum intuetur, & præmissas singulas expendit, consequenter distincte agnoscit, certas esse præmissas & ex iis conclusiones legitime inferri. Omnium adeo facillime demonstrationes intelligit.

*Quinam demonstrationes facillime intelligat.*

Experientia docet, quam molestum accidat tyroni pariter atque exercitatis, ubi demonstrationes ea ratione expendere didicerunt, quam fert analysis earum logica, & inde ad inordinatas ab eadem remotas attendere jubeantur.

§. 1183.

*Si quis definitiones ac propositiones anteriores sibi familiares reddidit, is ad sequentes in scripto scientifico progredi potest.* Etenim in scripto scientifico definitiones eo ordine collocantur, ut ex anteriori sint loco, quarum definita ingrediuntur definitiones sequentes, & propositiones priori loco ponuntur, quæ tanquam præmissæ ingrediuntur una cum definitionibus syllogisticis, quorum concatenatione demonstratio absolvitur (§. 790.). Qui ergo definitiones sequentes ac propositiones intelligere voluerit, is familiares experiri debet definitiones antecedentes, & qui certus esse voluerit nullum sumi in demonstrando principium, quod non in definitionum ac propositionum anteriorum numero habeatur, ei & definitiones,

*Quinam in lectione scripti scientifici ad sequentia progredi possit.*

Mmmmm 2

& pro-

& propositiones anteriores familiares esse debent. Quamobrem qui definitiones ac propositiones anteriores sibi familiares reddidit, is ad sequentes progredi potest.

Hinc non mirum eos in lectione scriptorum scientificorum nihil proficere, qui nondum intellectis, nedum familiaribus sibi redditis anterioribus ad posteriora progrediuntur, immo anterioribus prorsus neglectis, quæ medio vel postremo loco continentur, evolvunt, nisi in eo genere tyronum numero annumerandi. Conferenda hic sunt, quæ ea fini superius (§. 963. 964. 967.) inculcata fuere.

§. 1184.

*Quinam ex cursoria lectione librorum scientificorum proficere possit.* Si quis ex scripto aliquo scientifico definitiones ac propositiones sibi familiares reddidit; is alia in eodem genere fugitivo ocululo percurrens & scientiam suam, & cognitionem historicam locupletare valet. Etenim qui ex scripto aliquo scientifico definitiones ac propositiones sibi familiares reddidit; is aliud in eodem genere scriptum vel fugitivo oculo percurrans extemplo animadvertit propositionem, si qua occurrit, sibi nondum perspectam, cumque ab Autore ex anterioribus, adeoque sibi notis, demonstretur, circa demonstrationem minime hæret (§. 569.). Quam primum adeo eandem vi demonstrationis certam agnoscit (§. 568.); eam memoriæ mandare atque sic scientiam suam locupletare valet. Idem eodem modo ostenditur, ubi propositio a posteriori, vel rationibus saltem probabilibus adstruitur.

Enimvero dum hac ratione dijudicare valet, quamnam in unoquoque libro singularia occurrunt, si temporis, quo prodire, rationem habet; eodem labore in historia quoque literaria egregie proficit (§. 784.), quatenus vel ad artem inveniendi locupletandam usum præstat (§. 785.).

Qui adeo præclaros accelerares in aliquo scientiarum genere progressus amant, ex libro aliquo scientifico aut, ubi talis deficit, ex alio quocunque ea lege perlecto, quam nos in superioribus integro capite (§. 902. & seqq.) tulimus, ubi in arte inveniendi probe exercitatus fuerit (§. 962.), definitiones ac propositiones sibi familia-

res

res reddant & alios deinde libros in eodem genere evolventes nonnisi ad ea attendant, quæ in systemate suo, quod cognitionis fundamentum posuere, minime extant, atque cum principiis sibi cognitis connectant. Hac profecto ratione ipso facto experientur, quod maximo temporis, atque laboris compendio & scientiam, & historiam literariam locupletare atque evidentiam in omni cognitione sua conservare possint. Præterea hunc etiam experientur usum, quod compilatores a bonis autoribus dignoscant. Experta loquor, & aliis maxime profutura. Quodsi quis more communi plurium librorum lectioni tyro adhuc vacet, is magis confunditur, quam proficit, ac magno sæpe conatu temporisque dispendio parum aut nihil, saltem nihil præclari addiscit. Ego sane cum in Elementis Matheseos universæ, tum in operibus Philosophiæ, quorum hoc opus logicum primum est, eum mihi præfixi scopum, ut veritatis fidentes palmaria rerum cognitione imbuam, quo magno in posterum temporis atque laboris compendio scientiam suam ex libris aliis locupletare queant.

§. 1185.

*Si quis notiones a rebus præsentibus abstrahere valet vel operam dat, ut ipso opere in se experiatur ea, quæ de interiori hominis mutatione scriptura sacra in medium affert, ac in demonstrando fuerit versatus; is verum scripturæ sacræ sensum investigare ac verum a falso discernere valet.* *Quinam scripturam sacram interpretari possit.* Qui enim a rebus præsentibus sive oculis, sive animo (quo ergo etiam ea referimus, quæ dudum antiquata studio antiquitatum nobis innotescant) vel etiam a mutatione spiritali, quam in semetipso experitur, notiones abstrahit; is cum verbis scripturæ sacræ eas notiones jungit, quæ ex intentione Scripturæ S. cum iisdem jungi debent (§. 971. 972.). Verum adeo sensum scripturæ sacræ crucere valet (§. 969.).

Quodsi idem in demonstrando fuerit versatus, is judicare valet, quandonam notio subjecti & prædicati sibi mutuo repugnet, quando per se invicem determinantur, atque adeo interpretationem veram a falsa discernere potest (§. 975. 676. 977.).

Immo verum sensum non modo eruere, verum etiam ex principiis a nobis stabilitis demonstrare valet, eum esse verum: id quod non exigui momenti est in constituenda fidei analogia & condendo systemate Theologiæ harmonico ad terminandum controversias, quibus nunc animi dissentientium exacerbantur. Apparet adeo, quam necessarium sit, ut interpretes scripturæ atque systematum conditores methodum scientificam in potestatem suam redigant, non modo Logicam, quæ lapidem fert Lydium (§. 26. & seqq.) sibi familiarem reddentes, verum etiam scriptorum scientificorum atenta lectione Logicam utentem sibi comparantes.

## §. 1186.

*Scripturam  
sacram qui-  
nam expli-  
care possit.*

*Qui scriptura sacra verum sensum eruere valet, propositiones palmarias pure revelatas una cum principiis Theologiæ naturalis atque philosophiæ moralis sibi familiares reddidit & demonstrandi habitu pollet, is scripturam sacram explicare valet.* Etenim si verum sensum verborum scripturæ sacræ eruere valet, in notiones iisdem ex intentione Dei jungendas inquirere potest (§. 1185.). Si demonstrandi habitu pollet ac Theologiæ naturalis & philosophiæ moralis principiis instructus est; propositiones, quæ in scriptura sacra occurrunt, rationi pervestigabiles demonstrare potest (§. 979.). Si denique demonstrandi habitu pollet & propositiones quasdam revelatas palmarias una cum principiis aliis philosophicis sibi familiares reddidit; is etiam in propositionibus pure revelatis prædicatum subiecto competere ex hujus notione deducere valet (§. 980.). Scripturam igitur sacram in hypothese propositionis præsentis explicare potest (§. 981.).

Facile apparet, nobis hic sermonem esse de eo, qui scripturam sacram explicat nullo alio interprete adjutus, ut inventoris munere fungatur. Quodsi vero istiusmodi librorum sacrorum explicationes publice prostant, iis deinde in usum populi erudiendi uti possent etiam alii, qui tanta virium copia minime instructi, quemadmodum veritates inventas discere easque deinde alios docere valent, qui eas proprio Marte invenire minime norunt. Enimvero talia sum demum in potestate erunt, quando ad studia solidiora tempe-

stive



sive revocabitur juvenus studiosa. Ceterum hic tenendum est, me ad explicationem scripturæ sacre non solum requirere, ut sensum ejus verum intelligamus; verum etiam ut veritatem, quantum datur, intueamur, ob multiplicem, qui inde redundat, usum suprà (§. 981.) jam indicatum.

### CAPUT III.

## DE ÆSTIMANDIS VIRIBUS IN CONVINCENDO, CONTROVERTENDO, DISPUTANDO ET DOCENDO.

§. 1187.

**Q**ui regulas formandi notiones, definitiones ac propositiones determinatas a posteriori dextre applicare & alterum ad observationes & experimenta illuc requisitas adducere potest; is alterum veritatis a posteriori convincere valet. Cum enim a posteriori alterum convicturus eum eo adducere debeat, ut res præsentis, quarum notio exhibetur, vel de quibus judicatur, coram intueatur, atque adeo, si de rebus practicis sermo fuerit, earum veritatem in se experiatur (§. 985.), applicatis in dato quolibet casu regulis, quæ ad notiones, definitiones ac propositiones cum categoricas, tum hypotheticas a posteriori eruendas præferibuntur in superioribus (§. 669. & seqq.); evidens utique est, quod alterum a posteriori convincere queat veritatis, qui in dato casu eundem adducere valet, ut ipsemet ea experiatur, quibus notiones, definitiones ac propositiones datæ continentur, & applicatis regulis heuristicis eidem monstrare potest, quod in iisdem contineantur.

Vulgus in facilibus satisfacit huic officio, feliciter utens viribus, quas Logica naturalis suppeditat, perverso operationum mentis usu, eruditus perquam familiari, minime corruptis. Nullum adeo dubium.

bium est, quin etiam in difficilioribus a cognitione vulgi remotis iisdem viribus dextre utantur, qui Logica artificiali docente atque utente pollent, vires a naturali expectandas ampliante & ad terminos ultiores extendente. Absit adeo ut quis conqueratur, nos difficilia aut prorsus impossibilia reddere, quæ nunc unusquisque in potestate sua esse opinatur atque prævio studio & labore.

## §. 1188.

*Quinam al-  
terum veri-  
tatis hypo-  
theseos philo-  
sophicæ con-  
vincere pos-  
sit.* Si quis ex hypothesi philosophica legitima demonstrandi forma id deducere valet, ex quo vicissim hypothesi sive directe, sive indirecte colligitur, atque idem, quod ex hypothesi deduxerat, experientia consentaneum monstrare potest; is veritatis hypotheseos alterum convincere valet (modo sit is, qui convinci possit, quod per se patet). Etenim si ex hypothesi A sequitur B & vicissim ex B sequitur A; B ex nulla alia hypothesi quam A sequi potest. Quod si ergo B esse experiamur; A quoque esse debet. Quamobrem qui ostendere valet, posita hypothesi A poni B & vicissim posito B poni hypothesin A, atque B poni per experientiam probat; is veritatem hypotheseos A evincit, consequenter alterum ejusdem convincere valet.

E. gr. Si quis gravitatem æris sumit tanquam hypothesin; exinde a priori deducere potest, hemisphæria cuprea datæ diametri evacuata adeo comprimi debere, ut nisi data vi non divellantur. Quamobrem cum Otto de Guericke facto experimento in comitiis imperii Ratisbonensibus, quod describitur in Experimentis novis Magdeburgicis de vacuo spatio lib. 3. c. 23. f. 104., ostenderit, hemisphæria nonnisi vi ista, quæ calculo principiis hydrostaticis de pressione fluidorum nixo determinatur, separari posse; veritatis hypotheseos de pressione æris alios convincit. Istiusmodi experimenta decisiva sunt, per quæ ea ponuntur, quibus positæ hypotheses ponitur. Utrum vero quibusdam positæ hypotheses ponatur, necne, nonnisi demonstratione dirimi potest. Similiter Mathematici ex motu vertiginis Telluris colligunt diminutionem gravitatis prope æquatorem & eam diminutionem observationi conformem probant. Qui adeo demonstrare valet, posita quantitate diminutionis determinata poni motum vertiginis Telluris & eandem quantitatem experi-

perimento pendulorum, quibus in observando utuntur, determinari; is motum vertiginis Telluris demonstrare valet. Maximi momenti est præsens theorema in dirimendis controversiis physicis, utrum aliqua hypothesis sit demonstrata, an tantum in probabilium numero habeatur. Ad exempla attendenti manifestum erit, sæpissime cognitionem mathematicam cum philosophica conjungendam esse, ut ad certitudinem perveniri detur. Deproperantur judicia in hoc genere subinde vel ab iis, qui acumine præstant & meritis in scientiam eminent: unde apparet Logicæ artificialis utilitas, immo indispensable necessitas.

§. 1189.

*Si quis methodo demonstrandi ac observandi & experimentandi pollet; is alterum probabilitatis hypotheseos convincere valet.* Etenim si methodo demonstrandi pollet, ex hypothesi data legitimorum ratiociniorum nexu continuo inde colligere valet, quæ necessario consequuntur (§. 551. & seqq.). Quamobrem si idem methodo observandi & experimentandi pollet; ea, quæ necessario ex data hypothesi consequuntur, experientiae conformia seu cum phaenomenis eadem esse ostendere, consequenter alterum probabilitatis hypotheseos certum reddere (§. 608.), adeoque eundem ejusdem convincere valet (§. 982.).

*Quinam alterum probabilitatis hypotheseos convincere valeat.*

Ita in astronomia tyronem convincimus probabilitatis systematis Copernicani, dum ex eodem a priori colligimus phaenomena motus proprii planetarum primariorum & ex collatione cum observationibus palam facimus identitatem demonstratorum cum observatis. Atque eodem modo in physica procedimus. Hic quoque usui esse cognitionem mathematicam, supra jam (§. 1163.) adstruximus. Constans adeo esse debet in Physica quemadmodum rationis & experientiae; ita quoque cognitionis philosophicae ac mathematicae & historicae connubium.

§. 1190.

*Qui regulas fidei & experientiarum familiares experitur Qui auctoritatem habet principiis moralibus probe imbutum; is auctoritatem historici & observatoris adstruere valet.* Qui enim regulas

(Wolffii Logica)

Nnnnn

gulas

*observatoris  
adfervere  
valuit.*

gulas fidei, & experientiarum familiares experitur, ut eidem succurrant in dato casu, quo earum meminisse debet, ac præterea principiis moralibus probe imbutus est, ut non minus eadem in promptu habeat, quoties opus fuerit; is in dato casu demonstrare aut saltem datis minime sufficientibus adstruere valet, historicum & observatorem nec falli potuisse, nec fallere voluisse (§. 613. & seqq.), consequenter historici & observatoris auctoritatem adstruere valet.

Utitur auctoritate alterius ad convincendum alterum veritatis facti seu observationis, quoties in potestate nostra positum non est efficere ac alter ipsemet observet ea, ad quæ tanquam experientia clara provocamus (§. 288.). Ceterum me tacente intelligit, qui antecedentem est guarus, quomodo applicatio ista fieri debeat. Nimirum hypotheses theorematum nostrorum monstrant, ad quæ respiciendum sit in casu dato, ut judicia formentur intuitiva; principia moralia & regulæ experientiarum suppediunt propositiones majores in syllogismo primis; regulæ autem fidei earum vicem subeunt in prosyllogismo.

#### §. 1191.

*Qui habitu demonstrandi pollet ac principiis imbutus & in propositionibus explicandis atque demonstrationibus resolvendis probe fuerit exercitatus; is veritatis propositionis alterum convincere valet.* Qui enim habitu demonstrandi pollet ac principiis imbutus; is propositionem alteri demonstrare valet (§. 551. & seqq.). Quodsi ergo in demonstrationibus resolvendis probe fuerit veritatus, demonstrationem datam usque ad principia ab altero concessa continuare valet (§. §. cit.). Quamobrem cum etiam propositionem explicare possit, quando quidem opus fuerit *per hypotheses*; alterum utique veritatis propositionis convincere valet (§. 991. 997.).

Geometræ habitu demonstrandi polleant, propositiones ex definitionibus explicare & demonstrationes usque ad prima principia, definitiones atque axiomata, reducere norunt. Atque ideo alios veritatis propositionum suarum convincere valent, ita ut alter assensum præbere teneatur vel invitus.

#### §. 1192.

§. 1192.

Quoniam tamen assensus non in instanti, sed successive <sup>Ignorans</sup> gignitur (§. 993.), donec principia, quæ magno sæpe numero <sup>principia</sup> præsupponuntur (§. 992.), certa & familiaria evaserint (§. 570.); <sup>quando con-</sup> qui prima in quodam genere <sup>principia ignorat, cum veritatis ali-</sup> <sup>vinci ne-</sup> cuius propositionis ab iis procul præsertim distantis frustra con- <sup>queat.</sup> vincere conaris, nisi a primis principiis incipere & ea sibi successive familiaria reddere indeque ad sequentia progredi volueris.

Ostendimus jam modum detegendi principia, quæ convincendo tanquam nota atque familiaria supponenda, siquidem convictioni locus esse debeat (§. 992.). Unde in dato quolibet casu enumerari possunt, quæ successive perpendenda sint, ut tandem assensus propositioni præbendus extorqueatur. Absolum adeo est postulare ab altero, ut nos veritatis alicujus propositionis convincat, ubi assensus sæpius plurium annorum improbo labore demum obinetur. Exemplo esto, si quis principiorum mathematicorum ignarus, vel primaria *Euclidis* elementa edoctus veritatis eorum convinci desiderat, quæ *Newtonus* de densitatibus & ponderibus planetarum invenit. Repetenda hic sunt, quæ supra (§. 992. 993.) eam in rem diximus. Et eadem quoque de claritate notionum successive genita tenenda.

§. 1193.

Quoniam porro vi demonstrationis veritatis alicujus <sup>Ignorans</sup> propositionis convinci nequit, qui in demonstrando <sup>formam de-</sup> nondum <sup>monstratio-</sup> versatus, ut demonstrationem in dato casu agnoscere valeat, <sup>nis cur con-</sup> frustra quoque in convincendo altero a priori laboras, ubi is nul- <sup>vinci neque-</sup> lam unquam demonstrationem concepit, omni adeo <sup>at.</sup> notione ejus destitutus.

Atque ea ratio est, cur a studio Matheſeos alienos, cum nullam demonstrationis ideam penes se habeant, veritatis convincere non detur, etsi iis manifestæ, quibus & principia perspecta sunt, & forma demonstrationis animo inhæret. Unde intelligitur ratio, cur Græci olim philosophi ad studium philosophiæ ineptos judicaverint Mathematicum imperitos. Confer, quæ supra (not. §. 996.) ea de re annotavimus.

## §. 1194.

*Quæ de probabilitate hic tenenda.*

Cum demonstratio & probatio probabilis nonnisi principiis, neutiquam vero forma differant (§. 588.); *quæ de demonstratione (§. 1191. & seqq.) stabilivimus, ea quoque tenenda sunt, ubi vi probationis probabilis probabilitatis alterum convincere volueris.*

Plura olim, quæ hic circa principia præsertim variosque probandi modos singularia occurrunt, Logica probabilium suppeditebit. Ad confirmandum ea, quæ affirmamus, valent theoremata de aliis convincendis (§. 994. & seqq.).

## §. 1195.

*Præcipitantiam in judicando quinam evitare nequeat.*

*Qui habitu demonstrandi minime pollet, nec notiones universales & judicia determinata a posteriori eruere valet; is præcipitantiam in judicando evitare nequit.* Etenim qui demonstrandi habitu minime pollet, nec notiones atque judicia determinata a posteriori eruere valet; is convictionis nullam habet ideam aut, si qua vel maxime incompleta ejus animo inhaeret, eam in dato casu applicare non novit, consequenter sibi persuadere potest, se esse convictum, cum tamen convictus minime sit. Præcipitantiam adeo in judicando evitare nequit (§. 1009.).

Experientia quotidiana propositio præsens confirmatur: nihil enim inter eruditos præcipitantia in judicando frequentius, quibus methodus accurata perfecta non est.

## §. 1196.

*Quinam præjudicia evitare nequeat.*

*Quoniam nec præjudicia evitare valet, qui præcipitantiam in judicando evitare nequit (§. 1011.); qui nec habitu demonstrandi pollet, nec notiones universales & judicia determinata a posteriori eruere valet, præjudicia evitare nequit.*

Non adeo mirum, quod tot inter eruditos vigeant hodiernum præjudicia vel maxime in iis, quæ extra omnem controversiæ aleam penes intelligentes posita sunt.

## §. 1197.

§. 1197.

*Qui habitu demonstrandi non pollet, vel principiis in dato genere minime imbutus est, vel utroque defectu laborat; is propositionem erroneam a priori neque directe, neque indirecta refutare potest.* Qui enim habitu demonstrandi non pollet, is nec propositionem veram falsæ oppositam demonstrare, neque etiam modum, quo alter in errorem incidit, vel quod principia falsa assumerit, vel quod in formam syllogismorum impegerit, utpote quæ per demonstrationum analysin logicam (not. §. 551. & seqq.) denum patent, monstrare valet; alterum adeo directe a priori refutare nequit (§. 1036.). Similiter qui demonstrandi habitu minime pollet, nec ex propositione falsa tanquam vera assumpta syllogismorum concatenatione propositionem aliam, quam refutandus ipsemet falsam agnoscit, inferre potest (§. 553.), consequenter alterum per indirectum refutare nequit (§. 1039.).

Quinam alterum a priori refutare nequeat.

Quoniam demonstratio nec directa (§. 551. 552.), nec indirecta (§. 553. 559.) absque principiis in dato genere condī potest; eodem, quo ante, modo patet, quod alterum refutare nequeat, qui principiis in dato genere non est instructus.

Cum itaque alterum a priori refutare non possit, qui habitu demonstrandi minime pollet, *vi num. 1.* nec qui principiis in dato genere minime imbutus, *vi num. 2.* multo minus is alterum a priori refutare poterit, qui utroque defectu laborat.

Ita circuli quadraturam erroneam a priori refutare nequit, qui principia geometrica & arithmetica ignorat, vel ipsemet proprio Marte demonstrationes condere non novit. Multo minus autem eam refutabit a priori, qui neque principia geometrica novit, neque formam demonstrationis animo comprehensam habet, multo minus in demonstrando versatus. Donum demonstrandi cum adeo rarum sit, nec propositiones ac notiones determinatæ extra Mathematicam frequentiores deprehendantur; nemo mirabitur, quod

Nnnnn 3

refut-

refutator rara in orbe literato avis sit, utut impugnatoribus idem abundet.

## §. 1198.

*Quinam alterius sententiam consequentiis onerare valeat.*

Quoniam methodi demonstrandi & principiorum in dato genere ignarus affirmare potest, ex alterius sententia propositiones falsas sequi, utut eas inde fluere demonstrare nequeat; ideo *idiotæ quilibet sententiam alterius consequentiis onerare valet.*

Ita idiota quilibet systema harmoniæ præstabilitæ *Leibnitianum* odiosis consequentiis onerare potest affirmando, sed non demonstrando, ex eo sequi, hominem non esse liberum, & idiotam in hoc casu se probat, qui ad demonstrandum provocatus demonstrare nequit, falsam, quam urget, consequentiam inde fluere, præsertim cum provocatus denuo nude affirmet.

## §. 1199.

*Impotentia ad propositio- nem refutan- dam & impug- nandam.*

*Qui propositionem datam explicare nequit, is eam nec refutare, nec impugnare valet, etiamsi falsa fuerit.* Etenim propositio explicanda est, antequam refutari, vel impugnari possit (§. 1027.). Qui ergo eam explicare nequit, nec eandem refutare vel impugnare valet.

Qui adeo adversus alterius sententiam insurgunt, cum eam nondum intelligant (quo nostris moribus nihil frequentius); ii a refutando altero tam procul absunt, ut ne eam quidem impugnasse, sed impugnationem vano molimine tentasse dicendi sint (§. 1017. 1018.)

## §. 1200.

*Quinam ab impugnatio- ne indirecta perversa ab- horreat.*

*Si quis intelligens, sapiens ac virtute præditus fuerit, vel ob male facta pudore suffunditur; is nec consequentias precario sumere, nec ad eas colorandas verba alterius pervertere, nec consequentias consequentiarum cumulare potest.* Etenim qui intelligens, hoc est, methodi demonstrandi ac principiorum in dato genere gnarus fuerit, is sibi persuadere nequit, propositionem, cujus ipsemet ex hypothese alterius rationem reddere, vel quam cum propositione aliqua conciliare nequit, ex illa fluere:



fluere: cum non admittat, propositionem aliquam ex data hypothefi seu propositione alia fluere, nisi quam legitima rationum concatenatione inde inferre valet (§. 551. & feqq.), non assumtis principiis nisi evidenter veris (§. 562.). Fieri adeo nequit, ut infcius consequentiam aliquam precario sumat.

Si quis virtute præditus fuerit, vel ob male facta pudore suffunditur; is nec sciens consequentiam aliquam precario sumere, multo minus sensum verborum alterius iniqua interpretatione pervertere valet, ut aliqua veri specie eandem sumere imperitis videatur.

Similiter si quis intelligens fuerit, is novit, propositionem falsam jam esse refutatam, si juxta formam demonstrationis indirectæ unica colligitur propositio falsa; superfluum adeo esse, ut ex ea ulterius inferat alias (§. 1041.). Fieri adeo nequit, ut ob ignorantiam consequentias consequentiarum cumulet. Quodsi idem fuerit sapiens, a superfluis abhorret, quod suo loco alibi demonstrandum facile conceditur, consequenter nec volens easdem cumulat. Et quoniam idem virtute præditus est, vel ob male facta pudore suffunditur, nec pravo in alios affectu eo adduci sese patitur, ut sciens ac volens animo nōcendi easdem cumulet (§. 1042.).

Quamobrem si quis & intelligens, & sapiens, & virtute præditus fuerit, vel ob male facta pudore suffunditur; is nec infcius, nec sciens ac volens consequentias precario sumit, multo minus ad eas colorandas verba alterius pervertit & consequentias consequentiarum cumulat.

Loquimur hic de impossibilitate morali, non physica, quemadmodum in sacris impossibile dicitur, ut Deus mentiarur, & vulgo impossibile affirmatur, ut vir honestus idem sit maliciosus.

§. 1201.

*Si quis fuerit idiota & maliciosus, is consequentiarum Quinam con-  
agere potest. Quodsi idem nullo pudore suffundatur, iniqua sequentiari-  
inter- um agere  
possit.*

*interpretatione consequentiam precariam colorare valet.* Si quis fuerit idiota, hoc est, methodi demonstrandi & principiorum in dato genere ignarus; is ex data hypothese eorum rationem inde reddere nequit, quorum gratia conditur, nec quamquam propositiones se mutuo ponant, vel tollant, dijudicare valet (§. 551. & seqq.). Neque idem novit, cumulatæ consequentiæ consequentiarum propositionem non magis fieri falsam, consequenter non magis refutari, quam si nonnisi unica inde colligatur (§. 1041.). Facile adeo sibi persuadet, se censuram aliorum minime incurrere, dum tanquam consequentiam primam sumit propositionem, quam ex data inferre nequit, & consequentias consequentiarum cumulat. Atque adeo ad utrumque pronus est. Quodsi idem fuerit malitiosus, alteri nocere intendit, atque adeo consequentias ridiculas & periculosas comminisci & nisi primæ statim istiusmodi sunt, eas cumulare non erubescit (§. 1042.). Quodsi denique nullo pudore suffundatur, nec consequentias molestas alteri imputare veretur, immo lubenter imputat, ut scopum suum, qui est nocere alteri, consequatur, & ut id aliqua veri specie fieri queat, verba alterius pervertere nullus dubitat. Quoniam itaque consequentiarum religioni sibi minime ducit primam consequentiam precario sumere, ut alias alteri molestas porro inde deducere valeat, immo ut aliqua veri specie eandem sumere imperitis videatur, verba alterius in sensum perversum detorquere non veretur (§. 1047.), imprimis autem consequentias ridiculas & periculosas, minimum plerorumque opinione tales quærit, & ubi istiusmodi consequentiæ non primæ sese offerunt, consequentias consequentiarum eo usque continuat, donec ad tales pervenerit, nec in iis cumulandis subsistit, quamdiu tales offeruntur, atque molestas istas consequentias alteri imputat (§. 1048.); evidens omnino est, eum, qui idiota fuerit & malitiosus, nec pudore ullo suffunditur, consequentiarum agere posse.

Patet adeo facillimum esse, ut quis consequentiarium agat; diffi-  
cillimum vero, immo moraliter impossibile viro honesto, ut ejus-  
dem personam tueatur.

§. 1202.

Quoniam consequentarius argumento ab invidia ducto *Quinam ar-*  
utitur (§. 1049.), qui consequentiarium agere potest, ille etiam *gumentum*  
argumento ab invidia ducto uti valet. *Idiota igitur & mali-*  
*tiosus, quique nullo pudore suffunditur, argumento ab invidia du-*  
*cto uti valet (§. 1201.).* *ab invidia*  
*ducere valet.*

Quo quis major est idiota & malitia alios vincit, quoque minus  
pudore suffunditur, eo magis aptus est ad consequentiarium agen-  
dum, consequenter ad argumentum ab invidia ducendum. Etenim  
qui methodum demonstrandi prorsus ignorat, ei evidentia videntur,  
quæ nulla consequentia inferuntur. Qui principia omnia prorsus  
ignorat; is rationibus intrinsicis nihil probare valet, sed in omni-  
bus ad extrinsecas confugit, quales argumentum ab invidia ductum  
offert (§. 1050.). Qui mentem alterius ne quidem intelligit, ei  
multæ difficultates enascuntur, ubi nullas perspicit peritus, easque  
tanquam consequentias cum urgeat *vi demonstrationis antecedentis*,  
plurimas consequentias precarias facillimo negotio reperit, quæ sint  
ceterarum fundamentum. Cum vero ignorantiam suam non perspi-  
ciat & vano fastu turgidus alios talpas judicet; pravi in alterum  
licet affectus sibi conscius, qui stimuli loco est, proferre non vere-  
tur, quæ magis ipsi, quam adversario nocent penes intelligentes ac  
æquos rerum arbitros. Quando principia verioris Logicæ, Psycho-  
logiæ ac philosophiæ moralis magis in potestate erunt; ex praxi ar-  
gumenti ab invidia ducti interiorem mentis consequentiariorum sta-  
tum demonstrativa ratione olim venabuntur.

§. 1203.

Similiter cum consequentarius utatur verbis maxime *Quinam in*  
contumeliosis & in alterum injuriis (§. 1057.), consequentia- *impugnando*  
rium vero agere valeat idiota malitiosus & perfrectæ frontis *verbis in al-*  
(§. 1201.); *idiotam malitiosum & perfrectæ frontis non veretur uti*  
*verbis in alterum injuriis, quem impugnat.* *terum inju-*  
*riis uti*  
*queat.*

Rationes morales non addimus, quæ hic & in antecedentibus ur-  
geri poterant, principiiis logicis contenti.

(Wolffii Logica)

00000

1204.

## §. 1204.

*Qui praxin consequentiariorum a refutatione indirecta distinguere possit.*

*Qui demonstrationis indirectæ ideam animo concepit, is refutationem indirectam ab impugnationibus male sanis consequentiariorum & praxi argumenti ab invidia ducti facile distinguit. Qui enim demonstrationis indirectæ ideam animo comprehensam habet, is eam in dato casu agnoscere valet (§. 349.), consequenter & refutationem indirectam ab impugnatione indirecta (§. 1023. 1026.), adeoque multo magis a praxi consequentiariorum (§. 1047. & seqq.) & argumenti ab invidia ducti distinguere valet (§. 1050.).*

Nimirum impugnatio indirecta cum nitatur probatione insufficiente formam demonstrationis apogogicæ servat (§. 1026.), & a refutatione indirecta nonnisi principiis differt, quod nempe tanquam certa sumantur, quæ nondum probata sunt. Cum demonstratione autem apogogica nihil prorsus commune habet praxi consequentiariorum & argumenti ab invidia ducti (§. 1047. & seqq. §. 1050. 553.).

## §. 1205.

*Quinam alterum a posteriori refutaturus nosse debet regulas de formandis, judiciis intuitivis & notionibus a posteriori, inprimis de observandis attributis & essentialibus, nec non iis; quæ per modum attributorum insunt, de definitionibus a posteriori detegendis & limandis, de causis investigandis & judiciis universalibus ex observationibus atque experimentis eruendis (§. 1054.); alterum a posteriori refutaturus non modo observationes atque experimenta in promptu, vel in potestate habere, verum etiam in propositionibus determinatis inde eruendis probe exercitatus esse debet.*

Quoniam alterum a posteriori refutaturus nosse debet regulas de formandis, judiciis intuitivis & notionibus a posteriori, inprimis de observandis attributis & essentialibus, nec non iis; quæ per modum attributorum insunt, de definitionibus a posteriori detegendis & limandis, de causis investigandis & judiciis universalibus ex observationibus atque experimentis eruendis (§. 1054.); alterum a posteriori refutaturus non modo observationes atque experimenta in promptu, vel in potestate habere, verum etiam in propositionibus determinatis inde eruendis probe exercitatus esse debet.

Alias scilicet experientia obstat videbitur, quæ thesin impugnatam non ferit, aut cum ea prorsus conspirat, quemadmodum consequentiarii difficultates, quas comminiscuntur, eidem obstat sumunt, cum tamen nonnisi ob illam parum intellectam obstat videantur.

## §. 1206.

*Quinam propositionibus demonstrativa ratione interpretandis*

*Qui in propositionibus demonstrativa ratione interpretandis*

*zandis fuerit versatus, ac præterea principiis & habitu demon-* *nem defende-*  
*strandi, nec non veritatem propositionis a posteriori stabiliendi in-* *re possit.*  
*struæus; is propositionem impugnata defendere valet.* Etenim  
 qui in propositionibus demonstrativa ratione interpretandis fue-  
 rit versatus, is verborum in alienum sensum detortorum ve-  
 rum sensum demonstrare, aut, ubi is demonstrativa ratione pa-  
 tere nequit, ea ita interpretari novit, ut sensum fundant impu-  
 gnanti probatum, consequenter sententiam suam contra verbo-  
 rum detorsiones, vel falsas aut a mente sua alienas interpreta-  
 tiones defendere valet.

Si quis principiis ac habitu demonstrandi pollet, is pro-  
 positionem impugnata demonstrare, tum etiam ostendere  
 valet, ab impugnante sumi principia precaria, vel falsa, vel in  
 formam syllogismorum impingi, ubi aliquid horum contingit,  
 nec minus si ipse principiorum precariorum vel violatæ formæ  
 demonstrationis reus sistitur, & illa demonstrare, & hanc vin-  
 dicare; immo veritatem, quando opus est, consequentiæ, quæ  
 tanquam absurda venditur, evincere & consequentias preca-  
 rias a veris discernere, nec non consequentiæ molestæ contra-  
 riam ex propositione impugnata deducere (§. 551. & seqq.),  
 consequenter propositionem impugnata a priori, tum quando  
 publice nondum prostat demonstratio (§. 1062.), tum in omni  
 casu impugnationis directæ (§. 1068. 1069.), atque indirectæ  
 (§. 1070. 1071. 1072.) defendere valet.

Si quis denique in veritate propositionum a posteriori sta-  
 bilienda versatus fuerit; is a posteriori, ubi observationes ac ex-  
 perimenta in potestate sunt, confirmare potest, prædicatum  
 convenire subjecto, consequenter propositionem impugnata  
 a posteriori defendere valet (§. 1063.).

E. gr. Contra motum terræ vertiginis ipse *Tycho* urgebat, ædifi-  
 cia eidem superstruæta collapsura vi centrifuga, qua corpora in peri-  
 pheria circuli lata a centro per tangentem recedere conantur. Eum  
 defendentes excipiebant, conatu centrifugo vim gravitatis esse ma-  
 jorem, qua versus centrum retrahuntur. Enimvero nec *Tycho* de-

monstrare poterat, conatum centrifugum esse vi gravitatis majorem; nec qui motum vertiginis defendere conabantur demonstrare valebant, vim gravitatis conatu centrifugo esse majorem. Immo *Tycho*nis ævo demonstratio nondum in potestate erat. Quamobrem nec fieri poterat, ut *Tycho* hoc argumento vertiginem Telluris refutaret, neque e contrario, ut motus vertiginis Telluris defenderetur, sed defensio tantum tentabatur, cum in dubio relinqueretur, utrum conatu centrifugo excutienda sint, quæ Telluri superstruuntur. Quod jam perpenderent, quantæ dotes ingenii ad errorem refutandum & veritatem impugnatam defendendum requirantur, non adeo ad controvertendum forent proni, iis nonnisi dotibus instructi, quæ consequentiarum perficiunt (§. 1201.).

§. 1207.<sup>1</sup>

*Quinam scripta polemica & apologetica condere possit.*

Quoniam scriptum polemicum & apologeticum conditurus observare debet, quæ de refutando & defendendo præcipiuntur (§. 1080.); *qui errores refutare & veritatem impugnatam defendere valet, & in conscribendis libris dogmaticis fuerit exercitatus, is scripta polemica & apologetica condere valet.*

Sicilicet si officio refutatoris & defensoris satisfacere quis potest, materia scripti polemici & apologetici eidem in promptu est. Ut vero inde librum dextre condere possit, iis etiam satisfacere tenetur regulis, quæ in condendis libris dogmaticis observandæ sunt.

## §. 1208.

*Quinam ad opponendum aptus sit.*

*Si quis demonstrationum analysin logicam (not. 551. & seqq.) dare valet; is ad opponendum peraptus est.* Qui enim probationem thesæ contrariæ, quam opponens defendit, vel illationem consequentiæ absurdæ ex thesi, quam impugnat, eo modo logice resolvit, quo demonstrationes resolvuntur; ei modus oppositionis omnis manifestus evadit (§. 1097.). Novit adeo, quinam syllogismi opponendi & quo ordine in medium proferendi sint, ut falsitas propositionis impugnatæ tandem pateat. Ad opponendum adeo peraptus est.

Quodsi opponens hac analysi instructus accedit, a vero tramite  
ad

ad diverticula nunquam receder, neque se a respondente aut prae-  
dicte abduci poterit.

§. 1209.

Si quis formam syllogismorum & principia in dato genere, Quinam in  
ad quod disputatio refertur, tenet, atque in determinatione sub- disputando  
jecti vel ejus, quod ad notionem subjecti aut praedicati refertur, respondentis  
qua stante praedicatum subjecto competit, inquirere novit; is re- vicem tueri  
spondentis officio in disputando fungi potest. Etenim si formam possit.  
syllogismorum & principia tenet; assumpto syllogismo Oppo-  
nentis novit, quidnam negare, quidnam concedere debeat.  
Quodsi praeterea in determinationem subjecti vel ejus, quod  
ad notionem subjecti aut praedicati refertur, prompte inquire-  
re valet; propositionem restringendam vel limitandam, qua  
utitur in syllogismo suo opponens, restringere vel limitare,  
seu distinguere (§. 1109.), & applicata distinctione monere  
potest, quo respectu majorem concedat, minorem neget, &  
vicissim majorem neget, minorem concedat. Respondentis  
adeo munere in disputando fungi potest (§. 1102. 1103. 1104.  
1108. 1112. & seqq.).

§. 1210.

Qui notionibus rerum animum refertum habet easque ver- Quinam do-  
bis dextre cum aliis communicare valet, definitiones ac proposi- centis mune-  
tiones explicare, illustrare & ordinatis atque completis demonstra- re fungi  
tionibus munire easdemque a posteriori confirmare novit, nec non queat.  
methodi alios convincendi ac refutandi gnarus, immo logica arri-  
ficiali cum utente, tum docente pollet; is docentis munere fungi  
potest. Patet per intuitum, si ad ea, quae de methodo do-  
cendi (§. 1119. & seqq.) inculcata fuere, animum advertere  
volueris.

Multa hinc specialia deducere licet, si ad ea respicias, quae de no-  
tionibus sibi comparandis & cum aliis communicandis, de definitio-  
nibus & propositionibus, tum de earum explicatione ac probatione,  
de errorum confutatione, de veritatis impugnatae defensione dicta  
sunt. Sed qui omnem Logicæ theoriam & praxin sibi familiarem

O o o o 3

reddit;

reddit; is vires suas abunde examinare poterit, utrum muneri decentis sufficiant, nec ne.

✠✠✠✠ ✠✠✠✠ ✠✠✠✠ ✠✠✠✠ ✠✠✠✠ ✠✠✠✠ ✠✠✠✠ ✠✠✠✠

## SECTIO VI.

DE

# USU LOGICÆ IN PRAXI VITÆ ET METHODO EAM STUDENDI.

## CAPUT I.

### DE USU LOGICÆ IN PRAXI VITÆ

§. 1211.

*Scopus Auto-  
ris.*

**U***Sum Logicæ in praxi vitæ monstraturi ostendemus, quid Logica artificialis conferat in dirigendis operationibus mentis circa negotia in vita obvia.*

In generalibus subsistimus, nec ad specialia digredimur, negotia in vita obvia ad certa genera reducentes, non solum ea de causa, ne opus hoc logicum in nimiam molem excreseat; sed præcipue ex hoc capite, quod accurata pertractatio alia quam plurima præsupponat, quæ in Logica tradi minime possunt. Ceterum ut lector attentus & in theoria ac praxi Logicæ probe versatus ipsemet specialia deregere possit, aut generalia nostra in dato casu speciali dextre applicare discat; non inconsultum ducimus eadem exemplis specialibus illustrare. Equidem nonnullis omne hoc institutum vanum atque superfluum videbitur, propterea quod experientia comprobatum existimant.



ment, Logicam naturalem hic nobis abunde sufficere, nec artificiali esse opus: ut itaque secus sentiant nec, quæ sibi adeo proficua futura sunt, intempestive negligant, hinc inde damna nonnulla annotabimus, quæ ex neglectu Logicæ artificialis consequuntur. Objectionem minime moramur, quod Logicam artificialem unusquisque pro arbitrio sibi fingat: dedimus enim (§. 26. & seqq.) lapidem Lydium, qui genuinam a spuria certo distinguit. Immo sufficit Logicam a nobis traditam eum habere usum, quem eidem vindicamus. Si quis diversam a nostra condit vel commendat, is quantum ea valeat, ipse dispiciat.

## §. 1212.

*Omnis cognitionis acquisitæ usus in negotiis vitæ ad applicationem definitionum & propositionum redit.* Etenim ex definitione rei colligitur, quodnam ei conveniat nomen (§. 349.), consequenter cum terminis communibus notiones communes (§. 114.), adeoque genera atque species (§. 113. 44. & seqq.), denotentur, ea ad sua genera suasque species reducit. Porro cum in propositionibus universalibus atque determinatis generibus & speciebus sua prædicata attribuantur, quæ iisdem conveniunt (§. 242.); earum ope ulterius colligitur, quid rei obviæ conveniat (§. 348.), consequenter quodnam in dato casu iudicium formari debeat discursivum (§. 51.), sive theoreticum, sive practicum, prout casus tulerit. Omnis adeo cognitionis acquisitæ in negotiis vitæ usus ab applicatione definitionum & propositionum pendet.

*Unde pendeat omnis cognitionis in negotiis vitæ usus.*

E. gr. JCrus ex definitione *Societatis* in dato casu ratiocinando colligit *contractum datum esse societatem*, atque inde beneficio legum porro infert, quid in eodem casu sit justum, quid injustum, & quid fieri debeat. Idem etiam facere tenetur Medicus morbum agnitus & remedia convenientia præscripturnus. Omnis nostra cognitio definitionibus & propositionibus continetur. Propositionibus docemur, quænam rebus obviis tribuenda sint prædicata, ut, quæ iis conveniant, intelligamus, etiamsi eadem intuitive minime cognoscamus. Definitionum autem beneficio res obvias agnoscimus & a se invicem discernimus, ne per errorem iisdem tribuamus prædicata, quæ minime conveniunt. Hinc eas demum ad vitam utiles ostendunt.

ostendimus (§. 122. *Disc. prelim.*) propositiones, in quibus conditio accurate determinatur, sub qua predicatum subiecto tribuitur, consequenter quæ determinatæ sunt (§. 320.), & terminos in philosophia non tolerari iussimus (§. 116. *Disc. prelim.*) nisi accurata definitione explicatas, & in lectione librorum præcepimus, ne propositiones memoriarum mandentur, antequam constet eas esse determinatas (§. 954.) & in scripto dogmatico historico in usum vitæ condemni inunximus, ne eidem inferantur nisi definitiones, quarum realitas jam publice adstructa, & propositiones publice jam demonstratae (§. 847.), quæ ad praxin tendunt (§. 865.).

## §. 1213.

*Dijudicatio  
definitionum, antequam  
eæ applicentur.*

Quoniam applicatio definitionis manca errorem parit, nec nisi fortuito rem agnoscere facit (§. 633.), quæ vero superfluis abundat, applicationem iusto prolixiorē reddit (§. 836.), immo efficere potest, ut res obvia minime agnoscatur, ubi accurate ratiocinari fueris aduersus (§. 349.); *antequam definitiones in dato casu applicare possis, eas nec mancas esse, nec superfluas continere certus esse debes.*

Atque hinc usus doctrinæ logicæ de notionibus ac definitionibus quæ magnam theoriæ partem absolvit, & frequens etiam in praxi comparat, per omnia vitæ negotia sese diffundit. Ceterum exemplum quoque clare loquuntur, quod hic inculcatur. Sane JCus si vitæ definitione manca societatis, pro societate habebit contractum, quæ sub hac specie minime comprehenditur &, ubi contigerit, eum in iudicando a vero non aberrare, quod veritatem assecutus fuerit definitioni, sed casui tribuere debet, cum eadem facilitate in errorem incidere potuisset, si alius contractus societati ex parte similis oblatu fuisset. Quod si quis novit, definitionem esse mancam, nec aliam in promptu habet; is sane probabilem tantummodo esse applicationem ejus agnoscit, neque adeo pro certo habet, sed tanquam probabile sumit, rem obviā ad hoc vel istud genus, aut hanc vel istam speciem pertinere (§. 581.): quo in casu omnia quoque judicia ulteriora ex applicatione propositionum resultantia non nisi probabilia erunt (§. 585. 586.). Plurimum autem refert in negotiis vitæ humanæ ut constet, utrum judicia nostra sint certa, an probabilia tantum, cum inde pendeat æstimatio speciei circa eventum in consiliis prudenter capiendis non negligenda.

## §. 1214.

Quoniam propositiones contrariæ simul falsæ sunt, si de subjecto absolute prædicatur, quod eidem nonnisi sub adjicienda conditione convenit (§. 531.) atque adeo earum applicatione ad casus obvios judicium discursivum erroneum paritur (§. 538.); immo quamdiu non constat, num in propositione hypothetica conditio adjecta, in categorica definitio possibilis sit, propositio nonnisi hypothetice vera est (§. 534.), consequenter nec certum parit in applicatione ad casum obvium judicium discursivum (§. 570.); *propositiones dijudicandæ sunt, num sint determinatæ & in iis notio subjecti possibilis, antequam ad casum obvium applicari possint.*

*Dijudicatio  
propositio-  
num ante-  
quam appli-  
centur.*

Atque hic usui sunt, quæ de propositionibus & syllogismis in theoria Logicæ & aliis huc spectantibus passim in praxi ejusdem traduntur: ut adeo denuo omnis ista Logicæ doctrina usum suum per omnia vitæ negotia diffundat. Ita e. gr. Medicus remedium morbo in dato casu conveniens non determinabit, nisi determinate noverit, quandonam idem conducat.

## §. 1215.

Quoniam definitiones ac propositiones dijudicandæ sunt, num regulis logicis respondeant, antequam ad usum vitæ transferri possint (§. 1213. 1214.); patet *ad praxin vitæ potissimum facere, quæ de definitionibus ac propositionibus determinatis earumque demonstrationibus præcipiuntur.*

*Quanam  
præcepta Lo-  
gica ad pra-  
xin vitæ ser-  
viant.*

Apparet adeo omnem propemodum theoriam logicam, qualem in compendium missam dedimus in Logica minore, huc facere.

## §. 1216.

*Si libri dogmatici historici prostant, in quibus non traduntur definitiones nisi accuratæ, nec propositiones nisi determinatæ; usu Logicæ in dijudicandis definitionibus, num mancæ sint, an superflua contineant, atque propositionibus, num sint determinatæ & in iis notio subjecti possibilis, carere potest eas ad casus obvios applicaturus.* Etenim eo in casu autor libri dogmatici cum definitiones, tum propositiones dijudicavit, atque adeo non opus est, ut lector easdem denuo dijudicet, qui viribus huc requisitis minime instructus supponitur, cum eas applicare pos-

*Dijudicatio-  
ne definitio-  
num & pro-  
positionum  
quando non  
sit opus.*

(Wolffii Logica)

P p p p p

sit,

fit, etiam si easdem dijudicare nequeat, modo sibi easdem familiares reddiderit (§. 348. 349.).

E. gr. Qui vitris poliendis & instrumentis inde conficiendis operam navant, Opticorum theoremata, quorum nonnisi historiam cognitionem habent, demonstrationes autem dare nequeunt, nec ab aliis datas intelligunt, dextre applicant in casu dato, propterea quod applicatione nullus prognasci possit error, cum certa sint, utpote demonstrationibus a Mathematicis munita, etsi ipsimet illius certitudinis non sint participes, assensu suo in auctoritatem illorum resolute. Non tamen hinc consequitur, exspirare in eo casu usum logicum, quem in anterioribus (§. 1213. 1214.) inculcavimus, cum autor libri dogmatici historici & qui eidem fidem habent unam tueantur personam.

§. 1217.

*Quandonam  
quis eadem  
opus habeat.*

*Si in libris dogmaticis historicis definitiones occurrant minus accurate & propositiones vagæ; eas absque periculo errandi ad praxin transferre nequit, nisi qui ipsemet easdem dijudicare valet.* Etenim & definitiones, num sint mancæ, an superflua contineant (§. 1213.), & propositiones, num sint determinatæ, & notio subjecti earundem possibilis, dijudicari debent, antequam ad casus obvios applicentur (§. 1214.). Quamobrem quia autor libri dogmatici historici definitiones ac propositiones minime dijudicavit, antequam easdem libro suo insereret *per hypothesein*; lector easdem dijudicare debet, antequam eas ad praxin transferat. Etenim si contingat, definitionem esse minus accuratam, propositionem vagam; periculo errandi sese exponit, dum eas ad casus obvios applicat, quemadmodum jam ante (§. §. cit.) ostendimus.

Cum hodiernum libri scientifici extra Mathesein tantum non prorsus exulent, in libris vero dogmaticis historicis & definitiones accurate plerumque desint, & propositiones non satis determinantur, in utramque ideo contradictionis partem disputabiles; Logica artificialis iis apprimè necessaria est, qui ex illis in usum vitæ proficere volunt, nisi dubiæ fortunæ fluctibus in casibus obviis sese præter necessitatem exponere malint.

§. 1218.

*Definitionis*

*Definitionem in dato casu applicaturus* i. eam in tot propositionibus

positiones resolvat, quot notæ eandem ingrediuntur, quem- *in dato casu*  
admodum in lectione librorum præcepimus (§. 947.): 2. ad *applicatio.*  
rem præsentem attendens tot judicia formet intuitiva, quot præ-  
dicata distinguere valet (§. 669.): 3. hæc prædicata cum notis  
istis seu prædicatis propositionum, in quas definitio resoluta  
fuit, conferat: Quodsi inter ista hæc singula minime occur-  
rant, ex illis (§. 551. & seqq.) colligat alia. Etenim si vel in-  
tuitive, vel ratiocinando, vel partim intuitive, partim ratioci-  
nando innotescit, notas, quæ definitionem ingrediuntur, in re  
obvia contineri; definitum quoque iisdem competere recte  
concluditur (§. 349.).

Nimirum omnis definitionis applicatio continetur hoc syllogismo  
generali: *Cui conveniunt notæ in definitione ipsius B enumerata simul,*  
*eidem quoque convenit definitum. Sed enti A conveniunt omnes notæ in*  
*definitione ipsius B enumeratae. Ergo ipsi etiam convenit nomen B* (quod  
est in hoc casu definitum), seu, quod perinde est, *ergo A est B*. Major con-  
tinetur sub dicto de omni & nullo ad definitiones extenso (§. 349.).  
Minor probatur, vel per judicia intuitiva solâ, vel per intuitiva & di-  
scursiva ex iisdem derivata. E. gr. In casu dato probaturus figuram  
obviam esse quadratum ita argumentaris: *Omni figura & quadrila-*  
*tera, & aquilatera, & rectangula est quadratum. Atqui hæc figura est*  
*& quadrilatera, & aquilatera, & rectangula. Ergo hæc figura est qua-*  
*dratum.* Minor continet judicia de figura præsentem formata sive in-  
tuitiva, sive ex intuitivis deducta, veluti si tria latera eidem mensuræ  
congruere & bina tertio ad angulos rectos jungi intuitive cognoscis  
atque inde ratiociniorum legitima concatenatione (§. 552.) colligis,  
quartum esse iisdem quoque æquale, consequenter figuram æquila-  
teram. Idem eodem modo obtinet in definitionis *temperantiæ* ap-  
plicatione, quod *fit habitus determinandi appetitum circa cibum & po-*  
*tum legi naturali convenienter.* Etenim applicatio hoc continetur syl-  
logismo: *Quicumque gaudet habitu determinandi appetitum circa cibum*  
*& potum legi naturali convenienter, ille est temperans. Sed Titius gau-*  
*det habitu determinandi appetitum legi naturæ convenienter. Ergo Ti-*  
*tius est temperans.* Minor probari debet ex iis, quæ de Titio in ca-  
piendo cibo ac potu observas, adscitis in subsidium principiis mo-  
ralibus sive juris naturalis de determinatione appetitus circa cibum  
atque potum juri naturali congrua, sed observatis iis, quæ de notis

definitionem ingredientibus præcipiuntur, scilicet ne admittantur, quæ per se minus determinantur (§. 836.). Unde denuo patet in applicatione definitionum ad casus obvios eadem sæpius concurren-  
tibus syllogismorum opus esse, quæ in demonstrando (§. 551. & seqq.) videtur.

## §. 1219.

Ne in iudiciis intuitivis formandis nimius sis, *summa quæ nota, quæ definitionem ingreditur, dispiciendum est, num ea nota continetur, ubi suspicio adsuerit, eam locum habitum, vel queritur, num ea applicari possit.*

E. gr. Si queritur, num *Mevius* sit temperans, cum jus naturæ arguat quantitatem ac qualitatem cibi per sanitatem tanquam rationem finalem determinandam esse; inquirendum erit, num ea cibi quantitate ac qualitate utatur, quæ sanitati conducit, & num sanitatem in capiendo cibo atque potu constanter tanquam finem intendat. Quodsi cognoscas intuitive & data occasione, *Mevium* a nimia sibi quantitate abstinere; cum id inter requisita ad temperantiam locum habeat, probabiliter colligitur, *Mevium* forsan esse temperantem. Ne igitur per ambages incedas certo cogniturus, utrum temperans sit nec ne, inquirendum erit num cetera ad temperantiam requisita, hoc est, notæ definitionem ingredientibus omnes in eodem deprehendantur (§. 580.). Hac ratione evitantur ambages in applicandis definitionibus, dum a iudiciis intuitivis formandis abstinemus, quorum in determinandis notis nullus est usus.

## §. 1220.

*Quinam definitiones datas in omni casu applicare queat.*

Cum notæ definitionem ingredientibus in dato casu singulari non semper intuitive cognoscantur, sed sæpissime ex iudiciis intuitivis colligi debeant eadem syllogismorum concatenatione, quæ in demonstrando utimur (§. 1218.); *in applicandis definitionibus & demonstrandi habitu, & principiis certis sæpissime opus est.*

Non adeo sufficit condere definitiones probatas in usum vitæ; sed eas dextre applicaturus & demonstrandi habitum sibi comparare, & principiis aliis animum imbuere tenetur: quod cum vulgo negligatur, iudicia discursiva in rebus ad sua genera suasque species reducendis deperari æquis mirabitur?

## §. 1221.

## §. 1221.

*Omnes propositiones, quæ converti possunt, definitionum loco serviunt in dato casu.* Etenim si propositio converti potest, loca subiecti & prædicati permutare licet (§. 282.), nempe si omne A est B, etiam omne B est A. Ex eo igitur, quod quid B sit, inferre datur quod etiam sit A, consequenter prædicatum propositionis convertibilis notæ vicem subit, unde in dato casu subiectum agnoscitur atque ab aliis rebus distinguitur. Illa igitur propositio definitionis locum tuetur (§. 153.).

*Quenam definitionum loco servant propositiones.*

E. gr. In elementis Geometriæ propositio de æqualitate angulorum alternorum intra parallelas converti potest: utuntur adeo Geometriæ istorum angulorum æqualitate loco definitionis in lineis parallelis agnoscendis. Et quando in Medicina & philosophia morali de signis loquimur, siquidem certa, non tantum probabilia esse debeant, per ea non intelliguntur nisi prædicata propositionum convertibilium, ut adeo absolum videri nequeat, quod cum definitiones rebus agnoscendis & a se invicem distinguendis inserviant (§. 197.), Medici ac Moralistæ insuper veluti habitis definitionibus utantur signis. Si certa fuerint signa, per ea rem inde agnoscendam definire licet: id quod ex nostra de propositionum conversione (§. 283. & seqq.) & diverso definiendi modo doctrina a priori patet (§. 172. & seqq.).

## §. 1222.

Quoniam propositio, in qua de subiecto prædicantur vel attributum proprium (§. 283.), vel omnia essentialia simul sumpta (§. 284.), vel modi cuiusdam aut relationis possibilitas, quæ per modum attributi proprii inest (§. 285.), vel quod sub data conditione nonnisi de eodem prædicari potest (§. 286.), in propositionibus convertendis nultum studii ponendum, ne conversa prætermittatur, quam in casibus obviis definitionis locum tueri posse prævidemus, vel saltem suspicamur.

*Studium in convertendis propositionibus ponendum.*

Principia logica non sufficiunt, ut in omni casu demonstretur, num aliqua propositio converti possit, etsi nos tradiderimus, quæ utiliter hic adhibentur. Cum enim ostenderimus, quomodo observentur ea, quæ per modum attributorum insunt (§. 673.) tum etiam attributa & essentialia (§. 677.), nec non quomodo essentialia & attributa

tum propria, tum communia simul sumenda, ut proprio æquivalent, determinentur (§. 732. 733.) atque præterea docuerimus, quale esse debeat prædicatum, ut propositio converti possit (283. & seqq.); ex principiis logicis sapissime decidere licet, num propositio data sit convertibilis. Quoniam vero non modo sapius ex principiis Logicæ convertibilitas propositionis demonstrari nequit, verum etiam prolixior evadit demonstratio, quam quæ ex principiis domesticis contextitur; ideo tentanda est propositionum conversarum demonstratio ex principiis domesticis, exemplo Mathematicorum, qui ex iisdem conversas demonstrare solent. Ne tamen numerus conversarum præter necessitatem augeatur, eorundem exemplo non omnis conversa promiscue recipienda, sed ea tantummodo, quæ usui esse potest. Ita *Euclides* non demonstrat conversam theorematis de quantitate angulorum trianguli simul sumtorum, scilicet quod figura sit triangulum, cujus anguli simul sumti sunt ad rectum in ratione dupla, propterea quod ex hoc attributo nunquam triangulum agnoscitur, neque adeo converso theoremate definitionis loco utimur. Hæc cura propositionum convertendarum iis inprimis incumbit, qui scripta dogmatica in usum vitæ condunt, vel ex libris dogmaticis historicis, in quibus definitiones minus accuratæ & propositiones vagæ ponuntur, proficere student. Inprimis ea commendari meretur, quamdiu bonæ definitiones raræ sunt, ut propositionum conversarum ope defectui huic medeamur, cum datis istiusmodi propositionibus conversis & definitiones condi possint, si ita visum fuerit, & definitionibus in praxi carere possimus.

## §. 1223.

*Propositio-  
num catego-  
ricarum in  
dato casu ap-  
plicatio.*

*Propositionem categoricam applicaturus* 1. vel ope notionis claræ, utut confusæ (§. 80. 88.), vel vi definitionis (§. 1218.), vel denique vi propositionis, quæ definitionis locum tuetur (§. 1221.), rem obviam ad suum genus, vel speciem suam reducat: 2. eidem tribuat prædicatum, quod generi vel speciei isti convenire alias cognovit (§. 348.).

Nititur scilicet applicatio propositionis categoricæ hoc syllogismo generali: *Quicquid continetur sub genere vel specie A, ei competit prædicatum B.* Atqui *res obvia continetur sub genere vel specie A.* Ergo *ei competit prædicatum B.* Minor innotescit in casu dato vel notionis confusæ, vel definitionis, aut propositionis æquivalentis applicatio-



catione: major est principium nobis familiare. Communiter homines res obvias notionum confusarum ope distinguunt & principia, quibus majoris loco utuntur, sunt propositiones, quæ iteratis iudiciis intuitivis animo sese ingenerarunt. E. gr. *Ignem agnoscimus ope notionis confusæ. Quod ignis calefaciat experientia edocti sumus: unde de igne in præsentem casu inferimus, quod calefacere debeat. Revera igitur ita ratiocinamur, dum ope cognitionis antea acquisitæ & intuitive præsentis iudicium discursivum formamus, quod hic ignis, quem e longinquo spectamus, calefaciat: Ignis calefacit. Hoc ens est ignis. Ergo hoc ens calefacit.* Ope definitionis JCtus agnoscit contractum datum esse societatem. Quamobrem cum lex permittat, ut *societas renunciatione unius, invito altero, solvatur*, de dato quoque contractu iudicat, quod *unius renunciatione, altero invito, solvi queat.* Revera autem ita argumentatur: *Omnis societas renunciatione unius, invito altero, solvi potest. Sed hic contractus est societas.* Ergo *hic contractus, invito altero, unius renunciatione solvi potest.* Minor reperitur applicata definitione societatis ad casum datum. Major est lex, quam sibi familiaris reddidit JCtus. Ceterum hinc patet necessitas definitionum in jure, cum absque iis applicatio legum incerta sit, ubi notionibus confusis fidere non licet.

## §. 1224.

*Propositionem hypotheticam sive expressam, sive ad formam categoricæ reductam applicaturus* 1. res obvia ut ante ad suum genus vel speciem suam reducatur: 2. formentur iudicia intuitiva (§. 669.), ut appareat, num in prædicatorum numero occurrat determinatio subjecti, quæ in propositione hypothetica conditionem præbet, vi cuius prædicatum subjecto tribuendum; vel ex iudiciis intuitivis colligantur (§. 551. & seqq.) alia discursiva in eundem finem, ubi intuitiva nondum exhibent determinationem subjecti: 3. quæ generi, vel speciei sub data determinatione conveniunt, prædicata rei obviæ tribuantur (§. 348.). Ita propositio hypothetica ad præsentem casum erit applicata.

*Propositionis hypotheticæ applicatio.*

Nititur scilicet applicatio propositionis hypotheticæ sive expressæ, sive ad formam categoricæ reductæ hoc syllogismo: *Quicquid continetur sub genere, vel specie A & admittit determinationem C, ei competit prædi-*

*prædicatum B. Sed res obvia continetur sub genere, vel specie A & ad-*  
*mittit determinationem C. Ergo rei obvia competit prædicatum B.*  
 Minor innotescit in dato casu quoad partem primam ut in problema-  
 te præcedente (§. 1223.), quoad alteram vero vel per judicium intuiti-  
 tivum, vel per discursivum inde collectam, vel partim per illam, partim  
 per hæc. Major vero est propositio nobis familiaris. E. gr. *Ignem*  
*agnoscimus ope notionis confusæ: flammam ejus ferire trabem in ca-*  
*su dato ope judicii intuitivi nobis innotescit.* Recordati igitur *lignum*  
*ab igne accendi, si ejus flamma ipsum ferit*, applicantes hanc pro-  
 positionem in casu dato judicamus, *trabem accensum iri.* Revera  
 igitur ita ratiocinamur: *Si flamma ignis trabem ferit, eam accendere*  
*potest.* Atqui *flamma ignis hic trabem ferit.* Ergo *eam accendere*  
*potest.* Similiter JCtus ope definitionis societatis agnoscit contra-  
 ctum datum esse societatem, & intuitive ipsi innotescit, *contraben-*  
*tes in certis partibus lucri distribuendi convenisse respectu opera in-*  
*equalis.* Quoniam itaque lex præcipit, ut, *si partes societati fuerint*  
*adjectæ, quod unus ei plus opera contulerit, id valeat*; vi ejusdem  
 pronunciat, *in casu dato lucrum in eas partes esse distribuendum, in*  
*quas consensere contrabentes.* Applicatio igitur legis in præsentem ca-  
 su hoc nititur syllogismo: *Si partes societati fuerint adjectæ, quod unus*  
*ei plus opera contulerit, lucrum in eas distribuendum.* Sed *data so-*  
*cietati partes sunt adjectæ, quod unus ei plus opera contulit.* Ergo  
*lucrum in eas dividendum.* Minor reperitur applicata definitione  
 societatis ad casum datum & formati de eo judicii intuitivi. Ma-  
 jor est lex JCto familiaris.

## §. 1225.

*Terminorum  
 fixorum ne-  
 cessitas ad  
 applicandas  
 definitiones  
 & propositiones.*

Quoniam res nobis obvias ratiocinando ad sua genera  
 suasque species reducere & propositiones generales cum cate-  
 goricas, tum hypotheticas dextre applicare, nec non ratioci-  
 nando colligere licet, num rei cuidam obvia conditio ista ad-  
 fit, sub qua prædicatum in hypothetica subjecto tribuitur, si  
 genera & species terminis accurate definitis distinguuntur &  
 conditio in propositionibus hypotheticis terminis fixis expri-  
 mitur (§. 499. & seqq.); *terminis fixis studere & a vagis absti-*  
*nere debet, cognitionem rerum, quam sibi acquirit, ad casus in*  
*vita obvios applicaturus.*

Quoniam vulgo in philosophicis notionibus vagis atque confusis  
 sunt

sunt contenti, ideo non mirum, quod, quæ in philosophia doceri solent, ad praxin vitæ hætenus parum conducere deprehensa fuerint.

## §. 1226.

*Si quis propria experientia proficere studet in iis, quæ in negotiis vitæ humanæ usui esse possunt; is 1. eorum, quæ fiunt, notationes sibi distinctas formare tenetur (§. 682.), ut norit, quid casu eodem recurrente sit agendum: 2. judicia formare debet determinata, ut eadem in casu simili applicare ipsosque casus similes dijudicare valeat (§. 1223. 1224.).*

*Propria experientia quomodo comparatur notitia rerum ad praxin vitæ utilium.*

Ipsa facto experietur, qui distincta Logicæ ad experientiam domesticam applicatione notitiam rerum ad negotia vitæ humanæ obvianda utilem sibi comparat, quodnam discrimen intercedat inter cognitionem distinctam hac ratione acquisitam & confusam absque Logicæ artificialis subsidio obtentam, nec non quam fallax sit huius, quam certa atque facilis illius ad casus in posterum nobis obvenientes applicatio. Neglectui Logicæ artificialis debetur, quod imitati alios vel semetipsos in casu dissimili fine intento excidant. Sed plura ea de re dicendi locus alibi recurrit.

## CAPUT II.

## DE METHODO LOGICAM DISCENDI.

## §. 1227.

**A**d studium Logicæ animum appulsurus, præcipuorum terminorum ac propositionum historicam notitiam sibi comparare debet. Etenim terminos præcipuos qui sibi familiares reddidit, is propositiones logicas, tum etiam earum probationes ex iis contextas (§. 551. & seqq.), intelligere valet (§. 1177.) atque adeo nullum ex obscuritate tardium percipit, nec perversum sibi sensum fingens errorem veritatis loco amplectitur. Quamobrem cum is, qui animum ad studium Logicæ appellit, regulas logicas intelligere & intellectas in

*Initium studii Logici.*

(Wolffii Logica)

Qq q q q

usum

usum futurum memoriæ mandare debeat (§. 902.); quod terminorum præcipuorum notitiam sibi comparare teneatur evidens omnino est.

In probandis vel demonstrandis propositionibus logicis utimur anterioribus tanquam principiis : id quod vel ex solis citationibus innotescit, ubi ad eas animum advertere volueris. Demonstrationem vero facile intellecturus principia familiaria experiri debet (§. 1149.): id quod cum fieri nequeat nisi successu temporis, propositionum præcipuarum notitiam historicam sibi comparare tenetur animum ad studium Logicæ ap-  
pulsurus.

Quæ hic de studio Logicæ præcipimus, ad aliarum quoque disciplinarum studium transferri possunt. Inde autem omnis difficultas est, quam initio studii sentiant tyrones, quod termini, quibus utimur, & propositiones, quarum in demonstrando usus est, nondum ipsis sint familiares. Et ideo scripta dogmatica historica in omni scientiarum genere condenda sunt, ut eorum lectione tyrones præparentur ad lectionem scientificorum. Atque ideo promissimus in superioribus (not. §. 966.) directorium in usum lectionis præparatoriæ operis hujus logici, eorum potissimum gratia, qui adhuc hospites sunt in hoc studiorum genere. Hic ergo liberaturi fidem nostram problema sequens cum sua resolutione apponimus.

#### §. 1228.

*Directorium  
in usum le-  
ctionis præ-  
paratoriæ  
Logicæ.*

*Historicam definitionum ac palmariarum propositionum notitiam sibi comparaturus,*

#### I. Familiares sibi reddat definitiones

1. simplicis apprehensionis & notionis (§. 33. 34.) atque termini cum in genere (§. 36.), tum inanis (§. 38.), iudicii & enunciationis (§. 39. 41.), individui, generis ac speciei (§. 43. & seqq.), ratiocinationis (§. 50.), notionis universalis (§. 54.), essentialium, attributorum & modorum (§. 64. & seqq.), notæ (§. 79.) ac specierum notionum (§. 88. 92. 93. 95. 105. 110. 113. 123.), nec  
non

non terminorum (§. 81. 108. 111. 129. 133. 211.), significatus proprii atque usus loquendi (§. 139. 140.), definitionis cum in genere (§. 152.), tum in specie nominalis & realis (§. 191.), essentialis & accidentalis (§. 192.) atque genericæ (§. 195.) de *prima mentis operatione*.

2. Subiecti, prædicati & copulæ (§. 200. 201.), diversarum specierum propositionum (§. 204. 209. 213. 216. 218. 241. 242. 243. 244. 262. 266. 267. 269. 275. 276. 277. 278. 314. & seqq. 320.), determinationis subiecti (§. 228.), conversionis (§. 282.) & oppositionis (§. 288.) de *secunda mentis operatione*.
3. Syllogismi & partium ejus (§. 332. 335. 336. 340.), nec non specierum (§. 341. 342. 352. 361. 365. 403. & seqq. 416. 422. 459. 467. 471. 478. 493.), figurarum & modorum (§. 344. 345.), probationis ac demonstrationis (§. 492. 496. & seqq.) ejusque principiorum (§. 561.) & specierum (§. 549. 550. 799. 854. 855.) de *tertia mentis operatione*.
4. Veritatis & falsitatis (§. 505.) & criteriî utriusque (§. 523. 525.) conceptibilis & inconceptibilis (§. 522.), idæ veræ & falsæ (§. 547.), certæ, incertæ (§. 564.) & probabilis (§. 573. 578. 587.), scientiæ (§. 594.), opinionis (§. 602.) fidei (§. 611.) & erroris (§. 623.), experientiæ (§. 664.) & vitii subreptionis in experiundo (§. 668.), libri dogmatici & ejus specierum (§. 750. 751.), methodi scientificæ (§. 792.), syntheticæ, analyticæ ac mixtæ (§. 885.), ordinis scholæ, naturalis & mixti (§. 829. 830.), connexionis veritatum (§. 877.), solidæ ac superficiariæ pertractationis (§. 898.), convictionis (§. 982.), præcipitanitiæ in judicando (§. 1003.), rationum intrinsecarum & extrinsecarum (§. 1004.), præjudicii (§. 1011.) refutationis & impugnationis (§. 1017. 1018.), utriusque specierum (§. 1023. & seqq.), consequentariî (§. 1049.), defensionis (§. 1058.) ac tentaminis ejus (§. 1060.) disputationis (§. 1083. 1084.) ex *praxi Logicæ*.

## II. Familiares sibi reddat propositiones.

1. De operationibus mentis (§. 30. 31. 32. 40. 48. 49. 52. 53.), de ente in genere (60. 61. 62. 69. 70. 72.), de notionibus (§. 78. 82. 85. 89. 91. 97. & seqq. 104. 106. 112.), de terminis (§. 37. 117. 118. & seqq. 121. 132. 135. 141. 144.) & de definitionibus (§. 153. 154. 157. 158. 160. 167. 175. 179. 193. 194.) *quoad primam mentis operationem.*
2. De partibus judicii (§. 198.), copula (§. 203.), negatione (§. 207. 208. 212.), de modo prædicandi (§. 215. 217. 220. 221. 222. 225. 226. 227. 232. & seqq.), de determinationibus subjecti (229.), de universalitate propositionum (§. 257. 258.), de differentia propositionum (§. 259.) de oppositione earundem (§. 289. & seqq. §. 294. 295.) *quoad secundam mentis operationem.*
3. De regulis syllogismorum in genere (§. 333. 334. 346. & seqq. §. 354. 356. 357. 558.) & syllogismorum primæ figuræ in specie (§. 366. & seqq.), de modis primæ figuræ (§. 372. & seqq.) & ipsa prima figura (§. 377. 378. 379.) de syllogismo hypothetico (§. 407. 409.), de disjunctivo (§. 417. 419.), de enthymemate (§. 421. 423.), de syllogismis crypticis (§. 432. 441. 442.), de consequentiis immediatis (§. 445. 449. 451. 454. 455. 456. 460. 463.), de forite (§. 466. 470.), de inductione (§. 477. 479.), de usu vocum circa ratiocinia (§. 499. & seqq.) *quoad tertiam mentis operationem.*
4. De judiciis veris & falsis (§. 506. 507. 509. 514. 519. 520. 521. 529. 532. 533. 534. 544. 548. 557. 558.), de veris & falsis syllogismorum conclusionibus (§. 537. & seqq.), de principiis demonstrandi (§. 562.), de certitudine cognitionis (§. 567. & seqq.), de probabilitate ejusdem (§. 578. & seqq.), de scientia (§. 595. & seqq.), de opinione

nione (§. 603. & seqq.), de requisitis hominis fide digni (§. 613. & seqq.) de errore (§. 624. & seqq. §. 634. 637.), de experientia (§. 666. 667.), de possibilitate notionum (§. 717. & seqq.), de convictione (§. 983. 984. 985. 987. 990. & seqq.), de assensu rationibus extrinsecis extorto (§. 1007.), de refutatione & impugnatione (§. 1019. 1022. 1027. 1033. 1035. 1039. 1040. 1041. 1042. 1044. 1045. 1053. 1056.) & de defensione (§. 1061. & seqq.) *ex praxi Logicæ.*

III. Definitionibus ac propositionibus, prætermisiss demonstrationibus, jungat, quæ illustrationis gratia adjiciuntur.

IV. Ab anterioribus ad posteriora lento gradu progrediatur, & anteriora tamdiu repetat, donec memoriæ ita fuerint infixæ, ut verbis prolatis notiones iisdem respondentes statim recurrant & subiecto propositionis obvio prædicatum una occurrat atque contra.

Nimirum hoc modo in accurata systematis integri lectione nihil occurret, quod difficultatem facessat, multoque minoris temporis intervallo & magno laboris compendio eandem utiliter absolvet.

Immo si quis in historica hac definitionum ac propositionum notitia acquiescere voluerit aut pro ratione instituti ceteras quoque, quæ supersunt, eodem modo sibi familiares reddere studuerit; is regulis Logicæ in dato quolibet casu uti poterit, modo ulterius habitum iisdem utendi sibi comparaverit, utut demonstrationes ignoraverit (§. 960.).

#### §. 1229.

*Ad lectionem preparatus (§. 1228.) integrum systema hoc Logica cognitivum perlegat, observatis regulis, quas de scriptis dogmaticis scientiis legendis inculcavimus, nempe ut 1. propositiones omnes, immo definitiones sequentes, explicet per definitiones nostras (§. 910.), 2. definitiones nominales in tot resolvat propositiones, quot notæ eandem ingrediuntur (§. 947.) & eas*

*Logica cognitio scientifica  
quomodo  
comparatur.*

Qq q q q 3

ad

ad exemplum illustrationis gratia appositum applicet (§. 948.), 3. in propositionibus perinde ac docens hypothesin a thesi distinguat (§. 1128.) eamque ad exemplum illustrationis gratia prolatum applicet, 4. demonstrationes quoque ac probationes in resolvat perinde ac docens, ut non modo singulæ præmissæ syllogismorum, ex quibus eadem constant, animum discantis subeant; sed earum etiam forma appareat (§. 1130.), immo integras ad exempla singularia applicet, veluti in casu singulari demonstraturus, prædicatum in dato casu subiecto competere.

Etenim hac ratione singula rite intelliget (§. 903.) & veritatis propositionum certus evadet (§. 569.) easque ad exempla obvia applicare discet, consequenter Logicæ docentis artificialis compos fiet (§. 10.).

Equidem prolixus nimis nonnullis videbitur labor theoriæ Logicæ comparandæ impendendus: ast tentanti palam fiet, quod lente festinans minore temporis intervallo magis præclaros sentiat progressus, quam qui celeri gradu ad sequentia progreditur, ubi anteriora nondum satis familiaria facta fuerint.

#### §. 1230.

*Logica artificialis utens quomodo comparetur.*

*Habitu utendi regulis logicis sibi comparaturus*, seu Logicam artificialem utentem acquisiturus, 1. scripta scientifica accurata methodo condita continuo legat, 2. quomodo in iisdem regulis Logicæ fuerit satisfactum inquirat. Patet enim hac ratione continuo applicari regulas logicas atque adeo exercitia logica institui. Quamobrem cum exercitiis habitus omnis comparetur, iisdem quoque comparari debet habitus utendi regulis logicis.

Talia exercitia logica hætenus inusitata sunt, dubio procul quod libri accurata methodo conscripti rarissimi sint, immo si a mathematicis discesseris fere nullibi extent. Alias nullus dubito fore, ut non minus autorum analyses logicæ in usum tyronum a docentibus instituantur, quam vulgo analyses grammaticæ institui solent, in usum habitus utendi regulis Grammaticæ comparandi. Inserviunt huic instituto *Elementa Euclidis* & nos inprimis *Elementa nostra Mathe-*



Matheseos universæ, Arithmeticæ præsertim atque Geometriæ, eisdem aptavimus. Immo opera quoque nostra philosophica eidem usui inservire possunt, ut adeo ipsa Logicæ nostræ lectio prævia præparatione (§. 1228.) & conveniente modo (§. præc.) absoluta habitum quoque utendi regulis Logicæ pariat.

## §. 1231.

*Si quis in continua scriptorum scientificorum tractatione versatur, sed exercitiis logicis prorsus neglectis; is logicam naturalem docentem sibi clariorem, logicam vero naturalem utentem expeditam magis & ampliorem reddit.* Etenim lectione v. gr. elementorum Euclidis aut nostrorum vel Matheseos universæ, vel Geometriæ, aut nostrorum etiam scriptorum philosophicorum, notionem confusam acquirit formæ demonstrandi ac probandi, nec non connexionis definitionum atque propositionum (§. 790. 688.), quæ cum plura contineat, quam notio confusa regularum, juxta quas dirigitur facultas cognoscitiva in cognitione rerum, communi usu vel lectione scriptorum minime scientificorum acquisita; logica naturalis docens clarius fit (§. 8.).

*Logica naturalis quomodo clarius & usus ejus expeditior reddatur.*

Quoniam vero exercitio habitus comparatur, continua scriptorum scientificorum tractatione habitus quoque comparatur juxta ideam illam confusam in aliis casibus agendi, consequenter logica naturalis utens fit magis expedita & ampliatur.

Experientia sane loquitur, quod in Mathematicis probe versati logica naturali utente magis polleant alii, qui eadem vel prorsus non degustarunt, vel non scientificè pertractarunt. Eadem tamen non minus confirmat, ubi extra Mathesin eadem accuratione uti voluerint, eos hinc inde cespitare, cum rationes reddere nequeant, cur ita agant, neque demonstrare valeant, rite sese habere omnia: id quod a notione confusa expectare non licet (§. 88. 551. & seqq.). Nos sane cum animum ad Mathesin appelleremus methodi intimius pernoscentiæ gratia, in hunc usque diem attentionem nostram in regulas methodi, quæ nonnisi regulæ Logicæ sunt, defiximus. Nimirum primum notiones quasdam distinctas definitionum & propositionum atque demonstrationis, nec non ordinis, quæ-

defi-

definitiones ac propositiones collocantur, & concatenationis syllogismorum in demonstrationibus formavimus. Mox ad communem tractatum mentis usum attendentes earum ex mente humana rationem scrutati sumus atque deinde alia inde deduximus. Inquisivimus porro, num quæ hoc modo ex observatis collecta fuerant cum praxi Mathematicorum similiter consentirent. Et hoc pacto cum in theoria Logica proficere continuo nobis licuit, tum in observandis regulis logicis, quibus Mathematici usi fuere, acutiores facti sumus.

## §. 1232.

*Connubium  
rationis &  
experientia.*

Quoniam in optica præsertim & Astronomia observationes cum demonstrationibus combinantur, & idem multo luculentius fieri potest in physica experimentalis, siquidem rite tractetur; *habitu utendi operationibus mentis in cognitione rerum a posteriori & cum ea combinandi cognitionem a priori, Opticæ, Astronomiæ atque physicæ experimentalis studio comparare licet, exercitiis præsertim logicis institutis, dum scilicet regulæ de formandis judiciis intuitivis & notionibus a posteriori (§. 669.) una cum ceteris regulis logicis quibuscunque, prout usus tulerit, applicantur.*

Nos sane notionem distinctam venaturi modi veritatis a posteriori cognoscendi &, quæ a posteriori cognovimus imperfecte, ulterius perficiendi Astronomiam & opticam ita pertractavimus, ut ad methodi leges continuo attenderemus. Regulas, quas inde stabilivimus, de novo cum praxi Mathematicorum in Astronomia & Optica contulimus, ut illarum cum hoc consensus pateret. Philosophiam deinde experimentalem nova quadam ratione pertractavimus, ut experientiæ atque rationis connubium palam fieret, idemque institutum exequemur amplius in philosophia experimentalis; quam idiomaticè Latino dabimus. Quod vero hic denuo urgeamus exercitia logica, eadem est ratio, quæ nobis eadem in cognitione veritatis a priori persuasit (*not. §. 1230.*). Etenim qui in sola Astronomiæ, Opticæ ac philosophiæ nostræ experimentalis tractatione acquiescit, is nonnisi confusam quandam notionem veritatis a posteriori cognoscendæ sibi comparat, cum applicatione regularum logicarum obtineatur distincta. Confusa vero notio & lapsus faciliorem experitur, nec adeo amplum usum, quemadmodum distincta.

## §. 1233.

## §. 1233.

Si quis logica docente ac utente artificiali pollet, is in legendis scriptis vulgari modo conditis aut compilatis utramque ulterius perficere valet. Etenim qui Logica artificiali docente pollet, is distincte cognoscit regulas earumque rationes perspicit (§. 10.); qui vero logica artificiali utente pollet, is habitu instructus est regulas istas ad praxin transferendi (§. 12.). Quamobrem legens scripta vulgari modo condita, aut compilata, dijudicare valet, ubi in regulas logicas impeerint autores & in rationes inquirens, cur impeerint, perspicit, quomodo lapsus istiusmodi sint evitandi. Quodsi ergo in propositionibus determinatis formandis iisque demonstrandis fuerit versatus, id quod est Logicæ artificialis utentis (§. 551. & seqq. §. 705. 706. 734. 735.); logicam docentem subinde novis regulis ditare, cumque exercitiis continuatis ampliatur habitus omnis, logicam quoque utentem perficere ulterius valet. Præterea qui in propositionibus determinatis formandis ac demonstrandis probe fuit versatus, seu, quod perinde est, in arte inveniendi exercitatus, is librum vulgari more conscriptum, vel compilatum eo modo legere valet, quo scientificus tractatur (§. 962.), ut scilicet definitiones ac propositiones determinatæ ad vitam utiles inde hauriantur (§. 957.). Quamobrem dum definitiones minus exactas emendat, notionibus confusis distinctas substituit & propositiones vagas ad determinatas reducit; Logicam in inveniendo exercet, quod est omnium exercitiorum logicorum supremum, consequenter eo ipso logicam utentem ulterius perficit (§. 12.) & docentem sibi clariorem reddit (§. 930.).

Facile adeo apparet, exercitia hæc nec cadere in tyrones (§. 962.), nec utiliter ab iisdem institui, etsi superficialia opera contenti sint. Etenim de erroribus ac lapsibus aliorum per præcipitantiam statuentes ipsimet in errores & præjudicia incidunt, quibus a veritate cognoscenda detinentur, & in censendis ac perfringendis iis, quæ non intelligunt, audaces fiunt sibi que viam ad scientiam multis modis præcludunt. Non opus est verbis, ubi rerum testimonia adsunt.

(Wolffii Logica)

Rrr rr.

§. 1234.

Quomodo logica artificialis dolens ac utens ulterius perficitur.

§. 1234.

*Logica artificialis docens ac utens quo studio comparatur.*

*Logica cum docens, tum utens artificialis nonnisi multo studio atque labore, nec nisi successive comparatur.* Patet prius per ea, quæ de studio Logicæ fuere pertractata (§. 1227. & seqq.), tum etiam si quis numerum definitionum ac propositionum perpendit, quibus in hoc opere logico theoria & praxis Logicæ continetur, atque simul expendit, eas & rectius intelligi ad casus singulares applicatas, & habitum singulas applicandi exercitiis nonnisi acquiri repetitis.


Cum vero omnis rerum cognitio successive enascatur, immo notionum quoque claritas & assensus propositionibus præbendus successive gignatur (§. 993.), atque habitum non nisi successive generari ipso facto edoceamur; non minus evidens est, logicam quoque docentem ac utentem artificialem nonnisi successive comparari.

Ideo lectionem præparatoriam distinximus a lectione accurata (§. 1227. & seqq.) & hæc absoluta commendavimus exercitia logica diversi gradus (§. 1230. & seqq.). Quod si quis methodo a nobis præscripta in studio logico versari voluerit; is logicæ artificialis præstantiam ipso facto experietur, nec morabitur confusa aliorum de Logicæ naturali iudicia per notionem Logicæ naturalis & artificialis (§. 6. & seqq.) discutienda & rectificanda.

### FINIS PARTIS SECUNDÆ



CON-





# CONSPECTUS TOTIUS OPERIS.

Discursus præliminaris de philosophia in genere.

**D**E triplici cognitione humana, historica, philosophica & mathematica, pag. 1

*Cap. 3.*  
De usu Vocum sive Terminorum circa notiones, 169

*Cap. 4.*  
De Definitionibus, 189

*Sectio III.*  
De Judicio in specie.

*Cap. 1.*  
De Judiciorum differentia, 216

*Cap. 2.*  
De Divisione Propositionum in Mathesi usitata, 253

*Cap. 3.*  
De variis judiciorum affectionibus, 262

*Cap. 4.*  
De usu vocum seu Terminorum circa judicia, 284

*Sectio IV.*  
De Ratiocinatione seu Discursu in specie.

*Cap. 1.*  
De Syllogismo in genere, 289

*Cap. 2.*  
De Figuris & Modis Syllogismorum, 302

*Cap. 3.*  
De Syllogismis compositis, 328

*Cap. 4.*  
De Syllogismis Crypticis, 340

*Cap. 5.*  
De Consequentis immediatis, 353

*Cap. 6.*  
De aliis nonnullis argumentandi generibus, 363

*Cap. 7.*  
De Ratiocinatione polysyllogistica & mixtim composita, 376

Pars

*Cap. 2.*  
De Philosophia in genere, 13

*Cap. 3.*  
De Partibus philosophiæ, 28

*Cap. 4.*  
De Methodo philosophica, 53

*Cap. 5.*  
De Stylo philosophico, 71

*Cap. 6.*  
De libertate philosophandi, 79

Philosophia Rationalis sive Logica. Prolegomena, 107

Pars I. sive Theoretica.

*Sectio I.*

De Logicæ principiis.

*Cap. 1.*  
De tribus mentis Operationibus in genere, 125

*Cap. 2.*  
De notitiis quibusdam generalibus entis, 142

*Sectio II.*

De Notionibus in Specie.

*Cap. 1.*  
De Notionum differentia formali, 155

*Cap. 2.*  
De differentia notionum materiali, 165

Pars II. five Practica.

*Sectio I.*

De usu Logicæ in vero a falso, certo-  
que ab incerto dijudicando.

*Cap. 1.*

De Veritatis criterio, 387

*Cap. 2.*

De Demonstratione, 412

*Cap. 3.*

De certo, incerto atque probabili, 430

*Cap. 4.*

De scientia, opinione, fide atque errore, 444

*Sectio II.*

De usu Logicæ in veritate  
investiganda.

*Cap. 1.*

De experientia in genere, 480

*Cap. 2.*

De formandis judiciis intuitivis & notio-  
nibus a posteriori, 484

*Cap. 3.*

De formandis judiciis discursivis & defini-  
tionibus a priori, 511

*Sectio III.*

De usu Logicæ in libris conscribendis,  
dijudicandis & legendis.

*Cap. 1.*

De Librorum differentia, 537

*Cap. 2.*

De conscribendis libris historicis, 541

*Cap. 3.*

De conscribendis libris dogmaticis, 565

*Cap. 4.*

De dijudicandis libris historicis, 579

*Cap. 5.*

De dijudicandis libris dogmaticis, 585

*Cap. 6.*

De legendis libris tum historicis, tum do-  
gmaticis, 648

*Cap. 7.*

De interpretatione Scripturæ sacre, 692

*Sectio IV.*

De usu Logicæ in veritate cum aliis  
communicanda.

*Cap. 1.*

De modo alios convincendi, 706

*Cap. 2.*

De modo alios refutandi, 733

*Cap. 3.*

De modo sese defendendi, 757

*Cap. 4.*

De Methodo disputandi, 771

*Cap. 5.*

De Methodo docendi, 788

*Sectio V.*

De usu Logicæ in æstimandis viribus  
ad rerum cognitionem requisitis.

*Cap. 1.*

De æstimandis viribus ad verum invenien-  
dum & dijudicandum requisitis, 798

*Cap. 2.*

De æstimandis viribus ad libros conscri-  
bendos, dijudicandos & legendos neces-  
sariis, 815

*Cap. 3.*

De æstimandis viribus in convincendo,  
controvertendo, disputando & docen-  
do, 831

*Sectio VI.*

De usu Logicæ in praxi vitæ & metho-  
do eam studendi.

*Cap. 1.*

De usu Logicæ in praxi vitæ, 846

*Cap. 2.*

De methodo Logicam discendi, 857

INDEX



# INDEX RERUM ET VERBORUM, in quo litera D. discursum præliminare,

Numeri vero paragraphos denotant.

|  |  |
|--|--|
| <b>A</b> bsolute quæ de rebus enuncianda, 61                 | <i>Argumentum.</i> Definitio, 1099   |
| <i>Abstractiones</i> quomodo fiant claræ & distinctæ, 122    | <i>Argumentum ab invidia ductum.</i> Definitio, 1049. 1050. quinam idem in potestate habeat, 1202  |
| <i>Accidens</i> separabile & prædicabile, 67                 | <i>Arithmetica, naturalis, connata acquisita.</i> n. 6   |
| <i>Equationum algebraicarum</i> &c. historia not. 785        | <i>Ars inveniendi.</i> Fundamentum & Definitio, 74. D. quomodo ex historia literaria locupletetur, 785. 944  |
| <i>Equitas in interpretando.</i> Definitio, 922. regulæ, 921 | <i>Articuli fidei,</i> quinam dicuntur mixti, not. 979. quinam puri, not. 980  |
| <i>Equivocatio.</i> Definitio, 326. quando non molesta, 327  | <i>Artis opera</i> ad Philosophiam pertinent, 40 D.  |
| <i>Affirmatio.</i> Definitio 205. Signum, 206                | <i>Artium philosophia,</i> 39 D.   |
| <i>Alphabetum inventorum,</i> not. 1139                      | <i>Artium liberalium philosophia,</i> 72. D.   |
| <i>Analogia fidei,</i> per quod constituatur not. 976        | <i>Affensus</i> successiva generatio, 993. quando rationibus extrinsecis extorqueatur, 1007. 1008. vi demonstrationis extortirationes quænam, 1006. qualis sit convicti, 1000                      |
| <i>Anatomia.</i> Definitio, 746                              | <i>Affentiri.</i> Definitio, not. 613  |
| <i>Anima.</i> not. 149                                       | <i>Affumere</i> quid dicatur, 1099   |
| <i>Anima duplex</i> facultas, 60. D.                         | <i>Assumptio.</i> Definitio, 363   |
| <i>Antecedens.</i> Definitio, 405. quando negandum 1114      | <i>Attentio convincendi,</i> 998. ejus medium, 999   |
| <i>Antiquitatum</i> usus in explicanda S. S. not. 972        | <i>Attributa.</i> Definitio, 65. species, 66. quomodo de ente prædicentur, 69. quot definitionem ingredi debeant, 175. quomodo ex iis definitiones condantur, 181. eorum observatio, 674. 675. 677 |
| <i> Applicatio definitionum in praxi vitæ,</i> 1213          | <i>Attributa communia.</i> Definitio, 66. quomodo prædicentur, 221. quomodo determinentur, 733   |
| <i> Applicatio probabilis definitionum,</i> 581              | <i>Attributa propria.</i> Definitio, 66. quomodo prædicentur, 220. quomodo determinentur, 732  |
| <i> Applicatio probabilis propositionum certarum,</i> 590    | <i>Argumentatio,</i> not. 50. a specie ad genus, 641   |
| <i> Applicatio propositionum in praxi vitæ,</i> 1215         | <i>Argumentatio illegitima</i> a dicto secundum quid ad dictum simpliciter, 647. a dicto simpliciter ad dictum secundum quid, 648. ex contradictione spuria, 656                                   |
| <i> Apprehensio simplex.</i> Definitio, 33                   | <i>Argumentationes vitiosæ,</i> 638, 642. 644.   |
| <i> Arborum educatio artificiosa,</i> not. 41                |  |

- Attributorum per modum quæ insunt*, quomodo prædicentur, 222
- Autoritas*, quando ad eam provocandum, 988
- Axioma*. Definitio, 267. quænam propositiones huc referendæ, 268. 270. & seqq. negativa, 271. cur sint certa, 572. quinam ea dijudicare valeat, 1156. 1157
- B***iographia*, 749
- Botanica*, not. 83. D. 746
- Botanologia*, not. 83. D.
- C***alor non semper idem* not. 13. D. an distincte describi possit, 766
- Causa*. Definitio, 696. a posteriori quomodo investigetur, 697. 698. a priori quomodo detegatur, 727. 728. quomodo probabiliter detegatur, 727. 728
- Cavillatio*, not. 636
- Cavillator*, not. 636
- Certitudo*. Quomodo in philosophia obtineatur, 34. D. quomodo eidem in libris consulatur, 846
- Certitudo fidei*, 614
- Certitudo propositionum* a posteriori, 567. a priori, 568. 571. quomodo obtineatur, 569. 570
- Certorum cum incertis confusio*, 849. & seqq.
- Certum*. Definitio, 564. notio relativa, 565. quando cum incerto confundatur, 849. 899.
- Circulus in definiendo*. Definitio, 170. cur vitandus, 169
- Circulus in demonstrando*. Definitio, 883. cur vitandus, 884
- Citationum necessitas in scriptis scientificis*, 794. usus, not. 796. 797. 992
- Clara notio* quomodo fiat obscura, 85. Vide *notio clara*.
- Clavittis cura*, 164
- Cognita* quænam sint? detegere 737
- Cognitio* ad usum vitæ faciens, 51. D.
- Cognitionis gradus infimus*, 22. D. gradus medius inter philosophicam & historicam, 54. D. usus in negotiis vitæ unde pendeat, 1212
- Cognitio certa* cui conveniat, 595. quando non obtineatur, 862
- Cognitio historica*. Fundamentum, 1. D. limites ejus, cur non constituentur, 2. D. definitio, 3. D. differentia a philosophica, 7. D. quando fundamentum præbeat philosophicæ, 10. D. cur excolenda, 11. D. usus, 12. D. usus in mathematica, 18. D. veritatum mathematicarum, 19. D. divisio, 21. D. philosophicam confirmat, 26. D. limites in philosophia, 35. D. quando nexum in philosophia non turbet, 36. D.
- Cognitio historica arcana*. Fundamentum, 20. D. Definitio, 21. D. reductio ad communem, 24. D.
- Cognitionis historica connubium* Autori sanctum, 12. D.
- Cognitio mathematica*. Fundamentum, 13. 18. D. definitio, 14. D. cognitio ejusdem historica, 15. 19. D. cum altero communis, 16. D. differentia a philosophica & historica, 17. D. usus in philosophica, 27. D. est cum philosophica conjungenda, 28. D. in philosophia limites, 35. D. quando nexum in philosophia non turbet, 36. D.
- Cognitio philosophica*. Fundamentum, 4. 10. D. limites non constituendi, 5. D. Definitio, 6. D. differentia ab historica, 7. D. cognitio ejusdem historica, 8. D. quando absit, 9. D. usus in mathematica,

- ca, 18. D. unde confirmetur, 26. D. unde certitudinem consequatur, 27. D. ejus extensio, 42. 43. D. prerogativa 42. 43. 44. D.
- Cognitio philosophica operum artis*, 40. D. voluptas inde profecta, 44. D.
- Cognitio philosophia historica est ad usum vitæ applicabilis*, 51. D.
- Cognitio universalis unde derivetur*, 57. quomodo a posteriori comparetur, 708
- Cognitio vulgaris qualis*, 23. D.
- Cognitionis philosophica certior ad usum vitæ applicatio*, 41. D. extensio, 42. D.
- Cognitionis philosophica & mathematica conubium*, 28. D.
- Colores an distincte describi possint*, 765
- Compendia. Quomodo dijudicentur*, 894. quales iis convenient demonstrationes, 895. quænam demonstrationes non convenient, 896. quinam rigor in definiendo iisdem conveniat, 897
- Compilator. Definitio*, 889. quando plagiarus, 891. quando iudicio careat, 892. quando ejus propositiones per definitionem non explicandæ, 926
- Complectum opus. Definitio*, 815. regulæ idem dijudicandi, 816. & seqq.
- Concatenatio syllogismorum. Definitio*, 492. exempla, not. 551. & seqq.
- Conceptibilis. Definitio*, 522. quænam propositio talis sit, 528
- Conclusio. Definitio*, 335. quando vera, 537. quando particularis, 356. quando negativa, 358. 542. 543. quando falsa, 538. 539. quando vera ex præmissis non sequatur, 540. 542. quando in consequentia immediata vera, 542. quando probabilis, 585. 586. ex definitionibus, 724
- Conditor systematis. Definitio*, 889
- Confusio rerum & verborum*, 834. 835
- Conjuncta quod quædam constanter sint, quid ex eo sequatur* 702
- Connexio veritatum. Definitio*, 877. ubi locum habeat, 878. 879.
- Conjectaria. Definitio*, 277
- Consequens. Definitio*, 405. quando concedendum, 1115
- Consequentia. Definitio*, 1043. quando cumulantur, 1042. imputatio quando fiat, 1045. 1078. quando neganda, 1112. 1113
- Consequentia immediate. Definitio*, 459. quid sint 460. a nonnullis neglectæ & non, 461. modi, 462. praxis, 463. fundamentum, 464. species, 465
- Consequentiarum cumularum rationes*, 1042
- Consequentiarus. Definitio*, 1046. praxis, 1047. 1048. quando persecutor, 1052. quibus verbis utatur, 1057. cur in interpretando iniquus, 1067. qua defensione adversus ipsum opus, 1076. quinam talem agere possit, 1198. & seqq. 1201
- Consequentiariorum praxin a refutatione indirecta quinam distinguere possit*, 1204
- Constantia loquendi necessitas*, 143. D.
- Constantium discrimen*, 63
- Contradictio Philosophiæ & Theologiæ est demonstranda non obtrudenda*, 168. D. in subalternis latens, 301. in indefinitis latens, 303. in contraria defendentium, 304. in affirmativis, 305. in propositionibus negativis, 306. quando pariat errorem, 657
- Contradictoriarum propositionum veritas & falsitas*, 532
- Controversia temeraria quomodo arcenda*, 53. D.
- Conversa unius ex altera illatio*, 456
- Con-*

*Conversio* illegitima quando errorem pariat, 649. 650. & seqq.  
*Convictio*. Definitio, 982. modi, 985. & seqq. quinam ejus capax, 994 997. quomodo ad eam disponatur animus, 995. 1012  
*Convincere*. 982. quinam ad convincendum idoneus, 994. attentio convincendi qualis, 998. Convicti assensus, 1000. alterum quinam possit, 1187. hypotheseos philosophicæ 1188. 1189. a priori 1191.  
*Copula*. Definitio, 201. cautio circa eandem, 202. quomodo ingredientur enunciationem, 203  
*Corollaria*. Definitio, 277  
*Corpus organicum* quomodo ejusdem definitio realis inveniat. 686  
*Cosmologia*. Definitio, 77. D.  
*Cosmologia generalis vel transcendentalis*. Definitio, 78. D. principia ontologica. 97. D.  
*Criterium falsitatis*. Definitio, 525. in quo consistat. 526  
*Criterium veritatis*. Definitio, 523. quodnam sit. 524. 527. 528  
*Crypsis propositionum* unde oriatur & dijudicetur, 313  
*Crypsis syllogismorum*. Principium generale, 432. 441. variae species, 433. & seqq. quomodo tollenda, 442  
*Crypsis* in syllogismo secundæ figuræ latens, 385  
*Crypsis* in syllogismis tertiæ figuræ latens, 397  
*Curia Romana* judicium sanum de hypothesibus philosophicis, *not.* 164. 168. D.

**D***efensio*. Definitio, 1058. tentamen, 1059. 1060. quando non habeat locum, 1061.

regula, 1062. & seqq. varii modi, 1066-1079. quando non opus 1074  
*Definitio* quid sit, 152. quænam ingredi eam possint, 153 154. notitia huc requisita, 159. cui notio deceptrix responder, 171. diversi modi, 172. & seqq. quot attributa eandem ingredientur, 175. quot modorum & relationum possibilitates, 176. cur modi eam ingredi nequeant, 177. quando possibilitates, 178. 182. usus, 179. quando constat ex essentialibus, 180. quando ex attributis, 181. quænam sufficiant, 186. cur genus proximum postulet, 190. differentia, 191. & quis eandem invenerit, *not.* 191. quem locum inter propositiones tueatur, 214. propositioni universali æquivaler, 252. cui competit, 253. *not.* 277. quando in axioma abeat, 272. seqq. quomodo a notis superfluis liberetur, 680. usus in propositionibus, 322. requisita earum, 580. applicatio ejus probabilis, 581. quomodo superflua ex eadem arceantur, 680. modus deducendi inde conclusiones, 724. ordo definitionum, 880. quando de iis judicandum, 953. usus in interpretando, 904. 905. 910. 927. & seqq. quando in interpretando nullum habeat usum, 915 916. & seqq. 926 in dato casu applicatio, 1218. 1219. quinam eam applicare possit, 1220. quomodo a posteriori dequantur, 679. quando nimis, 823. 824. quando superflua continere non debeant, 838. dijudicatio antecedens applicationem, 1213. 1216. 1217. seqq.  
*Definitio accidentalis*, 192  
*Definitio deceptrix*, 166. 171  
*Definitio essentialis*, 192  
*Definitio genetica*. Definitio, 195. quænam noti-

# Index Rerum & Verborum.

- notitia huc requiratur, 196. resolutio, 1126. explicatio & illustratio, 1127  
*Definitio inversa* æquivalens propositioni  
 universali, 255. est axioma, 274  
*Definitio manca* cur in interpretando er-  
 rorem pariat, 918. quomodo eum pariat,  
 633. quando tales sint, 839. 840. quo-  
 modo eviteretur, 952  
*Definitio quando mutila*, 839. 840  
*Definitio nominalis*. Definitio, 191. 197. quæ-  
 nam tales sint, 193. quomodo investiga-  
 tur, 730. quomodo condi possit, 731. re-  
 solutio, 947. illustratio, 948. examen,  
 949. superfluum eliminatio, 950.  
 quomodo superflua in illis detegantur,  
 951. quando iudicium de ea differen-  
 dum, 953. in cuiusnam sit potestare, 1141.  
 quomodo docens eam resolvere, 1123.  
 explicare, 1124. & illustrare debeat, 1125.  
 quinam eam diiudicare possit, 1154. 1153  
*Definitio realis*. Definitio, 191. 197. quæ-  
 nam talis sit, 194. modus eam investi-  
 gandi, 686. 687. 734. 735. 736. usu in  
 interpretando, 938  
*Definitio corporis organici* quomodo inve-  
 niatur, 686. modi eam investigandi, 687  
*Definitiones abundantes*. Incommoda in in-  
 terpretando, 919. incommoda in cogni-  
 tione veritatis & applicatione ejus, 836.  
 837. seqq.  
*Definitiones* reducunt res ad sua genera &  
 species, 179  
*Definitionum* in libris ordo, 119. D. in pro-  
 positionibus usus, 322  
*Definitionum a posteriori* inventio, 679.  
 examen, 681  
*Definitum*. Definitio, 152. num ingredi pos-  
 sit, aut ingrediatur definitionem, 167.  
 168. cui competat, 256. & not. 277  
 (Wolffii Logica)  
*Demonstrare* prepositionem more geome-  
 trico, modus, 801  
*Demonstrare* independentem, not. 882  
*Demonstratio*. Definitio, 498. materia,  
 123. D. ordo in ea observandus, 124. D.  
 modi argumentandi ei convenientes,  
 555. principia, 561. 562. differentia a  
 probatione probabili, 588. qui ejus vim  
 non percipiant, 570. quænam refuta-  
 tioni conveniat, 1022. quinam eam di-  
 judicare possit, 1149. 1150. cur ejus for-  
 mam ignorans convinci nequeat, 1193.  
 singularia nonnulla, 129. & 131. D. quo-  
 modo extra Mathesin ad eam perve-  
 niatur, 729. cur memoriæ non man-  
 danda, 960. quinam eam facillime in-  
 telligat, 1182. quomodo abbrevientur,  
 798. analysis, 958. 1130. quænam reso-  
 lutu faciles, 959. earum resolutio a do-  
 cente instituenda, 1130  
*Demonstratio apogogica* sive indirecta, 550.  
 forma, 553. modus, 559. analysis logica,  
 553. 559. fundamentum, 556. 558. cur  
 vera, 557  
*Demonstratio completa*. Definitio, 854. cur  
 facile intelligatur, 857  
*Demonstratio directa*. Definitio, 549  
*Demonstratio consummata*. Definitio, 855.  
 prærogativa, 859. criterium, 856  
*Demonstratio incompleta*. Definitio, 854.  
 cur difficulter intelligatur, 857  
*Demonstratio inconsummata*. Definitio, 855  
*Demonstratio indirecta*. Definitio, 550  
*Demonstratio inordinata*. Definitio, 799  
*Demonstratio ordinata*. Definitio, 799. quo-  
 modo condenda, 800. prærogativa, 858  
*Demonstratio ostensiva* s. directa. Definitio,  
 549. forma, 551. 552. analysis logica,  
 551. 552  
 Demon-

- Demonstrationes*. extra Mathesin quomodo ad eas perveniat, 729
- Dendrologia*, not. 83. D.
- Determinare*. Quæ per se invicem determinantur, 536
- Determinatio subjecti*. Definitio, 228. unde desumatur, 229
- Determinatio sufficiens propositionis* unde agnoscenda, 1158
- Determinationes subjecti æquivalentes*. Definitio, 230. quænam tales sint, 231
- Dianoëa*, not. 50
- Dianoëticum judicium*, 51
- Dicta* ab aliis, quando majore luce illustrentur, 161. D.
- Dicta classica* quænam dicantur, not. 976
- Dicta incommoda* num refutanda, 1032
- Dictum de omni & nullo*, 346. & seqq. extensio ejusdem ad definitiones, 349. ad prædicationes proprias, 350
- Differentia formalis* notionum, 77
- Differentia materialis* notionum, 103
- Differentia numerica*, 75
- Differentia specifica* a proprio diversa, 76
- Dilemma*. Definitio, 482. quam pariat conclusionem, 483
- Dimensionum ratio* quomodo determinanda, 774
- Discrimen* eorum, quæ rebus insunt, 60
- Discursus*. not. 50
- Disputatio*. Definitio, 1083. leges, 1084 & seqq. an ea veritas eruatur, 1116. quomodo per quæstiones instituitur, 1117
- Dissensus in verbis* non repugnans consensui in re, 158. D.
- Distinctio*. Definitio, 1107. quomodo inveniat, 1109
- Docere*. Definitio, 1118. regulæ docendi, 1119. & seqq.
- Docentis munere* quanam fungi queat, 1210.
- requisita, 1119. 1134. regulæ ei observande, 1131
- E***lenchi ignoratio*. Definitio, 658. quomodo evitetur, 659
- Ens*, quæ absolute, 61. quæ hypothetice de eodem enuncianda, 62
- Euthymema*. Definitio, 422. ratio, 421. ejus species syllogismi, 323. criterium, 424. species, 425. & seqq. usus in disputando, 1111
- Entis cognitio* generalis, 60. & seqq. essentialia, 64. attributa, 65
- Enunciatio*. Definitio, 41. ejus differentia a judicio, 42. partes, 199. species, 204
- Enunciatio affirmativa*, 204
- Enunciatio negativa*, 204
- Ephes. III. 10.* not. 980
- Episyllogismus*, 493
- Epitomator*. Definitio, 893. quænam tenere debeant in demonstrando, 895. 896. in definiendo, 897
- Errare pueriliter*. not. 641. medium evitandi periculum errandi, 661
- Error*. Definitio, 623. quomodo detegatur, 625. quando committatur, 626. & seqq. ex uno sequuntur plures, 627. 628. a notione deceptrice ortus, 629. circæ judicium intuitivum commissus, 631. ex defectu definitionis, 633. ex lapsu memoriæ, 634. a specie ad genus, 640. varii ortus, 650. seqq. 657. 660. 918. ex neglectu in scrutandis causis ortus, 699. 700. quomodo hic evitetur, 701. ex apparenia objectorum visibilium ortus, 703. quomodo hic evitetur, 704
- Error circa principia*, 632
- Error notarum*, medium evitandi, 701
- Essentialia*. Definitio, 64. differentia, 68. quo-

quomodo de ente prædicentur, 69. quomodo definitio ex iis contexenda, 180. quomodo determinentur, 732. 733. observatio, 674. 675. 677  
*Essentialium prædicatio* quando propositionem identicam pariat, 223. 224  
*Ethica. Fundamentum*, 63. D. definitio, 64. D. quo loco tractanda, 104. D.  
*Etymologia* num interpretationi serviat, 914  
*Existentia Dei* num ex hypothesebus probanda, not. 128. D.  
*Experientia. Definitio*, 664. objectum, 665. probatio, 666. vitium in experiundo, 667. propria quomodo comparetur utilis, 1226  
*Experientia & rationis* connubium, 1232  
*Experimenta*, 747. quomodo describenda, 772. eorum ordo, 110. D. usus ad intelligendum historiam naturalem, 769  
*Experimenti veritatis* quomodo alterum convincere valeas, 989  
*Experiri. Definitio*, 664  
*Explicatio propositionis* per etymologiam fallax, 914. quomodo demonstretur, 1028  
**F***acultas cognoscitiva*, ejus dispositio naturalis, 5  
*Facultas appetitiva*, exemplum. not. 682  
*Fallacia. not.* 636. æquivocationis seu homonymiæ, not. 638. compositionis, not. 639. divisionis, *ibid.* a dicto secundum quid ad dictum simpliciter, not. 647. a dicto simpliciter ad dictum secundum quid, not. 648  
*Falsa idea* quænam, 547  
*Falsa narratio*, 621. criterium intrinsecum, 622  
*Falsa interpretationis S. S. criterium*, 976  
*Falsi a vero* discernendi regulæ, 545-546

*Falsitas. Definitio*, 505. criterium, 525. & seq.  
*Falsitas hypotheseos philosophicæ*, 609  
 propositionis, 566  
 notionis, 547  
*Falsa resolutio* problematis, 873  
*Fatum Christianum s. hypotheticum*, quid Theologi appellant, not. 1032  
*Fides. Definitio*, 611. objectum, 612. certitudo, 614. probabilitas, 614  
*Fide* quinam dignus, 613. ejus requisita, 613. & seqq.  
*Figura syllogismorum. Fundamentum*, 343. definitio, 344  
*Figura prima syllogismorum. Definitio*, 344. regulæ, 366. --- 371. modi, 372. perfectio, 378. 401. sufficientia, 379. præstantia, 380  
*Figura secunda syllogismorum. Definitio*, 344. fundamentum proximum, 381. modi & regulæ, 382. 383. ad primam reductionem, 384. quæ cryptis in illa, 385. cur minus evidens, 388  
*Figura tertia syllogismorum. Definitio*, 344. fundamentum, 389. 391. modi, 390. 392. 393. regulæ, 395. ad primam reductionem, 396. 398. quæ cryptis in illa, 397. cur minus evidens, 399  
*Figura imperfecta*, 400  
 perfecta, 400  
*Formam ignorans* cur convinci nequeat, 1193  
**G***enera*, ubi existant, 56. quomodo determinentur, 70. quomodo distinguantur, 71. differentia, 72. quomodo definiantur, 172. 173. 174  
*Generis & differentia specificæ* notas quando permiscere liceat, 188. quando non liceat, 189

- Generis* notio quomodo reperitur , 710.  
711. 713. 715  
*Generis inferioris* notio , 184  
*Generum prædicata* ad species applicanda ,  
235. & seqq.  
*Genesios VI. 6.* not. 976  
*Genus.* Definitio , 45. quomodo definitio-  
nem ingrediatur , 187. quomodo agno-  
scatur , 179. 582  
*Genus inferius* ejusdem notio quid invol-  
vat , 184  
*Genus proximum* postulat definitio , 190  
*Genus intermedium* , 47  
*subalternum* , 47  
*superius* , 46  
*Geometrarum* mos , an in scriptis scienti-  
ficis observandus , 793. qui illo more  
scribere potest , 93. 1174  
*Geometria* quomodo intellectum acuat , 996  
*Grammatica philosophica* , 72. D.  
**H**armonia præstabilita num virtuti con-  
traria , not. 164. D.  
*Hierolyphica significatio* litterarum he-  
braicarum , not. 978  
*Historia* , 745. per eminentiam sic dicta  
species , 749. finis generalis , 759. ordo ,  
809. qui eam rectius intelligat , 934. fi-  
nis generalis , 759. modus eam conden-  
di , 760. applicatio ad usum , 942. 1167.  
1168  
*Historia animalium* ut avium , insectorum ,  
piscium , 746.  
*Historia artis* quomodo condenda , 773. &  
seqq. species , 748. finis , 754. quinam  
eam condere possit , 1166  
*Historia civilis.* Definitio , 749. finis , 755.  
ordo , 809. quomodo condenda , 779.  
780. 783. quinam eam condere possit ,  
1167. 1168  
*Historia celestis* , 746  
*Historia ecclesiastica.* Definitio , 749. finis ,  
756. ordo , 809. quomodo condenda ,  
781. 783  
*Historia literaria.* Definitio , 749. finis ,  
758. quomodo condenda , 784. 785.  
exemplum , not. 785. quinam eam con-  
dere possit , 1169. 1170  
*Historia meteororum* , 746  
*Historia morborum* , 746  
*Historia naturalis.* Definitio , 745. species  
variarum , 746. finis , 753. quomodo con-  
denda , 761. & seqq. 771. quinam eam  
condere aptus , 762. & seqq. 1166. qui-  
nam eam rectius interpretetur , 932.  
quomodo veritas ejus examinetur , 805.  
& seqq. ordo in ea observandus , 808  
*Historia privata.* Definitio , 749. finis , 757.  
ordo in ea tenendus , 809. quomodo  
condenda , 782. 783  
*Historiographia* Campanellæ , not. 72. D.  
*Homonymia.* Definitio , 326. quomodo vi-  
tiosam reddat formam syllogismi , 638  
*Hydrographia* , not. 82. D.  
*Hydrologia* , 82. D.  
*Hypothesibus* quinam locus in philosophia  
assignetur , not. 168. D.  
*Hypothesis philosophica.* Definitio , 126. D.  
quatenus in philosophia admittitur ,  
127. 129. D. illustratio , not. 127. D. spu-  
ria , not. 127. D. abusus , 128. D. qua-  
tenus ex a curia Romana admittuntur ,  
not. 164. 168. D. cur sit opinio , 606.  
quando vera , 607. quando probabilis ,  
608. falsa , 609. improbabilis , 610  
*Hypothesios philosophica probabilitatem*  
quinam dijudicare possit , 1162. 1163  
*Hypothetice demonstranda* , 129. D.

ab Hy-



- ab Hypothetico ad absolutum** vitiosa argu-  
mentatio, 645. 646
- Ichtyographia**, not. 746
- Idea vera & falsa** discrimen, 547
- Idiota**, quid potest, 1198
- Ignoratio elenchi**. Definitio, 658. quomo-  
do evitetur, 659
- Illatio**, 335
- Imaginationis lex** ejus usus, 32
- Impossibilis** definitio, 518. notio, 519
- Improbabile** cur possit esse verum, 592
- Improbabilitas** hypotheſeos philosophicæ,  
610
- Impugnatio**. Definitio, 1018. species, 1025.  
1026. quorum verborum expers sit,  
1056. quando contemnenda, 1064. qui  
a perversa abhorreat, 1200. 1203
- Incertum**. Definitio, 564. quod sit notio re-  
lativa, 565
- Inconceptibilis**. Definitio, 522. quænam ta-  
lia sint, 528
- Incompletum opus**. Definitio, 815. unde  
agnoscatur, 816. & seqq.
- Independenter** propositionem ab altera de-  
monstrare, not. 882
- Individuationis principium**, 75
- Individuum**. Definitio, 43. 74
- Individuorum differentia**, unde, 73
- Individuorum prædicata** quomodo ad speci-  
em transferenda, 234
- ab Individuis ad speciem** argumentatio vi-  
tiosa, 644
- Inductio**. Fundamentum, 477. definitio,  
478. reductio ad syllogismos categori-  
cos, 479. cur peculiarem argumentandi  
modum constituat, 480. ad syllogismos  
hypotheticos reductio, 481
- Inferiorum** definitio, 476
- Iniquitas in interpretando**. Definitio, 922.  
gradus, 923. 924. 925
- Intelligere**, quando autorem intelligamus,  
903
- Interpretandi regulæ**, 903. & seqq., 927.  
seqq.
- Interpretatio fallax**, 914. falsa, criterium  
ejusdem, 976. dubia, 1179
- Interpretationes S. S. regulæ logicæ** 970. &  
seqq. utilitas, 981
- Inutile scriptum**. Definitio, 825. quando  
talc, 826
- Inveniendi habitus** quomodo comparetur,  
726. 1138
- Inventorem** cur quis in omnibus agere ne-  
queat, 741
- Iris**, quando generatur, not. 4. D.
- Ironia**, not. 146
- Judex controversiarum philosophicarum**  
competens, 52. 53. D.
- Judex consequentiarum**. Definitio, 1046
- Judicia aequipollentia**, 278
- Judicia de facto cum facto non confunden-  
da**, 778
- Judiciorum falsorum casus**, 507
- Judicium**. Definitio, 39 in quo consistat,  
40. differentia ab enunciatione, 42. par-  
tes, 198. species, 204. ab objecto dissen-  
sus, 508. cum objecto consensus, 508
- Judicium affirmativum**. Definitio, 204.  
qualis notio eidem respondeat, ubi ve-  
rum, 520
- Judicium determinatum**, 320
- discursivum**, 51
- Judicium intuitivum**. Definitio, 51. quo-  
modo formetur, 669. 670. quando præ-  
beant notionem distinctam, 671. quo-  
modo universale a posteriori eruendum,  
705. 706

- Judicium negativum.* Definitio, 204. quænam eidem notio respondeat, 521
- Judicium particulare,* 243  
*singulare,* 241  
*vagum,* 320  
*universale,* 242
- Judicium probabile de genere & specie,* 582
- Judiciorum verorum casus,* 506
- Jur naturæ.* Definitio, 68. D. quo loco tractandum, not. 104. D. 39. D.
- L***apides Lydii Logica,* 26. & seqq. applicatio eorum, not. 58
- LECTIO spuria* scriptorum scientificorum, 967
- LECTIO scripti scientifici* a quonam celeriter absolvatur, 1183. 1184
- LECTORIS* officium, 902. seqq.
- Lex imaginationis* ejus utilitas, not. 32
- Legum providentia divina* scrutatio, 943
- Liber dogmaticus.* Definitio, 750. divisio, 751. principia dijudicandi tales, 815. & seqq. quinam utilis & inutilis, 826. quid de eo observandum, 945. qui lectu facilis, 946. quinam eos dijudicare possit, 1175
- Liber dogmaticus historicus.* Definitio, 751. finis, 787. quomodo condendus, 788. objectum, 789. quando ordine conscriptus, 827. propositiones ei inferendæ, 847. 848. 863. & seqq. utilitas, 964. quinam condere valeat, 1171
- Liber dogmaticus scientificus.* Definitio, 751. quomodo condendus, 790. seqq. quando ordine conscriptus, 828. quænam eidem inferendæ, 866. seqq. regulæ lectori observandæ, 961. & seqq. quænam lectio rejicienda, 967. a quonam accurate legi possint, 961. 1183. utilitas, 1031.
- a quo condendus, 1173. quinam cursoria lectione inde proficiant, 1184
- Liber historicus.* Definitio, 744. differentia, 745. qua attentione legendus, 939. quinam eundem condere potest, 1164. 1165
- Liber obscurus,* 820. cur non intelligatur, 821. 913
- Liber perspicuus,* 820. cur intelligi potest, 821. seqq.
- Liber solide conscriptus* qualis, 901  
*superficialis conscriptus* qualis, 901
- Libri* quinam intelligi possint, 821. 822. ex quibus parum proficere detur, 957. quinam accurate legi nequeant nisi ab artis inveniend perito, 962
- Librorum* differentia, 743
- Librorum lectio.* Quomodo instituenda, 902. & seqq.
- Librum* more Geometrico quinam scribere possit, 1174
- Libertas philosophandi.* Definitio, 151. D. cui concedenda, 166. D. exemplum singulare, not. 166. D. quando nullum inde periculum nascatur, 167. D. num progressui scientiarum utilis, 169. D. damna inde sequentia, not. 169. D.
- Limitata propositio.* Definitio, 1106
- Linguarum authenticarum* in S. S. interpretanda usus, 978
- Logica.* Fundamentum, 60. D. definitio, 61. D. 1. num sit demonstranda, 2. distincta applicatio, 24. quando primo loco & quomodo pertractanda, 88. 90. 91.. D. principia, 89. D. quando postponenda, 90. D. usus in condenda historia, 786. usus in vero a falso discernendo, 545. cur Autor eam primo loco tractet, 91. D. num præbeat cri-

- criterium veritatis sufficiens, 546. in cō-  
denda historia, 786. quænam illius  
præcepta ad praxin vitæ serviant, 1215
- Logica* ejus lectio præparatoria, 1227. 1228  
cognitio scientifica quomodo com-  
paretur, 1229  
studium cur philosophico præmit-  
tendum, 88. D.  
theoria & praxis cur docenti necessa-  
ria, 1143
- Logica artificialis.* Necessitas, 20. quando  
nulli usui, 21. & seqq. quinam de ejus  
inutilitate conqueruntur, 25. & seqq.
- Logica artificiales docens.* Definitio, 10.  
differentia a naturali, 11. quando nulli  
usui, 21. & seqq. lapis lydius, 26 & seqq.  
quomodo perficiatur, 1233. quo studio  
comparetur, 1234
- Logica artificialis utens.* Definitio, 12. quo-  
modo comparetur, 1230. 1234. quomo-  
do perficiatur, 1233
- Logica naturalis.* Fundamentum, 5. de-  
finitio, & divisio, 6. insufficientia, 19.  
compendium, 58. quomodo clarior &  
ejus usus expeditior fiat, 1231
- Logica naturalis connata.* 6. diversi gradus, 13  
*acquisita.* 6. diversi gradus, 14. & seqq.
- Logica naturalis docens.* Fundamentum, 7.  
definitio, 8. perversa quænam, 17
- Logica naturalis utens.* Definitio, 9. quæ-  
nam perversa, 18
- Logica probabilium,* 593
- Logomachia.* Definitio, 1029. medium eam  
evitandi, 1030. 1031
- Luminare* quid dicatur in sacris, *not.* 158. D.  
*not.* 658. 659. 972
- Lux.* Definitio, *not.* 150
- M***ajor propositio* 340. in prima figura sit  
universalis, 366
- Matheſis* unde objecti sui cognitionem at-  
que axiomata deriveret, 12. D. *usus, not.* 14. D.
- Matrimonium.* Definitio, *not.* 947
- Mechanica animalium,* 84. D.
- Medicinæ philosophia,* 39. D.
- Memoria lapsus* quomodo errorem pariat, 634
- Mens* sensu percipit externo, 30. se ipsam  
percipit sensu interno, 31. imaginatur  
absentia, 32
- Mens alterius* quando intelligatur, 117. 118.  
quando non, 119. quando pervertatur,  
120. quando difficulter intelligatur, 134
- Metaphysica.* Definitio, 79. D. partium or-  
do, 99. D. cur philosophiæ practiciæ  
præmittenda, 93. D. cur Physiçæ præ-  
mittenda, 95. D.
- Meteorographia,* *not.* 746
- Meteorologia,* 80. D.
- Methodi differentialis* significatus diversus,  
*not.* 158. D.
- Methodus.* Definitio & divisio, 885. qua-  
nam Autor utatur, 886. quinam accura-  
tam dijudicare possit, 1176
- Methodus analytica.* Definitio, 885. regulæ,  
887. unde lucem mutuetur, 888
- Methodus convincendi* docenti utilis, 1132
- Methodus erotemtica,* 1117
- Methodus geometrica* seu mathematica ea-  
dem cum philosophica, 139. D. 793
- Methodus mixta,* 889
- Methodus philosophica.* Definitio, 115. D.  
leges, 116. D. & seqq. lex suprema, 133. 134.  
D. ejus praxis unde pendeat, 135. D.  
damaum ex neglectu ortum, 136. &  
seqq. D. identitas cum mathematica,  
139. D. num ferat veritati revelatæ con-  
traria, 163. D. num virtuti contraria, 164  
D. num.

- D.** num statui publico contraria, 165. **D.**  
ab objectionibus liberatur, *not.* 169. **D.**  
*Methodus refutandi* docenti utilis, 113  
*Methodus scientifica*, 792  
*Methodus syllogistica* est evidentior erote-  
matica, *not.* 1117  
*Methodus synthetica.* Definitio, 885. regula,  
887  
*Metus.* Definitio, *not.* 149  
*Microscopiorum* usus in formandis notioni-  
bus distinctis, 684  
*Minor propositio*, 340. quando infinita, 377.  
quid ex falsa concludatur, 541  
*Mixta* quomodo describenda, 775  
*Modi* non ingrediuntur definitionem, 177  
*Modi* argumentandi in demonstratione, 555  
*Modi prædicandi* universaliter, 249. & seqq.  
254. & seqq.  
*Modi syllogismorum.* Definitio, 345. no-  
mina in prima figura, 373. 375. in secun-  
da, 383. in tertia, 389. 390. 391. 393  
*Modi syllogismorum hypotheticorum*, 409.  
nomina, 410. compendium loquendi in  
iis, 411  
*Modorum* possibilitates, 156. quod defini-  
tionem constituent, 176. quænam defi-  
nitionem ingredi possint, 178  
*Modus.* Definitio, 67. quomodo de ente  
prædicetur, 172. cur definitionem in-  
gredi nequeat, 177. observatio, 672. 673.  
675. 676  
*Modus prædicandi.* Fundamentum, 219.  
diversitas, 220 & seqq.  
*Moraliter impossibilis resolutio*, *not.* 875  
**N**arrare, quid ad id requiratur, 615  
*Narrationis falsa* rationes quomodo  
detegantur, 812  
*Negatio.* Definitio, 205. signum, 207. 210  
*Negativa* ex meris nil sequitur, 357  
*Nomina modorum*, 373. 383. 390. 393. 410.  
significatus eorum essentialis, 374. co-  
rum usus, 375. monitum de iis, 402  
*Nominibus* discernenda quæ sint, 145. **D.**  
*Notæ.* Definitio, 79. unde desumenda, 100.  
sufficientia unde demonstratur, 102. ge-  
neris & differentiæ specificæ, quando eas  
permisceri liceat, 188. quando non, 189.  
quomodo superflua ex definitione ar-  
ceantur, 680  
*Notio.* Definitio, 34. differentia formalis,  
77. materialis, 103. quando in memori-  
am revocatur, 116. respondens iudicio  
affirmativo vero, 520. iudicio negativo,  
521. quænam falsa, 547. quænam vera,  
547. per reflexionem, 717. a possibili-  
bus, 718. & reliquæ ejusdem possibilira-  
tes, 719. seqq. ex praxi, 930  
*Notio abstracta.* Fundamentum, 109. De-  
finitio, 110  
*Notio abundans.* 93  
*Notio adequata.* Fundamentum, 94. de-  
finitio, 95. gradus, 96. mutatio in ade-  
quatam, 99. quomodo obtineatur, 683  
*Notio clara.* Fundamentum, 78. definitio, 80.  
quomodo obscura fiat, 88  
*Notio completa.* Fundamentum, 91. defi-  
nitio, 92. quando incompleta fiat, 97. quæ-  
nam ei sufficiant, 185  
*Notio complexa.* Fundamentum, 104. defi-  
nitio, 105. objectum, 106  
*Notio communicabilis*, quomodo fuit,  
124. 125  
*Notionum communium* fundamentum, 112.  
definitio, 113  
*Notio concreta.* Fundamentum, 109. defi-  
nitio, 110  
*Notio confusa.* Fundamentum 87. defi-  
nitio, 88. cum sit determinata, 126. quo-  
modo

|  |                |
|--|----------------|
| modo obtineatur, 688. & seqq. communicatio,  | 767. 768. 1120 |
| <i>Notio deceptrix.</i> Num vera notio, 38. species diversæ, 135. 136. quomodo errorem pariat, 629. usus in interpretando, 936. quinam eas dijudicare possit,  | 1151           |
| <i>Notio determinata.</i> Definitio, 123. quomodo fiant determinatæ & communicabiles,  | 124. 125       |
| <i>Notio distincta.</i> Fundamentum, 87. definitio, 88. signum, 89. 90. quando in confusam abeat, 98. usus, 101. cuinam communicari possit, 121. 121. 122. antea parum curæ cordique fuere eruditis, not. 159. quis eam consequi valeat, 1140. quomodo formetur, 671. 672. 682. pro confusa in interpretando substituenda, 929 |                |
| <i>Notio inadæquata.</i> Fundamentum, 94. definitio, 95. quomodo obtineatur, 691   |                |
| <i>Notio incompleta.</i> Fundamentum, 91. definitio,   | 92             |
| <i>Notio negativa.</i>   | 211            |
| <i>Notio obscura.</i> Fundamentum, 78. definitio, 80. gradus, 83. quando obtineatur, 692. & seqq. cur non sit determinata, 126   |                |
| <i>Notio positiva,</i>   | 211            |
| <i>Notio possibilis &amp; impossibilis,</i>  | 519            |
| <i>Notio simplex.</i> Fundamentum, 104. definitio, 105. objectum,  | 107            |
| <i>Notio singularis.</i> Fundamentum, 112. definitio,  | 113            |
| <i>Notio vera.</i> qui eam a deceptrice discernere valet,  | 1151           |
| <i>Notio universalis.</i> Definitio, 54. quomodo formetur, 55. quomodo sensu duce acquiratur,  | 678            |
| <i>Notiones.</i> Variæ, 519. seqq. quomodo formantur, 716. quomodo ex autorum exemplis & probationibus derivandæ, 920. quomodo realitas adstruatur, 717. & seqq.   |                |
| (Wolffii Logica)   |                |
| quænam a praxi suggerantur, 980. & seqq. quænam in S. S. supponantur, 971. 972   |                |
| <i>Notiones in historia natura interpretanda</i> unde hauriendæ,   | 931. & seqq.   |
| <i>Notiones in Scriptura S.</i> quomodo eruantur,  | 971. & seqq.   |
| <i>Notionis genuinæ in deceptricem degeneratio,</i>  | 137            |
| <i>Notionum imaginariarum in interpretando</i> usus,   | 937            |
| <b>O</b> bscurus liber. Definitio, 820. cuinam talis videatur,   | 913            |
| <i>Observationes</i> cur literis consignandæ, 709  |                |
| <i>Observandi</i> modus quando describendus,   | 770            |
| <i>Oeconomia animalis,</i>   | 84. D.         |
| <i>Oeconomica.</i> Fundamentum, 66. D. definitio, 67. D. quo loco tractanda, 104. D.   |                |
| <i>Ontologia.</i> Fundamentum, & definitio, 73. D.   |                |
| <i>Opera artis ad philosophiam spectant,</i>   | 40. D.         |
| <i>Operationum mentis regule</i> num dentur, 3. an eas mens intelligat, dum sequitur, 4. numerus, 52. ordo,  | 53             |
| <i>Opinio.</i> Definitio, 602. notio relativa, 603. mutabilitas, 604. cur probabilis falsa esse possit,  | 605            |
| <i>Opponens.</i> Definitio, 1084. officium, 1087. 1089 & seqq. 1110. quinam ejus personam tueri possit,  | 1208           |
| <i>Oppositio</i> quando locum non habeat, 1094. unde ejus initium faciendum,   | 1096           |
| <i>Oppositionis</i> modus in disputando quomodo innotescat,  | 1097           |
| <i>Opus completum &amp; incompletum,</i>   | 815            |
| <i>Ordo</i> per omnem philosophiam,  | 132. D.        |
| <i>Ordo definitionum,</i>  | 119 D. 880     |
| partium philosophiæ,   | 87. D.         |
| historiæ naturalis,  | 808            |
| partium Metaphysicæ,   | 99. D.         |
| T t t t t  | <i>Ordo</i>    |

# Index Rerum & Verborum.

|  |              |   |              |
|--|--------------|---|--------------|
| <i>Ordo problematum,</i>                             | 876          | <i>Philosophia ex perimentalis</i>                  | not. 107. D. |
| propositionum,                                       | 120. 121. D. | <i>Philosophia civilis</i> unde notiones suas deri- | 12. D.       |
| scripti dogmatici, quomodo agno-                     |              | ver,  |              |
| scatur,  | 827. 828     | <i>moralis</i> unde notiones suas deriver,          | 12. D.       |
| <i>Ordo mixtus.</i> Definitio, 830. usus, 833.       |              | <i>Philosophia practica.</i> Fundamentum, 60. D.    |              |
| monitum de eodem,                                    | 882          | definitio, 62. D. principia metaphysica,            |              |
| <i>Ordo naturalis.</i> Definitio, 829. usus, 832.    |              | 92. D. cur post Metaphysicam tractan-               |              |
| <i>Ordo scholæ.</i> Definitio, 829. usus, 831        |              | da,   | 93. 105. D.  |
| <i>Origo errorum,</i>                                | 626. & seqq. | <i>Philosophia practica universalis.</i> Funda-     |              |
| <i>Oryctographia,</i>                                | not. 81. D.  | mentum, 69 D. definitio, 70. D. cur E-              |              |
| <i>Oryctologia,</i>                                  | 81. D.       | thicæ, Oeconomica & Politicæ præmit-                |              |
| <b>P</b> <i>aralogismus.</i> Definitio, 636. quomodo |              | tenda,  | 103. D.      |
| detegatur,   | 637          | <i>Philosophia prima.</i> Definitio,                | 73. D.       |
| <i>Pars debilior</i> syllogismi. Definitio, 359.     |              | <i>Philosophia partes,</i> 56. D. num plures recen- |              |
| cur conclusio eandem sequatur,                       | 360          | fitis, 86. D. ordo illarum,                         | 87. D.       |
| <i>Particula negandi.</i> quomodo propositi-         |              | <i>Philosophia</i> an compotes fieri queamus, 38.   |              |
| nem ingrediatur,                                     | 210          | D. partium ordo,                                    | 87. D.       |
| <i>Particularia,</i> ex meris nihil sequitur, 354    |              | <i>Philosophia &amp; Theologia</i> contradictio cur |              |
| <i>Pathologia physica,</i>                           | 84. D.       | demonstranda, non obtrudenda, 168. D.               |              |
| <i>Periculum errandi</i> unde oriatur, 650. 653.     |              | <i>Philosophia prima</i> notiones unde derivan-     |              |
| 655. 660. quomodo evitetur,                          | 661          | da,   | 12. D.       |
| <i>Persecutor.</i> Definitio, 1051 cur in interpre-  |              | <i>Philosophicas controversias</i> quinam dijudi-   |              |
| -tando iniquus, 1067. defensio contra                |              | care nequeat,                                       | 52. 53. D.   |
| eum,   | 1077. 1078   | <i>Philosophur.</i> Definitio, 46. D. gradus, 47.   |              |
| <i>Perpicuus liber,</i>                              | 820          | 48. D. ejus circa terminos receptos officii         |              |
| <i>Persuasio.</i> Definitio, 1001. rationes, 1002    |              | um, 147. D. cur suo stare debeat judicium           |              |
| <i>Phænomenon.</i> Definitio,                        | not. 610     | 156. D. quatenus ab aliis tradita admittit          |              |
| <i>Phænomenorum artis</i> utilitas,                  | 25. D.       | 157. D. cur a refutandis aliis abhorret             |              |
| <i>Philosophia.</i> Definitio, 29 D. officium, 31.   |              | 162. D. quinam labor præcipuus, 144. D.             |              |
| 32. 33. D. an detur, 37. D. est in nostra            |              | <i>Physica.</i> Definitio, 59. D. fundamentum       |              |
| potestate, 38. D. non est contemnenda,               |              | partium, 75. D. principia, 94. D. cur Te-           |              |
| 45. D. cur notio ejus a fastu revocet, 49.           |              | leologiæ præmittenda, 100. D. cur post              |              |
| D. objectum, 55. D. partes primariæ, 56.             |              | Metaphysicam tractanda, 95. 106. D.                 |              |
| D. cognitio historica, 50. 51. D. partes             |              | <i>Physica dogmatica</i> quænam dicatur, 108. D.    |              |
| latentes, 86. D. tractatio accurata, 116. &          |              | <i>Physica experimentalis.</i> Definitio, 107. D.   |              |
| seqq. D. termini, 116. D. principia, 117.            |              | cur dogmaticæ præmittenda, 109. D.                  |              |
| D. ordo in ea adhibendus, 132. D. quo-               |              | <i>Physica generalis.</i> Definitio,                | 76. D.       |
| modo tradenda, not. 54. D. num metho-                |              | <i>Physiognomus,</i>                                | not. 753     |
| dum suam a Mathesi mutuetur, 139. D.                 |              | <i>Physiologia,</i>                                 | 84. D.       |
| <i>Philosophia artium liberalium</i>                 | 72. D.       | <i>Phytologia,</i>                                  | 83. D.       |
|  |              |   | Pla-         |

|  |          |   |             |
|--|----------|---|-------------|
| <i>Plagiarius,</i>   | 890      | <i>Premissa syllogismorum,</i>  | 335         |
| <i>Pneumatica,</i>   | 79. D.   | <i>Preparatio ad lectionem scriptorum scientificorum,</i>   | 964.965.966 |
| <i>Penitere.</i> quid sit in Deo   | not. 976 | <i>Preparatio ad demonstrationem,</i>   | 563         |
| <i>Poëtica philosophica,</i>   | 72. D.   | <i>Principia</i> quando incerta, 841. quænam in philosophia adhibenda, 117. D. quænam convincendo nota supponenda, 991.992      |             |
| <i>Politica.</i> Fundamentum, 63. D. definitio 65. D. quo loco tractanda,  | 104. D.  | <i>Principiorum ignorantia</i> quomodo tollatur,  | 1139        |
| <i>Poni.</i> quid dicatur,   | 406      | <i>ignarus</i> cur convinci nequeat,  | 1192        |
| <i>Possibilit.</i> definitio, 518. notio,  | 519      | <i>Principia demonstrandi,</i>  | 561. 562    |
| <i>Possibilitates rei intrinsecæ,</i> 155. quando inter attributa referenda, 157. quando inter modos, 158. quando definitionem ingreditantur, 182. quando non,   | 178      | <i>Principia precaria.</i> Definitio, 600. notio relativa, 601, 843. quinam iisdem utantur 844. quando sumantur, 860. & seqq.   |             |
| <i>Possibilitates modorum &amp; relationum,</i>  | 156.     | <i>Principia scientiarum</i> ex historia derivanda,   | 771         |
| quot definitionem ingredi debeant. 176   |          | in <i>Principiis</i> quinam erret,  | 632         |
| <i>Postulata.</i> Definitio, 269. cur certa, 572. qui ea dijudicare valeat,  | 1156     | <i>Principium individuationis,</i>  | 75          |
| <i>Præcipitancia in judicando.</i> Definitio, 1003. quomodo vitetur, 1009. 1010. cur periculo errandi obnoxia, 660. quomodo in judiciis de causis effectuum vitanda, 707. quinam eam in judicando evitare queat,                           | 1195     | <i>Probabile</i> judicium de genere & specie, 582   |             |
| <i>Prædicata entis</i> absoluta, 61. conditionata, 62. universalia absoluta, 257. universalia hypothetica,   | 258      | <i>Probabilis applicatio</i> definitionis, 581. propositionum certarum,   | 590         |
| <i>Prædicata universalia,</i> quomodo universaliter prædicentur,   | 248      | <i>Probabilis probatio.</i> Definitio, 587. differentia a demonstratione,   | 588         |
| <i>Prædicatorum constantium</i> discrimen, 63  |          | <i>Probabilis propositio</i> cur falsa esse possit, 591   |             |
| <i>Prædicatum.</i> Definitio, 200. determinatio in propositionibus philosophicis, 130. D. determinatio in oppositis, 292. quando apparenter idem 324. quando apparenter diversum. 329. cur conveniar subiecto, 375. qui hoc cognoscat, 576 |          | <i>Probabilitas.</i> Definitio, 578. quando ejusdem convincamur, 984. quinam eam dijudicare valeat,                             | 1160. 1161  |
| <i>Præjudicium.</i> Definitio, 1011. quomodo vitetur, 1011. quinam id evitare queat, 1196  |          | <i>Probabilitas conclusionis</i> syllogismorum,   | 585. 586    |
| <i>Præjudicium autoritatis.</i> Definitio, 1013. quomodo vitetur,  | 1014     | fidei,  | 614         |
| <i>Præjudicium nimie confidentiæ.</i> Definitio, 1015. quomodo vitetur,  | 1016     | hypotheseos philosophicæ, 608. qui de iis judicare valet,   | 1162. 1163  |
|  |          | propositionis a subiecto derivata, 589  |             |
|  |          | <i>Probabilius</i> quidnam, 579. cur a certo distinguendum,   | 125. D.     |
|  |          | <i>Probatio.</i> Definitio, 496. divisio, 497. insufficient, 599. quando sine probatione sumatur, 860. seqq. analysis, 958. 959 |             |
|  |          | <i>Problema.</i> Definitio, 276. resolutio quando completa, 869. superflua contineat, 870                                       |             |
|  |          | T t t t t 2   | quan-       |

# Index Rerum & Verborum.

quando vera, 871. 872. falsa, 873. impossibilis, 874. a praxiali aliena, 875. ordo eorum, 876  
*Progressus scientiarum unde pendeat*, 169. 170. D.  
*Preluxum scriptum*, 819  
*Propositio*. Definitio, 41. quot voces ad eandem requirantur, 319. quales requiratur terminos, 321. quanam conceptibilis, 328. quanam inconceptibilis, 328. quando hypothetice vera, 334. omnis vel vera vel falsa, 366. quanam falsa, 371. quomodo more geometrico demonstraretur, 801. quando non satis intelligatur, 845. quando convincendo explicanda, 997. quanam refutari & impugnari possit, 1019. seq. cur explicanda, antequam refutetur, 1027. quanam in philosophiam recipienda, 1118. D. quando vera, 544. 509. & seqq. 515. 529. & seqq. quomodo a priori investigetur, 724. 725. a quonam defendi possit, 1206. a quonam in scripto scientifico intelligi queat, 1177. a quonam impugnari & refutari non potest, 1199. quando dijudicanda, antequam in vita applicetur, 1213. 1216. 1217. quanam definitionis loco esse possit, 1221. resolutio, 1128. explicatio & illustratio, 1129. unde determinationis inficientia agnoscatur, 1158  
*affirmativa*, 205. quando falsa, 514. 516. 517  
*categorica*. Fundamentum, 215. Definitio, 216. quæ conditio tacite in iis supponatur, 225. reductio ad hypotheticam, 226. requisita ad ejusdem veritatem, 583. applicatio ad vitam, 1223  
*composita*, 314  
*conceptibilis*, 328. quanam sit, 328  
*contraria*, 297. in contradictionem abiens, 302. repugnantia, 449. cur duæ non possint esse veræ, 529. 532. illarum falsitas unde innote-  
 scat, 530. quando duæ simul falsæ, 531  
*conversa*. Definitio, 282. quando convertibilis. 283. & seqq. unius ex altera illatio, 456  
*copulativa*, 315  
*cryptica*. Definitio, 312. unde oriatur, 313  
*definita*, 244  
*demonstrata* cur vera, 944. 557  
*demonstrativa*. 261. 262  
*determinata*. Definitio, 320. unde agnoscatur, 955. 956  
*disjunctiva*, 316  
*hypothetica*. Definitio, 218. fundamentum, 217.

reductio ad categoricam, 227. quando vera, 534. 584. applicatio ad vitam, 1224  
*identica*. Definitio, 213. quanam tales sint, 214. 223. sunt axiomata, 270. usus in syllogismis, 364  
*inconcepcibilis*, 328  
*indefinita*, 244. quando contradictoria, 308. 309  
*indemonstrabilis*. Fundamentum, 261. Definitio, 262. quomodo agnoscatur, 263. & seqq.  
*demonstranda*, quando demonstrationem ingredi queat, 881  
*infinita*. Fundamentum, 208. Definitio, 209  
*irrestricta*, 1105  
*limitata*, 1106  
*major & minor*, 340  
*negativa*, 205. earum nexus, 454. quando vera, 515. criterium, 517  
*obliquè particularis*, 247  
*obliquè universalis*, 246  
*particularis*, 243. cur illarum nulla contradic-  
 tio, 298. earum nexus, 455  
*particulariter affirmans*, quando vera, 510  
*probabilis*, 578  
*restringenda*, 1105  
*simplex*, 314  
*singularis*, 241. quando vera, 511  
*subalternans*, 299. ejusdem cum universali ne-  
 xus, 451  
*subcontraria*, 299  
*theoretica*. Definitio, 266. Fundamentum, 265  
*universalis*, 242. cur duæ non sint contradic-  
 toriæ, 296  
*universalis apparens*, 246  
*universaliter affirmans*, quando vera, 509  
*vaga*, 310  
*vera* quando universaliter affirmans, 509  
*Propositiones*, quæ in Philosophia admittenda, 111.  
 D. quæ memorie mandandæ, 954. apparenter eædem, 325. apparenter diversæ, 331. in scripto  
 scientifico, quanam intelligere possit, 1177. in  
 casu dubio, quanam eas interpretari possit, 1178.  
 quanam definitionum loco servant, 1221  
*Propositiones aequivalentes*. Definitio, 278. quæ-  
 nam tales sint, 279. seqq. illarum nexus, 445  
*Propositiones certæ a posteriori*, 567. a priori, 168.  
 quanam illarum certitudo. 569. applicatio  
 probabilis, 590  
*contradictoria*. Definitio, 288. quanam a non-  
 nullis dicantur, 318. quanam tales sint, 394.  
 & seqq. 298. 391. 393. & seqq. eorum nexus, 447  
*Propo-*



*Propositiones contrarie.* Di. finitio, 197. cur non sint simul veræ, 529 § 30. quando simul falsæ, 531. earum repugnantia, 449  
*incertæ* quando non intelligantur, 845  
*oppositæ* Definitio, 288. significatio vulgaris, 300.  
 ratio, 289. seqq. quomodo dijudicentur, 293  
*philosophicæ.* Forma, 121. 122. D. quomodo prædicatum in its determinetur, 130. D.  
*præctica.* Fundamentum, 265. Definitio, 266  
*propria,* 351  
*pure revelatæ* quatenus demonstrabiles, 980  
*Propositiones S.S.* quatenus demonstrabiles, 979. 980  
*Propositionis veritas,* quando agnoscatur, 516. § 17  
*Propositionis negativæ veræ* consequens, 518. notio subiecti, 533. 548  
*Propositionum* applicatio probabilis, 590.  
 diversitas, 259  
 divisio in Mathesi usitata, 260. seqq.  
 examen, 954  
 ordo, 120. D.  
*Propositionum conversionis* usus singularis, 1222  
*Propositionum negatarum* nexus, 454  
*Proprietates communes & essentielles.* Definitio, 66  
*Prosyllogismus,* 493  
*Providentia divina* ex historia, 943  
*Psychologia,* Definitio, 58. D. principia, 98. D.  
*Psychologia Empirica.* Fundamentum & Definitio, 111. D. 746  
*Psychologia rationalis,* 112. D.  
*Pueri uter ore,* not. 641  
**R**atiocinatio. Definitio, 50. genera, 48. 49.  
*Ratiocinatio mixta composita.* Definitio, 495  
*poly syllogistica.* Definitio, 494  
*Rationes* cur subiectum prædicato conveniat, quænam sint, 575. quinam eas cognoscant, 576  
*Rationes diversæ* ejusdem sententiæ, 159. D.  
*Ratio insufficiens* quando sit, 577  
*Rationis & experientie* connubium, 1232  
*Ratio extrinseca.* Definitio, 1004. quando non attendenda, 155. D. ejus in impugnando usus, 1055  
*Rationes falsæ narrationis* quomodo detegantur, 812  
*Ratio intrinseca* Definitio, 1004. quales sint, 1005  
*Receptus significatus,* 140  
*Refutandi* modus præstantissimus, 1033. 1034.  
 a posteriori, 1053. seqq.  
*Refutando* philosophus operam perdit, 162. D.  
*Refutare* alterum quinam possit, 1197. 1205  
*Refutatio.* Definitio, 1017. species, 1023. 1024.  
 quando instituenda, 1027. 1028. ubi non,

1032. modi, 1033. & seqq. 1039. 1053. 1054.  
 requisita ad refutandum, 1037. quando eb-  
 tineat ob incommodam dictionem, 1032.  
 quando sine successu tentetur, 1038  
*Refutatio indirecta.* Definitio, 1023. quando spur-  
 ria, 1040. multiplex, 1044. quando absolu-  
 ta, 1041  
*Refutatus* quando errorem agnoscat, 1021  
*Regule logicæ,* illarum usus, 545. sufficientia, 546  
*Regule operationum mentis* dantur, 3. num-  
 mens eas sequatur, 4. logicæ, quis eas distin-  
 ste applicare potest, 24  
*Relationum possibiliter,* 156. quot simul sumtæ  
 definitionem constituent, 176  
*Removeri* quid dicatur, 406  
*Repugnare* quænam dicantur, 310. quænam sibi  
 repugnent, 311. quæ non repugnent, 535  
*Requisita ad veritatem,* 573  
 definitionum, 580  
 hypotheseum philosophicarum, 607  
 propositionis hypotheticæ, 584  
 propositionis categoricæ, 583  
 ad docendum, 1119  
 ad refutandum alterum, 1037  
 extrinseca ad inveniendum, 1145  
*Rerum notitia* ad praxin vitæ utilis quomodo ex-  
 perientia comparetur, 1226  
*Resolutio* moraliter impossibilis, not. 875  
*Respondere* ad argumentum, 1099  
*Respondens.* Definitio, 1084. officium, 1084.  
 1099. & seqq. 1108. 1112 & seqq. quinam  
 ejus personam tueri possit, 1209  
*Restrictio,* 1105  
*Rhetorica philosophica,* 72. D.  
 1. **S**amuelis I, 29. not. 976  
*Scientia.* Definitio, 30. D. 594. cur certam  
 pariat cognitionem, 595. quomodo compa-  
 retur, 596. & seqq. progressus ejus unde pen-  
 deat, 169. 170. D. incrementa unde, 170. D.  
*Scire,* quantum sciamus, 598. 603  
*Scripti dogmatici continue orationis* analysis logi-  
 ca, 945  
*Scriptum,* unde dijudicandum ejus genus, 813.  
 num sit completum seu incompletum, 816. seqq.  
*Scriptum apologeticum.* Definitio, 1079. regulæ,  
 1080. quando necessarium, 1082. quinam  
 id condere possit, 1207  
*Scriptum completum,* quando incompletum eva-  
 dat, 818  
 T t t t t 3  
 Scriptum

- Scriptum dogmaticum* quomodo dijudicetur, 813.  
 & f. qq. quando lectu facile, 946. vid.  
*liber dogmaticus.*
- dogmaticum historicum* quinam condere  
 possit, 1171. 1172. prepositiones in  
 eo collocandæ, 847. 863. & seqq. quis  
 legere & intelligere possit, 1180. vide  
*liber dogmaticus historicus.*
- eristicum* cur intelligentibus exosum,  
 1081
- historicum*, quænam in eodem observan-  
 da, 760. quomodo legendum, 911.  
 939. quando completum, 810. 811.  
 quomodo dijudicetur, 802. & seqq. qui-  
 nam id condere possit, 1164. 1165.
- inutile*, 825
- polemicum*. Definitio, 1079. regulæ,  
 1080. quinam tale condere possit,  
 1207
- proximum*. Definitio, 819
- scientificum*, quænam propositiones ei-  
 dem inferendæ, 866 & seqq. quomo-  
 do conditur, 790. & seqq. illorum  
 interpretatio, 910. 911. usus in præ-  
 cavendis logomachiis, 1031. quinam  
 condere possit, 1173. & seqq. vid. *li-  
 ber scientificus.*
- superfluum*, 819
- utile & inutile*. Definitio, 825. quando  
 tale sit, 826
- Scriptura sacra*, quænam ejus propositiones de-  
 monstrari possunt, 977
- Scripturæ S. interpretatio* non confundenda cum  
 veritate revelata, not. 163. D. quatenus a re-  
 gulis Logicæ pendeat, 968. & seqq. quinam  
 ei sufficiat, 1185
- Scripturam sacram* quinam intelligat, 969. qui-  
 nam eandem explicare queat, 1186
- Sensus* quomodo eruat in scriptis scientificis,  
 910. seqq.
- Sensus erroneus* dubius auctori non tribuendus, 921
- Sensus* usus, 1. 2. D. 30. 31
- Sententia* quænam eligenda, 154. 155. D. diver-  
 se ratio, 159. D. num pars adoptari possit,  
 integra missa, 166. D.
- Servius philosophandi*. Definitio, 152. D. cur  
 methodo philosophicæ diversa, 153. D.
- Servus* quinam sit Paulus, not. 972
- Significatus idem* cum diversitate notionum con-  
 sistens, 141. 142. & seqq.
- Significatus termini* quando diversus, 144. quan-  
 do fixus, 127. 130. quando mutetur, 147
- Significatus improprius*, 146
- proprius*, 138. quomodo detegatur, 150
- Significatus vagus* termini, 131. quando ad fixum  
 reducitur, 144. D.
- Significatus verborum receptus*, 122. 147. D. 140.  
 quando perperam mutari credatur, 142. D.  
 cur non mutandus, 147. D.
- Simplex apprehensio*. Definitio, 33. an absque no-  
 tione esse queat, 35. & notio cur pro syno-  
 nimis habeantur, not. 35
- Singularia*, ex meris aliquid sequi potest, 355
- Sol stare* dicitur, & quid significet, not. 972
- Solida tractatio*. Definitio, 898. cur fallat de ea  
 judicia, 899. discrimen a superficialia, 900
- Sophisma*, 636. ortus, 649
- Sophista*, & *Sophistica*. Definitio, not. 636
- Sorites*. Definitio generalis, 474. quando de-  
 monstratio, 554
- Sorites Categoricus*. Fundamentum, 466. defini-  
 tio, 467. resolutio in categoricos, 468. usus, 469
- Sorites crypticus*, 475
- demonstrativus*, 554
- hypotheticus*. Definitio, 471. fundamentum,  
 470. resolutio, 472. usus, 473
- Species*. Definitio, 44. divisio, 47. notio, 183.  
 ubi ex existant, 56. quomodo determinentur,  
 70. quomodo distinguantur, 71. differentia,  
 72. quomodo definiantur, 172. & seqq. quomo-  
 do agnoscantur, 179. quando probatio-  
 nem ingrediatur instar conditionis, 239.  
 quando probabiliter cognoscatur, 582. præ-  
 dicata conditionata, 233
- Speciei notio* quid involvat, 183. quomodo re-  
 peritur, 711. 714
- Speciei predicata* singulis individuis propria,  
 232. 235
- conditionata* quomodo individuis appli-  
 canda, 233
- a *Specie ad genus* argumentatio erronea, 640. 641
- a *Specie una ad alteram* argumentatio erronea, 642
- Species infima*, 47
- Stare solem* quid significet, not. 972
- Studii legitimum* initium, 1227
- mathematici* ad philosophandum utilitas,  
 not. 159. D.
- Stylus philosophicus*. Definitio, 140. D. *suprema*  
*lex*, 141. D. simplicitas, 149. D.
- Stylus*

# Index Rerum & Verborum.

|   |   |
|---|---|
| <i>Stylus oratorius</i> cur ex philosophia prescribendus, 150. D.   | <i>Syllogismus simplex</i> , 361  |
| <i>Sul-j-ctum</i> . Definitio, 200. quoduplex, 240. quando apparet idem, 323. quando apparet diversum, 328. quando propositionem probabilem reddit, 589   | <i>universalis</i> , 342  |
| <i>Subjecti determinatio</i> . Definitio, 228. in oppositis, 291  | <i>Synecdoche</i> , not. 146  |
| <i>notio in propositione vera</i> , 533. 548  | <i>Synonymia</i> . Definitio, 330   |
| <i>Subreptionis virium</i> in experiundo, 668   | <i>Systema</i> , 889  |
| <i>Subsumtio</i> , 362  | <b>T</b> <i>heologia</i> . Definitio, 71 D. principia, 113. D. cur physice postponenda, 114. D.   |
| <i>Summationes syllogismorum</i> , 335  | <i>Telecopium</i> usus in notionibus distinctis formandis, 685  |
| <i>Superficialia tractatio</i> . Definitio, 898. cur falsa de ea iudicia, 899. discrimen a solida, 900  | <i>Teleologia</i> . Definitio, 85. D. usus in cognitione Dei, 101. D. an post Theologiam naturalem tradenda, 102. D.  |
| <i>Superflui</i> . Definitio, 819   | <i>Tentamen defensionis</i> . Definitio, 1060   |
| <i>Superiorum</i> . Definitio, 476  | <i>Termini</i> ad definitionem requisiti, 160. cur debeant esse clari, 163. 164. 165  |
| <i>Syllogismus</i> . Definitio, 332. partes, 333. regula, 334. 337. 338. 354. & seqq. 360. fundamentum, 353. quomodo a cryptis liberandus, 442. concatenatio, 492. quando conclusio vera, 537. quando falsa, 538. 539. quando ex præmissis non sequatur, 540. 541. usus indispensabilis in demonstrando, 560. cur in tertia figura minus evidentes quam in prima, 599. usus in disputando, 1095 | ad propositionem requisiti, 321   |
| <i>affirmans</i> , 341  | in philosophia admittendi, 116. D.  |
| <i>biformis</i> . Definitio, 489. fundamentum, 487. modus, 488. in simplicibus resolutio, 490. cur sit compendium argumentandi, 491   | <i>Terminus</i> an philosophia obscuratur, 148. D.  |
| <i>categoricus</i> , 361  | <i>Terminorum combinatio</i> quoduplex, not. 41   |
| <i>categoricus multiplex</i> . Definitio, 484. varietas, 485. resolutio in plures, 486  | <i>usus in abstractionibus</i> , 122  |
| <i>compositus</i> , 403   | in notionibus determinatis, 124   |
| <i>crypticus</i> . Definitio, 365. quomodo a cryptis liberetur, 442. & seqq.  | <i>Terminus</i> . Definitio, 36. significatus, 37. quando vagus, 131. quando eum intelligere nobis videamur, 132. quando significatus diversus, 144. 145. quando mutetur significatus, 147. quando duo sunt proprii significatus, 148. quando notionem in memoriam revocet, 116 |
| <i>crypticus compositus</i> , 443. quomodo a cryptis liberandus, 444  | <i>abstractus</i> , 111   |
| <i>disjunctivus</i> . Definitio, 416. fundamentum, 417. 418. modi, 419. ad primam reductionem, 420  | <i>equivocus</i> , 326  |
| <i>hypotheticus s. conditionalis</i> . Definitio, 404. fundamentum, 407. 408. modi, 409. 410. ad primam figuram reductionem, 412. æquipollentia cum categoricis, 413. evidentiis, 414. quando reductionem ad primam figuram difficilis, 415. principium generale, 458. ortus varius, 446. 448. 450. 453. 457  | <i>barbarus</i> in philosophia retinendus, not. 147. D.   |
| <i>negans</i> , 341   | <i>clarus</i> . Definitio, 81. cur sit respectivus, 82. 84. quando fiat obscurus, 86. quando inanis, 149  |
| <i>particularis</i> , 342   | <i>communis</i> , 114   |
| <i>proprius</i> , 352. in prima figura, 376. in secunda, 386. in tertia, 394. a secunda & tertia ad primam reductionem, 387. 398  | <i>complexus</i> , 108  |
|   | <i>concretus</i> , 111  |
|   | <i>extremus</i> , 336   |
|   | <i>familiaris</i> , 132. 133  |
|   | <i>fixus</i> . Definitio, 119. necessitas in applicatione definitionum, 1225  |
|   | <i>homonymus</i> , 226  |
|   | <i>improprius</i> , 146   |
|   | <i>inanis</i> , 38  |
|   | <i>major</i> , 339  |
|   | <i>minor</i> , 339  |
|   | <i>medius</i> , 336   |
|   | <i>negativus</i> . Definitio, 211. quando propositionem negativam efficiat, 212   |
|   | <i>Terminus</i>   |

# Index Rerum & Verborum.

- Terminus obscurus.* Definitio, 81. quod sit relativus, 82. 84  
*philosophicus.* Definitio, 146. D. usus, 148. D. positivus, 211  
*proprius,* 138  
*simplex,* 108  
*singularis,* 114  
*vagus,* 129  
*Testis auritus.* Definitio, 616. quando oculato æquivalet, 617. quando obliuiscatur, 618. quando veritatem facti non assequatur, 619. 620  
*Testis ocularis,* 616  
*Theatrum machinarum,* 748  
*Theologia naturalis.* Definitio, 57. D. principia, 96. D. not. 107. D.  
*Theologia experimentalis,* 107. D.  
*Theorema.* Definitio, 275. eadem investigandi habitus, quomodo comparatur, 726. usus præcedentium, 768  
*Thesis.* Definitio, 1084  
*Tractatio solida & superficialis,* 898. seqq.  
*Tyro.* officium ejus in investiganda veritate, 742  
**V***Era* resolutio problematis, 871. 872  
*Verba.* breviter quomodo intelligantur, 903  
*a rebus* quinam discernere valeat, 1154. 1155  
*in refutatione vitanda,* 1056  
*Verborum & rerum confusio,* 834. 835  
*Verborum sensus verus* quomodo vindicetur, 1065  
*usus circumspiciendus,* 151  
*Verbis in alterum injuriis* quinam utatur in impugnatione, 1203  
*Veritas.* Definitio nominalis, 505. definitio realis, 513. requisita ejus, 573. quando certo cognoscatur, 574. quot modis investigetur, 663. quinam investigandæ par sit, 742. modi varii a priori eam investigandi, 724. & seqq. quinam eam a posteriori diducari valeat, 1159. latens cur nonnisi ex cognitionis eruatur, 738. quinam eam eruiere valeat, 739. 740. an disputando eruatur, 1116  
*historia naturalis* quomodo cognoscatur, 941  
*quomodo investigetur,* 805. 806. 807  
*hypothesum philosophicarum,* 607  
*hypothesica propositionis veræ,* 534  
*logica.* Definitio, 505. 513  
*Veritas narrationis,* 574. quomodo diducitur, 804. 940  
*propofitionis* quomodo agnoscatur, 516. 517  
*in quo consistat,* 566. unde a priori innoscatur, 544. 557. quando alterum ejus convincas, 987. 990  
*scripti historici,* quomodo examinetur, 803  
*Veritatem facti* quinam norit, 615. quomodo ea in animo obliteretur, 618  
*Veritates connexæ,* 877  
*Veritatis criticium.* Definitio, 523. in quo consistat, 524  
*Veritatis definitionum examen,* 949  
*Versatum mathematicarum* cognitio historica, 19. D.  
*Verum a falso* qui discernere possit, 1146. & seqq.  
*Verum* cur quis narrare nolit, 621  
*Via lactea* est stellarum innumerarum congregatio, not. 685  
*Vires veritatis inveniendæ,* 1135. & seqq. earum æstimatio quando probabilis, 1136. unde iudicatio specialis pendeat, 1142. & seqq.  
*Vitium formæ* in syllogismo. Definitio, 635. species, 638. & seqq. 643. seqq.  
*Vitium materiæ* in syllogismo, 630  
*Vitium subreptionis* in experiundo, 668  
*Vox.* Definitio, 36. quot voces ad propositionem requirantur, 319. usus varius in tertie mentis operatione, 499. & seqq. usus indispensabilis in ratiocinando, 504. in applicatione propositionum, 501. 502. & definitionum, 503  
*Voces* quænam in S. S. non pro insanibus habendæ, 971  
*Voces non definitæ* autorum quinam intelligere possit, 1171  
*Vocum compositio & divisio* quando vitium forme pariat, 639  
*Voluptas* ex cognitione philosophica profecta, 44. D.  
*Universalia prædicata* quomodo particulariter prædicentur, 248  
*Usus loquendi.* Definitio, 139  
*Usus vocum,* 499. seqq. cognitionis unde pendeat, 513  
**Z***oographia,* not. 746

INDICIS FINIS.















  
**A 3 9015 00390 711 3**  
University of Michigan - BUHR

UNIVERSITY OF MICHIGAN



3 9015 05981 4619

